

# ইস্পাত

নিকোলাই অস্ট্রভস্কি



চিরাযত গ্রন্থমালা

.....আ লো কি ত মা নু ষ চা ই.....

নিকোলাই অস্ত্রভস্কি  
ইম্পাত

অনুবাদ  
রবীন্দ্র মজুমদার

বিশ্বসাহিত্য কেন্দ্র প্রকাশনা ২২০

গ্রন্থমালা সম্পাদক  
আবদুদ্বাহ আবু সাঈদ

প্রথম বিশ্বসাহিত্য কেন্দ্র সংস্করণ  
কার্তিক ১৪১০ অক্টোবর ২০০৩

দ্বিতীয় সংস্করণ তৃতীয় মুদ্রণ  
কার্তিক ১৪১৯ অক্টোবর ২০১২



প্রকাশক

মো. আলাউদ্দিন সরকার

বিশ্বসাহিত্য কেন্দ্র

১৪, কাজী নজরুল ইসলাম এভিনিউ

ঢাকা ১০০০ ফোন ৯৬৬০৮১২ ৮৬১৮৫৬৭

মুদ্রণ

সুমি প্রিন্টিং প্রেস অ্যান্ড প্যাকেজিং

৯, নীলক্ষেত, বাবুপুরা, ঢাকা ১২০৫

প্রচ্ছদ

ধ্রুব এষ

মূল্য

চারশত টাকা মাত্র

ISBN-984-18-0219-8

---

HOW THE STEEL WAS TEMPERED by NIKOLAI OSTROVSKY : Translated by  
Revindra Majumder. Published by Bishwo Shahitto Kendro  
14, Kazi Nazrul Islam Avenue, Dhaka-1000 Bangladesh  
Cover Design : Dhrouba Esh. 2nd Edition 3rd Print : October 2012  
Price Tk. 400.00 only



## ইস্পাত : পাঠগ্রন্থতি

১৯১৭ সালের নভেম্বরে পৃথিবীতে একটি অবিস্মরণীয় ঘটনা ঘটেছিল। তার প্রচলিত নাম রুশবিপ্লব। আসলে তা ছিল পৃথিবীর প্রথম সফল সমাজতান্ত্রিক বিপ্লব। কার্ল মার্কস ও ফ্রেডারিক অ্যাঙ্গেলস মেহনতি ও নির্যাতিত শ্রেণীর মুক্তির যে যুগান্তকারী পথনির্দেশ দিয়েছিলেন, সেই তত্ত্বের সফল বাস্তবায়ন ঘটেছিল লেনিনের নেতৃত্বে সোভিয়েত ইউনিয়নে। অবশ্যই সেই বিপ্লবের পক্ষ-বিপক্ষ ছিল; অবশ্যই একদল এই ঘটনাকে মানবজাতির গৌরবোজ্জ্বল ঘটনাক্ষর বলে উল্লেখ করলেও অপরদল ঘটনাটিকে নিছক নৃশংসতা ভিন্ন আর কিছু বলে স্বীকার করতে নারাজ; অবশ্যই এই বিপ্লবের ফলে পৃথিবীর দেশে দেশে মেহনতি ও নির্যাতিত মানুষেরা যেমন মুক্তির স্বপ্ন দেখতে শুরু করেছিল, তেমনই তার বিরোধীরা সাম্যবাদকে অলীক বলে উড়িয়ে দিতে চেয়েছিল। তার পরেও, এটাই বাস্তবতা যে, ১৯১৭ সালের রুশবিপ্লবের পরে পৃথিবী আর আগের মতো থাকেনি। অর্থাৎ রুশবিপ্লবের প্রত্যক্ষ বা পরোক্ষ প্রভাব পড়েছে এর পক্ষে-বিপক্ষের সবার ওপরে তো বটেই, এমনকি তাদের ওপরেও—যারা নিজেদের দাবি করে ‘নিরপেক্ষ’ বলে।

এইরকম যুগান্তকারী বিষয় নিয়ে লেখক-শিল্পীরা আলোড়িত হবেন—এটাই স্বাভাবিক। আর রুশসাহিত্য তো বরাবরই মহৎ সৃষ্টিতে অগ্রগামী। আলেকজান্ডার পুশকিন, লেভ তলস্তয়, আস্তন চেখভ, দস্তয়ভস্কি প্রমুখ চিরায়তের মর্যাদা লাভ করেছেন আগেই। রুশবিপ্লব পথ খুলে দিল আরো অনেকের জন্য। কালজয়ী সাহিত্যসৃষ্টিতে এগিয়ে এলেন ম্যাক্সিম গোর্কি ও মায়াকোভস্কির মতো লেখকরা। তাদেরই সারিতে ‘ইস্পাত’ উপন্যাস নিয়ে স্থান করে নিয়েছেন নিকোলাই অস্তভস্কি।

১৯৮৬ সালেই এই উপন্যাসটি অনূদিত হয়ে গেছে ৪৮টি ভাষায়। প্রকাশিত হয়েছে ৪২টি দেশে। ১৯৩৪ সালে প্রথম প্রকাশিত ‘ইস্পাত’ পরবর্তী ৫২ বছরে বিক্রি হয়েছে দেড়কোটি কপিও বেশি। বর্তমান সময় পর্যন্ত হিসাব করলে এই সংখ্যাটি হবে অবিস্বাস্য।

মঙ্গলগ্রহে যাবার সময় সঙ্গে নিতে চাও কী কী? এই বিষয়ে সোভিয়েত তরুণদের মতামত জরিপ করা হয়েছিল। ফলাফল ছিল বিশ্বয়কর। সবচেয়ে বেশিসংখ্যক তরুণ-তরুণী সঙ্গে নিতে চেয়েছিল এককপি ‘ইস্পাত’ উপন্যাস।

এসব তথ্য জানলে স্বভাবতই মনে প্রশ্ন জাগে, কী এমন আছে এই উপন্যাসে—যা এই গ্রন্থবিমুখ সময়েও কোটি কোটি পাঠককে বাধ্য করে ইস্পাতের প্রতি আকৃষ্ট হতে? কলাটেকবল্যবাদীরা দাবি করেন, ‘ইস্পাত’ নিছকই একটি প্রপাগান্ডামূলক উপন্যাস, সে-দাবির যথার্থতা কতটুকু? নাকি এটি সত্যি সত্যিই একটি মহৎ উপন্যাস—যা লাভ করেছে ক্লাসিকত্ব বা চিরায়তের মর্যাদা?

কোন কোন গুণের কারণে একটি সাহিত্যকর্ম ক্লাসিক বা চিরায়ত হয়ে ওঠে তা অদ্যাবধি নির্ধারণ করতে পারেননি কোনো সাহিত্যতাত্ত্বিক। ঐতিহাসিকভাবে সীমায়িত হওয়া সত্ত্বেও কেন কোনো-কোনো রচনাকর্ম চিরায়ত হয়ে ওঠে তার মীমাংসা টিএস এলিয়টও করতে পারেননি। দাস্তের 'ডিভাইন কমেডি' কেন চিরায়ত রচনা, এই নিয়ে কোনো খই পাননি ট্রটস্কিও। একবার বলেছেন ঐতিহাসিক কারণে; পরক্ষণেই দাস্তের প্রতিভা অর্থাৎ নান্দনিক দক্ষতার কথা বলেছেন; শেষে বলেছেন যে মৃত্যু যেহেতু সার্বজনীন বিষয় তাই এই কাব্যও চিরায়ত। সব সাহিত্যই কোনো-না-কোনো পরিমাণে যুগের ইতিহাসকে ধারণ করে। সেই যুগের ইতিহাসকে কীভাবে ও কী পরিমাণে ধারণ করলে সাহিত্য মূল্যবান হবে তার কোথাও একটা সীমা আছে। একমাত্র প্রতিভাধর শিল্পীই এই সীমাকে উপলব্ধি করতে পারেন।

এ থেকে বোঝা যায়, প্রুপদী না-হওয়া সত্ত্বেও কোনো সাহিত্যকর্ম যথেষ্ট মূল্যবান বলে বিবেচিত হতে পারে। প্রপাগান্ডামূলক বলে শুদ্ধতাবাদীরা উপহাস করলেও যেমন মানিক বন্দ্যোপাধ্যায়ের 'পদ্মানদীর মাঝি'র শিল্পমূল্য বিন্দুমাত্র কমে যায় না, ম্যাক্সিম গোর্কির চিরন্তন 'মা'-এর আকৃতি যেমন বিফলে যায় না; তেমনই নিকোলাই অস্তভস্কির 'ইস্পাত' অপাঙ্ক্রেয় হয়ে যায় না। পাঠকহৃদয়ে যদি সংবেদনশীলতা থাকে, যদি মহৎ আদর্শের প্রতি বিন্দুমাত্র পক্ষপাত থাকে, সেই পাঠকদেরকে বিশ্বয়করভাবে উদ্দীপিত করতে সক্ষম এই উপন্যাস।

শিল্পের একটি মহৎ বৈশিষ্ট্য হচ্ছে সঙ্কল্পগণশীলতা। লেখকের অনুভূতির প্রকাশ যদি পাঠকের নিজস্ব অনুভূতিতে রূপান্তরিত হতে না পারে, তবে সেই সাহিত্যকর্মের মূল উদ্দেশ্যই ব্যাহত হয়। সেইদিক থেকে 'ইস্পাত' একটি সফল সাহিত্যকর্ম।

আমরা জেনেছি নিকোলাই অস্তভস্কি যখন উপন্যাসটি রচনা করেন, তখন তিনি ছিলেন সম্পূর্ণ অন্ধ। সেইসঙ্গে ছিল শারীরিক পঙ্গুত্ব। এইসব দুর্ভেদ্য প্রতিকূলতা জয় করে 'ইস্পাত' উপন্যাস রচনা করাটা এককথায় সাধারণ মানুষের কাছে অসম্ভব। এই অসম্ভবকে সম্ভব করেছিলেন লেখক। কোথায় পেয়েছিলেন তিনি এই ইস্পাতদৃঢ় মনোবল? তা পেয়েছিলেন জীবনের কাছ থেকে। পেয়েছিলেন নিজের সংগ্রামী চেতনার কাছ থেকে। যতদিন সুস্থ ছিলেন, কাজ করেছেন সমাজতান্ত্রিক বিপ্লবকে সুসংহত করার লক্ষ্যে। যখন অন্ধত্ব এল, পঙ্গুত্ব এল, তখনকার বেঁচে থাকাকে অর্থবহ করার জন্যই লিখতে শুরু করেছিলেন এই উপন্যাসটি।

পরবর্তীতে জানা গেছে, 'ইস্পাত' মূলত আত্মজৈবনিক উপন্যাস। উপন্যাসের কেন্দ্রীয় চরিত্র পাভেল করচাগিন নির্মিত হয়েছে যার ছায়া অবলম্বন করে তিনি আর কেউ নন-স্বয়ং লেখক নিকোলাই অস্তভস্কি। কিন্তু বেশিরভাগ আত্মজীবনীতে যা করা হয়, নিজেকে ও নিজের পছন্দের দল ও মানুষদেরকে খুব উজ্জ্বল করে আঁকা হয়, নিজেকে সমালোচনার অতীত বলে প্রতিভাত করার চেষ্টা করা হয়, এক্ষেত্রে তা করা হয়নি। হয়নি বলেই 'ইস্পাত' ইচ্ছাপূরণের কাহিনী না হয়ে হয়েছে একটি নিখুঁত উপন্যাস।

এই উপন্যাস পড়ে আমরা জানতে পারছি যে, বিপ্লব মানেই এক অলৌকিক উদ্ধার নয়। বিপ্লব মানেই নয় তাৎক্ষণিক মুক্তি। বিপ্লব কোনো তাৎক্ষণিক সমৃদ্ধি এনে দেয়

না, দুধ-মধুর নহর বইয়ে দেয় না। বিপ্লব একটি দীর্ঘ এবং কষ্টসাধ্য প্রক্রিয়া। বিপ্লবকে রক্ষা করার জন্য যেমন নিরন্তর লড়াই করতে হয় ভেতরের ও বাইরের শত্রুর সঙ্গে, তেমনই জীবনযাপন করতে হয় অবর্ণনীয় কষ্টতার মধ্য দিয়ে। তার সঙ্গে আছে পুরাতন ও পশ্চাৎপদ সংস্কৃতির জের, আমলাতান্ত্রিক জটিলতা, নেতা ও সাথীদের পদজ্ঞলনের ভয়, অসুখ্যাতকের তৎপরতা, যান্ত্রিক সরলীকরণের বিপদসহ আরো অনেক চোরাবাঁলি।

এতসব প্রতিকূলতা ডিঙিয়েও মানুষ তাহলে বিপ্লব করতে যায় কেন? তাৎক্ষণিক কোনো লাভের দেখা তো পায় না বিপ্লবের প্রথমসারির সৈনিকেরা। তবু তারা বিপ্লবের জন্য নিজেদের সর্বস্ব বিলিয়ে দিতে অগ্রসর হয় কেন? এই প্রশ্নের উত্তরও মোটামুটি স্পষ্ট করেই দেওয়া আছে উপন্যাসটিতে। মানুষ বিপ্লব করতে চায় মানবতার মুক্তির জন্য, ভবিষ্যৎ প্রজন্মের জন্য বিকাশের অনুকূল একটি পরিবেশ-পরিস্থিতি গড়ে-তোলার জন্য।

রাশিয়া, ইউক্রেনের মানুষ বিপ্লব চেয়েছিল; তবে সবশ্রেণীর মানুষ চায়নি। বিপ্লবের পক্ষে দাঁড়িয়েছিল কৃষক-শ্রমিক-ভূমিদাস-নিরন্ন মানুষেরা। তাদের নেতৃত্বে ছিল মধ্যশ্রেণী থেকে আগত মানবপ্রেমিক বুদ্ধিজীবীরা। অন্যদিকে বিরোধিতা করেছিল অভিজাত ও সুবিধাভোগীশ্রেণী।

কারা ছিল সেই বিপ্লবের পক্ষে? আরতিওমের জ্বানী থেকে জানা যায় : 'বড়লোকদের বাড়ি রাঁধুনির কাজ করত আমার মা।...সকাল থেকে রাস্তির পর্যন্ত রাঁধুনিগিরি করে চার ক্রবল মাইনে আর একমুঠো খাবার পেত মা।...আমি ন'বছরে পড়তেই আমাকে মিস্ত্রিখানায় শিক্ষানবিশ হিশেবে ভর্তি করে দেওয়া ছাড়া মা'র আর কোনো উপায় রইল না। তিন বছর বিনা মাইনেয় কাজ করেছি...ওধু দু'বেলা খোরাকি পেতাম।'

বুদ্ধ ইঞ্জিনিয়ারলক পলেন্ডভস্কি বলে: '...আমি আর কী বলতে পারি তোমাদের কমরেড? আগেকার দিনে মজুরের জীবন যে কী ধরনের ছিল তা তো তোমরা সবাই জানো। সারাজীবন খেটে মরেছি কেনা গোলামের মতো আর এই বুড়োবয়সে ভিখিরির অবস্থা। এ-কথা স্বীকার করছি যে, যখন বিপ্লব এল তখন আমার নিজেকে মনে হয়েছিল সংসারের ভাবনাচিন্তার বোঝায় নুয়েপড়া একজন বুড়োমানুষ, তাই তখন পার্টির ভেতরে আসার পথ আমি খুঁজে পাইনি।...কিন্তু এই কথাটি শুধু আমি বলতে চাই; অন্য কোনো পথ নয়, বলশেভিকদের পথই আমার পথ।'

উপন্যাসের কেন্দ্রীয় চরিত্র পাভেলও এইরকম শ্রেণী থেকে উঠে আসা একজন তরুণ। এগারো বছর বয়সেই স্কুল ছাড়তে হয়েছে তাকে। বারো বছর বয়সে রেস্তোরাঁয় ডিশ-প্রেট ধোয়ার কাজে নিযুক্ত হতে হয়েছে। সেখানেই সে দেখেছে নিম্নআয়ের মেয়েদের ওপর মালিকদের যৌননিপীড়ন, দুর্বলদের ওপর সবলদের নির্যাতনের বাস্তবচিত্র। সেই রেস্তোরাঁয় অনেক ঘাত-প্রতিঘাতের পর তরুণ পাভেলের কর্মস্থল হল বিদ্যুৎ-স্টেশন।

ইতোমধ্যে সর্বশক্তিমান জারের পতন হয়েছে। ইউক্রেনে পাভেলদের ছোট্ট শহর একবার যাচ্ছে স্বেতবাহিনীর দখলে, একবার পোলিশদের দখলে; আবার যাচ্ছে

লালফৌজ বা বলশেভিকদের দখলে। পরিস্থিতিটা পরিষ্কার বোঝা যায় দুইজন প্রতিবেশীর কথোপকথন থেকে : “আতঙ্কে বুদ্ধিভ্রষ্ট কোনো ভদ্র নাগরিক হয়তো সকালবেলায় ঘরের জানালার খড়খড়িটা খুলে, ঘুমে ভারী চোখে চেয়ে, মুখ বাড়িয়ে তার পাশের বাড়ির প্রতিবেশীকে উদ্ভিগ্ন স্বরে প্রশ্ন করছে, ‘আভ্তোনম পেত্রভিচ, বলতে পারেন আজ শহরের কর্তা কে?’ এবং আভ্তোনম পেত্রভিচ হয়তো তখন তার প্যান্ট আঁটসাঁট করে বাঁধতে বাঁধতে এদিকে-ওদিকে সম্ভ্রান্ত দৃষ্টি ফেলে জবাব দিচ্ছে : ‘জানিনে আকালাস কিরিলোভিচ। রায়ে কারা যেন ঢুকেছে শহরে-কারা, সেটা লিগগিরই জানতে পারব! যদি ওরা ইহুদিদের ধরে লুটপাট শুরু করে, তাহলে বুঝব ওরা পেং লিউরার, আর যদি ওই ‘কমরেডদের’ কেউ হয়, তাহলে ওদের কথাবর্তী ধরন-ধারণেই সঙ্গে সঙ্গে ধরতে পারব। আমি তো কার ছবি ঘরে টাঙাতে হবে সবসময় সেইদিকে লক্ষ্য রাখছি-আমাদের ঐ পাশের বাড়ির গেরাসিম লেওস্তিয়েভিচের মতো যাতে আবার বিপদে পড়তে না হয়। জানেন তো, ভালো করে না-দেখেওনেই সে গিয়ে দিবিা লেনিনের ছবি টাঙিয়ে বসে আছে; আর সঙ্গে সঙ্গে তিনজন লোক এসে তাকে ধরেছে চেপে; দেখা গেল তারা পেথলিউরার লোক। ছবিটার দিকে একনজর দেখেই ওরা বাড়ির কর্তার ওপর ঝাঁপিয়ে পড়ে দিল বেশ ঘা-কতক। তা প্রায় গোটাকুড়ি চাবুকের ঘা হবে, ওরা খেঁকিয়ে উঠল, ‘আন্ত ছাল ছাড়িয়ে নেব তোর, ওয়োরের বাচ্চা কমিউনিস্ট কোথাকার!’ গেরাসিম যতই চেষ্টা আর যতই প্রাণপণে চেষ্টা করতে থাকে ব্যাপারটা বুঝিয়ে বলার জন্যে, কিছুতেই কিছু হবার নয়।”

এইরকম টালমাটাল পরিস্থিতিতে লালফৌজের সঙ্গে যোগ দেয় পাভেল করচাগিন। লালফৌজের সঙ্গে সঙ্গে সেও শহর ছেড়ে চলে যায় বিপ্লবকে রক্ষা ও সংহত করার প্রতিজ্ঞা নিয়ে। পেছনে রেখে যায় দারিদ্র্য-জর্জরিত বৃদ্ধা মা, তার বিকাশোন্মুখ প্রেমের পাত্রী ধনীকন্যা তোনিয়া এবং ভাই আরতিওমকে। আমরা এভাবেই জন্ম নিতে দেখি একজন তরুণ কমিউনিস্টকে, যাকে ভবিষ্যতে একের পর এক অগ্নিপরীক্ষায় উত্তীর্ণ হতে হবে।

২

‘জনসাধারণের জন্য দায়িত্বপালন, সামান্য বা তুচ্ছতম হলেও কখনই নিষ্ফল হতে পারে না। তুমি যদি একটা আঙিনা ঝাড়ু দাও তাহলে শিশুদের ফুসফুসে ক্ষতিকর ধূলা প্রবেশের পথ তুমি রুদ্ধ করো; যদি সময় থাকতে একটা বই বাঁধাও তাহলে তার আয়ুষ্কাল বাড়িয়ে দাও এবং রাষ্ট্রের পক্ষ হয়ে কাগজ বাঁচাও।’

ম্যাক্সিম গোর্কি কথাগুলো বলেছিলেন তরুণ লেখকদের উদ্দেশ্যে, যারা লেখা ছাড়া অন্য সামাজিক কাজকর্মে অংশগ্রহণ করতে অনীহা ছিলেন। গোর্কি বরং দ্বিতীয় শ্রেণীর লেখক হবার চাইতে তাঁদের প্রথম শ্রেণীর সামাজিক কর্মী হতে উদ্বুদ্ধ করেছিলেন। বিশেষত সেই সময়ে-যখন ধ্বংস এবং সৃষ্টির কাজ একইসঙ্গে চলতে থাকে, চারিদিকে হৈ চৈ ও গোলমাল; জীর্ণ অতীতের পুঁতিগন্ধময় আবর্জনা পায়ের নিচে

ধূলায় মিশে যাচ্ছে, চারপাশের বাতাস সেই নোংরা ধূলিতে পূর্ণ হয়ে উঠছে। অবিশ্বাস্য দ্রুতগতিতে সর্বত্র পরিবর্তন সাধিত হচ্ছে। এত দ্রুতগতিতে যে, কারো মাথা চুলকাবার সময় নেই, কপাল থেকে ঘাম মুছবার কিংবা নাক খুঁটবার সময় নেই।’

‘ইম্পাত’ উপন্যাসের পাভেলকেও আমরা দেখি সব পিছুটান উপেক্ষা করে কর্মযজ্ঞে ঝাঁপিয়ে পড়তে, এক যুদ্ধক্ষেত্র থেকে আরেক যুদ্ধক্ষেত্রে ছুটে যেতে। দুইরকম যুদ্ধেই সে শামিল। একরকম যুদ্ধে সে অস্ত্র হাতে সরাসরি শত্রুর মুখোমুখি দাঁড়ায়, শত্রু হনন করে, নিজে আহত হয়। অন্য আরেক যুদ্ধ, যেটি আরও কঠিন, সেখানে সে নিরস্তুর নিজেকে ব্যস্ত রাখে যুবসমাজকে সংঘটিত করার কাজে, পার্টির মধ্যে লুকিয়ে-থাকা আমলাতন্ত্র ও সুবিধাবাদকে নির্মূল করার কাজে, সাথীদের নিরস্তুর উৎসাহ যোগানোর কাজে।

কমী পাভেলের সবচেয়ে উজ্জ্বল রূপ চোখে পড়ে তুষারের মধ্যে তিনমাস ধরে রেললাইন পাতার কাজে প্রত্যক্ষভাবে জড়িত থাকার সময়। কনকনে ঠাণ্ডা, পরনে শীত ঠেকানোর পর্যাপ্ত পোশাক নেই, পায়ে দেবার বুটজুতো নেই, কাজ করতে হয় ‘চালুনির ফাঁক দিয়ে জল ঝরে পড়ার মতো’ বৃষ্টির মধ্যে, খাদ্য অপরিপাক, রাত্রিযাপনের উপযুক্ত ঘর নেই—মেঝেতে খড় বিছিয়ে শুতে হয়—এইরকম পরিস্থিতিতে মুখ বুঁজে রেলপথের কাজ করে গেছে পাভেল ও তার সঙ্গীরা। সেই পাভেল বা লেখক নিকোলাই অস্ত্রভস্কি একমাত্র তখনই লেখালেখিকে প্রধান ও একমাত্র কাজ হিসেবে গ্রহণ করেছেন, যখন অন্ধত্ব ও পঙ্গুত্ব তাকে বাধ্য করেছে শারীরিক শ্রমবহুল কাজ থেকে সরে দাঁড়াতে। রচিত হল ‘ইম্পাত’। জরা ও ব্যাধির ওপর জয়ী হল মানবিক সংগ্রাম।

কেমন করে মানুষ মহৎ আদর্শের জন্য নিজেকে তৈরি করতে পারে তার শিক্ষা পাওয়া যাবে এই বইটি থেকে। কেউ যদি ভিন্ন আদর্শেও বিশ্বাসী হয়ে থাকে তাকেও শ্রদ্ধায় মাথা নত করতে হবে এই নিবেদিতপ্রাণ কর্মীদের কাহিনী পাঠ করে। মহৎ সাহিত্যের বৈশিষ্ট্য এটাই, তাৎপর্যও এটাই। তাই ‘ইম্পাত’ চিরায়ত রচনা কিনা সেই প্রশ্নে না-গিয়েও বলা যায়, এটি সং সাহিত্য। কোনো রচনার জন্য এই অভিধাও কম সম্মানের নয়।

জাকির হালুকদার



## নিকোলাই অস্ত্রভস্কি এবং পাভেল করচাগিন

কোনো কোনো জীবৎকালে মহা-মহা কীর্তিকলাপ সাধিত হয়। আবার গোটা জীবনই একটা মহাকীর্তি, এমনও হয়। বিখ্যাত সোভিয়েত সাহিত্যিক এবং এই বইখানির লেখক নিকোলাই অস্ত্রভস্কির (১৯০৪—১৯৩৬) জীবন ছিল এমনই। জীবনের শেষ বারো বছর গুরুতর অসুস্থ এবং শেষ আট বছর অন্ধ অবস্থায় থেকে তিনি মারা যান বত্রিশ বছর বয়সে।

তবু, যথার্থ অমর উত্তরাধিকারই তিনি রেখে গেছেন। পুরুষের পর পুরুষ নওজোয়ানের দিশারী আলোক হয়ে রয়েছে তাঁর ‘ইম্পাত’।

নিযুত-নিযুতখানা ছাপা হয়েছে এই বইয়ের, বইখানি পৃথিবীর প্রায় সব দেশেই পরিচিত। ১৯৩৭ সালে বইখানি ইংরেজি ভাষায় তরজমা হলে লন্ডনের ‘টাইমস’ পত্রিকায় পুস্তক-পরিচয় স্তম্ভে এই তরুণ লেখক সম্বন্ধে বলা হয়েছিল, এই উপন্যাস লেখা আরম্ভ করার আগে থেকেই তিনি ছিলেন শয্যাশায়ী এবং অন্ধ। উপন্যাসখানি বহুলাংশে আত্মজীবনীমূলক; তিনি মাত্র কয়েক সপ্তাহ আগে মারা গেছেন। ঐ পুস্তক-পরিচয়দাতা লিখেছিলেন, নতুন রাশিয়ার তরুণ বীর-নায়ক পাভেল করচাগিনের পূর্ণাঙ্গ আলোচ্য তুলে ধরেছেন অস্ত্রভস্কি; প্রথম বিশ্বযুদ্ধ, গৃহযুদ্ধ এবং সোভিয়েত ইউনিয়নে পুনর্গঠনের কালপর্যায়ের পটভূমিতে তিনি এঁকেছেন এই আলোচ্যখানি। পটভূমি খুবই বাস্তবতাসম্মত, প্রধান চরিত্রটি প্রত্যয়জনক, সমগ্র কাহিনীটিই এক-ফালি বাস্তবজীবন—খুব জোরালোভাবে, পরমোৎকৃষ্ট রুচিবোধ আর সূক্ষ্ম নাটকীয়তাবোধ অনুসারে সেটাকে উপস্থিত করা হয়েছে।

নিকোলাই অস্ত্রভস্কির উপন্যাসখানি সঙ্গে সঙ্গেই বিদেশী পাঠক-সমাজে সমাদৃত হয়েছিল। আমরা আশা রাখি, এই নতুন বাংলা সংস্করণটি আরও বহু নতুন পাঠক-পাঠিকার সমাদর পাবে।

অস্ত্রভস্কি বলেছিলেন : ‘বীরত্ব জন্মে সংগ্রামের ভিতর দিয়ে, আর কঠোর অবস্থার ভিতর দিয়ে তার পরীক্ষা হয়।’

তাঁর নিজের সংক্ষিপ্ত জীবনে কঠোর অবস্থা আর সংগ্রাম এসেছে নিরন্তর...

রাশিয়ায় সমাজতান্ত্রিক বিপ্লবের সময়ে এই লেখকের বয়স ছিল মাত্র তেরো বছর, তবু কঠোর শ্রম আর দারিদ্র্যের অর্থটা তাঁর জানা ছিল তার আগেই। একটা রেল-স্টেশনের রেষ্টোরাঁয় তাঁকে কাজ করতে হত দিনে বারো-চোদ্দ ঘন্টা, সর্ব আঁকাবাঁকা সিঁড়ি দিয়ে ভারী-ভারী সামোভার তুলতে-নামাতে হত, চুপ্তিতে জ্বালানি যোগানের কাজ করতে হত, বিজলি মিস্ত্রিকে সাহায্য করতে হত।

পনেরো বছর বয়সে তিনি গৃহযুদ্ধে লড়তে নেমেছিলেন। পরে, কিয়েভ রেলওয়ে মেরামতি কারখানা এবং রেলপথ নির্মাণের কাজে তিনি অংশগ্রহণ করেছিলেন, নদীতে কাঠ ভাসিয়েও তিনি কাজ করেছিলেন।

অস্ত্রভক্ষি ইউক্রেনে একজন উৎসাহী কমসমোল সংগঠক ছিলেন। যে-কোনো কাজে তিনি হাত দিতেন তাতে তিনি ঢেলে দিতেন নিজের অন্তর-মন।

১৯২৪ সালের শেষের দিকে তিনি গুরুতরভাবে অসুস্থ হয়ে পড়লেন। দেখা গেল সেটা মেরুদণ্ডের ক্ষয়রোগ। বাল্যে অপুষ্টি আর মাত্রাতিরিক্ত শ্রম, গৃহযুদ্ধের ফ্রন্টে জখম, দেশের বিধ্বস্ত অর্থনীতি পুনঃসংস্থাপনের কাজে তাঁর অতিমানুষিক পরিশ্রম—এই সবেরই ফল হল ঐ রোগ। এই সাহসী যোদ্ধা সহসা দেখতে পেলেন তিনি অচল—সারাদেশ তখন পুনরুজ্জীবনের সৃজনী আঙনে উদ্দীপ্ত। নওজোয়ানেরা তখন সামনের সারিগুলিতে—দেশের নতুন নতুন সম্পদ আর নতুন জীবন গড়ার কাজে তারা ব্যাপৃত।

সোভিয়েত ইউনিয়নের সেরা সেরা ক্লিনিকে সেরা সেরা ডাক্তারেরা অস্ত্রভক্ষির চিকিৎসা করেছিলেন, কিন্তু রোগের অবস্থা ছিল চিকিৎসার অসাধ্য। এই তরুণের অঙ্গপ্রত্যঙ্গ একেজো হয়ে গেল, তারপরে গেল দৃষ্টিশক্তিও। রোগই জিতে গেল—রোগ তাঁকে যোদ্ধাশ্রেণী থেকে সরিয়ে দিয়ে তাঁর ‘শয্যা-সমাধি’ অবধারিত করে দিল।

কী করবেন তিনি তখন? বেঁচে থাকবেন কীভাবে? ঐভাবে কি বেঁচে থাকা যায়?

তাঁর বইয়ের নায়ক পাভেল করচাগিনের সামনে এল এইসব মর্মান্তিক প্রশ্ন। এইসব প্রশ্নের উত্তর বের করবার জন্য চলল অস্ত্রভক্ষির অতি কষ্টকর প্রচেষ্টা।

‘সংগ্রাম করার ক্ষমতাকেই সে জীবনে সবচেয়ে বড় মূল্য দিয়ে এসেছে, সেই ক্ষমতাটাকেই হারিয়ে বসার পর আর বেঁচে রইবে কিসের জন্যে? আজকের আর নিরানন্দ আগামীকালের অস্তিত্বের সমর্থনে যুক্তিটা কী? কী দিয়ে ভরে তুলবে সে তার দিনগুলোকে? টিকে রইবে শুধু নিশ্বাস নেবার জন্যে আর পান-আহার করবার জন্যে? কমরেডরা সব সংগ্রামের মধ্যে দিয়ে এগিয়ে যাবে, আর সে শুধু পাশে দাঁড়িয়ে অসহায়ের মতো দেখে যাবে?’

উদ্ধার পাবার একটা চিন্তা এল : আত্মহনন। কিন্তু শেষ মুহূর্তে তিনি দৃঢ়ভাবে সেই উপায়কে বাতিল করলেন : ‘জীবন যখন অসহনীয় হয়ে ওঠে তখন কী করে বাঁচতে হয় সেটা শেখো। জীবনটাকে কাজে লাগাও।’

১৯৩০ সালে সেপ্টেম্বর মাসে অতি নিদারুণ শেষ আঘাত হয়ে এল সম্পূর্ণ অন্ধতা—তখন অস্ত্রভক্ষি তাঁর বন্ধু পিওত্র নভিকভের কাছে চিঠিতে লিখেছিলেন :

‘নিজের জীবনটাকে অর্থপূর্ণ করে তোলার একটা পরিকল্পনা আমার আছে—নিজ অস্তিত্বের ন্যায্যতা প্রতিপাদনের জন্যে সেটা দরকার। পরিকল্পনাটা অত্যন্ত কঠিন এবং জটিল। পরিকল্পনাটা যদি কিছু নির্দিষ্ট হয়ে ওঠে তখন তোমাকে এ বিষয়ে আরও কিছু জানাব।

‘...শয্যাশায়ী হলেও আমি অসুস্থ নই। ওসব ভুল। একগাদা বাজে কথা। আমি একদম সুস্থ। আমার পা চলে না, দেখতে পাইনে ছাই কিছুই—সবই একটা নিদারুণ ভুল...’

একেবারে বীরত্ব দিয়েই লেখা এই চিঠিখানা সত্যিই মৃত্যুর সঙ্গে পাজা কষাকষি—মৃত্যু তখন দংষ্ট্রাকরাল-হাসিমুখে তাঁর পাশেই সমুপবিষ্ট। রোগ আরও



ছড়িয়েই পড়ছিল, ডাক্তারেরা রোগটাকে শায়েস্তা করতে অক্ষম। আর কখনও তিনি বিছানা ছেড়ে উঠে দাঁড়াতে পারবেন না, ভোরের আলোয় তাঁর চোখ মেলবে না আর কখনও। তাহলে কী উপায়!

তিনি উঠে দাঁড়াবেন, দাঁড়িয়ে হেঁটে এসে যাবেন সোজা জীবনের মাঝখানে—নিজের বইখানির পৃষ্ঠাগুলি থেকে।

পরবর্তী পুরুষের কাছে অস্ত্রভঙ্গি কী বলতে চান সেটা তাঁর জানা ছিল অনেক আগে থেকেই। বিপ্লবের এক যোদ্ধা, তাঁকে কখনও জোর করে পিছু হঠানো যায় না—তাঁরই জবানবন্দি হবে সেটা।

প্রথমে তাঁকে সাহায্য করবার মতো কেউ ছিল না। তাঁর স্ত্রী কাজে যেতেন সকালে, আর সন্ধ্যায় বাড়ি ফিরতেন শান্তক্লান্ত হয়ে। অসাড় আঙুলগুলো দিয়ে পেন্সিল চেপে ধরে অস্ত্রভঙ্গি অতিকটে একটা-একটা করে অক্ষর ফুটিয়ে তুলতেন, কিন্তু প্রায়ই এক-একটা পঙ্ক্তির তার আগেরটার উপর পড়ে দুটো পঙ্ক্তিই দুস্পাঠ্য হয়ে যেত।

তবে হাতখানাকে দিশা দেবার জন্য একটা খাঁজকাটা বোর্ডের ব্যবস্থা হল শিগগিরই। একটা মামুলি পিচবোর্ডের ফাইল থেকে তৈরি এই জিনিশটা ছিল সহজ-সরল। ফাইলটার উপরের পাল্লা থেকে সমান্তরালভাবে ৮ মিলিমিটার চওড়া ফালি-ফালি কেটে নেওয়া হয়েছিল—তখন ফাইলটার ভিতরে একখণ্ড কাগজ ঢুকিয়ে দেওয়া হলে তিনি ‘কশি’গুলো বরাবর লিখে যেতে পারতেন।

অস্ত্রভঙ্গি লিখতেন সাধারণত রাত্রে—যখন সবাই ঘুমিয়ে পড়ত। তাঁর স্ত্রী কিংবা মা পঁচিশ-ত্রিশ খণ্ড কাগজ ফাইলে ঢুকিয়ে দিয়ে যেতেন, আর সরু করে কাটা কয়েকটা পেন্সিল রেখে যেতেন বিছানার পাশে। সাধারণত তিনি রাতারাতি সমস্ত কাগজই লিখে ফেলতেন। তখন তার পরিবার কিংবা বন্ধুবান্ধবদের মধ্যে থেকে কেউ পাঠোদ্ধার করে সেই লেখা টাইপ করে দিত।

‘এই বইয়ের কাজই হয়ে উঠেছে আমার সমগ্র জীবন,’ অস্ত্রভঙ্গি লিখেছিলেন এক বন্ধুর কাছে। ‘কাজ ধরেছি ‘রাতের শিফটে’, ভোরে ঘুমিয়ে পড়ি। রাত্রে সব খুব শান্ত, কোথাও টুঁ-শব্দটি নেই। আমার সামনে ঘটনার পর ঘটনা উঠে আসে, যেন ফিল্মের মতো, মনশ্চক্ষে আবার ফুটে ওঠে কত যে ছবি আর গোটা দৃশ্য...’

সেই ভয়ঙ্কর বছরগুলোতে অস্ত্রভঙ্গিকে এগিয়ে নিয়ে চলেছিল তাঁর অদম্য মনোবল, সংকল্পের দৃঢ়তা আর প্রচণ্ড ইচ্ছাশক্তি।

‘ইস্পাত’ প্রথম প্রকাশিত হয়েছিল ১৯৩৪ সালে।

তার পরে—মস্কো, ১৯৩৫ সালের ডিসেম্বর মাস। অস্ত্রভঙ্গি সবে সোচি থেকে রাজধানীতে এসেছেন। সোভিয়েত সাহিত্যক্ষেত্রে বীরত্বপূর্ণ অবদানের জন্য তিনি ‘লেনিন অর্ডার’ পেয়েছেন। ‘ঝঞ্ঝাট উদ্ভব’ নামে দ্বিতীয় উপন্যাস লেখা শুরু করেছেন তিনি।

কেটে-যাওয়া সময়ের মাঝে ফিরে গিয়ে ৪০ নং গোর্কি স্ট্রিটে লেখকের বাড়িতে গিয়ে দেখা যাক। চওড়া সিঁড়ি বেয়ে দোতলায় উঠে দরজার ঘন্টি বাজিয়ে আমরা ঢুকলাম।

অস্ত্রভঙ্কি শুয়ে আছেন, তাঁর গায়ের নিচের দিকটা কয়লা ঢাকা। তাঁর একটা টান-টান ডাব। এ মন কখনও নিষ্ক্রিয় থাকে না—তারই অনুপ্রাণিত অভিব্যক্তি তাঁর মুখে। তাঁর উঁচু কপালখানায় ডাইনের জ্বর উপরে একটা ছোট খাঁজ—একটা পুরনো জখমের দাগ। কোটরগত চোখদুটো একেবারে খোলা—মনে হয় যেন তিনি দেখতে পান। গায়ে একটা খাকি শার্ট। তাঁর বুকে এঁটে দেওয়া হল ‘লেনিন অর্ডার’।

...কামরাটায় আবছা আলো। রাস্তার আওয়াজ আটকাবার জন্য বড় জানলাটায় ভারী পর্দা টানা।

বিছানার উপরে দেয়ালে লেনিনের প্রতিকৃতি। আসবাব শাদাসিধে। একটা ডেস্ক, একখানা চামড়া-বাঁধানো কৌচ, একটা পিয়ানো, একটা বইয়ের শেল্ফ, আরি বারবুসের একটা আবক্ষ মূর্তি।

কামরাটায় এদিক-ওদিক তাকিয়ে দেখতে থাকবার সময়ে শোনা গেল তরুণ বলিষ্ঠ কঠোর প্রীতি-সম্ভাষণ। নিজের পাশে বসতে বলে অস্ত্রভঙ্কি বাড়িয়ে দিলেন বাঁ হাতখানা। তাঁর কজিতে কিছু চলনশক্তি অবশিষ্ট আছে। ক্ষীণভাবে তিনি হাতে চাপ দেন, যতক্ষণ থাকা হয় তিনি হাত ছাড়েন না। বেশ বোঝা যায় এই হাত-আঁকড়ে-থাকা, আর যেভাবে তিনি মাঝে মাঝে হাতে হঠাৎ একটা অস্থির চাপ দেন, সেটা একটা সেতুর মতো, মানুষটি কেমন সেটা বুঝতে তাঁর সুবিধে হয় ঐ সূত্র দিয়ে।

তাঁর পাশে যতবেশি সময় বসে থাকা যায়, মানুষটির সাংঘাতিক রোগের কথা মনে আসে ততই কম। তাঁর কথাবার্তায়, তাঁর অনুপ্রাণিত চিন্তার দ্রুত সঞ্চরণে কোথায়ও অশক্তির কোনো লক্ষণ পাওয়া যায় না। তিনি বলতে থাকেন, ‘যখন চোখ বুজি’, তখন মনেই হয় না ঐ চোখদুটি বুজা আছে কত বছর হয়ে গেল। তিনি বলেন, ‘ফুর এই ভীষণ উৎপাত’, মনে হয় আর কোনো কষ্টই তাঁর নেই। তাঁর কথার ধরনধারণ এই রকমের—‘এখন পড়ছি’, ‘এখন লিখছি’, ‘ভাবছি যাব...’, ‘মহাফেজখানায় গিয়ে দেখব’, ‘কংগ্রেসের জন্যে আমার বক্তৃতা তৈরি করছি’।

তিনি শুয়ে রয়েছেন, তাঁর রোগে মৃত্যু নিশ্চিত—কিন্তু তাঁর থেকে বিকীর্ণ হয় এমন আমেজ আর কর্মোদ্যোগ যাতে করুণা-সমবেদনার বদলে এই চমৎকার যোদ্ধার জন্য বিপুল গর্ববোধই আসে।

লেখক এবং তাঁর সৃষ্টি-করা চরিত্রগুলির মধ্যে সাধারণত একটা পার্থক্য টেনে দেখা হয়। এক্ষেত্রে কিন্তু লেখক এবং তাঁর নায়ক অভিন্ন, উভয়ে একই জীবনের ভাগীদার, তাঁদের প্রকৃতির ইস্পাত পোড় খেয়ে মজবুত হয়ে উঠেছে একই আগুনে।

অস্ত্রভঙ্কির বইয়ে বর্ণিত সময় এবং ঘটনাবলি এখন অতীতের বস্তু, তবু আমাদেরই এ-যুগের বীর-নায়ক হয়ে রয়েছেন পাভেল করচাগিন।

তাঁর প্রতি আমরা আকৃষ্ট হই কিসের জন্য?

প্রথমত, সেটা হল জীবনের সেই ‘সুড়ঙ্গগুলো’ দিয়ে দৃঢ়ভাবে এগিয়ে চলার ক্ষমতা—সেগুলোর বর্ণনা করেছিলেন মহান ফরাসি লেখক রোমাঁ রোলাঁ তাঁর এক তরুণ বন্ধুর কাছে লেখা চিঠিতে : ‘তোমার মতো বয়সে আমার ওপর ধাক্কা এসেছিল মাত্রা ছাড়িয়েই। তেমনটা ঘটলে নিজের মনে বোলা (আমার এই উপলব্ধি এসেছিল অনেক পরে—গোটা জীবনকালের অভিজ্ঞতার ফলে) ওগুলি রাস্তা

পারাপারের সুড়ঙ্গের মতো : গুগুলোর ভিতর দিয়ে পার হওয়াটা অবধারিত, সেটা আমাদের করতেই হবে—কেননা, সুড়ঙ্গের অন্যপ্রান্তে বেরিয়ে পাওয়া যায় ঝলমলে রোদ আর তাজা হাওয়া...অন্তরে বলিষ্ঠতা নিয়ে ক্রমাগত এগিয়ে চলাই প্রধান জিনিশ।’

আমাদের প্রত্যেকেরই আছে নিজস্ব সুড়ঙ্গগুলো : গতকালের, আজকের, আগামীকালের। সেগুলোর ভিতর দিয়ে পার হবার জন্য চাই সাহস। তাতে আনুকূল্য পাওয়া যায় অন্তর্ভুক্তি-করচাগিনের কাছ থেকে।

অন্তর্ভুক্তি কিংবা তাঁর নায়ককে ঘিরে নেই কোনো অলৌকিক মহিমা, তাঁরা দু’জনেই খুবই মানুষের মতো।

নৈরাশ্য, আশাভঙ্গ আর ভুলভ্রান্তির ষোলো-আনা অর্থই জ্ঞানা ছিল শেপেতোভ্কার এই কালো-চোখ ছেলেটি পাভেল করচাগিনের।

নিজের জীবনের সারমর্মটি ফুটিয়ে তুলে সে একবার বলেছিল, লড়াইগুলোকে তার এড়িয়ে যেতে হয়নি, তীব্র সংগ্রামের মধ্যে সে পেয়েছিল নিজের জায়গাটি, বিপ্লবের লাল পতাকায় রয়েছে তারও কয়েক ফোঁটা রক্ত, এজন্য সে আনন্দিত।

করচাগিন যে ভাব-ধারণা থেকে প্রেরণা পেয়েছে তার পরাক্রমের মধ্যেই তার শক্তি নিহিত।

বহুবার আমি আলাপ করেছি ‘আসল করচাগিনের’ সঙ্গে। একদিন তিনি বলেছিলেন :

‘আত্মসর্বস্ব মানুষ শেষ হয়ে যায় সবার আগে। তার অস্তিত্ব কেবল তার নিজেরই জন্যে, তার ‘আমি’টা ঘা খেলেই তার আর কিছুই অবশিষ্ট থাকে না। কিন্তু, সমাজের স্বার্থের ভাগীদার হয় যে-জন, যে-জন তার ভাগ্যকে মিলিয়ে দেয় মানুষ-ভাইদের সঙ্গে, তাকে চূর্ণ করা যায় না সহজে...সৈন্যশ্রেণীতে দাঁড়িয়ে যে সৈনিক প্রাণ দেয়, তার কমরেডরা এগিয়ে চলেছে এটাই যার সর্বশেষ সচেতন অনুভূতি, সে পায় চূড়ান্ত আর পরিপূর্ণ তৃপ্তি।’

১৯৩৬ সালে মারা যাবার স্বল্পকাল আগে সোচিতে অন্তর্ভুক্তির সঙ্গে লভনের ‘নিউজ ক্রনিকল্’ পত্রিকার সংবাদদাতার একটা সাক্ষাৎকার হয়েছিল। ফ্যাসিবাদ, যুদ্ধ এবং আগামী বিজয় সম্বন্ধে তাঁদের মধ্যে বিস্তারিত আলাপ চলেছিল। এই সংবাদদাতা বলেছিলেন, বহু বিশিষ্ট রাষ্ট্রনায়কের সঙ্গে তাঁর দেখাসাক্ষাতাদি হয়েছে, তবু এই সাক্ষাৎকারের কথা, কিংবা এর থেকে পাওয়া শিক্ষার কথা তিনি কখনও ভুলবেন না।

‘আপনি অত্যন্ত সাহসী,’ বলেছিলেন এই সংবাদদাতা। ‘কমিউনিজ্‌মে বিশ্বাস থেকেই আপনি পান এই সাহস, নয় কি?’

‘ঠিক,’ উত্তরে অন্তর্ভুক্তি বলেছিলেন, ‘আরও পাই সুখ।’

করচাগিনের জীবনকাহিনী থেকে প্রত্যয়জনকভাবেই প্রমাণিত হয় যে, মহৎ লক্ষ্য থাকলে, একমাত্র তবেই মানুষের জীবন মহৎ হয়ে উঠতে পারে।

করচাগিনকে, এই সাধারণ মেহনতি তরুণটিকে যথার্থ মহৎ করে তুলেছে ঐ মহৎ লক্ষ্যই।

যা হতে পারত সেটা নয়, যা ছিল বাস্তবজীবনে তারই কথা লিখেছেন অল্পভক্তি ।  
নিজেরই জীবনের ঘটনাবলি নিয়ে তাঁর বইখানি; আপাতদৃষ্টিতে যা অসম্ভব সেটা  
যদি সম্ভব হয়ে উঠে থাকে, সেটা লেখকের কল্পনার দরুন নয়, সেটা হয়েছে  
জীবনেরই ফলে, বাস্তবজীবনই সৃষ্টি করেছে এমনসব মানুষ যারা স্বপ্নকে বাস্তবে  
রূপায়িত করেছে । অল্পভক্তি না-লিখে পারেননি—তিনি জানতেন সেটাই ছিল তাঁর  
অস্তিত্ব বজায় রাখার পক্ষে একমাত্র যুক্তি ।

রুঢ় এবং যথার্থ বাস্তবতা নিয়েই তাঁর এই বইখানি ।

রোমা রোলা এই লেখক সম্বন্ধে বলেছেন : 'বিপ্লবের যুগের শিল্পকলার মহত্তম সৃষ্টি  
হল এই বিপ্লব থেকে উদ্ভূত মানুষগুলি । এমনই একজন হলেন নিকোলাই অল্পভক্তি ।'

সেমিয়ন ড্রেগভ



## প্রথম ভাগ

### প্রথম অধ্যায়

‘তোমাদের মধ্যে যারা পরীক্ষা দেবার জন্যে ইস্টারের ছুটির আগে আমার বাড়ি এসেছিলে, তারা উঠে দাঁড়াও!’

কথাটা যিনি বললেন, মোটাসোটা তাঁর দেহের ওপর পাদরির আলখাল্লা-পরা, গলায় ঝুলছে একটা ভারী ক্রুশ। তাঁর তীব্র চোখের চাউনিতে গোটা ক্লাসঘরটা স্তব্ধ হয়ে গেল আর তাঁর ছোট ছোট চোখের কঠিন দৃষ্টি যেন তাদের ভেতর পর্যন্ত কুরে নিল। যে চারটি ছেলে দুটি মেয়ে উঠে দাঁড়িয়েছিল, এরা আশঙ্কার চোখে তাকাল আলখাল্লা-পরা লোকটির দিকে।

‘তোমরা বসো’, বললেন পাদরিমশাই মেয়েদুটির দিকে হাত নেড়ে। স্বস্তির নিশ্বাস ফেলে তাড়াতাড়ি বসে পড়ল তারা।

ফাদার ভাসিলির চেরা-চোখের দৃষ্টি এসে নিবন্ধ হল বাকি চারজনের ওপর।

‘তোরা এদিকে আয় দিকি, বাছাধনরা আমার!’ চেয়ারটা ঠেলে সরিয়ে উঠে দাঁড়ালেন ফাদার ভাসিলি, পায়ে পায়ে এগিয়ে এলেন গা-ঘেঁষাঘেঁষি করে জড়োসড়ো হয়ে দাঁড়ানো ছেলেগুলির দিকে।

‘তোদের এই ক’জন গুণ্ডা চ্যাংড়ার মধ্যে কে বিড়ি খাস?’

‘বিড়ি আমরা খাই না, ফাদার’, ভয়ে ভয়ে উত্তর দিল চারজন।

লাল হয়ে উঠল ফাদার ভাসিলির মুখ।

‘বিড়ি খাস না, না? শয়তান! আমার কেক-এর জন্যে মেখে-রাখা ময়দায় তাহলে তামাক-গুঁড়ো মিশিয়ে দিয়ে এসেছিল কে? দেখছি এখুনি—বিড়ি খাস কিনা। দেখি, পকেটগুলো তোদের উন্টে দেখা! কই, যা বলছি কর! উন্টে দেখা পকেটগুলো!’

তিনজন তাদের পকেট থেকে জিনিশপত্র বের করে টেবিলের ওপর রাখতে লাগল। পাদরিমশাই তীক্ষ্ণদৃষ্টিতে সেলাইয়ের ভাঁজগুলো পরীক্ষা করলেন তামাকের গুঁড়ো পাওয়া যায় কিনা। কিন্তু কিছু না-পেয়ে তিনি তাকালেন চার-নম্বর ছেলেটির দিকে। কালো-চোখ কিশোর, ধূসর রঙের শার্ট গায়ে, নীল পাখলুনের হাঁটুর কাছটায় পটি মেয়ে সেলাই-করা।

‘দাঁড়িয়ে রইলি কেন পুতুলের মতো?’

প্রশ্নকর্তার দিকে একটা চাপা ঘৃণার দৃষ্টি হেনে ক্লষ্ট গলায় ছেলেটি বলল, ‘আমার পকেট নেই।’

‘পকেট নেই, না? আচ্ছা! এমন শয়তানি করে কে আমার কেক-এর জন্যে তৈরি ময়দা নষ্ট করে দিয়েছিল সেদিন, ভেবেছিঁস—জানিনে আমি! এবারও তোকে ছেড়ে দেব ভেবেছিঁস? না হে বাছাধন, মজাটা টের পাইয়ে দেব এবার। গতবারে তোর মা এসে কাকুতি-মিনতি করাতেই তোকে ইকুলে রেখেছিলাম। কিন্তু এবারে আর পার পাবিনে। যা, বেরিয়ে যা!’ নির্মমভাবে ছেলেটার কান মুচড়ে ধরে ফাদার ভাসিলি তাকে হিচড়ে করিডরে ঠেলে দিয়ে জোরে বন্ধ করে দিলেন ক্লাসঘরের দরজাটা।

নিমন্তক, সন্তুষ্ট ক্লাসঘর। কেন পাভেল করচাগিনকে কুল থেকে তাড়িয়ে দেওয়া হল, তা একমাত্র পাভেলের ঘনিষ্ঠতম বন্ধু সের্গেই ক্রঝাক ছাড়া ছেলেমেয়েদের মধ্যে কেউই বুঝে উঠতে পারল না। সে-ই দেখেছিল পাভেলকে ফাদার ভাসিলির রান্নাঘরে গিয়ে ইন্টার-ভোজের কেক-এর জন্যে মেখে-রাখা ময়দায় একমুঠো ঘরে-তৈরি তামাক-গুঁড়ো মিশিয়ে দিতে। ওরা ছ’জন ক্লাসের পিছিয়ে-পড়া ছেলেমেয়ে, তখন ফাদার ভাসিলির কাছে আরেকবার পরীক্ষা দেবার জন্যে গিয়ে তাঁর আসার অপেক্ষায় ছিল সেই রান্নাঘরে।

ইকুলবাড়ির দেউড়ির শেষ ধাপটায় এসে বসল বিতাড়িত পাভেল। বিষণ্ণ-মনে ভাবছিল, মা তার মুখে ঘটনাটা শুনে কী বলবে। গরিব মা তার, আবগারি-দারোগার বাড়িতে রাঁধুনির কাজে সকাল থেকে গভীর রাত পর্যন্ত কঠিন পরিশ্রম করতে হয় তাকে।

কান্নায় গলা বুজে এল পাভেলের।

‘কী করি এখন? এই হতভাগা পাদরিটার জন্যেই এই কাণ্ড। কেক-এর ময়দায় তামাক-গুঁড়ো মিশিয়ে দেবার দুর্বুদ্ধিটা যে কোথা থেকে এসে ভর করেছিল মাথায়! মতলবটা জুগিয়েছিল সেরিওঝাই। বলেছিল, ‘আয়, বুড়ো ঘাগীটাকে একটু জ্ব্ব করি,’ আর তাই করেছিলাম। এখন কিনা সেরিওঝাটা পার পেয়ে গেল আর আমাকে ইকুল থেকে তাড়িয়েই দেওয়া হবে হয়তো!’

ফাদার ভাসিলির সঙ্গে তার শত্রুতা অনেকদিনের। যেদিন মিশকা লেভচুকভ-এর সঙ্গে মারামারি করার শাস্তি হিশেবে পাভেলকে লাঞ্ছ খেতে না দিয়ে কুলে আটকে রাখা হয়, ব্যাপারটার শুরু সেদিন থেকেই। খালি ক্লাসঘরে যাতে সে দুষ্টমি করতে না পারে, তার জন্যে মাস্টারমশাই তাকে দ্বিতীয় শ্রেণীর একটা ক্লাসঘরে নিয়ে গিয়ে বসিয়ে দেন। পেছনের একটা জায়গায় বসেছিল পাভেল। কালো কোর্তাগায়ে, হাড়জিরজিরে,

ছোটখাটো মাস্টারমশাইটি তখন পৃথিবী আর গ্রহতারকা সম্বন্ধে বলছিলেন। পৃথিবীর বয়স কোটি কোটি বছর আর তারাগুলো সব এক-একটা পৃথিবীর মতোই—এ-কথা শুনে তো পাভেলের মুখ হাঁ হয়ে গিয়েছিল অবাক বিস্ময়ে। শুনতে শুনতে পাভেলের এতই চমক লেগে গিয়েছিল যে আর-একটু হলেই সে দাঁড়িয়ে উঠে চেষ্টা করে বলে ফেলেছিল আর-কি, ‘কিন্তু বাইবেলে তো তা বলে না!’ কিন্তু পাছে আরও কিছু শাস্তি কপালে জোটে এই ভয়ে সে কিছু বলেনি।

পাদরিমশাই বাইবেলের পরীক্ষায় তাকে বরাবর পুরো নম্বর দিয়ে এসেছেন। প্রার্থনার শ্রোকগুলো পাভেলের প্রায় সবই মুখস্থ, বাইবেলের পূর্বভাগ আর উত্তরভাগও তাই। সপ্তাহের কোন দিনে ঈশ্বর কোন কোন জিনিশটি সৃষ্টি করেছেন সেসব ঠিকঠাক জানা আছে তার। ফাদার ভাসিলির কাছে গিয়ে ব্যাপারটা ফয়সালা করবে বলে সে মনে-মনে ঠিক করল। পরের ক্লাসেই—পাদরিমশাইয়ের জুং করে চেয়ারে বসামাত্রই—পাভেল হাত তুলল। বলবার অনুমতি পেয়েই সে উঠে দাঁড়াল, ‘ফাদার, ওপরের ক্লাসে মাস্টারমশাই বলছিলেন, পৃথিবীর নাকি কোটি কোটি বছর বয়েস। কিন্তু বাইবেল তো বলে পাঁচ হাজার...’ ফাদার ভাসিলির কর্কশ চিৎকারে কথা বন্ধ হয়ে গেল তার।

‘কী বললি রে শয়তান? এই বুঝি তোর বাইবেল শেখা হচ্ছে!’

কী যে ব্যাপারটা ঘটল, তা ভালো করে বুঝবার আগেই পাদরিমশাই পাভেলের কান ধরে দেয়ালে তার মাথাটা ঠুকে দিতে লাগলেন। কয়েক মিনিট পরে ভয়ে আর যন্ত্রণায় অস্থির পাভেল দেখতে পেল যে সে করিডরে দাঁড়িয়ে আছে।

তার মা-ও সেবার তাকে খুব বঝাঝকা করেছিল।

পরের দিন সে গিয়ে ফাদার ভাসিলিকে কাকুতি-মিনতি করে বলেছিল পাভেলকে ছুঁলে ফিরিয়ে নিতে।

সেইদিন থেকে পাভেল মনেপ্রাণে পাদরিকে ঘৃণা করে। ঘৃণা করে আর ভয় করে। যে-কোনো অন্যায়ে বক্রক্ষে তার কিশোর-হৃদয় বিদ্রোহী হয়ে ওঠে—তা সে অন্যায্য যতই সামান্য হোক-না কেন। বিনা কারণে এই মার খাবার জন্য সে পাদরিমশাইকে ক্ষমা করতে পারেনি। ফলে, তিত-বিরক্ত হয়ে উঠল তার মন।

তারপর থেকে ফাদার ভাসিলির কাছ থেকে পাভেল নানান লাঞ্ছনা ভোগ করে আসছে। সর্বদাই তাকে ক্লাসঘর থেকে বের করে দিতেন পাদরিমশাই। যৎসামান্য ক্রটির জন্য তাকে তিনি ঘরের কোণে দাঁড় করিয়ে রাখেন দিনের পর দিন, সপ্তাহ-ভর। কখনও তাকে পড়া জিজ্ঞেস করেন না। তার ফলে, ইস্টারের ছুটির আগের দিন ক্লাসের লেখাপড়ায় পিছিয়ে-পড়া ছেলেদের সঙ্গে পাভেলকে পাদরিমশাইয়ের বাড়ি যেতে হয়েছিল পরীক্ষা দেবার জন্য। সেখানেই সেদিন রান্নাঘরে গিয়ে সে কেক তৈরির জন্য মেখে-রাখা ময়দায় তামাকের গুঁড়ো মিশিয়ে দিয়ে এসেছিল।

ব্যাপারটা কেউ দেখেনি, তবু পাদরিটা ঠিক ধরেছেন দোষটা কার।

...শেষপর্যন্ত ক্লাস শেষ হল, ছেলেমেয়েরা দল বেঁধে বেরিয়ে এল বাইরের আঙিনায়, ভিড় জমিয়ে তুলল পাভেলকে ঘিরে। পাভেল বিষণ্ণ আর গম্ভীর। সেরিওঝা ক্রবাক শুধু পেছনে থেকে গিয়েছিল ক্লাসঘরে। তার মনে হচ্ছিল সেও অপরাধী, কিন্তু বন্ধুকে সাহায্য করার মতো তার কিছু করবার নেই।

মাস্টারমশাইদের ঘরের খোলা জানলাটার ফাঁকে হেডমাস্টার এফ্রেম ভাসিলিয়েভিচ তাঁর মাথাটা বের করে হাঁক দিলেন, ‘করচাগিনকে এখুনি পাঠিয়ে দাও আমার কাছে!’

চমকে দাঁড়িয়ে উঠল পাভেল হেডমাস্টারের জলদগম্বীর স্বরে। তারপরে দুরুদুরু বৃকে এগিয়ে গেল হুকুম তামিল করতে।

\*

\*

\*

রেলস্টেশনের রেস্টোরার মালিক, ফ্যাকাসে আর মধ্যবয়সী লোকটা তার নিশ্চভ বিবর্ণ চোখ তুলে একটু দেখে নিল পাভেলকে।

‘বয়স কত এর?’

‘বারো’, মা বলল।

‘বেশ, থাকুক এখানে। মাসে আট রুবল আর কাজের দিনে বেত পাবে। একদিন অন্তর একনাগাড়ে চব্বিশ-ঘণ্টা কাজ করতে হবে। কিন্তু ছিচকেমি চলবে না, মনে থাকে যেন।’

‘আজ্ঞে না, কর্তা, চুরিচামারি করবে না ও। সেজন্যে আমি দায়ী থাকলাম’, মা তাকে আশ্বাস দিয়ে বলল ভয়ে ভয়ে।

‘আজ থেকে কাজে লাগুক’, হুকুম দিল রেস্টোরার মালিক। তার পাশেই কাউন্টারের পেছনে যে-মেয়েটি দাঁড়িয়ে ছিল তাকে বলল, ‘জিনা, ছেলেটাকে বাসন ধোবার ঘরে নিয়ে যাও। ফ্রসিয়াকে বলো, গ্রিশ্কার জায়গায় একে কাজে লাগাতে।’

কাউন্টারের মেয়েটা হ্যাম কাটা ছেড়ে ছুরিটা নামিয়ে রেখে পাভেলের দিকে মাথা নেড়ে পথ দেখিয়ে এগিয়ে গেল হলঘর পার হয়ে একপাশের একটা দরজার দিকে—সেই দরজার ওধারে থালা-বাটি ধোওয়া-মাজা-রাখা হয়। পাভেল চলল তার ৭ পিছু-পিছু। তার মা তাড়াতাড়ি এগিয়ে এসে তার কানে-কানে বলল, ‘দেখিস, পাভলুশ্কা, লক্ষী ছেলে, ভালো করে কাজ করিস বাবা। নিন্দের ভাগী হোস নে।’

বিষণ্ন-চোখে মা তাকিয়ে রইল তার যাওয়ার দিকে, তারপর চলে এল।

বাসনপত্তর ধোবার ঘরে পুরোদমে কাজ চলছিল। টেবিলের ওপর স্থপীকৃত হয়ে আছে থালা, কাঁটাচামচ, ছুরি। জনকতক মেয়ে কাঁধে-ঝোলানো তোয়ালে দিয়ে সেগুলো মুছে নিচ্ছে।

পাভেলের চেয়ে একটু বড়, ঝাঁটার মতো ঝাঁকড়া আর লাল চুলঅলা একটি ছেলে তদ্বির করছিল দুটো বিরাট সামোভারের।

একটা বড় পাত্রে জল ফুটছে, তারই মধ্যে ডিশগুলো ধোওয়া হচ্ছে আর বাস্পে ভরে গেছে বাসনপত্তর ধোবার ঘরটা। প্রথমে তাই পাভেল মেয়েদের মুখগুলো দেখতে পায়নি। অনিশ্চিতভাবে সে দাঁড়িয়ে রইল কিছুক্ষণ—কেউ তাকে বলে দেবে কী করতে হবে না-হবে, তারই অপেক্ষায়।

ডিশ-ধোওয়া একটি মেয়ের কাছে গিয়ে কাউন্টারের মেয়ে জিনা তার কাঁধে হাত রেখে বলল, ‘এই যে, ফ্রসিয়া, গ্রিশ্কার জায়গায় এই নতুন ছেলেটিকে নেওয়া হল। কী করতে হবে ওকে বলে দাও।’ তারপর, সে ফ্রসিয়া বলে যাকে ডেকেছিল, তাকে



দেখিয়ে পাভেলকে বলল, 'ও এখনকার কাজকর্ম চালায়। কী করতে হবে তা ওই তোমাকে বলে দেবে।' বলেই জিনা ঘুরে চলে গেল খাবার হলঘরে।

'আচ্ছা', মৃদু গলায় বলে পাভেল প্রশ্নভরা চোখে তাকাল ফ্রসিয়ার দিকে। কপালের ঘাম মুছে ফ্রসিয়া তাকে আপাদমস্তক খুঁটিয়ে দেখল—যাচাই করে নিল মনে-মনে। তারপর কনুইয়ের ওপর পড়া জামার হাতাটা ওটিয়ে নিয়ে গভীর আর আশ্চর্যরকম মিষ্টি গলায় বলল, 'কাজটা বিশেষ কিছু না, খোকা, কিন্তু খাটিতে হবে তোমায় সমস্তক্ষণ। সকালবেলায় গরম করতে হবে ওই তামার পাস্তরটা, সমস্তক্ষণ গরম রাখতে হবে ওটাকে যাতে সবসময় ফুটন্ত জল পাওয়া যায়। তাছাড়া, কাঠ কেটে রাখতে হবে, সামোভারগুলোরও তদ্বির করতে হবে। কাঁটাচামচ আর ছুরিগুলো মাঝে মাঝে তোমায় মেজে দিতে হবে, এঁটোকাঁটাগুলো আর নোংরা জল বাইরে ফেলে আসতে হবে। অনেক কিছুই করতে হবে, খোকা!' ফ্রসিয়ার উচ্চারণের ভঙ্গিটা স্পষ্ট কল্পমা অঙ্কলের লোকদের মতো, 'আ'-কারগুলো টানা-টানা। তার কথা বলার ভঙ্গি, লাল হয়ে ওঠা মুখ, ছোট অল্প-বোঁচা নাক সব মিলিয়ে পাভেলের একটু ভালো লাগল।

'মাসিটি দিব্যি কিন্তু', সিদ্ধান্ত করল পাভেল। তারপর লজ্জা কাটিয়ে উঠে জিজ্ঞেস করল, 'এখন কী করতে হবে আমায়, মাসি?'

বলেই সে থতমত খেয়ে গেল। কথাটা শুনে এক দমক উচ্চকিত হাসি হেসে উঠল—ডিশ-ধোওয়া মেয়েরা।

'ও মা! ফ্রসিয়া এক বোন-পো জুটিয়ে এনেছে, দ্যাখ...'

সবচেয়ে বেশি মন-খুলে হাসল ফ্রসিয়া নিজে। ঘন বাষ্পের জন্য পাভেল লক্ষ করেনি যে, ফ্রসিয়া অল্পবয়সী মেয়ে—আঠারো বছরের বেশি তার বয়েস নয়।

ঘাবড়ে গিয়ে পাভেল সেই ছেলেটির দিকে ফিরে জিজ্ঞেস করল, 'কী করতে হবে আমায় এখন?'

ছেলেটা শুধু চাপা হেসে বলল, 'মাসিকে জিজ্ঞেস করো, বলে দেবে সব। আমি চলি।' বলেই শী করে বেরিয়ে গেল রান্নাঘরের দিককার দরজাটা দিয়ে।

ডিশ ধুচ্ছিল যারা, তাদের মধ্যে একজন মধ্যবয়সী মেয়ে ডাক দিল, 'এদিকে এসো, কাঁটাগুলো মুছে ফেলতে হাত লাগাও।' অন্যদের ধমক দিয়ে বলল, 'হাসাহাসি বন্ধ করো। এমন কিছু হাসির কথা বলেনি ছেলেটা। এই যে, এটা নাও', পাভেলের দিকে একটা ডিশ-মোছার তোয়ালে এগিয়ে দিল সে। 'একটা দিক দাঁতে চেপে অন্য দিকটা টান করে ধরো। এই নাও একটা কাঁটা, কাঁটার ফাঁকে-ফাঁকে তোয়ালেটা ঢুকিয়ে চালাচালি করে নাও। দেখো, যেন ময়লা-টয়লা লেগে না-থাকে। এ-ব্যাপারে এখানে এদের বড় কড়া নজর, খদ্দেররা সবসময় কাঁটাগুলো পরখ করে দেখে—এককণা ময়লা পেলেই দারুণ গণ্ডগোল বাধাবে আর গিল্লি সঙ্গে সঙ্গে তাড়িয়ে দেবেন একমুহূর্তে।'।

'গিল্লি?' পাভেল প্রতিধ্বনি করল, 'আমাকে কাজে লাগাল যে-কর্তা, তাকেই তো মালিক বলে ভেবেছিলাম।

হেসে উঠল মেয়েটা, 'না রে খোকা, কর্তাটি এখানে শুধু ঘর-সাজানো আসবাব গোছের। আসল মালিক হলেন গিল্লিটি। আজ্ঞা এখানে নেই। দুদিন কাজ করো এখানে, নিজেই সব দেখতে পাবে।'।

বাসন-ধোবার ঘরের দরজাটা খুলে গেল। ময়লা ডিশে স্তূপীকৃত বারকোশগুলো নিয়ে তিনজন ওয়েটার ঢুকল। তাদের মধ্যে কাঁধ-চওড়া, ট্যারা-চোখে, বড় চৌকা মুখ আর ভারী-চোয়াল লোকটি বলল, 'একটু তাড়াতাড়ি করো বরং। বারোটোর গাড়ি যে-কোনো মুহূর্তে এসে পড়বে আর এদিকে তোমরা কি-না নিটপিট লাগিয়েছ।'।

পাভেলকে দেখে সে জিজ্ঞেস করল, 'এটি কে?'

'ও নতুন লাগল কাজে,' বলল ফ্রসিয়া।

'নতুন কাজে লাগল বুঝি? বেশ, শোনো খোকা।' পাভেলের কাঁধে ভারী হাতটা দিয়ে তাকে সামোভারগুলোর দিকে ঠেলে দিয়ে এসে বলল, 'এই দুটো যাতে সবসময় ফুটতে থাকে—সেদিকে নজর রাখা তোমার কাজ। এই দেখো, একটা গেছে নিভে, আরেকটাও নিভন্ত। আজকের মতো আর কিছু বলব না, কিন্তু যদি ফের এরকমটা হয়, তাহলে মেরে বদন বিগড়ে দেব কিন্তু!'

একটাও কথা না বলে পাভেল সামোভারগুলো নিয়ে কাজে লেগে গেল।

তার মেহনতের জীবন আরম্ভ হল এইভাবে। প্রথম এই দিনটির মতো আর কোনোদিন পাভেল এত খাটেনি। এটুকু বুঝেছিল যে এটা বাড়ি নয় যেখানে মার কথা না-শুনলেও পার পেয়ে যাবে। কথামতো কাজ না করলে যে মার খেতে হবে—সেটা ওই ট্যারা-চোখ ওয়েটারটা বেশ স্পষ্ট করেই বুঝিয়ে দিয়েছিল।

চিমনির মুখে উঁচু বুটজোড়ার একটা ধরে হাপরের মতো চালিয়ে দিল পাভেল। অল্পক্ষণের মধ্যেই পেট-মোটা বড় বড় সামোভারদুটোর মধ্যে থেকে আগুনের ফুলকি ছিটকে বেরুতে থাকল। ময়লা জলের পাত্রটা তুলে নিয়ে ছুটল জঞ্জাল ফেলার জায়গাটার দিকে। জল ফোটার পাত্রটার নিচে জ্বালানি কাঠ গুঁজে দিল। ডিশ-মোছার ভিজে তোয়ালেগুলো গরম সামোভারদুটোর গায়ে মেলে দিয়ে শুকিয়ে নিল। এককথায়, যা যা করতে বলা হল, সবই করল। সেদিন অনেক রাতে ক্লান্ত পাভেল ঢুকল গিয়ে নিচে, রান্নাঘরে। তার পেছনে বন্ধ-হয়ে-আসা দরজাটার দিকে তাকিয়ে ডিশ-ধোয়া মেয়েদের মধ্যে সেই মধ্যবয়সী আনিসিয়া মস্তব্য করল, 'অদ্ভুত ছেলেটা। দেখেছ কেমন পাগলের মতো ছুটোছুটি করে। ওকে কাজে লাগাবার বিশেষ কোনো কারণ আছে নিশ্চয়।'

'হ্যাঁ, ছোঁড়াটা কাজের বটে', বলল ফ্রসিয়া, 'তাড়া দিতে হয় না।'

'শিগগিরই মিইয়ে আসবে', মত প্রকাশ করল লুশা, 'প্রথম প্রথম সবাই খুব খাটে...'

একটা গোটা রাত্রি না-ঘুমিয়ে অনবরত ছুটোছুটি করে কাজ করার পর, পরের দিন সকাল সাতটায় অত্যন্ত ক্লান্তদেহে পাভেল ফুটন্ত সামোভারদুটো জিন্মা করে দিল তার জায়গায় যে-ছেলেটি কাজে এসেছে তার কাছে।

গোলগাল-মুখ এই ছেলেটার চাউনিতে একটা স্পর্ধা। ফুটন্ত সামোভারদুটোকে পরখ করে সব ঠিক আছে দেখে নিশ্চিত হবার পর সে তার পকেটে হাতদুটো ঢুকিয়ে নিয়ে উপরঅলার মতো অবজ্ঞা-মেশানো ভঙ্গিতে দাঁতের ফাঁক দিয়ে থুতু ফেলল। বর্ণহীন চোখে পাভেলকে বিধে ঝগড়াটে গলায় বলল, 'আচ্ছা, শোনো হে পোঁটা-নাক ছোঁড়া, কাল ঠিক ছ'টায় কাজে হাজির থাকা চাই, বুঝলে?'

'ছ'টায় কেন?' জিজ্ঞেস করল পাভেল, 'কাজের সময়-বদলি হয় তো সাতটায়, নাকি?'

‘কাজ-বদলির সময় নিয়ে তোমার মাথা ঘামাতে হবে না। ছ’টায় হাজির থাকবে। বেশি বকবক করবি তো মেরে মুখের চেহারা পালটে দেব। আশ্পর্শা দেখ না! আজই কাজে লেগে এর মধ্যেই কিনা গুস্তাদি মারতে লেগেছে।’

ডিশ-ধোওয়া মেয়েদের যাদের সবে কাজের সময় শেষ হয়েছে, তারা কৌতূহলের সঙ্গে এই দুটি ছেলের মধ্যে কথাকাটাকাটি শুনছিল। ওই ছেলেটার নির্লজ্জ কথার ধরন আর বেয়াড়াপনায় রেগে গেল পাভেল। প্রতিপক্ষের দিকে একপা এগিয়ে এসে উত্তম-মধ্যম দিতে যাবে, এমন সময়ে নতুন-পাওয়া চাকরিটা হারাবার ভয়ে থেমে গেল সে। রাগে মুখ কালো করে বলল, ‘বেশি চেষ্টাস নে, থাম্। মুখ সামলে কথা বলবি, নইলে টের পাইয়ে দেব মজাটা। কাল সাতটায় আসব আমি, আর মনে রাখিস—হাত চালাতে আমিও কম যাইনে। দেখবি নাকি? আসবি তো চলে আয়!’

পাভেলের ত্রুঙ্কভঙ্গি দেখে আশ্চর্য হয়ে হাঁ-করে তাকিয়ে তার প্রতিপক্ষ গুটিয়ে নিল নিজেকে, পিছু হঠে জল ফোটার পাত্রটা ঘেঁষে গিয়ে দাঁড়াল। এতটা শক্ত পাল্টা জবাব সে আশা করেনি।

‘আচ্ছা, আচ্ছা, দেখা যাবে,’ বিড়বিড় করে বলল সে।

চাকরির প্রথম দিনটা ভালোয় ভালোয় কেটেছে। কাজের শেষে এই-যে ছুটি, এর মধ্যে কোনো ফাঁকি নেই—এরকম একটা মনোভাব নিয়েই পাভেল তাড়াতাড়ি চলল বাড়ির দিকে। এখন থেকে সেও তো শ্রমজীবী, কেউ আর তাকে পরগাছা বলে দোষ দিতে পারবে না।

করাত-কলের এলোমেলো ছড়ানো বাড়িগুলোর ওপর দিয়ে তখন সূর্য উঠে আসছে। একটু বাদেই লেচিনস্কিদের খামারবাড়ির পেছনে পাভেলদের ছোট বাড়িটা দেখা দেবে।

‘মা নিশ্চয়ই উঠে গেছে, আর আমি এই কাজ সেরে বাড়ি ফিরছি’, শিস দিতে দিতে জোরে পা চালিয়ে পাভেল ভাবছিল, ‘ইস্কুল থেকে বের করে দেওয়াটা খুব মন্দ হয়নি দেখছি। হতচ্ছাড়া পাদরিটা তো একমুহূর্ত শান্তি দিত না আমায়, চুলোয় যাক ব্যাটা এখন।’ বাড়ি পৌছে বেড়ার দরজা খুলতে খুলতে পাভেল মনে মনে বলল, ‘আর ওই শগচুলোটা, ওর মুখে ঠিক ঝাড়ব একটা ঘুসি।’

আঙিনায় মা সামোভারটায় আগুন ধরাতে ব্যস্ত ছিল, পাভেলকে আসতে দেখে মুখ তুলে উষ্ণ স্বরে জিজ্ঞেস করল, ‘কিরে, কেমন?’

‘দিব্যি’, বলল পাভেল।

মা আরও কী যেন বলে সতর্ক করে দিতে যাচ্ছে, এমন সময় খোলা জানলাটা দিয়ে পাভেল তার দাদা আরতিওম-এর চওড়া পিঠের দিকটা দেখতে পেল।

‘আরতিওম এসেছে বুঝি?’ উষ্ণ হয়ে জিজ্ঞেস করল সে।

‘হ্যাঁ, কাল রাতে এসেছে। ও থাকবে এখন এখানে। ডিপোয় কাজ করবে।’

একটু ইতস্ততই করে পাভেল ঘরের দরজাটা খুলল।

দরজার দিকে পেছন ফিরে টেবিলের ধারে বসে ছিল আরতিওম। পাভেল ঢুকতে বিরাট দেহটা ঘুরিয়ে সে তার কালো ঘন ভুরুস্নর নিচে দুই চোখের কঠোর দৃষ্টিতে তাকাল পাভেলের দিকে, ‘এই যে, তামাকু-ছোঁড়া এসে গেছে। তারপর, চলছে কেমন?’

কথাবার্তাটা কোন দিকে মোড় নেবে আন্দাজ করে শঙ্কিত হয়ে উঠল পাভেল। 'আরতিওম সবই জানে দেখছি,' ভাবল মনে মনে, 'আরতিওমের কাছ থেকে বকুনি জুটতে পারে, এমনকি পিটুনিও!'

আরতিওমকে ভয় করত পাভেল। কিন্তু আরতিওম মারধোরের মধ্যে গেল না। টুলটার উপরে বসে টেবিলে কনুই ভর দিয়ে পাভেলকে লক্ষ করতে লাগল কৌতুক আর বিদ্রূপ-মেশানো চাউনিতে।

'তাহলে, তুই তো পাস করে বেরিয়ে এলি দেখছি ইউনিভার্সিটি থেকে, অ্যাং? সেখানে শেখার যা ছিল সব শিখে নেবার পরে এখন থেকে তাহলে এঁটোকাঁটা সাফ করা নিয়েই থাকবি, কি বল?' আরতিওম বলল।

মেঝেয় একটা তক্তার দিকে একদৃষ্টে তাকিয়ে একটা পেরেকের মাথা লক্ষ করতে থাকল পাভেল। টেবিল ছেড়ে দাঁড়িয়ে উঠে আরতিওম চলে গেল রান্নাঘরে।

স্বস্তির নিশ্বাস ছেড়ে পাভেল ভাবে : 'যাক, মারধোর করবে না বলেই মনে হচ্ছে।'

পরে চা খেতে-খেতে আরতিওম পাভেলকে কুলের সমস্ত ঘটনাটা জিজ্ঞেস করল। যা যা ঘটেছিল সবই বলল পাভেল।

মা দুঃখিতভাবে বলল, 'বড় হয়ে যদি এমন বেয়াড়া হয়ে উঠিস, তাহলে কী হবে তোর? কী করব তোকে নিয়ে? কার মতো যে হলি, তাই ভাবি! হায় ভগবান, কী ভোগান্তিই না ভোগাচ্ছে আমায় ছেলেটা!' বিলাপ করল মা।

খালি কাপটা ঠেলে দিয়ে পাভেলের দিকে ফিরে বলল আরতিওম, 'আচ্ছা, শোনো ভাই। যা হয়ে গেছে তার আর কোনো চারা নেই। কিন্তু এখন থেকে খেয়াল রেখো, ভালো করে কাজ করতে হবে। ওসব বাঁদরামি চলবে না। এখান থেকে যদি তাড়িয়ে দেয়, তাহলে ধোলাই দেব তোমায় একচোট—মনে থাকে যেন। মাকে যথেষ্ট কষ্ট দিয়েছ। সবসময় একটা গোলমাল পাকাতেই আছ দেখছি। ওসব আর চলবে না। এখানে বছরখানেক কাজ করা হলে পর চেষ্টা করব যাতে তোকে আমাদের ডিপোয় শিক্ষানবিশ হিসেবে নেওয়া হয়—জীবন-ভোর খাবার-দোকানের এঁটো-ময়লা পরিষ্কার করে তো আর চলবে না। একটা-কিছু কাজ শিখতে হবে। এখন তোর বয়েস খুব কম—দেখব বছরখানেক বাদে কী করা যায় না-যায়। নিতেও পারে তোকে হয়তো। আমি তো এখন এখানেই কাজ করব। মাকে আর কাজ করতে যেতে হবে না। যথেষ্ট খেটে মরেছে মা যতসব শুয়ারগুলোর ঝি-গিরি করে। কিন্তু তোকে মানুষ হতে হবে পাভেল—এইটে খেয়াল রাখিস।'

দাঁড়িয়ে উঠল আরতিওম, তার বিরাট দেহটার তুলনায় ঘরের অন্য সবকিছুকে নেহাত ঝাটো দেখাল। চেয়ারে ঝোলানো কোর্তাটা গায়ে দিয়ে মাকে বলল, 'ঘন্টাখানেকের জন্যে আমাকে একবার বেকসতে হবে।'

একটু ঝুঁকে দরজাটা পেরিয়ে চলে গেল সে। উঠোনে জানলার পাশ দিয়ে যেতে-যেতে ভেতরে তাকিয়ে পাভেলকে বলল, 'একজোড়া বুটজুতো আর একখানা ছুরি এনেছি তোর জন্যে। মা তোকে দেবে এখন।'

\*

\*

\*

স্টেশনের রেষ্টোরাঁটা সারা দিনরাত খোলা থাকে।

পাঁচটা আলাদা আলাদা রেললাইন এসে মিশেছে এই জংশনে, সর্বদাই লোকের ভিড়ে জমজমাট স্টেশনটা। কেবল রাত্রিবেলায় দুটো ট্রেন আসার ফাঁকে একসময় দু-তিন ঘণ্টার জন্য জায়গাটা কিছুটা শান্ত হয়ে আসে। চতুর্দিকে শত শত ট্রেন এই স্টেশনের ওপর দিয়ে যুদ্ধ-সীমান্ত থেকে হাজার হাজার আহত আর পঙ্গু মানুষ ফিরিয়ে এনেছে আর ফ্রন্টের দিকে একঘেয়ে ধূসর গ্রেটকোট-পরা নতুন নতুন মানুষের নিরবচ্ছিন্ন স্রোত বয়ে নিয়ে গেছে।

দু-বছর কাজ করা হল এখানে পাভেলের—এই দু-বছরে সে বাসন-ধোবার ঘর আর রান্নাঘর ছাড়া আর কিছুই দেখেনি। মাটির নিচুতলার প্রকাণ্ড রান্নাঘরে কুড়িজনেরও বেশি লোক হন্যে হয়ে কাজ করে। খাবারঘর আর রান্নাঘরের মধ্যে দশজন ওয়েটার অনবরত হুড়মুড়িয়ে যায় আর আসে।

এখন আট ক্রুবলের জায়গায় দশ ক্রুবল করে পাচ্ছে পাভেল। এই দু-বছরে সে লম্বায় আর চওড়ায় বেড়েছে, অনেক কিছু ঝুঁকিও গেছে তার ওপর দিয়ে। ছ'মাস পাভেল রান্নাঘরে খানসামার কাজ করেছে, কিন্তু তাকে আবার ফেরত পাঠানো হয় বাসন-ধোবার ঘরে। বাতিল করে দিয়েছে সর্বশক্তিমান বড় বাবুর্চি। পছন্দ হয়নি গোয়ার ছোঁড়াটাকে—কী জ্ঞানি, বলা যায় না, বেশি-বেশি ঘুসি-টুসি মারলে আবার কখন হয়তো ছুরি-টুরি মেরে বসবে। সত্যিই, পাভেলের দারুণ রাগী মেজাজের জন্য তার চাকরিটা হয়তো অনেক আগেই চলে যেত, কিন্তু সে-যে থেকে যায় তা শুধু ওর পরিশ্রম করার প্রচণ্ড ক্ষমতার জন্যই। অন্য যে-কোনো লোকের চেয়ে সে বেশি পরিশ্রম করতে পারত, ক্লান্ত হত না যেন কখনও।

যেসব সময়ে খাবারঘরে সবচেয়ে বেশি ভিড় জমে, ও তখন ডিশে ভর্তি বারকোশগুলো নিয়ে এক-এক লাফে চার-পাঁচটা সিঁড়ি পার হয়ে ঝড়ের বেগে নিচে, রান্নাঘরে যায় ও ফিরে আসে।

রাত্রিবেলায় যখন রেস্টোরার হলঘরদুটোয় গোলমাল থেমে আসে, ওয়েটাররা তখন এসে জড়ো হয় নিচে রান্নাঘরের ভাঁড়ারগুলোয়—উদ্দাম আর বেপরোয়া! তাসবাজি শুরু হয়ে যায় তখন। পাভেল প্রায়ই ওদের টেবিলে প্রচুর টাকা দেখেছে। আশ্চর্য হয়নি সে এত টাকার ছড়াছড়ি দেখে। পাভেল জানে, প্রতি শিফট-এ এক-একজন ওয়েটার মোট তিরিশ থেকে চল্লিশ ক্রুবল পায় বখশিশের এক ক্রুবল আর আধ-ক্রুবল মিলিয়ে। এই টাকাটা তারা পরে খরচ করে মদ খেয়ে আর জুয়ো খেলে। ঘৃণা করে এদের পাভেল।

‘হতভাগা শুয়ার যতসব!’ মনে মনে ভাবে সে, ‘আরতিওম—প্রথমশ্রেণীর গুস্তাদ কারিগর—সে কিনা সর্বসাকুল্যে পায় মাসে আটচল্লিশ ক্রুবল, আর আমি পাই দশ। আর এরা শুধু খাবারের থালাগুলো বয়ে নিয়ে যায় আর আসে—তাতেই একদিনেই পায় এত। তারপরে সবটা উড়িয়ে মদে আর তাসে।’

পাভেলের কাছে তার মালিকদের মতোই এই ওয়েটাররাও ভিন্ন আর শত্রুভাবাপন্ন জগতের লোক। ‘এখানে তো এই শুয়ারগুলো হজুরে-হাজির থাকে সবসময়, আর ওদিকে এদের বৌ-ছেলেপুলে শহরে চলাফেরা করে বড়লোকের মতো।’

মাঝে মাঝে ওদের বৌ আর ছেলেরা এখানে আসে। ছেলেদের গায়ে থাকে কেতাদুরস্ত কুলের উর্দি, বৌগুলো ভালো থাকে, ভালো খায়-দায়, তাই বেশ হটপুট

আর কোমল-শরীর। 'যেসব ভদ্রলোকদের ওরা খানসামাগিরি করে, তাদের চেয়ে এদের পয়সা বেশি—বাজি রেখে বলতে পারি,' ভাবে পাভেল। রাত্রে রান্নাঘরের অন্ধকার কোণে-কোণে কিংবা ভাঁড়ারঘরে যেসব কাণ্ড ঘটে, তা দেখেও ছেলেটা আর অবাক হয় না। খুব ভালো করেই ও জানে যে ডিশ-ধোবার কিংবা খদ্দেরদের মদ জোগাবার কাজে যে-মেয়েরা আছে, তাদের বেশিদিন চাকরি থাকবে না যদি তারা এখানে ক্ষমতাধর প্রত্যেকের কাছে কয়েক রুবলের জন্য নিজেদের বিক্রিয়ে না দেয়।

জীবনের প্রতি, নৃতনত্ব ও অজ্ঞাতপূর্ব সবকিছুর প্রতি পাভেলের আগ্রহ অসীম—সে এখানে জীবনের গভীরতম তলদেশ পর্যন্ত দেখে নিয়েছে, কুৎসিত সে-গর্তটার একেবারে তলা থেকে পাক-ভরা নর্দমার পচা ভাপসা গন্ধ উঠে এসেছে।

ডিপোয় ভাইকে শিক্ষানবিশ হিসেবে ঢুকিয়ে নিতে পারেনি আরতিগুম। পনেরো বছরের কমবয়সী কাউকে সেখানে নেওয়া হয় না। কিন্তু পাভেল ওই কালি-পড়া ইন্টার প্রকাণ্ড বাড়িটার দিকে আকৃষ্ট হয়েছে। কবে-যে এই রেস্তোরাঁটা থেকে বেরিয়ে আসতে পারবে তারই আশায় সে দিন গানে।

সে প্রায়ই ডিপোয় গিয়ে আরতিগুমের সঙ্গে দেখা করে, তার সঙ্গে ঘুরে-ঘুরে গাড়িগুলো দেখে, পারলেই তার কাজে সাহায্য করে।

বিশেষ করে ফ্রসিয়া চলে যাবার পর থেকে তার বড় একা লাগে। হাসিখুশি আর আমুদে এই মেয়েটা চলে যাবার পরে পাভেল আরও বেশি করে অনুভব করেছে ফ্রসিয়ার সঙ্গে বন্ধুত্বটা তার কী জিনিশ ছিল। আজকাল সকালে বাসন-ধোবার ঘরটায় এসে পাভেল সেখানে উদ্ভাস্ত মেয়েগুলির তীক্ষ্ণগলার ঝগড়া শোনে আর একটা একাকিত্ব আর শূন্যতার বোধ তাকে কুরে কুরে খায়।

\*

\*

\*

একদিন রাত্রে, কাজে যখন চাপ কম, বয়লারে কাঠ দিতে-দিতে খোলা চুল্লিটার সামনে পাভেল উবু হয়ে বসে আছে শিখাগুলির দিকে চোখ কুঁচকে তাকিয়ে—উনুনের উষ্ণতায় ভালোই লাগছিল। বাসন-ধোবার ঘরে কেউ ছিল না। আপনা থেকেই ফ্রসিয়ার কথা এসে গেল পাভেলের মনে; কিছুদিন আগে দেখা একটা দৃশ্য ভেসে উঠল তার মনের পটে।

শনিবার রাত্রে কাজের বিরতির সময়টুকুতে পাভেল রান্নাঘরের দিকে সিঁড়ি বেয়ে নামছে, এমন সময় কৌতূহলী হয়ে সে জ্বালানি-কাঠের একটা স্তুপ বেয়ে উঠে নিচতলার ভাঁড়ারঘরটার দিকে তাকাল যেখানে জুয়াড়ীরা সাধারণত জড়ো হয়।

তখন পুরোদমে খেলা চলেছে। জালিভানভ তখন বাজি জিতছে, উদ্বেজনায তার মুখ লাল।

ঠিক সেই সময় সিঁড়িতে পায়ের শব্দ শোনা গেল। ঘুরে তাকিয়ে প্রশংসাকে দেখে পাভেল সিঁড়ির নিচে সঁদিয়ে গেল যতক্ষণ-না লোকটা রান্নাঘরে ঢুকে যায়। সিঁড়ির নিচে অন্ধকার, তাই-প্রশংসা তাকে দেখতে পেল না। সে যখন সিঁড়ির বাঁকটা ঘুরছে তখন পাভেল তার চওড়া পিঠ আর বিরাট নাখাটা দেখতে পেল।

এই সময়ে কে যেন হালকা-পায়ে দ্রুত সিঁড়ি বেয়ে নেমে এল ওয়েটারটার পিছু পিছু। একটা পরিচিত গলার ডাক জনতে পেল পাভেল, 'দাঁড়াও, প্রশংসা!'

প্রশকা খেমে ঘুরে দাঁড়িয়ে সিঁড়ির ওপর-মুখো তাকাল।

‘কী চাই?’ খেকিয়ে উঠল সে।

পায়ের শব্দটা নেমে আসতেই ফ্রসিয়াকে দেখা গেল।

ওয়েটারটার আঙ্গিন চেপে ধরল সে। ভাঙা আর ক্লঙ্কস্বরে বলল, ‘লেফটেন্যান্ট তোমায় যে-টাকাটা দিয়েছে, সেটা কই, প্রশকা?’

হাতটা ছিনিয়ে নিয়ে প্রশকা বলল, ‘কিসের টাকা? তোমাকে তো দিয়েছি টাকা, নাকি দিইনি?’ তীক্ষ্ণ আর ভয়ঙ্কর তার গলার স্বর।

‘কিন্তু ও তো তোমাকে তিন-শো রুবল দিয়েছিল,’ চাপাকান্নায় ভেঙে পড়ল ফ্রসিয়ার গলা।

‘তাই নাকি? তিন-শো!’ নাক সিটকে বিদ্রূপ করল প্রশকা, ‘সবটাই পেতে চাও অ্যা? ডিশ-ধোনেওয়ালীর পক্ষে বড্ড বেশি আশা করা হয়ে যাচ্ছে নাকি, সুন্দরী? ওই পঞ্চাশ যা দিয়েছি, তাই প্রচুর। তোমার চেয়ে ঢের ভালো দেখতে—এমনকি লেখাপড়া-জানা মেয়েরাও অত পায় না। যা পেয়েছ তাতেই তোমার কৃতজ্ঞ থাকা উচিত—এক রাগিরের জন্যে পুরো পঞ্চাশ রুবল তো বাসা! বোকা পেয়েছ! আচ্ছা, আরও দশ দিচ্ছি—যাকগে, নাহয় কুড়িই হল, বাস! বোকা না হও তো এমনি আরও রোজগার করতে পারবে। আমি সাহায্য করব।’ বলেই প্রশকা ঘুরে অদৃশ্য হয়ে গেল রান্নাঘরটায়।

‘বদমাইশ! গুয়ার!’ চিৎকার করে উঠল ফ্রসিয়া তার উদ্দেশে। কাঠের স্তূপে ঠেস দিয়ে জ্বালাধরা কান্নায় ভেঙে পড়ল সে।

কাঠের পাজার উপরে ফ্রসিয়া পাগলের মতো মাথা ঠুকছে—সিঁড়ির নিচে অন্ধকারে দাঁড়িয়ে এ-দৃশ্য দেখতে দেখতে পাভেল যে কী আবেগে আচ্ছন্ন হয়ে গিয়েছিল তা ভাষায় প্রকাশ করা যাবে না। কিন্তু নিজেকে দেখতে দেয়নি পাভেল। শুধু তার আঙুলগুলো কেঁপে চেপে-চেপে ধরেছিল সিঁড়ির পাশের লোহার শিকগুলো।

‘ওরা তাহলে ফ্রসিয়াকেও বেচেছে—জাহান্নামে যাক ওরা! ফ্রসিয়া, ফ্রসিয়া...’

প্রশকার প্রতি ঘৃণা আরও বেশি জ্বালা ধরিয়ে দিল পাভেলের মনে। চতুর্দিকের সবকিছু অত্যন্ত ঘৃণ্য আর ন্যাক্কারজনক। ‘আমার গায়ে তেমন জোর থাকলে মেরে খুন করতাম শয়তানটাকে! আহা, আরতিওমের মতো লম্বা-চওড়া আর জোয়ান হতাম যদি!’

বয়লারের নিচে আগুনের শিখা জ্বলে উঠে মিইয়ে এল, তাদের লাল জিভগুলো কেঁপে-কেঁপে পরস্পরের গায়ে পাক খেয়ে-খেয়ে লম্বা আর নীলচে একটা সর্পিল আকার নিতে থাকল। পাভেলের মনে হল কে যেন তার দিকে জিভ বের করে ভেংচি কেটে বিদ্রূপ করছে।

ঘরটা নিস্তব্ধ—শুধু আগুনে কাঠ-ফাটার শব্দ উঠছে মাঝে মাঝে আর কলটার মুখে জ্বল পড়ছে ফোঁটায় ফোঁটায় একটা মাপা সময়ের ব্যবধানে।

চকচকে করে মাজা শেষ পাত্রটা ক্রিমকা তাকের ওপর রেখে হাত মুছল। আর কেউ নেই রান্নাঘরে। এই সময়টায় যে-বার্ভার্টির হাজিরা রাখার কথা, সে আর তার সহকারী মেয়েরা পোশাক রাখার ঘরটায় ঘুমুচ্ছে। রাত্রির তিনঘণ্টার শান্তি নেমেছে রান্নাঘরটায়। এই সময়টুকু ক্রিমকা রোজ ওপরতলায় পাভেলের সঙ্গে কাটায়। রান্নাঘরের ফাইফরমাশ-খাটা এই কিশোরটির সঙ্গে কালো-চোখ ওই বয়লার-বরদার ছেলেটির

একটা ঘনিষ্ঠ বন্ধুত্ব গড়ে উঠেছে। উপরে এসে ক্রিমকা দেখে, মুখ-খোলা চুল্লিটার সামনে উবু হয়ে বসে আছে পাভেল। দেয়ালের গায়ে তার পরিচিত ঝাঁকড়া-চুলো দেহের ছায়াটা পড়তে দেখে পাভেল তার দিকে না-ফিরেই বলল ‘বোস, ক্রিমকা।’

ছেলেটি কাঠের পাঁজার উপর উঠে হাত-পা ছড়িয়ে দিয়ে নির্বাক পাভেলের দিকে তাকিয়ে রইল।

হেসে বলল ক্রিমকা, ‘কপালের লিখন পড়ছিস বুঝি আগুনে?’

আগুন-শিখার হিসহিসে জিভগুলোর দিকে আটকে-যাওয়া দৃষ্টি ছিনিয়ে এনে ক্রিমকার দিকে তাকাল পাভেল—বড় বড় চকচকে তার চোখদুটোয় উপচে উঠেছে এক অব্যক্ত বেদনা। ক্রিমকা তার বন্ধুকে এত বিষণ্ণ দেখেনি আর কোনো দিন।

‘কেমন যেন অদ্ভুত দেখাচ্ছে তোকে আজ, পাভেল?’ একটু খেমে জিজ্ঞেস করল সে, ‘ঘটেছে নাকি কিছু?’

পাভেল উঠে এসে ক্রিমকার পাশে বসল। নিচুগলায় বলল, ‘ঘটেনি কিছু। এখানে আমার পক্ষে টেকা খুব কঠিন, ক্রিমকা।’ হাঁটুর উপরে রাখা তার হাতদুটো মুষ্টিবদ্ধ হয়ে উঠল।

‘কী হয়েছে আজ তোর?’ কনুইয়ের উপর ভর দিয়ে উঠে পীড়াপীড়ি করতে লাগল ক্রিমকা।

‘আজই শুধু? এ-কাজে ঢোকার পর থেকে বরাবরই আমার এইরকম লাগছে। এখানে কী কাণ্ডকারখানা হচ্ছে একবার তাকিয়েই দ্যাখ না! আমরা গাধার মতো খাটি, আর ভালো কথা বদলে পাই ঘুসি—যে-কেউ ধরে তোকে মার লাগাতে পারে, কিন্তু তোর হয়ে কথাটি বলার কেউ নেই। মালিকরা আমাদের নেয় তাদের কাজ করে দেবার জন্যে, কিন্তু গায়ে যার জোর আছে তারই অধিকার আছে আমাদের ধরে পেটাবার। ছোটোছোটো করে মরে গেলেও সবাইকে খুশি করা যাবে না কিছুতেই, আর যাদের খুশি করতে পারবে না, তাদের হাতে মার খেতেই হবে সবসময়। যাতে কেউ তোমার কাজে খুঁত ধরতে না পারে তার জন্যে যতই চেষ্টা করো-না কেন, সবাইকে তো সন্তুষ্ট করা সম্ভব নয়। আর, একজনের বেলায় দেরি হলেই গর্দানের উপর এসে পড়বে একটি ঘুসি...’

‘চেষ্টাস নে অমন করে’, ভয় পেয়ে বাধা দিল ক্রিমকা, ‘কেউ এসে পড়লে শুনে ফেলবে।’

লাফিয়ে দাঁড়িয়ে উঠল পাভেল।

‘অনুক গে, আমি ছেড়ে তো দেবই কাজটা। এখানে আটকে থাকার চেয়ে বরং রাস্তায় বরফ সাফ করব সেও ভালো...যতসব জোচ্ছোরের আস্তানা! কী টাকাটা করেছে এরা একবার দ্যাখ! আমাদের সঙ্গে তো এমন ব্যবহার করে যেন আমরা নেহাতই নোংরা জিনিশ, আর মেয়েগুলোকে নিয়ে যা হচ্ছে তাই করে। যারা ভালো মেয়ে তারা যদি এদের খুশিমতো না চলে, তাহলে তাদের সঙ্গে সঙ্গে তাড়িয়ে দেয় আর তাদের জায়গায় কাজে নেয় উপোসী উদ্ধাস্ত মেয়েদের যাদের আর কোথাও যাবার জায়গা নেই। এ-ধরনের মেয়েরা যা-হোক করে থেকে যায়, কারণ এখানে অন্তত তারা দুটো খেতে পায় আর এদের অবস্থা এতই খারাপ যে এরা একটুকরো রুটির জন্যে সবকিছুই করতে পারে।’



এমন ক্রোধের সঙ্গে পাভেল কথাগুলি বলে গেল যে ক্রিমকা তাড়াতাড়ি উঠে রান্নাঘরের দিকের দরজাটা বন্ধ করে দিল—পাছে কেউ কথাগুলো শুনে ফেলে এই ভয়ে। আর পাভেল তার মনে ছাপিয়ে-ওঠা সমস্ত তিক্ততা ঢেলে দিয়ে বলে চলল—

‘আর ক্রিমকা, তুই তো সমস্ত মার পড়ে-পড়ে পিঠ পেতে নিস। কখনো মুখ খুলিসনে কেন?’

টেবিলের কাছে একটা টুলের উপর বসে পড়ল পাভেল, হাতের তেলোয় মাথাটা রাখল ক্লান্তভাবে। আগুনে কিছু কাঠ গুঁজে দিয়ে ক্রিমকাও বসল টেবিলটার পাশে।

‘আজ পড়বি না?’ জিজ্ঞেস করল সে পাভেলকে।

‘পড়বার কিছু নেই’, বলল পাভেল, ‘বইয়ের দোকানটা বন্ধ।’

‘আজকে বন্ধ কেন?’ একটু অবাক হল ক্রিমকা।

‘পুলিশ ধরে নিয়ে গেছে বইঅলাকে। কী যেন পেয়েছে তার কাছে’, বলল পাভেল।

‘ধরে নিয়ে গেছে? কেন?’

‘লোকে তো বলছে রাজনীতি করার জন্যে।’

কথাটার মানে বুঝতে না-পেরে ক্রিমকা একদৃষ্টে তাকিয়ে রইল পাভেলের দিকে। ‘রাজনীতি? সে আবার কী?’

কাঁধ ঝাঁকিয়ে পাভেল বলল, ‘কী তা শয়তানই জানে! লোকে তো বলে, জারের বিরুদ্ধে গেলেই নাকি রাজনীতি করা হয়।’

চমকে গেল ক্রিমকা, ‘সেরকম কোনো কাজও করে নাকি লোকে?’

‘কী জানি,’ বলল পাভেল।

দরজাটা খুলে গেল, বাসন-ধোবার ঘরে ঢুকল গ্লাশা, ঘুম পেয়ে তার চোখদুটো ফোলা-ফোলা।

‘ঘুমোসনি কেন তোরা দুটি? ট্রেনটা আসার আগে ঘণ্টাখানেক তো ঘুমিয়ে নেবার সময় আছে। একটু বরং জিরিয়ে নে পাভেল। আমি ততক্ষণ বয়লারটা দেখব এখন।’

\*

\*

\*

পাভেল যা ভেবেছিল তার আগেই তাকে চাকরিটা ছাড়তে হল। আর এমনভাবে যে ছাড়তে হবে তাও সে ভাবেনি।

একদিন বরফ-ঝরা জানুয়ারির সকালে পাভেল তার কাজের শিফট শেষ করে বাড়ি যাবার জন্য তৈরি হয়ে ছিল, দেখল যে-ছেলেটি এসে তার কাজের ভার নেবে সে তখনও আসেনি। মালিকের গির্নির কাছে গিয়ে পাভেল জানাল, সেই ছেলেটি আসুক বা না-আসুক, সে চলে যাচ্ছে, কিন্তু গির্নি শুনবে না সে-কথা। কাজ চালিয়ে যাওয়া ছাড়া তার আর উপায় রইল না—যদিও পুরো একটা দিন-রাত্রির কাজের শেষে সে একেবারে শ্রান্ত। সন্দের দিকে পাভেল যেন ক্লান্তিতে ভেঙে পড়তে চায়। রাত্রিতে কাজের অবসর সময়টুকুতে তার বয়লারগুলো ভর্তি করে রাখার কথা—যাতে তিনটের ট্রেন আসার সময়ে সেগুলো ফুটন্ত অবস্থায় এসে যায়।

কলের মুখটা খুলে দিল পাভেল, কিন্তু জ্বল নেই; বোঝা গেল পাম্প চলছে না। কলের মুখটা খোলা রেখে কাঠের টিবিবির উপর সে গুলো একটু; কিন্তু ক্লান্তির কাছে হার মানতে হল—অল্পক্ষণের মধ্যেই গভীর ঘুমে আচ্ছন্ন হয়ে গেল পাভেল।

কয়েক মিনিট পরেই কলের মুখে হিসহিস শব্দে জল এসে গেল, কুলকুল শব্দে জল পড়তে লাগল বয়লারটায়, ভর্তি হয়ে উপচে উঠে জল ছড়িয়ে পড়ল বাসন-ধোবার ঘরের টালি-লাগানো মেঝেটায়—এই ঘরটা তখন ফাঁকা ছিল। জল ঝরে পড়তে পড়তে গোটা ঘরের মেঝেটা ভর্তি হয়ে উপচে উঠে দরজাটার ফাঁক দিয়ে হলঘরটার ভেতরে এসে পড়ল। ঘুমে ঝিমস্ত ট্রেনযাত্রীদের প্যাটরা-খলি-পুঁটুলির নিচে জল জমে উঠল। কিন্তু মেঝের উপর শুয়ে-থাকা একজন যাত্রীর গায়ে জল না-লাগা পর্যন্ত কেউ তা লক্ষ করেনি। চোঁচিয়ে লাফিয়ে উঠল লোকটি। এবার ছোট্টাছুটি পড়ে গেল জিনিশপত্রগুলো সামলাবার জন্য, শুরু হয়ে গেল দারুণ হৈ-হুল্লা।

আর জল ঝরে পড়তেই থাকল সমস্তক্ষণ।

দু-নম্বর হলঘরটায় প্রশকা টেবিলগুলো পরিষ্কার করছিল। গুগোল শুনে ছুটে এল সে। জল-জমে-ওঠা জায়গাগুলো লাফিয়ে পার হয়ে দরজাটার উপর পড়ে প্রচণ্ড ধাক্কায় খুলে ফেলল। সঙ্গে সঙ্গে সেই দরজায় আটকে-রাখা ভেতরে জমে-ওঠা জলের রাশি ধারাবেগে এসে পড়ল হলঘরে।

শুরু হয়ে গেল আরও বেশি চোঁচামেচি। ডিউটিরত গুয়েটাররা ছুটে এল বাসন-ধোবার ঘরটায়। প্রশকা ঝাঁপিয়ে পড়ল ঘুমন্ত পাভেলের ওপর।

ঘুসির ওপর ঘুসি এসে পড়ল ছেলেটার মাথায়, অভিভূত করে দিল তাকে।

তখনও আধা-ঘুমন্ত পাভেল বুঝতেই পারেনি কী ঘটল ব্যাপারটা। চোখের সামনে ধাঁধা-লাগানো কতকগুলো বিদ্যুতের চমক আর সমস্ত দেহে নিদারুণ যন্ত্রণার খোঁচা—ওধু এইটুকুর চেতনা তার ছিল।

এত প্রচণ্ড মার খেয়েছে পাভেল যে সে কোনোরকমে নিজেকে টেনে নিয়ে এল বাড়িতে।

সকালবেলায় জুকুটি-গভীর মুখে আরতিওম তার ভাইকে জিজ্ঞেস করল কী হয়েছিল।

সবই বলল পাভেল।

‘কে মেরেছিল তোকে?’ শুকনো গলায় জিজ্ঞেস করল আরতিওম।

‘প্রশকা।’

‘ঠিক আছে। এখন শুয়ে থাক চুপ করে।’

আর কোনো কথা না বলে আরতিওম বেরিয়ে গেল তার কোর্তাটা পরে নিয়ে।

\*

\*

\*

ডিশ-ধোওয়া মেয়েদের একজনকে সে জিজ্ঞেস করল এসে, ‘গুয়েটার প্রখোরকে কোথায় পেতে পারি?’

বাসন-ধোবার ঘরে এসে-যাওয়া মজুরের পোশাক-পরা অচেনা লোকটার দিকে তাকিয়ে গ্যাশা বলল, ‘এখুনি সে এসে যাবে এখানে।’

দরজার চৌকাঠে তার বিরাট দেহের ভর রেখে দাঁড়িয়ে রইল মজুরটি, ‘ঠিক আছে। আমি অপেক্ষা করছি।’

একটা বারকোশের ওপর ডিশের পাহাড় নিয়ে দরজাটা পায়ের ধাক্কায় খুলে প্রখোর বাসন-ধোবার ঘরটায় ঢুকল।

দেখিয়ে দিয়ে গ্লাশা বলল, 'এই-যে সে।'

এক পা এগিয়ে এসে প্রখোরের কাঁধে ভারী হাত একখানা রেখে আরতিওম সোজা তার চোখে চোখ রাখল।

'আমার ভাই পাভেলকে মেরেছ কেন?'

ঝাঁকুনি দিয়ে কাঁধটা ছাড়িয়ে নেবার চেষ্টা করল প্রখোর, কিন্তু প্রচণ্ড একটা ঘুসি খেয়ে চিৎপাত হয়ে পড়ল সে মেঝের উপর; উঠবার চেষ্টা করতেই আরও ভীষণ আরেকটা ঘুসি তাকে যেন গঁথে দিল মেঝের সঙ্গে।

আতঙ্কগ্রস্ত ডিশ-ধোওয়া মেয়েরা ছুটোছুটি আরম্ভ করল চারদিকে।

ঘুরে দাঁড়িয়ে আরতিওম বেরিয়ে এল।

চিৎপাত হয়ে পড়ে রইল প্রশকা মেঝের উপর, খেঁতলে-যাওয়া মুখখানা দিয়ে রক্ত ঝরে পড়ছে।

সেদিন সন্ধ্যায় ডিপো থেকে বাড়ি ফিরল না আরতিওম।

মা জ্ঞানতে পারল, তাকে পুলিশে আটকেছে।

ছ'দিন পরে গভীর রাতে ফিরে এল আরতিওম—মা তখন ঘুমিয়ে পড়েছে। পাভেল উঠে বসেছিল বিছানায়, তাকে আরতিওম কোমল গলায় বলল, 'এখন ভালো তো?' পাভেলের পাশে বসে আরতিওম বলল, 'এর চেয়েও খারাপ ব্যাপার হয়।' তারপরে একমুহূর্ত চুপ করে থেকে সে বলল, 'যাক গে, তুই বিদ্যুৎ-স্টেশনে কাজ করবি। আমি ওদের বলে রেখেছি তোর কথা। সত্যিকারের একটা কাজ শিখবি তুই ওখানে।'

আরতিওমের বলিষ্ঠ হাতখানা পাভেল দু-হাতে চেপে ধরল।

## দ্বিতীয় অধ্যায়

ঘূর্ণি-হাওয়ার মতো সেই আশ্চর্য খবরটা ছড়িয়ে পড়ল এই ছোট্ট শহরটায় : 'জ্বারকে উৎখাত করা হয়েছে!'

শহরের লোকে বিশ্বাস করতে চাইল না কথাটা।

তারপরে শীতের একদিন ঝড়ের মধ্যে গুঁড়ি মেরে একটা ট্রেন এসে থামল স্টেশনে আর তার ভেতর থেকে প্র্যাটফর্মে নেমে এল দুজন ছাত্র—তাদের পরনে সামরিক গুভারকোট, কাঁধে ঝোলানো রাইফেল, সঙ্গে একদল বিপ্লবী সৈন্য, তাদের বাহুতে লাল ফিতে বাঁধা। তারা স্টেশনের পুলিশদের, একজন বৃদ্ধ কর্নেলকে আর শহরে মোতায়েন সৈন্যদলের কর্তাকে হেঁচকি করল। এবারে খবরটায় বিশ্বাস হল শহরবাসীদের। হাজারে হাজারে তারা বরফ-ঢাক্স রাস্তা বেয়ে এসে জমা হল শহরের ময়দানে।

আগে যেসব কথা তারা কখনও শোনেনি সেইসব কথা তারা সামগ্রহে শুনল : স্বাধীনতা, সাম্য, ভ্রাতৃত্ব।

কয়েকটা উদ্দাম দিন কেটে গেল—উত্তেজনা আর আনন্দে ভরা দিন। তারপরে একটা ঝিমিয়ে-পড়া ভাব এসে গেল। শুধু যেখানে মেশেভিকরা আর বৃন্দপস্থীরা এসে ঘাঁটি গেড়েছিল, সেই টাউন-হলের মাথায় উড়ন্ত লাল নিশানটা পরিবর্তনটুকু মনে করিয়ে দিতে লাগল। আর সবকিছুই যেমনটি ছিল তেমনই থাকল।

শীতের শেষদিকে অস্থারোহী গার্ডের একটা রেজিমেন্টকে শহরে মোতায়েন করা হল। সকালবেলায় তারা দলে দলে ভাগ হয়ে বেরিয়ে পড়ত রেলস্টেশনের দিকে—যারা দক্ষিণপশ্চিম ফ্রন্ট থেকে পালিয়ে লুকিয়ে ফিরছে তাদের খুঁজে বের করার জন্য।

এই সৈন্যরা সব বিরাট-দেহ, মেদবহুল লোক, মুখ দেখে বোঝা যায় এরা ভালো খায়-দায়। এদের অফিসারদের বেশির ভাগই রাজারাজড়া-জমিদার। কাঁধে তাদের সোনালি পট্টা আর পাৎলুনে রূপোর কাজ, ঠিক জ্বারের সময়ে যেমনটি ছিল—যেন কোনো বিপ্লবই হয়নি।

১৯১৭ সাল কাটতে থাকল। পাভেল, ক্লিমকা আর সের্গেই ব্রুখাক্-এর পক্ষে কিছুই অদলবদল হল না। ওপরঅলা ঠিকই আগেকার মতো রইল। শেষে নভেম্বর থেকে অসাধারণ কিছু কিছু ঘটনা ঘটতে থাকল। নতুন ধরনের একদল লোক দেখা দিল স্টেশনে, তারা কিছু কিছু তৎপরতা লাগিয়ে দিল, এদের সংখ্যা ক্রমশই বাড়তে থাকল—তাদের একটা বড় অংশ যুদ্ধক্ষেত্রের একেবারে সামনের সারির লোক। ‘বলশেভিক’—এই অদ্ভুত নামে তাদের পরিচয়।

কেউ জানে না কোথা থেকে এই ধনিমুখর আর ভারী কথাটা এসেছে।

গার্ড-ফৌজের লোকদের পক্ষে যুদ্ধক্ষেত্র থেকে পালিয়ে-আসা সৈন্যদের আটকানোটা ক্রমশই বেশি করে কঠিন হয়ে উঠতে লাগল। রাইফেলের দুমদাম আর কাচ ভেঙে-পড়ার ঝনঝনানি স্টেশন থেকে ক্রমশই বেশি করে শোনা যেতে লাগল। ফ্রন্ট থেকে দল বেঁধে লোক আসছে আর আটক করতে গেলেই তারাও বেয়নেট নিয়ে লড়ছে। ডিসেম্বরের গোড়ার দিকে তারা আসতে লাগল ট্রেন-বোঝাই হয়ে।

গার্ড-সৈন্যরা তোড়জোড় করে স্টেশনে আসে ফ্রন্ট-ফিরতি সৈন্যদের রুখবার জন্য, কিন্তু মেশিনগানের গুলিতে তারা ছত্রভঙ্গ হয়ে পড়ে। রেলগাড়ির কামরা থেকে যারা ঝাঁকে ঝাঁকে নামে, মরা তাদের গা-সহা।

দূসর কোট-পরা ফ্রন্টের লোক গার্ড-ফৌজকে তাড়িয়ে দিল শহরের মধ্যে। তারপরে ফিরে এল স্টেশনে, যে-যার গন্তব্যস্থানের দিকে রওনা হল ট্রেনের পর ট্রেন ভর্তি হয়ে।

\*

\*

\*

১৯১৮ সালের বসন্তকালে একদিন তিনটি কিশোর-বন্ধু সের্গেই ব্রুখাকদের বাড়ি থেকে তাস খেলে ফিরবার পথে করচাগিনদের বাগানে ঢুকে ঘাসের উপর শুয়ে পড়ল। বড় একঘেয়ে লাগছে তাদের। সাধারণত তারা সময় কাটানোর জন্য যা যা করে, তার সবই নীরস হয়ে উঠছিল। তাই দিন কাটানোর জন্য নতুন ধরনের কোনো উপায়ের সন্ধানে যখন তারা ভীষণভাবে মাথা ঘামাতে শুরু করেছে, ঠিক সেই সময়ে পেছনে

ঘোড়ার খুরের শব্দ শুনতে পেল। রাস্তা বেয়ে একজন ঘোড়সওয়ারকে আসতে দেখা গেল। রাস্তা আর বাগানের নিচু বেড়ার মাঝখানকার খানাটাকে একলাফে পার হয়ে এল ঘোড়াটা। পাভেল আর ক্রিমকার দিকে চাবুকটা নেড়ে সওয়ারটি বলল, 'এই খোকারা, এদিকে এসো তো একটু!'

লাফিয়ে উঠে দৌড়ে এল পাভেল আর ক্রিমকা বেড়াটার কাছে। ধুলোয় ভরে গেছে ঘোড়সওয়ারের শরীর। মাথার পেছনদিকে ঠেলে দেওয়া তার টুপির উপরে, খাকি রঙের কোর্তায় আর ব্রিটিজে ধূসর ধুলোর পুরু স্তর জমেছে। তার ভারী ফৌজি কোমরবন্ধনীটায় ঝুলছে একটা রিভলভার আর দুটো জার্মান হাতবোমা।

'একটু খাবার জল এনে দিতে পারো, খোকারা?' জিজ্ঞেস করল ঘোড়সওয়ার। পাভেল বাড়ির ভেতরে ছুটে গেল জল আনবার জন্য। সেগেই ঘোড়সওয়ারের দিকে একদৃষ্টে তাকিয়ে ছিল। তার দিকে ফিরে ঘোড়সওয়ার বলল, 'তোমাদের শহরে এখন কোন সরকার আছে বলো দেখি খোকা?'

এক নিশ্বাসে সেগেই সমস্ত স্থানীয় খবর বলে গেল এই আগন্তুকটিকে, 'দু-সপ্তাহ ধরে এখানে কোনো সরকার নেই। নিজেরাই নিজেদেরই এখন রক্ষা করি। বাসিন্দারা সবাই দলে-দলে ভাগ হয়ে পালা করে রাত্রে ঘুরে-ঘুরে শহর পাহারা দেয়। আচ্ছা, আপনি কে?' পাল্টা জিজ্ঞেস করল সেগেই।

হাসল ঘোড়সওয়ারটি, 'বেশি জেনে ফেললে আবার তাড়াতাড়ি বুড়িয়ে যাবে, জানো তো?'

বেরিয়ে এল পাভেল এক-মগ জল নিয়ে। তৃষ্ণার্ত ভঙ্গিতে ঘোড়সওয়ার এক চুমুকে মগটা খালি করে ফিরিয়ে দিল পাভেলকে। তারপর ঘোড়ার রাশে ঝাঁকুনি দিয়ে সে দ্রুত বেরিয়ে গেল পাইনবনের দিকে।

'কে লোকটা?' পাভেল জিজ্ঞেস করল ক্রিমকাকে।

কাঁধ ঝাঁকিয়ে সে বলল, 'কী করে জানব?'

'মনে হচ্ছে কর্তৃত্বের বদল হবে ফের। সেইজন্যই তো লেপ্টিনস্কিরা কাল শহর ছেড়ে গেছে। বড়লোকরা পালাচ্ছে। তার মানেই পার্টিজানরা আসছে,' রাজনীতিক প্রশ্নটাকে দৃঢ়ভাবে ফয়সালা করে দিয়ে একটা শেষ সিদ্ধান্ত দেবার ভঙ্গিতে বলল সেগেই।

তার কথায় যুক্তিটা এতই নিশ্চিত রকমের প্রমাণ-নির্ভর যে পাভেল আর ক্রিমকা তার সঙ্গে তৎক্ষণাৎ একমত হল।

এরা কথাটার আলোচনা শেষ করার আগেই বড় রাস্তা থেকে ঘোড়ার খুরের শব্দ ভেসে এল। তিনজনেই ছুটে ফিরে এল বেড়াটার কাছে।

প্রধান বনপরিদর্শকের বাড়িটা গাছের ফাঁকে কোনোক্রমে দেখতে পাওয়া যায়। সেই বাড়িটার পাশ কাটিয়ে বন থেকে বেরিয়ে আসছে গাড়ি-ঘোড়া আর লোকজন, আর অদূরে বড় রাস্তার উপরে আড়াআড়ি রাইফেল-ঝোলানো আরও জন-পনেরো ঘোড়সওয়ার। তাদের সামনে ঘোড়ায় চড়ে আসছে দু'জন : একজন বয়স্ক-লোক, গায়ে খাকি কোর্তা, অফিসারের কোমরবন্ধনী আর বুকের উপর ঝোলানো সামরিক দূরবীন, আর যার সঙ্গে এই ছেলেরা এইমাত্র কথা বলেছে সেই লোকটি তার পাশে। বয়স্ক-লোকটির বুকের ওপর একটা লাল ফিতে পরানো।

‘কী বলেছিলাম তখন?’ পাভেলের পাঁজরায় কনুইয়ের ঠেলা দিয়ে বলল সেগেই, ‘দেখেছিস লাল ফিতেটা? বলেছি না, পার্টিজান ওরা! আমার চোখ ফেটে যাক, বুঝলি...?’ আর আনন্দে চোঁচাতে চোঁচাতে বেড়া ডিঙিয়ে যেন পাখির মতো হাওয়ায় ভর করে রাস্তায় লাফিয়ে পড়ল সে। বাকি দু’জন তাকে অনুসরণ করল। সবাই মিলে রাস্তার ধারে দাঁড়িয়ে এগিয়ে-আসা ঘোড়সওয়ারদের দিকে তাকিয়ে রইল।

সওয়াররা যখন বেশ কাছাকাছি এসে গেছে, তখন তাদের সেই চেনা-লোকটি ওদের দিকে মাথা নেড়ে হাতের চাবুকটা দিয়ে লেটিনস্কিদের বাড়িটা দেখিয়ে জিজ্ঞেস করল, ‘ওখানে কে থাকে?’

সওয়ারের পাশাপাশি থাকার চেষ্টায় পাভেল ছুটতে ছুটতে বলল, ‘উকিল লেটিনস্কি। কাল পালিয়ে গেছে। নিশ্চয়ই আপনাদের ভয়ে...’

‘কী করে জানলে আমরা কে?’ হাসতে হাসতে জিজ্ঞেস করল বয়স্ক-লোকটি।

‘ওই তো, ওটা কী?’ লাল ফিতেটার দিকে আঙুল দিয়ে দেখিয়ে বলল পাভেল, ‘সবাই বলতে পারে...’

লোকজন বেরিয়ে পড়ল রাস্তায়, কৌতূহলী-চোখে তাকিয়ে রইল শহরে-টোকা এই ফৌজিদলটার দিকে। এই তিনটি কিশোর-বন্ধুও দাঁড়িয়ে এই ধুলো-মাখা ক্লাস্ত লাল-রক্তীদলটাকে এগিয়ে যেতে দেখল।

তারপরে যখন রাস্তার খোয়া-নুড়ির উপর দিয়ে সৈন্যদলটির একমাত্র কামান আর মেশিনগান বয়ে-নিয়ে-যাওয়া গাড়িগুলো শব্দ তুলে চলে গেল, ছেলেরা তখন পার্টিজানদের পিছু ধরল। দলটি যতক্ষণ-পর্যন্ত-না শহরের মাঝখানটায় এসে থেমে তাদের থাকবার ব্যবস্থা করতে আরম্ভ করল, ততক্ষণ পর্যন্ত এরা কেউ বাড়ি ফিরল না।

\*

\*

\*

সেইদিন সন্ধ্যাবেলায় লেটিনস্কিদের প্রশস্ত বসার ঘরে ভারী আর পায়-খোদাই-করা প্রকাণ্ড টেবিলের চারধারে চারজন লোক বসেছিল : সৈন্যদলের অধিনায়ক কমরেড বুলগাকভ—বয়স্ক, চুলে পাক ধরতে শুরু করেছে, এবং দলের অন্য তিনজন কম্যান্ডার।

এই অঞ্চলের একটা ম্যাপ টেবিলের উপর বিছিয়ে নিয়ে তার উপর নখ দিয়ে চেপে দাগ কাটলেন বুলগাকভ।

‘কমরেড ইয়েরমাচেন্কে, তুমি বলছ, আমাদের এই জায়গাটায় একটা লড়াইয়ের ঘাঁটি গাড়া উচিত’, উঁচু চোয়াল আর বড় বড় দাঁতঅলা যে-লোকটি সামনে বসেছিল, তাকে উদ্দেশ্য করে বললেন বুলগাকভ, ‘কিন্তু আমার তো মনে হয়, সকালেই আমাদের রওনা দেওয়া দরকার। আরও ভালো হত যদি রাতেই চলা শুরু করা যেত, কিন্তু আমাদের সৈন্যদের খানিকটা বিশ্রাম দরকার। কাজাতিন-এ জার্মানরা আসার আগেই সেখানে সরে আসাটা হচ্ছে আমাদের কাজ। আমাদের যা সামর্থ্য আছে, তাই নিয়ে শত্রুকে রুখতে যাওয়াটা হাস্যকর হবে। একটা কামান আর ত্রিশ রাউন্ড গোলা, দুশো পদাতিক সৈন্য আর ষাটজন ঘোড়সওয়ার। জার্মানরা যখন ইস্পাতের বন্যার মতো এগিয়ে আসছে, তখন এটাকে খুব একটা জোরদার সামরিক শক্তি নিশ্চয়ই বলা

চলে না। অন্যসব হঠে-আসা লাল দলগুলির সঙ্গে যোগ দিতে না-পারা পর্যন্ত আমরা লড়াইয়ের মুখোমুখি দাঁড়াতে পারি না। তাছাড়া, কমরেড, আমাদের অবশ্যই মনে রাখতে হবে, জার্মানরা ছাড়াও পথে আমাদের অসংখ্য প্রতিবিপ্লবী ফৌজিদলকে রুখতে হবে। আমি প্রস্তাব করছি, সকালে প্রথমে স্টেশনের ওধারে রেল-সাঁকোটাকে উড়িয়ে দিয়ে আমরা সরে যাব। ওটা মেরামত করে নিতে জার্মানদের দু'তিনদিন লাগবে। ইতিমধ্যে রেলপথ ধরে তাদের এগিয়ে আসাটা আটকে থাকবে। কী বলো তোমরা, কমরেড? আমাদেরকেই ঠিক করতে হবে...' টেবিলের চারপাশে যারা বসে ছিল তাদের দিকে তাকালেন।

বুলগাকভের কোনাকুনি উল্টোদিকে বসেছিল স্তব্ধকণ্ঠ। ঠোট চিবিয়ে সে প্রথমে ম্যাপটার দিকে, তারপরে বুলগাকভের দিকে তাকাল। শেষে অতিকষ্টে ঠেলে ঠেলে শব্দ বার করে বাধো-বাধো গলায় বলল, 'আ-আমি বুলগাকভের সঙ্গে এ-একমত।'।

এদের মধ্যে সবচেয়ে অল্পবয়সী, মজুরের কোর্তা-পরা লোকটিও মাথা নেড়ে সমর্থন জ্ঞানাল, 'বুলগাকভ ঠিক বলেছেন।'।

কিন্তু ইয়েরমাচেঙ্কো—যে কয়েক ঘণ্টা আগে পাভেলদের সঙ্গে কথা কয়েছিল সে মাথা নাড়ল, 'তাহলে আমরা এই সৈন্যদলটাকে জড়ো করতে গিয়েছিলাম কিসের জন্যে? লড়াই না-করেই জার্মানদের সামনে থেকে সরে আসার জন্যে? আমি যতদূর বুঝেছি, এইখানেই তাদের সঙ্গে মোকাবিলা করতে হবে। পিছু হটতে হটতে তো একেবারে হন্দ হয়ে গেছি। আমার ওপরে যদি ভার থাকত, তাহলে আমি নিশ্চয়ই এখানেই ওদের সঙ্গে লড়াই...' চেয়ারটা পেছনদিকে সজোরে ঠেলে দিয়ে সে দাঁড়িয়ে উঠে ঘরে পায়চারি শুরু করল।

কথাটায় সায় না দিয়ে বুলগাকভ তাকালেন তার দিকে, 'আমাদের মাথা খাটাতে হবে, ইয়েরমাচেঙ্কো। যে-লড়াইয়ে আমরা মার খেয়ে নিশ্চিহ্ন হয়ে যেতে বাধ্য, সেসকম কোনো লড়াইয়ের মধ্যে সৈনিকদের ঠেলে দিতে পারি না আমরা। তাছাড়া, হাস্যকর ব্যাপার হবে সেটা। আমাদের ঠিক পেছনেই রয়েছে ভারী কামান আর সাঁজোয়া-গাড়িতে সুসজ্জিত একটা পুরো ডিভিশন...ছেলেমানুষি করার সময় এটা নয়, কমরেড ইয়েরমাচেঙ্কো।' অন্যদের দিকে তাকিয়ে তিনি বক্তব্য শেষ করলেন : 'তাহলে তাই ঠিক হল, আমরা কাল সকালে এখান থেকে সরে যাচ্ছি..'

'আচ্ছা, এখন পরের প্রশ্নটায় আসা যাক—যোগাযোগ রক্ষার ব্যাপারটা কী করা যায়,' বলে যেতে লাগল বুলগাকভ, 'আমরাই শেষ দল যারা জায়গাটা ছেড়ে যাচ্ছি, সুতরাং জার্মান সৈন্যসারির পেছনে কাজ চালানোটাকে সংগঠিত করা আমাদেরই কাজ। মস্তবড় একটা রেল-জংশন এটা, দুটো স্টেশন আছে শহরটায়। রেলপথে কাজ চালাবার জন্যে একজন নির্ভরযোগ্য কমরেড যাতে থাকেন সে-ব্যবস্থা আমাদের করতেই হবে। কাজটা চালিয়ে যাবার জন্যে এখানে কাকে রেখে যাওয়া যায় সেটা আমাদের এখনই ঠিক করতে হবে। তোমাদের মনে আসছে কারুর কথা?'

ইয়েরমাচেঙ্কো টেবিলটার দিকে আসতে আসতে বলল, 'আমার মনে হয়, নৌবাহিনীর ফিওদর বুখরাই-এর এখানে থাকা উচিত। প্রথমত, সে স্থানীয় লোক। দ্বিতীয়ত, সে ফিটার মিস্ত্রি, স্টেশনে কাজ জুটিয়ে নিতে পারবে একটা। আমাদের

সৈন্যদলের সঙ্গে কেউ তাকে দেখেনি—আজ রাত্রের আগে সে এখানে আসছে না। কাঁধের উপর মাথাটা তার দিব্য খোলসা, সে ঠিকমতো কাজ চালিয়ে যাবে। আমার মনে হয়, সে এই কাজের পক্ষে সবচেয়ে উপযুক্ত লোক।’

মাথা নাড়লেন বুলগাকভ, ‘ঠিক। আমি তোমার সঙ্গে একমত। কোনো আপত্তি নেই তো অন্য কমরেডদের?’ অন্যদের দিকে তাকালেন তিনি, ‘কোনো আপত্তি নেই তাহলে। আচ্ছা, তাহলে এ ব্যাপারটার ফয়সালা হয়ে গেল। বুখরাই-এর কাজের জন্যে লাগতে পারে এমন কিছু টাকা আর পরিচয়পত্র আমরা তার কাছে দিয়ে যাব...আচ্ছা, এবারে তাহলে তৃতীয় আর শেষ আলোচনাটা। এই শহরে জমা করে রাখা অস্ত্রশস্ত্র সম্বন্ধে। কুড়ি হাজার রাইফেলের বেশ বড়রকম একটা স্তূপ জমা আছে এই শহরে জারের সময়কার যুদ্ধের আমল থেকে—সবাই ভুলে গেছে ব্যাপারটা। এক চাষীর চালাঘরে পাজা হয়ে আছে। খবরটা জানলাম সেই চালার মালিকের কাছ থেকে, সে তো গুপ্তলোর হাত থেকে নিস্তার পাবার জন্যে ব্যস্ত। আমরা তো গুপ্তলো জার্মানদের জন্যে ফেলে যেতে পারি না। আমার মতে গুপ্তলো পুড়িয়ে ফেলা উচিত, এবং সেটা এখনই, যাতে সকালের মধ্যেই ব্যাপারটা চুকে যায়। শুধু একটা মুশকিল আছে—আশেপাশের কুঁড়েঘরগুলিতে আগুন ছড়িয়ে পড়তে পারে। এটা হল শহরের বাইরের সীমানায় যেখানে গরিব চাষীরা থাকে।’

স্বব্ধকভ নড়েচড়ে বসল তার চেয়ারে। গড়নটা তার বলিষ্ঠ, তার মুখের খোঁচা-খোঁচা দাড়ি বেশ কয়েকদিন ক্ষুরের স্পর্শ পায়নি। ‘পো-পো-পোড়াবো কেন? তা-তার চেয়ে শ-শহরের লোকদের মধ্যে বি-বিলি করে দেওয়াই তো ভালো।’

বুলগাকভ তাড়াতাড়ি মুখ ফেরালেন তার দিকে, ‘বিলি করে দিতে বলছ?’

‘চমৎকার প্রস্তাব!’ উৎসাহের সঙ্গে সায় দিল ইয়েরমাচেঙ্কো। ‘মজুরদের, আর অন্য যারা চায়, তাদের দিয়ে দাও গুপ্তলো। জার্মানরা যখন জীবন দুর্বিসহ করে তুলবে, তখন পাল্টা মার দেবার মতো অন্তত কিছু-একটা হাতে থাকবে। ওরা তো সবচেয়ে খারাপ অবস্থা করবেই। তারপরে যখন ব্যাপারটা বেশ পাকিয়ে উঠবে, তখন লোকে অস্ত্র-হাতে দাঁড়াতে পারবে। স্বব্ধকভ ঠিক বলেছে : রাইফেলগুলো বিলি করেই দিতে হবে। কিছু রাইফেল গ্রামে নিয়ে গেলেও মন্দ হয় না। চাষীরা লুকিয়ে রাখবে আর জার্মানরা যখন সৈন্যদের জন্যে সবকিছু নিয়ে নিতে থাকবে তখন রাইফেলগুলো কাজে লাগবে।’

বুলগাকভ হাসলেন, ‘তা ঠিক। কিন্তু জার্মানরা নিশ্চয়ই সমস্ত অস্ত্রশস্ত্র জমা দিতে বলবে, আর সবাই তখন হুকুম মানবে।’

‘সবাই না,’ আপত্তি তুলে বলল ইয়েরমাচেঙ্কো, ‘কিছু লোকে মানবে, কিন্তু বাকি লোকে মানবে না।’

সপ্রশ্ন চোখে বুলগাকভ টেবিলের চারপাশে লোকদের দিকে তাকালেন।

‘আমি রাইফেলগুলি বিলি করে দেওয়ার পক্ষে,’ অল্পবয়সী মজুরটি ইয়েরমাচেঙ্কো আর স্বব্ধকভকে সমর্থন করল।

‘আচ্ছা, তাহলে তাই ঠিক হল’, মত দিলেন বুলগাকভ। চেয়ার থেকে উঠে বললেন, ‘এখনকার মতো তাহলে এই। সকাল পর্যন্ত আমরা বিশ্রাম করতে পারি।’



ঝুঝুয়াই এলে তাকে আমার কাছে পাঠিয়ে দিও, তার সঙ্গে কিছু কথা আছে। ইয়েরমাচেঙ্কো, তুমি বরং সান্ত্রীদের পাহারার জায়গাগুলো একবার তদ্বির করে এসো।’

আর সবাই চলে যাবার পর বুলগাকভ পাশের শোবার ঘরে গিয়ে গদিটার উপরে ওভারকোট বিছিয়ে শুয়ে পড়লেন।

\*

\*

\*

পরের দিন সকালে পাভেল বাড়ি ফিরছিল বিদ্যুৎ-স্টেশন থেকে। সেখানে সে আজ পুরো একবছর হল কাজ করছে—চুল্লিতে যারা কয়লা জোগান দেয় তাদের একজন সাহায্যকারী হিসেবে।

রাস্তায় পড়েই সে বুঝল চলছে একটা বিশেষকিছু। শহরজুড়ে একটা অসাধারণ উত্তেজনা। যতই এগুতে থাকে ততই বেশি-বেশি লোক দেখতে পায়, প্রত্যেকের কাঁধে একটা, দুটো, কখনও তিনটে করে রাইফেল। ব্যাপারটা বুঝতে না-পেরে যত তাড়াতাড়ি পারে বাড়ি চলে এল সে। লেটিনস্কিদের বাগানবাড়িটার সামনে পাভেল তার আগের দিনের পরিচিত ফৌজি-লোকজনদের ঘোড়ায় চড়তে দেখতে পেল।

ছুটে বাড়ির মধ্যে গিয়ে পাভেল তাড়াতাড়ি মুখ-হাত ধুয়ে নিল। আরতিওম তখনও বাড়ি আসেনি—মার কাছ থেকে শুনেই আবার ছুটে বেরিয়ে গিয়ে সের্গেই ক্রঝাকের সঙ্গে দেখা করতে এল। সে থাকে শহরের আরেক প্রান্তে।

সের্গেইয়ের বাবা ইঞ্জিন-ড্রাইভারের একজন সাহায্যকারী। নিজের ছোট বাড়ি আর একফালি জমি আছে। সের্গেই বাড়ি নেই। মোটাসোটা ফ্যাকাসে-মুখ তার মা পাভেলের দিকে অপ্রসন্ন-চোখে তাকাল, ‘শয়তান জানে গেছে কোথায়! সকালে উঠেই ছুটে বেরিয়ে গেল যেন ভূতে পেয়েছে। বলে গেল, কোথায় যেন রাইফেল বিলি করছে। ওইখানেই গেছে বলে মনে হচ্ছে। তোদের এই শিকনি-ঝরা লড়নেঅলাদের একচোট ধরে মার দেওয়া দরকার—একেবারেই বয়ে গেছিস তোরা। মায়ের দুধ মুখে শুকোতে-না-শুকোতেই একেবারে বন্দুক ধরবার জন্যে ছুটেছিস! হারামজাদাটাকে বলে দিস, এ-বাড়িতে যদি একটাও কার্তুজ এনে ঢোকায়, তাহলে আমি ওকে জ্যান্ড ধরে চামড়া ছাড়িয়ে নেব। কে জানে কী এনে ঢোকাবে বাড়িতে আর আমাকে তখন তার জন্যে জবাবদিহি করতে হবে। তুইও চলেছিস সেখানে, নাকি?’

কিন্তু সের্গেই-এর মায়ের বকুনি শেষ হবার আগেই পাভেল ছুট লাগাল রাস্তা বেয়ে। বড় রাস্তার উপর দুই কাঁধে দুই রাইফেল ঝোলানো একটা লোকের সঙ্গে তার দেখা। ছুটে গেল পাভেল তার কাছে, ‘কোথায় পেলেন এগুলো, হাঁ কাকা?’

‘ওই ভের্খোভিনয়।’

যত তাড়াতাড়ি পারে চলল পাভেল। দুটো রাস্তার পরেই সে ধাক্কা খেল একটি ছেলের সঙ্গে—বেয়নেট-অঁটা একটা ভারী পদাতিকবাহিনীর রাইফেল টেনে নিয়ে চলেছে ছেলেটি। পাভেল থামাল তাকে, ‘কোথায় পেলেন বন্দুকটা?’

‘পার্টিজানরা এগুলো দিয়ে দিচ্ছিল সবাইকে—ওইখানে, ইঙ্কুলের সামনে। কিন্তু আর তো নেই। সব খতম। সারা রাত্রি ধরে বিলি হয়েছে। এই আমার আরেকটা হল’, গর্বের সঙ্গে ঘোষণা করল ছেলেটি।

অত্যন্ত দমে গেল পাভেল খবরটা শুনে। 'হায়রে কপাল! বাড়ি না গিয়ে সরাসরি ওখানে গেলেই পারতাম।' নিজের ওপর ভারি রাগ হল তার, 'কী সুযোগটাই না হাতছাড়া হয়ে গেল!'

হঠাৎ একটা ফন্দি এসে গেল তার মাথায়। ঝট করে ঘুরে দাঁড়িয়ে দু-তিন লাফে সে ধরে ফেলল এগিয়ে-যাওয়া ছেলেটিকে, একটানে ছিনিয়ে নিল রাইফেলটা তার হাত থেকে।

'তোমার একটাই যথেষ্ট। এটা আমার', এমন স্বরে সে বলল কথাটা যার কোনো প্রতিবাদ নেই। উন্মুক্ত দিবালোকে এই রাহাজানির ব্যাপারে ক্রুদ্ধ হয়ে ছেলেটি ছুটে এল পাভেলের দিকে। কিন্তু সে একলাফে পিছিয়ে এসে বেয়নেটটা উঁচিয়ে ধরল তার প্রতিপক্ষের দিকে।

'দেখিস, নইলে জখম হবি', চোঁচিয়ে উঠল পাভেল।

প্রচণ্ড স্ফোটে কেঁদে ফেলল ছেলেটি, অসহায় ক্রোধে গাল দিতে দিতে ছুটে পালাল। নিজের ওপর ভারি খুশি হয়ে বাড়ির দিকে পা চালাল পাভেল। একলাফে বেড়া ডিঙিয়ে ছুটে ঢুকল চালাঘরটায়, চালার নিচে আড়কাঠের উপর জোঁগাড়-করা জিনিসটিকে রেখে খুশিতে শিস দিতে-দিতে বাড়ির ভেতরে ঢুকল।

\*

\*

\*

ইউক্রেনে গরমকালের সন্ধ্যাগুলি অতি সুন্দর—বিশেষ করে শেপেতোভ্কার মতো ছোট শহরগুলোয়, যেখানে প্রান্তসীমা গ্রামের সঙ্গেই মেলে বেশি।

এখানকার শান্ত গ্রীষ্মসন্ধ্যা সমস্ত অল্পবয়সীদের টেনে আনে ঘরের বাইরে। জোড়ায় জোড়ায়, দলে দলে তাদের দেখতে পাওয়া যাবে বারান্দায়, বাড়ির সামনে ছোট ছোট বাগানগুলিতে, কিংবা রাস্তার পাশে জড়ো-করা কাঠের স্তূপের উপর বসে থাকতে। সন্ধ্যার নিশ্চলতায় তাদের খুশি-ভরা হাসি আর গানের প্রতিধ্বনি ওঠে।

ফুলের গন্ধে ভারী বাতাস কেঁপে-কেঁপে যায়। আকাশের গভীরে তারাগুলি সূচিমুখের মতো সূক্ষ্ম অস্পষ্টতায় জ্বলজ্বল করে, আর দূর থেকে দূরান্তরে ভেসে যায় গলার স্বর...

পাভেল অ্যাকর্ডিয়ন বাজাতে বড় ভালোবাসে। মিষ্টি সুরে ভরা এই যন্ত্রটিকে সে কোলের উপর সাবধানে রেখে ডবল-সারি চাবিগুলোর উপরে আলতোভাবে আঙুলগুলি দ্রুত চালিয়ে দেয়। বেরিয়ে আসে খাদের সুরে একটা দীর্ঘশ্বাস আর এক দমক মন-নাচানো সুরঝঙ্কার...

বাজনাটির ভাঁজ-করা হাপর ক্রমান্বয়ে খুলে গিয়ে আর বন্ধ হয়ে যখন খুশির আমেজ-ভরা সুর বের করতে থাকে, তখন কি আর চুপ করে থাকা যায়! জ্ঞানতে পারার আগেই পাদুটি সুরের গভীরতর আহ্বানে সাড়া দিয়ে ওঠে। বেঁচে থাকার কী আনন্দ!

সেদিন সন্ধ্যটা ছিল একটু বিশেষ আনন্দের। পাভেলদের বাড়ির বাইরে একটা কাঠের স্তূপের উপরে ভিড় জমিয়ে তুলেছে আমুদে একদল তরুণ। এদের মধ্যে সবচেয়ে খুশিতে উচ্ছল গালোচ্কা—পাভেলদের পাশের বাড়ির রাজমিস্ত্রির মেয়ে। নাচতে আর গাইতে ভালো লাগে গালোচ্কার। তার গলার স্বর গভীর, নরম আর চড়া।

গালোচ্চাকে একটু ভয়-ভয় করে চলে পাভেল, কারণ বড় মুখরা মেয়েটা। পাভেলের পাশে বসে দুইহাতে তাকে জড়িয়ে ধরে আনন্দের হাসি হাসছিল গালোচ্চা।

‘কী আশ্চর্য মানুষ হয়ে যাও তুমি ওই বাজনাটা বাজাবার সময়!’ বলল গালোচ্চা, ‘বড্ড ছোট তুমি—এই যা আপসোস, নইলে দিব্যি বর হতে পারতে তুমি আমার! অ্যাকর্ডিয়ন বাজানোঅলা ছেলেদের ভারি ভালোবাসি আমি, মনটা আমার একেবারে গলে যায়।’

চুলের গোড়া পর্যন্ত লাল হয়ে গেল পাভেলের—ভাগ্যিস অন্ধকার হয়ে এসেছে, তাই কেউ দেখতে পেল না সেটা। প্রগল্ভা মেয়েটির কাছ থেকে একটু সরে বসল পাভেল, কিন্তু মেয়েটি তাকে জাপটে ধরেই রইল। হাসতে হাসতে বলল, ‘ওগো পালিয়ে যেও না আমায় ছেড়ে। তুমি যে আমার বড় ভালোবাসার মানুষ।’

তার উন্নত বুকের স্পর্শ লাগল পাভেলের কাঁধে, কেমন যেন একটা অদ্ভুত নাড়া খেল পাভেলের মন নিজের অজ্ঞাতেই, আর অন্য সবার উচ্চকিত হাসি উঠে পথের অভ্যন্ত নিস্তর্রতাকে ভেঙেচুরে দিল।

গালোচ্চাকার কাঁধে আস্তে একটু ধাক্কা দিয়ে পাভেল বলল, ‘সরে বোসো। বাজাবার জায়গা নেই।’

ফলে আরেক দমক হাসি, কৌতুক আর ঠাট্টার হুল্লোড় উঠল।

পাভেলের উদ্দারে এগিয়ে এল মার্কসিয়া, ‘করুণ সুরের কিছু-একটা বাজাও, পাভেল, মনের মোচড় লাগাবার মতো একটা কিছু।’

ধীরে ধীরে ভাঁজ-ছড়ানো হাপরটার চাবিগুলোকে সযতনে আদর করে গেল পাভেলের আঙুল, আর একটা পরিচিত প্রিয় গানের সুরে ভরে উঠল বাতাস। গালোচ্চাই প্রথম গলা মেলাল, তারপরে মার্কসিয়া, তারপরে আর সবাই :

কুটির-কোণে বিহানবেলায়  
জুটল যত নেয়ে,  
বিধুর মোরা মধুর  
সেই ব্যথার গান গেয়ে...

তরুণ গাইয়েদের কেঁপে-কেঁপে-ওঠা কচি তাজা গলার স্বর ভেসে-ভেসে গেল দূর বনপ্রান্ত পর্যন্ত।

‘পাভেল!’ আরতিওমের গলার ডাক।

বাজনার হাপরটা চেপে বন্ধ করে পাভেল বাঁধনগুলো আটকে দিল, ‘আমাকে ডাকছে ওরা। আমি চলি।’

মার্কসিয়া তাকে মিষ্টকথায় ভুলিয়ে বসাবার চেষ্টা করল, ‘আর একটু বাজাও না! এত তাড়া কিসের গো?’

কিন্তু বাধা মানল না পাভেল, ‘পারব না। কাল আবার গান-বাজনা হবে, এখন যেতে হবে আমাকে। ডাকছে আরতিওম।’ বলেই সে রাস্তাটা ছুটে পার হয়ে সামনে ছোট বাড়িতে ঢুকল।

আরতিওম ছাড়া আরও দু'জন মানুষকে ঘরে দেখতে পেল সে : রমান—  
আরতিওমের এক বন্ধু, অন্যজন অপরিচিত। একটা টেবিলের ধারে বসে ছিল তারা।

‘ডেকেছ আমাকে?’ জিজ্ঞেস করল পাভেল।

তার দিকে মাথা নেড়ে অপরিচিত মানুষটিকে বলল আরতিওম, ‘এই সেই আমার  
ভাই, যার কথা বলছিলাম।’

অপরিচিত মানুষটি পাভেলের দিকে গিটেপড়া হাত বাড়িয়ে দিল।

‘শোন্ পাভেল’, আরতিওম বলল তার ভাইকে, ‘বিদ্যুৎ-স্টেশনের  
ইলেকট্রিশিয়ানের অসুখ করেছে বলেছিল। তার জায়গায় কোনো ভালো লোক পেলে  
ওরা নেবে কিনা, সেটা তুমি কাল খোঁজ নিবি—এটা করতে হবে তোকে। যদি নেয়,  
তাহলে জানাবি আমাদের।’

অপরিচিত মানুষটি বাধা দিয়ে বলল, ‘না, তা করার দরকার নেই। আমি বরং কাল  
ওর সঙ্গে গিয়ে মালিকের সঙ্গে নিজেই কথা বলব।’

‘ওদের লোক দরকার তো বটেই। স্তান্‌কোভিচ অসুস্থ বলেই তো আজ  
বিদ্যুৎ-স্টেশনে কোনো কাজ হয়নি। মালিক দু-বার দেখতে এসেছিল—স্তান্‌কোভিচের  
জায়গায় কাজ করতে পারে এমন একজনের খোঁজে টুঁড়ে বেরিয়েছে সে, কাউকে  
পায়নি। মোটে একজন কয়লা-জোগানদারকে নিয়ে মেশিন চালাতে সে ভরসা  
পায়নি। এদিকে ইলেকট্রিশিয়ানের টাইফাস হয়েছে।’

‘তাহলে তো ঠিক আছে’, বলল অপরিচিত লোকটি, ‘আমি কাল এসে তোমায়  
ডেকে নিয়ে একসঙ্গে যাব ওখানে।’

‘বেশ।’

পাভেলের দৃষ্টি পড়ল অপরিচিত মানুষটির শান্ত ধূসর চোখের দিকে। সে  
পাভেলকে খুঁটিয়ে দেখছিল। দৃঢ় আর অচঞ্চল সন্ধানী চাউনির সামনে একটু  
অস্বস্তি বোধ করছিল পাভেল। আগন্তুকের গায়ে ধূসর রঙের একটা কোর্তা, উপর  
থেকে নিচ পর্যন্ত বোতাম লাগানো। জামাটা—যে তার গায়ে বেশ একটু আঁটসাঁট  
হয়েছে, সেটা স্পষ্টই বোঝা যায়—কারণ, তার চওড়া বলিষ্ঠ পিঠের দিকে  
সেলাইটায় রীতিমতো টান পড়েছে। পেশিবহুল, ষাঁড়ের মতো গলাটায় তার মাথা  
আর ঘাড় জোড়া পড়েছে। লোকটার সমস্ত শরীরে পুরনো ওক-গাছের দৃঢ়  
বলিষ্ঠতার আভাস।

আরতিওম আগন্তুককে বুখ্‌রাই-নাম ধরে সন্ধানন করে দরজা পর্যন্ত এগিয়ে দিয়ে  
তাকে শুভেচ্ছা আর বিদায় জানিয়ে বলল, ‘কাল তুমি আমার ভাইয়ের সঙ্গে গিয়ে  
কাজটা ঠিক করে ফেলবে।’

\*

\*

\*

সৈন্যদলটা চলে যাবার তিনদিন পরে জার্মানরা শহরে ঢুকল। স্টেশনটা  
ইদানীং জনহীন হয়ে থাকছিল, তাদের আসার খবরটা ঘোষিত হল সেই  
স্টেশনে একটা ট্রেনের সিটি দিয়ে। শহরে বিদ্যুতের মতো খবর ছড়িয়ে পড়ল,  
‘জার্মানরা আসছে!’

খোঁচা-খাওয়া পিপড়ের ঢিবির মতো চঞ্চল হয়ে উঠল শহরটা। শহরবাসীরা যদিও কিছুদিন থেকে জানত জার্মানদের আসার কথা, তবু তারা কেমন যেন কথাটা ঠিক পুরোপুরি বিশ্বাস করেনি। শেষপর্যন্ত এই ভয়ঙ্কর জার্মানরা শুধু-যে কাছাকাছি এসে গেছে তাই নয়, বাস্তবিকপক্ষে তারা এখানে, এই শহরের মধ্যেই চলে এসেছে। বেড়া আর দরজার পিছন থেকেই শহরবাসীরা উঁকি দিল, রাস্তায় বেরুতে সাহস হয় না।

একজনের পেছনে আর একজন—এইভাবে বড় রাস্তার দু-পাশে দুই সারি বেঁধে জার্মানরা ঢুকল। পরনে জলপাই-রঙের মেটে সবুজ সামরিক উর্দি, তারা রাইফেল বাগিয়ে চলেছে। চওড়া ছুরির মতো বেয়নেট গোঁজা তাদের রাইফেলের ডগায়, মাথায় ভারী লোহার হেলমেট, পিঠে বাঁধা বিরাট বোঁচকা। স্টেশন থেকে শহরে ঢুকছে তারা এক অফুরন্ত ধারায়—সম্ভরণে, যে-কোনো মুহূর্তে আক্রমণ রুখবার জন্য তৈরি—যদিও তাদের আক্রমণ করার কথা কেউ স্বপ্নেও ভাবেনি।

সামনে চলেছে লম্বা লম্বা পা ফেলে দু'জন অফিসার, হাতে তাদের মাউজার-পিস্তল। রাস্তার মাঝখান দিয়ে চলেছে তাদের দোভাষী—সে হেটম্যান বাহিনীর সার্জেন্ট-মেজর, গায়ে একটা নীল ইউক্রেনীয় কোট, মাথায় লম্বা পশমি টুপি।

শহরের মাঝখানে ময়দানটায় সারবন্দি হয়ে দাঁড়াল জার্মানরা। দামামা বেজে উঠল। শহরবাসীদের মধ্যে যারা একটু বেশি সাহসী, তাদের একটা জোট ভিড় জমে উঠল। ইউক্রেনীয় কোট-পরা হেটম্যানের লোকটা ডাক্তারখানার উঁচু বারান্দায় দাঁড়িয়ে উঠে জার্মান কম্যান্ড্যান্ট মেজর কর্ফ-এর একটা হুকুমনামা চোঁচিয়ে পড়ে শোনাতে সবাইকে :

১

এতদ্বারা আমি আদেশ জারি করিতেছি :

এই শহরের সমস্ত অধিবাসীকে চব্বিশ ঘন্টার মধ্যে তাহাদের নিজের নিজের আগ্নেয়াস্ত্র বা অন্যান্য অস্ত্রশস্ত্র সমস্তই জমা দিতে হইবে। এই আদেশ অমান্যের শাস্তি—গুলিতে মৃত্যু।

২

এতদ্বারা শহরে সামরিক আইন জারি করা হইল এবং শহরের অধিবাসীদিগকে রাত্রি আটটার পর রাস্তায় বাহির হইতে নিষেধ করা যাইতেছে।

মেজর কর্ফ

শহরের কম্যান্ড্যান্ট

আগে যে-বাড়িটা পৌরশাসনসভা ব্যবহার করত এবং বিপ্লবের পরে যেটা শ্রমিক-প্রতিনিধি সোভিয়েতের কার্যালয় হয়েছিল, জার্মান কম্যান্ড্যান্টুর সেইখানে ঘাঁটি গাড়ল। দেউড়িতে একজন সাক্ষী খাড়া হল—বিরাট একটা রাজকীয় ঈগল-শোভিত কুচকাওয়াজের শিরস্ত্রাণ তার মাথায়। নাগরিকরা যেসব অস্ত্রশস্ত্র জমা দেবে, তার জন্য গুদামের জায়গা ওই বাড়িটারই পেছনের আঙিনায়।

গুলি করে মারার শাসানিতে ভয় পেয়ে শহরবাসীরা সারাদিন ধরে অস্ত্রশস্ত্র এনে জমা দিতে লাগল। বড়রা দেখা দিল না, কিশোর আর বাচ্চাছেলেরা নিয়ে এল সেগুলো। কাউকে আটকাল না জার্মানরা।

যারা সশরীরে আসতে চাইল না, তারা রাতে অস্ত্রগুলো পথের উপর ফেলে রেখে গেল। সকালে জার্মান চৌকিদাররা সেগুলো কুড়িয়ে নিয়ে একটা সামরিক গাড়িতে জড়ো করে কম্যান্ডাটুরে নিয়ে গেল।

বেলা একটায় অস্ত্রশস্ত্র জমা দেবার চব্বিশ ঘণ্টা সময় শেষ হবার পর জার্মান সৈন্যরা তাদের সংগৃহীত মালের হিশেব নিতে বসল : চোদ্দ হাজার রাইফেল। তার মানে ছ-হাজার জমা পড়েনি। যে ব্যাপক খানাতালাশি তারা চালাল, তাতে ফল হল নগণ্য।

দু'জন রেলশ্রমিকের বাড়িতে লুকানো রাইফেল খুঁজে পাওয়া গিয়েছিল, তাদের শহরের বাইরে ইহুদিদের পুরনো গোরস্থানে নিয়ে গিয়ে পরের দিন ভোরবেলায় গুলি করে মারা হল।

\*

\*

\*

কম্যান্ডাণ্টের হুকুম শুনেই আরতিওম ছুটে বাড়ি এল। পাভেলকে আঙিনায় দেখে তার কাঁধে হাত রেখে শান্ত কিন্তু দৃঢ়স্বরে সে জিজ্ঞেস করল, 'কোনো অস্ত্র এনেছিলি নাকি বাড়িতে?'

রাইফেলের কথা মোটেই বলার ইচ্ছে ছিল না পাভেলের, কিন্তু দাদার কাছে মিথ্যা বলতে পারল না। সোজাসুজি বলল সব কথা।

দু'জনে মিলে তারা গেল সেই চালাঘরটায়। আড়কাঠের উপর লুকানো জায়গাটা থেকে রাইফেলটা নামিয়ে নিয়ে আরতিওম সেটার বন্দু আর বেয়নেট খুলে নলটা ধরে তার সমস্ত শক্তি দিয়ে আছাড় মারল বেড়ার একটা খুঁটির উপর—চুরমার হয়ে গেল বাঁটটা। রাইফেলটার বাকি অংশটুকু বাগানের ওপারে একটা পোড়ো জমিতে ছুড়ে দিয়ে আরতিওম বেয়নেট আর বন্দুটা পায়খানার গর্তে ফেলে দিল।

কাজটা শেষ হলে আরতিওম তার ভাইয়ের দিকে ফিরল, 'তুই আর কচি শোকাটি নোস্, পাভেল। বন্দুক নিয়ে খেলা করা চলে না, তাও তোর জানা উচিত। খবরদার, এরকম কোনোকিছু আনবি না বাড়িতে—ভয়ানক জরুরি কথা এটা। ইদানীং এ-ধরনের ব্যাপারে প্রাণ পর্যন্ত যেতে পারে। আর ওসব চালাকি-টালাকি করবি না কক্ষনো—কারণ ওরকম কোনো জিনিশ যদি তুই বাড়িতে নিয়ে আসিস আর ওরা সেটা ধরে ফেলে, তাহলে প্রথমেই আমাকে গুলি করে মারবে। তোর মতো বাচ্চাকে তো ওরা ছেঁবে না। ভয়ানক সাংঘাতিক দিনকাল—বুঝলি তো!'

পাভেল প্রতিজ্ঞা করল।

দুই ভাই যখন আঙিনা পার হয়ে বাড়ি ঢুকছে, তখন লেচিনস্কিদের ফটকে একটা গাড়ি এসে থামল। উকিলমশাই, তাঁর বউ আর দুই ছেলেমেয়ে—নেলি আর ভিক্টর—নামল।

'এই-যে, সুখের পায়রাগুলো আবার ফিরে এসেছে দেখছি বাসায়', রেগে গজগজ করল আরতিওম, 'এইবার তো মজা জমবে। হতভাগা ব্যাটারা!' ভেতরে চলে গেল সে।

রাইফেলটার কথা ভেবে সারাদিন মন খারাপ হয়ে রইল পাভেলের। ইতিমধ্যে ভীষণ কাজে ব্যস্ত তার বন্ধু সেগেই। পুরনো পরিত্যক্ত একটা চালাঘরের দেয়ালের ঠিক পাশেই মাটিতে একটা গর্ত খুঁড়ছিল সে। শেষপর্যন্ত তৈরি হল খোঁদলটা। ভালো করে চটে-মোড়া আনকোরা রাইফেল তিনটি তার মধ্যে রাখল সেগেই। লালরঙী দলটা যখন জনসাধারণের মধ্যে রাইফেল বিলি করছিল, তখনই ও এগুলো জোগাড় করেছিল, জার্মানদের কাছে এগুলো ফেরত দেবার বিন্দুমাত্র ইচ্ছে তার ছিল না। সারারাত সে কঠিন পরিশ্রম করেছে যাতে এগুলোকে নির্বিঘ্নে লুকিয়ে রাখা সম্বন্ধে সে নিশ্চিত হতে পারে।

গর্তটা ভরাট করে মাটিটা পায়ে চেপে সমান করে দিয়ে সে তার উপরে একরাশ জঞ্জাল জমা করে দিল। পরিশ্রমের ফলটা খুঁটিয়ে দেখে সন্তুষ্ট হয়ে সে তার টুপিটা খুলে কপালের ঘাম মুছল, 'এইবার তল্লাশি করুক ওরা। যদিও বা পায় খুঁজে, কে যে এখানে রেখেছে তা জানতে পারবে না, কারণ এই চালাঘরটার তো মালিক নেই কেউ।'

\*

\*

\*

পাভেল আর সেই গম্বীর-মুখ ইলেকট্রিশিয়ানটির মধ্যে ওদের নিজেদের অজ্ঞান্বেই একটা দৃঢ় বন্ধুত্ব গড়ে উঠেছে। বুখরাইয়ের এই বিদ্যুৎ-স্টেশনে পুরো একমাস কাজ করা হল। সে এই কয়লা-জোগানদারের সহকারীটিকে দেখিয়ে দিয়েছে কীভাবে ডাইনামোটা তৈরি, কী করে সেটা চলে।

বুদ্ধিমান চটপটে কিশোরটিকে এই জাহাজি মানুষটির ভালো লেগেছে। ছুটির দিনে সে প্রায়ই আরতিওমের কাছে যায়। মায়ের সাংসারিক দুঃখ-কষ্ট-ভাবনাচিন্তার কথা ধৈর্যের সঙ্গে শোনে, বিশেষ করে ছোটছেলেটার দুঃখের কথা বলে মা যখন অভিযোগ করে। মারিয়া ইয়াকোভলেভনার ওপরে চিন্তাশীল আর ধীর বুখরাই একটা শাস্ত নিশ্চয়তার প্রভাব বিস্তার করে। তার সঙ্গে পেয়ে পাভেলের মা তার দুঃখ ভোলে আর হাসিখুশি হয়ে ওঠে।

একদিন পাভেল যখন বিদ্যুৎ-স্টেশনের আঙিনায় জ্বালানি কাঠের উঁচু উঁচু স্থপগুলির মাঝখান দিয়ে যাচ্ছে, বুখরাই তাকে আটকাল।

'তোমার মা বলছিলেন, তুমি নাকি মারামারি করতে খুব ভালোবাস', হেসে বলল বুখরাই, 'উনি বলছিলেন, ছেলেটা লড়াইয়ের মোরগের মতো ডানপিটে।' সমর্থনের হাসি হেসে বুখরাই বলল, 'আসলে ব্যাপারটা হচ্ছে, লড়নেঅলা হলে কোনো ক্ষতি নেই যদি জানা থাকে কার সঙ্গে লড়তে হবে আর কেন লড়াই করতে হবে।'

পাভেল ঠিক বুঝতে পারল না বুখরাই ঠাট্টা করছে, না সত্যিই বলছে কথাগুলো। সে জবাব দিল, 'আমি বিনা কারণে লড়াই করি না। যা ন্যায্য আর ঠিক তার জন্যেই লড়ি।'

'ঠিকমতো লড়াই কী করে করতে হয়, আমার কাছে শিখতে চাও?' অপ্রত্যাশিতভাবে জিজ্ঞেস করে বসল বুখরাই।

'ঠিকমতো মানে?' পাভেল তাকাল তার দিকে অবাক হয়ে।

'দেখবে।'

তারপর মুষ্টিযুদ্ধ সম্বন্ধে পাভেল একটা ছোট বক্তৃতা শুনল বুখরাইয়ের কাছে।

এ-ব্যাপারে পাভেল খুব সহজে দক্ষ হয়ে উঠতে পারেনি। অনেকবার তাকে ঝুঝরাইয়ের ঘুসির ধাক্কায় হড়কে মেঝেয় গড়াগড়ি খেতে হয়েছে। কিন্তু সে নিজে একাধি আর ধৈর্যবান শিষ্য বলে প্রমাণ করল—শেষে কৌশলটা আয়ত্ত করে ফেলল।

একদিন যখন গরম পড়েছে, পাভেল ক্রিমকাদের বাড়ি থেকে নিজের ঘরে ফিরে এসে কী করবে ভাবতে ভাবতে ঠিক করল—তাদের বাড়ির পেছনে বাগানের কোণে চালাঘরটার চালে তার প্রিয় জায়গাটায় গিয়ে বসবে। পেছনের উঠোন পার হয়ে বাগানে এসে ভাঙা তক্তাগুলো বেয়ে চালাটার উপরে উঠল সে। চালাটার উপর নুয়ে-পড়া চেরিগাছগুলোর ঘন শাখা ফাঁক করে-করে চালের মাঝখানে এগিয়ে এসে ওয়ে পড়ে রোদ পোয়াতে লাগল পাভেল।

চালাটার একটা পাশ লেচিনস্কিদের বাগানের উপর কিছুটা এগিয়ে গেছে। চালের একপ্রান্ত থেকে গোটা বাগানটা আর বাড়িটার একটা দিকের সবটাই দেখা যায়। ধার দিয়ে মাথাটা বাড়িয়ে পাভেল উঠানের খানিকটা দেখতে পাচ্ছিল, একটা গাড়ি দাঁড়িয়ে আছে সেখানে। লেচিনস্কিদের ওখানে যে জার্মান লেফটেন্যান্ট বাসা নিয়েছে, তার আদালিটা কর্তার পোশাক ঝাড়ছে।

এই লেফটেন্যান্টটিকে পাভেল কয়েকবার ফটকের কাছে দেখেছে। বেঁটে, মোটা, লালমুখো লোকটির ছোট করে ছাঁটা গোঁফ, চোখে প্যাশনে-চশমা, মাথায় চকচকে চামড়ার কানঅলা টুপি। পাভেল আরও জানত, লোকটা থাকে পাশের ঘরে, যার জানলাটা বাগানের দিকে খোলে, আর ওই চালাটার চাল থেকে দেখা যায় ঘরটা।

লেফটেন্যান্ট সেই সময় টেবিলে বসে লিখছিল। একটু পরেই লেখাটা তুলে নিয়ে ঘরের বাইরে গেল। কাগজটা আদালিকে দিয়ে বাগানের পথ ধরে ফটকের দিকে গেল। লতাপাতায় ছাওয়া বাগান-ঘরটার কাছে এসে সে ভেতরে কার সঙ্গে যেন কথা বলল। বাগান-ঘর থেকে নেলি লেচিনস্কিয়া বেরিয়ে এল। লেফটেন্যান্ট তার হাত ধরল, দু'জনে একসঙ্গে ফটকের বাইরে রাস্তায় বেরিয়ে এল।

পাভেল তার ঘাঁটি থেকে সমস্ত ব্যাপারটা লক্ষ করে গেল। কিছুক্ষণের মধ্যে ঘুমের আমেজ আসতেই সে চোখ বন্ধ করতে যাবে—এমন সময় দেখতে পেল আদালিটা লেফটেন্যান্টের ঘরে ঢুকছে। একটা উর্দি ঝুলিয়ে রেখে বাগানের দিকে জানলাটা খুলে ঘরটা ঝাড়পোঁছ করল সে। তারপর বেরিয়ে গেল পেছনের দরজাটা বন্ধ করে। এর পরে পাভেল তাকে দেখতে পেল আস্তাবলের কাছে যেখানে ঘোড়াগুলো বাঁধা।

খোলা জানলাটা দিয়ে সমস্ত ঘরটা পরিষ্কার দেখতে পাচ্ছিল পাভেল। টেবিলের উপরে রাখা একটা কোমরবন্ধনী আর চকচকে কী একটা জিনিশ।

অদম্য একটা কৌতূহলের টানে পাভেল চুপিসারে নিঃশব্দে চাল থেকে চেরিগাছ বেয়ে নেমে এল লেচিনস্কিদের বাগানে। গুঁড়ি মেরে বাগানটা পার হয়ে জানলার ফাঁকে তাকিয়ে দেখল ঘরের মধ্যে। সামনেই টেবিলের উপরে কাঁধ-টানা পরানো একটা কোমরবন্ধনী আর একটা চামড়ার খাপে চমৎকার বারো-টোটার একটা মান্‌লিশের পিস্তল।

নিশ্বাস বন্ধ হয়ে এল পাভেলের। কয়েক মুহূর্তের জন্য ইতস্তত করল, কিন্তু বেপরোয়া দুঃসাহসই শেষপর্যন্ত জয়ী হল। ঘরে ঢুকেই খাপটাকে হাতিয়ে নতুন কালো চকচকে



অস্ত্রটাকে টেনে বের করে নিয়েই বাইরে লাফিয়ে পড়ল। চারিদিকে দ্রুতচোখে দেখে নিয়ে সাবধানে পিস্তলটাকে পকেটে ফেলেই একছুটে বাগান পেরিয়ে এল চেরিগাছটার কাছে। বাদরের মতো তড়তড় করে সে উঠে এল চালে, তারপর একমুহূর্ত দাঁড়াল পেছনে দেখবার জন্য। আদালিটা তখনও খোশমেজাজে সহিসটার সঙ্গে কথা বলছে, বাগানটা নিস্তব্ধ আর জনহীন। অন্যদিক দিয়ে নেমে এসে পাভেল ছুটে বাড়ি এল।

মা রান্নাঘরে খাবার রাঁধতে ব্যস্ত, তাকে বিশেষ লক্ষ করল না।

একটা তোরঙ্গের পাশ থেকে খানিকটা ছেঁড়া কাপড় টেনে নিয়ে পকেটে গুঁজে মার অলক্ষে বেরিয়ে পড়ল সে। দৌড়ে উঠোনটা পার হয়ে, একলাফে বেড়া ডিঙিয়ে এসে পড়ল বনের দিকে যাবার রাস্তায়। উরুর ধাক্কায় ভারী পিস্তলটির দোলানি বন্ধ করার জন্য সেটাকে চেপে ধরে যত তাড়াতাড়ি পারে পাভেল বনে ছুটে এল একটা পরিত্যক্ত ইটের পাঁজার ধ্বংসাবশেষের দিকে।

পাদুটো তার যেন মাটি ছোঁয়নি, বাতাস শিস দিয়ে বেরিয়ে যাচ্ছে কানের পাশ দিয়ে।

পুরনো পাঁজাটার চারিদিক নিস্তব্ধ। কাঠের চাল এখানে-ওখানে ধসে পড়েছে, ভাঙা ইটের পর্বতপ্রমাণ স্তুপ, ভেঙে-পড়া উনুন—দৃশ্যটা মনকে দমিয়ে দেবার মতো। আগাছায় ভর্তি জায়গাটা। পাভেল আর তার দুই বন্ধু এখানে মাঝে মাঝে খেলতে আসে, তাছাড়া আর কেউ এদিকে আসে না। পাভেলের অনেকগুলো গোপন জায়গা জানা আছে, যেখানে চুরি-করা এই সম্পদটাকে নিরাপদে লুকিয়ে রাখা যায়।

একটা চুপ্তির ফাঁকে উঠে সে সাবধানে চারিদিকে দেখল, কিন্তু কাউকে দেখা গেল না। শুধু পাইনগাছগুলো একটা নরম নিশ্বাস ফেলল আর মস্থর বাতাস নাড়া দিয়ে গেল রাস্তার ধুলোকে। বাতাসে কড়া রজনের গন্ধ।

কাপড়ে জড়ানো পিস্তলটাকে পাভেল চুপ্তির মধ্যে মেঝের এককোণে রেখে সেটাকে পুরনো ইটের একটা স্তুপের নিচে চাপা দিল। বেরোবার সময় পুরনো পাঁজাটার ঢোকায় মুখ আলগা ইটে ভরাট করে ঠিক জায়গাটা বেশ ভালো করে দেখে নিল, তারপর বাড়ির দিকে রওনা হল আস্তে আস্তে। লক্ষ করল, হাঁটুদুটো তার কাঁপছে।

‘এর ফল কী হবে কে জানে!’ ভাবতে ভাবতে বিপদের আশঙ্কায় তার মন ভারী হয়ে উঠল।

বাড়ি ফেরাটা এড়াবার জন্য সে এল বিদ্যুৎ-স্টেশনে—সাধারণত যে-সময়ে আসে তার একটু আগেই। দারোয়ানের কাছ থেকে চাবিটি নিয়ে মেশিনঘরের চওড়া দরজা খুলে ফেলল। ছাই পরিষ্কার করে বয়লারে জল পাম্প করে নিয়ে আগুনটা জ্বালাতে জ্বালাতে ভাবতে লাগল—লেন্চিনস্কিদের বাড়িতে এতক্ষণ না-জানি কী হচ্ছে।

এগারোটা নাগাদ বুখরাই এসে পাভেলকে বাইরে ডাকল। খাটো গলায় জিজ্ঞেস করল, ‘তোমাদের বাড়িতে আজ খানাতল্লাশি হল কেন?’

চমকে উঠল পাভেল, ‘খানাতল্লাশি?’

অল্প একটু থেমে বলল বুখরাই, ‘আমার ভালো মনে হচ্ছে না ব্যাপারটা। কিসের খোঁজে ওরা এসেছিল আন্দাজ করতে পারো কিছু?’

কিসের খোঁজে যে ওরা এসেছিল তা পাভেল খুব ভালো করেই জানে। কিন্তু পিস্তল-চুরির কথাটা খুখরাইকে বলার ঝুঁকি সে নিতে পারল না। আশঙ্কায় কাঁপতে কাঁপতে সে জিজ্ঞেস করল, 'ওরা কি আরতিওমকে শ্রেণ্ডার করেছে?'

'শ্রেণ্ডার কেউ হয়নি, কিন্তু ওরা বাড়ির সবকিছু তছনছ করে দিয়ে গেছে।'

কথাটায় সামান্য একটু আশ্বস্ত হল পাভেল, যদিও তার উদ্বেগ কাটল না। কয়েক মিনিট সে আর খুখরাই দু'জনেই দাঁড়িয়ে রইল প্রত্যেকেই নিজের চিন্তায় আচ্ছন্ন হয়ে। একজন জানে খানাতল্লাশি কেন হয়েছে, ফলাফল ভেবে সে দুচ্চিন্তাগ্রস্ত। অন্যজন সেটা জানে না বলেই সচকিত।

খুখরাই ভাবছিল, 'হতভাগারা বোধহয় আমার সম্বন্ধে কোনোকিছু টের পেয়েছে। আরতিওম আমার কথা কিছু জানে না, কিন্তু খানাতল্লাশিটা হল কেন? আরও সাবধান হতে হবে।'

একটাও কথা না বলে দু'জনে যে-যার কাজে চলে গেল।

ওদিকে লেচিনস্কিদের বাড়িতে দারুণ গণ্ডগোল বেধে গেছে।

পিস্তলটা নেই দেখে লেফটেন্যান্ট ডেকে পাঠিয়েছিল তার আদালিকে। আদালি বলল, অস্ত্রটা নিশ্চয়ই চুরি গেছে। ফলে, অফিসারটি মহা রেগে তার সংযম হারিয়ে সর্বশক্তি প্রয়োগ করে একটি ঘুসি ঝেড়ে বসল আদালির কানের উপর। ঘুসিতে টলতে টলতেও আদালি কাঠের পুতুলের মতো কেতামাফিক খাড়া দাঁড়িয়ে কাঁচুমাচু হয়ে নিরীহভাবে চোখ পিটিপিটি করতে লাগল ব্যাপারটা কতদূর গড়ায় তারই প্রতীক্ষায়।

জবাবদিহি করার জন্য ডাকা হল উকিলমশাইকে। চুরির ঘটনায় ভয়ানক চটেমটে তিনি তো লেফটেন্যান্ট-এর কাছে ক্ষমা চাইলেন তার বাড়িতে এমন-ধারা ব্যাপার ঘটতে পেরেছে বলে।

ভিক্টর লেচিনস্কি তার বাবাকে বলল, পিস্তলটা পড়শিরা—বিশেষ করে ওই খুদে শয়তান পাভেল করচাগিন—চুরি করে থাকতে পারে। ছেলের সিদ্ধান্তটা বাবা লেফটেন্যান্টের কানে তুলে দিতে দেরি করলেন না। লেফটেন্যান্ট সঙ্গে সঙ্গে তল্লাশির হুকুম দিল।

খানাতল্লাশিটা নিষ্ফল হল এবং হারানো পিস্তলের এই ঘটনাটায় পাভেল দেখল যে এমন ঝুঁকির কাজও অনেক সময়ে সফল হয়।

## তৃতীয় অধ্যায়

খোলা জানলাটার কাছে দাঁড়িয়ে আপন-মনে ভাবতে ভাবতে তোনিয়া তাকিয়ে দেখছিল জমকালো পপলার গাছের সারি-দেওয়া তার বড় পরিচিত বাগানটিকে। মৃদু হাওয়ায় অল্প অল্প কাঁপছে গাছগুলো। যেন বিশ্বাসই হয় না যে এই যে-জায়গায় তার ছেলেবেলা কেটেছে, সেখান থেকে যাবার পর পুরো একটি বছর পার হয়ে গেছে। মনে হচ্ছে যেন মাত্র গতকাল বাড়ি থেকে চলে গিয়ে আবার আজ সকালের ট্রেনেই ফিরে এসেছে।

বদলায়নি কিছুই : সারি সারি র‍্যাস্পবেরির ঝাড়গুলো সযতনে ছাঁটাকাটা আছে বরাবরের মতোই। জ্যামিতিক নির্দিষ্টতায় টানা বাগানের পথগুলো দু'ধারে মায়ের সেই প্রিয় প্যানসি-ফুলের গাছে সাজানো। বাগানের সবকিছুই তকতকে ঝকঝকে। সর্বত্র যেন এক উদ্যানপালনবিশারদের নিপুণ হাতের ছাপ। পরিষ্কার আর নিখুঁতভাবে টানা পথগুলো দেখতে একটু একঘেয়ে লাগল তোনিয়ার।

যে-উপন্যাসটা পড়ছিল, তুলে নিল সেটা। বারান্দার দরজাটা খুলে সিঁড়ি দিয়ে নেমে এল বাগানে। রঙ-করা ছোট ফটকটা ঠেলে ধীরে ধীরে এগিয়ে গেল সে জলপাম্পের স্টেশনটার পাশে পুকুরটার দিকে।

সাঁকোটা পার হয়ে এসে পড়ল গাছের সারি-দেওয়া রাস্তাটায়। তোনিয়ার ডানদিকে উইলো আর অ্যালডার-ঝোপে ঘেরা পুকুরটা, বাঁ-দিকে গুরু হয়েছে বন।

পুরনো পাথর-খনিটার কাছে পুকুরটার ধারে যাবে তোনিয়া—এমন সময়ে জলের উপর ঝুঁকে-পড়া একটা মাছ-ধরা ছিপ দেখে দাঁড়িয়ে পড়ল সে।

একটা বাঁকা উইলো গাছের গুঁড়ির উপরে ভর দিয়ে ডালপালাগুলো ফাঁক করে সামনে দেখল—রোদে-পোড়া, খালি-পা, হাঁটুর উপরে প্যান্ট-গুটানো একটা ছেলে, তার পাশে মরচে-ধরা একটা টিনের পায়ে কতকগুলো কেঁচো। ছেলেটা মাছ ধরায় নিবিষ্ট বলে তাকে দেখতে পায়নি।

‘এখানে মাছ পাওয়া যাবে বলে মনে করেছ নাকি?’

ঘাড় ফিরিয়ে বিরক্তভাবে তাকাল পাভেল।

উইলো গাছটা ধরে জলের ধারে ঝুঁকে-পড়া একটি মেয়ে, তার পরনে শাদা নাবিক-হাঁদের একটা ব্লাউজ, গলায় নীল ডোরা-কাটা কলার, হালকা-ধূসর খাটো স্কার্ট। রোদে-পোড়া তার নিটোল পায়ে খয়েরি রঙের জুতো আর রঙিন বেড়-দেওয়া ছোট আঁটো মোজা। বাদামি চুলের গোছা মোটা বিনুনিতে বাঁধা।

ছিপ-ধরা হাতখানার অল্প একটু কাঁপুনিতে সুতোয় বাঁধা হাঁস-পালকের ফাৎনাটা নড়ে উঠল মসৃণ জলের বুকে ডেউয়ের চক্র তুলে।

‘দেখ, দেখ, টোপ গিলেছে!’ উত্তেজিত গলায় সুর উঠল পাভেলের পেছনে।

এইবার পাভেল তার স্বৈর্ঘ্য সম্পূর্ণ হারিয়ে সুতোটায় এত জোরে টান দিল যে ডগায় বেঁধা পাক-খাওয়া পোকাটা-সমেত বড়শিটা জল থেকে বেশ খানিকটা লাফিয়ে উঠল।

অত্যন্ত বিরক্ত-মনে পাভেল ডাবল, ‘মাছ ধরার দফা রফা হল, ধুসোরি ছাই! কোথা থেকে জুটল এসে মেয়েটা এখানে!’ ছিপ টানার বোকামিটুকু সামলে নেবার জন্য আরও দূরে ছুড়ে দিল বড়শিটা ঠিক এমন একটা জায়গায় যেখানে সেটা ফেলা উচিত ছিল না—বড়শিটা গিয়ে পড়ল দুটো কাঁটা-শ্যাঙলার মাঝখানে যেখানে সুতোটার সহজেই আটকে যাবার সম্ভাবনা।

কী ঘটেছে সেটা বুঝতে পারল পাভেল এবং মাথাটা না-ফিরিয়ে তীব্র ফিসফিসানির স্বরে উপরে পাড়ে-বসা মেয়েটির উদ্দেশে বলল, ‘চুপ করে থাকুন তো। চেষ্টায়ে মাছগুলোকে ভড়কে দেবেন দেখছি।’

উপর থেকে ঠাট্টার স্বরে শোনা গেল, ‘আপনাকে দেখামাত্রই অনেক আগে মাছ ভেগেছে। তাছাড়া, দিনের বেলায় আবার কেউ মাছ ধরে নাকি? ওহ, কী আমার মাছ-শিকারি!’

পাভেল ভদ্র ব্যবহার করবার জন্য যথাসাধ্য চেষ্টা করেছে, কিন্তু এটা বড্ড বাড়াবাড়ি বলে মনে হল তার। দাঁড়িয়ে উঠে চোখের উপর নামিয়ে দিল টুপিটা ঠেলে—চটে গেলে সে এরকম করে। দাঁত চেপে, যতদূর সম্ভব ভদ্রভাষায় বিড়বিড় করে বলল, ‘এখান থেকে আপনি সরে পড়লেই ভালো হয়।’

তোনিয়ার চোখদুটো একটু কুঁচকে এল, সেই চোখে হাসির নাচ, ‘আমি কি সত্যিই আপনার ব্যাঘাত ঘটচ্ছি?’

তার গলায় ঠাট্টার সুরটা চলে গেছে, বন্ধুত্বমূলক একটা আপসের সুর এসেছে। উড়ে এসে জুড়ে বসা এই ভদ্রমহিলাটিকে সত্যিই দুটো কড়া কথা শোনাবে বলে পাভেল মনস্থির করেছিল, কিন্তু এখন সে নিরস্ত হয়ে পড়ল।

‘দেখতে চান তো দেখুন। জায়গার জন্যে আমার কোনো আফসোস নেই’, বলল সে, তারপর আবার বসে পড়ল ফাৎনাটার দিকে মন দেবার জন্য। ওটা আটকে গেছে একটা কাঁটা-শ্যাওলায়। বড়শিটা-যে শেকড়ে গেঁথে গেছে তাতে কোনো সন্দেহ নেই। টান দিতে ভয় হল পাভেলের। যদি আটকে গিয়ে থাকে, তাহলে ছাড়াতে পারবে না আর নিশ্চয় হেসে উঠবে মেয়েটা। ওর চলে যাওয়াই কামনা করল সে।

তোনিয়া ততক্ষণে অল্প-দুলতে-থাকা উইলো গাছের গুঁড়িটার উপরে আরাম করে বসেছে। হাঁটুর উপর বইটা নিয়ে দেখছে এই রোদে-পেড়া কালো-চোখ অমার্জিত ছেলেটাকে, যে তাকে এমন অভদ্র অভ্যর্থনা জানিয়েছে আর এখন ইচ্ছে করেই তাকে উপেক্ষা করছে।

পুকুরের আয়নার মতো বুকে পাভেল স্পষ্ট দেখতে পাচ্ছে মেয়েটার প্রতিবিম্ব। বইয়ের মধ্যে সে যখন ডুবে গেছে বলে তার মনে হল, তখন সে সাবধানে জড়িয়ে-যাওয়া সুতোটায় টান দিল। ফাৎনাটা ডুবে গেল জলে, টান-টান হয়ে এল সুতোটা।

‘আটকে গেছে, আরে গেল যা!’ কথাটা চট করে খেলে গেল তার মনে, আর সেই মুহূর্তেই দেখল জলের মধ্যে থেকে মেয়েটার হাসিমুখ তাকে লক্ষ্য করছে।

ঠিক সেই সময়ে পাম্প-স্টেশনের সাঁকোটা পার হয়ে আসছিল দু’জন তরুণ—দু’জনেই হাইস্কুলের সপ্তম শ্রেণীর ছাত্র। এদের মধ্যে একজন ডিপোর কর্তা ইঞ্জিনিয়ার সুখার্কো-র সতেরো বছর বয়সী ছেলে—ফ্যাকাসে চুলঅলা, ছুলিতে ভরা মুখ, চোয়াড়ে, নিষ্কর্মা গোছের। স্কুলের সহপাঠীরা তার নাম দিয়েছে ‘দাগীমুখো গুরকা’। একটা শৌখিন ছিপ আর সুতো তার হাতে, মুখের কোণে বেপরোয়া ভঙ্গিতে একটা সিগারেট আটকানো। তার সঙ্গে আসছে ভিক্টর লেচ্চিনস্কি—সুঠাম, কোমল গড়নের ছোকরা।

সঙ্গীর দিকে ঝুঁকে অর্থপূর্ণভাবে চোখ টিপে সুখার্কো বলেছিল, ‘দেখ, এই মেয়েটা একটা টুকটুকে পাকা ফল। এরকমটি এদিকে আর কেউ নেই। একেবারে অসাধারণ—যাকে বলে, রো-মা-ন্-টিক—এই যা বললাম মনে রেখো। ক্লাস সিন্বে পড়ে কিয়েভের ইঙ্কুলে। এখন এসেছে ওর বাবার কাছে গরমের ছুটি কাটাতে। ওর বাবা এখানকার প্রধান বনপরিদর্শক। আমার বোন লিজার সঙ্গে ওর আলাপ আছে। আমি

একবার ওকে একটা চিঠি লিখেছিলাম—কিছুটা আবেগের সঙ্গেই আর কী। ‘আমি আপনার শ্রেমে পাগল’, তুমি তো ধরনটা জানোই, ‘দুরুদুরু বুকে রয়েছে আপনার উত্তরের অপেক্ষায়।’ এমনকি, নাদসন থেকে কিছু জুসই কবিতাও উদ্ধৃতি করেছিলাম।’

‘তা ফলটা কী হল?’ সাগ্রহে জিজ্ঞেস করল ভিক্টর।

‘ঢং করে আর কী, ভারী দেমাক’, বলল সুখার্কো মিইয়ে-যাওয়া গলায়, ‘আমায় বলে কিনা চিঠি লিখে যেন কাগজ নষ্ট না করি, হেন-তেন কত কী। কিন্তু গোড়ার দিকে ওইরকমই হয় সবসময়। এসব ব্যাপারে আমি তো পাকা লোক। সত্যিকথা বলতে কী, ওসব ঝামেলা পোষায় না—দিনের পর দিন কাকুতি-মিনতি করো আর দীর্ঘনিশ্বাস ফেলো। তার চেয়ে ঢের সহজে বিকেলের দিকে বেড়াতে বেড়াতে মিস্ত্রিদের পাড়ায় চলে যাও, সেখানে তিন রুবল দিয়ে এমন সুন্দর মেয়ে পাবে যে জিতে জল আসবে তোমার। ওসব ঢং নেই। আমি ওখানে যেতাম ভাল্কা তিখোনভের সঙ্গে। সেই রেল-কারখানার ফোরম্যানকে চেনো না?’

তাচ্ছিল্যেরে ভুরু কুঁচকাল ভিক্টর, ‘কী বলছ ওরা? তুমি এইসব জঘন্য ব্যাপারের মধ্যে যাও নাকি?’

সিগারেটটা চিবিয়ে থুতু ফেলে ঝঁকিয়ে উঠল ওরা, ‘অত সাধুপনা কোরো না। তোমরা কে যে কী করো আমার জানা আছে।’

ভিক্টর তাকে বাধা দিল, ‘তা এর সঙ্গে আমার আলাপ করিয়ে দেবে?’

‘নিশ্চয়। চলো তাড়াতাড়ি যাই, নইলে ও আমাদের এড়িয়ে কেটে পড়বে। কাল সকালে ও একাই মাছ ধরতে গিয়েছিল।’

দুই বন্ধুতে তোনিয়ার কাছাকাছি এল। মুখের সিগারেটটা নামিয়ে নিয়ে সুখার্কো তাকে খুব-একটা কেতাদুরস্ত অভিবাদন জানাল, ‘কেমন আছেন, শ্রীমতী তুমানভা? মাছ ধরতে এসেছেন নাকি?’

‘না, এই দেখছি আর কী’, বলল তোনিয়া।

ভিক্টরকে বাছ ধরে টেনে এনে সুখার্কো তাড়াতাড়ি বলল, ‘আপনাদের আলাপ নেই, না? এই আমার বন্ধু ভিক্টর লেচিনস্কি।’

একটু ঘাবড়ে গিয়ে ভিক্টর তোনিয়ার দিকে তার হাত বাড়িয়ে দিল।

আলাপটা চালিয়ে যাবার চেষ্টায় সুখার্কো জিজ্ঞেস করল, ‘আজ মাছ ধরছেন না কেন?’

‘তোনিয়া উত্তর দিল, ‘আমার ছিপটা আনতে ভুলে গেছি।’

‘আমি এক্ষুনি এনে দিচ্ছি আরেকটা’, বলল সুখার্কো, ‘ইতিমধ্যে আপনি আমারটা নিতে পারেন। আমি এক মিনিটের মধ্যেই ফিরে আসছি।’

তোনিয়ার সঙ্গে ভিক্টরের আলাপ করিয়ে দেবার কথা সে রেখেছে। এখন সে ওদের দু’জনকে একটু একা থাকতে দেবার জন্য ব্যস্ত।

তোনিয়া বলল, ‘না, আমি বরং মাছ ধরব না। শুধু শুধু ব্যাঘাত করা হবে। এখানে আরেকজন মাছ ধরছে।’

‘কাকে ব্যাঘাত করা হবে?’ জিজ্ঞেস করল সুখার্কো, ‘ও, এই এটাকে?’ এই প্রথম সে ঝোপের নিচে বসে-থাকা পাভেলকে দেখতে পেল। ‘আচ্ছা, এটাকে দুই ধাক্কা ভাগিয়ে দিচ্ছি এখন থেকে।’

তোনীয়া বাধা দেবার আগেই সে নেমে গেছে ছিপ আর সুতো নিয়ে ব্যস্ত পাভেলের কাছে।

সুখার্কো পাভেলকে বলল, 'ছিপ গুটিয়ে নিয়ে সরে পড় এখন থেকে।' পাভেল শান্তভাবে মাছ ধরেই চলছে দেখে সে আবার বলল, 'তাড়াতাড়ি কর, এই!...'

মাথা তুলে পাভেল সুখার্কোর দিকে তাকাল, তার চাউনিটার রকমসকম সুবিধের ছিল না।

'এই চুপ। অমন হাঁ করে চেয়ে রইলি যে!'

'কী বললি!' ফেটে পড়ল সুখার্কো, 'মুখের উপর জবাব দেবার সাহস তোর! হাঘরে কোথাকার! ভাগ্ এখন থেকে!' কঁচোর টিনটায় ভীষণ এক লাথি লাগাল সে। শূন্যে পাক খেয়ে পড়ে গেল সেটা পুকুরের মধ্যে, জলের ছিটে লাগল তোনীয়ার মুখে।

'ছিঃ ছিঃ সুখার্কো, লজ্জা করছে না আপনার?' চোঁচিয়ে উঠল সে।

লাফিয়ে উঠল পাভেল। সে জানে আরতিওম যেখানে কাজ করে সেই ডিপোর বড়কর্তার ছেলে সুখার্কো। এই মোটাসোটা লালমুখো হাঁদটাকে যদি সে মারে, তাহলে সে তার বাপের কাছে গিয়ে নালিশ করলে আরতিওম বিপদে পড়তে পারে। শুধু এই চিন্তাই তাকে একটু বাধা দিচ্ছিল, নইলে সে সঙ্গে সঙ্গেই ব্যাপারটা চুকিয়ে ফেলত।

পাভেল তাকে মুহূর্তের মধ্যেই মেরে বসবে আন্দাজ করে, সুখার্কো ছুটে এগিয়ে এসেই দুই হাতে ধাক্কা লাগাল পাভেলের বুকে। জলের পাড়েই দাঁড়িয়ে ছিল পাভেল, বিপজ্জনকভাবে টাল খেয়ে প্রাণপণে দুই হাত ছড়িয়ে সে নিজেকে সামলে নিল, কোনোরকমে বাঁচাল নিজেকে জলে পড়ে যাওয়ার হাত থেকে।

এই সুখার্কো পাভেলের চেয়ে দু-বছরের বড়, ঝগড়াটে গুণা হিসেবে সে কুখ্যাত।

বুকে ঘুসি খেয়ে মুখচোখ রাগে লাল হয়ে উঠল পাভেলের।

'দেখবি তাহলে? এই দ্যাখ!' বলেই হাতটা অল্প-একটু ঘুরিয়ে পাভেল একটা প্রচণ্ড ঘুসি বসাল সুখার্কোর মুখে। ঘুসিটা সে সামলে নেবার আগেই, পাভেল তার ইঙ্কুলে-পর্য উর্দিটা চেপে ধরে টেনেহিঁচড়ে তাকে জলের মধ্যে নামিয়ে দিল।

হাঁটু পর্যন্ত ডুবে গেছে সুখার্কো, পালিশ-করা জুতো আর প্যান্ট তার ভিজে গেছে, প্রাণপণে সে পাভেলের শক্তমুঠি থেকে ছাড়া পাবার চেষ্টা করতে লাগল। উদ্দেশ্যটা সিদ্ধ হওয়ার পর পাভেল লাফিয়ে ডাঙায় উঠে এল।

প্রচণ্ড রাগে আবার সুখার্কো তাকে তাড়া করল, ছিড়েঝুড়ে ফেলবে সে পাভেলকে।

ঘুরে প্রতিপক্ষের মুখোমুখি দাঁড়িয়ে পাভেল স্মরণ করল : 'বাঁ পায়ের উপর দেহের ভর রাখো, ডান পা টান করে হাঁটু বেকিয়ে নাও। শরীরের সমস্ত ওজন দিয়ে উপরের দিকে থুতনির নিচে ঘুসি বসাও।'

মোক্ষম একটি ঘুসি!

পাভেলের ঘুসিটা পড়তেই দাঁত কড়মড়ের আওয়াজ শোনা গেল। তারপর থুতনিতে আর কামড়ানো জ্বিভের অসহনীয় যন্ত্রণায় চিচি চিৎকার করতে করতে সুখার্কো দুই হাত ছড়িয়ে জলের মধ্যে ঝপ করে পড়ে গেল।

ডাঙার উপর হাসিতে ভেঙে পড়ছে তোনীয়া। হাততালি দিয়ে সে চোঁচিয়ে উঠল, 'বেশ করেছে, শাবাশ!'

আটকে-যাওয়া ছিপের সুতোটায় এত জোরে টান দিল পাভেল যে তার ডগাটা গেল ছিঁড়ে, তারপর পাড় বেয়ে উঠে এল রাস্তার উপরে।

চলে যেতে-যেতে সে গুনল, ভিক্টর বলছে তেনিয়াকে, 'এই হল পাভেল করচাগিন—এক নম্বর গুণ্ডা একটা।'

\*

\*

\*

স্টেশনে গোলমাল পাকিয়ে উঠছে। গুজব শোনা যাচ্ছে, রেললাইনের শ্রমিকেরা কাজ বন্ধ করতে লেগেছে। পরের বড় স্টেশনটার ডিপোর শ্রমিকরা বড় রকমের একটা কাণ্ড পাকিয়ে তুলছে। ঘোষণাপত্র নিয়ে যাচ্ছিল বলে সন্দেহ করে জার্মানরা দু'জন ইঞ্জিনচালককে গ্রেপ্তার করেছে। যেসব শ্রমিকদের গাঁয়ের সঙ্গে সম্পর্ক আছে, তাদের মধ্যে দারুণ চাঞ্চল্য—কারণ, জমিদাররা জমিদারিতে ফিরছে, জবরদখল শুরু হয়েছে।

হেটম্যান সাক্ষীদের চাবুকে চাষীদের পিঠের চামড়া ছিঁড়ে যাচ্ছে। গোটা গুর্বেনিয়া জুড়ে গড়ে উঠছে পার্টিজান-আন্দোলন। বলশেভিকরা ইতিমধ্যেই ডজনখানেক পার্টিজান সৈন্যদল গড়ে তুলেছে।

ঝুঝরাইয়ের বিশ্রামের ফুরসত নেই ইদানীং। শহরে থেকে সে এর মধ্যে অনেককিছু করে ফেলেছে। বহু রেলশ্রমিকের সঙ্গে আলাপ করে নিয়েছে, তরুণদের সমাবেশে উপস্থিত থেকেছে, ডিপোর মিস্ত্রিদের আর করাত-কলের শ্রমিকদের মধ্যে থেকে একটা জোরালো দল গড়ে তুলেছে। আরতিগুমের মনোভাবটা কী তা জানবার চেষ্টা করেছে সে : একবার জিজ্ঞাসা করেছিল তাকে—বলশেভিক পার্টি আর সেই পার্টির উদ্দেশ্য সম্বন্ধে কী মনে করে আরতিগুম। উত্তরে বলিষ্ঠ-দেহ এই মিস্ত্রি জানিয়েছিল, 'আমি এইসব পার্টি সম্বন্ধে বিশেষ কিছু জানি না, ফিওদর। তবে কিছু সাহায্যের দরকার হলে আমি সেটা করব জেনো।'

এতেই নিশ্চিত হয়েছিল ফিওদর। সে জানে, আরতিগুম খাঁটি লোক, সে তার কথা রাখবে ঠিকই। 'পার্টির ব্যাপারে সে এখনও তৈরি নয়। তাতে কিছু যায় আসে না', মনে মনে ভাবল সে, 'যা দিনকাল, তাতে ও শিগগিরই নিজেই সবকিছু বুঝে নেবে।'

ফিওদর বিদ্যুৎ-স্টেশন ছেড়ে ডিপোয় একটা কাজ নিয়েছে। সেখানে তার কাজকর্ম চালানো আরও সুবিধে। বিদ্যুৎ-স্টেশনে থাকার সময়ে সে রেলওয়ে থেকে বিচ্ছিন্ন হয়ে পড়েছিল।

ট্রেন-যাতায়াত ভয়ানক রকম বেড়ে গেছে। ইউক্রেন থেকে জার্মানরা হাজার হাজার গাড়ি-বোঝাই লুটের মাল পাঠাচ্ছে জার্মানিতে—যব, গম, গরু-ভেড়ার পাল...

\*

\*

\*

স্টেশনে তারের খবর দেওয়া-নেওয়া করে পনোমারেঙ্কো, তাকে একদিন হেটম্যান সাক্ষীরা গ্রেপ্তার করল। রক্ষীয়াঁটিতে নিয়ে গিয়ে নির্মমভাবে মারা হল তাকে। সেই-যে আরতিগুমের একজন সহযোগী শ্রমিক রমান সিদোরেঙ্কোর প্রচার-আন্দোলনের কথা বলে দিয়েছে, সেটা বোঝা গেল।

ডিপোয় যখন কাজ চলছে, তখন রমানকে ধরতে এল দু'জন জার্মান এবং একজন হেটম্যান সান্ধী, স্টেশন-কম্যান্ড্যান্টের সহকারী। রমান যেখানে কাজ করছে, সেইখানে এসে একটাও কথা না বলে সহকারী-কম্যান্ড্যান্ট চাবুক মেরে তার মুখটা কেটে দিল।

‘আয় আমাদের সঙ্গে, গ্যোরেস বাচ্চা! তোমার কিছু জবাবদিহি করতে হবে।’ বিশীরকম মুখ ভেঙিয়ে সে মিস্ত্রির হাতটা ধরে ভয়ানক জোরে মুচড়ে দিল। ‘আন্দোলন করে বেড়ানোর মজাটা টের পাবি আমাদের গুথানে!’

রমানের পাশের যন্ত্রটাতেই কাজ করছিল আরতিগুম। হাতে উখাটা রেখে সে তার বিরাট দেহটার ভীষণরকম একটা ভঙ্গি করে এগিয়ে এল সহকারী-কম্যান্ড্যান্টের দিকে। জমে উঠতে থাকা ক্রোধ যথাসম্ভব সামলাবার চেষ্টা করে কর্কশ গলায় বলল আরতিগুম, ‘মারতে যাবিনে, বেজন্মা কোথাকার!’

সহকারী-কম্যান্ড্যান্ট পিছিয়ে গেল পিস্তলের চামড়ার খাপটা খুলতে খুলতে। ছোটখাটো বেঁটে-পা একজন জার্মান কাঁধ থেকে তার চওড়া বেয়নেট লাগানো রাইফেলটা খুলে নিয়ে টিপ-কলটা খট করে নামিয়ে নিল।

‘হল্ট!’ খেঁকিয়ে উঠল জার্মানটা, আর এক পা এগুলেই গুলি করার জন্য প্রস্তুত সে।

লম্বা, বলিষ্ঠ মিস্ত্রি অসহায় হয়ে দাঁড়িয়ে রইল এই খুদে সৈনিকটার সামনে—কিছু করবার নেই তার।

রমান আর আরতিগুম, দু'জনকেই গ্রেপ্তার করা হল। একঘণ্টা বাদে ছেড়ে দেওয়া হল আরতিগুমকে, কিন্তু মাটির নিচের একটা গুদামঘরে তালাবদ্ধ হয়ে রইল রমান।

এই গ্রেপ্তারের দশ মিনিটের মধ্যেই একজন লোকও কাজে রইল না। স্টেশন-সংলগ্ন পার্কে ডিপোর শ্রমিকেরা এসে জমায়েত হল, সেখানে তাদের সঙ্গে এসে যোগ দিল ট্রেন-চলাচলের যোগাযোগ-রক্ষী কর্মীরা আর সরবরাহ-বিভাগের শ্রমিকেরা। দারুণ বিক্ষোভ সৃষ্টি হল, রমান আর পনোমারেঙ্কোর মুক্তির দাবি জানিয়ে একজন একটা আবেদনপত্র রচনা করল।

বিক্ষোভ আরও বেশি পুঞ্জীভূত হয়ে উঠল যখন একদল রক্ষীর সঙ্গে একটা পিস্তল আশ্বালন করতে করতে সহকারী-কম্যান্ড্যান্ট পার্কে ছুটে ঢুকে চৌচিয়ে উঠল, ‘কাজে ফিরে যাও সব, নইলে প্রত্যেকটি লোককে এখানেই গ্রেপ্তার করব! তোমাদের কয়েকজনকে গুলি করে মারাও হবে!’

উত্তরে ক্রুদ্ধ শ্রমিকরা এমন একটা গর্জন করে উঠল যে সহকারী-কম্যান্ড্যান্টকে ছুটতে হল স্টেশনে আশ্রয় নেবার জন্য। ইতিমধ্যে অবশ্য সে শহরের জার্মান সৈন্যদের আসবার জন্য খবর পাঠিয়েছিল, গাড়িভর্তি জার্মান সৈন্যদল স্টেশনের দিকে রওনা হয়ে গেছে ততক্ষণে।

জমায়েত ভেঙে দিয়ে শ্রমিকরা তাড়াতাড়ি বাড়ি ফিরে গেল। কেউ কাজে রইল না, এমনকি স্টেশনমাষ্টারও না। ঝুঝুরাই যে তাদের মধ্যে কাজ করেছে, সেটার ফল ফলতে লাগল। এই প্রথম স্টেশন-শ্রমিকরা ব্যাপকভাবে সংগ্রামী ব্যবস্থা অবলম্বন করল।

ভারী একটা মেশিনগান স্টেশনের প্ল্যাটফর্মের উপর বসাল জার্মানরা। শিকারের গন্ধ-পাওয়া কুকুরের মতো সেটা সেখানে মুখ উঁচিয়ে খাড়া রইল, তার ঘোড়াটায় হাত রেখে পাশেই উবু হয়ে বসে রইল একজন জার্মান কর্পোরাল।



জনহীন হয়ে গেল স্টেশনটা।

রাত্রিবেলা শুরু হল ধরপাকড়। যাদের নিয়ে গেল, তাদের মধ্যে আরতিওম একজন। সে-রাও বাড়ি না-ফেরায় বুঝ্রাই পার পেয়ে গেল।

যাদের শ্রেণ্ডার করা হয়েছিল, তাদের সবাইকে বিরাট একটা মালগাড়ি রাখার চালার নিচে ঢুকিয়ে দিয়ে এই বলে হুমকি দেওয়া হল যে হয় তাদের কাছে যেতে হবে, নয়তো সামরিক আইনে তাদের বিচার হবে।

আগাগোড়া রেললাইন জুড়ে সমস্ত রেল-শ্রমিকই ধর্মঘট করেছিল। একটা পুরো দিনরাতের মধ্যে একখানা ট্রেনও যাতায়াত করেনি। প্রায় আশি মাইল দূরেই লড়াই চলেছে একটা বিরাট পার্টিজান-বাহিনীর সঙ্গে, তারা রেললাইন উপড়ে ফেলে সাঁকোগুলো উড়িয়ে দিয়েছে।

রাত্রিবেলায় জার্মান-সৈন্য-ভর্তি একটা ট্রেন এসে লেগেছিল, কিন্তু সেটা আটকে গেল। সেটার ইঞ্জিনচালক, তার সহকারী আর ফায়ারম্যান, তিনজনই সরে পড়েছে। স্টেশনের পাশের লাইনে আরও দুটো ট্রেন আটকে আছে ছাড়ার অপেক্ষায়।

মালগাড়ির চালাটার ভারী দরজাটা খুলে গেল এবং স্টেশন-কম্যান্ড্যান্ট, একজন জার্মান লেফটেন্যান্ট, তার সহকারী এবং একদল অন্যান্য জার্মান এসে ঢুকল।

‘করচাগিন, পলেন্ডভস্কি, ক্রম্বাক’, হেঁকে গেল সহকারী-কম্যান্ড্যান্ট, ‘তোমাদের তিনজনকে একটা ইঞ্জিন চালাবার দল হিসেবে এখন একটা ট্রেন চালিয়ে নিয়ে যেতে হবে। যদি রাজি না হও, তাহলে সঙ্গে সঙ্গে গুলি করে মারা হবে তোমাদের। কী বলার আছে তোমাদের?’

শ্রমিক তিনজন গম্ভীর-মুখে সম্মতি জানাল মাথা নেড়ে। সহকারী-কম্যান্ড্যান্ট যখন পরবর্তী ট্রেনের চালক, সহকারী আর ফায়ারম্যানের নাম ডাকছে, ততক্ষণে পাহারাধীনে তাদের নিয়ে যাওয়া হল ইঞ্জিনখানার কাছে।

\*

\*

\*

ক্রুদ্ধ একটা আওয়াজ করে একঝলক স্কুলিঙ্গ ছড়িয়ে দিল ট্রেনের ইঞ্জিনটা। ঘন ঘন নিশ্বাস ছাড়তে ছাড়তে লাইনের উপর দিয়ে গড়িয়ে চলল রাত্রির গভীরে সামনের অন্ধকার ঠেলে। আরতিওম চুল্লিটায় বেলচা করে কয়লা গুঁজে দিল, চুল্লির মুখটা পায়ের ধাক্কায় বন্ধ করে বাঁকা-নাক কেটলি থেকে এক চুমুক জল খেয়ে বুড়ো ইঞ্জিনচালক পলেন্ডভস্কির দিকে তাকাল, ‘তাহলে বুড়ো, ট্রেনটা চালাতেই হচ্ছে আমাদের?’

ঘন ঝুলে-পড়া ভুরুসর নিচে পলেন্ডভস্কির চোখদুটো বিরক্তিতে পিটপিট করে উঠল, ‘পেছনে বেয়নেট বাগিয়ে থাকলে চালাতেই হবে।’

কয়লাগাড়িটার উপরে বসে-থাকা জার্মান সৈনিকটার দিকে আড়চোখে তাকিয়ে ক্রম্বাক বলল, ‘সব ছেড়েছুড়ে সরে পড়লে কেমন হয়?’

আরতিওম বিড়বিড় করে বলল, ‘আমারও তাই মনে হয়, কিন্তু আমাদের পেছনে ওই-যে ঘাগীটা বসে আছে।’

জানালা দিয়ে মাথাটা বাড়িয়ে অনিশ্চিতভাবে ক্রম্বাক বলল, ‘তা বটে।’

আরতিওমের কাছাকাছি সরে এল পলেন্ডভস্কি। ফিসফিসিয়ে বলল, 'ট্রেনটাকে নিয়ে যাওয়া চলবে না কিছুতেই, বুঝলে? সামনে লড়াই চলছে, আমাদের লোক রেললাইন উড়িয়ে দিয়েছে। এই তয়োরগুলোকে ওখানে নিয়ে যাওয়া মানে এদের গুলির মুখে আমাদের ওই লোকদের সাঁপে-দেওয়া। এমনকি জ্বারের আমলেও ধর্মঘটের সময়ে আমি ট্রেন চালাইনি, বুঝলে? এবার চালাব? কক্ষনো না। নিজেদের লোকই যদি আমাদের জন্যে মারা পড়ে, তবে সে-কলঙ্ক আর জীবনে ঘুচবে না। আমাদের আগে যারা ইঞ্জিন চালাচ্ছিল, প্রাণের ঝুঁকি নিয়েও তারা কিন্তু পালিয়েছে। আমাদেরও ট্রেনটা চালিয়ে নিয়ে যাওয়া চলবে না, কী বলো?'

'ঠিক বলেছ খুড়ো, কিন্তু এর ব্যবস্থা কী করবে?' বলে সে সৈন্যটাকে চোখের ইঙ্গিতে দেখাল।

ভুরু কুঁচকাল ইঞ্জিন-ড্রাইভার। একমুঠো ফেসো দিয়ে ঘর্মান্ত কপাল মুছে রক্তাক্তচোখে একদৃষ্টিতে তাকিয়ে রইল ইঞ্জিনের চাপ-নির্দেশক যন্ত্রটার দিকে—যেন, তোলপাড়-করা প্রশ্রুটার উত্তর খুঁজছে সে সেইখানে। তারপরে রাগে বেপরোয়া হয়ে গাল পাড়ল একটা।

আরেকবার জল খেল আরতিওম। দু'জন লোকই একই কথা ভাবছে, কিন্তু কেউই উদ্বিগ্ন নীরবতাইকু ভাঙতে পারছে না। আরতিওমের মনে পড়ল বুখরাইয়ের প্রশ্ন : 'আচ্ছা ভাই, বলশেভিক পার্টি আর কমিউনিস্টদের ধারণা সম্বন্ধে তোমার কী মনে হয়?' আর মনে পড়ল তার জবাবে নিজের উক্তি : 'আমি সবসময় সাহায্য করতে প্রস্তুত, আমার ওপর নির্ভর করতে পারো...'

'সাহায্যটা করছি বটে বড় চমৎকার', মনে মনে ভাবল সে, 'নিয়ে চলেছি পিটুনি ফৌজ...'

পলেন্ডভস্কি এতক্ষণে আরতিওমের পাশে টুল-বাক্সটার উপরে ঝুঁকে পড়েছে। শুকনো গলায় সে বলল, 'ওই লোকটাকে খতম করে দিতে হবে, বুঝলে?'

চমকে উঠল আরতিওম। পলেন্ডভস্কি দাঁত চেপে বলল, 'আর কোনো উপায় নেই। মাথায় মারতে হবে ওর, তারপরে ইঞ্জিনের বাষ্পনালিটা আর লেভারগুলো খুলে নিয়ে চুপ্তিতে ফেলে দিয়ে, বাষ্পটাকে বের করে দিয়েই নেমে পড়তে হবে।'

একটা ভারী বোঝা যেন কাঁধ থেকে নেমে গেল আরতিওমের—বলল, 'ঠিক!'

ক্রম্বাকের দিকে ঝুঁকে আরতিওম তাকে সিদ্ধান্তটা জানাল।

তৎক্ষণাৎ কিছু বলল না ক্রম্বাক। তিনজনেই একটা বিরাট ঝুঁকি নিতে চলেছে। প্রত্যেকেরই বাড়িতে এক-একটা পরিবারের কথা ভাববার আছে। পলেন্ডভস্কিরটাই সবচেয়ে বড় : নয়জন পোষ্য তার। কিন্তু তিনজনেই জানে ট্রেনটাকে নির্দিষ্ট লক্ষ্যে নিয়ে যেতে কিছুতেই পারে না তারা।

'বেশ, আমি আছি তোমাদের সঙ্গে, বলল ক্রম্বাক, 'কিন্তু ওটার কী ব্যবস্থা? কে ওকে...' কথাটা শেষ করল না সে, কিন্তু মানেটা আরতিওমের কাছে যথেষ্টই স্পষ্ট।

বাষ্পনালিটা নিয়ে ব্যস্ত পলেন্ডভস্কির দিকে ফিরল আরতিওম, ঘাড় নেড়ে জানাল ক্রম্বাক তাদের সঙ্গে একমত। কিন্তু পরমুহূর্তেই সিদ্ধান্ত-না-হওয়া একটা প্রশ্নে উদ্বিগ্ন হয়ে বুড়ো মানুষটার দিকে সে এগিয়ে এল।

‘কিন্তু কীভাবে?’

পলেন্ডভস্কি তাকাল আরতিওমের দিকে, ‘তুমি লাগো আগে। তোমার গায়ের জোর সবচেয়ে বেশি, আমরা শাবলটা দিয়ে ঘা লাগাব, চুকে যাবে।’ বৃদ্ধ ভয়ানক উত্তেজিত।

ভুরু কুঁচকাল আরতিওম, ‘ওটি আমাকে দিয়ে হবে না। হাত কেমন যেন উঠতে চায় না। শেষপর্যন্ত যদি ভেবে দেখ, এই সৈনিকটার দোষ নেই কোনো। ওকেও তো জোর করে বেয়নেট দেখিয়ে লাগানো হয়েছে এই কাজে।’

চোখে আগুন জ্বলে উঠল পলেন্ডভস্কির, ‘দোষ নেই বলছ? আমরাও যে বাধ্য হয়ে এই কাজটা করছি, তাতে আমাদেরও কোনো দোষ নেই। কিন্তু ভুলে যেও না, আমরা নিয়ে চলেছি একটা পিটুনি ফৌজ। এইসব ‘নির্দোষ’ সৈন্যরা আমাদের পার্টিজানদের গুলি করে মারতে চলেছে। তাহলে পার্টিজানরা কি দোষী? না হে ছোকরা, ভালুকের মতো জোয়ান তুমি, কিন্তু বুদ্ধিটা তোমার একটু কম...’

‘ঠিক আছে, ঠিক আছে’, ভাস্তা গলায় বলল আরতিওম। শাবলটা তুলে নিল সে।

কিন্তু পলেন্ডভস্কি ফিসফিসিয়ে বলল, ‘আমি করছি ওটা, আমার বরং আরও ভালো আসে। তুমি বেলচাটা নিয়ে উঠে যাও কয়লাবান্ন থেকে কয়লা দেবার জন্যে। দরকার হলে তুমি এক ঘা দেবে বেলচাটা দিয়ে। আমি কয়লা ভাঙার ভান করব।’

ক্রম্বাক কথাটা শুনে মাথা নেড়ে সায় দিল। ‘ঠিক বলেছ বুড়ো’, বলে সে বাষ্পনালিটার কাছে গিয়ে দাঁড়াল।

লাল-বেড়-দেওয়া সামরিক টুপি পরে জার্মান সৈনিকটা বসেছিল কয়লা রাখার গাড়িটার উপরে। দু-পায়ের মাঝে রাইফেলটা রেখে চুরুট খাচ্ছে সে। ইঞ্জিনচালানো অলা এই তিনজন লোকের কাজকর্মের দিকে সে মাঝে মাঝে তাকিয়ে দেখছিল।

কয়লা রাখার গাড়িটার উপরে যখন আরতিওম উঠে আসে, তখন সান্ধ্যীটা বিশেষ কোনো নজর দেয়নি। তারপরে, পলেন্ডভস্কি যখন কয়লার স্তুপটার ওপাশে বড় বড় চাঙড়গুলো নেবার ভান করে তাকে সরে যাবার ইশারা করল, তখন জার্মানটা সঙ্গে সঙ্গে নেমে এসে ইঞ্জিনের দিকে সরে এল।

শাবলের আঘাতে জার্মানটার খুলি ফেটে যাবার হঠাৎ একটা শব্দে চমকে লাফিয়ে উঠল আরতিওম আর ক্রম্বাক, যেন গরম লোহার ছোঁয়া লেগেছে তাদের গায়ে। বস্তার মতো গড়িয়ে পড়ে গেল সান্ধ্যীর দেহটা। দ্রুত রক্তের স্রোত গড়াল ধূসর পশমের টুপিটার ফাঁকে, গাড়ির লোহার দেয়ালে ঠুকে গেল তার রাইফেলটা।

‘খতম’, শাবলটা রেখে ফিসফিসিয়ে বলল পলেন্ডভস্কি, ‘এখন আর আমাদের পিছিয়ে যাবার পথ নেই।’

তার মুখখানা হেঁচকে কেঁপে-কেঁপে উঠছিল। তারপর চাপা নীরবতা ভেঙে দিয়ে সে চিৎকার করে উঠল, ‘বাষ্পনালিটার প্যাঁচ খুলে দাও, জ্বলদি!’

দশ মিনিটের মধ্যে শেষ হয়ে গেল কাজটা। ট্রেনটা এখন নিয়ন্ত্রণের বাইরে, ধীরে ধীরে গতি কমে আসছে তার।

ঘন আঁধারে ঘেরা দু-পাশের গাছগুলো ইঞ্জিনের আলোর বৃত্তের মধ্যে এসে পরস্পরই আবার মিশে যাচ্ছে পেছনের দুর্ভেদ্য অন্ধকারের মধ্যে। হেডলাইটগুলো

বৃথাই চেষ্টা করছে রাত্রির ঘন যবনিকাকে ভেঙে দিতে, সামনের দিকে মাত্র কয়েক গজ ফুঁড়ে যেতে পারছে। ক্রমশই ইঞ্জিনটার নিশ্বাস ফেলার শব্দ ভারী হয়ে আসছে। গতিটা কমে আসছে, যেন তার শেষ শক্তিটুকু ফুরিয়ে গেছে।

‘লাফিয়ে পড়ো!’ পেছনে পলেন্ডভস্কির গলা শুনে আরতিওম হাতলটা ছেড়ে দিল। ট্রেনের গতিবেগ তার বলিষ্ঠ দেহটাকে সামনের দিকে এক ধাক্কায় ঠেলে দিল, তারপরে একটা ঝাঁকুনি খাবার সঙ্গে সঙ্গে যেন মাটিটা নিচ থেকে উপরে উঠে এসে ঠেকে গেল তার পায়ে। দু-এক পা দৌড়ে গিয়ে আরতিওম হোঁচট খেয়ে ডিগবাজি খেয়ে গেল।

একই সঙ্গে আরও দুটো ছায়ামূর্তি লাফিয়ে নেমে গেল গাড়িটার দু-পাশ থেকে।

\*

\*

\*

ক্রমাকের বাড়িতে গভীর বিষণ্ণতা। সেগেই-এর মা আন্তনিনা ভাসিলিয়েভনা গত চারদিন ধরে ভাবনায়-চিন্তায় প্রায় পাগল। কোনো খবর নেই তার স্বামী। শুধু এইটুকু সে জানে যে জার্মানরা তাকে করচাগিন আর পলেন্ডভস্কির সঙ্গে একটা ট্রেন চালিয়ে নিয়ে যেতে বাধ্য করেছে। গতকাল হেটম্যান তিনজন সান্নী এসে বিশ্রীরকম গালমন্দ করে তাকে নানা কথা জিজ্ঞেস করে গেছে।

ওদের কথা থেকে খুব অস্পষ্টভাবে সে বুঝেছে যে কিছু-একটা গোলমাল হয়ে গেছে। ভয়ানক উদ্ভিগ্ন-মনে, লোকগুলো চলে যাবার প্রায় সঙ্গে সঙ্গেই, সে মাথায় ক্রমালটা বেঁধে রওনা হল মারিয়া ইয়াকোভলেভনার বাড়ি—যদি ওখানে তার স্বামীরা কোনো খবর পেতে পারে।

রান্নাঘরটা গোছগাছ করছিল তার বড়মেয়ে ভালিয়া, সে মাকে বাড়ি থেকে বেরুতে দেখে জিজ্ঞেস করল, ‘কোথায় যাচ্ছ, মা?’

জল-ভরা চোখে মেয়ের দিকে তাকিয়ে আন্তনিনা ভাসিলিয়েভনা বলল, ‘করচাগিনদের ওখানে। দেখি, ওরা হয়তো তোর বাবার খবর কিছু জানতে পারে। সেগেই বাড়ি এলে বলিস, সে যেন স্টেশনে গিয়ে পলেন্ডভস্কিদের ওখানে একবার দেখা করে আসে।’

মায়ের গলা দুই হাতে জড়িয়ে ধরল ভালিয়া। দরজার কাছে মাকে এগিয়ে দিয়ে সে বলল, ‘ভেবো না, মা গো।’

\*

\*

\*

বরাবরের মতোই মারিয়া ইয়াকোভলেভনা সাদর অভ্যর্থনা জানাল আন্তনিনা ভাসিলিয়েভনাকে। দু’জনেই আশা করেছিল যে অন্যজনের কাছে কিছু খবর পাওয়া যাবে, কিন্তু কথা বলতেই সে আশা মিলিয়ে গেল।

করচাগিনদের বাড়িতেও রাতে খানাতক্কালি হয়ে গেছে। সৈন্যরা আরতিওমের খোঁজে এসেছিল। মারিয়া ইয়াকোভলেভনাকে বলে গেছে, তার ছেলে বাড়ি ফিরলেই যেন সে কম্যান্ডাটুরে খবর দেয়।

সান্নীর দলটা বাড়িতে আসতেই মারিয়া করচাগিনার ভয়ে প্রায় বুদ্ধি লোপ পাবার মতো হয়েছিল। বাড়িতে সে একা, পাডেল রাত্রির শিফটে বিদ্যুৎ-স্টেশনে ছিল সাধারণত যেমন থাকে।

ভোরবেলায় কাজ থেকে ফিরে মার কাছ থেকে তন্দ্ৰাশির কথা শুনে পাভেলের দারুণ দুচ্চিন্তা হল দাদার নিরাপত্তার জন্য। দুই ভাইয়ের চরিত্রের অমিল আর আরতিওমের আপাত কঠোরতা সত্ত্বেও তাদের দু'জনের মধ্যে একটা গভীর টান আছে। এ ভালোবাসা দৃঢ়, কিন্তু সেটার কোনো বাহ্যিক প্রদর্শনী নেই। পাভেল জানে, ভাইয়ের জন্য কোনোরকম আত্মদানেই সে ইতস্তত করবে না।

জিরিয়ে নেবার জন্য না-বসেই পাভেল স্টেশনে ছুটে এল ঝুখরাইয়ের খোঁজে। তাকে পাওয়া গেল না। অন্যান্য চেনা শ্রমিকও বেপান্তা মানুষগুলোর খবর কিছু বলতে পারল না। ইঞ্জিনচালক পলেন্ডভ্‌স্কির পরিবারও সম্পূর্ণ অন্ধকারে। উঠোনে তার ছোটছেলে বরিসের সঙ্গে দেখা হওয়ায় ওর কাছ থেকে সে শুধু এইটুকুই জানতে পারল যে রাত্রিবেলায় তাদের বাড়িতেও খানাতন্দ্ৰাশি হয়ে গেছে। ফৌজের লোকজন পলেন্ডভ্‌স্কিকে খুঁজছে।

মাকে দেবার মতো কোনো খবর না-পেয়েই পাভেল ফিরে এল। ক্লান্ত অবসন্ন দেহে সে শুয়ে পড়ল বিছানাটায়, সঙ্গে সঙ্গে ডুবে গেল তন্দ্ৰার অস্থির তরঙ্গমালার মধ্যে।

\*

\*

\*

দরজাটায় ঘা পড়তেই মুখ তুলে তাকাল ভালিয়া। আগলটা খুলে জিজ্ঞেস করল, 'কে?' খোলা দরজাটার ফাঁকে ক্রিমকা মারচেঙ্কোর উক্খুশ কটা-চুলঅলা মাথাটা দেখা গেল। স্পষ্টই বোঝা গেল সে ছুটে এসেছে—হাঁফাচ্ছে আর লাল হয়ে উঠেছে তার মুখ দৌড়ানোর পরিশ্রমে। ভালিয়াকে জিজ্ঞেস করল সে, 'তোমার মা বাড়ি আছেন?'

'না, বেরিয়ে গেছেন।'

'কোথায়?'

'করচাগিনদের বাড়ি বোধহয়।' ক্রিমকা যেই ছুটে বেরিয়ে যাবে, অমনি তার জামার হাতাটা চেপে ধরল ভালিয়া।

ইতস্তত করে মেয়েটার দিকে তাকাল ক্রিমকা।

'একটা দরকারে একবার তাঁর সঙ্গে দেখা করতে চাই', সাহস করে বলল ক্রিমকা।

'কী ব্যাপার?' ভালিয়া ছাড়ল না তাকে, শিগগির বল, 'কটাচুলো ভালুক কোথাকার, ভাবনার মধ্যে ফেলিস না, বলছি', হুকুমের স্বরে বলল মেয়েটা।

ঝুখরাইয়ের সাবধানবাণী ভুলে গেল ক্রিমকা। বিশেষ করে বলে দিয়েছিল সে, একমাত্র আস্তনিনা ভাসিলিয়েভ্‌নার হাতেই যেন সে চিরকুটটা দেয়। পকেট থেকে একটুকরো ময়লা কাগজ বের করে ক্রিমকা ভালিয়ার হাতে দিল। সেগেই-এর এই হালকাচুল বোনটাকে সে কখনও 'না' বলতে পারে না—সত্যি বলতে কী, এই সুন্দরী মেয়েটার প্রতি কটা-চুল ক্রিমকার একটু দুর্বলতা আছে। অবশ্য, ভালিয়াকে যে তার ভালো লাগে, সেটা এমনকি নিজের কাছেও বলার মতো সাহসও তার নেই। কাগজটা তাড়াতাড়ি পড়ল ভালিয়া :

'তেনিয়া! কিছু ভাবনা কোরো না। খবর সব ভালো। আমরা নিরাপদে ভালো আছি। শিগগিরই আরও খবর পাবে। অন্যদের জানিয়ে দিও—সব ঠিক আছে, তাদের দুচ্চিন্তার কোনো কারণ নেই। এই চিরকুটটা নষ্ট করে ফেলো।

জাখার।'

ভালিয়া ছুটে এল ক্রিমকার কাছে, 'ছোট্ট কটা ভালুক আমার! কোথা থেকে পেলো এটা? কে দিয়েছে এটা?' বলতে বলতে সে ক্রিমকারে এমন জোরে ঝাঁকানি দিল যে সে তার উপস্থিতবুদ্ধি হারিয়ে, নিজে বুঝতে পারার আগেই দ্বিতীয় ভুলটা করে বসল।

'ঝুঝুয়াই স্টেশনে এটা আমাকে দিয়েছে।' তারপরেই, কথাটা-যে তার বলা উচিত হয়নি সেটা বুঝতে পেরে বলল, 'কিন্তু তোমার মাকে ছাড়া আর কাউকে এটা দিতে সে আমাকে বারণ করেছে।'।

'ঠিক আছে', হেসে উঠল ভালিয়া, 'আমি কাউকে বলব না। আচ্ছা, তাহলে ছোট্ট লক্ষী ভালুকটি, ছুটে যাও পাভেলদের বাড়ি, ওখানে পাবে মাকে।'।

আস্তে একটা ধাক্কা দিল সে ক্রিমকার পিঠে। মুহূর্তের মধ্যে বাগানের বেড়াটার বাইরে ক্রিমকার কটা-চুল মাথাটা অদৃশ্য হয়ে গেল।

তিনজন রেলকর্মীর কেউই বাড়ি ফিরল না। সন্ধ্যার দিকে ঝুঝুয়াই করচাগিনদের বাড়ি এসে মারিয়া ইয়াকোভলেভনাকে ট্রেনের ঘটনাটা সব বলল। আতঙ্কিত মাকে শান্ত করবার যথাসাধ্য চেষ্টা করল সে। বারবার করে তাকে বলল, তিনজনেই নিরাপদে আছে ক্রিমকারের কাকার বাড়িতে এমন একটা গ্রামে যেটা একটু চলতিপথের বাইরে। এখন অবশ্য তারা ফিরতে পারবে না, কিন্তু জার্মানরা বেশ একটু মুশকিলে পড়েছে এবং যে-কোনো দিন অবস্থা বদলে যেতে পারে।

মানুষ তিনটি অদৃশ্য হয়ে যাবার ফলে তাদের পরিবারের মধ্যে ঘনিষ্ঠতা বেড়ে গেল আগেকার চেয়ে। ওদের কাছ থেকে কুচিং কখনও যেসব চিঠিপত্র আসে, তা এরা সবাই আনন্দ করে পড়ে, কিন্তু ওরা না-থাকায় বাড়ি ফাঁকা আর বিষণ্ণ বলে মনে হয়।

একদিন ঝুঝুয়াই পলেন্ডভস্কির স্ত্রীর সঙ্গে দেখা করতে এল—ভাবখানা যেন সে এইদিক দিয়েই যাচ্ছিল। কিছু টাকা দিল তাকে।

'এই কয়েকটা টাকা পাঠিয়েছে আপনার স্বামী আপনার চালাবার মতো', বলল সে, 'শুধু দেখবেন, আর কারুর কাছে বলবেন না কথাটা।'।

সকৃতজ্ঞভাবে তার হাতখানা চেপে ধরে বৃদ্ধা বললেন, 'ধন্যবাদ! ভয়ানক দরকার পড়েছিল আমাদের। ছেলেমেয়েদের খেতে দেবার মতোও কিছু নেই।'।

আসলে, বুলগাকভ যে-টাকাটা রেখে গিয়েছিলেন, তার থেকেই এটা দিল ঝুঝুয়াই।

স্টেশনে ফিরে যেতে-যেতে মনে-মনে বলল ঝুঝুয়াই : 'দেখা যাক কতদূর কী হয়। গুলির ভয়ে যদিও বা ধর্মঘট ভেঙে গেছে, শ্রমিকেরা কাজে ফিরে গেছে, তবু আগুন তো জ্বলে উঠেছে, সেটাকে আর নেভানো যাবে না। আর ওদের তিনজনের কথা যদি বলতে হয়, ওরা শক্ত মানুষ, সত্যিকারের প্রলেতারিয়ান।'।

\*

\*

\*

ভরোবিয়োভা বাল্কা গ্রামের বাইরের দিকে ছোট্ট একটা পুরনো কামারশালা। ধোঁয়ায় কালো তার সামনের দিকটা রাস্তামুখো। জ্বলন্ত হাপর-চুল্লিটার সামনে দাঁড়িয়ে আছে পলেন্ডভস্কি, আগুনের আঁচে চোখ কুঁচকে গেছে। লাল করে তাতানো একটা লোহার পাত সে উল্টিয়ে দিল একটা লম্বা চিমটে দিয়ে।

মাথার উপরে একটা আড়কাঠ থেকে ঝোলানো হাপরটা টেনে টেনে চালাচ্ছিল আরতিওম।

‘ভালো কাজ-জানা মিস্ত্রি আজকাল গ্রামে মারা পড়বে না। অনেক কাজ আছে—যত চাও,’ দাড়ির মধ্যে হেসে খুশিমনে বলছিল ইঞ্জিনচালক, ‘আর দু-এক সপ্তাহ এরকম চালাতে পারলেই বাড়ির লোকজনদের কিছু গম আর মাংস পাঠাতে পারব। চাষীরা সবসময়েই কামারদের খাতির করে হে। দেখে নিও, পুঞ্জিপতিদের মতো খাব আমরা, হাঃ হাঃ। জাখারটা আমাদের থেকে একটু ভিন্নরকম—কৃষকদের কাছাকাছি ঘুরঘুর করে ওর ওই খুড়োর মারফত ওর শিকড় আটকেছে জোতজমিতে। না, আমি অবশ্য ওর দোষ দিয়ে বলছি না কথাটা। তুমি আর আমি, বুঝলে আরতিওম, আমাদের বাপু সেই-যে বলে না-আছে লাঙল, না-আছে জাঙল। শক্ত পিঠ আর একজোড়া হাত ছাড়া কিছুই নেই—যাকে বলে, চিরকালের প্রলেতারিয়ান, আমরা হচ্ছি তাই—হাঃ হাঃ। কিন্তু জাখারটার যেন দু-নৌকায় পা—এক পা গাঁয়ে আর এক পা রেল-ইঞ্জিনে।’ লাল করে তাতানো লোহাটা চিমটেয় ধরে পাশ ফিরিয়ে দিয়ে আরেকটু গম্ভীর হয়ে সে বলল, ‘কিন্তু আমাদের ব্যাপার-সাপার ভালো মনে হচ্ছে না হে। জার্মানরা যদি অল্পদিনের মধ্যে সাবাড় না হয়, তাহলে আমাদের সরে পড়তে হবে ইয়েকাতেরিনব্লাভ কিংবা রস্তুভ-এর দিকে। নইলে ধরা পড়ে যাব হয়তো, আর কিছু জানবার আগেই ঝুলতে থাকব শূন্য স্বর্ণ-মর্ত্যের মাঝখানে।’

‘কথাটা বলেছ ঠিক,’ অস্পষ্টভাবে বলল আরতিওম।

‘ওখানে আমাদের লোকজন কী করছে জানতে পারলে হত। সৈন্যরা ওদের শাস্তিতে থাকতে দিচ্ছে কিনা তাই ভাবছি।’

‘হ্যাঁ, আমাদের অবস্থাটা বড় বিশ্রী, খুড়ো। বাড়ি ফেরার চিন্তাটা আমাদের ছাড়তে হবে।’

চুল্লি থেকে নীল-হয়ে-আসা গনগনে উত্তপ্ত লোহাটা বের করে ইঞ্জিনচালক কুশলী হাতে টান দিয়ে এনে রাখল সেটাকে নেহাইটার উপরে, ‘পেটাও হে!’

ভারী হাতুড়িটা মাথার উপরে তুলে আরতিওম সেটাকে সজোরে নামিয়ে আনল নেহাইটার বকে। উজ্জ্বল স্কুলিঙ্গের একটা ফোয়ারা ছিটিয়ে পড়ল চতুর্দিকে হিসহিস শব্দে, কামারশালার সবচেয়ে অন্ধকার কোণগুলো একমুহূর্তের জন্য আলোকিত হয়ে উঠল।

জোরালো হাতুড়ি-পেটার ফাঁকে ফাঁকে পলেন্ডভস্কি ঘুরিয়ে ঘুরিয়ে দিতে থাকল লোহাটাকে আর একদলা নরম মোমের মতোই অবাধে চেন্টে চেন্টে যেতে লাগল লোহাটা।

কামারশালার খোলা দরজাটা দিয়ে অন্ধকার রাত্রির উষ্ণ নিশ্বাস ভেসে এল।

\*

\*

\*

নিচেই অন্ধকার হ্রদটা বিরাট। চারধারে সেটাকে ঘিরে পাইনগাছগুলো উঁচু মাথা দোলাচ্ছে।

সেদিকে তাকিয়ে তেনিয়া ভাবল, ‘ঠিক যেন জীবন্ত প্রাণীর মতো।’ তীরে গ্র্যানিট-পাথরের মধ্যে ঘাসে-নরম একটা নিচু জায়গায় শুয়েছিল সে। তার মাথার অনেক উপরে ঝোঁদলটা যেখানে শেষ হয়েছে তার ওধারে বনের আরম্ভ, নিচে

উঁচুপাড়ের পায়ের কাছেই হ্রদ। চারধারে পাথরের খাড়া তীরের ছায়া চেপে এসে হ্রদের কালো জলে আরও কালো একটা বেড় দিয়েছে।

স্টেশনের একমাইল দূরে এই পুরনো পাথরখনিটা তোনিয়ার প্রিয় জায়গা। পাথর খুঁড়ে নেবার পরে পরিত্যক্ত গভীর খাদ থেকে জলের উৎস বেরিয়ে তিনটে হ্রদ জেগেছে এখানে। পাড়াটা যেখানে জলে মিশেছে, সেইখানে ছলাৎ-ছলাৎ শব্দ শুনে তোনিয়া মাথাটা তুলে সামনের ডালপালাগুলো সরিয়ে সেদিকে তাকাল। রোদে-পোড়া নমনীয় একটা দেহ বলিষ্ঠ বাহুবিক্ষেপে সঁাতার কেটে সরে যাচ্ছে তীরের দিক থেকে। সঁাতারের বাদামি রঙের পিঠ আর কালো মাথাটা তোনিয়ার চোখে পড়ল—বিরাট একটা জলজন্তুর মতো হাওয়া ছাড়ছে মুখ দিয়ে, জল কেটে চলেছে দ্রুতগতিতে, উল্টে যাচ্ছে, ডিগবাজি খাচ্ছে, ডুবে গিয়ে ভেসে উঠছে। তারপরে চিৎ হয়ে, হাতদুটো ছড়িয়ে, দেহটাকে একটু বেঁকিয়ে, উজ্জ্বল রোদে চোখ কুঁচকে ভেসে রইল। ফাঁক করে ধরা ডালপালাগুলো ছেড়ে দিয়ে তোনিয়া মুখ নামিয়ে নিল। মনে মনে হেসে বলল, ‘আর দেখাটা উচিত নয়।’ বইটা ফের পড়া আরম্ভ করল সে।

লেন্সিনস্কির দেওয়া এই বইটার মধ্যে সে একেবারে ডুবে গিয়েছিল, দেখতেই পায়নি যে পাইনবন আর খোদলটার মাঝখানে গ্র্যানিট-পাথরের খাড়াই বেয়ে কখন একজন উঠে এসেছে। আগন্তুকের অজ্ঞান্তে একটা নুড়ি ধাক্কা খেয়ে গড়িয়ে এসে যখন তোনিয়ার বইটার উপরে পড়ল, শুধু তখনই সে চমকে উঠে তাকিয়ে দেখল পাভেল করচাগিন তার সামনে দাঁড়িয়ে। পাভেলও একটু হকচকিয়ে গিয়েছিল এই হঠাৎ দেখা হয়ে যাওয়ায়, কী করবে বুঝতে না-পেরে সে চলে যাবার জন্য ফিরে দাঁড়াল।

তার ভিজে চুল লক্ষ করে তোনিয়া ভাবল, ‘জলে গুকেই দেখেছি, নিশ্চয়।’

‘চমকে দিয়েছি নাকি? আমি জানতাম না আপনি এখানে রয়েছেন।’ পাথরের উদ্গত অংশে হাত রাখল পাভেল, চিনতে পেরেছে সে তোনিয়াকে।

‘না, না, আমার কোনো অসুবিধে হয়নি আপনার আসাতে। যদি আপত্তি না থাকে তো থাকুন, কিছুক্ষণ কথাবার্তা বলা যাক।’

পাভেল অবাক হয়ে তাকাল তোনিয়ার দিকে, ‘কী কথা বলব?’

হাসল তোনিয়া, ‘দাঁড়িয়ে কেন? বসুন না—এইখানটায়।’ একটা পাথরের দিকে দেখিয়ে জিজ্ঞেস করল, ‘কী নাম আপনার?’

‘পাভকা করচাগিন।’

‘আমার নাম তোনিয়া। এই তো, আমাদের পরিচয় হয়ে গেল।’

অস্বস্তিতে পড়ে পাভেল তার টুপিটা দুমড়াতে লাগল।

‘আপনাকে বুঝি বলে পাভকা?’ নীরবতা ভেঙে বলল তোনিয়া, ‘পাভকা কেন? ভালো শোনাচ্ছে না ওটা, পাভেল তার চেয়ে ঢের ভালো। আমি আপনাকে তাই বলব—পাভেল। এখানে প্রায়ই আসেন বুঝি...’ বলতে যাচ্ছিল ‘সঁাতার কাটতে’—কিন্তু সে-যে পাভেলকে জলে দেখেছে, সেটা চেপে যাওয়ার জন্য তোনিয়া বলল, ‘বেড়াতে?’

‘না, প্রায়ই না। অবসর সময় আসি’, বলল পাভেল।

‘ও, কাজ করেন বুঝি কোথাও?’ তোনিয়া আর-একটা প্রশ্ন করল।

‘বিদ্যুৎ-স্টেশনে কয়লা-জোগানদারের কাজ।’



‘আচ্ছা, অমন চমৎকার লড়তে শিখলেন কোথায় বলুন তো?’ হঠাৎ জিজ্ঞেস করে বসল তোনিয়া।

‘আমি মারামারি করি তো আপনার কী?’ নিজের অনিচ্ছাতেই খেঁকিয়ে উঠল পাভেল। ‘চটে যাবেন না করচাগিন’, তার প্রশ্নে পাভেল বিরক্ত হয়েছে দেখে সে বলল তাড়াতাড়ি, ‘এমনি জানতে ইচ্ছে হল তাই। কী ঘুসিটাই ঝেড়েছিলেন! অতটা নিষ্ঠুর হওয়া উচিত হয়নি আপনার।’ খিলখিল করে হেসে উঠল তোনিয়া।

‘ওর জন্যে দুঃখ হয়েছে বুঝি, অ্যা?’ জিজ্ঞেস করল পাভেল।

‘মোটাই না। বরং ঠিকই হয়েছে সুখার্কোর মার-খাওয়াটা। খুব খুশি হয়েছিলাম আমি। শুনেছি, আপনি নাকি প্রায়ই মারামারি বাধান।’

‘কে বলেছে?’ কান খাড়া করল পাভেল।

‘এই তো, ভিক্তর লেচিনস্কি বলছিল, আপনি নাকি পেশাদার মারকুটে।’

মুখ-চোখ আঁধার হয়ে এল পাভেলের, ‘ভিক্তরটা একটা নাদুসনুদুস শুয়োর। কপাল ভালো ওর যে সেদিন ও আমার হাতে মার খায়নি। আমার সন্ধ্যা ও যা বলেছিল সেটা শুনেছিলাম, কিন্তু ছুঁচো মেরে হাত নোংরা করতে চাইনি আমি।’

‘অমন মুখ খারাপ করছেন কেন পাভেল? ওটা ভালো নয়,’ তাকে বাধা দিল তোনিয়া।

চটে উঠল পাভেল। মনে মনে ভাবল, ‘এই বড়লোকের অদ্ভুত মেয়েটার সঙ্গে কেন-যে কথা বললাম! ভারি আমার হুকুম চালানো হচ্ছে : প্রথমে ওর ‘পাভ্কা’ পছন্দ হল না, এখন আবার আমার ভাষার দোষ ধরছে।’

‘লেচিনস্কির ওপরে আপনি এত চটা কেন?’ জিজ্ঞেস করল তোনিয়া।

‘ও একটা খুকি, আদুরে গোপাল, এতটুকু হিংস্র নেই। এ-ধরনের ছেলে দেখলেই আমার হাত নিশাপিশ করে। গায়ে পড়ে ঝগড়া করতে ভালোবাসে। ভাবখানা যেন বড়লোক বলে যা-ইচ্ছে-তাই করতে পারে। পয়সা আছে, তাতে আমার ভারি ব্যয়েই গেল। হাত দিয়ে দেখুক একবার আমার গায়ে, উচিতমতো শিক্ষা পেয়ে যাবে একচোট। এ-ধরনের ছেলে দেখলেই ঝাড়তে ইচ্ছে করে একটা ঘুসি চোয়ালের উপর’, ঝেপে গিয়ে বলেই চলল পাভেল।

লেচিনস্কির প্রসঙ্গ তুলেছে বলে আপসোস হল তোনিয়ার। বুঝতে পারল সে, ওই কেতাদুরস্ত শৌখিন স্কুলের ছেলেটার সঙ্গে এই তরুণটির অনেকদিনের পুরনো ঝগড়া ফয়সালা করবার আছে। কথাবার্তা আরও সহজ খাদে চালাবার জন্য সে পাভেলকে তার পরিবার আর কাজকর্ম সন্ধ্যা জিজ্ঞেস করতে লাগল।

নিজের অজান্তেই পাভেল মেয়েটার প্রত্যেকটি প্রশ্নের জবাব দিতে থাকল অত্যন্ত বিশদভাবে। ভুলেই গেছে যে সে চলে যেতে চাচ্ছিল।

‘পড়াশোনা চালিয়ে গেলেন না কেন?’ জিজ্ঞেস করল তোনিয়া।

‘ইস্কুল থেকে তাড়িয়ে দিল যে।’

‘কেন?’

লজ্জায় রাঙা হয়ে উঠল পাভেল, ‘পাদরিটার কেক তৈরির ময়দায় তামাকের গুঁড়ো মিশিয়ে দিয়েছিলাম বলে। ভারি পাজি লোক ওই পাদরিটা। ওর জ্বালায় অতিষ্ঠ হয়ে উঠেছিলাম।’ পাভেল পুরো ঘটনাটা বলে গেল।

আগ্রহের সঙ্গে শুনল তোনীয়া। প্রাথমিক লজ্জার ভাবটা কাটিয়ে উঠেছে পাভেল। কিছুক্ষণের মধ্যে সে এমনভাবে কথাবার্তা চালানল যেন তোনীয়া তার পুরনো পরিচিত কেউ। নানা কথার মধ্যে সে তার দাদার নিরুদ্দেশ হয়ে যাবার কথা বলল। খোঁদলটার মধ্যে বসে অন্তরঙ্গ গল্প জমে গিয়ে দু'জনের কেউই লক্ষ করেনি যে ঘণ্টার-পর-ঘণ্টা সময় কেটে যাচ্ছে। শেষে হুঁশ হতে পাভেল হঠাৎ লাফিয়ে উঠল।

‘কাজে যাবার সময় বয়ে গেছে। এখানে বসে গল্প না করে আমার এতক্ষণে বয়লারে আগুন দেওয়া উচিত ছিল। দানিলো ওদিকে নিশ্চয়ই চাঁচামেটি আরম্ভ করবে।’ আবার একটু অস্বস্তিতে পড়ে সে বলল, ‘আচ্ছা, চলি তাহলে। আমাকে এবার দৌড়াতে হবে শহরের দিকে।’

তোনীয়াও তাড়াতাড়ি উঠে জ্যাকেটটা পরে নিল, ‘আমাকেও যেতে হবে। চলুন, একসঙ্গে যাই।’

‘না, তা কী করে হবে? আমাকে দৌড়ে যেতে হবে যে।’

‘কেন? আমিও দৌড়ে পাল্লা দেব আপনার সঙ্গে। দেখা যাক, কে আগে পৌছতে পারে।’

অবজ্ঞার চোখে তার দিকে তাকাল পাভেল, ‘আমার সঙ্গে দৌড়ে পাল্লা দেবেন? মোটেই পেরে উঠবেন না!’

‘দেখা যাক। চলুন এখান থেকে বেরুই আগে।’

পাথরের উপর দিয়ে লাফিয়ে পড়ল পাভেল, তারপর হাত বাড়িয়ে দিল তোনীয়ার দিকে। দু'জনে দৌড়ে বন পেরিয়ে এসে পড়ল স্টেশনের দিকে যাবার চণ্ডা আর সমতল ফাঁকা জায়গাটায়।

তোনীয়া থেমে পড়ল রাস্তার মাঝখানে।

‘আসুন, এবার দৌড়ানো যাক। এক, দুই, তিন! ধরুন দিকি...’ ঝড়ের গতিতে উধাও হয়ে গেল তোনীয়া রাস্তা বেয়ে তার জুতোর শুকতলায় বিদ্যুতের ঝিলিক খেলিয়ে। নীল জ্যাকেটের প্রান্তটা তার উড়তে লাগল হাওয়ায়।

পাভেল ছুটে চলল তার পেছনে।

উড়ন্ত জ্যাকেটটার পেছনে দৌড়াতে দৌড়াতে ভেবেছিল পাভেল, ‘দুই ঝাড়া দিয়েই ধরে ফেলব ওকে,’ কিন্তু রাস্তাটার একবারে শেষে স্টেশনের কাছ পর্যন্ত এসে তবে সে তোনীয়াকে ধরতে পারল। শেষের ঝোকটায় এগিয়ে এসে সে শক্ত দুই হাতে তোনীয়ার কাঁধটা চেপে ধরল।

‘এইবার! ধরে ফেলেছি!’ খুশির চিৎকারে বলে উঠল পাভেল হাঁপাতে হাঁপাতে।

‘উহ, লাগছে,’ বাধা দিল তোনীয়া।

দাঁড়িয়ে পড়েছে দু'জনে হাঁপাতে হাঁপাতে, নাড়ির গতি বেড়ে গেছে তাদের। বেদম দৌড়িয়ে ক্লান্ত তোনীয়া সেই মধুর সান্নিধ্যের মুহূর্তে এত হালকাভাবে পাভেলের দেহে ভর দিয়েছিল যে পাভেল বহুদিন পর্যন্ত সেটা ভুলতে পারেনি।

‘এর আগে আমাকে কেউ ধরতে পারেনি’, পাভেলের হাত থেকে নিজেকে ছাড়িয়ে নিয়ে বলল তোনীয়া।

এইভাবে আলাদা হয়ে গেল তারা। হাতের টুপিটা বিদায়ের ভঙ্গিতে নেড়ে পাভেল দৌড় দিল শহরের দিকে।

বয়লার-ঘরের দরজাটা যখন সে ঠেলে খুলল, তার আগে থেকেই স্টোকার দানিলো লেগে গিয়েছিল।

‘আরও দেরি করে আসতে পারলে না?’ খেঁকিয়ে উঠল সে, ‘তোমার কাজটাজ্ঞ সব আমাকেই করে দিতে হবে নাকি?’

পাভেল তার পিঠ চাপড়ে দিল তাকে শাস্ত করবার জন্য। খুশির সঙ্গে বলল, ‘একুনি এক ফুঁয়ে গনগনে আঁচ বের করে দিচ্ছি, দেখ না!’ জ্বালানি কাঠ জড়ো করতে লেগে গেল সে।

মাঝরাত্রের দিকে দানিলো যখন কাঠের স্থূপের উপর আরামে নাক ডাকাচ্ছে, পাভেল তখন ইঞ্জিনটায় তেল দিয়ে, ময়লা ফেন্সোতে হাত মুছে, টুলবাক্সটার ভেতর থেকে বের করে নিল ‘জুসেপে গ্যারিবন্ডি’ বইটির বাষষ্টি নম্বর কিস্তি। ইতালির নেপলস্ শহরের ‘লাল-কোর্তা’দের এই নেতার সম্বন্ধে লোকমুখে প্রচলিত নানান বিচিত্র দৃশ্যসাহসিক রোমাঞ্চ-কাহিনীর মধ্যে অল্পক্ষণের মধ্যে ডুবে গেল সে।

‘সুন্দর নীল তার চোখদুটি তুলে সে তাকাল ডিউকের দিকে...’

‘তোনিয়ারও চোখদুটি নীল’, ভাবল পাভেল, ‘আর ও একটু আলাদা ধরনেরও বটে, মোটেই বড়লোকের মেয়ের মতো নয়। আর, কী দারুণ দৌড়তে পারে!’

তোনিয়ার সঙ্গে তার আগের দিনের আলাপ-পরিচয়-কথাবার্তার কথা ভাবতে ভাবতে তন্ময় হয়ে পড়েছিল পাভেল, সে লক্ষ্যই করেনি যে ওদিকে বাড়তি বাষ্পের চাপে ইঞ্জিনটার গোঙানির শব্দ ক্রমশই বেড়ে চলেছে। বড় চাকাটা ততক্ষণে ঘুরতে লেগেছে প্রচণ্ড বেগে, ইঞ্জিনটা যার উপরে বসানো আছে সেই কংক্রিটের গাঁথুনিটা কেঁপে-কেঁপে উঠছে।

চাপ-মাপার যন্ত্রটার দিকে এক-চোখ তাকিয়েই পাভেল দেখতে পেল—সাবধান-সংকেতের লাল রেখাটার কয়েক বিন্দু উপরে উঠে গেছে কাঁটাটা।

‘ধুরোঁরি ছাই!’ একলাফে পাভেল এগিয়ে এল বাড়তি বাষ্প বের করে দেবার লিভারটার দিকে। হাতলটায় তাড়াতাড়ি দুটো পাক দিয়ে দিল, বাষ্পটা নল বেয়ে সবেগে হিসহিস শব্দে বেরিয়ে এসে পড়ল বয়লার-ঘরের বাইরে নদীর বুকে। লিভারটায় এক টান দিয়ে চামড়ার পট্টিটা পরিয়ে দিল পাষ্পের চাকায়।

দানিলোর দিকে একবার তাকাল পাভেল, কিন্তু সে গভীর ঘুমে আচ্ছন্ন, মুখটা হাঁ হয়ে গেছে, নাক ডাকছে ভীষণ শব্দে। আধ মিনিটের মধ্যেই চাপ-মাপার যন্ত্রের কাঁটাটা স্বাভাবিক অবস্থায় এসে গেল।

\*

\*

\*

পাভেল ভিন্ন পথে চলে যাবার পর, কালো-চোখ এই তরুণটির সঙ্গে আজকের আলাপের ব্যাপারটা ভাবতে ভাবতে তোনিয়া চলল তার বাড়িমুখো। পাভেলের সঙ্গে আলাপ হওয়াতে নিজের অজান্তেই খুশি হয়ে উঠেছে তোনিয়ার মন। ‘কী উজ্জল প্রাণশক্তি ছেলেটার! আর, আমি যা ভেবেছিলাম সেরকম গোয়ার-গোবিন্দ ও তো

মোটাই নয়! আর যাই হোক, ওইসব ইচ্ছুলে-পড়া লাল-ঝরা ছেলেগুলোর মতো নয় একেবারেই...'

পাভেলের মনের গড়নটা অন্যরকম, এমন একটা পরিবেশ থেকে সে এসেছে যেটা তোনিয়ার কাছে একেবারেই অপরিচিত।

'কিন্তু বাগ মানিয়ে নিতে পারা যাবে ওকে,' মনে মনে ভাবল তোনিয়া, 'বেশ হবে ওর সঙ্গে বন্ধুত্বটা হলে।'

বাড়ির কাছাকাছি এসে তোনিয়া দেখতে পেল—বাগানে বসে আছে লিজা সুখারকো, নেলি আর ভিক্টর লেচিনস্কি। ভিক্টর কী একটা পড়ছিল। ওরা তার জন্যই অপেক্ষা করছে বোঝা গেল।

সন্ধ্যা-বিনিময়ের পর তোনিয়া একটা বেঞ্চির উপরে বসল। এদের অন্তঃসারশূন্য গালগল্পের মাঝখানে একসময় ভিক্টর তার পাশে বসে পড়ে জিজ্ঞেস করল, 'আমি যে-উপন্যাসটা দিয়েছিলাম, সেটা পড়েছেন?'

'উপন্যাস?' হঠাৎ মনে পড়ল তোনিয়ার, 'ও, বইটা আমি...' প্রায় বলে ফেলেছিল আর-কী যে সে বইটা ভুলে ফেলে এসেছে হৃদের ধারে।

প্রশ্নভরা চোখে ভিক্টর তাকাল তার দিকে, 'উপন্যাসটা ভালো লেগেছে আপনার?'

এক মুহূর্তের জন্য ভাবনায় ডুবে গেল তোনিয়া, তারপর জুতোর মাথাটা দিয়ে ধীরে ধীরে রাস্তাটার ধুলোর বুকে একটা জটিল রেখার আঁচড় কাটতে কাটতে মাথা ভুলে তাকাল সে ভিক্টরের দিকে, 'না, আমি ওর চেয়েও ঢের ভালো একটা উপন্যাস আরম্ভ করেছি।'

'তাই নাকি?' টেনে টেনে বলল ভিক্টর বিরক্ত হয়ে, 'কার লেখা বইটা?'

উজ্জ্বল উপহাসভরা চোখে তার দিকে তাকিয়ে তোনিয়া বলল, 'কার্লের লেখা নয়...'

বারান্দা থেকে তোনিয়ার মা ডাকলেন, 'তোনিয়া, তোর বন্ধুদের ভেতরে নিয়ে আয়, চা দেওয়া হয়েছে।'

নেলি আর লিজার হাত ধরে তোনিয়া ওদের নিয়ে এল বাড়ির ভেতরে। তোনিয়ার কথাগুলোর মানে বুঝতে না-পেরে ওদের পেছনে পেছনে আসবার সময় ভারি ধোঁকায় পড়ল ভিক্টর।

\*

\*

\*

এই নতুন আর অদ্ভুত অনুভূতিটা পাভেলকে তার অজ্ঞানতাই পেয়ে বসেছে, তার মনের মধ্যে একটা অস্পষ্ট অস্থিরতার সৃষ্টি করেছে। ব্যাপারটা সে ঠিক বুঝতে পারছে না বলেই তার বিদ্রোহী স্বভাব বেশকিছুটা নাড়া খেয়েছে।

তোনিয়ার বাবা প্রধান বনপরিদর্শক। পাভেলের দিক থেকে এটার মানে—তোনিয়ার বাবা আর উকিল লেচিনস্কি বলতে গেলে সমশ্রেণীর মানুষ।

পাভেল মানুষ হয়ে উঠেছে দারিদ্র্য আর অভাবের মধ্যে। কাউকে বড়লোক বলে মনে হলেই তার প্রতি পাভেলের মনে একটা বিরুদ্ধতা জাগে। সুতরাং তোনিয়ার প্রতি তার মনোভাবটা হল সংশয় আর সাবধানতা মেশানো। তোনিয়া তাদের নিজেদের একজন নয়—যেমন, ধরা যাক, রাজমিস্ত্রির মেয়ে ওই গলোচকার মতো তোনিয়া সরল

আর সহজবোধ্য নয়। তোনিয়ার সান্নিধ্যে পাভেলকে সবসময় সচেতন থাকতে হয়—  
 ওর মতো সুন্দরী আর সুশিক্ষিতা মেয়ের পক্ষে পাভেলের মতো একজন সামান্য  
 কয়লা-জোগানদার মজুরকে বিদ্রূপ করে কিংবা অপমানকর কিছু বলে বসাটা আশ্চর্য  
 নয় বলেই পাভেলও তোনিয়ার ওই ধরনের কোনো কথার উপযুক্ত পাল্টা জবাব দেবার  
 জন্য সর্বদা প্রস্তুত থাকে মনে মনে।

পুরো একটা সপ্তাহ তোনিয়ার সঙ্গে তার দেখা হয়নি। তাই আজ পাভেল হৃদের  
 দিকে যাবে বলে ঠিক করল। ইচ্ছে করেই সে তোনিয়াদের বাড়ির সামনের রাস্তাটা  
 ধরল, যদি ওর সঙ্গে দেখা হয়ে যায় এই আশায়। বেড়াটার ধার ঘেঁষে সে যখন আস্তে  
 আস্তে চলেছে, তখন বাগানের শেষপ্রান্তে সেই পরিচিত নাবিক-ধাঁচের ব্লাউজটা  
 দেখতে পেল। পথের উপর থেকে একটা পাইন-কুঁড়ি কুড়িয়ে নিয়ে ছুড়ে মারল শাদা  
 ব্লাউজটা লক্ষ করে। ঘুরে দাঁড়িয়ে ওকে দেখে ছুটে এল তোনিয়া বেড়ার কাছে, উজ্জ্বল  
 হাসিভরা মুখে হাতটা বাড়িয়ে দিল বেড়ার ওপারে।

‘এসেছেন তাহলে শেষপর্যন্ত,’ খুশিভরা গলায় বলল সে, ‘কোথায় ছিলেন এতদিন?  
 হৃদের ওদিকে গিয়েছিলাম ফেলে-আসা বইটা নিয়ে আসবার জন্যে। ভেবেছিলাম  
 হয়তো আপনার দেখা পাব ওখানে। আসুন-না আমাদের বাগানের ভেতরে।’

মাথা নাড়ল পাভেল, ‘না।’

‘কেন?’ বিশ্বয়ে ভুঙ্ক তুলল তোনিয়া।

‘আপনার বাবা গালাগালি করবেন নিশ্চয়। আমার মতো একটা গরিব ওঁচা  
 লোককে বাগানে ঢুকতে দেবার জন্যে নিশ্চয় আপনার ওপরে একচোট বকুনি হবে।’

‘কী বাজে বকছেন, পাভেল,’ চটে গিয়ে বলল তোনিয়া, ‘একুনি আসুন ভেতরে,  
 আমার বাবা ওসব কিছুই বলবেন না। দেখতেই পাবেন। আসুন, ভেতরে আসুন।’

দেউড়িটা খুলে দেবার জন্য ছুটে এল তোনিয়া। অনিচ্চিতভাবে বাগানে  
 ঢুকল পাভেল।

বাগানের মধ্যে মাটিতে গাঁথা একটা গোল টবিলের ধারে দু’জনে বসার পর  
 তোনিয়া জিজ্ঞেস করল, ‘বই ভালোবাসেন আপনি?’

সাম্রহে বলল পাভেল, ‘খুব।’

‘কী বই আপনার সবচেয়ে পছন্দ?’

দু-এক মুহূর্ত ভেবে নিয়ে উত্তর দিল পাভেল, ‘জুসেপা গারিবল্‌ডি।’

‘জুসেপে গ্যারিবল্‌ডি’, সংশোধন করে দিল তোনিয়া, ‘ওই বইটা আপনার খুব  
 ভালো লাগে বুঝি?’

‘হ্যাঁ। আমি বইটার আটষষ্টিটা কিস্তির সবগুলো পড়েছি। আমি প্রত্যেক হপ্তা  
 মজুরি পাবার দিনে পাঁচটা করে কিস্তি কিনি। গ্যারিবল্‌ডি—হ্যাঁ, একটা মানুষের মতো  
 মানুষ!’ বলতে বলতে উত্তেজিত হয়ে উঠল পাভেল, ‘সত্যিকারের বীর! একেই তো  
 বলি সাক্ষা মানুষ একটা! কতগুলো লড়াই করতে হয়েছে লোকটাকে—আর  
 প্রত্যেকটায় জিতেছে। দুনিয়ার সব দেশ ঘুরেছে! গ্যারিবল্‌ডি আজ বেঁচে থাকলে আমি  
 ওঁর দলে গিয়ে ঢুকতাম, সত্যি বলছি। গ্যারিবল্‌ডি তো যতসব মজুরদের তাঁর দলে  
 নিতেন, আর তারা সবাই মিলে লড়াই করত গরিব মানুষদের জন্যে।’

‘চলুন, আমাদের লাইব্রেরিটা দেখাব আপনাকে!’ পাভেলের হাত ধরে বলল তেনিয়া।  
আপত্তি করল পাভেল, ‘না, না। বাড়ির ভেতরে যাব না আমি।’

‘এত গোয়াৰ্ভুমি করেন কেন? ভয় পাচ্ছেন নাকি?’

পাভেল তার খালি পাদুটোর দিকে তাকিয়ে মাথাটা চুলকোতে লাগল—আহামরি  
পরিষ্কার কিছু নয় সে দুটো।

‘আপনার বাবা কিংবা মা আমাকে বের করে দেবেন না তো?’

চটে গেল তেনিয়া, ‘ওসব কথা ছাড়ুন দেখি, আমি রাগ করব আপনার ওপর।’

‘লেচিন্‌কিরা কিন্তু কখনো আমাদের মতো লোকজনদের ঢুকতে দেয় না ওদের  
বাড়িতে। আমাদের শ্রেণীর লোকদের সঙ্গে কথা বলে রান্নাঘরে। আমি একবার  
কী-একটা কাজে গিয়েছিলাম ওদের বাড়ি, নেলি তো ঘরেই ঢুকতে দিল না—গালিচা  
নোংরা করে দেব কিংবা ওইরকম কিছু-একটা করব ভেবে ভয় পেয়েছিল নিশ্চয়ই’,  
হেসে বলল পাভেল।

‘আসুন, আসুন’, তাগিদ দিল তেনিয়া, পাভেলের কাঁধে মৃদু একটা ধাক্কা দিয়ে  
ঠেলে দিল বারান্দার দিকে।

খাবারঘরটার মধ্যে দিয়ে ওকে নিয়ে এল আরেকটা ঘরে, সেখানে বিরাট একটা  
ওক-কাঠের আলমারি। তার পাল্লাদুটো খুলে ফেলতেই পাভেল দেখল তার  
সামনে পরিপাটি করে সাজানো সারি-সারি অজস্র বই। এমন সম্পদ সে জীবনে  
কোনোদিন দেখেনি।

‘আচ্ছা, আপনার জন্যে একটা ভালো বই বেছে দিচ্ছি। কিন্তু কথা দিন—আরও  
বই নেবার জন্যে নিয়মিত আসবেন, কেমন?’

সানন্দে মাথা নাড়ল পাভেল। বলল, ‘বই আমি খুব ভালোবাসি।’

খুশিভরা কয়েকটি ঘণ্টা একসঙ্গে সেদিন কাটল তারা! তেনিয়া তার মায়ের সঙ্গে  
পাভেলের আলাপ করিয়ে দিল। পাভেল যেরকমটি ভেবে নিয়েছিল, শেষপর্যন্ত দেখা  
গেল সেরকম ভীষণ কিছু ব্যাপার নয়। সত্যিকথা বলতে কী, তেনিয়ার মাকে তার  
ভালোই লাগল বেশ।

তেনিয়া তার নিজের ঘরে পাভেলকে নিয়ে গিয়ে নিজের পাঠ্যবই ও অন্যান্য  
বই দেখাল।

প্রসাধনের টেবিলের উপরে ছোট্ট একটা আয়না। সেটার সামনে পাভেলকে টেনে  
নিয়ে গিয়ে একটু হেসে উঠে বলল, ‘মাথার চুলগুলো এমন বুনো ঝাড়ের মতো বাড়তে  
দিয়েছেন কেন? চুলটা কি কখনো ছাঁটেন না বা আঁচড়ান না?’

একটু অস্বস্তির সঙ্গে কৈফিয়ত দিয়ে পাভেল বলল, ‘বেশি বড় হয়ে গেলে শ্রেফ  
কামিয়ে ফেলি। চুল নিয়ে আর কী করব?’

ওনে হাসল তেনিয়া, টেবিলের উপর থেকে একটা চিরুনি নিয়ে তাড়াতাড়ি  
বারকয়েক আঁচড়ে দিল উকখুক কোঁকড়া চুলগুলো। তারপরে পাভেলকে নিরীক্ষণ করে  
বলল, ‘এইবার ঠিক হয়েছে। চুলটা ভালো করে ছাঁটবেন, অমন ন্যালাখ্যাপার মতো  
ঝাঁকড়া-চুলো হয়ে বেড়ান কেন?’

পাভেলের বিবর্ণ খয়েরি রঙের জামা আর জীর্ণ প্যাণ্টের দিকে একনজর খুঁটিয়ে দেখে নিল তোনিয়া, কিন্তু আর কোনো মন্তব্য করল না।

তোনিয়ার নজরটা লক্ষ করে পাভেল লজ্জা পেল তার জামাকাপড়ের কথা ভেবে। বিদায় নেবার সময় তোনিয়া তাকে আবার আসবার জন্য আমন্ত্রণ জানাল। পাভেলের কাছ থেকে কথা আদায় করে নিল যে সে আবার দু'দিন বাদে এসে তোনিয়ার সঙ্গে মাছ ধরতে যাবে।

সরাসরি জানলা দিয়ে লাফিয়ে পড়ে খুব সহজ উপায়েই পাভেল বেরিয়ে এল তোনিয়ার বাড়ি থেকে। অন্য সব ঘরগুলো পার হয়ে তোনিয়ার মা'র সঙ্গে দেখা করে আসার কথাটা তার মনেই হয়নি।

\*

\*

\*

আরতিওম চলে যাবার পর থেকে করচাগিন-পরিবারে কষ্ট শুরু হয়েছে। পাভেলের মজুরি যথেষ্ট নয়।

মারিয়া ইয়াকোভলেভনা পাভেলকে বলল, সে যদি আবার আগেকার মতো কাজে লাগে তাহলে কেমন হয়—বিশেষ করে যখন লেচিনস্কিদের বাড়িতে একজন রাধুনির দরকার। কিন্তু পাভেলের তাতে মত নেই।

‘না, মা। আমি একটা বাড়তি কাজ জোগাড় করে নেব। করাত-কলে ওরা লোক চায় কাঠের তক্তা জড়ো করার জন্যে। আমি ওখানে আধা-রোজ করে কাজ করব, তাহলেই আমাদের চলে যাবার মতো যথেষ্ট রোজগার হবে এখন। তুমি কিছুতেই কাজে যেতে পারবে না, তাহলে তোমাকে না-খাটিয়ে নিজে চালাতে পারিনি বলে আরতিওম রাগ করবে আমার ওপর।’

মা পীড়াপীড়ি করবার চেষ্টা করল, কিন্তু পাভেল গৌ ধরে রইল, রাজি হল না।

পরের দিনই পাভেল করাত-কলে কাজে লেগে গেল—সদ্য-কাটা কাঠের তক্তাগুলো ওকোতে দেবার জন্য জড়ো করা তার কাজ। চেনা কতকগুলো ছেলের সঙ্গে সেখানে তার দেখা—তার স্কুলের পুরনো সহপাঠী মিশা লেভচুকভ আর ডানিয়া কুলিশভ। মিশা আর সে জুটি বেঁধে কাজ করতে শুরু করল, ঠিকে হিশেব কাজ করে তাদের রোজগারও মন্দ দাঁড়াল না। করাত-কলে পাভেলের দিনটা কাটে, রাত্রিবেলায় সে যায় বিদ্যুৎ-স্টেশনের কাছে।

দশদিনের দিন বিকেলে পাভেল তার রোজগার নিয়ে এল মায়ের কাছে। টাকাটা মায়ের হাতে দিয়ে একটু অস্বস্তির সঙ্গে ইতস্তত করে লজ্জায় মুখ রাঙা করে শেষপর্যন্ত বলে ফেলল, ‘ইয়ে, এই বলছিলাম কী, আমাকে একটা সাটিনের জামা কিনে দাও না, মা—নীল রঙের—গেল বছরে যেমনটি দিয়েছিলে, মনে আছে তো? প্রায় অর্ধেকটা টাকাই লেগে যাবে অবশ্য—কিন্তু তুমি ভেবো না, আমি আরও কিছু রোজগার করব। আমার এই জামাটা একেবারে পচে গেছে।’ তাড়াতাড়ি বলল সে, যেন এই অনুরোধ করার জন্য মাপ চাইছে।

‘সে কি রে, নিশ্চয় কিনব বৈকি,’ বলল মা, ‘আজই কাপড়টা কিনে আনব, বুখলি পাভলুশা, কাল দেব সেলাই করে। সত্যিই তোর একটা নতুন জামার বড় দরকার।’ স্নেহে সে তাকাল ছেলের দিকে।

চুল-ছাঁটাইয়ের দোকানটার সামনে একটু থেমে পকেটের ভেতরে রুবলটা নাড়াচাড়া করতে করতে পাভেল দাঁড়াল দরজাটার মুখে।

নাপিত বেশ চৌকস চেহারার এক তরুণ। পাভেলকে ঢুকতে দেখে তাকে খালি চেয়ারটা মাথা নেড়ে দেখিয়ে বলল, 'বসুন।'

নরম উঁচু চেয়ারটায় গা এলিয়ে বসে পাভেল তার সামনের আয়নায় একটা অপ্রতিভ রাঙা মুখ দেখতে পেল।

নাপিত জিজ্ঞেস করল, 'ছোট করে ছেঁটে দেব?'

'হ্যাঁ...মানে, না—এই কী বলে গিয়ে—আমি চুলটা ছাঁটতে চাই আর কী—যাকে বলে গিয়ে...' থতমত খেয়ে চুপ করে গেল পাভেল, হাত নেড়ে একটা হতাশার ভঙ্গি করল।

হাসল নাপিত, 'বুঝেছি।'

পনেরো মিনিট পরে দুর্ভোগের হাত থেকে রেহাই পেয়ে ক্লান্ত ঘর্মাক্ত পাভেল বেরিয়ে এল—চুলটা তার পরিপাটি করে ছাঁটা আর আঁচড়ানো। অব্যাহত চুলগুলোকে বাগ মানাতে গিয়ে বেশ খাটতে হয়েছে নাপিতকে, কিন্তু শেষপর্যন্ত জল আর চিরুনির জয় হয়েছে, ঝোঁচা-ঝোঁচা চুলের গোছটা এখন দিব্যি বসে গেছে।

রাস্তায় বেরিয়ে এসে একটা স্বস্তির নিশ্বাস ছেড়ে পাভেল তার টুপিটা ঠেলে নামিয়ে দিল চোখের উপর। 'কী জানি, মা আমাকে দেখে কী বলবে,' মনে মনে ভাবল সে।

একসঙ্গে মাছ ধরতে যাবার কথা পাভেল না-রাখাতে তোনিয়া বিরক্ত হয়েছিল। বিরক্ত হয়ে ভেবেছিল, 'ওই কয়লা-জোগানদার ছেলেটার অন্যের সম্বন্ধে তেমন বিবেচনা নেই।' কিন্তু আরও কয়েকটা দিন কেটে যাবার পরেও যখন পাভেল এল না, তখন তোনিয়ার মন কেমন করতে লাগল।

একদিন যখন সে বেড়াতে বেরুচ্ছে, এমন সময়ে তার মা তার ঘরে এসে বললেন, 'তোর সঙ্গে একটি ছেলে দেখা করতে এসেছে তোনিয়া, আসতে বলব নাকি?'

দরজার কাছে দেখা গেল পাভেলকে, চেহারা এত বদলে গেছে যে তোনিয়া প্রথমে তাকে প্রায় চিনতেই পারেনি।

পরনে তার আনকোরা নতুন সাটিনের জামা আর কালো প্যান্ট, চকচকে করে পালিশ-করা তার বুট-জোড়া। তোনিয়া একমুহূর্তের মধ্যেই দেখে নিয়েছে, তার ঝোঁচা-ঝোঁচা চুল পরিপাটিভাবে ছাঁটাই-করা। ময়লা-নোংরা তরুণ মজুরটি যেন নতুন মানুষ হয়ে গেছে একেবারে।

বিশ্বয় প্রকাশ করতে গিয়ে নিজেকে সময়মতো সামলে নিল তোনিয়া, কারণ পাভেল-যে এমনিতেই অস্বস্তিবোধ করছে সেটা বুঝতে পেরে সে আর তাকে বেশি লজ্জা দিতে চাইল না। পাভেলের চেহারায় পরিবর্তনটা লক্ষ না-করার ভান করে সে তাকে বকতে শুরু করে দিল, 'মাছ ধরতে যাবার জন্যে এলেন না কেন? এই বুঝি আপনার কথা রাখা? ছিঃ ছিঃ!'



‘আমি এতদিন করাত-কলে কাজ করছি, একেবারে আসবার সুযোগ পাইনি।’  
এই জামা আর প্যান্টটা কিনবার জন্য সে যে এই ক’দিন বেদম কাজ করেছে,  
সে-কথা পাভেল তোনিয়াকে বলতে পারল না।

তোনিয়া অবশ্য ব্যাপারটা আন্ডাজ করে নিল, পাভেলের ওপরে তার রাগ উবে গেল।  
‘চলুন, পুকুরের ধারে বেড়াতে যাই,’ বলল তোনিয়া। বাগান ছাড়িয়ে তারা এসে  
পড়ল রাস্তার উপরে।

কিছুক্ষণের মধ্যেই পাভেল তোনিয়াকে বলতে শুরু করে দিয়েছে লেফটেন্যান্টের  
ঘর থেকে সেই পিস্তল-চুরির ঘটনাটা। তার এই মস্তবড় গোপনীয় কথাটা  
বন্ধুর মতো তোনিয়ার কাছে সমস্ত বলল সে। শিগ্গরিই পাভেল একদিন  
তোনিয়াকে নিয়ে বনের গভীর অঞ্চলে গিয়ে গুলি ছুড়ে শিকার-টিকার করবে এমন  
কথাও দিল।

তারপরে হঠাৎ তাকে ‘তুমি’ সম্বোধন করে বলে উঠল পাভেল, ‘কিন্তু দেখো,  
কান্নার কাছে আমাকে ফাঁস করে দিও না যেন।’

‘আমি কখনো কান্নার কাছে তোমাকে ফাঁস করব না,’ প্রতিজ্ঞা করল তোনিয়া।

### চতুর্থ অধ্যায়

গোটা ইউক্রেন জুড়ে শুরু হয়ে গেছে প্রচণ্ড, নির্মম শ্রেণীসংগ্রাম। ক্রমশই আরও  
বেশি-বেশি করে লোক এগিয়ে আসছে সশস্ত্র লড়াইয়ের পথে, প্রত্যেকটি সংঘাত  
নতুন নতুন অংশীদারদের টেনে আনে।

নাগরিকদের সেই শাস্ত্র নিস্তরঙ্গ জীবন আর নেই।

তুষারঝড় উঠল, কামানের গোলা ফাটার শব্দে কেঁপে-কেঁপে উঠছে ছোট ছোট  
জীর্ণ বাড়িগুলো। নাগরিকরা জড়োসড়ো হয়ে আশ্রয় নিচ্ছে তাদের মাটির নিচের  
ভাঁড়ারঘরে কিংবা পেছনের আঙিনায় খোঁড়া গর্তের মধ্যে।

নানান ছোপ আর নানান ছাঁদের পেথলিউরা-দস্যুবাহিনী সমস্ত অঞ্চলটা ছেয়ে  
ফেলেছে। ছোট-বড় দলের নেতা, স্থানীয় গোষ্ঠী-সর্দার, গোলুব, আর্কেঞ্জেল, এঞ্জেল,  
গদিউস্ ইত্যাদি নামে বিভিন্ন বোম্বের নেতৃত্বে যতসব লুটেরা-দল বন্যার মতো  
নেমে এসেছে।

জারের সৈন্যবাহিনীর ভূতপূর্ব অফিসার, ইউক্রেনের দক্ষিণপন্থী আর বামপন্থী  
সোশ্যালিস্ট-রেভলিউশনারিরা, কিংবা যে-কোনো বেপরোয়া লোকই কিছু খুনী-ডাকাতকে  
জড়ো করামাত্র নিজেকে ‘আতামান’ বলে ঘোষণা করে দিচ্ছে; কেউ কেউ তাদের  
নিজের নিজের সাধ্য, শক্তি আর সুযোগ অনুসারে যতটা পারছে জায়গা দখল করে  
পেথলিউরা-দলের হলদে-নীল ঝাণ্ডা উড়িয়ে দিয়ে নিজের কর্তৃত্ব কায়ম করে নিচ্ছে।

হরেক রকমের এই দঙ্গলগুলিতে আরও জুটেছে কুলাকরা আর আতামান  
কোনোভালেথসের ফৌজের গ্যালিসীয় সৈন্যরা। আর এইসব বিভিন্ন দলের মধ্যে

থেকে 'প্রধান আতামান' পেথলিউরা গড়ে তুলেছে তার সৈন্যবাহিনী। লাল পার্টিজান সৈন্যদলগুলি যখন এইসব সোশ্যালিস্ট-রেভলিউশনারিদের আর কুলাক্দের দলবলের ওপর আক্রমণ চালাল, তখন হাজার হাজার ঘোড়ার খুরের আওয়াজে আর মেশিনগান, কামান ইত্যাদি বয়ে নিয়ে যাওয়া গাড়ির চাকার ঘর্ষের শব্দে মাটি কেঁপে কেঁপে উঠতে লাগল।

অস্থির, উদ্ভাল সেই ১৯১৯-এর এপ্রিল মাসে আতঙ্কে বুদ্ধিভ্রষ্ট কোনো ভদ্রনাগরিক হয়তো সকালবেলায় ঘরের জানলার খড়খড়িটা খুলে, ঘুমে ভারী চোখে চেয়ে, মুখ বাড়িয়ে তার পাশের বাড়ির প্রতিবেশীকে উদ্ভিগ্ন স্বরে প্রশ্ন করছে, 'আভ্তোনম পেত্রভিচ, বলতে পারেন আজ শহরের কর্তা কে?'

এবং আভ্তোনম পেত্রভিচ হয়তো তখন তার প্যান্ট আঁটসাঁট করে বাঁধতে বাঁধতে এদিকে-ওদিকে সন্ত্রস্ত দৃষ্টি ফেলে জবাব দিচ্ছে, 'জানিনে, আফানাস্ কিরিলোভিচ। রাত্রে কারা যেন ঢুকেছে শহরে—কারা, সেটা শিগগিরই জানতে পারব : যদি ওরা ইহুদিদের ধরে লুটপাট শুরু করে, তাহলে বুঝব, ওরা পেথলিউরার, আর যদি ওই 'কমরেডদের' কেউ হয়, তাহলে ওদের কথাবার্তা ধরনধারণেই সঙ্গে সঙ্গে ধরতে পারব। আমি তো কার ছবি ঘরে টাঙাতে হবে সবসময় সেইদিকে লক্ষ্য রাখছি—আমাদের ওই পাশের বাড়ির গেরাসিম লেওণ্ডিয়েভিচের মতো যাতে আবার বিপদে পড়তে না হয়। জানেন তো, ভালো করে না-দেখেওনেই সে গিয়ে দিব্যি লেনিনের ছবি টাঙিয়ে বসে আছে; আর সঙ্গে সঙ্গে তিনজন লোক এসে তাকে ধরেছে চেপে : দেখা গেল তারা পেথলিউরার লোক। ছবিটার দিকে একনজর দেখেই ওরা বাড়ির কর্তার উপর ঝাঁপিয়ে পড়ে দিল বেশ ঘা-কতক—তা প্রায় গোটা-কুড়ি চাবুকের ঘা হবে; ওরা ঝঁকিয়ে উঠল, 'জ্যান্তছাল ছাড়িয়ে নেব তোর, ওয়োরের বাচ্চা কমিউনিস্ট কোথাকার!' গেরাসিম যতোই চেষ্টা আর যতোই প্রাণপণে চেষ্টা করতে থাকে ব্যাপারটা বুঝিয়ে বলার জন্যে, কিছুতেই কিছু হবার নয়।'

দলে দলে সশস্ত্র লোকজনদের রাস্তা দিয়ে আসতে দেখলে জানলা বন্ধ করে লুকিয়ে পড়ে ভদ্রনাগরিকরা। মনে মনে ভাবে, সাবধানের মার নেই...

শ্রমিকরা একটা চাপা ঘৃণার সঙ্গে দেখে পেথলিউরা-ঠগীদের হলদে আর নীল ঝাণ্ডাটাকে। ইউক্রেনের এইসব উগ্র জাতীয়তাবাদী পেটি-বুর্জোয়া স্রোতের সামনে তারা অসহায় বোধ করে। তাদের মনোবল ফিরে আসে আর উৎসাহ জাগে শুধু যখন কোনো লাল সৈন্যদল চারিদিক থেকে ঘিরে-আসা ওই পেথলিউরা বাহিনীকে প্রচণ্ড লড়াই করে হঠিয়ে দিয়ে পথ কেটে এসে শহরের মধ্যে ঢোকে। দু-একদিন শ্রমিকের অতিপ্রিয় লাল ঝাণ্ডাটা ওড়ে টাউন-হলের মাথায়, কিন্তু তার পরেই দলটা এগিয়ে যায় আর আবার নিরানন্দে আচ্ছন্ন হয়ে যায় সবকিছু।

ইদানীং শহরটা আছে কর্নেল গোলুব-এর হাতে—নীপার-পারের ডিভিশনের 'আশা আর গর্ব' কর্নেল গোলুব।

আগের দিন তার হাজার-দুয়েক খুনী-ডাকাতের একটা বাহিনী বিজয়-অভিযান করে শহরে ঢুকেছে। অতি সুন্দর একটা কালো ঘোড়ায় চেপে সৈন্যসারির আগে-আগে

এল পান্ গোলাব । এপ্রিল মাসের চনমনে রোদ সস্তুও তার পরনে ছিল একটা ককেশীয় বুরকা, চুড়োয় উজ্জ্বল লাল রঙের বেড়-দেওয়া ভেড়ার চামড়ার কসাক-টুপি, কালো 'চের্কেস্কা' আর এই পোশাকের সঙ্গে মানানসই নানারকম অস্ত্রশস্ত্র : ছোরা আর ক্রপোর পাতে মোড়া হাতলঅলা বাঁকানো লম্বা তলোয়ার । তার দাঁতে চেপে ধরা ছিল একটা বাঁকা ডাঁটিঅলা পাইপ । সুন্দর চেহারা পান্ কর্নেল গোলাব-এর : চোখের ভুরুদুটি কালো, বিবর্ণ ফরসা মুখে নিরবচ্ছিন্ন মদ্যপানজনিত হালকা হলুদের আভাস ।

বিপ্রবের আগে এই পান্ কর্নেল ছিল একটা চিনি-কলের সঙ্গে সংশ্লিষ্ট বিট-উৎপাদন-খামারের উদ্ভিদতত্ত্ববিদ । কিন্তু তার সে-জীবনটা ছিল নিতান্তই ভোঁতা, 'আতামান'-এর পদ-পদবির সঙ্গে তার কোনো তুলনাই হয় না । অতএব, গোটা দেশজুড়ে যে ঘোলা-জলের ঢেউ বয়ে চলেছে, তারই চূড়ায় এই উদ্ভিদতত্ত্ববিদটি পান্ কর্নেল গোলাব হিসেবে আবির্ভূত হল ।

শহরের একমাত্র থিয়েটার-গৃহে এই আগন্তুকদের সম্মানে একটা আনন্দোৎসবের আয়োজন করা হল । পেথলিউরা-সমর্থক বিশিষ্ট নাগরিকদের 'শ্রেষ্ঠ প্রতিভা'রা সবাই উপস্থিত : ইউক্রেনীয় শিক্ষকের দল, পাদরিমশাইয়ের দুই কন্যা—সুন্দরী আনিয়া আর তার ছোটবোন দিনা, অপেক্ষাকৃত মাঝারি অবস্থার জনকতক অভিজাত লোক, কাউন্ট পতোথ্কির পরিবারের কয়েকজন ভূতপূর্ব ভৃত্য আর কিছুসংখ্যক সাধারণ মধ্যবিত্ত নাগরিক, ইউক্রেনীয় সোশ্যালিস্ট-রেভলিউশনারি দলের অবশিষ্ট কিছু লোক, যারা নিজেদের 'স্বাধীন কসাক' বলে থাকে ।

জমজমাট থিয়েটার-গৃহ । পাদরিকন্যা, মধ্যবিত্ত মহিলা আর শিক্ষিকাদের আশেপাশে ঘুরঘুর করে বেড়াচ্ছে ঘোড়ায়-চড়া বুটের খটখটে আগুয়াজ তুলে অফিসাররা, যাদের বেশভূষা দেখে মনে হয় যেন তারা 'জাপোরোঝিয়ে-কসাকদের' পুরনো ছবি থেকে উঠে এল । আর, উজ্জ্বল রঙের ফুলের নকশা-তোলা ইউক্রেনের জাতীয় পোশাকে রঙচঙে পুঁতির মালা আর ফিতেয় সেজেগুজে এসেছে ঐ মহিলারা ।

সামরিক বাজানদাররা বাজনা শুরু করে দিল । আজ সন্ধ্যায় যে 'নাজার শুদোলিয়া' নামে নাটকটির অভিনয় হবার কথা আছে তার জন্য মঞ্চের উপর উর্ধ্বশ্বাস প্রস্তুতি চলেছে ।

কিন্তু বিজলি-সরবরাহ বন্ধ । ঘটনাটা যথাসময়ে সদর ঘাঁটিতে পান্ গোলাবের কর্ণগোচর করল তার অ্যাডজুট্যান্ট সাব-লেফটেন্যান্ট পলিয়ান্তসেভ, সে নিজের নাম আর পদবি ইউক্রেনীয় ধাঁচে করে নিয়ে নিজেকে ইদানীং 'খোরক্সিজি'\* পালিয়ানিৎসা বলে অভিহিত করে থাকে । কর্নেলটি আজকের সাক্ষা-উৎসবে উপস্থিত থেকে অনুষ্ঠানটিকে সার্থক করে তুলতে ইচ্ছুক ছিল । পালিয়ানিৎসার কথাটা শুনে সে অবজ্ঞাভরে, কর্তৃত্বের ভঙ্গিতে বলল, 'আলোর ব্যবস্থাটা করো । একজন ইলেকট্রিশিয়ান জোগাড় করে বিদ্যুৎ-স্টেশনটা চালু করো—মাথা খুঁড়ে মরে গেলেও এটা করা চাই ।'

'যে-আজ্ঞে, পান্, কর্নেল!'

খোরক্সিজি পালিয়ানিৎসা মাথা না-খুঁড়েই বিজলি-মিন্ত্রিদের জোগাড় করল ।

\* কসাক অস্বারোহী বাহিনীতে জুনিয়ার অফিসার ।

দু-ঘণ্টার মধ্যেই পাভেল এবং আর দুজন মিস্ত্রিকে সশস্ত্র প্রহরায় নিয়ে আসা হল বিদ্যুৎ-স্টেশনে।

‘সাতটার মধ্যে যদি আলো না জ্বলে, তাহলে তোমাদের তিনজনকেই ঝুলিয়ে দেব,’ কথাটা বলে পালিয়ানিৎসা ওদের মাথার উপরে একটা লোহার কড়িকাঠের দিকে দেখিয়ে দিল।

অবস্থাটার এই সুস্পষ্ট ব্যাখ্যায় কাজ হল—নির্দিষ্ট সময়েই আলো জ্বলে উঠল।

পুরোদমে যখন সাক্ষ্য-উৎসব চলেছে, তখন পান্ কর্নেল এল তার সঙ্গিনীকে নিয়ে—গোলুব যে ওঁড়ির বাড়িতে তার ডেরা নিয়েছে, তারই পীনবন্ধ সোনালি-চুল মেয়েটি তার সঙ্গিনী।

তার বাপের পয়সা আছে, তাই সে সদর শহরের হাইস্কুলে লেখাপড়া শিখেছে।

সামনের সারিতে এই দু’জন মাননীয় প্রধান-অতিথি পূর্বনির্দিষ্ট আসন গ্রহণ করলেন। তার পরেই পান্ কর্নেল ইশারা করল এবং সঙ্গে সঙ্গেই এমন আকস্মিকভাবে পর্দাটা উঠে গেল যে মঞ্চ থেকে তাড়াতাড়ি সরে যাবার সময়ে পরিচালকের পেছনদিকটা একনজর দেখতে পেল দর্শকরা।

নাটকের অভিনয় চলতে থাকার সময়ে অফিসাররা আর তাদের সঙ্গিনীরা সময় কাটাল যেখানে পানাহারের ব্যবস্থা রয়েছে সেখানে। সর্বকর্মপটু পালিয়ানিৎসা আয়োজন করে রেখেছিল—হুকুমের জোরে সরবরাহ করা নানারকম সুখাদ্য আর ঘরে-তৈরি নির্জলা মদে ভরাট হয়ে উঠল সবাই। নাটকের অভিনয়ের শেষ নাগাদ সবারই অবস্থা বেশ টাইটবুর-গোছের।

যবনিকা-পতনের পর মঞ্চের উপর লাফিয়ে উঠল পালিয়ানিৎসা। বাহুদুটো নাটকীয় ভঙ্গিতে বিক্ষিপ্ত করে সে ঘোষণা করল, ‘ভদ্রমহিলা ও ভদ্রমহোদয়গণ! এখনই নাচের আসর শুরু হবে।’

হাততালি দিল সবাই। তারপরে সবাই বাইরের আঙিনায় বেরিয়ে এল যাতে পেথলিউরা পাহারাদার সৈন্যরা চেয়ারগুলো বের করে দিয়ে অতিথিদের নাচের জন্য থিয়েটার-ঘরের মেঝেটা খালি করে দিতে পারে।

আধ-ঘণ্টার মধ্যেই থিয়েটার-ঘরে একটা উদ্দাম হৈ-হল্লা শুরু হয়ে গেল।

উত্তাপে রাঙা-মুখ স্থানীয় সুন্দরীদের নিয়ে সমস্ত সংযম জলাঞ্জলি দিয়ে পেথলিউরা-অফিসাররা উদ্দাম ‘হোপাক’ নৃত্য শুরু করে দিল। ভারী ভারী বুটের প্রচণ্ড শব্দে কেঁপে-কেঁপে উঠল জীর্ণ-শীর্ণ থিয়েটার-বাড়ির দেয়ালগুলো।

ইতিমধ্যে, সশস্ত্র একটা অশ্বারোহী-বাহিনী শহরের দিকে আসছিল ময়দা-কলের দিক থেকে।

শহরের প্রান্তে যে পেথলিউরা সাক্ষীদের বসানো আছে পাহারাদারি করার জন্য, তারা সন্ত্রস্ত হয়ে ছুটে এল তাদের মেশিনগানের দিকে, গুলি ছোড়ার জন্য প্রস্তুত বন্দুকগুলোর ঘোড়া-নামানোর ঝটাঝট আওয়াজ শোনা গেল, রাত্রির অন্ধকারে একটা তীক্ষ্ণ আহ্বান ভেসে এল :

‘খামো! কে যায়?’

দুটো কালো মূর্তি স্পষ্ট হয়ে এল অন্ধকারের মধ্যে থেকে। একজন এগিয়ে এসে কর্কশ আর ভারী গলায় চৈঁচিয়ে উঠল, 'আতামান পাভলিউক আর তাঁর সৈন্যদল। তোমরা কারা? গোলুবের লোক?'

'হ্যাঁ,' বলল একজন অফিসার—সেও এগিয়ে এসেছিল।

পাভলিউক জিজ্ঞেস করল, 'আমার লোকজনদের থাকার জায়গা দেব কোথায়?'

'আমি এখন সদর ঘাঁটিতে টেলিফোন করছি,' বলেই অফিসারটি অদৃশ্য হয়ে গেল পথের ধারে একটা ছোট কুটিরের মধ্যে।

মিনিটখানেক বাদে সে ফিরে এসে হুকুম দিতে থাকল, 'মেশিনগানটা রাস্তার উপর থেকে সরিয়ে নাও! পান্ আতামানকে পথ ছেড়ে দাও!'

আলোয় উজ্জ্বল থিয়েটার-বাড়ির সামনে খোলা হাওয়ায় বহু লোক বেরিয়ে বেড়াচ্ছে, পাভলিউক বাড়িটার সামনে এসে তার ঘোড়ার রাশ টানল।

পাশের ক্যান্টেন-সঙ্গীটির দিকে ফিরে বলল, 'দেখে মনে হচ্ছে খুব ফুর্তি জমেছে এখানে। এসো হে গুন্মাচ্ নেমে পড়ো, একটু আমোদ-টামোদ করা যাক। এক-জোড়া মেয়ে ধরে নেওয়া যাবে—মেয়েমানুষে তো ভর্তি দেখছি জায়গাটা। ওহে স্তালেঙ্কো,' চৈঁচিয়ে উঠল সে, 'তুমি দেখো, শহরের বাড়িতে বাড়িতে আমাদের লোকজনের একটা থাকার ব্যবস্থা করো গে। আমরা একটু এখানে হয়ে যাচ্ছি। কই, আমার দেহরক্ষীরা এসো।' ক্লাস্ত ঘোড়াটার উপর থেকে সে ভারী-দেহটা নামিয়ে নিল।

থিয়েটারের প্রবেশ-দরজায় পাভলিউককে থামাল দু'জন সশস্ত্র পেথলিউরা-সাত্ত্বী, 'টিকেট?'

তাদের দিকে অবজ্ঞার চোখে একনজর দেখে একজনকে কাঁধের একটা ধাক্কা দিয়ে সরিয়ে দিল পাভলিউক। তার সঙ্গে অন্য বারোজনও তাকে অনুসরণ করল। তাদের ঘোড়াগুলো বাইরে বেড়ায় বাঁধা রইল।

আগন্তুকদের তৎক্ষণাৎ লক্ষ করল সবাই। বিশেষভাবে দৃষ্টি আকর্ষণ করছিল পাভলিউক-এর বিরাট দেহটা। ভালো কাপড়ে তৈরি অফিসারের কোট তার পরনে, গার্ডবাহিনীতে যেরকম পরে সেইরকম নীল ব্রিজেস, আর মাথায় ঝাঁকড়া পশমের টুপি। কাঁধের উপর দিয়ে টানা চামড়ার ফিতেটায় ঝুলছে একটা মাউজার-পিস্তল, পকেট থেকে বেরিয়ে আছে একটা হাতবোমা।

'কে ইনি?' ফিসফিস প্রশ্নটা ভিড়ের মধ্যে সর্বত্র ছড়িয়ে গেল নাচের আসরে যেখানে গোলুবের সহকারী উদ্দাম নাচ নাচছে।

পাদরির বড়মেয়েটা তার নৃত্যসঙ্গিনী, এমন বেপরোয়া হয়ে সে বনবন করে ঘুরছে যে তার ঘাগরাটা বেশ খানিকটা উঠে গিয়ে রেশমি অন্তর্বাসগুলো রীতিমতো দেখা যাচ্ছে আর সৈন্যরা তো তাই দেখে ভারি খুশি।

ভিড় ঠেলে সরিয়ে পাভলিউক সোজা নাচের জায়গাটায় চলে এল।

চকচকে চোখে সে একদৃষ্টে তাকিয়ে রইল পাদরিকন্যার পায়ের দিকে, তারপরে জিভ দিয়ে শুকনো ঠোঁট চেটে নিয়ে নাচের আসরটা পার হয়ে অর্কেস্ট্রা মঞ্চের কাছে এসে একটু থেমে পাকানো ঘোড়ার চাবুকটা নেড়ে বলল, 'ওহে, 'হোপাক' নাচের সুরটা বাজাও!'

ঐকতান-বাদন যে পরিচালনা করছিল, সে কান দিল না তার কথায়। তারপর পাভলিউকের হাতের একটা তীব্র বিক্ষেপে সংগীত-পরিচালকের পিঠের উপর কেটে বসে গেল চাবুকটা। প্রচণ্ড এক আকস্মিক যন্ত্রণায় লাফিয়ে উঠল সংগীত-পরিচালক, বাজনা থেমে গেল, হলঘর নিস্তব্ধ।

‘এ কী অসহ্য বেয়াদপি!’ প্রচণ্ড রাগে খেপে গেছে ঊঁড়ির মেয়েটি। পাশের আসনে বসা গোলুবের কনুই চেপে ধরে চোঁচিয়ে উঠল সে, ‘তোমার চোখের সামনে এমন ব্যাপার ঘটতে দেবে!’

টেনে দাঁড় করাল নিজেকে গোলুব, একটা চেয়ার লাখি মেরে সরিয়ে দিল, তিন পা এগিয়ে এসে পাভলিউকের মুখোমুখি দাঁড়াল। সে সঙ্গে সঙ্গেই এই আগন্তুকটিকে চিনতে পেরেছে। স্থানীয় ক্ষমতাদব্বলের এই প্রতিদ্বন্দ্বীটির সঙ্গে তার বেশকিছুটা বোঝাপড়া করার ছিল।

মাত্র এক সপ্তাহ আগে পান্ কর্নেলের সঙ্গে একটা জঘন্য রকমের প্রতারণা করেছে এই পাভলিউক। লাল সৈনিকদের একটা দল গোলুবের বাহিনীকে একাধিকবার ক্ষতবিক্ষত করেছে—তাদের সঙ্গে যখন পুরোদমে একটা লড়াই চলছিল, তখন পাভলিউক ওই বলশেভিকদের পেছন থেকে আক্রমণ না করে একটা ছোট শহরে ঢুকে সেখানকার অল্পসংখ্যক লাল পাহারাদারদের হঠিয়ে দিয়ে, আত্মরক্ষার জন্য চারধারে সৈন্যঘেরাও করে রেখে শহরটাকে একেবারে নিঃশেষে লুটপাট করে নিয়ে যায়। অবশ্য, পেথলিউরার লোক হিসেবে সে বিশেষ নজর রেখেছিল যাতে শহরের ইহুদি বাসিন্দারাই তার লুটের প্রধান শিকার হয়।

ইতিমধ্যে লাল সৈন্যদলটি গোলুবের বাহিনীর ডান-দিকটাকে চুরমার করে দিয়ে এগিয়ে গিয়েছিল।

আর এখন কিনা ঘোড়সওয়ার-বাহিনীর এই উদ্ধত ক্যান্টেনটি এখানে গায়ের জোরে ঢুকে পড়ে পান্ কর্নেল গোলুবের চোখের সামনেই তার নিজস্ব সামরিক বাজনদার-দলের পরিচালককে মেরে বসতে সাহস করেছে! না, বড্ড বাড়াবাড়ি এটা। গোলুব বুঝতে পারল যে সে যদি এই অহংকারীকে টিট না করে, তাহলে সৈন্যবাহিনীতে তার ইচ্ছত বলে কিছু থাকবে না।

কয়েক মুহূর্ত এই দু’জন লোক পরস্পরের দিকে নিঃশব্দে তীক্ষ্ণদৃষ্টিতে তাকিয়ে দাঁড়িয়ে রইল।

তারপর একহাতে তলোয়ারের হাতলটা চেপে আর অন্য হাতে পকেটের পিস্তলটা নাড়াচাড়া করতে করতে গোলুব খেঁকিয়ে উঠল, ‘কোন সাহসে আমার লোকের গায়ে হাত দিয়েছিস, শয়তান?’

পাভলিউকের হাতখানা এগিয়ে গেল তার মাউজার-পিস্তলের খাপটার দিকে, ‘একটু সামলে, পান্ গোলুব! দেখো, পা ফসকে না যায়। আমাকে ঘা দিও না, আমিও তো মেজাজ খারাপ করে বসতে পারি।’

এটা গোলুবের সহ্যের সীমা ছাড়িয়ে গেল। চোঁচিয়ে উঠল সে, ‘বের করে দাও এদের, আর প্রত্যেককে পঁচিশ ঘা করে চাবুক মারো!’

গোলুবার অফিসাররা পাভলিউক আর তার লোকদের ওপর ঝাঁপিয়ে পড়ল একদল ডালকুস্তার মতো ।

একটা গুলি বেরিয়ে গেল—শব্দটা যেন মেঝের উপর একটা ইলেকট্রিক বাল্ব পড়ে গুঁড়ো হয়ে যাবার মতো শোনাল । দুইদল লড়াই কুকুরের মতো লোকগুলো মারামারি, জ্ঞাপটা-জ্ঞাপটি, গড়াগড়ি করতে থাকল হলঘরের মধ্যে । প্রচণ্ড এই দাঙ্গাহাঙ্গামার মধ্যে লোকগুলো সাঁই-সাঁই তলোয়ার চালান পরস্পরের উদ্দেশ্যে, একে অন্যের চুল টেনে ধরল, নখ বসিয়ে দিল গলায়, আর মেয়েরা সব খোঁচা-খাওয়া শুয়োরের মতো আর্তস্বরে চৈঁচাতে চৈঁচাতে লড়নেঅলাদের কাছ থেকে পালিয়ে গিয়ে ছড়িয়ে ছিটিয়ে পড়তে থাকল চারদিকে ।

কয়েক মিনিটের মধ্যে পাভলিউক আর তার লোকজনকে হলের বাইরে টেনে-হিঁচড়ে এনে বের করে দেওয়া হল রাস্তায়—বেদম মার খেয়েছে তারা, তাদের অস্ত্রশস্ত্র ছিনিয়ে নেওয়া হয়েছে ।

মারামারির মধ্যে পাভলিউক নিজে হারিয়েছে তার পশমি টুপি, মুখটা ছড়ে গেছে তার, হাতিয়ারগুলো বেহাত হয়ে গেছে—প্রচণ্ড রাগে সে আত্মহারা । জিনের উপর লাফিয়ে উঠে সে আর তার দলবল ঘোড়া ছুটিয়ে বেরিয়ে গেল রাস্তা বেয়ে ।

মাটি হয়ে গেছে সন্ধেটা । এই ঘটনার পরে আর কারুরই আমোদ-প্রমোদে মত্ত হবার বাসনা নেই । মেয়েরা আর নাচে যোগ দিতে চাইল না, তারা পীড়াপীড়ি করতে লাগল বাড়ি ফিরিয়ে নিয়ে যাবার জন্য । কিন্তু গোলুব তা শুনবে না । সে হুকুম দিল, ‘সান্ত্বী মোতায়েন করে দাও চারধারে, কেউ যেন চলে যেতে না পারে ।’

পালিয়ানিৎসা ছুটে গেল হুকুম তামিল করার জন্য ।

তুমুল প্রতিবাদ উঠল, কিন্তু কড়া গলায় বলল গোলুব, ‘ভদ্রমহিলা ও ভদ্রমহোদয়েরা! সারারাত নাচ চলবে, আমি স্বয়ং প্রথম ‘ওয়ালস্’ নাচটা নাচব ।’

ঐকতান-বাদন আবার শুরু হল, কিন্তু দেখা গেল সে-রাতের মতো আর ফুটিটা জমবার নয় ।

পাদরিকন্যাকে নিয়ে নাচার সময়ে কর্নেলের এক পাক ঘোরা হতে-না-হতেই সান্ত্বীরা চৈঁচামেচি করতে করতে হলঘরে ঢুকল, ‘পাভলিউক খিয়েটারটা ঘিরে ফেলছে!’

ঠিক সেই মুহূর্তেই রাস্তার দিকের একটা জানলার কাচ ভেঙে পড়ল, আর তার ফাঁক দিয়ে ঘরের মধ্যে ঢুকে পড়ল একটা মেশিনগানের ভোঁতা-নাক নল । নির্বোধ একটা জীবন্ত প্রাণীর মতো নলটা এদিক থেকে ওদিক ঘুরে গেল যেন ভেতরের এই লোকজনদের তাক করার উদ্দেশ্যে, আর মানুষগুলো তার থেকে হলের মাঝখানের দিকে পাগলের মতো ছুটে পালিয়ে যেতে লাগল, যেন সাক্ষাৎ শয়তানকে সামনে দেখছে তারা ।

পালিয়ানিৎসা মাথার উপরে ঝুলন্ত হাজার-পাওয়ারের ইলেকট্রিক বাল্বটার দিকে গুলি ছুড়ল । বোমার মতো ফেটে গেল সেটা, কাচের টুকরোগুলো ছড়িয়ে ছিটিয়ে পড়ল হলের সবার গায়ে ।

অন্ধকার হয়ে গেল হলঘর । কে চতুর থেকে চৈঁচিয়ে উঠল, ‘বাইরে বেরিয়ে পড়ো সবাই!’ তারপর প্রচণ্ড তোড়ে গালাগালি চলল ।

মেয়েদের উন্মত্ত আত্মনা, হকচকিয়ে যাওয়া অফিসারদের জড়ো করার চেষ্টায় গোলুবের ছুটোছুটি আর হুকুম-হুকুম, বাইরে আঙিনায় গুলি ছোড়াছুড়ি আর চিৎকার— এই সবকিছু মিলেমিশে গিয়ে একটা অবর্ণনীয় নরক-কুণ্ডের সৃষ্টি হল। আত্ম অবস্থার মধ্যে কেউ লক্ষ করেনি—পেছনের দরজা দিয়ে সরে পড়ে একটা নির্জন পাশের রাস্তায় বেরিয়ে এসে পালিয়ানিৎসা প্রাণপণে দৌড়ে চলে গেল গোলুবের সদর-ঘাঁটিতে।

আধঘণ্টার মধ্যে একটা রীতিমতো যুদ্ধ কাঁপিয়ে তুলল শহরটাকে। রাইফেলের নিরবচ্ছিন্ন গুলি ছোড়ার শব্দের ফাঁকে ফাঁকে মেশিনগানের খটখট আওয়াজ ভেঙেচুরে দিল রাত্রির নিস্তব্ধতা। নিতান্তই বিমূঢ় অবস্থায় শহরবাসীরা তাদের আরামের বিছানা ছেড়ে লাফিয়ে উঠে জানলার খড়খড়ির ফাঁক দিয়ে চেয়ে রইল।

শেষপর্যন্ত গুলি-চালাচালি বন্ধ হল। শুধু শহরের প্রান্তে কোনো-এক জায়গায় একটা মাত্র মেশিনগান মাঝে মাঝে ইঠাৎ গুলি চালাবার আওয়াজ করে উঠতে লাগল কুকুরের ঘেউঘেউ আওয়াজের মতো।

দিগন্তে ভোরের আলোর আভা ফুটেতে থাকার সঙ্গে সঙ্গে লড়াই থেমে এল...

\*

\*

\*

শহরে দাঙ্গাহাঙ্গামার একটা প্রভুতি চলেছে—এরকম একটা কানাঘুষো শোনা যাচ্ছে। শেষপর্যন্ত খবরটা পৌছে গেল ইহুদি-পাড়ায়—নদীর ধার ঘেঁষে যেখানে কাদায় নোংরা খাড়ির গায়ে-গায়ে কোনোরকমে জড়াজড়ি করে খাড়া হয়ে আছে তাদের নিচু চালা আর ছোট ছোট জানলাঅলা ঘরগুলো। বাড়ির নামে এইসব খৌদলগুলোর মধ্যে কল্পনাভীত অবস্থার মধ্যে বাস করে গরিব ইহুদিরা।

সেগেই ব্রহ্মাক আজ বছরখানেকের বেশি হল যে-ছাপাখানাটায় কাজ করছে, সেখানকার কম্পোজিটররা আর অন্যান্য কর্মীরা সবাই ইহুদি। সেগেই আর তাদের মধ্যে একটা নিবিড় সম্পর্ক গড়ে উঠেছে। ওদের মালিক ব্রুমস্টাইনের নিখুঁত পোশাক-আশাক, সে ভালো খায়-দায়। তার বিরুদ্ধে এরা সবাই একটা ঘনিষ্ঠ পরিবারের লোকজনের মতোই ঐক্যবদ্ধ। মালিক আর কর্মীদের মধ্যে সংগ্রামটা ছিল নিরবচ্ছিন্ন। ব্রুমস্টাইনের প্রাণপণ চেষ্টা যাতে সে তার কর্মীদের সবচেয়ে বেশি কাজ করিয়ে নিয়ে সবচেয়ে কম মাইনে দিতে পারে। কয়েকবার কর্মীরা ধর্মঘট করেছে, ছাপাখানার কাজ একনাগাড়ে দু-তিন সপ্তাহ পর্যন্ত বন্ধ থেকেছে। কর্মীরা সবসুদ্ধ চোদ্দ জন। সবচেয়ে অল্পবয়সী সেগেই—তাকে দৈনিক বারো ঘণ্টা একটা হাতে-চালানো ছাপায়ন্ত্রের চাকা ঘোরাতে হয়।

সেগেই আজ ছাপাখানার শ্রমিকদের মধ্যে একটা অস্বস্তি লক্ষ্য করছে। গত কয়েক মাস ধরে দিনকাল বড় খারাপ গিয়েছে, মাঝে মাঝে প্রধান আতামানের হুকুমনামা ছাপা ছাড়া আর কোনো কাজ করার বিশেষ কিছু ছিল না।

মেডেল নামে ক্ষয়কালের রুগী একজন কম্পোজিটর সেগেইকে এককোণে ডাকল। বিষণ্ণ-চোখে ছেলেটার দিকে তাকিয়ে সে বলল, 'ইহুদিনিখন আসছে, জানো তো?'

অবাক হয়ে তাকাল সেগেই, 'কই না, আমি তো কিছুই জানি না!'

মেডেল তার গিঠে-পড়া হলদে হাতখানা রাখল সেগেইয়ের কাঁধে। বাবা যেমন ছেলেকে কোনো গোপনীয় কথা বলে সেইভাবে সে বলল, 'হ্যাঁ, হবে। আমরা খাঁটি



খবর পেয়েছি। ইহুদিদের সব ধরে-ধরে মার লাগাবে। এখন আমি যেটা জিজ্ঞেস করছিলাম—তুমি তোমার সহকর্মীদের এই বিপদে সাহায্য করবে কিনা?’

‘নিশ্চয়, পারলে করব বৈকি। কী করতে পারি বলো, মেডেল?’

কম্পোজিটররা সবাই এতক্ষণে তাদের কথাবার্তা শুনেছে।

‘তুমি ভালো ছেলে, সেরিওঝা। তোমাকে বিশ্বাস করি আমরা। তোমার বাবাও তো আমাদের মতোই মজুর। আচ্ছা, তাহলে তুমি একবার ছুটে বাড়ি গিয়ে তাঁকে জিজ্ঞেস করে এসো, আমাদের জনকতক বুড়োবুড়ি আর মেয়েদের তাঁর বাড়িতে লুকিয়ে থাকতে দিতে রাজি আছে কিনা। ইতিমধ্যে আমরা ঠিক করব কে কে যাবে ওখানে। তাছাড়া তোমার আত্মীয়-স্বজনরা হয়তো জানে আর কেউ এরকম করতে রাজি কিনা সেটাও জিজ্ঞেস করে এসো। ক্লশীরা এইসব ডাকাতদের হাত থেকে আপাতত নিরাপদ। ছুটে যাও, সেরিওঝা, সময় খুব কম।’

‘আমার উপর নির্ভর করতে পারো, মেডেল। আমি পাভকা আর ক্রিমকার সঙ্গেও এখনি দেখা করছি—ওদের পরিবারও নিশ্চয়ই কয়েকজনকে রাখতে পারবে।’

‘শোনো, এক মিনিট’, সের্গেই বেরিয়ে পড়তে যাবে এমন সময় উদ্ভিগ্ভাবে তাকে ধামাল মেডেল, ‘পাভকা আ ক্রিমকা কারা? ভালোরকম চেনো তো ওদের?’

নিশ্চিন্তভাবে মাথা নেড়ে সায় দিল সের্গেই, ‘নিশ্চয়! ওরা আমার বন্ধু। পাভকা করচাগিনের ভাই একজন মিস্ত্রি।’

‘ও, করচাগিন,’ নিশ্চিন্ত হল মেডেল, ‘আমি চিনি তাকে—একই বাড়িতে ছিলাম আমরা। হ্যাঁ, করচাগিনদের ওখানে খোঁজ নিতে পারো। যাও, সেরিওঝা, আর যত তাড়াতাড়ি পারো খবর নিয়ে এসো।’

সের্গেই ছুটে বেরিয়ে গেল রাস্তায়।

\*

\*

\*

পাভলিউকের ফৌজ আর গোলুবের লোকজনদের মধ্যে সেই প্রচণ্ড লড়াই হয়ে যাবার পর তৃতীয় দিনে দাঙ্গা শুরু হল।

শহর থেকে মার খেয়ে বিতাড়িত হবার পর পাভলিউক এই অঞ্চল থেকে সরে গিয়ে কাছাকাছি একটা ছোট শহর দখল করে নিয়েছে। শেপেতোভ্‌কায় সেই রাতের ঘটনায় তার বিশজন লোক মারা গেছে। গোলুবের দলেরও সমান ক্ষতি হয়েছে।

নিহতদের তাড়াতাড়ি সরিয়ে ফেলে গাড়ি করে কবরখানায় নিয়ে গিয়ে সেই দিনই মাটিচাপা দেওয়া হয়েছে। সৎকারের অনুষ্ঠান ইত্যাদি বিশেষ কিছু করা হয়নি—কারণ, গোটা ঘটনাটার মধ্যে সত্যিই জাঁক করার কিছু ছিল না। রাস্তার দুটো খাঁকি কুকুরের মতো দু’জন আতামান পরস্পরের টুটি চেপে ধরেছিল—এর পরে মৃতদের সৎকারের ব্যাপারে বেশি শোরগোল তোলাটা খারাপ দেখায়। পালিয়ানিৎসা অবশ্য চেয়েছিল নিহতদের বেশ একটু ঘটা করে কবর দিয়ে পাভলিউককে লাল-ডাকাত বলে ঘোষণা করবে। কিন্তু পাদরি ভাসিলির সোশ্যালিস্ট-রেভলিউশনারি কমিটি আপত্তি তুলল।

গোলুবের সেনাবাহিনীর মধ্যে সেই রাত্রের ঘটনাটা বেশ একটু অসন্তোষ সৃষ্টি করেছে—বিশেষ করে যারা তার দেহরক্ষী তাদের মধ্যে, কারণ তাদের লোকজনই

মারা গেছে সবচেয়ে বেশি। অসন্তোষটা দূর করার জন্য আর খানিকটা উৎসাহ-উদ্বীপনা ফিরিয়ে আনার জন্য পালিয়ানিৎসা এই দাস্তার প্রস্তাবটা দিয়েছে। অত্যন্ত হৃদয়হীনের মতোই সে ফৌজি লোকদের জীবনে ‘সামান্য বৈচিত্র্য’ আনার কথাটা পেড়েছিল গোলুবের কাছে। তার যুক্তিটা ছিল—সৈন্যদের মধ্যে যে-অসন্তোষ দেখা দিয়েছে তার পরিপ্রেক্ষিতে এটা নিতান্তই দরকার। কর্নেলের অবশ্য খুব ইচ্ছে ছিল না—কারণ, গুঁড়ির ওই মেয়েটির সঙ্গে তার দু-চারদিনের মধ্যেই বিয়ে হবে, তার আগে শহরের শান্তিভঙ্গ হতে দিতে সে চায়নি—কিন্তু পালিয়ানিৎসার হুমকিতে শেষপর্যন্ত রাজি হতে হল তাকে।

আরও একটা কারণে পান কর্নেল এই ব্যাপারটা ঘটতে দিতে সত্যিই গররাজি ছিল : সম্প্রতি সোশ্যালিস্ট-রেভলিউশনারি পার্টির অন্তর্ভুক্ত হয়েছে সে। তার শত্রুরা ফের তার নামে যা-তা কথা বলতে পারে, বলতে পারে কর্নেল গোলুব দাস্তাবাজ এবং প্রধান আতামানের কাছে তারা নানা কথা গিয়ে লাগাবে, তাতে কোনো সন্দেহ নেই। গোলুব অবশ্য এ-পর্যন্ত প্রধান আতামানের ওপর তেমন নির্ভরশীল নয়—কারণ, সে নিজের ফৌজের রসদ আর লোকজন নিজেই জোগাড় করে এসেছে। তাছাড়া প্রধান আতামান খুব ভালো করেই জানে অধীনস্থ লোকজন কী চিন্তা। সে নিজেই তো বহুবার শাসন-পরিচালনার প্রয়োজনে তথাকথিত ‘হুকুম-দখল’ থেকে টাকার দাবি তুলেছে। আর, দাস্তাবাজ হিশেবে খ্যাতির দিক থেকে গোলুবের ভূতপূর্ব কীর্তিকলাপ বড় কম নয়। সুতরাং, ওরকম আরেকটা ঘটনায় আর তার এমন কী এসে যাবে।

ভোর-সকালে লুটপাট হাঙ্গামা আরম্ভ হল।

দিন শুরু হবার আগে ধূসর কুয়াশায় তখনও শহরটা আচ্ছন্ন। ভিজে ন্যাকড়ার ফালির মতো আঁকাবাঁকা রাস্তায় এদিকে-সেদিকে এলোমেলোভাবে জড়ানো ইহুদিদের বাড়িগুলো। সে-রাস্তাগুলো জনশূন্য, নিপ্পাণ। আঁটসাঁট পর্দা-টানা খড়খড়ি-তোলা জানলাগুলো।

বাইরে থেকে দেখে মনে হয় বুঝি গোটা পাড়াটা শেষরাত্রির গভীর ঘুমে আচ্ছন্ন। কিন্তু, কোনো বাড়ির ভেতরে কারুর চোখে ঘুম নেই। গোটা একেকটা পরিবার জামাকাপড় পরে তৈরি হয়ে একেকটা ঘরে জড়োসড়ো হয়ে আসন্ন সর্বনাশের প্রতীক্ষা করে আছে। শুধু ঘটনাটা বোঝার পক্ষে যাদের বয়েস নিতান্ত কম, সেই শিশুরা শান্ত হয়ে ঘুমোচ্ছে তাদের মায়েরদের কোলে।

গোলুবের প্রধান দেহরক্ষী সালোমিগা—রোদে-পোড়া গায়ের রঙ তার জিপসিদের মতো কালচটে পড়া, গালের এদিক থেকে ওদিক পর্যন্ত একটা তলোয়ারের ক্ষতচিহ্নের নীলচে দাগ—গোলুবের অ্যাডজুট্যান্ট পালিয়ানিৎসাকে ঘুম থেকে তুলবার জন্য সেদিন সকালে তাকে যথেষ্ট বেগ পেতে হল।

বড় কষ্টে চোখ মেলে তাকাল পালিয়ানিৎসা—সারারাত্রি দুঃস্থপ্ন দেখেছে সে, কিছুতেই আর নিজেকে সেই ঘোর থেকে মুক্ত করে আনতে পারছে না—সেই ভেংচিকাটা কুঁজো-পিঠ বিভৎস চেহারার শয়তানটা তখনও যেন তার গলাটা চেপে ধরে আছে। শেষপর্যন্ত সে যন্ত্রণায় ছিড়ে-পড়া মাথা তুলে দেখল সালোমিগা জাগাচ্ছে

তাকে। তার কাঁধে ঝাঁকুনি দিয়ে সালোমিগা বলল, 'উঠে পড়ো হে, মাল। কাজে রওনা হতে হবে, সময় হয়ে গেছে অনেকক্ষণ। বেশ টেনেছ দেখছি।'

এতক্ষণে পুরোপুরি জেগে উঠেছে পালিয়ানিৎসা, এক-গলা তেতো জল-টেকুর উঠে এসেছে, মুখ বেঁকিয়ে সেটাকে খুঁতুর মতো বের করে দিয়ে সালোমিগার দিকে অর্থহীন চোখে তাকিয়ে জিজ্ঞেস করল, 'কী কাজ?'

'ইহুদি হতভাগাদের গুঁড়োবার কাজ, আবার কী কাজ! ভুলে গেছ, নাকি?'

এতক্ষণে সবটা মনে পড়ল পালিয়ানিৎসার। সত্যি একেবারে ভুলে বসে ছিল সে। পান কর্নেল যে-খামারবাড়িটায় তার ভাবী বধূ আর একগাদা বোতলের ইয়ার সঙ্গে নিয়ে আছে, সেখানে আগের সন্ধ্যায় পান বড্ড বেশি হয়ে গিয়েছিল।

দাস্তা চলতে থাকার সময়টুকুর জন্য শহরের বাইরে কোথাও গিয়ে কাটিয়ে আসাটাই গোলুবের পক্ষে সবচেয়ে সুবিধাজনক হত। কারণ, সেক্ষেত্রে পরে সে ব্যাপারটাকে তার অনুপস্থিতির জন্য একটা ভুল-বোঝাবুঝির ফল বলে চালাতে পারবে এবং ইতিমধ্যে পালিয়ানিৎসাও বেশ নিখুঁতভাবে কাজটা নিষ্পন্ন করতে পারবে। হ্যাঁ, বৈচিত্র্যসৃষ্টির ব্যাপারে পালিয়ানিৎসা সত্যিই গুস্তাদ লোক!

মাথায় এক বালতি জল ঢেলে বুদ্ধিটাকে গুছিয়ে নিয়ে পালিয়ানিৎসা অল্পক্ষণের মধ্যেই সদর-ঘাঁটির চারিদিকে ঘুরতে ঘুরতে হুকুম দিতে থাকল।

একশো জন দেহরক্ষী ইতিমধ্যেই ঘোড়ায় চেপে বসেছে। গোলযোগের সম্ভাবনাকে এড়াবার জন্য দূরদর্শী পালিয়ানিৎসা শহরকেন্দ্র এবং মজুরদের এলাকা আর স্টেশনের মাঝে মাঝে পাহারা বসাবার হুকুম দিল। কোনোরকম বাধা সৃষ্টি করার চিন্তাটা যদি মজুরদের মাথায় ঢোকে, তাহলে একঝাঁক গুলির মুখোমুখি হতে হবে তাদের—তারই ব্যবস্থা হিসেবে লেফটিন্যান্টদের বাগানে রাস্তার দিকে মুখ করে একটা মেশিনগান বসানো হল।

পুরো বন্দোবস্ত হয়ে যাবার পর, অ্যাডজুট্যান্ট আর সালোমিগা লাফিয়ে উঠল ঘোড়ার পিঠে।

যখন তারা রওনা হয়ে গেছে, তখন হঠাৎ বলে উঠল পালিয়ানিৎসা, 'খামো! প্রায় ভুলেই গিয়েছিলাম আমি। দুটো গাড়ি সঙ্গে নাও গোলুবের বিয়ের যৌতুক বয়ে আনবার জন্যে। হাঃ হাঃ! লুটের প্রথম কিস্তিটা যথারীতি সেনাপতির প্রাপ্য, আর প্রথম মেয়েটা প্রাপ্য তাঁর অ্যাডজুট্যান্টের—অর্থাৎ আমার। বুঝেছ হে, আহাম্মক?—এই শেষের সম্বোধনটা সালোমিগার উদ্দেশ্যে।

সালোমিগা তার হলদে চোখের তীব্রদৃষ্টিতে পালিয়ানিৎসার দিকে তাকিয়ে বলল, 'সবার জন্যেই যথেষ্ট পাওয়া যাবে!'

বড় রাস্তা বেয়ে ঘোড়া হাঁকিয়ে চলল সবাই, এলোমেলো এই ঘোড়সওয়ারদলটির আগে-আগে চলেছে পালিয়ানিৎসা আর সালোমিগা।

দোতলা একটা বাড়ির সামনে এসে রাশ টানল পালিয়ানিৎসা। ততক্ষণে কুয়াশা কেটে গেছে। বাড়িটার সামনে একটা মর্চে-ধরা তক্তির গায়ে লেখা আছে—'ফুক্স, মনিহারি দ্রব্য ব্যবসায়ী।'

দূসর রঙের তার মাদি ঘোড়াটা পথের খোয়ার উপরে অবস্থির সঙ্গে রোগা পা ঠুকল।

মাটিতে লাফিয়ে পড়ে পালিয়ানিৎসা বলল, 'তাহলে এখন থেকেই শুরু করা যাক, ভগবান সহায় হোন! তোমরা সব নেমে পড়ো,' নিজের চারপাশে জড়ো লোকজনদের দিকে ঘুরে বলল সে, 'এইবার খেল শুরু। আচ্ছা শোনো, খুলিটুলি গুঁড়ো করে বোসো না যেন—ওসব করবার সুযোগ পরে ঢের পাবে। আর, মেয়েদের সম্বন্ধে বলি—শিকার যদি তেমন একটা জুতসই না হয় তো সন্ধে পর্যন্ত নিজেদের একটু সামলে রেখো।'

দলের একজন তার শক্ত দাঁত বের করে আপত্তি জানাল, 'কিন্তু পান্ খোঁজি, যদি উভয় পক্ষের মত নিয়েই হয়, তাহলে?'

হা-হা করে হেসে উঠল সবাই। যে-লোকটা কথাটা বলেছিল, তার দিকে প্রশংসাসূচক প্রশ্নের চোখে তাকাল পালিয়ানিৎসা, 'সেটা হলে অবশ্য আলাদা কথা—যদি ওরা গররাজি না হয়, তাহলে চালিয়ে যাবে—তাতে কোনো বাধা নেই।'

দোকানঘরটার বন্ধ-দরজার কাছে এগিয়ে গিয়ে জোরে একটা লাথি মারল পালিয়ানিৎসা, কিন্তু ওক-কাঠের ভারী আর মজবুত পাল্লাদুটো একটু কাঁপল না পর্যন্ত।

স্পষ্টই বোঝা গেল, কাজটা ভুল জায়গা থেকে শুরু করা হয়েছে। তলোয়ারটা হাতে চেপে ধরে বাড়িটার পাশ ঘুরে পালিয়ানিৎসা এগিয়ে গেল ফুক্স যেদিকে থাকে সেই দিকটায়। পেছন পেছন চলল সালোমিগা।

বাড়ির লোকেরা ভেতর থেকেই শুনেছে সদর-রাস্তায় ঘোড়ার খুরের শব্দ। দোকানের সামনেই যখন আওয়াজটা এসে থামল আর দেয়ালের আড়াল পেরিয়ে শোনা গেল মানুষগুলোর গলার স্বর, তখন তাদের হৃৎস্পন্দন যেন থেমে গিয়ে গোটা শরীর ভয়ে আড়ষ্ট হয়ে গেল।

এই ফুক্স লোকটা পয়সাঅলা, আগের দিন সে তার বউ আর মেয়েদের নিয়ে শহর ছেড়ে গেছে। জিনিশপত্তরগুলো পাহারা দেবার জন্য রেখে গেছে তার চাকরানী রিভাকে—উনিশ বছর বয়েসী শান্ত আর নিরীহ মেয়েটা। খালি বাড়িটায় একলা থাকতে রিভা ভয় পাচ্ছে দেখে সে বলেছিল যে সে ফিরে না-আসা পর্যন্ত রিভা যেন তার বুড়ো বাবা আর মাকে নিয়ে এসে এই বাড়িতে থাকে।

রিভা খুব নরমভাবে এ-কথার প্রতিবাদ করাতে ধূর্ত ব্যবসাদারটি তাকে ভরসা দিয়েছিল যে খুব সম্ভবত দাস্তা হবেই না—কারণ, তাদের মতো গরিব ভিখিরিদের কাছ থেকে আর কী পাবার আশা ওরা করে? তারপরে সে রিভাকে প্রতিশ্রুতি দিয়েছিল যে সে ফিরে এসে তাকে পোশাক বানাবার জন্য ভালো খানিকটা কাপড়ের ছিট দেবে।

তিনজনে তারা ভেতরে দাঁড়িয়ে দাঁড়িয়ে কাঁপতে লাগল আতঙ্কে, নিরাশার মধ্যেও তারা আশা করছে যদি লোকগুলো ঘোড়া হাঁকিয়ে এগিয়ে যায়। হয়তো তাদের ভুল হয়েছে, হয়তো তারা ভুল করে ভেবেছে যে তাদের বাড়ির সামনেই ওদের ঘোড়া থেমেছে। কিন্তু দোকানঘরের দরজায় একটা চাপা আওয়াজের প্রতিধ্বনি শুনে ওদের সমস্ত আশা চুরমার হয়ে গেল।

দরজার সামনে দাঁড়িয়ে ছিল বৃদ্ধ পেইসাখ—সমস্ত চুল তার শাদা, নীল চোখদুটো তার ভয়-পাওয়া শিশুর চোখের মতো বিস্ফারিত। উৎকট ধর্মোন্মত্তের সমস্ত বিশ্বাসের

জোর নিয়ে সে সর্বশক্তিমান জিহোভার উদ্দেশে ফিসফিসিয়ে প্রার্থনা করছে যাতে ভগবান এই বাড়িটাকে সর্বনাশের হাত থেকে রক্ষা করেন। পাশে দাঁড়িয়ে বৃদ্ধা স্ত্রী তার প্রার্থনার উচ্চারণের মধ্যে প্রথমটায় স্তন্যভেদেই পায়নি মানুষগুলোর পায়ের শব্দ।

সবচেয়ে দূরের ঘরটায় পালিয়ে গিয়ে রিভা লুকিয়ে আছে ওক-কাঠের বিরাট আলমারিটার পেছনে।

দরজাটার উপরে একটা প্রচণ্ড ঘা পড়তেই এই দুই বৃদ্ধ-বৃদ্ধা চমকে কেঁপে উঠল।

‘দরজা খোল!’ আগের চেয়ে প্রচণ্ড আরেকটা ধাক্কা আর ত্রুন্ধ গালাগালি।

কিন্তু আতঙ্কে আড়ষ্ট এই দুটি প্রাণী দরজাটা খোলার জন্য হাত তুলতে পারল না।

আগলটা ভেঙে না-পড়া পর্যন্ত বাইরে দরজার গায়ে বন্দুকের কুঁদোর ধাক্কা এসে পড়তে লাগল অনবরত আর শেষপর্যন্ত খুলে গেল দরজাটা।

সশস্ত্র লোকে ভর্তি হয়ে গেল বাড়িটা, সর্বত্র চলল খানাতল্লাশি। ভেতর দিয়ে দোকানঘরে ঢোকান দরজাটা ভেঙে গেল বন্দুকের কুঁদোর এক ধাক্কা, সামনের দিকের দরজাটার আগল এদিক থেকেই খুলে ফেলা হল।

লুটপাট শুরু হল।

কাপড়ের গাঁট, জুতো আর অন্যান্য জিনিশে গাড়িগুলো বোঝাই করার পর সেই লুটের মাল গোলুবের বাড়ি পৌঁছে দিতে গেল সালোমিগা। ফিরে এসে সে একটা আর্ট চিৎকার স্তন্যভেদেই বাজিয়ে দিল।

পালিয়ানিৎসা তার লোকজনের ওপর দোকানটা লুট করার ভার ছেড়ে দিয়ে মালিকের ঘরে গিয়ে দেখল সেখানে বুড়োবুড়ি আর তাদের মেয়ে দাঁড়িয়ে আছে। বনবিড়ালের মতো তার সবুজ-চোখে ওদের দিকে একনজর তাকিয়েই সে বুড়োবুড়ির দিকে হুৎকার ছাড়ল, ‘বেরোও এখান থেকে!’

বাপ-মায়ের একজনও নড়েনি।

পালিয়ানিৎসা এক পা এগিয়ে একটু করে তার তলোয়ারটা খুলল খাপ থেকে।

‘মা গো!’ একটা হৃদয়বিদারী চিৎকার করে উঠেছিল মেয়েটা।

এই চিৎকারটাই স্তন্যভেদে পেয়েছিল সালোমিগা।

চিৎকার শুনে পালিয়ানিৎসার যেসব লোক ছুটে এসেছিল ঘরে, তাদের দিকে ফিরে বুড়োবুড়িকে দেখিয়ে ঝঁকিয়ে উঠল সে, ‘বের করে দাও এদের!’ হুকুম তামিল হতেই সালোমিগা ঘরে ফিরে এলে তাকে বলল, ‘তুমি এই দরজাটায় পাহারা থাকো, আমি এই ছুঁড়িটার সঙ্গে একটু কথাটাকা বলে নিই ততক্ষণ।’

আর-একবার চিৎকার করে উঠল মেয়েটা। ছুটে এল বুড়ো পেইসাখ ঘরে ঢোকান দরজাটার দিকে, কিন্তু সঙ্গে সঙ্গে বুকের উপর একটা প্রচণ্ড ঘুসি খেয়ে সে উল্টে গড়িয়ে গেল দেয়ালের গায়ে, যন্ত্রণায় দম বন্ধ হয়ে এল তার। বুড়ি মা তোইবা—আজীবন যে অতি শান্ত আর নিরীহ—সে সালোমিগার উপর ঝাঁপিয়ে পড়ল সম্মানকে রক্ষা করার সময়ে বাঘিনীর মতো হিংস্রতা নিয়ে।

‘ছেড়ে দাও, কী করছ তোমরা?’

দরজাটার দিকে এগুবার চেষ্টা করতে লাগল তোইবা, প্রাণপণ চেষ্টা করেও সালোমিগা তার কোটের উপর তোইবার জীর্ণ আঙুলের শক্ত মুঠি ছাড়িয়ে নিতে পারল না।

ইতিমধ্যে আঘাত আর যন্ত্রণা থেকে খানিকটা সামলে নিয়ে উঠে দাঁড়িয়েছে পেইসাখ—সে এগিয়ে গেল তোইবাকে সাহায্য করার জন্য।

‘যেতে দাও আমাদের! ছেড়ে দাও আমাদের মেয়েকে!’

দুই বুড়োবুড়ি মিলে কোনোরকমে দরজা থেকে ঠেলে সরিয়ে দিল সালোমিগাকে। ফলে ভয়ানক রেগে দিয়ে সে কোমরবন্ধনী থেকে একটানে পিস্তলটা বের করে নিয়ে বৃক্ষের শাদা-চুল মাথাটার উপর জোরে এক ঘা বসাল ইস্পাতের কুঁদোটা দিয়ে। মেঝের উপর নেতিয়ে পড়ল পেইসাখ।

ঘরের ভেতরে সমানে আর্ত চিৎকার করে চলেছে রিভা।

তোইবাকে যখন টেনেহিচড়ে রাস্তায় বের করে দিল ওরা, তখন সে বেদনায় উন্মাদ হয়ে গেছে। তার নিদারুণ চিৎকারে আর সাহায্যের আবেদনে মুখরিভ হয়ে উঠল রাস্তাটা।

বাড়ির ভেতরটা তখন নিস্তব্ধ।

ঘর থেকে বেরিয়ে এল পালিয়ানিৎসা। দরজার হাতলের উপর ইতিমধ্যেই সালোমিগার হাতটা এগিয়ে এসেছে, তার দিকে না-তাকিয়েই পালিয়ানিৎসা বলল, ‘ভেতরে ঢুকে আর লাভ নেই। বালিশ চাপা দিয়ে ওর চিৎকার বন্ধ করতে গিয়ে দম আটকে মারা গেছে।’ পেইসাখের দেহটা ডিঙিয়ে চলে যাবার সময় তার পা পড়ল জমাট একতাল রক্তের উপর।

বাইরে বেরিয়ে আসতে আসতে সে বিড়বিড়িয়ে বলল, ‘আরজটা খুব সুবিধের হল না হে!’

বাড়িটার সিঁড়ির উপরে আর মেঝের বুকে রক্তাক্ত পদচিহ্ন এঁকে দিয়ে আর সবাই তার পেছনে নিঃশব্দে বেরিয়ে গেল।

শহরে পুরোদমে চলেছে লুটতরাজ। লুটের বখরা নিয়ে মাঝে মাঝে লুটেরাদের মধ্যে ঝগড়া বাধতে লাগল আর মাঝে মাঝে প্রচণ্ড মারামারি হয়ে গেল তাদের মধ্যে, তলোয়ার ঝলসে উঠতে লাগল এখানে-ওখানে। আর, প্রায় সর্বত্রই চলল অবাধ ঘুসোঘুসি।

বিয়ারের দোকানটা থেকে পঁচিশ-গ্যালন পিপেগুলো গড়িয়ে নামিয়ে আনা হল পাশের গলিতে।

তারপর ইহুদিদের বাড়িতে হানা দিতে শুরু করল ঠেঙাড়ের দল।

কোনোরকম বাধা পেল না তারা। ঘরে ঘরে ঢুকে অলঙ্করণের মধ্যে সবকিছু তছনছ করে দিয়ে লুটের মাল বোঝাই করে নিয়ে ফিরে গেল, পেছনে ফেলে গেল কাপড়ের স্তুপ, ছেঁড়াখোঁড়া বিছানা আর বালিশের ছড়িয়ে-পড়া পালক। প্রথমদিনে নিহতের সংখ্যা ছিল মাত্র দুই—রিভা আর তার বাবা। কিন্তু অনিবার্য মৃত্যুর তাণ্ডব শুরু হবে রাত্রি আসন্ন হয়ে আসার সঙ্গে সঙ্গে।

সন্দের দিকে পৈশাচিক চণ্ডালদের এই দলটা মাতাল হয়ে উঠল। রাত্রির অপেক্ষায় আছে উন্মত্ত পের্শলিউরা-বাহিনী।

অন্ধকার তাদের মুক্তি দিল সংযমের শেষ বাঁধন থেকে। রাত্রির আঁধারে মানুষকে হত্যা করা অপেক্ষাকৃত সহজ, এমনকি শেয়ালেও অপেক্ষা করে থাকে অন্ধকারের অন্তত সন্ধিক্ষণের জন্য।

ভয়ঙ্কর এই তিনটি দিন আর দুটি রাত্রির কথা খুব কম লোকেই ভুলতে পারবে। সেই রক্তাক্ত কয়েক ঘণ্টার মধ্যে কতগুলো জীবনকে যে এরা গুঁড়িয়ে দিয়ে গেল,

কতগুলো প্রাণকে গলাটিপে মারল, কী নিদারুণ আতঙ্কে কতগুলো তরুণের মাথার সমস্ত চুল পেকে শাদা হয়ে গেল রাতারাতি, আর কী মর্মান্তিক কান্নার স্রোত বয়ে গেল তার কোনো হিশেব নেই। বুক-ভরা শূন্যতা নিয়ে, লজ্জা আর অপমানের অসহ্য যন্ত্রণা সয়ে যারা চিরতরে চলে-যাওয়া প্রিয়জনের জন্য অবর্ণনীয় দুঃখের মধ্যে বেঁচে রইল, তারা নিহতদের চেয়ে ভাগ্যবান কিনা, সেটা বলা কঠিন। আর, সৰু সৰু গলিঘুঁজির মধ্যে পড়ে রইল তরুণী মেয়েদের যন্ত্রণাবিহীন বেঁকে-যাওয়া দেহগুলি—অসহ্য যন্ত্রণার ভঙ্গিতে তাদের বাহ পেছনের দিকে উৎক্ষিপ্ত।

শুধু নদীর ধারে যেখানে কামার নাউম-এর বাড়ি, সেইখানে একটা প্রচণ্ড প্রতিরোধের ধাক্কা খেল ডালকুস্তারা, যারা তার তরুণী স্ত্রী সারার দিকে এগিয়েছিল। চব্বিশ বছরের পূর্ণ-যৌবন এই কামারটির বলিষ্ঠ জোয়ান দেহ আর ইস্পাতের মতো পেশি, বিরাট হাতুড়িটা ঠুকে ঠুকে সে তার জীবিকা নির্বাহ করে। সে তার সঙ্গিনীকে ছেড়ে দিল না গুদের হাতে।

ছোট তার কুটিরে সর্গক্ষিপ্ত কিন্তু প্রচণ্ড একটা সংঘাতের মধ্যে দু'জন পের্ণলিউরা ডাকাতে মাথার খুলি চুরমার হয়ে গেল পচা কুমড়োর খেলের মতো। নাউম মরিয়ামানুষের চরম হিংস্রতা নিয়ে তাদের দু'জনের জীবনের জন্য প্রচণ্ড লড়াই চালাল। অনেকক্ষণ পর্যন্ত রাইফেলের গুলি ছোড়ার কর্কশ খটাখট আওয়াজ শুনতে পাওয়া গেল নদীর ধারে, যেখানে বিপদ বুঝে ছুটে গেছে বোম্বের দল। যখন আর মাত্র এক রাউন্ড গুলি বাকি রইল, তখন নাউম তার স্ত্রীকে গুলি করে মেরে নিজে বেয়নেট হাতে নিয়ে মৃত্যুর মুখোমুখি বেরিয়ে এল। একঝাঁক গুলি এসে বিধল তার সর্বাস্ত্র আর বাড়ির সামনের দরজায় তার জোয়ান দেহটা হুমড়ি খেয়ে পড়ে গড়িয়ে গেল।

কাছাকাছি গ্রামগুলো থেকে অবস্থাপন্ন চাষীরা তাদের গাড়িটানা হুটপুট ঘোড়া হাঁকিয়ে শহরে এল, খুশিমতো জিনিশপত্রে বোঝাই করে নিল গাড়িগুলো। তারপরে গোলুবের বাহিনীতে তাদের যেসব ছেলেরা কিংবা আত্মীয়স্বজন আছে, তাদের সঙ্গে তাড়াতাড়ি বাড়ি ফিরে গেল, যাতে আরও দু-একবার শহরে এসে জিনিশপত্র নিয়ে যেতে পারে।

সেরিওঝা ক্রম্বাক আর তার বাবা ছাপাখানার সহযোগী কর্মীদের অর্ধেক লোকজনকে লুকিয়ে রেখেছিল তাদের বাড়ির চিলেকোঠায় আর মাটির নিচে ভাঁড়ারঘরে। বাড়ি যাবার পথে সবজিক্ষেতটা পার হবার সময় সে দেখতে পেল—রাস্তা বেয়ে একটা লোক ভীষণভাবে দুই হাত দোলাতে দোলাতে ছুটে আসছে, তার পরনে একটা লম্বা তালিমারা কোট।

লোকটা একজন বুড়ো ইহুদি। খালি মাথা, প্রাণপণে হাঁফাচ্ছে; মৃত্যুর আতঙ্কে আড়ষ্ট এই মানুষটার পেছনে পেছনে একটা ধূসর রঙের ঘোড়া হাঁকিয়ে আসছে একজন পের্ণলিউরা-র লোক। এদের দু'জনের মধ্যে দূরত্বটা দ্রুত কমে আসছে। ঘোড়সওয়ারটা তার জিনের উপর থেকে নুয়ে পড়ল বৃদ্ধ ইহুদিকে কেটে ফেলবার জন্য। পেছনে ঘোড়ার খুরের শব্দ শুনে বুড়োমানুষটা দুই হাত তুলল, যেন সে আঘাতটাকে রুখতে চায়। ঠিক সেই মুহূর্তে সেরিওঝা রাস্তায় লাফিয়ে পড়ে ছুটে এসে দাঁড়াল ঘোড়ার সামনে বৃদ্ধকে রক্ষা করবার জন্য, 'ছেড়ে দাও গুকে, ডাকাত কুস্তা কোথাকার!'

নেমে-আসা তলোয়ারের গতিটাকে থামাবার কোনো চেষ্টা না করে ঘোড়সওয়ারটি তার ফলাটা ভোঁতাভাবে সরাসরি নামিয়ে আনল শণ-রঙের চুলআলা কচি মাথাটার উপর।

প্রধান আতামান পেথলিউরার সৈন্যদলের উপরে লাল সৈন্যদলের চাপ ক্রমশই বেড়ে চলেছে। গোলুবের বাহিনীর তলব পড়ল সীমান্তে। শহরে শুধু রেখে-যাওয়া হল পেছনের সারির একটা ছোট সৈন্যদল আর শহরের সামরিক শাসনকর্তৃপক্ষের লোকদের।

শহরবাসীরা একটু নড়াচড়া করার সুযোগ পেল। ইহুদি অধিবাসীরা এই সাময়িক বিরতির সুযোগটুকুতে মৃতদের কবর দিতে লাগল, ইহুদিপাড়ার ছোট ছোট কুঁড়েঘরগুলোয় জীবন আবার ফিরে এল।

শুধু মাঝে মাঝে শান্ত সন্ধ্যায় দূর থেকে অস্পষ্ট কামানের আওয়াজ ভেসে আসে। খুববেশি দূরে নয় কোথাও লড়াই চলেছে।

স্টেশনের রেলকর্মীরা গ্রামের দিকে ঘুরতে লেগেছে কাজের সন্ধানে।

স্কুল বন্ধ হয়ে গেছে।

সামরিক আইন জারি হয়েছে গোটা শহরে।

\*

\*

\*

নিবিড় অন্ধকার আর কুৎসিত এই রাত্রিটা—এমন একটা রাত্রি যে, যতই তীক্ষ্ণদৃষ্টিতে তাকানো যাক-না কেন, অন্ধকার ভেদ করা যাবে না কিছুতেই, আর অন্ধচোখে হাতড়ে হাতড়ে পথ চলতে হবে মানুষকে—যে-কোনো মুহূর্তে খানায়-গর্ভে মুখ খুবড়ে ঘাড় ভেঙে পড়ার সম্ভাবনা।

নাগরিকেরা জানে যে এহেন সময়ে ঘরের মধ্যে অন্ধকারে বসে থাকাই ভালো। তারা আলোও জ্বালবে না, কারণ অবাস্তবিক অতিথিরা আলো দেখে আকৃষ্ট হতে পারে। অন্ধকারই ভালো আর ঢের নিরাপদ। এমন কেউ কেউ অবশ্য আছে যারা সর্বদাই অস্থির—তারা যদি বাইরে বাইরে ঘুরে বেড়াতে চায় তো যাক, নাগরিকদের তাতে মাথা ঘামাবার কোনো দরকার নেই। সে নিজে কিন্তু যাবে না। নিশ্চিত থাকতে পারেন, যাবে না।

এইরকম একটা রাত্রি, কিন্তু তবু এহেন রাত্রিতেও একজন লোক চলেছে রাস্তা দিয়ে।

করচাগিনদের বাড়ির সামনে এসে সে সাবধানে টোকা মারল জানলাটার উপর। কোনো সাড়া না-পেয়ে সে আবার আরও জোরে আর আরও ঘনঘন টোকা দিতে থাকল।

পাভেল স্বপ্ন দেখছিল—একটা অমানুষিক চেহারার অদ্ভুত প্রাণী তার দিকে একটা মেশিনগান বাগিয়ে আছে আর সে পালিয়ে যেতে চাইছে, কিন্তু কোথাও যাবার জায়গা নেই, এমন সময়ে মেশিনগানটা ভয়ানকরকম খটাখট শব্দে গুলি ছুড়তে লাগল।

ঘুম ভেঙে যেতেই তখনতে পেল জানলায় খটাখট আওয়াজ। কে যেন টোকা দিচ্ছে।

বিছানা থেকে লাফিয়ে উঠে জানলার কাছে এল—লোকটা কে দেখবার জন্য, কিন্তু দেখতে পেল শুধু একটা অস্পষ্ট ছায়ামূর্তি।

বাড়িতে পাভেল একা। মা গেছে পাভেলের বড়বোনকে দেখতে। তার স্বামী চিনিকলের একজন মিস্ত্রি। আর আরতিওম তো কাছাকাছি একটা গায়ে কামারের কাজ করছে, হাতুড়ি পিটে চালিয়ে নিচ্ছে নিজেরটা।



তবু লোকটা তো একমাত্র আরতিওমই হতে পারে।

পাভেল জানলাটা খুলবে ঠিক করল। অন্ধকারকে উদ্দেশ্য করে বলল, 'কে?'

জানলার বাইরের মূর্তিটা একটু নড়াচড়া করে চাপা গম্ভীর গলায় বলল, 'আমি বুখরাই।'

জানলার তাকের উপর হাতদুটো রেখে বুখরাই মাথাটা তুলে ধরল পাভেলের মুখোমুখি সমান উচ্চতায়। ফিসফিসিয়ে বলল, 'রাতটা তোমার এখানে কাটা'ব বলে এলাম। কোনো আপত্তি আছে, ভাই?'

'নিশ্চয় না,' সম্মুখে বলল পাভেল, 'কাটা'বে বইকি। জানলা দিয়ে গলে ভেতরে এসো।'

জানলাটার ফাঁকে কোনো গতিকে তার বিরাট দেহটাকে টেনে ভেতরে আনল ফিওদর।

জানলাটা বন্ধ করে দিয়ে সে কিন্তু তখনই সরে এল না।

কান খাড়া করে সে শুনল কিছুক্ষণ। তারপর, মেঘের আড়াল থেকে চাঁদটা সরে গিয়ে যখন রাস্তাটা স্পষ্ট হয়ে উঠল তখন সে খুব ভালো করে দেখে নিল রাস্তাটা। তারপরে পাভেলের দিকে ফিরল সে, 'তোমার মায়ের ঘুম ভাঙিয়ে দেব না তো, কি বলো?'

পাভেল জানাল যে বাড়িতে সে ছাড়া আর কেউ নেই। নাবিকটি আরও আশ্বস্ত হল কথাটা শুনে। সে আরেকটু জোর-গলায় কথা বলতে লাগল, 'খুনি-ডাকাতগুলো ইদানীং আমার পেছনে বেশ তোড়জোড় করেই লেগেছে, ভাই। স্টেশনে যা হয়ে গেছে, তার জন্যেই আমার খোঁজে ঘুরছে ওরা। আমাদের লোকজন যদি আরেকটু একজোট হয়ে দাঁড়াতে পারত, তাহলে আমরা ওই দাঙ্গার সময় সেই কুস্তাদের উপর বেশ একহাত নিতে পারতাম। কিন্তু দেখছই তো, এখনও আগুনে ঝাপ দিতে চায় না লোকে। আর সেইজন্যেই তো কিছু হল না। এদিকে ওরা আমার খোঁজে ফিরছে, দু-দুবার জাল ফেলেছে—আজ তো একচুলের জন্যে পার পেয়ে গেছি। বাড়ি ফিরছিলাম, বুঝলে, পেছনের রাস্তা দিয়ে অবশ্য। একবার চারদিকে দেখে নেবার জন্যে চালাটার কাছে যেই থেমেছি দেখি একটা গাছের গুঁড়ির আড়াল থেকে একটা বেয়নেটের ডগা বেরিয়ে রয়েছে। তক্ষুনি তো ঘুরে দাঁড়িয়ে চলে এলাম তোমার এখানে। তোমার যদি কোনো আপত্তি না থাকে, তাহলে এখানেই দিনকতকের জন্যে ঘাঁটি গাড়'ব, কি বলো? বেশ।'

বুখরাই কাদামাখা বুটজোড়া টেনে খুলতে লাগল।

সে আসাতে খুশি হয়েছে পাভেল। বিদ্যুৎ-স্টেশনে ইদানীং কাজ চলছে না, নির্জন বাড়িতে পাভেলের ভারি ফাঁকা ঠেকছিল।

ওয়ে পড়ল তারা। পাভেল তৎক্ষণাৎ ঘুমিয়ে পড়ল, কিন্তু বুখরাই সিগারেট টানতে টানতে জেগে রইল অনেকক্ষণ। একটু পরেই উঠে পড়ল সে, খালিপায়ে নিঃশব্দে জানলাটার কাছে এসে রাস্তাটার দিকে অনেকক্ষণ তাকিয়ে রইল। শেষপর্যন্ত ক্লান্তিতে আচ্ছন্ন হয়ে ওয়ে ঘুমিয়ে পড়ল, কিন্তু সমস্তক্ষণ তার হাতটা রইল বালিশের নিচে গোঁজা ভারী পিস্তলটার হাতলের উপর।

\*

\*

\*

সেই রাতে বুখরাইয়ের অপ্রত্যাশিতভাবে এসে পড়া আর তার সঙ্গে আটদিন কাটানোর ফলে পাভেলের জীবনের সমস্ত গতিটা বিশেষভাবে প্রভাবিত হল।

অনেককিছু নতুন গুরুত্বপূর্ণ ব্যাপার সম্বন্ধে পাভেল জানতে পারল এই নাবিকটির কাছে—সেটা নাড়া দিল তার সম্ভার গভীরে। এই দিনকয়টি তরুণ স্টোকারের জীবনে চূড়ান্ত হয়ে দেখা দিল।

আত্মগোপন করতে বাধ্য হয়ে নিষ্কর্মা বসে থাকতে হচ্ছে বুখরাইকে। তাই সে উৎসুক পাভেলের কাছে নানান কথা বলে এই সময়টুকু কাটাচ্ছে : এই অঞ্চলটার টুটি টিপে রয়েছে ইউক্রেনীয় জাতীয়তাবাদীরা—তাদের উদ্দেশ্যে প্রচণ্ড ক্রোধ আর জ্বলন্ত ঘৃণা ঢেলে দিয়ে নানা কথা বলে চলে সে পাভেলের কাছে।

বুখরাইয়ের ভাষাটা স্পষ্ট, ঝরঝরে আর সহজ। কোনো দ্বিধা নেই তার মনে, তার সামনে পথটা পরিষ্কার এবং পাভেল ক্রমশই দেখতে পেল যে, ‘সোশ্যালিস্ট-রেভলিউশনারি’, ‘সোশ্যাল-ডেমোক্র্যাট’, ‘পোলিশ সোশ্যালিস্ট’ ইত্যাদি গালভরা নামঅলা বিভিন্ন রাজনীতিক দল আসলে সবাই শ্রমিকদের নিদারুণ শত্রু—একমাত্র সত্যিকারের বিপ্লবী দল, যেটা ধনিক-শ্রেণীর বিরুদ্ধে একান্তভাবে লড়াই করে চলেছে, সেটা হচ্ছে বলশেভিক পার্টি।

এর আগে পর্যন্ত এসব ব্যাপারে পাভেলের ধারণাটা ছিল নিতান্তই এলোমেলো।

সমুদ্রের ঝড়ে পোড়-খাওয়া এই দৃঢ় আর বলিষ্ঠ-মন বাস্টিক অঞ্চলের নাবিকটি বহুদিনের পুরনো আর বিস্মৃত বলশেভিক, ১৯১৫ সাল থেকে সে রুশ সোশ্যাল-ডেমোক্র্যাটিক শ্রমিক (বলশেভিক) পার্টির সভ্য। পাভেলের কাছে সে জীবনের নির্মম সত্যগুলিকে উদ্ঘাটিত করে যায় আর তরুণ এই স্টোকার মুগ্ধ হয়ে তাই শোনে।

বুখরাই বলছিল, ‘অল্পবয়সে আমিও তোমার মতোই ছিলাম, ভাই। শরীরমনের এতটা উদ্যম নিয়ে কী করব ভেবেই পেতাম না, সবসময়ে শাসন না-মানার দিকে ঝোঁকটা গিয়ে পড়ত। দারিদ্র্যের মধ্যে মানুষ হয়ে উঠেছিলাম, মাঝে মাঝে শহরের ভন্দরলোকদের হুটপুট ছেলেদের দেখেই রাগে জ্বলে উঠতাম। প্রায়ই ওদের ধরে বেদম মার দিতাম, কিন্তু তার জন্যে আমাকে আবার বাবার কাছে পাল্টা মার খেতে হয়েছে। একা-একা লড়াই করে অবস্থাটা বদলানো যায় না। মজুরদের আদর্শের জন্যে ভালো একজন লড়েনেঅলা হবার মতো সবকিছু গুণ তোমার মধ্যে আছে, পাভলুশা। শুধু তোমার বয়েসটা এখনও বড় কম আর শ্রেণীসংগ্রাম সম্বন্ধে বিশেষ কিছু জানো না। আমি তোমাকে ঠিক রাস্তাটা বাতলে দেব, কারণ আমি জানি তুমি একজন ভালো কর্মী হয়ে উঠবে। আমি এই নিরীহ মিনমিনে গোছের ছেলেদের সহ্য করতে পারি না। গোটা দুনিয়াটায় আশুন জ্বলে উঠেছে আজ। এতদিন যারা গোলাম ছিল আজ তারা উঠে দাঁড়িয়েছে, পুরনো ধরনের জীবনের শিকড় উপড়ে ফেলতে হবে। কিন্তু সেটা করবার জন্যে আমাদের শক্তসমর্থ লোক চাই; লড়াই শুরু হলে যারা তেলাপোকার মতো সুড়সুড় করে গর্তে গিয়ে ঢুকবে, সে-ধরনের মেয়েলি স্বভাবের ছেলেদের নিয়ে আমাদের চলবে না। নির্মম হয়ে যারা আঘাত হানতে পারবে, তেমন মানুষই আমাদের দরকার।’

টেবিলের উপরে সশব্দে একটা ঘুসি বসাল সে।

তারপর উঠে দাঁড়িয়ে ভুরু কুঁচকে হাতদুটো পকেটে গুঁজে পায়চারি করতে লাগল ঘরের এদিক থেকে ওদিক।

এই ক'দিনের নিষ্ক্রিয়তা তাকে একটু দমিয়ে দিয়েছে। তার কমরেডরা সবাই চলে যাবার পরে সে এই শহরে থেকে গিয়েছিল বলে তার মনে দারুণ আক্ষেপ এসেছে। এখানে আর পড়ে-থাকাটা নিরর্থক হবে মনে করে সে যুদ্ধসীমান্ত পার হয়ে গিয়ে লাল সৈন্যদলগুলির সঙ্গে যোগ দেবে বলে ঠিক করে ফেলেছে।

শহরে কাজ চালিয়ে যাবার জন্য ন'জন পার্টি-সভ্যের একটা দল থাকবে এখানে। একটু বিরক্ত হয়ে মনে-মনে ভাবল বুখরাই, 'আমাকে ছাড়াই ওরা কাজ চালিয়ে যেতে পারবে। এভাবে কিছু না করে আমি তো আর বসে থাকতে পারি না। বলতে গেলে দশটা মাস নষ্ট করেছি আমি।'

পাভেল একবার জিজ্ঞেস করেছিল তাকে, 'আচ্ছা, ফিওদর, তুমি ঠিক কে বলো তো?' বুখরাই দাঁড়িয়ে পকেটে হাত গুঁজে দিয়েছিল, সে প্রথমে কথাটার মানে বুঝতে পারেনি, 'জানো না?'

নিচুগলায় বলেছিল পাভেল, 'আমার তো মনে হয় তুমি বলশেভিক কিংবা কমিউনিষ্ট।'

হেসে ফেটে পড়ল বুখরাই। ডোরা-কাটা আঁটসাঁট গেঞ্জি-পরা চওড়া তার বুকের উপরে চাপড় মেরে বলল, 'ঠিক বলেছ ভাই! বলশেভিক আর কমিউনিষ্টরা যে এক, এ-কথা যেমন ঠিক, তোমার কথাটাও তেমনি ঠিক।' হঠাৎ সে গম্ভীর হয়ে উঠল, 'কিন্তু এতটা যখন বুঝে গেছে, তখন মনে রাখা চাই—তুমি তো চাও না যে ওদের হাতে আমি ধরা পড়ি, সুতরাং কক্ষনো কারুর কাছে বলবে না কথাটা। বুঝলে তো?'

'বুঝেছি,' দৃঢ়স্বরে বলল পাভেল।

আঙিনার দিকে গলার স্বর শোনা গেল, আর কোনো জ্ঞানান না দিয়েই দরজাটা খুলে গেল। বুখরাইয়ের হাতটা সঙ্গে সঙ্গে সেঁধিয়ে গেল পকেটের মধ্যে, কিন্তু সেগেই ক্রমাককে এবং তার পেছন পেছন ভালিয়া আর ক্রিমকাকে ঢুকতে দেখে সে আবার বের করে আনল হাতটা। রোগা আর বিবর্ণ সেগেই-এর মাথায় পট্টি বাঁধা।

পাভেলের করমর্দন করে হাসিমুখে বলল সেগেই, 'কিরে, পাভকা। আমরা তিনজনেই এলাম তোর এখানে একটু গল্পটক্ক করব বলে। ভালিয়া আমাকে একা বেরুতে দেবে না, আর ক্রিমকা আবার ভালিয়াকে একা কোথাও যেতে শুনলে ঘাবড়ে যায়। কটা-চুলো হলে হবে কী, ক্রিমকাটা এদিকে দিবি্য সেয়ানা।'

হাসতে হাসতে ভালিয়া হাত দিয়ে চেপে ধরল সেগেই-এর মুখটা, 'ফাজিল একটা। আজ সারাদিন ক্রিমকার পেছনে লেগে থাকবে, দেখছি।'

এক-পাটি শাদা দাঁত বের করে ক্রিমকা তার স্বভাবসিদ্ধ মিষ্টি হাসি হাসল, 'ঘেয়ো-মাথা রুগীকে নিয়ে আর কী করা যাবে বলো? ঘিলুটা একটু ঘুলিয়ে গেছে—দেখতেই তো পাচ্ছ।'

হেসে উঠল সবাই।

মাথায় তলোয়ারের সেই চোটটা থেকে সেগেই এখনও সম্পূর্ণ সেরে উঠতে পারেনি। পাভেলের বিছানার উপরে আরাম করে বসল সে। কিছুক্ষণের মধ্যেই জোরালো গল্পে জমে গেল এরা ক'জন। সেগেই সাধারণত ফুর্তিবাজ আর হাসিখুশি।

কিন্তু পেথলিউরা-সৈনিকের সঙ্গে তার সেদিনের ঘটনাটার পর সে গভীর আর মন-মরা হয়ে উঠল। ঘটনাটার কথা সে বলল ঝুখরাইকে।

ঝুখরাই এই তিনটি ছেলেমেয়েকে চেনে, কারণ সে বারকয়েক গেছে ক্রম্বাকদের বাড়ি। এই তরুণদের তার ভালো লাগে, একেবারে সংগ্রামের মধ্যে এখনও সরাসরি আসেনি, কিন্তু শ্রমিকদের শ্রেণীগত আশা-আকাঙ্ক্ষা ওদের মধ্যে সুস্পষ্ট রূপ পেয়ে গেছে। আগ্রহের সঙ্গে ঝুখরাই শুনে গেল কীভাবে ওরা ওদের বাড়িতে ইহুদি-পরিবারগুলিকে আশ্রয় দিতে সাহায্য করেছিল তাদের বাঁচাবার জন্য। সেদিন বিকেলে সে এই ছেলেমেয়েদের অনেক কিছু বলল—বলশেভিকদের সম্বন্ধে, লেনিনের সম্বন্ধে। কী ঘটছে না-ঘটছে সেসব এদের বুঝিয়ে বলল ঝুখরাই।

পাভেল যখন তার বন্ধুদের বিদায় দিয়ে রাস্তায় এগিয়ে দিল, তখন বেশ রাত্রি হয়ে গেছে।

ঝুখরাই প্রতি সন্ধ্যায় বেরিয়ে যায় আর গভীর রাত্রে ফিরে আসে। শহর ছেড়ে যাবার আগে তাকে তার কমরেডদের সঙ্গে আলোচনা করে নিতে হচ্ছে কাকে কোন কাজটা করার জন্য থাকতে হবে।

কিন্তু আজকের এই রাস্তিরটায় আর ফিরল না সে। সকালে ঘুম ভেঙে উঠে পাভেল দেখতে পেল শূন্য বিছানা।

একটা অস্পষ্ট আশঙ্কায় ভরে গেল পাভেলের মন, তাড়াতাড়ি পোশাক পরে বেরিয়ে গেল সে। দরজাটা বন্ধ করে যথাস্থানে চাবিটা রেখে ক্রিমকার বাড়ি এল যদি সেখানে ফিওদরের কোনো খবর পাওয়া যায় সেই আশায়। জামাকাপড় কাচাকাটি করছিল ক্রিমকার মা—মোটাসোটো দেহ, বসন্তের দাগঅলা চ্যান্টা মুখ। ফিওদর কোথায় জানে কিনা পাভেল জিজ্ঞেস করলে কাটা-কাটা কথায় জবাব দিল ক্রিমকার মা, 'তোর ওই ফিওদরের ওপর নজর রাখা ছাড়া আমার আর কোনো কাজ নেই, না? ওই হতভাগা লোকটার জনেই তো জোজুলিখার সংসারটা তছনছ হয়ে গেল। ওর সঙ্গে তোর কী এত কাজ? কী আমার একটা দল! ক্রিমকা, তুই, যতসব...' রাগে সে সজোরে চাপ দিল জামাকাপড়ে।

ক্রিমকার মা বড় মুখরা, ভীষণ কাটা-কাটা তার কথা।

ক্রিমকার বাড়ি থেকে পাভেল এল সেগেইয়ের বাড়ি। সেখানে সে তার আশঙ্কার কথাটা বলল। ভালিয়া বলল, 'এত ভাবছই বা কেন? হয়তো কোনো বন্ধুর বাড়িতে থেকে গেছে।' কিন্তু তার কথায় নিশ্চয়তার অভাব ফুটে উঠল।

মনটা চঞ্চল হয়ে উঠেছে পাভেলের, ক্রম্বাকদের বাড়িতে বেশিক্ষণ থাকল না সে। ওরা তাকে খেয়ে যাবার জন্য পীড়াপীড়ি করা সত্ত্বেও চলে এল পাভেল।

বাড়ি ফিরে এল পাভেল যদি ঝুখরাই ফিরে থাকে এই আশায়।

দরজাটা তেমনই তালাবদ্ধ। ভারী মন নিয়ে বাইরে দাঁড়িয়ে রইল পাভেল কিছুক্ষণ, ফাঁকা বাড়িটায় ঢুকতে তার মন চাইল না কিছুতেই।

গভীর চিন্তায় আচ্ছন্ন হয়ে সে কিছুক্ষণ আঙিনাটায় দাঁড়িয়ে রইল, তারপর হঠাৎ যেন কিসের টানে সে এসে ঢুকল চালাঘরটায়। চালের নিচে বেয়ে উঠে মাকড়সার

জাল সরিয়ে গোপন জায়গাটা থেকে লুকিয়ে-রাখা ন্যাকড়া-জড়ানো সেই ভারী মান্লিশের পিস্তলটা বের করে নিল।

তারপর চালাটা থেকে বেরিয়ে এসে পাভেল রওনা হল স্টেশনের দিকে। পকেটে খুলন্ত পিস্তলটার ভার অনুভব করে সে অদ্ভুত রকমের একটা উদ্ভাস বোধ করল।

কিন্তু স্টেশনে ঝুঁকরাইয়ের কোনো খবর পাওয়া গেল না। ফিরে আসার পথে প্রধান বনপরিদর্শকের সেই চেনা বাগানবাড়িটার কাছে তার গতি কমে এল। একটা ক্ষীণ আশায় সে বাড়িটার জানলাগুলোর দিকে একবার তাকাল, কিন্তু বাগানটার মতোই বাড়িটাও যেন প্রাণহীন। বাগানটা পেরিয়ে যেতে-যেতে সে পেছন ফিরে একনজর তাকাল গত হেমন্তের ঝরাপাতায় আচ্ছন্ন বাগানের পথটার দিকে। জায়গাটাকে মনে হল জনমানবশূন্য আর নিতান্তই উপেক্ষিত। কোনো উদ্যোগী হাতের স্পর্শ পেয়েছে বলে দেখে মনে হয় না—বিরাত পুরনো বাড়িটার প্রাণহীন নিস্তব্ধতা পাভেলকে আরও বিষণ্ণ করে তুলল।

তোনিয়ার সঙ্গে তার শেষ ঝগড়াটা খুব গুরুতর রকমের হয়ে গেছে। মাসখানেক আগে খুব অপ্রত্যাশিতভাবে ঘটনাটা ঘটেছিল।

পকেটে হাতদুটো গুঁজে ধীরে ধীরে শহরে ফিরে আসার পথে সমস্ত ব্যাপারটা মনে পড়ল পাভেলের।

হঠাৎ রাস্তায় তোনিয়ার সঙ্গে দেখা হয়ে গিয়েছিল, আর তোনিয়া তাকে তাদের বাড়ি আসার জন্য আমন্ত্রণ জানিয়েছিল, ‘বাবা আর মা বলশানস্কিদের বাড়ি যাচ্ছেন জন্মদিনের নেমন্ত্নে। আমি একা থাকব বাড়িতে। তুমি এসো না, পাভলুশা? একটা খুব ভালো বই আছে—লেওনিদ আন্দ্রেয়েভের ‘সান্কা ঝিগুলিওভ’—দু’জনে মিলে পড়া যাবে। আমার অবশ্য পড়া হয়ে গেছে, কিন্তু আরেকবার পড়ার ইচ্ছে আছে তোমার সঙ্গে। বেশ কাটাও বিকেলটা, কেমন? আসবে তো?’

তোনিয়ার ঘন বাদামি চুলের উপর শাদা আঁটসাঁট টুপিটার নিচ থেকে তার বড় বড় বিস্ফারিত চোখদুটো আশাবিতভাবে তাকিয়েছিল পাভেলের দিকে।

‘আসব আমি।’

তারপরে যে-যার পথে চলে গিয়েছিল তারা।

পাভেল তাড়াতাড়ি চলে এসেছিল তার যন্ত্রগুলোর কাছে; সন্ধ্যাটা তোনিয়ার সঙ্গে কাটাতে পারবে—যেন এই চিন্তাতেই চুন্নিটায় আগুনটা জ্বলছে অন্যদিনের চেয়ে উজ্জ্বল হয়ে, জ্বালানির কাঠগুলো যেন আরও বেশি খুশি হয়ে পটপট আগুয়াজ্জ তুলছে।

সেদিন সন্ধ্যায় সে যখন সামনের চওড়া দরজাটায় এসে টোকা মারল, তোনিয়া বেরিয়ে আসতেই দেখা গেল তার যেন কেমন একটা ইতস্তত ভাব। তোনিয়া বলল, ‘আমার কয়েকজন বন্ধু এসেছে—ওদের আসার কথা ছিল না অবশ্য। কিন্তু পাভলুশা, তুমি চলে যেয়ো না।’

ফিরে যাবার জন্য পিছন ফিরে দরজাটার দিকে পাভেল এগিয়ে যেতেই তোনিয়া এসে তার হাত ধরল, ‘চলো ভেতরে। তোমার সঙ্গে আলাপ করে ওদেরই লাভ হবে।’ পাভেলের কাঁধ জড়িয়ে ধরে তোনিয়া তাকে খাবারঘরটার মধ্যে দিয়ে নিয়ে এল তার নিজের ঘরে।

ঘরে বসেছিল কয়েকজন তরুণ-তরুণী। তাদের দিকে ফিরে তোনিয়া হেসে বলল, 'আলাপ করিয়ে দিই তোমাদের সঙ্গে, এই আমার বন্ধু পাভেল করচাগিন।'

ঘরের মাঝখানে ছোট টেবিলটা ঘিরে বসেছিল ওরা তিনজন : লিজা সুখার্কো—সুন্দরী, গাঢ় রঙ, ঠোঁট-ফোলানো ছোট মুখ, চটুল ভঙ্গিতে চুল বাঁধা—কুলের ছাত্রী সে; কালো রঙের একটা কেতাদুরস্ত জামা গায়ে লম্বাটে একটি ছেলে, মাথার পাতলা চুলগুলো তার তেলে চকচক করছে, ধূসর চোখের দৃষ্টিতে একটা শূন্য চাউনি; আর এদের দু'জনের মাঝখানে বাবুয়ানা একটা ইকুলের উর্দি পরে বসে আছে ভিক্তর লেচ্চিনস্কি। তোনিয়ার ঘরে ঢোকার সময়ে তাকেই পাভেল প্রথম দেখেছিল।

লেচ্চিনস্কিও দেখেই চিনেছে পাভেলকে, বিষয়ে তার সরু বাঁকা ভুরুদুটো তুলল সে।

কয়েক মুহূর্ত পাভেল একটা সুস্পষ্ট শত্রুতার চোখে ভিক্তরের দিকে তাকিয়ে দাঁড়িয়ে রইল দরজাটায়। এই অস্বস্তিকর নিস্তব্ধতাতুঁকু ডাঙবার জন্য তাড়াতাড়ি এগিয়ে এল তোনিয়া, পাভেলকে ভেতরে আসতে বলে লিজার সঙ্গে আলাপ করিয়ে দিতে এল।

আগন্তুকটিকে কৌতূহলের সঙ্গে লক্ষ্য করছিল লিজা সুখার্কো, দাঁড়িয়ে উঠল সে চেয়ার ছেড়ে।

পাভেল কিন্তু বোঁ করে ঘুরে দাঁড়িয়ে আধা-অন্ধকার খাবারঘরটা পেরিয়ে হনহন করে চলে এল সামনের দরজাটার দিকে। তোনিয়া এসে যখন তাকে ধরে ফেলে তার কাঁধে হাত রাখল, ততক্ষণে পাভেল দেউড়িতে চলে এসেছে।

'ছুটে চলেছ কোথায়? তোমার সঙ্গে ওদের দেখা হোক তাই আমি বিশেষ করে চেয়েছিলাম,' উদ্বিগ্ন স্বরে সে বলল।

পাভেল কাঁধের উপর থেকে তার হাতদুটো সরিয়ে দিয়ে তীব্রস্বরে বলল, 'ওই শালার সামনে আমি নিজেই একটা দেখবার জিনিশ হিশেবে খাড়া করতে রাজি নই। আমি ওই দলের লোক নই—তুমি ওদের পছন্দ করতে পারো, কিন্তু আমার ঘেন্না হয় ওদের দেখে। যদি জানতাম যে ওরা তোমার বন্ধু, তাহলে আমি কক্ষনো আসতাম না।'

জমে-ওঠা রাগ চেপে তাকে বাধা দিয়ে বলল তোনিয়া, 'এরকম কথা বলার কী অধিকার আছে তোমার? আমি তো কখনো জানতে যাই না তোমার বন্ধু কারা, কারা আসে তোমার বাড়িতে।'

'তোমার এখানে কারা আসে না আসে তাতে আমার ভারি ব্যয়েই গেল। কিন্তু আমি আর তোমার এখানে আসব না—শুধু এইটে বলে যাচ্ছি।' সামনের সিঁড়ি বেয়ে নামতে নামতে পাভেল পাল্টা জবাব দিয়েছিল তোনিয়ার কথার। ছুটে গিয়েছিল সে বাগানের দেউড়িটার দিকে।

তারপর থেকে আর তোনিয়ার সঙ্গে দেখা হয়নি। দাস্তার সময়ে সে আর ইলেকট্রিশিয়ান দু'জনে মিলে যখন বিদ্যুৎ-স্টেশনে ইহুদি-পরিবারগুলোকে আশ্রয় দিয়েছিল, তখন পাভেল ভুলে গিয়েছিল ঋগড়ার ঘটনাটা। আজ আবার তোনিয়ার সঙ্গে দেখা করার ইচ্ছে হল তার।

ঝুঝরাইয়ের নিরুদ্ধশেষের ব্যাপারটা আর ফাঁকা বাড়ির কথা ভেবে মনটা দমে গেল পাভেলের। ধূসর লম্বা রাস্তাটা ঘুরে গেছে ডাইনে। বসন্তের কাদা এখনও শুকোয়নি,

তামাটে কাদা-জলের ছোট ছোট গর্ত রাস্তাটার বুক জুড়ে আছে। সামনের একটা বাড়ির দেয়ালটার প্রাচীর খসে গেছে। কদাকার বাড়িটা এসে ঢুকেছে রাস্তার মধ্যে আর তারই পাশ দিয়ে রাস্তাটা দু'ভাগে ভাগ হয়ে গেছে।

\*

\*

\*

রাস্তার মোড়ে যেখানে একটা ভাঙাচারা দরজাঅলা বিধ্বস্ত দোকানঘরের মতো জায়গার মাথার উপরে 'সোডা-লেমোনড' লেখা একটা তক্তা উল্টো হয়ে ঝুলছে, সেইখানে ভিক্টর লেচিনস্কি লিজা সুখার্কোর কাছে বিদায় নিচ্ছিল।

ভিক্টর অনুনয়ের দৃষ্টিতে লিজার চোখের দিকে তাকিয়ে তার হাত ধরে জিজ্ঞেস করছিল, 'আসবেন তো ঠিক? ঠকাবেন না তো শেষপর্যন্ত?'

লিজা চতুরমুখে উত্তর দিল, 'আসব বৈকি। অপেক্ষা করতে পারেন আমার জন্যে।'

চলে যাবার সময় সে ভিক্টরের দিকে তার বাদামি চোখের ভরসা-জাগানো গৃঢ় চাউনিতে তাকিয়ে হাসল।

রাস্তা বেয়ে কয়েক গজ আসতেই লিজা দু'জন লোককে একটা বাঁক ঘুরে রাস্তার উপরে বেরিয়ে আসতে দেখল। প্রথমজন বলিষ্ঠ দেহ, চওড়া-বুক, মজুরের পোশাক পরা—তার বোতাম-খোলা কোর্তাটার নিচে ডোরাকাটা গেঞ্জিটা দেখা যাচ্ছে, কপালের উপরে মাথার কালো টুপিটা নামানো, পায়ে বাদামি নিচু বুটজোড়া, চোখের নিচে একটা কালচে-নীল আঘাতের চিহ্ন।

দৃঢ়পায়ে কিন্তু একটু টলে টলে চলেছে লোকটি।

তার তিন-পা পেছনে পিঠে প্রায় বেয়নেট ঠেকিয়ে বন্দুক বাগিয়ে ধূসর কোট-পরা একজন পেথলিউরা-সৈন্য—তার কোমরবন্ধনীর সঙ্গে ঝুলছে দুটো কার্তুজের থলি। লোমশ ভেড়ার চামড়ার টুপিটার নিচ থেকে তার ছোট ছোট সাবধানী চোখদুটো বন্দির মাথার পেছনদিকটা লক্ষ্য রেখেছে, তার গায়ের দু'ধারে তামাকের ধোয়ায় হলদে খোঁচা-খোঁচা গোফ।

একটু গতিটা কমিয়ে লিজা রাস্তাটা পার হয়ে অন্যদিকে এল আর ঠিক সেই সময় তার পেছনে পাভেল এসে পড়ল বড় রাস্তাটার উপরে।

পুরনো বাড়িটা পার হয়ে রাস্তাটার বাঁকে পাভেল ডানদিকে যেই ঘুরেছে, অমনি সেও ওই দু'জন মানুষকে তার দিকে আসতে দেখল।

চমকে উঠে থেমে গেল পাভেল, যেন তার পা আটকে গেছে মাটির সঙ্গে। যাকে শ্রেণ্ডার করে নিয়ে যাওয়া হচ্ছে সে ঝুঁকুঁরাই।

'এইজন্যেই কাল রায়ে ফেরেনি ঝুঁকুঁরাই!'

ক্রমশই এগিয়ে আসছে ঝুঁকুঁরাই। পাভেলের বুক হাতুড়ি পিটতে লাগল, যেন হৃৎপিণ্ডটা ফেটে পড়বে এখনই। অবস্থাটা ঠিকমতো বুঝে নেবার বৃথা চেষ্টায় তার মাথায় অতিদ্রুত চিন্তার স্রোত বয়ে যেতে লাগল : খুব বেশি ভাবনা-চিন্তার সময় নেই। শুধু একটা জিনিশ স্পষ্ট : ঝুঁকুঁরাই ধরা পড়েছে। বিভ্রান্ত আর হতচকিত পাভেল ওদের দু'জনকে এগিয়ে আসতে দেখে ভাবতে লাগল, 'কী করা যায়?'

শেষমুহূর্তে তার মনে পড়ল পকেটে পিস্তলটার কথা। ওরা দু'জন তাকে পার হয়ে এগিয়ে গেলেই সে রাইফেলধারীটাকে পেছন থেকে গুলি করবে আর তাহলেই

ফিওদরের মুক্তি। মুহূর্তের মধ্যে এই সিদ্ধান্তে আসার সঙ্গে সঙ্গেই তার মাথা পরিষ্কার হয়ে গেল। সে ভীষণ জ্বরে দাঁতে দাঁত চাপল। ফিওদর তো কালই বলেছিল, 'এইসব কাজের জন্যে আমাদের চাই শক্তসমর্থ লোকের...'

দ্রুত একনজর পেছনদিকটা দেখে নিল পাভেল। শহরমুখো রাস্তাটা একেবারে জনহীন, জন-প্রাণীও চোখে পড়ে না। সামনের দিকে একটা বসন্তের খাটো কোটপরা স্ত্রীলোক রাস্তাটা তাড়াতাড়ি পার হয়ে যাচ্ছে—ও নিশ্চয়ই এ-ব্যাপারে মাথা ঢোকাবে না। মোড়ের ওখান থেকে যে-অন্যরাস্তাটা বেরিয়ে গেছে সেটা সে দেখতে পাচ্ছে না। শুধু স্টেশনের দিকে বহুদূরে রাস্তাটার উপর কিছু লোককে দেখা যাচ্ছে।

রাস্তাটার ধার ঘেঁষে সরে এল পাভেল। মাত্র আর কয়েক পা যখন ব্যবধান, তখন ঝুঝুরাই তাকে দেখতে পেল।

আড়চোখে তার দিকে তাকিয়ে দেখে ঝুঝুরাইয়ের ঘন ভুরুজোড়া নেচে উঠল। পাভেলের সঙ্গে এই অপ্রত্যাশিতভাবে দেখা হয়ে যাওয়ায় তার গতি কমে এল, আর বেয়নেটটা এসে স্পর্শ করল তার পিঠ।

খ্যানখেনে ভাঙা গলায় প্রহরীটা বলে উঠল, 'তাড়াতাড়ি পা বাড়িয়ে চলো, নইলে দেব এক বাড়ি এই কুঁদোর!'

তাড়াতাড়ি পা চালান ঝুঝুরাই। পাভেলের সঙ্গে কথা বলতে চেয়েছিল সে, কিন্তু সামলে নিল নিজেকে। শুধু যেন অভিবাদনের ভঙ্গিতে হাতটা নাড়ল একবার।

পাছে কটা-গোফ সৈনিকটার দৃষ্টি আকৃষ্ট হয়, তাই পাভেল নিতান্তই উদাসীনের ভঙ্গিতে অন্যদিকে মুখ ফিরিয়ে নিল।

কিন্তু তার মাথায় উদ্বিগ্ন প্রশ্নটা বারবার চাড়া খেতে লাগল : 'যদি গুলিটা ফসকে গিয়ে ওই লোকটার গায়ে না-লেগে ঝুঝুরাইয়ের গায়ে লাগে, তাহলে....'

কিন্তু আর ভাববার সময় নেই।

কটা-গোফ সৈন্যটা পাভেলের পাশাপাশি এসে পড়তেই সে হঠাৎ ঘুরে দাঁড়িয়ে তার উপরে ঝাঁপিয়ে পড়ল—রাইফেলটা চেপে ধরে নলটা ঝট করে মাটির দিকে নামিয়ে আনল।

বেয়নেটটা একটা পাথরের উপর ঘষে গিয়ে কর্কশ আওয়াজ তুলল।

এরকম আকস্মিক আর অপ্রত্যাশিতভাবে আক্রান্ত হয়ে সৈন্যটা হঠাৎ বিমূঢ় হয়ে পড়ার পর ভীষণ একটা হেঁচকা টানে রাইফেলটা ছিনিয়ে নেবার চেষ্টা করল। কিন্তু দেহের সমস্ত ভার দিয়ে কোনোরকমে রাইফেলটা চেপে ধরে রইল পাভেল। ধস্তাধস্তির মধ্যে একটা গুলি বেরিয়ে গিয়ে পাথরের গায়ে লেগে ছিটকে গিয়ে পড়ল খানাটার মধ্যে।

শব্দটা শুনেই ঝুঝুরাই পাশে লাফিয়ে পড়ে ঘুরে দাঁড়াল। পাভেলের হাত থেকে রাইফেলটা ছাড়িয়ে নেবার জন্য ভীষণভাবে ধস্তাধস্তি করছে সৈন্যটা—পাভেলের হাতটা মুচড়ে গেছে, কিন্তু যন্ত্রণা সত্ত্বেও সে তার মুঠি আলগা করেনি। তারপরে একটা প্রচণ্ড ধাক্কায় ক্রুদ্ধ পেরলিউরা-সৈনিকটি পাভেলকে পেড়ে ফেলল মাটিতে—কিন্তু তবুও সে রাইফেলটা ছাড়িয়ে নিতে পারল না। পাভেল পড়ে গেল, কিন্তু পাভেলের টানে সঙ্গে সঙ্গে সৈন্যটিও হুমড়ি খেয়ে পড়ল পাভেলের উপর—এই



মুহূর্তে পৃথিবীতে এমন কোনো শক্তি নেই যা পাভেলের হাত থেকে রাইফেলটা ছাড়িয়ে নিতে পারে ।

তখন দুই লাফে ঝুঝরাই এসে পড়ল ওদের পাশে—লোহার মতো শক্ত তার মুঠি শূন্যে একপাক ঘুরে নেমে এল সৈন্যটার মাথার উপর । এক সেকেন্ডের মধ্যেই সৈন্যটার হাত থেকে ছাড়া পেয়ে গেল পাভেল । মুখের উপর দুটো প্রচণ্ড ঘুসি খেয়ে নেতিয়ে পড়ল সৈনিকের দেহ পথের ধারে খানার মধ্যে ।

যে-হাতে ঘুসি চলেছিল, সেই বলিষ্ঠ দুটি হাতই পাভেলকে মাটি থেকে টেনে তুলে দাঁড় করিয়ে দিল ।

\*

\*

\*

ইতিমধ্যে ভিক্টর রাস্তার মোড়টা থেকে শ-খানেক পা এগিয়ে গিয়েছিল । লিজার সঙ্গে দেখা হওয়ার আনন্দে আর পরের দিন আবার লিজা তার সঙ্গে পরিত্যক্ত কারখানাটার পেছনে দেখা করতে আসবে বলে কথা দেওয়ায় ভিক্টর মনের স্মৃতিতে চলেছে শিস দিয়ে ‘চপল-হৃদয়া মোহিনী’ গানটির সুর ভাঁজতে ভাঁজতে ।

ইকুলের ছেলেদের মধ্যে শোনা যায় যে লিজা সুখার্কো প্রেমের ব্যাপারে বেশ একটু বেপরোয়া গোছের ।

উদ্ধত আর বড়াই করতে অভ্যস্ত সেমিওন জালিভানভ একবার বলেছিল যে লিজা নাকি তার কাছে আত্মদান করেছে । ভিক্টর যদিও ঠিক বিশ্বাস করেনি কথাটা, তবু লিজাকে তার বড় আকর্ষণীয় আর বাস্ত্বিত বলে মনে হয় । কাল সে জানতে পারবে জালিভানভের কথাটা সত্যি না মিথ্যে ।

‘কাল যদি আসে ও, তাহলে আমি ইতস্তত করব না । যাই হোক, লিজা চুমো তো খেতে দেয় । আর, সেমিওনটা যদি সত্যিকথাই বলে থাকে...’ দু’জন পথ-চলতি পেরলিউরা-সৈন্যকে পথ ছেড়ে দেবার জন্য রাস্তাটার পাশে সরে যেতে গিয়ে ভিক্টরের চিন্তায় এইখানে বাধা পড়ল । সৈন্য দু’জনের মধ্যে একজন হাতে একটা ক্যান্সিসের বালতি ঝুলিয়ে চলেছে খাটো-লেজ একটা ঘোড়ায় চেপে—বোঝা যাচ্ছে যে ঘোড়াটাকে জল খাওয়াতে নিয়ে চলেছে সে । খাটো কোর্তা আর ঢিলেঢালা নীল-প্যান্ট-পরা অন্যজন চলেছে ঘোড়সওয়ারের পাশে পাশে তার হাঁটুর উপর হাতটা রেখে একটা মজার গল্প বলতে বলতে ।

এদের যাবার জন্য পথ ছেড়ে দিয়ে ভিক্টর যখন ফের চলতে শুরু করেছে, তখন বড় রাস্তাটার উপরে রাইফেলের গুলির আওয়াজ শুনে খেমে গেল সে । ঘুরে দাঁড়িয়ে দেখতে পেল সওয়ারটি আওয়াজটার দিকে ঘোড়া হাঁকিয়ে দিয়েছে আর তার পেছন-পেছন অন্য লোকটি ছুটে চলেছে তার তলোয়ারটি চেপে ধরে ।

ভিক্টর ছুটল ওদের পেছনে । বড় রাস্তাটার উপরে যখন সে প্রায় পৌছে গেছে, তখন আরেকটা গুলির আওয়াজ ভেসে এল, আর পাগলের মতো ঘোড়া ছুটিয়ে মোড়ে বাক নিয়ে এগিয়ে এল ঘোড়সওয়ার-সৈন্যটি । ঘোড়াটিকে আরও জোরে দৌড়ানোর জন্য পা দিয়ে খোঁচা মেরে আর বালতি দিয়ে আঘাত করে সে প্রথম দেউড়িটার কাছে এসে ভিতরে ঢুকেই আঙিনায় লোকগুলোর দিকে হাঁক পাড়ল, ‘শিগগির, হাতিয়ার নিয়ে ছুটে এসো! আমাদের একজনকে মেরে ফেলেছে ওরা!’

এক মিনিটের মধ্যে জনকতক লোক তাদের রাইফেলের বন্দুর ভাঁজ খোলার খটাখট আওয়াজ তুলে ছুটে বেরিয়ে এল আঙিনাটা থেকে ।

ভিক্তরকে গ্রেপ্তার করা হল ।

ততক্ষণে কিছুলোক জড়ো হয়ে গিয়েছিল রাস্তার উপরে—তাদের মধ্যে ছিল লিজাও । লিজাকে আটকানো হয়েছিল সাক্ষ্য দেবার জন্য ।

ভয়ে লিজার পাদুটো যেন আটকে গিয়েছিল ঘটনার জায়গাটায় । ঝুখরাই আর করচাগিন তার পাশ দিয়ে ছুটে বেরিয়ে গেল । অবাক হয়ে লিজা দেখল যে—ছেলেটি পেথলিউরা-সৈন্যটাকে আক্রমণ করেছিল, তাকেই যে তোনিয়া সেদিন তার সঙ্গে আলাপ করিয়ে দিতে চেয়েছিল ।

ঝুখরাই আর পাভেল একজনের পেছনে আরেকজন বেড়া ডিঙিয়ে একটা বাগানের মধ্যে ঢুকেছে, এমন সময়ে সওয়ার-সৈন্যটি এসে পড়ল বড় রাস্তায় ঘোড়া হাঁকিয়ে । ঝুখরাইকে রাইফেলটা নিয়ে পালিয়ে যেতে দেখে আর মার খেয়ে বেসামাল সৈন্যটাকে উঠে দাঁড়াবার চেষ্টা করতে দেখে সওয়ারটি তার ঘোড়া হাঁকাল বেড়াটার দিকে ।

ঘুরে দাঁড়িয়ে ঝুখরাই রাইফেলটা তুলে গুলি ছুড়ল ধাওয়া-করে-আসা সওয়ারটার দিকে । ঘুরে গিয়ে তাড়াতাড়ি হটে এল লোকটা ।

পেথলিউরা-সৈন্যটার এমন ভীষণভাবে ঠোঁট কেটে গেছে যে প্রায় কথা বলতে পারছে না সে । কোনোক্রমে সে এতক্ষণে ঘটনাটার বিবরণ দিল ।

‘নিরেট আহত্বক কোথাকার! গ্রেপ্তার-করা একটা লোক কিনা নাকের নিচ দিয়ে বেরিয়ে গেল, আর ভূমি দিব্যি সেটা হতে দিলে? যাও এখন পাছায় পঁচিশ ঘা খাও গে ।’

ক্রুদ্ধ সৈন্যটি খিচিয়ে উঠল, ‘খুব-যে ওস্তাদি মারছ দেখছি । নাকের নিচ দিয়ে বেরিয়ে গেল, না? ওই-যে আরেকটা বেজন্মা আমার ঘাড়ের উপর খ্যাপার মতো লাফিয়ে পড়ল—সেটা আমি আগে থেকে জানব কী করে?’

লিজাকেও জেরা করা হল । পেথলিউরা-সৈন্যটি যা বলেছিল সেও তাই বলল; কিন্তু যে-ছেলেটি তাকে আক্রমণ করেছিল সেই ছেলেটিকে—যে সে চেনে, সে-কথাটা লিজা চেপে গেল । তারপরে তাদের সবাইকে কম্যান্ড্যান্টের দপ্তরে নিয়ে আসা হল এবং সন্দের আগে কাউকে ছাড়া হল না ।

কম্যান্ড্যান্ট নিজে সঙ্গে গিয়ে লিজাকে বাড়ি পৌছে দিয়ে আসতে চাইল, কিন্তু রাজি হল না লিজা—লোকটার মুখে ভোদকার গন্ধ এবং তার এই প্রস্তাবটার উদ্দেশ্য মোটেই ভালো বলে ঠেকল না ।

ভিক্তর চলল লিজার সঙ্গে তাকে বাড়ি পৌছে দেবার জন্য ।

স্টেশনের পথটা বেশ দূর এবং দু’জনে হাত-খরাখরি করে যাবার সময় ওই ঘটনাটা ঘটানো জন্য ভিক্তর মনে-মনে কৃতজ্ঞ বোধ করল ।

বাড়ির কাছাকাছি এসে লিজা জিজ্ঞেস করল, ‘গ্রেপ্তার-করা লোকটাকে খালাস করে দিল কে, সেটা নিশ্চয়ই আন্দাজ করতে পারছেন না, না?’

‘মোটাই না, কী করে আন্দাজ করব?’

‘সেদিন সন্ধ্যায় তোনিয়া একটি ছেলেকে আমাদের সঙ্গে আলাপ করিয়ে দিতে চেয়েছিল, মনে আছে?’

‘খেমে গেল ভিক্টর, বিশ্বয়ের সঙ্গে জিজ্ঞেস করল, ‘পাভেল করচাগিন?’

‘হ্যাঁ, নামটা করচাগিন বলেই তো মনে হচ্ছে। কীরকম অদ্ভুত ঢঙে বেরিয়ে গিয়েছিল, মনে আছে? সেই ছেলেটা।’

বিশ্বয়ে নির্বাক হয়ে গেল ভিক্টর।

‘ঠিক দেখেছেন আপনি?’

‘নিশ্চয়, ঠিক মনে আছে আমার গুর মুখখানা।’

‘কম্যান্ড্যান্টকে কথাটা বললেন না কেন?’

অত্যন্ত বিরক্ত হয়ে উঠল লিজা, ‘এমন জঘন্য কাজ আমি করব ভেবেছেন নাকি?’

‘জঘন্য? সৈন্যটার উপর কে হামলা চালিয়েছিল সেটা বলা কি জঘন্য কাজ হল?’

‘তা নয়তো কী, সেটাকে আপনি মনে করেন খুব একটা সম্মানের কাজ? ওরা যে কী অত্যাচারটা চালাচ্ছে সেটা ভুলে যাচ্ছেন? ইস্কুল-বাড়িতে কতকগুলো অনাথ ইহুদি বান্ধাকান্ধা রয়েছে, তার কোনো ধারণা আছে আপনার? আর আপনি চান আমি কিনা করচাগিনকে ধরিয়ে দেব ওদের কাছে? সত্যি, আপনি এরকম কথা বলবেন বলে আমি ভাবতে পারিনি।’

লেন্চিনস্কি এমন জবাব প্রত্যাশা করেনি। কিন্তু লিজার সঙ্গে ঝগড়া বাধালে তার চলবে না, তাই সে আলোচনাটা পাল্টে নেবার চেষ্টা করল, ‘চটছেন কেন লিজা, আমি এই একটু ঠাট্টা করছিলাম আর-কী। আপনি যে এমন নীতিনিষ্ঠ মেয়ে তা জানতাম না।’

‘ঠাট্টাটা আপনার বড় বিশ্রী,’ শুকনো গলায় পাল্টা জবাব দিল লিজা।

সুখারুকোদের বাড়ির সামনে লিজার কাছে বিদায় নেবার সময় ভিক্টর জিজ্ঞেস করল, ‘তাহলে কাল আসবেন তো, লিজা?’

অনির্দিষ্টভাবে লিজা বলল, ‘ঠিক বলতে পারছি না, দেখি....’

শহরমুখো ফিরে যেতে-যেতে ভিক্টর সমস্ত ব্যাপারটা মনে-মনে একবার ভেবে দেখল, ‘তা বেশ তো, সুন্দরী, তুমি হয়তো কাজটাকে জঘন্য মনে করতে পারো, কিন্তু আমার ধারণাটা একেবারেই অন্যরকম। অবশ্য, কে কাকে কার হাত থাকে ছাড়িয়ে নিল—তাতে আমার কিছু এসে যায় না।’

লেন্চিনস্কিরা পোল্যান্ডের প্রাচীন বনেদি পরিবার। সুতরাং সেই হিশেবে ভিক্টরের কাছে উভয়পক্ষই সমান ঘৃণ্য। একমাত্র যে-সরকারকে সে স্বীকার করে, সেটা পোলিশ অভিজাতদের সরকার—‘রাজকীয় পোলিশ সরকার’—এবং সেটা শিগগিরই এদেশে কায়েম হবে পোলিশ-বাহিনী এসে পড়ার সঙ্গে সঙ্গে। কিন্তু ওই হারামজাদা করচাগিনটাকে শেষ করে দেবার এই একটা সুযোগ। ওরা নির্ধাত গুর ঘাড়টা ধরে মটকে দেবে।

তার পরিবারের লোকজনের মধ্যে একমাত্র ভিক্টরই শহরে থেকে গেছে। চিনি-কারখানার সহকারী-পরিচালকের সঙ্গে তার এক পিসিমার বিয়ে হয়েছে, তার সঙ্গেই সে আছে। তার পরিবারের আর-সবাই আছে ওয়ারশয়ে—সেখানে তার বাবা সিগিজমুন্ড লেন্চিনস্কি একজন পদস্থ কর্মকর্তা।

কম্যান্ড্যান্টের দপ্তরে এসে ভিক্টর খোলা-দরজাটা দিয়ে ভেতরে ঢুকে গেল।

কিছুক্ষণের মধ্যেই দেখা গেল, সে চারজন পেথলিউরা-সৈন্যের সঙ্গে চলেছে করচাগিনদের বাড়িমুখে।

ভেতরে আলো-জ্বালা একটা ঘরের জানলার দিকে আঙুল দিয়ে দেখিয়ে নিচুগলায় বলল ভিক্টর, 'ওই বাড়িটা। আমি এবার যেতে পারি তাহলে?' খোঁকজিকে জিজ্ঞেস করল সে।

'নিশ্চয়। বাকিটা আমরাই ব্যবস্থা করব। খবরটা দেবার জন্যে ধন্যবাদ।'।

ফুটপাথ বেয়ে তাড়াতাড়ি পা চালান ভিক্টর।

\*

\*

\*

পিঠের উপর শেষ আঘাতটা পড়তেই পাভেল হুমড়ি খেয়ে পড়ল অন্ধকার ঘরটার মধ্যে যেখানে তাকে নিয়ে আসা হয়েছে। ছড়িয়ে-পড়া হাতদুটো তার সামনের দেয়ালের গায়ে ঠুকে গেল। হাতড়াতে হাতড়াতে সে দেয়ালের সঙ্গে আটকানো তক্তাটা পেয়ে তার উপর উঠে বসল। সর্বাস্ত তার ক্ষতবিক্ষত, ব্যথায় টনটন করছে সমস্ত শরীর, মনটাও দমে গেছে।

সম্পূর্ণ অপ্রত্যাশিতভাবে সে ঝেঁগার হয়েছে। পেথলিউরার লোকে তার কথা জানল কী করে? কেউ-যে তাকে দেখেনি, এ-সম্বন্ধে তার কোনো সংশয় ছিল না। কী হবে এর পর? বুখরাই-ই বা কোথায়?

বুখরাই ক্রিমকাদের বাড়ি গিয়ে ওঠার পর পাভেল সেখান থেকে চলে আসে সেগেইদের বাড়ি। শহর ছেড়ে সরে পড়বার জন্য বুখরাই ক্রিমকাদের ওখানে সঙ্গে পর্যন্ত অপেক্ষা করতে থাকল।

'কাকের বাসায় পিস্তলটা লুকিয়ে রেখে ভালোই করেছিলাম', ভাবল পাভেল, 'ওটা এদের হাতে পড়লে আর কোনো আশাই ছিল না। কিন্তু আমাকে ধরতে পারল কী করে এরা?' উত্তর না-পাওয়ায় প্রশ্নটা যেন যন্ত্রণা দিতে থাকল তাকে।

পেথলিউরার লোকজন খুঁটিয়ে খানাতত্বাশি করা সত্ত্বেও করচাগিনদের বাড়িতে বিশেষ কিছু পায়নি। আরতিওম তার পোশাক আর অ্যাকর্ডিয়ন-বাজনাটা নিয়ে গেছে গ্রামে যেখানে সে থাকে। মা সঙ্গে করে নিয়ে গেছে তার বাস্র। সুতরাং এদের লুট করে নিয়ে আসার মতো ছিল না কিছুই।

কিন্তু বাড়ি থেকে এই থানায় আসার অভিজ্ঞতাটা পাভেল জীবনে ভুলবে না; নিবিড় অন্ধকার রাত্রি, মেঘে-ঢাকা আকাশ, তারই মধ্যে দিয়ে চারদিক থেকে প্রচণ্ড ঘুসি আর লাথি খেতে-খেতে অন্ধভাবে আধা-মূর্ছিত পাভেল হাঁচট খেয়ে-খেয়ে পথ চলেছে।

দরজাটার ওপাশের ঘরে যেখানে কম্যাভ্যান্টের সাক্তীরা রয়েছে, সেখান থেকে গলার আওয়াজ ভেসে আসছে। দরজাটার নিচের ফাঁকে একটা উজ্জ্বল আলোর রেখা। পাভেল দাঁড়িয়ে উঠে দেয়াল হাতড়াতে হাতড়াতে ঘরটার চারিদিকে একবার হেঁটে এল। দেয়ালে আটকানো তক্তাটার উল্টোদিকে ভারী গরাদে বসানো একটা জানলা আবিষ্কার করল পাভেল। হাতে ধরে সেগুলোকে পরখ করল সে, শক্তভাবে আটকানো গরাদগুলো। স্পষ্টই বোঝা যাচ্ছে, আগে এটা একটা ভাঁড়ারঘর ছিল।

দরজাটার কাছে এগিয়ে এসে পাভেল একমুহূর্ত কান পেতে শুনল, তারপর হাতলটায় আস্তে একটু চাপ দিল।

‘শালা, হারামজাদা!’ দরজাটা তীব্র একটা ক্যাচক্যাচ শব্দ করে উঠতেই গাল পাড়ল সে।

দরজাটা সামান্য খুললে সামনের সবু ফাঁকটা দিয়ে দেখতে পেল একজোড়া কড়া-পরা পায়ের বাঁকা-বাঁকা আঙুলগুলো বেরিয়ে আছে দেয়ালে আটকানো তক্তাটার প্রান্ত থেকে। আরেকবার হালকাভাবে ঠেলা দিতেই দরজাটা আরও জোরে ক্যাচক্যাচ শব্দে প্রতিবাদ জানাল। সঙ্গে সঙ্গে তক্তাটায় উঠে বসল আলুথালু চেহারার ঘুমে ভারী-মুখ একটা লোক—উকুনে-ভরা মাথাটা তার পাঁচ-আঙুলে ভীষণ জোরে চুলকোতে চুলকোতে অনেকক্ষণ ধরে লম্বা একচোট গালাগালিতে ফেটে পড়ল লোকটা। অশ্লীল গালাগালিটা শেষ হবার পর শোবার জায়গাটার পাশ থেকে রাইফেলটা টেনে নিয়ে নীরস গলায় সেই জীবটা বলল, ‘বন্ধ করে দে দরজাটা, ফের যদি এদিকে উঁকি মারতে দেখি, তাহলে খেঁতলে দেব তোর ওই...’

দরজাটা বন্ধ করে দিল পাভেল। পাশের ঘরে একদমক হাসির হল্লা উঠল।

সারারাত্রি ধরে প্রচুর ভাবল পাভেল। প্রথমবারের লড়াইয়ে পড়ার ফলটা তার বিরুদ্ধেই গেল। পয়লা চোটেই ধরা পড়ে গেছে সে, ইঁদুরের মতো সে এখন ফাঁদে আটকা।

বসে থাকতে থাকতেই একটা অস্থির আধা-ঘুমের ভাব তাকে আচ্ছন্ন করল—বারে বারে ভেঙে যাচ্ছে ঘুমটা—তারই মধ্যে ভেসে ভেসে উঠছে মায়ের রোগা, চামড়া-কুঁচকে-যাওয়া মুখখানা, আর সেই চোখদুটি যা সে এত ভালোবাসে। ‘মা যে এখানে নেই, সেটা ভালোই হয়েছে—থাকলে আরও বেশি দুঃখ পেত।’

জানলা দিয়ে একটা ধূসর চৌকোনা আলো এসে পড়ল মেঝের উপর।

অন্ধকার ক্রমশই কেটে যাচ্ছে। ভোর হয়ে আসছে।

## ষষ্ঠ অধ্যায়

বিরাট পুরনো বাড়িটার শুধু একটা জানলা দিয়ে ভেতরের আলো দেখা যাচ্ছে। পর্দাগুলো টানা। হঠাৎ বাইরে শিকলে-বেঁধে-দেওয়া ট্রেসরের গম্ভীরগলার ঘেউঘেউ ডাক প্রতিধ্বনিত হতে থাকল। একটা কিমন্ত ভাবের মধ্যে দিয়ে তোনिया শুনতে পেল মা নিচুগলায় বলছেন, ‘না, ও ঘুমোয়নি এখনও। ভেতরে এসো, লিজ্জা।’

বান্ধবীর হালকা পায়ের শব্দে আর তার হঠাৎ উষ্ণ আলিঙ্গনে তোনियার কিমন্ত ভাবটা শেষপর্যন্ত কেটে গেল।

মান হাসি হাসল সে, ‘ভারি খুশি হলাম লিজ্জা তোর আসাতে। বাবার অসুখের সঙ্কটটা কাল কেটে গেছে, আজ তিনি সারাদিন দিব্যি ঘুমোচ্ছেন। মা আর আমিও পর পর কয়েক রাত্রি জাগার পর খানিকটা বিশ্রাম পেয়েছি। কী খবর-টবর সব বল।’ কৌচটার উপর তার পাশে তোনিয়া তার বান্ধবীকে টেনে নিল।

‘খবর তো অনেক আছে। তবে, কতকগুলো খবর শুধু তোকেই বলার মতো।’ দুইমিডরা চাউনিতে লিজা তাকাল তোনিয়ার মা ইয়েকাতোরিনা মিখাইলভনার দিকে।

তিনি হাসলেন। ছত্রিশ বছর বয়সী গিনিবান্নি মানুষ তিনি—তরুণীর মতো চঞ্চল তাঁর চলাফেরা, বুদ্ধিভরা ধূসর চোখ, সুন্দরী না হলেও মুখে একটা মিষ্টি ভাব আছে।

কৌচটার কাছে একটা চেয়ার টেনে নিয়ে তিনি কৌতুক করে বললেন, ‘বেশ তো, এক্ষুনি চলে যাচ্ছি আমি, কিন্তু তার আগে সবাইকে বলার মতো খবরগুলো একটু শুনে নিই।’

‘আচ্ছা। এক নম্বর খবর : আমাদের ইঙ্কুলের পড়া শেষ হল এবার। সপ্তম শ্রেণীর ছাত্রছাত্রীদের পাস করে বেরনোর সার্টিফিকেট দেওয়া হবে বলে ইঙ্কুলের পরিচালকমণ্ডলী ঠিক করেছেন। ভারি ভালো লাগছে আমার। এইসব বীজগণিত আর জ্যামিতি দেখলেই গায়ে জ্বর আসে! ওসব পড়ে কার যে কী লাভ হয়? ছেলেদের হয়তো আরও বেশিদূর পর্যন্ত পড়াশোনা চালিয়ে যাওয়া সম্ভব—যদিও চারিদিকে এই-যে লড়াই-টড়াই চলছে এর মধ্যে ওরাও জানে না যে কোথায় সেটা করা যেতে পারে। সত্যি, বড় সাংঘাতিক ব্যাপার... আমাদের কথা ধরতে গেলে—আমাদের তো বিয়েই হয়ে যাবে, বউ-মানুষদের আর বীজগণিতের দরকারটা কী’, হেসে উঠল লিজা।

এদের সঙ্গে একটুক্কণ বসার পর ইয়েকাতোরিনা মিখাইলভনা নিজের ঘরে চলে গেলেন।

লিজা এবার তোনিয়ার আরও কাছে ঘেঁষে বসে তাকে জড়িয়ে ধরে চৌরাস্তার ঘটনার কথাটা ফিসফিসিয়ে বলল, ‘তোনিয়া, ওই দৌড়ে পালিয়ে যাওয়া ছেলেটাকে চিনতে পেরে কী আশ্চর্য যে হয়েছিলাম! কে, আন্দাজ কর তো?’

আগ্রহের সঙ্গে শুনছিল তোনিয়া, কাঁধ-ঝাঁকুনি দিল সে!

কিছুক্ষণ নিশ্বাস চেপে রেখে এক দমকে বলে ফেলল লিজা, ‘করচাগিন!’

চমকে উঠে জুকুটি করল তোনিয়া, ‘করচাগিন?’

তোনিয়াকে আশ্চর্য করে দিতে পেরেছে দেখে খুশি হয়ে লিজা তার সঙ্গে ভিক্তরের ঝগড়ার প্রসঙ্গের অবতারণা করল।

গল্প বলায় মশগুল লিজা লক্ষই করেনি যে বিবর্ণ হয়ে উঠেছে তোনিয়ার মুখ আর তার আঙুলগুলো স্নায়বিক উত্তেজনায় নীল ব্লাউজের কাপড়টা দলা পাকিয়ে পাকিয়ে ধরছে। লিজা জানে না কী গভীর উদ্বেগ জমে উঠেছে তোনিয়ার মনে, তার সুন্দর চোখের দীর্ঘ পল্লবগুলো অমন কেঁপে-কেঁপে উঠছে তাও সে লক্ষ করল না।

মাতাল খোকাঞ্জিটা সম্বন্ধে গল্পটা বলে চলেছে লিজা—কিন্তু তোনিয়ার সেদিকে মোটেই কান নেই। একটা ভাবনায় সে অস্থির : ‘তাহলে ভিক্তর লেচিনস্কি জানে কে ওই পেথলিউরা-সৈন্যটাকে আক্রমণ করেছিল। উহ্, কেন লিজা কথাটা বলতে গেল তাকে?’ এবং নিজের অজান্তেই কথাটা বেরিয়ে গেল তার মুখ দিয়ে।

লিজা হঠাৎ তার কথার মানোটা ধরতে না-পেরে বলল, ‘কী বলছিলি?’

‘ভিক্তরকে বলতে গেলি কেন তুই পাভ্লুশার...এই, মানে, করচাগিনের কথাটা? ও নিশ্চয় ধরিয়ে দেবে তাকে...’











‘কক্ষনো না!’ প্রতিবাদ করল লিজা, ‘ভিক্টর এরকম কাজ করবে বলে আমার মনে হয় না। কেনই বা করতে যাবে সে এমন কাজ?’

তোনিয়া হঠাৎ উঠে বসে উত্তেজনায় সজোরে হাঁটুদুটো চেপে ধরল, ‘তুই বুঝতে পারছিস না লিজা! ভিক্টর আর পাভেলের মধ্যে ভীষণ ঝগড়া, তাহাড়া আরও কারণ আছে...ভিক্টরকে পাভলুশার কথা বলে তুই মন্তবড় ভুল করেছিস।’

এতক্ষণে তোনিয়ার উত্তেজনাটা লক্ষ করল লিজা। তোনিয়া-যে করচাগিনকে ‘পাভলুশা’ বলে উল্লেখ করেছে এটা লক্ষ্য করে এতদিন পর্যন্ত লিজা যে-কথাটা আবছাভাবে আন্দাজ করেছিল, সেটার দিকে হঠাৎ তার চোখ খুলে গেল যেন।

নিজেকে খানিকটা অপরাধী না মনে করে সে পারল না। একটু অস্বস্তিবোধ করে চুপ করে গেল। মনে মনে ভাবল, ‘তাহলে যা ভেবেছি তাই। আশ্চর্য! তোনিয়া কিনা শ্রেমে পড়েছে একটা... একজন সাধারণ মজুর-ছেলের সঙ্গে।’ কথাটা নিয়ে তোনিয়ার সঙ্গে আলোচনা করার ভারি ইচ্ছে হল লিজার, কিন্তু সৌজন্যের জন্য সে সামলে নিল নিজেকে। অন্যায়ের চেতনাটা খানিকটা হালকা করার জন্য সে তোনিয়ার হাতদুটো চেপে ধরল, ‘ভয়ানক ভাবনা হচ্ছে তো, তোনিয়া?’

অন্যমনস্কভাবে উত্তর দিল তোনিয়া, ‘না....হয়তো ভিক্টর সম্বন্ধে আমি যতটা ভেবেছি, ততটা বেইমান সে হয়তো নয়।’

একটা অস্বস্তিকর নিস্তব্ধতা নেমে এসেছিল—সেটা ভেঙে গেল ওদের ইকুলের দেমিয়ানভ নামে লাজুক আর আনাড়ি ধরনের একজন সহপাঠী এসে পড়াতে।

বিদায়ী বন্ধুদের এগিয়ে দেবার পর তোনিয়া বাগানের ফটকটায় ঠেস দিয়ে অনেকক্ষণ দাঁড়িয়ে রইল শহরমুখো অন্ধকার রাস্তাটার দিকে একদৃষ্টে তাকিয়ে। বসন্তকালের ভিজ়ে মাটির সৌন্দ-গন্ধে-ভরা বাতাস ঠাণ্ডা হাওয়া দিয়ে গেল তোনিয়ার মুখে। দূরে শহরের বাড়িগুলোর জ্ঞানলায় আবছা ছমছমে লাল আলো মিটমিট করছে। ওখানে ওই শহরের জীবন তার জীবনযাত্রা থেকে ভিন্ন রকমের। ওখানকার কোথাও কোনো-একটা বাড়িতে রয়েছে তার বিদ্রোহী বন্ধু পাভেল, যে তার আসন্ন বিপদের কথাটা কিছুমাত্র জানে না। বোধহয় সে ভুলে গেছে তোনিয়াকে—তাদের শেষ দেখা হবার পর কতদিন কেটে গেছে? সেবার পাভেলই অন্যায় করেছিল, কিন্তু সেসব অনেকদিন আগেই ভুলে গেছে তোনিয়া। আগামীকাল তার সঙ্গে দেখা করবে তোনিয়া, তাহলেই আবার তাদের বন্ধুত্ব গড়ে উঠবে—সুদৃঢ়, অন্তরঙ্গ বন্ধুত্ব। তাদের মধ্যে যে আবার নিশ্চয় বন্ধুত্ব গড়ে উঠবে সে-সম্বন্ধে তোনিয়ার মনে বিন্দুমাত্র সন্দেহ নেই। শুধু যদি আজকের এই রাতটার মধ্যেই পাভেলের কোনো বিপদ না ঘটে! যেন অশুভ সংকেতে ভরা এই রাত্রিটা বুঝি পাভেলের জন্য ওৎ পেতে আছে...

তোনিয়া একবার শিউরে উঠল; রাস্তাটার দিকে শেষবারের মতো একবার তাকিয়ে সে ভেতরে এল। বিছানায় শুয়ে ঘুমিয়ে পড়ার সময়েও তার মাথার মধ্যে চিন্তাটা ঘেরাফেরা করতে লাগল, ‘শুধু যদি আজকের এই রাত্তিরটা পাভেলের ভালোয় ভালোয় কেটে যায়!’

আর কেউ জেগে-ওঠার আগেই ভোরে ঘুম ভাঙল তোনিয়ার, তাড়াতাড়ি পোশাক পরে নিল সে। বাড়ির আর কেউ যাতে জেগে না যায় তার জন্য নিঃশব্দে বেরিয়ে এল তোনিয়া, বিরাট লোমশ ট্রেসরকে শিকল থেকে খুলে নিয়ে শহরমুখো রওনা দিল কুকুরটাকে সঙ্গে নিয়ে। করচাগিনদের বাড়ির সামনেটায় এসে সে একমুহূর্ত ইতস্তত করল, তারপরে বেড়ার দরজাটা ঠেলে খুলে ভেতরে আঙিনায় এসে পড়ল। লেজ নাড়তে নাড়তে ছুটে এগুল ট্রেসর...

সেইদিন ভোরেই আরতিগুম ফিরে এসেছে গ্রাম থেকে। যে-কামারটির সঙ্গে সে কাজ করছিল, সেই তাকে তার ঘোড়ার গাড়িতে করে পৌঁছে দিয়ে গেছে শহরে। বাড়ি পৌঁছিয়ে রোজগার-করা ময়দার বস্তাটা কাঁধে ফেলে সে আঙিনায় ঢুকেছে—পেছনে তার অন্য জিনিশপত্তর বয়ে নিয়ে আসছে কামারটি। খোলা দরজাটার সামনে বস্তাটা নামিয়ে রেখে আরতিগুম ডাক দিল, ‘পাভ্কা!’

কোনো উত্তর নেই।

এগিয়ে আসতে আসতে কামারটি বলল, ‘ব্যাপারখানা কী? ভেতরে ঢোকোই না?’ রান্নাঘরে তার জিনিশপত্রগুলো রেখে আরতিগুম ঢুকল পাশের ঘরটায়। এ-ঘরের দৃশ্য যেটা তার চোখে পড়ল, তাতে সে একেবারে হতবাক হয়ে গেল : সম্পূর্ণ ওলটপালট হয়ে আছে জায়গাটা, পুরনো কাপড়চোপড় ছিটিয়ে পড়ে আছে মেঝের উপর।

কিছুই মাথায় ঢুকছে না আরতিগুমের। কামারের দিকে ঘাড় ফিরিয়ে বিড়বিড় করে শুধু বলল, ‘ব্যাপারখানা কী?’

তার সঙ্গে সায় দিয়ে কামারটি বলল, ‘হ্যাঁ, গুগোলের ব্যাপারই বটে।’

‘ছেলেটা গেল কোথায়?’ চটে উঠছিল আরতিগুম।

কিন্তু ফাঁকা বাড়িটায় কেউ নেই তার কথার জবাব দেবার।

বিদায় নিয়ে চলে গেল কামারটি।

আঙিনায় এসে চারিদিকে তাকিয়ে দেখল আরতিগুম, ‘মাথায়ও কিছুই তো বুঝতে পারছি না! দরজাগুলো সব হাঁ করে খোলা, এদিকে পাভ্কা নেই।’

তারপরে আরতিগুম তার পেছনে পায়ের শব্দ শুনতে পেল, ঘুরে দাঁড়িয়ে দেখে বিরাট একটা কুকুর তার সামনে কানদুটো খাড়া করে দাঁড়িয়ে। ফটকের দিক থেকে একটি অচেনা মেয়ে বাড়িটার দিকে আসছে। আরতিগুমকে আপাদমস্তক দেখে সে মৃদুস্বরে বলল, ‘আমি একবার পাভেল করচাগিনের সঙ্গে দেখা করতে চাই।’

‘আমিও তো তার সঙ্গে দেখা করতে চাই। কিন্তু কোথায় যে সে গেছে শয়তানই জানে! বাড়িতে পৌঁছে দেখি ঘরদোর সব খোলা, পাভ্কার দেখা নেই কোথাও। আপনিও তাহলে ওর খোঁজেই এসেছেন?’

উত্তরে একটা প্রশ্ন করল মেয়েটি, ‘আপনি কি তার ভাই আরতিগুম?’

‘হ্যাঁ, কেন?’

উত্তর না দিয়ে মেয়েটি শঙ্কিত-চোখে তাকিয়ে রইল খোলা দরজাটার দিকে। মনে মনে ভাবল সে : ‘কেন আমি কাল রাত্রেই এলাম না? না, এ হতে পারে না, হতেই পারে না....’ বুঝানো আরও ভারী হয়ে উঠল তার।

আরতিওম তার দিকে অবাক হয়ে তাকিয়ে ছিল, মেয়েটা জিজ্ঞেস করল তাকে, 'আপনি এসে দেখেছেন দরজা খোলা আর পাভেল নেই?'

'কিন্তু পাভেলের সঙ্গে আপনার কী দরকার সেটা জানতে পারি?'

তোনিয়া তার কাছে এসে চারিদিকে একনজর তাকিয়ে নিয়ে থেমে-থেমে বলল, 'ঠিক বলতে পারছি না, তবে পাভেলকে যদি আপনি বাড়িতে না-দেখে থাকেন, তাহলে ও নিশ্চয় ঘেঁটার হয়েছে।'

চমকে উঠল আরতিওম, 'ঘেঁটার হয়েছে? কেন?'

'চলুন ভেতরে যাই', বলল তোনিয়া।

সে যা জানে সব বলল, নিঃশব্দে গুনে গেল আরতিওম। সব শোনার পর হতাশায় ভরে উঠল তার মন। বিষণ্ণভাবে বিড়বিড়িয়ে বলল, 'ধুস্তোরি ছাই! এত বিপদের পরেও যেন এই গণ্ডগোলটা আর না-বাধালে চলছিল না। এখন বুঝতে পারছি, বাড়িটা কেন তছনছ হয়ে আছে। ছেলেটা আবার এর মধ্যে জড়িয়ে পড়তে গেল কেন?...কোথায় এখন ঝুঁজতে যাব ওকে? আচ্ছা, আপনি কে?'

'আমার বাবা প্রধান বনপরিদর্শক তুমানভ। আমি পাভেলের একজন বন্ধু।'

'ও', অন্যমনস্কভাবে বলল আরতিওম, 'আমি এদিকে ছেলেটাকে খাওয়াবার জন্যে ময়দা-টয়দা নিয়ে এলাম, আর এসে দেখি এই...'

তোনিয়া আর আরতিওম দু'জনা দু'জনের দিকে নিঃশব্দে তাকিয়ে রইল।

'আমি এবার যাই,' আরতিওমের কাছ থেকে বিদায় নিয়ে আস্তে বলল তোনিয়া, 'আপনি বোধহয় ঝুঁজে পাবেন ওকে। সন্ধ্যায় একবার আসব 'খন। আপনার কাছ থেকে শোনা যাবে, কী হল।'

আরতিওম তার দিকে একবার নিঃশব্দে মাথা নাড়ল।

\*

\*

\*

শীতকালের দীর্ঘ ঘুম থেকে জেগে-ওঠা একটা রোগা মাছি জানলাটার এককোণে গুনগুন করছিল। পুরনো ছেঁড়াখোঁড়া কৌচটার একধারে বসে আছে অল্পবয়সী একটি চাষী-মেয়ে—কনুইদুটো তার হাঁটুর উপর রাখা, নোংরা মেঝেটার দিকে স্থির শূন্যদৃষ্টিতে তাকিয়ে আছে।

মুখের এককোণে আটকানো একটা সিগারেট চেপে ধরে কম্যান্ড্যান্ট কাগজের উপর একটা টান দিয়ে লেখাটা শেষ করল। স্পষ্টই বোঝা গেল যে এটা লিখে নিজের উপর খুলি হয়ে উঠেছে। কাগজটার যেখানে লেখা আছে 'শেপেতোভ্কা শহরের কম্যান্ড্যান্ট, খোব্রজি' তার নিচে জাঁকালো রকমের একটা সই বসাল সে নামের শেষে একটা প্যাচালো টান দিয়ে। দরজার দিক থেকে জুতোর নালের শব্দ গুনে কম্যান্ড্যান্ট তাকিয়ে দেখল।

সামনে দাঁড়িয়ে সালোমিগা—হাতে তার ব্যান্ডেজ বাঁধা।

কম্যান্ড্যান্ট তাকে অভ্যর্থনা জানাল, 'কি হে! কোথেকে উড়ে এলে হে?'

‘দখিনা বাতাসে নয়তো বটেই। হাড় পর্যন্ত হাতটা কেটে দিয়েছে একটা বোম্বনেস্।\* মেয়েটা যে বসে আছে, সেটা সম্পূর্ণ উপেক্ষা করে সালোমিগা অশ্লীল গাল পাড়ল।

‘তাহলে, এখানে কী করতে এসেছ? চোটের বেদনা সারাতে?’

‘বেদনা সারাবার সময় পাব পরলোকে। যুদ্ধসীমান্তে ওদিকে আমাদের দাঙ্গা চোপে আসছে ওরা।’

মাথা নেড়ে মেয়েটাকে ইশারায় দেখিয়ে সালোমিগাকে বাধা দিল কম্যাভ্যান্ট, ‘ওসব কথা পরে হবে এখন।’

একটা টুলের উপর ধূপ করে বসে পড়ল সালোমিগা, ‘ইউক্রেনীয় জাতীয় প্রজাতন্ত্রের’ চিহ্ন এনামেলের ত্রিশূলের চূড়া লাগানো টুপিটা খুলে ফেলল সে। খাটো গলায় বলল, ‘গোলুব পাঠিয়েছেন আমাকে। সৈন্যদের একটা বাহিনী এখানে আসবে শিগগিরই। সাধারণভাবে শহরে বেশ একটু কাণ্ডকারখানা হবে বলে মনে হচ্ছে। আমার কাজ হচ্ছে অবস্থাটা গোছগাছ করে আনা। প্রধান আতামান স্বয়ং আসতে পারেন বিদেশী হোমরাচোমরাদের নিয়ে—সুতরাং ওইসব ইহুদি-ঠ্যাঙানো ‘আমোদ-প্রমোদের’ কথাটথা যেন কেউ না-তোলে। কী লিখছিলে তুমি?’

কম্যাভ্যান্ট তার মুখের অন্যকোণে সরিয়ে নিল সিগারেটটা, ‘অতি বেয়াড়া এক ছোঁড়ার পাল্লায় পড়েছি এদিকে। সেই ঝুঝুরাই লোকটাকে মনে আছে? সেই যে, রেলওয়ের লোকজনদের উস্কে তুলেছিল আমাদের বিরুদ্ধে। লোকটাকে ধরা হয়েছিল স্টেশনে।’

‘ধরা হয়েছিল, আচ্ছা? তারপর?’ গভীর আশ্রয়ের সঙ্গে সালোমিগা তার টুলটা আরও কাছাকাছি টেনে নিল।

‘তারপরে, স্টেশন-কম্যাভ্যান্ট ওই নিরেট মুখ্য ওমেল্চেঙ্কোটা তাকে একটা কসাকের পাহারায় পাঠিয়ে দিয়েছিল আমাদের কাছে। মাঝপথে এখানে আমার হাতে এই ছোঁড়াটা পরিষ্কার দিনের আলোয় কিনা ছিনিয়ে নিল শ্রেণ্ডার-করা মানুষটাকে। হাতিয়ার কেড়ে নিয়ে দাঁত ভেঙে দিয়েছিল কসাকটার, তারপর পালিয়ে গেছে। ঝুঝুরাই তো পালিয়েছে, কিন্তু এই ছেলেটাকে আমরা ধরতে পেরেছি। এই যে, এই কাগজটায় সব লেখা আছে’, বলে সে একতড়া লেখায় ভর্তি কাগজ সালোমিগার দিকে ঠেলে দিল।

বাঁ-হাতে কাগজগুলো উলটে উলটে সে পড়ে গেল রিপোর্টটা। পড়া শেষ করে কম্যাভ্যান্টের দিকে তাকাল সে, ‘তাহলে, কিছুই বের করতে পারেনি ওর পেট থেকে?’

অস্বস্তির সঙ্গে কম্যাভ্যান্ট তার টুপির কানাটা ধরে টান দিল, ‘আজ পাঁচদিন ওর পেছনে লেগে আছি আমি। শুধুই বলে, ‘আমি কিছু জানি না, আমি লোকটিকে ছাড়াইনি।’ শয়তানের বাচ্চা! পাহারাঅলাটা ওকে চিনতে পেরেছে, বুঝলে?—প্রায় গলাটিপে মেরে ফেলেছিল আর-কী ছেলেটাকে দেখার সঙ্গে সঙ্গেই। কসাকটাকে তো

\* বোম্বনেস্—লাল ফৌজের বোম্বন-সেনাবাহিনীর সৈন্য। সপ্তদশ শতকে ইউক্রেনের জনসাধারণ যে জাতীয় মুক্তিসংগ্রামে নেমেছিল, সেই সংগ্রামের নেতা বোম্বন-এর নামেই লাল ফৌজের একটা বাহিনীর এই নামকরণ।

টেনে ছাড়াতেই পারিনি প্রায়—লোকটার রাগ তো হতেই পারে, কারণ ওমেল্‌চেকো ওদিকে ঠেঁশনে তাকে কয়েদি হাতছাড়া করার জন্যে পঁচিশ ঘা কষিয়েছে। ছেলেটাকে আর রাখার কোনো মানে হয় না—তাই, আমি ওকে খতম করে দেবার অনুমতি চেয়ে এই রিপোর্টটা হেডকোয়ার্টারে পাঠিয়ে দিচ্ছি।’

সালোমিগা তাক্সিলের সঙ্গে থুতু ফেলল, ‘আমার পান্ডায় পড়লে কথা বলত নিশ্চয়। জেরা করার ব্যাপারে তুমি কোনো কর্মের নও। ধর্মতত্ত্বের ছাত্রকে আবার কম্যান্ড্যান্ট হতে কে কবে শুনেছে? তুমি ডাঙার ব্যবস্থাটা চেষ্টা করেছিলে?’

রাগে খেপে গেল কম্যান্ড্যান্ট, ‘একটু বাড়াবাড়ি হয়ে যাচ্ছে তোমার। ওসব নাক সিটকিনি রেখে দাও। আমি এখানকার কম্যান্ড্যান্ট হিসেবে বলছি আমার কাজে নাক গলাতে এসো না।’

সালোমিগা ক্রুদ্ধ কম্যান্ড্যান্টের দিকে চেয়ে চিৎকার করে হেসে উঠল, ‘হাঃ হাঃ হাঃ.... অত ফুলে উঠো না হে পুরুতের পো! শেষে আবার ফেটে যাবে, দেখো! তা, চুলোয় যাও তুমি আর তোমার যতসব সমস্যা। তার চেয়ে বরং বাৎলাও কয়েক বোতল ‘সামোগন’ এনে দিতে পারবে কে।’

হাসল কম্যান্ড্যান্ট, ‘তা পারা যাবে এখন।’

‘আর এই ব্যাপারটায়’, সালোমিগা কাগজের তাড়াটার উপর আঙুল ঠুকে ঠুকে বলল, ‘ছেলেটার স্বথকে ঠিকমতো ব্যবস্থা যদি করতে চাও, তাহলে ওর বয়সটা ষোলো বছরের বদলে আঠারো বছর বলে লেখো। ছয়ের মাথাটা এইভাবে ঘুরিয়ে আট করে দাও। তা নইলে ওরা তোমায় অনুমতি না-দিতেও পারে।’

\*

\*

\*

ভাঁড়ারঘরটায় ওরা তিনজন। দাড়িঅলা এক বুড়ো, গায়ে পুরনো কোট, দেয়ালে আটকানো কাঠের তক্তাটার উপর শুয়ে আছে পাশ ফিরে, কাঠির মতো তার পাদুটো চওড়া ছিটের কাপড়ের প্যান্টের মধ্যে শরীরের নিচে গুটানো। তাকে শ্রোতার করার কারণ—যে-পেথলিউরার লোকটি তার ওখানে বাসা নিয়েছিল, তার ঘোড়াটা চালা থেকে হারিয়ে গেছে। মেঝের উপর বসে আছে এক বুড়ি, চঞ্চল ছোট ছোট তার চোখদুটো, সরু থুতনি। চোলাই ‘সামোগন’ মদ বেচে পেট চালায় ও, একটা ঘড়ি আর অন্য কয়েকটা দামি জিনিশ চুরি করার অভিযোগে ওকে এখানে এনে পোরা হয়েছে। জানলার নিচে একটা কোণে চেন্টে-যাওয়া টুপিটার উপর মাথা রেখে পাভেল পড়ে আছে আধা-অচেতন অবস্থায়।

\*

\*

\*

একটি অল্পবয়সী মেয়েকে এনে ঢোকানো হল এই ভাঁড়ারঘরে—মেয়েটির মাথায় জড়ানো রঙিন ক্রমাল, আতঙ্কে বিস্ফারিত তার চোখদুটো। দু-এক মুহূর্ত দাঁড়িয়ে থেকে সে ‘সামোগন’-বেচা বুড়ির পাশে বসে পড়ল।

আগন্তুক মেয়েটিকে অদ্ভুত-চোখে দেখে নিয়ে বুড়ি দ্রুত উচ্চারণে বলে উঠল, ‘কি রে ছুঁড়ি, ধরা পড়েছিস, অ্যাং?’

কোনো উত্তর দিল না মেয়েটা, কিন্তু 'সামোগন'-বুড়িটা ছাড়বার পাত্রী নয়, 'ধরল কে তোকে, অ্যা? 'সামোগনের' কোনো ব্যাপার নাকি, অ্যা?

দাঁড়িয়ে উঠে চাষী-মেয়েটা তাকাল এই নাছোড়বান্দা বুড়িটার দিকে। শান্ত স্বরে বলল সে, 'না, আমাকে ধরেছে আমার ভাইয়ের জন্যে।'

'সেটি কে?' বুড়িটা ছাড়বে না কিছুতেই।

বুড়োমানুষটি বলে উঠল, 'ওকে ছেড়ে দাও না বাপু। এমনতেই ওর ভয়-ভাবনার অন্ত নেই—তার ওপরে আবার তুমি বকবক করে জ্বালাও কেন ওকে?'

বোঁ করে বুড়িটা ঘাড় ফেরাল দেয়ালে-আটকানো বাক্সের দিকে, 'তা তুমি বলবার কে? তোমার সঙ্গে আমি কথা বলছি নাকি?'

থুতু ফেলল বুড়ো, 'ওর পেছনে লেগো না বলছি।'

আরেকবার নৈঃশব্দ নেমে এল ভাঁড়ারঘরটায়, চাষী-মেয়েটা একটা বড় রুমাল বিছিয়ে বাহুর উপর মাথাটা রেখে শুয়ে পড়ল।

খেতে শুরু করল 'সামোগন'-বুড়ি। বুড়ো উঠে বসল, মেঝের উপর পাদুটো রেখে ধীরে ধীরে একটা সিগারেট তৈরি করে নিয়ে ধরিয়ে নিল সেটা। ঝাজালো ধোয়ার মেঘ ছড়িয়ে গেল সারা ঘরে।

'এই দুর্গন্ধের জন্য শান্তিতে বসে একটু খাবারও জো নেই', মুখভর্তি খাবার নিয়ে গবগব করে খেতে-খেতে গজগজ করে বলল বুড়ি, 'গোটা ঘরটাই ফুঁকে দেবে দেখছি।'

নাক সিটকে পালটা জবাব দিল বুড়ো, 'রোগা হয়ে যাবার ভয় অ্যা? শিগগিরই তো এ-দরজা দিয়ে আর বেরুতে হবে না। নিজের পেটে সবটা না-ঠেসে ওই ছেলটাকে একটু কিছু দাও-না খেতে।'

বুড়ি একটা বিরক্তির ভঙ্গি করল, 'দিতে গিয়েছিলাম তো। কিছু খেতে চায় না যে। আর, দ্যাখো বাপু আমার ব্যাপার যদি বলো তো মুখটি বুজে থেকো বলে দিচ্ছি—তোমারটা খাচ্ছিনে।'

মেয়েটি 'সামোগন'-বুড়ির দিকে ফিরে করচাগিনকে দেখিয়ে জিজ্ঞেস করল, 'ওকে এখানে এনেছে কেন, জানো?'

মেয়েটি কথা বলাতে খুশি হয়ে উঠল বুড়ি, সঙ্গে সঙ্গে জবাব দিল, 'এখানকার ছেলে ও—করচাগিনার ছোটছেলে। ওর মা রাঁধুনি।'

তারপর মেয়েটার দিকে ঝুঁকে কানে কানে ফিসফিসিয়ে বলল, 'একজন কয়েদি বলশেভিককে ছাড়িয়ে নিয়েছিল ও—লোকটা একজন জাহাজি, আমাদের পড়শী জোজুলিখার বাড়িতে ছিল।'

অল্পবয়সী মেয়েটার মনে পড়ল তার শোনা-কথাগুলো, 'ওকে খতম করে দেবার অনুমতি চেয়ে এই রিপোর্টটা হেডকোয়ার্টারে পাঠিয়ে দিচ্ছি।'

\*

\*

\*

সৈন্যভর্তি ট্রেনগুলো একে একে এসে থামতে লাগল জংশনে আর তার থেকে দলে-দলে এলোমেলোভাবে নামতে লাগল সৈন্যদলভুক্ত লোকেরা। পাশের একটা লাইন বেয়ে এসে দাঁড়াল সাজোয়া-রেলগাড়ি 'জাপোরোজেন্স'—চারটে কামরা তার,



ইস্পাতে-মোড়া তার চতুর্দিকে বড় বড় নাচি বসানো। ছাদ-খোলা গাড়িগুলো থেকে নামিয়ে আনা হল কামানগুলো, ছাদঅলা মালগাড়ির কামরাগুলো থেকে বের করে আনা হল ঘোড়াগুলোকে। সেইখানেই ঘোড়াগুলোয় জিন এঁটে তাদের পিঠে চেপে ঘোড়সওয়ার-বাহিনীর লোকেরা পদাতিক-বাহিনীর লোকদের ভিড় ঠেলে ঠেলে এগিয়ে এল স্টেশনের আঙিনার দিকে যেখানে সারবন্দি হচ্ছে তারা।

অফিসাররা তাদের নিজেদের ইউনিটের নম্বর হেঁকে এদিক-ওদিক ছুটোছুটি করছে।

গোটা স্টেশনটায় বোলতার চাকের মতো কর্মতৎপরতা। আকারহীন একটা বিরাট জনসমষ্টি শোরগোল তুলে পাক খেয়ে যাচ্ছিল—ক্রমশ সেটাকে কতকগুলো সুনিয়ন্ত্রিত সৈন্যদলের রূপ দিয়ে নেওয়া হল। অল্পক্ষণের মধ্যেই সারবন্দি বিরাট একটা সশস্ত্র বাহিনী চুকতে থাকল শহরে। রাত্রি পর্যন্ত শহরের পথে পথে ঘড়ঘড় আওয়াজ উঠল ঘোড়ার গাড়ি আর পন্থাদবর্তী রাইফেল-বাহিনীর লোকজন বড় রাস্তা বেয়ে চলল। সবশেষে এগিয়ে গেল সদর-ঘাটির ফৌজিদলটা—একশো কুড়ি জন লোক গলা মিলিয়ে হেঁড়ে গলায় গান ধরেছে :

হৈ-হল্লা কেন এত, কিসের হাঁকাহাঁকি?

পেথলিউরার দল যে এল—সন্দ' আছে নাকি!...

জানলা দিয়ে দেখার জন্য উঠে দাঁড়াল পাভেল। গোধূলির আলো-আঁধারির মধ্যে সে জনতে পাচ্ছিল রাস্তায় চাকার ঘড়ঘড়ানি, অসংখ্য পায়ের শব্দ আর অনেকগুলি গলায় গেয়ে-ওঠা গান।

পেছনে একটা মৃদু গলার স্বর শোনা গেল, 'ফৌজ এসেছে শহরে।'

ঘুরে দাঁড়াল করচাগিন।

যে-মেয়েটিকে আগের দিন এখানে আনা হয়েছে, সেই বলেছিল কথাটা।

ইতিমধ্যে পাভেল শুনেছে মেয়েটির কাহিনী—'সামোগন'-বুড়ি তাকে বাধ্য করেছে সব কথা বলতে। শহর থেকে চার মাইল দূরে একটা গ্রামে তার বাড়ি। সোভিয়েত যখন ক্ষমতা দখল করে ছিল, তখন সেখানে তার বড়ভাই গ্রিৎস্কা গরিবচাষীদের একটা কমিটির নেতৃস্থানীয় ছিল—এখন সে একজন লাল পার্টিজান সৈনিক।

লাল সৈনিকেরা চলে যাবার সময় গ্রিৎস্কাও তাদের সঙ্গে চলে গেছে মেশিনগানের একটা কোমরবন্ধনী পরে। তারপর থেকে পরিবারের জীবন দুর্বিষহ করে তুলেছে পেথলিউরার লোকজন। এদের একমাত্র ঘোড়াটা ছিনিয়ে নিয়েছে। বাপকে কিছুদিন কয়েদ করে রেখেছিল—ভয়ানক কষ্ট হয়েছিল তার। গ্রিৎস্কা যাদের জন্ম করেছিল, তাদের একজন হচ্ছে গাঁয়ের মাতব্বর। সে লোকটা এখন এদের ওপর নেহাত প্রতিশোধ তুলবার জন্যই যতসব আগন্তুকদের এদের বাড়ি জায়গা নেবার জন্য পাঠিয়ে দেয়। গোটা পরিবারটাই নিঃশ্ব। আগের দিন কম্যাড্যান্ট গ্রামে এসেছিল খানাতল্লাশি চালাবার জন্য, গাঁয়ের মাতব্বর তাকে নিয়ে গিয়েছিল মেয়েটির বাড়ি! মেয়েটার ওপর নজর পড়ে তার, পরের দিন সে ওকে সঙ্গে করে শহরে নিয়ে আসে 'জেরা করার জন্যে'।

করচাগিনের ঘুম আসেনি, প্রাণপণে চেষ্টা করা সত্ত্বেও তার চোখে একটু বিশ্রামের ঘুম নামেনি। একটা চিন্তা অবিরাম তার মস্তিষ্কের মধ্যে ঘুরপাক খাচ্ছে, ‘এর পরে কী?’ কিছুতেই তাড়াতে পারছে না প্রশ্নটা মন থেকে।

খেঁতলে-যাওয়া তার দেহের সর্বান্তে একটা দারুণ যন্ত্রণার অনুভূতি। সেই পাহারাঅলাটা পাশবিক একটা নির্মমতার সঙ্গে তাকে ধরে মেরেছে।

মনের মধ্যে ভিড় জমিয়ে তোলা সেই নিদারুণ চিন্তাগুলোকে ভুলে থাকার জন্য সে এই মেয়ে দু’জনের ফিসফিসিয়ে কথাবলা শুনতে লাগল।

অশ্পষ্ট নিচুগলায় অল্পবয়সী মেয়েটি বলছিল কীভাবে কম্যাভ্যান্ট তার পেছনে লেগেছে, শাসিয়েছে, ফুসলিয়েছে এবং তার কাছ থেকে পাণ্টা জবাব পেয়ে শেষপর্যন্ত ভীষণ রাগে বলে উঠেছে, ‘মাটির নিচের ঘরে তালাবদ্ধ করে রাখব তোমাকে, দেখি কী করে সেখান থেকে ছাড়া পাও!’

অন্ধকার ঘনিয়ে উঠেছে ঘরটার আনাচে-কানাচে। আরেকটা রাত্রি আসছে—দম-আটকানো অস্থিরতায় ভরা রাত্রি। কাল সকালে কী হবে? বন্দি অবস্থায় এই তার সপ্তম রাত্রি, কিন্তু পাভেলের মনে হচ্ছে যেন সে এখন মাসের-পর-মাস ধরে কয়েদ হয়ে আছে। শক্ত মেঝেটার উপর পড়ে আছে পাভেল আর যন্ত্রণা মোচড় দিচ্ছে সর্বান্তে। এখন ওরা তিনজন এই ভাঁড়ারঘরটায়। ‘সামোগন’-বুড়িকে খোরকজি ছেড়ে দিয়েছে ভোদকা সংগ্রহ করে আনার জন্য। বুড়ো দাদুটি নাক ডাকিয়ে ঘুমোচ্ছে তক্তাটার উপর—যেন বাড়িতে গুয়ে আছে সে তার রুশী উনুনের উপর। দার্শনিক-সুলভ একটা বৈরাগ্যের সঙ্গে লোকটা তার মন্দ-ভাগ্যকে শান্তভাবে মেনে নিয়েছে, সারারাত্রি নিশ্চিন্তভাবে ঘুমোয় সে। খুন্তিনা আর পাভেল প্রায় পাশাপাশি মেঝের উপর গুয়ে আছে। গতকাল পাভেল জানলা দিয়ে সেগেইকে দেখতে পেয়েছিল—অনেকক্ষণ ধরে সে বিষণ্ণ-চোখে বাড়ির জানলাগুলোর দিকে তাকিয়ে দাঁড়িয়েছিল রাস্তার উপরে।

পাভেল মনে-মনে ভেবেছিল, ‘ও জানে আমি এখানে আছি।’

তিনদিন ধরে রোজ কে যেন পাভেলের জন্য কালো টক রুটি এনে দিয়ে গেছে—কে তা সাক্ষীরা কিছুতেই বলেনি। দু’দিন কম্যাভ্যান্ট তাকে জেরা করেনি। এসবের মানে কী?

আগের জেরার সময়ে সে কিছুই ফাঁস করেনি, বরং সবকিছু অস্বীকারই করেছে। কেন-যে সে মুখ বুজে ছিল, তা সে নিজেই জানে না। বইয়ে পড়া বীর-নায়কদের মতো সে নিজেকে সাহসী আর বলিষ্ঠহৃদয় বলে প্রমাণ করতে চেয়েছে। কিন্তু সেই রাতে তাকে কয়েদখানায় নিয়ে যাবার সময় একজন সাক্ষী বলেছিল, ‘এটাকে আর টানাটানি করে কী হবে, পান্ খোরকজি? পিঠে একটি গুলি চালিয়ে দিলেই তো চুকে যায়’,—তখন ভয় পেয়েছিল পাভেল। হ্যাঁ, ষোলো বছর বয়সে মৃত্যুর চিন্তাটা বড় সাংঘাতিক! মৃত্যু—অর্থাৎ সবকিছুর শেষ।

খুন্তিনাও ভাবছে। এই তরুণটি যা জানে না, সে তা জানে। খুব সম্ভবত ও জানে না ওর কপালে কী আছে...যা খুন্তিনা শুনে ফেলেছিল।

পাভেল সারারাত্রি ঘুমোতে না-পেরে অস্থিরভাবে এপাশ-ওপাশ করেছে। পাভেলের প্রতি নিবিড় মমতায় ভরে উঠেছে খুন্তিনার মন—যদিও তার নিজের জন্য

দূর্ভাবনাটাও কম নয় : কম্যান্ড্যান্টের কথাগুলির নিদারুণ শাসানি সে ভুলতে পারে না, 'কালই তোমার একটা ব্যবস্থা করে ফেলব—আমাকে যদি না চাও, তাহলে সেপাইদের ঘরে পাঠিয়ে দেব তোমায়। কসাকগুলো তোমাকে পেয়ে খুশি হবে। যা হয় বেছে নাও।'

বড় কঠিন, বড় নির্মম এই পৃথিবী, কোথাও এতটুকু দয়ামায়া নেই! গ্রিৎস্কা যে লালফোঁজে যোগ দিয়েছে, সেটা কি তার দোষ? জীবন বড় নিষ্ঠুর!

একটা বুক-চাপা বেদনার অনুভূতিতে দম বন্ধ হয়ে এল খৃস্তিনার, অসহায় হতাশায় আর ভয়ের যন্ত্রণায় তার দেহটা কঁপে-কঁপে উঠতে লাগল একটা নিদারুণ কান্নায়।

দেয়ালের কোণে একটা ছায়া নড়ে উঠল, 'কাঁদছ কেন?'

খৃস্তিনা তার এই কয়েদখানার নির্বাক সঙ্গীটির কাছে একনিষ্ঠাসে সমস্ত দুঃখ-যন্ত্রণার কথা দারুণ আবেগের সঙ্গে ফিসফিসিয়ে বলে গেল। কোনো কথা বলল না পাভেল, শুধু খৃস্তিনার হাতের উপর হাত রাখল হালকাভাবে।

টোক গিলে গিলে চোখের জল চেপে আতঙ্কভরা গলায় বলল খৃস্তিনা, 'আমার ওপর অত্যাচার করে ওই শয়তানগুলো মেরে ফেলবে আমায়, বাঁচার উপায় নেই!'

কী ওকে বলার আছে পাভেলের? কিছু বলার নেই। ওদের দু'জনকেই জীবন যেন একটা লোহার জাঁতাকলে পিষে মারছে।

কাল যখন ওকে নিয়ে যাবার জন্য আসবে, তখন পাভেল কি বাধা দেবার চেষ্টা করবে? সেক্ষেত্রে ওরা পিটিয়ে মেরে ফেলবে তাকে, কিংবা মাথার উপরে একটা তলোয়ারের চোট নেমে এলেই তো সব শেষ হয়ে যাবে। ভাবনায় অস্থির এই মেয়েটাকে সাহসনা দেবার জন্য পাভেল তার হাতে আদর করে হাত বুলিয়ে দেয়। কান্নাটা থেমে এল ওর। কিছুক্ষণ পর পর পথ-চলতি লোকের উদ্দেশ্যে দেউড়ির সান্ধীটার হাঁক শোনা যাচ্ছে, 'কে যায়?' আর, তারপরেই আবার সবকিছু নিস্তব্ধ হয়ে যায়। বুড়ো দাদু গভীর ঘুমে আচ্ছন্ন। মুহূর্তগুলো ধীরে ধীরে গড়িয়ে চলেছে—যেন শেষ নেই। তারপর একসময়, কখন তা পাভেল টের পায়নি—মেয়েটি দুই বাহু দিয়ে তাকে জড়িয়ে ধরে নিজের দিকে টেনে নিয়েছে।

'শোনো', দুটি উষ্ণ ঠোঁট ফিসফিসিয়ে উঠল, 'আমার তো আর পার নেই : হয় ওই অফিসারটা, আর নাহয় ওই সেপাইগুলো। তার চেয়ে, প্রিয়, তুমিই আমাকে নাও—ওই কুস্তাগুলোই যেন সর্বপ্রথম আমার কুমারীত্ব নাশ করতে না পারে।'

'এ কী বলছ খৃস্তিনা!'

কিন্তু বলিষ্ঠ বাহুর বাঁধন থেকে সে মুক্তি পেল না। জ্বলন্ত, পরিপূর্ণ দুটি ঠোঁট চেপে বসল তার ঠোঁটের উপর—এড়িয়ে যাওয়া শক্ত। সহজ আর কোমল মেয়েটির কথাগুলি—পাভেল জানে কেন ও বলছে এই কথাগুলো।

মুহূর্তের জন্য সে তার পরিবেশ সম্বন্ধে অচেতন হয়ে গেল। তালাবন্ধ দরজা, কটা-চুলঅলা সেই কসাক, কম্যান্ড্যান্ট, নির্মম প্রহার, সাতটি রক্তস্বাস বিন্দি রাত্রি—সবকিছু ভুলে গেল সে। সেই মুহূর্তের জন্য সমস্ত চেতনা আচ্ছন্ন করে রইল শুধু সেই জ্বলন্ত ঠোঁটদুটি আর চোখের জলে ভেজা সেই মুখখানি।

হঠাৎ তার মনে পড়ল তোনিকাকে।

‘কী করে সে ভুলে যেতে পারল তোনীয়াকে, তার আশ্চর্য সুন্দর সেই চোখদুটোকে?’  
দেহের সমস্ত শক্তি জড়ো করে নিজেকে ছিনিয়ে নিল সে খুস্তিনার বাহুবন্ধন থেকে।  
দাঁড়িয়ে উঠে মাতালের মতো টলতে টলতে এসে চেপে ধরল জানলার শিকগুলো।

খুস্তিনা হাতড়ে হাতড়ে এসে ধরল তাকে, ‘কেন, কী হল?’

তার সমস্ত অন্তরাখ্যা যেন মূর্ত হয়ে উঠেছে এই একটি প্রশ্নে! তার দিকে ঝুঁকে পড়ে  
হাতদুটো চেপে ধরে বলে উঠল পাভেল, ‘তা হয় না খুস্তিনা। তুমি এত... এত  
ভালো।’ এছাড়া আরও যে কী সব পাভেল বলেছিল, তা সে নিজেকে জানে না।

অসহ্য নিস্তব্ধতার মধ্যে সে আবার সোজা হয়ে দাঁড়িয়ে দেয়ালে-আটকানো  
বান্ধটার দিকে এল—একধারে বসে সে জাগিয়ে তুলল বুড়োকে, ‘একটা সিগারেট দাও  
আমাকে দাদু!’

সর্বান্ত শালে জড়িয়ে মেয়েটা কোণে বসে কাঁদতে লাগল।

পরের দিন কয়েকজন কসাকের সঙ্গে এসে কম্যাড্যান্ট খুস্তিনাকে নিয়ে গেল।  
বিদায়ের দৃষ্টিতে সে তাকাল পাভেলের দিকে, অভিযোগ-ভরা তার চাউনি। ও চলে  
যাবার পর যখন দরজাটা ফের বন্ধ হয়ে গেল, তখন পাভেলের সমস্ত মন আরও  
নিবিড় একটা বেদনায় আর নিঃসঙ্গতায় ভরে উঠল।

সারাদিনে বুড়ো দাদু পাভেলের মুখ থেকে একটাও কথা বের করতে পারল না।  
কম্যাড্যান্টের পাহারাঅলা আর সাক্ষী বদল হল। সন্ধ্যার দিকে একজন নতুন বন্দিকে  
এনে ঢোকানো হল এই ঘরে। পাভেল তাকে চিনতে পেরেছে : চিনি-কারখানার  
ছুতোর দোলিন্নিক। একটু খাটো, বলিষ্ঠ চেহারা, দেহের গড়নটা শক্ত, পুরনো একটা  
কোর্টার নিচে ফিকে-হয়ে-আসা হলদে একটা শার্ট তার পরনে। তীক্ষ্ণচোখে সে  
খুঁটিয়ে দেখল ভাঁড়ারঘরটা।

পাভেল তাকে দেখেছিল ১৯১৭-র ফেব্রুয়ারি মাসে যখন বিপ্লবের ঢেউ তাদের  
শহরেও এসে পৌঁছেছে। সেই সময়ের শোরগোলের সভা-মিছিলে পাভেল মাত্র  
একজন বলশেভিককেই বক্তৃতা দিতে শুনেছে এবং সেই বলশেভিকটি হচ্ছে  
দোলিন্নিক। রাস্তার ধারে একটা বেড়ার উপর দাঁড়িয়ে উঠে সে সৈন্যদের উদ্দেশে  
বক্তৃতা করছিল। তার শেষ কথাগুলো মনে আছে পাভেলের : ‘বলশেভিকদের পথে  
চলো সৈনিক ভাইসব, তারা কখনও তোমাদের প্রতি বিশ্বাসঘাতকতা করবে না!’

তারপর থেকে সে আর ছুতোরটিকে দেখেনি।

কয়েদখানায় এই নতুন সঙ্গীটিকে পেয়ে বুড়োদাদু খুশি হয়ে উঠেছে—সারাদিন  
নিচুপ বসে কাটানোটা যে তার পক্ষে কঠিন হয়ে উঠেছিল সেটা বোঝা যায়।  
দোলিন্নিক তার পাশে তক্তাটার ধারে বসে তার সঙ্গে কথা বলতে বলতে আর  
সিগারেট খেতে-খেতে সমস্ত বিষয়ে প্রশ্ন করতে লাগল।

তারপরে এই আগন্তুকটি এল করচাগিনের কাছে। পাভেলকে জিজ্ঞেস করল,  
‘আচ্ছা, তোমাকে এখানে আসতে হল কেন?’

পাভেল ‘হ্যাঁ’, ‘না’ করে জবাব দিচ্ছে দেখে দোলিন্নিক বুঝল যে সাবধানতার  
খাতিরেই তরুণটি বিশেষ কথা বলতে চাচ্ছে না। পাভেলের বিরুদ্ধে অভিযোগটা  
শোনার পর তার বুদ্ধিভরা চোখদুটি বিষ্ময়ে বড় হয়ে উঠল। ছেলেটার পাশে এসে

বসল সে, 'ও, তুমিই তাহলে ঝুখরাইকে ছাড়িয়ে নিয়েছিলে বলছ? ভারি আশ্চর্য তো। এরা-যে তোমায় পাকড়েছে, সেটা জ্ঞানতাম না আমি।'

কথাটা জ্ঞানাজ্ঞানি হয়ে যাচ্ছে বুঝে কনুইয়ে ভর দিয়ে একটু উঠে বসে পাভেল বলল, 'আমি কোনো ঝুখরাই-টুখরাইকে চিনি না। এরা তো এখানে যে-কোনো অভিযোগই আনতে পারে।'

দোলিন্নিক হেসে সরে এল তার দিকে, 'ঠিক আছে, ভাই। আমার কাছে তোমার অত সাবধান হবার দরকার নেই। আমি তোমার চেয়ে বেশি জানি।'

বুড়োদাদুটি যাতে স্তনতে না পায়, সেইভাবে নিচুগলায় সে বলে গেল, 'ঝুখরাইকে আমি নিজেই রওনা করে দিয়েছি, এতক্ষণে সে বোধহয় যেখানে যাবার সেখানে পৌছে গেছে। সে আমাকে ঘটনাটা সবই বলেছে।'

তারপর একমুহূর্ত চুপ করে কী যেন একটু ভেবে দোলিন্নিক বলল, 'তুমি দেখছি ঝাটি জিনিশে তৈরি—তবে এরা তোমাকে ধরে ফেলেছে আর সবকিছু জানে, সেটা খারাপ বটে—খুবই খারাপ।'

কোর্তাটা খুলে ফেলে দোলিন্নিক সেটাকে বিছিয়ে নিল মেঝের উপর, দেয়ালে হেলান দিয়ে সেটার উপর বসে সে আরেকটা সিগারেট বানাতে লাগল।

তার শেষ কথাটায় পাভেলের কাছে সবকিছু পরিষ্কার হয়ে গেছে। দোলিন্নিক যে ঝাটি লোক, তাতে কোনো সন্দেহ নেই। তাছাড়া, সে ঝুখরাইকে রওনা করে দিয়েছে, তার মানেই...

সেই সন্ধ্যায় পাভেল জ্ঞানতে পারল—পেথলিউরার কসাক-সৈন্যদের মধ্যে আন্দোলন চালাবার জন্য দোলিন্নিককে প্রেরণ করা হয়েছে। তাছাড়া, সে ধরা পড়ে হাতে-নাতে—সৈন্যদের আত্মসমর্পণ করে লাল সৈনিকদের পক্ষে যোগ দেবার জন্য আবেদন জানিয়ে জেলার বিপ্লবী কমিটি যে-ইশতেহার বের করেছিল, সেটা বিলি করার সময়ে।

দোলিন্নিক সাবধান ছিল, পাভেলকে সে বেশি কিছু বলল না। মনে মনে ভাবল সে, 'কে জানে, হয়তো ওরা ছেলেটার উপর ডাঙা চালাতে পারে—ও এখনও নেহাত ছেলেমানুষ।'

রাত্রি গড়িয়ে গেলে যখন ওরা ঘুমোবার জন্য তৈরি হচ্ছে, তখন সে তার আশঙ্কার কথাটা সংক্ষেপে ব্যক্ত করল, 'আমরা বড় বেকায়দায় পড়ে গেছি, বুঝলে করচাগিন। দেখা যাক, কদুর কী হয়।'

পরের দিন একজন নতুন কয়েদিকে এনে পোরা হল—বড় কানঅলা, ঘাড়-লিকলিকে নাপিত শ্রিওমা জেলহসার। মহা উত্তেজনার সঙ্গে হাত-পা নেড়ে সে বলছিল দোলিন্নিককে, 'ফুক্স, ব্রুডন্তেইন আর ত্রাখ্তেন্বের্গ তো লোকটাকে নুন আর রুটি দিয়ে অভ্যর্থনা জানাবে বলে ঠিক করেছে। আমি বললাম, ওরা যদি তা করতে চায় তো ককক, কিন্তু ইহুদিদের আর-সবাই কি ওদের সমর্থন করবে? মোটেই করবে না—এই আমি বলে রাখলাম তোমায়। এদের তিনজনের অবশ্য নিজেদের ঘর সামলাতে হবে : ফুক্স-এর দোকান আছে, ত্রাখ্তেন্বের্গের ময়দা-কল আছে—কিন্তু আমার আছে কী? আর-সবাই যারা উপোস করে মরছে, তাদের আছে কী? কিছু নেই। নিঃস্ব আমরা সবাই। আমার আবার জিভটা তো একটু আলগা। আজ একজন অফিসারের দাড়ি কামাঙ্ছিলাম—ওই

নতুন যারা দু-একদিনের মধ্যে শহরে এসেছে, তাদেরই একজন—জিজ্ঞেস করলাম, 'আতামান পেথলিউরা এই ইহুদি-ঐজানোর ব্যাপারটা জানেন নাকি? আপনার কি মনে হয় তিনি দেখা করবেন প্রতিনিধিদলের সঙ্গে?' হায়, হায়—আমার এই আলগা জিভের জন্যে কতবার যে বিপদে পড়তে হয়েছে! এত কায়দা আর তরিবত করে অফিসারটার দাড়ি কমিয়ে মুখে পাউডার ঘষে দেবার পর সে কী করলে জানো? উঠে দাঁড়িয়ে পয়সা দেবার বদলে লোকটা আমায় কর্তৃপক্ষের বিরুদ্ধে আন্দোলন করার জন্যে প্ররোচিত করল!

বুকে একটা চাপড় মারল জেলৎসার, 'আন্দোলনটা কী করলাম বলো দেখি? কী বলেছি কথটা? শুধু একবার জিজ্ঞেস করেছি লোকটাকে আর তারই জন্যে কিনা জেলে?...'

উত্তেজনার চোটে জেলৎসার দোলিন্নিকের শার্টের একটা বোতাম টেনে ধরে তার বাহুতে টান দিতে থাকল।

ক্রুদ্ধ শ্রিওমার কথা শুনতে শুনতে দোলিন্নিক অজান্তেই হেসে ফেলল। নাপিতের কথা শেষ হবার পর সে গভীরভাবে বলল, 'হ্যাঁ, তোমার মতো এরকম একজন বুদ্ধিমান লোকের পক্ষে কাজটা একটু বোকার মতোই হয়ে গেছে বটে। ওই অবস্থায় জিভটাকে আলগা হতে দিয়ে একটা বেমত্ব কাজ করে ফেলেছ। আমি হলে তোমাকে ওইভাবে এখানে এসে পড়ার পরামর্শ দিতাম না।'

জেলৎসার সমর্থনসূচক মাথা নেড়ে হাত ছড়িয়ে একটা হতাশার ভঙ্গি করল। ঠিক সেই সময়ে দরজাটা খুলে গেল আর বাইরে থেকে ঠেলে ঢুকিয়ে দেওয়া হল 'সামোগন'-বুড়িকে। কসাক-সেপাইটার দিকে ইতর গাল পাড়তে পাড়তে বুড়ি ভেতরে এসে পড়ল, 'আগুনে পুড়ে মর তোরা আর তোদের ওই কম্যান্ড্যান্ট! আমার এনে দেওয়া ওই মদ খেয়ে ও যেন টেসে যায়!'

দরজাটা ঠেলে বন্ধ করে দিল পাহারাঅলাটা, বাইরে তালাবন্ধ করার শব্দ শুনতে পেল ওরা।

বুড়ি তক্তাটার একপাশে বসার পর বুড়ো তাকে কৌতুক করে বলল, 'এই-যে বকবক করছেনওঅলি বুড়ি, আবার আমাদের মধ্যে ফিরে এসেছ দেখতে পাচ্ছি, এ্যা? আচ্ছা, বোসো তাহলে আরাম করে।'

শত্রুতাভরা চোখে তার দিকে একনজর তাকিয়ে বুড়ি তার পুঁটলিটা তুলে নিয়ে মেঝের উপর দোলিন্নিকের পাশে বসল। দেখা গেল, অফিসারদের জন্য কয়েক বোতল 'সামোগন' জোগাড় করতে যতক্ষণ লাগে, শুধু ততক্ষণের জন্যই তাকে ছেড়ে দেওয়া হয়েছিল।

হঠাৎ পাশে সেগাইদের ঘরটা থেকে চেঁচামেচি আর দৌড়াদৌড়ির শব্দ ভেসে এল। কে যেন কর্কশ স্বরে হুকুম দিচ্ছে। কয়েদিরা সকলে ব্যাপারটা শোনার জন্য দরজার দিকে মাথা ঘোরাল।

\*

\*

\*

প্রাচীন ঘণ্টা-ঘরের দেখতে-বিশী গির্জাটার সামনের মাঠে ইতিমধ্যে অদ্ভুত সব ব্যাপার ঘটছে। মাঠটার তিনদিকে আয়তক্ষেত্রের আকারে সারিবদ্ধা ফৌজের বহর—পুরোদত্তর সামরিক পোশাকে আর অস্ত্রশস্ত্রে সজ্জিত পদাতিক বাহিনী।

সামনে, গির্জার প্রবেশপথের মুখে বর্গক্ষেত্রের আকারে সারিবাধা চৌখুপীর ছকে তিনটে পদাতিক পল্টন পাশের স্কুলের বেড়াটা অবধি পর পর সাজানো।

রাইফেল ধরে রেখে দাঁড়িয়ে আছে ধূসর আর নোংরা পেথলিউরার পল্টন—তাদের আজব রাশিয়ান হেলমেট, অনেকটা আধাআধি কাটা কুমড়োর মতো দেখতে। বৃকে কার্তুজের বেল্ট আড়াআড়ি লাগানো। এরাই পেথলিউরার সেরা ডিভিশনের সৈন্য।

ভূতপূর্ব জারের সৈন্যবাহিনীর গুদাম থেকে হাতিয়ে নেওয়া এদের উর্দিগুলো আর বুট বেশ ভালো। সোভিয়েতের বিরুদ্ধে যারা সচেতনভাবে লড়াই করছে, এদের লোকজন প্রধানত সেই কুলাকদের মধ্যে থেকেই নেওয়া। স্ট্র্যাটেজির দিক থেকে অতি গুরুত্বপূর্ণ এই রেল-জংশনটাকে রক্ষা করবার জন্যই ডিভিশনটাকে এখানে বদলি করা হয়েছে।

শেপেতোভ্কা শহরে এসে মিশেছে পাঁচটা রেলপথ—পেথলিউরার পক্ষে এই জংশনটা হাতছাড়া হয়ে যাওয়া মানেই সর্বনাশ। বাস্তবিকপক্ষে, এই ডিভিশনের হাতে ইদনিং খুব সামান্য জায়গাই আছে, ছোট্ট ভিনিফ্সা শহরটা এখন পেথলিউরার রাজধানী।

প্রধান আতামান নিজে তার সৈন্যবাহিনী পরিদর্শন করবে বলে স্থির করেছে। সবকিছু প্রস্তুত হয়ে আছে তার আসার অপেক্ষায়।

মাঠটার দূরের এককোণে যেখানে তাদের দেখতে পাবার সম্ভাবনা সবচেয়ে কম, সেইখানে সারি দিয়ে দাঁড়িয়ে আছে নতুন রঙের একটা দল—বিভিন্ন রকমের ঢিলেঢালা বেসামরিক পোশাক-পরা, খালি-পা একদল তরুণ। এরা সব খামারে কাজ করা ছেলের দল—মাঝরাগ্রে গিয়ে হামলা চালিয়ে এদের ঘুম থেকে তুলে আনা হয়েছে কিংবা রাস্তা থেকে ধরে আনা হয়েছে। লড়াই করবার বিন্দুমাত্র ইচ্ছে এদের কারুর নেই।

নিজদের মধ্যে এরা বলাবলি করছে, ‘আমরা তো আর পাগল নই।’

পাহারাঅলা দিয়ে এদের শহরে আনিয়ে বিভিন্ন পল্টনে ভাগ করে দিয়ে হাতিয়ার হাতে দেওয়া ছাড়া এদের নিয়ে পেথলিউরার অফিসাররা আর কিছুই করে উঠতে পারেনি।

পরের দিনই অবশ্য এইভাবে জড়ো-করা এই রঙেরদের এক-তৃতীয়াংশ নিরুদ্দেশ হয়ে গেছে এবং প্রতিদিনই এদের সংখ্যা কমে আসছে।

এদের বুটজুতো দেওয়াটা হবে বোকামিরও বাড়া, বিশেষ করে যখন বুটজুতোর সংখ্যা নিতান্তই কম। অবশ্য সবাইকেই সৈন্যদলভুক্ত হবার জন্য উপযুক্ত রকম ‘পাদুকা’ পরে আসবার হুকুম দেওয়া হয়েছিল। তার ফলটা হয় আশ্চর্যরকম : পাদুকা বলতে কতকগুলো ছেঁড়া, পাচা চামড়ার সঙ্গে সুতো আর তারের একটা বিচিত্র সংগ্রহ!

অতএব, এদের খালিপায়েই কুচকাওয়াজের জন্য নিয়ে আসা হয়েছে।

পদাতিক পল্টনের পেছনেই গোলুবের ঘোড়সওয়ার-বাহিনী।

কুচকাওয়াজ দেখবার জন্য কৌতূহলী শহরবাসীদের জমাট ভিড় ঠেকিয়ে রাখছে ঘোড়সওয়ারেরা।

কম কথা নয়, স্বয়ং প্রধান আতামান উপস্থিত থাকবেন! এ-ধরনের ঘটনা শহরে বড় একটা ঘটে না, সুতরাং কেউই বিনা-পরিসায় মজা দেখার এই সুযোগ নষ্ট করতে চায় না।

গির্জার সিঁড়ির উপর জড়ো হয়েছে কর্নেল আর ক্যাপ্টেনরা, পাদরির দুই মেয়ে, জনকতক ইউক্রেনীয় শিক্ষক, একদল ‘স্বাধীন’ কসাক, আর স্থানীয় পৌরপ্রধান, যার পিঠটা অল্প একটু কুঁজো—এককথায় বলতে গেলে শহরের ‘সমাজের’ প্রতিনিধি—

স্থানীয় বিশিষ্ট ব্যক্তির সর্বাঙ্গ, এদের মধ্যে চেরকেস্কা-পরা পদাতিক পল্টনের ইনস্পেক্টর-জেনারেল। সে-ই আজকের এই কুচকাওয়াজের পরিচালক।

গির্জার ভেতরে পাদরি ভানিলি ইস্টার পরবের পোশাক-আশাক পরছেন।

পেথলিউরাকে বেশ জাঁকজমকের সঙ্গেই সংবর্ধনা জানানো হবে। বিশেষ করে এই নতুন রক্তকটের দলকে আজ আনুগত্যের শপথ নেওয়ানো হবে বলে একটা হলদে আর নীল পতাকা আনা হয়েছে।

একটা ঝরঝরে পুরনো 'ফোর্ড' মোটরগাড়িতে চেপে ডিভিশনটার সেনাপতি স্টেশনের দিকে রওনা হয়ে গেল পেথলিউরাকে অভ্যর্থনা করার জন্য।

সে চলে যাবার পর, লম্বা, মজবুত গড়ন, পাকানো-গোফালা কর্নেল চেরনিয়াকে ডেকে পদাতিক-বাহিনীর ইনস্পেক্টর বলল, 'আপনার সঙ্গে একজন কাউকে নিয়ে গিয়ে একবার দেখে আসুন কম্যান্ড্যান্টের অফিসটা ঠিক কেতাদুরস্ত আছে কিনা আর সেখানকার সব কাজকর্ম ঠিকমতো চলছে কিনা। যদি সেখানে কোনো কয়েদি দেখেন, তাহলে দেখে-ওনে আজ্ঞেবাজে লোকদের ছেড়ে দেবেন।'

চেরনিয়াক পায়ে পায়ে খট করে জুতো ঠুকল, তারপর প্রথমেই যে কসাক ক্যান্টেনটি তার চোখে পড়ল তাকে সঙ্গে নিয়ে ঘোড়ায় চেপে ছুটে বেরিয়ে গেল।

ইনস্পেক্টরমশাই তারপর পাদরির মেয়েটার দিকে ফিরে ভদ্রভাবে জিজ্ঞেস করল, 'ভোজসভার খবর কী? সব ঠিক আছে তো?'

সুপুরুষ ইনস্পেক্টরমশাইয়ের দিকে সতৃষ্ণ দৃষ্টিতে চেয়ে মেয়েটা বলল, 'হ্যাঁ, হ্যাঁ। কম্যান্ড্যান্ট যতদূর করবার সব করছে।'

হঠাৎ ভিড়ের মধ্যে একটা চাঞ্চল্য দেখা গেল : একজন সওয়ার ঘোড়াটার ঘাড়ের ওপর নুয়ে পড়ে পাগলের মতো ঘোড়া ছুটিয়ে আসছে। হাতটা নেড়ে চিৎকার করে উঠল সে, 'আসছেন ওঁরা!'

'শামিল হো!' গাঁক গাঁক করে উঠল ইনস্পেক্টর।

অফিসাররা ছুটল নিজের নিজের জায়গায়।

গির্জার কাছে এসে 'ফোর্ড' গাড়িটা থামতেই, 'ইউক্রেন এখনও মরেনি' গানের সুরে ব্যান্ড বেজে উঠল।

ডিভিশন-সেনাপতির পরেই গাড়িটা থেকে প্রধান আতামান তার ভারী দেহটা টেনে নামল কস্টেস্টে। পেথলিউরার দেহের উচ্চতা মাঝারি গোছের, লাল ঘাড়ের উপরে বেটপ মাথাটা দৃঢ়ভাবে বসানো। মিহি পশমের একটা নীল জোকা তার পরনে, কোমরের কাছে হলদে রঙের বন্ধনী আঁট করে জড়ানো, বন্ধনীটার বাঁধা একটা শ্যামোয়া চামড়ার খাপের মধ্যে ছোট ব্রাউনিং-পিস্তলটা ঝুলছে। মাথার উপরে চুড়োঅলা একটা খাদি উর্দি-টুপি, তার সামনের দিকটায় এনামেলের ত্রিশূল-চিহ্ন বসানো।

সিমন পেথলিউরার চেহারায় এমন কিছু একটা জঙ্গী ভাব নেই। বাস্তবিকপক্ষে, তাকে দেখে মোটেই সামরিক লোক বলে মনে হয় না।

মুখে একটা অসন্তোষের ভাব ফুটিয়ে সে ইনস্পেক্টরের রিপোর্ট শুনল। তারপরে পৌরপ্রধান তাকে অভ্যর্থনা জানিয়ে বক্তৃতা দিল।



পৌরপ্রধানের মাথার উপর দিয়ে সারি-বাঁধা ফৌজের দিকে তাকিয়ে অন্যমনস্কভাবে শুনে গেল পেথলিউরা।

তারপরে ইনস্পেক্টরের দিকে মাথা নাড়ল সে, 'এবার শুরু করা যাক!'

নিশানটার পাশে ছোট মঞ্চটার উপরে উঠে পেথলিউরা ফৌজের উদ্দেশ্যে দশ মিনিট বক্তৃতা দিল।

বক্তৃতাটা বিশেষ প্রত্যয় জাগাবার মতো কিছু হল না। স্পষ্টই বোঝা গেল, আত্মমান এতখানি রাস্তা এসে ক্লাস্ত, তাই বিশেষ উৎসাহের সঙ্গে বক্তৃতা করতে পারল না। সৈন্যদের নিয়মমাফিক 'জয়তু! জয়তু!' চিৎকারের মধ্যে বক্তৃতা শেষ করে সে মঞ্চ থেকে নেমে এল রুমাল দিয়ে কপালের ঘাম মুছতে মুছতে। তারপর ইনস্পেক্টর আর সেনাপতির সঙ্গে সে ফৌজ-পরিদর্শনে এল।

নতুন রঙকটদের সারির পাশ দিয়ে যাবার সময় তাচ্ছিল্যে ভরে উঠল তার চোখদুটো, বিরজিতে ঠোট কামড়াল সে।

সারি সারি নতুন রঙকটের দল অসমান পা ফেলে ফেলে নিশানটার দিকে এগিয়ে এল। নিশানটার কাছে পাদরি ভাসিলি বাইবেল হাতে নিয়ে দাঁড়িয়েছিলেন, প্রথমে তিনি বাইবেলটার উপরে আর তারপরে নিশানের মুড়িতে চুমো খেতে দিলেন তাদের। আর তখনই পরিদর্শনের শেষের দিকে ঘটল অপ্রত্যাশিত ব্যাপারটা।

কী এক অজ্ঞাত উপায়ে মাঠে ঢুকে পড়ে একটা প্রতিনিধিদল পেথলিউরার দিকে এগিয়ে এল। দলের সামনে চলেছে কাঠের ব্যবসাদার ধনী ব্রুভস্টেইন নুন আর রুটি উপহার নিয়ে, তার পেছনে বস্ত্রব্যবসায়ী ফুক্স আর অন্য তিনজন বড়লোক ব্যবসাদার।

মাথা নিচু করে একটা দাসোচিত সেলাম হুঁকে ব্রুভস্টেইন থালাটা দিল পেথলিউরার দিকে। পাশের একজন অফিসার সেটা হাত বাড়িয়ে নিল।

'রাষ্ট্রের প্রধান হিসেবে আপনার প্রতি স্থানীয় ইহুদি বাসিন্দারা তাদের আন্তরিক শ্রদ্ধা আর কৃতজ্ঞতা জানাতে চায়। দয়া করে এই মানপত্রটি গ্রহণ করুন।'

'বেশ', বিড়বিড় করে বলে পেথলিউরা তাড়াতাড়ি কাগজটার উপর চোখ বুলিয়ে গেল।

ফুক্স এগিয়ে এল, 'আমাদের বিনীত নিবেদন এই যে, আপনি অনুগ্রহ করে আমাদের উদ্যোগ আবার খুলবার অনুমতি দিন। দাস্তার হাত থেকে আমাদের রক্ষা করুন।' আমতা-আমতা করে ফুক্স বলে ফেলল 'দাস্তা' শব্দটা।

একটা ক্রুদ্ধ জকুটিতে অঙ্ককার হয়ে উঠল পেথলিউরার মুখ, 'আমার সৈন্যরা দাস্তা করে বেড়ায় না, মনে রাখবেন।'

হাল ছেড়ে দেবার ভঙ্গিতে বাহ বিস্ফেপ করল ফুক্স।

পেথলিউরার কাঁধটা একটা স্নায়বিক উত্তেজনায় সংকুচিত হল—অসময়ে এই প্রতিনিধিদলের উপস্থিতি তাকে অত্যন্ত বিরক্ত করে তুলেছে। তার পেছনে দাঁড়িয়ে গোলুব তার কালো গৌফ কামড়াচ্ছিল। তার দিকে ফিরে পেথলিউরা বলল, 'পান্ কর্নেল, আপনার কসাকদের বিরুদ্ধে এই একটা অভিযোগ এসেছে। ব্যাপারটা তদন্ত করে যা ব্যবস্থা করতে হয় করুন।' তারপর ইনস্পেক্টরের দিকে ফিরে শুকনো গলায় বলল, 'কুচকাওয়াজ আরম্ভ করতে পারেন এবার।'

মন্দভাগ্য প্রতিনিধিদল এখানে এসে গোলুবকে দেখতে পাবে বলে আশা করেনি, তাই এখন তাড়াতাড়ি সরে পড়ার চেষ্টা করল।

এতক্ষণে অনুষ্ঠানিক কুচকাওয়াজের প্রত্নতি দর্শকদের সমস্ত মনোযোগ টেনে নিয়েছে। উচ্চকিত গলায় নির্দেশ জারি হতে শুরু হয়েছে।

গোলুব বাইরে একটা শান্তভাব নিয়ে ব্রুডস্টেইনের দিকে এগিয়ে এসে জোরে ফিসফিসিয়ে বলল, 'বেরো এখান থেকে, হতভাগা কাফের। নইলে কিমা বানিয়ে ছাড়ব তোদের!'

ব্যান্ড বাজতে শুরু করল, সামনের দলগুলো কুচকাওয়াজ করে গেল মাঠের মাঝখানে দিয়ে। পের্ণলিউরার সামনে দিয়ে পরপর যাবার সময় তারা যান্ত্রিকভাবে হেঁকে উঠল 'জয়তু'! তারপর বড় সড়কে নেমে পড়ে একে একে পাশের রাস্তায় অদৃশ্য হয়ে গেল। এক-একটা সৈন্যদলের সামনে আনকোরা নতুন শ্বাকি রঙের উর্দি-পরা অফিসাররা তাদের হাতের ছড়িগুলো দুলিয়ে হালকা চালে হেঁটে চলেছে—ভাবখানা যেন তারা এই একটু বেড়াতে বেরিয়েছে। সৈন্যদের বন্দুকে শিক ব্যবস্থাটার মতোই এই কায়দা করে ছড়ি দুলিয়ে চলার চালটাও ডিভিশনে সবে চালু হয়েছে।

কুচকাওয়াজের শেষের দিকটায় রাখা হয়েছে নতুন রঙকটদের দলটাকে। এলোমেলোভাবে সারি বেঁধে, অসমানভাবে পা ফেলে, পরস্পরের গায়ে ধাক্কা মেরে এগিয়ে আসছে তারা।

সামনে দিয়ে যাবার সময় তাদের খালি-পা ফেলার একটা মৃদু আওয়াজ উঠল—এদের চলার মধ্যে কোনোমতে একটা শৃঙ্খলার ভাব আনবার জন্য অফিসাররা বৃথাই প্রাণপণে চেষ্টা করে চলেছে। এদের দ্বিতীয় দলটা কুচকাওয়াজ করে যাবার সময় মঞ্চটার কাছাকাছি একটা সারিতে শাদা কাপড়ের শার্ট-পরা একটি চাষী-ছেলে প্রধান আতামানের দিকে বড় বড় চোখে হাঁ করে তাকিয়ে এতই আশ্চর্য হয়ে গেল যে পথের উপর একটা গর্তে হোঁচট খেয়ে চিৎপাত হয়ে পড়ে গেল মাটিতে।

পাথরে ঠুকে গিয়ে একটা জোরালা আওয়াজ তুলে ছিটকে পড়ল তার রাইফেলটা। উঠবার চেষ্টা করতেই সে তার পেছনের লোকদের ধাক্কা আবার পড়ে গেল।

দর্শকরা হাসিতে ফেটে পড়ল। তারপরে সারি ভেঙে সম্পূর্ণ বিশৃঙ্খলভাবে রঙকটদের এই দলটা মাঠ পার হয়ে গেল। হতভাগ্য ছেলেটা তার রাইফেল কুড়িয়ে নিয়ে ছুটল নিজের দলের পিছু ধরতে।

পের্ণলিউরা আর এই কিস্তি দৃশ্যটা না-দেখে মুখ ঘুরিয়ে কুচকাওয়াজে শেষপর্যন্ত অপেক্ষা না করেই চলে এল মোটরগাড়ির দিকে। পেছনে পেছনে এসে ইনস্পেক্টর জিজ্ঞেস করল, 'পান্ আতামান কি ভোজ উপস্থিত হবেন না?'

সংক্ষেপে তীক্ষ্ণ উত্তর দিল পের্ণলিউরা, 'না!'

গির্জাটাকে ঘেরাও-করা উঁচু বেড়াটার গায়ে চেপে গিয়ে সেগেই ক্রবাক, ভালিয়া আর ক্রিমকা ভিড়ের মধ্যে দাঁড়িয়ে কুচকাওয়াজ দেখছিল।

বেড়াটার শিকগুলো চেপে ধরে মাঠের মধ্যে লোকদের দিকে ঘূর্ণান্বিত চোখে তাকিয়ে তাকিয়ে দেখছিল সেগেই।

ইচ্ছে করে চেঁচিয়ে উদ্ধত সুরে বলল সে, 'চল রে ভালিয়া, দোকানপাট গুটিয়ে নিয়েছে।'

বলেই সে মুখ ঘুরিয়ে চলে গেল বেড়াটার কাছ থেকে। অবাক হয়ে কিছু লোক তার দিকে তাকিয়ে রইল। সবাইকে উপেক্ষা করে সে তার বোন আর ক্রিমকার সঙ্গে চলে গেল গেটের দিকে।

\*

\*

\*

কর্নেল চের্ননিক আর সেই ক্যাপ্টেনটি ঘোড়া হাঁকিয়ে এসে কম্যান্ড্যান্টের অফিসে নামল। একজন পেয়াদার তদ্বিরে ঘোড়াদুটো রেখে দ্রুতপায়ে তারা এসে ঢুকল সান্ধীদের ঘরে।

পেয়াদাটিকে তীব্র গলায় জিজ্ঞেস করল চের্ননিক, 'কম্যান্ড্যান্ট কোথায়?'

খতমত খেয়ে বলল লোকটি, 'জানি না, কোথায় যেন গেছেন।'

নোংরা অগোছালো ঘরটার চারিদিকে তাকাল চের্ননিক—ছড়ানো-ছিটানো বিছানাগুলোর উপরে গড়াগড়ি দিচ্ছে কম্যান্ড্যান্টের কসাক-সান্ধীগুলো, অফিসারদের ঢুকতে দেখে তাদের কারও ওঠার কোনো চেষ্টা পর্যন্ত দেখা গেল না।

গর্জন করে উঠল চের্ননিক, 'তয়োরের খোঁয়াড় এটা, নাকি? আর, এভাবে তয়োরের মতো গড়াগড়ি দেবার অনুমতি কে দিয়েছে তোমাদের?' চিৎপাত হয়ে গা এলিয়ে দেওয়া লোকদের দিকে ঝেঁকিয়ে উঠল চের্ননিক।

একজন কসাক উঠে বসে একটা টেকুর তুলে বিরক্তিরে ঘোঁৎঘোঁৎ করে বলল, 'তুমি আবার এসে চেঁচামেচি শুরু করলে কেন? চেঁচামেচি করার লোক তো আমাদের এখানেই আছে।'

'কী বললি!' লাফিয়ে তার দিকে এগিয়ে এল চের্ননিক, 'কার সঙ্গে কথা বলছিস রে বেজনা? আমি কর্নেল চের্ননিক, বুঝলি রে তয়োর? ওঠ, উঠে পড় সবাই, নইলে চাবুক খাওয়াব তোদের!' ক্রুদ্ধ কর্নেল সান্ধীদের ঘরময় ছুটোছুটি আরম্ভ করে দিল, 'এক মিনিট সময় দিলাম—এর মধ্যে নোংরা ঝাড়ু দিয়ে, বিছানাপত্র গুছিয়ে নিয়ে নোংরা চোপাগুলো মানুষের সামনে দাঁড় করাবার মতো করে তোলা। একদল লুটেরা-ডাকাত বলে মনে হচ্ছে দেখে তোদের, কসাক নয়!'

রাগে আত্মহারা হয়ে কর্নেল তার পথের উপরে পড়ে-থাকা একটা ময়লা জলের পায়ে প্রচণ্ড লাথি মারল।

ক্যাপ্টেনটাও কিছু কম যায় না—গালাগালগুলোকে আরও জোরালো করে তুলবার জন্য সে তার তিন-ফালি চাবুকটাকে চালিয়ে লোকগুলোকে তাদের বিছানা থেকে তুলে দিল, 'প্রধান আতামান কুচকাওয়াজ দেখছেন। যে-কোনো মুহূর্তে তিনি এখানে এসে পড়তে পারেন। তৈরি হয়ে নাও সব, জলদি!'

ব্যাপারটা গুরুতর বুঝে কসাকরা সবাই লাফিয়ে উঠে দারুণ ব্যস্ত হয়ে পড়ল—সত্যিই তাদের চাবুক খেতে হতে পারে, এ-ব্যাপারে চের্ননিকের খ্যাতির কথাটা তারা জানে। মুহূর্তের মধ্যে দারুণ কাজের সাড়া পড়ে গেল।

ক্যাপ্টেন বলল, 'কয়েদিগুলোকে একবার দেখে নিলে ভালো হয়। কাদের যে ধরে বন্ধ করে রেখেছে কিছুই বলা যায় না। প্রধান আতামান যদি দেখতে আসেন, তাহলে ক্ষাসাদ হতে পারে।'

‘চাবিটা কার কাছে?’ চেরনিয়াক জিজ্ঞেস করল সান্স্টিটিকে, ‘একুনি খুলে দাও দরজাটা।’

একজন সার্জেন্ট তাড়াতাড়ি এগিয়ে এসে তালাটা খুলে দিল।

‘কম্যান্ড্যান্ট কোথায়? কতক্ষণ আর আমি তার জন্যে অপেক্ষা করব? একুনি তাকে খুঁজে বের করে এখানে পাঠিয়ে দাও’, হুকুম দিল চেরনিয়াক। ‘দেউড়ির সামনে সান্স্টিদের সারবন্দি করে দাও! রাইফেলগুলোয় বেয়নেট লাগানো নেই কেন?’

‘আমরা তো সবোমাত্র কাল এখানে এসেছি’, তাড়াতাড়ি কৈফিয়ত দেবার চেষ্টা করে সার্জেন্টটি কম্যান্ড্যান্টের খোঁজে বেরিয়ে পড়ল।

ভাঁড়ারঘরের দরজাটা লাথি মেরে খুলে ফেলল ক্যান্টেন। ভেতরের কয়েকজন কয়েদি মেঝে থেকে উঠে দাঁড়াল, বাকি কজন স্থির হয়ে শুয়ে রইল।

‘দরজাটা আরও ভালো করে খুলে দাও’, হুকুম দিল চেরনিয়াক, ‘যথেষ্ট আলো নেই এখানে।’

তারপরে কয়েদিদের মুখগুলো ভালো করে দেখল সে। বাঙ্কের ধারে বসা বুড়োমানুষটার দিকে ঝেঁকিয়ে উঠল সে, ‘তোমাকে ধরে আনা হয়েছে কেন?’

আধা দাঁড়িয়ে উঠে ঢিলে-প্যান্ট আঁট করতে করতে চেরনিয়াকের কড়া হুকুমে ঘাবড়ে গিয়ে বুড়ো খতমত খেয়ে বলল, ‘আমি নিজেই সেটা জানি না। স্রেফ ধরে এনে পুরে দিয়েছে। উঠোন থেকে একটা ঘোড়া হারিয়ে যায়, কিন্তু আমি তার কিছু জানি না।’

‘কার ঘোড়া?’ তাকে বাধা দিয়ে জিজ্ঞেস করল ক্যান্টেন।

‘ফৌজের ঘোড়া। আমার বাড়িতে যে-সেপাইগুলো আছে তারাই সেটাকে বিক্রি করে দিয়ে সেই পয়সায় মদ-টদ খেয়েছে আর এখন আমার ওপর দোষ চাপাচ্ছে।’

চেরনিয়াক বুড়োর সর্বাস্থে একবার দ্রুত চোখ বুলিয়ে নিয়ে অধৈর্য ভঙ্গিতে একবার কাঁধ-ঝাঁকুনি দিয়ে চেঁচিয়ে উঠল, ‘জিনিশপত্র যা আছে নিয়ে বেরিয়ে যাও এখান থেকে!’ তারপরে সে ‘সামোগন’-বুড়ির দিকে ফিরল।

বুড়ো তার কানকে বিশ্বাস করতে পারছে না—ক্ষীণদৃষ্টি চোখদুটো পিটপিট করে সে ক্যান্টেনের দিকে ফিরে জিজ্ঞেস করল, ‘তার মানে, আমি যেতে পারি?’

ক্যান্টেন মাথা নাড়ল, যার অর্থ : যত তাড়াতাড়ি পারো ততই ভালো।

বাঙ্কের একপাশে তার পুঁটলিটা ঝুলছিল, সেটাকে তাড়াতাড়ি তুলে নিয়েই বুড়ো ছুটে বেরিয়ে গেল দরজা দিয়ে।

‘তারপর, তুমি শ্রেণ্ডার হলে কেন?’ চেরনিয়াক প্রশ্ন করল ‘সামোগন’-বুড়িকে।

একমুখ খাবার চিবুচ্ছিল বুড়ি, সেটাকে গিলে ফেলে সে গড়গড় করে উত্তর দিয়ে গেল, ‘অন্যায়রকমভাবে—অত্যন্ত অন্যায়রকমভাবে আমাকে এনে এখানে পুরেছে ওরা, পান কর্তা। ভেবে দেখুন একবার—গরিব বিধবার ‘সামোগন’ খেয়ে শেষে কিনা তাকেই এনে তালাবদ্ধ করে রাখা!’

চেরনিয়াক জিজ্ঞেস করল, ‘সামোগনের কারবার করো নাকি তুমি?’

আহত ভঙ্গিতে বলল বুড়ি, ‘কারবার? মোটেই না। কম্যান্ড্যান্ট এসেই চার-চারটে বোতল তুলে নিল, একটা পয়সাও ঠেকাল না। ব্যাপারটা কীরকম বলি জুন : অন্যের তৈরি মদ খাবে, কিন্তু দাম দেবে না কখনো। এটাকে কি আপনি কারবার করা বলবেন?’

‘খুব হয়েছে, যা ভাগ এখন থেকে!’

আর দ্বিতীয়বার হুকুমটা শোনার জন্য দাঁড়াল না বুড়ি। বুড়িটা তুলে নিয়ে, কৃতজ্ঞতার সেলাম ঠুকতে ঠুকতে দরজা পর্যন্ত গিয়ে সে বলল, ‘ভগবান মঙ্গল করুন কর্তামশাইদের!’

অবাক হয়ে বড় বড় চোখে মজাটা লক্ষ করে যাচ্ছিল দোলিন্নিক। কয়েদিদের কেউ বুঝতে পারছিল না ব্যাপারখানা কী। এইটুকুই শুধু তাদের কাছে স্পষ্ট হয়ে উঠেছে যে, এই আগন্তুকরা নিশ্চয়ই কোনোকিছু কর্তাব্যক্তি গোছের হবে, যারা ইচ্ছে করলেই কয়েদিদের ছেড়ে দিতে পারে। ‘আর, তুমি?’ চেরনিয়াক দোলিন্নিককে প্রশ্ন করল।

ক্যাপ্টেনটা ঝঁকিয়ে উঠল, ‘পান্ কর্নেল যখন কথা কইবেন তখন উঠে দাঁড়াবে!’ ধীরে ধীরে দোলিন্নিক মেঝে থেকে উঠে দাঁড়াল।

চেরনিয়াক আবার জিজ্ঞেস করল, ‘তোমাকে ধরা হয়েছে কেন?’

দোলিন্নিক কয়েক মুহূর্ত তাকিয়ে রইল কর্নেলের নিখুঁতভাবে পাকানো গোঁফের দিকে, তার পরিষ্কার করে কামানো মুখের দিকে, তারপরে কর্নেলের নতুন টুপি আর তাতে আটকানো এনামেলের ত্রিশূলের দিকে। একটা বেপরোয়া চিন্তার ঝিলিক খেলে গেল তার মাথায় : ‘বলা যায় না এতে যদি কার্যসিদ্ধি হয়!’

‘রাত্রি আটটার পর বাইরে রাস্তায় বেরিয়েছিলাম বলে আমাকে ধরা হয়েছে।’ মাথায় প্রথমেই যা এল সেইটেই বলে ফেলল সে।

একটা অনিশ্চিত উদ্বেগ নিয়ে সে দাঁড়িয়ে রইল উত্তরের অপেক্ষায়।

‘রাত্রিবেলা বাইরে কী করছিলে?’

‘ঠিক রাত্রি হয়নি তখনও, শুধু এগারোটা হবে তখন।’

এটা বলার সময় তার আর বিশ্বাস ছিল না যে অন্ধকারে এই ঢিল ছোড়াটা ঠিক লেগে যাবে। ‘চলে যাও!’ এই সংক্ষিপ্ত হুকুমটা শোনার সময় তার হাঁটুদুটো কঁপে গেল। কোর্তাটা ভুলে ফেলে রেখেই দোলিন্নিক তাড়াতাড়ি বেরিয়ে গেল; ক্যাপ্টেন ততক্ষণে আরেকজন কয়েদিকে জেরা করতে লেগেছে।

করচাগিনকে জিজ্ঞেস করা হল সবশেষে। ঘটনাটা দেখতে দেখতে সম্পূর্ণ হতবুদ্ধি হয়ে গিয়ে সে মেঝের উপর বসেছিল। প্রথমটায় সে বিশ্বাসই করতে পারেনি যে দোলিন্নিককে ছেড়ে দেওয়া হল। ‘এভাবে এরা সবাইকে ছেড়ে দিচ্ছে কেন? কিন্তু দোলিন্নিক...ও যে বলল, আইন ভেঙে সন্ধ্যায় রাস্তায় চলার জন্যে ওকে থেঙার করা হয়েছিল...’ ভাবতে ভাবতে ব্যাপারটা এইবার বুঝে ফেলল সে।

কর্নেল ততক্ষণে হাড়জিরজিরে জেলৎসারকে জেরা করতে শুরু করেছে যথারীতি, ‘তোমাকে ধরে আনা হয়েছে কেন?’

ঘাবড়ে গিয়ে ফ্যাকাসে হয়ে উঠেছে নাপিতের মুখটা, বেমজা বলে ফেলল সে, ‘ওরা তো বলে আমি নাকি আন্দোলন করছিলাম, আন্দোলনটা যে কী করলাম, তা তো ঘুণাকরও বুঝতে পারছি না।’

কান ঝাড়া হয়ে উঠল চেরনিয়াকের, ‘কী বললে? আন্দোলন? কিসের আন্দোলন করছিলে তুমি?’

বিমূঢ়ের মতো হাতদুটো ছড়িয়ে দিল জেলৎসার, 'আমি নিজেই তা জানি না। শুধু বলেছিলাম, প্রধান আত্মমানের কাছে একটা দরখাস্ত পেশ করার জন্যে, ওরা তাতে ইহুদিদের সই জোগাড় করছিল।'

'কিসের দরখাস্ত?' চেরনিয়াক আর ক্যান্টেন দু'জনেই তার দিকে রীতিমতো ভয়-জাগানো ভঙ্গিতে এগিয়ে এল।

'ইহুদি-ঠেঙানো বন্ধ করার জন্যে দরখাস্ত। জানেন, সাংঘাতিক ঠেঙানি হয়ে গেছে আমাদের ওপর। লোকজন সকলেরই দারুণ আতঙ্ক।'

'হয়েছে, থাক', তাকে বাধা দিল চেরনিয়াক, 'দরখাস্ত পেশ করার মজাটা টের জীবনে পাবি 'খন—নোংরা ইহুদি কোথাকার!' ক্যান্টেনের দিকে ফিরে সে দ্রুত উচ্চারণে বলে গেল, 'এটাকে কোথাও রাখার উপযুক্ত ব্যবস্থা করো। সদর দপ্তরে পাঠিয়ে দাও—সেখানে আমি নিজে এর সঙ্গে কথা বলব। এই দরখাস্তের ব্যাপারটার পেছনে কে আছে সেটা দেখতে হবে।'

প্রতিবাদ করার চেষ্টা করল জেলৎসার, ক্যান্টেনটা তার পিঠে এক ঘা কষাল ঘোড়ার চাবুকটা দিয়ে, 'থাম্ ব্যাটা বেজন্মা!'

যন্ত্রণায় কঁকড়ে গিয়ে জেলৎসার টলে পড়ল এককোণে। ঠোটদুটো কঁপে-কঁপে উঠল তার, গলার কাছে ঠেলে-ওঠা কান্না সে চাপল কোনোক্রমে।

শেষ দৃশ্যের সময়ে পাভেল উঠে দাঁড়িয়েছে। ভাঁড়ারঘরে তখন জেলৎসার ছাড়া সে একমাত্র কয়েদি।

ছেলেটার সামনে দাঁড়িয়ে তাকে আগাগোড়া খুঁটিয়ে দেখল চেরনিয়াক তার কালো চোখের তীক্ষ্ণ দৃষ্টি দিয়ে, 'তুই কেন এখানে?'

পাভেলের জবাব তৈরি ছিল, 'জুতোর তলার জন্যে একটা জিনের চামড়া কেটে নিয়েছিলাম বলে।'

'কার ঘোড়ার জিন?' বুঝতে না-পেরে জিজ্ঞেস করল কর্নেল।

'আমাদের বাড়িতে দু'জন কসাক জায়গা নিয়েছে। আমি তাদের একজনের ঘোড়ার পুরনো একটা জিনের একটুকরো চামড়া কেটে নিয়েছিলাম জুতোর তলার জন্যে। কসাকরা তাই এখানে এনে পুরেছে আমাকে।' ছাড়া পাবার একটা উদ্দাম আশায় সে আরও বলল, 'যদি জানতাম যে এটা করা অন্যায়...'

অত্যন্ত তাচ্ছিল্যের সঙ্গে কর্নেল তাকাল পাভেলের দিকে, বলল, 'এই কম্যান্ড্যান্টটা কি আর কয়েদ করার লোক পায়নি? পাক্কা আহাম্মক একটা! কাদের ধরে এনেছে দ্যাখো একবার!' দরজার দিকে ফিরে সে চোঁচিয়ে উঠল, 'যা, বাড়ি যা, তোর বাপকে বল গে তোকে ধরে যেন দু-ঘা লাগায় বেশ করে। শিগগির বেরো!'

হেঁ মেরে দোলিনিকের কোর্তাটা তুলে নিয়েই পাভেল ছুট মারল দরজা দিয়ে। তখনও সে তার কানকে বিশ্বাস করতে পারছে না, বুকে হাতুড়ি পিটছে, যেন এখুনি ফেটে যাবে। কর্নেলটা যখন আঙিনায় বেরিয়ে আসছে তখন তার পেছন দিয়ে পাভেল সাক্ষীদের ঘরটা পেরিয়ে বাইরে বেরিয়ে এল। বেড়াটার বাইরে রাস্তায় এসে পড়েছে সে মুহূর্তের মধ্যে।

হতভাগ্য জেলহাসার একা পড়ে রইল ভাঁড়ারঘরটায়। বিপন্ন-চোখে সে একবার চারিদিকে তাকাল, অনিচ্ছায় দরজটার দিকে একবার এগিয়ে এল কয়েক পা, কিন্তু ঠিক তখনই একজন সান্ধী এসে দরজাটা বন্ধ করে তালাটা খুলিয়ে দিয়ে দরজার পাশে টুলটায় বসল।

বাইরে দেউড়িতে বেরিয়ে এসে চেরনিয়াক নিজের ওপরে বেশ খুশি হয়ে ক্যাপ্টেনকে বলল, ‘কয়েদিদের একবার দেখে নিয়ে ভালোই করেছি আমরা। কী সব আজেবাজে লোককে এনে পুরেছিল ভাবো একবার! এই কম্যান্ড্যান্টটিকে দু-এক সপ্তাহ কয়েদ করে রাখতে হবে দেখছি। আচ্ছা, তাহলে এবার যাওয়া যাক।’

সার্জেন্টটা সমস্ত সান্ধীদের আঙিনায় এনে সার বেঁধে দাঁড় করিয়েছে। কর্নেলকে দেখেই সে ছুটে এসে জানাল, ‘সব ঠিকঠাক করে ফেলা হয়েছে পান কর্নেল।’

রেকাবটায় পা রেখে জিনের উপর হালকাভাবে লাফিয়ে উঠল চেরনিয়াক। ক্যাপ্টেন তার গোয়ার ঘোড়াটাকে নিয়ে একটু মুশকিলে পড়েছে। রাশ টেনে চেরনিয়াক সার্জেন্টকে বলল, ‘কম্যান্ড্যান্টকে বলো, যত বাজে লোকদের এনে সে ওখানে পুরেছিল, আমি তাদের সবাইকে ছেড়ে দিয়েছি। আর বলবে, এখানকার কাজকর্ম সে যেভাবে চালিয়ে এসেছে তার জন্যে আমি তাকে দু-সপ্তাহ কয়েদখানায় রাখব। আর ওই-যে লোকটা এখন আছে ওখানে, ওকে এখনই সদর দপ্তরে পাঠিয়ে দাও। সান্ধীদের তৈরি থাকতে বলো।’

‘যে আজ্ঞে, পান কর্নেল।’ সার্জেন্ট সেলাম ঠুকল।

জুতোর নাল দিয়ে ঘোড়ার তলপেট ঠুকে কর্নেল আর ক্যাপ্টেন রওনা হয়ে গেল গির্জার মাঠের দিকে। সেখানে ততক্ষণে কুচকাওয়াজ শেষ হয়ে আসছে।

\*

\*

\*

পর পর সাতটা বেড়া টপকে পার হবার পর পাভেল নিতান্ত ক্লান্ত হয়ে থেমে পড়ল। আর চলতে পারছে না সে।

দম-আটকানো ওই ভাঁড়ারঘরের খাঁচায় এই কদিন না-খেয়ে বন্দি হয়ে থাকার ফলে তার শক্তি নিঃশেষ হয়ে এসেছে। কোথায় যাবে সে? বাড়ি যাবার কোনো প্রশ্নই ওঠে না। ক্রবাক্দের বাড়ি গেলে যদি সেখানে কেউ তাকে দেখে ফেলে, তাহলে তাদের গোটা পরিবারটার ওপরেই সর্বনাশ নেমে আসবে।

কী করবে না-জেনেই পাভেল আরেকবার অন্ধভাবে ছুট লাগাল শহরের বাইরের দিকে তরিতরকারির জমিগুলো আর বাগানগুলো পেছনে ফেলে। একটা বেড়ার গায়ে ধাক্কা খেয়ে চমকে উঠে হুঁশ ফিরে পেয়ে সে অবাক হয়ে চারিদিকে তাকাল : লম্বা বেড়াটার উপরে প্রধান বনপরিদর্শকের বাগান। নিঃশেষে ক্লান্ত তার পাদুটো এইখানে এনে ফেলেছে তাকে! এদিকে আসার কোনো চিন্তাই যে তার ছিল না।

তাহলে এখানে কী করে এল সে?

প্রশ্নটার কোনো উত্তর পাভেল পেল না।

তবু, বিশ্রাম তাকে নিতেই হবে কিছুক্ষণের জন্য—অবস্থাটা ভালো করে বুঝে নিয়ে তাকে ঠিক করতে হবে এর পরে কী করবে না-করবে। মনে পড়ল তার—বাগানটার শেষের দিকে একটা কুঞ্জ আছে, সেখানে কেউ তাকে দেখতে পাবে না।

লাফ দিয়ে বেড়াটার গা বেয়ে উঠে উপকে এধারে এসে সে পড়ল বাগানের মধ্যে। গাছের ফাঁকে একটু একটু দেখা যাচ্ছে বাড়িটা। সেদিকে একনজর তাকিয়ে সে এগোল কুঞ্জের দিকে। হতাশ হয়ে পাভেল লক্ষ করল, কুঞ্জের প্রায় চারিদিকই খোলা। গ্রীষ্মের সময় সে বুনে আঙ্গুরলতার ঝাড় কুঞ্জটাকে চারধারে ঘিরে দেয়াল তুলেছিল সেটা ভকিয়ে করে গেছে।

ফিরে যাবে বলে ঘুরে দাঁড়াল পাভেল, কিন্তু এখন আর তার উপায় নেই। পেছনে প্রচণ্ড ঘেউঘেউ আওয়াজ শুরু হয়ে গেছে—পাক খেয়ে ঘুরে দাঁড়িয়েই পাভেল দেখতে পেল বাড়িটার দিক থেকে শুকনো পাতা-ছড়ানো রাস্তাটা বেয়ে একটা বিরাট কুকুর সোজা তার দিকে এগিয়ে আসছে। কুকুরটার হিংস্র চিৎকারে বাগানের নিস্তব্ধতা ভেঙে যাচ্ছে।

আত্মরক্ষার জন্য প্রস্তুত হল পাভেল।

প্রথম আক্রমণটা সে ঠেকাল জোরে পা মেরে। কিন্তু কুকুরটা আরেকবার ঝাঁপিয়ে পড়বার জন্য ঝুঁপ পাতছে। এমন সময় একটা পরিচিত গলায় ডাক ভেসে এল, 'এদিকে আয় ট্রেসার! এদিকে আয়!'

এই ডাকটা না এলে পাভেলের সঙ্গে কুকুরটার এই সংঘর্ষের ফলাফল কী দাঁড়াতে বলা যায় না।

তোনিয়া ছুটে আসছিল পথটা বেয়ে। গলা-বন্ধনী ধরে ট্রেসারকে পেছনে টেনে তোনিয়া বেড়ার ধারে দাঁড়ানো তরুণটির দিকে তাকাল, 'এখানে কী কাজ আপনার? কুকুরটা আর একটু হলেই ভীষণভাবে কামড়ে দিত আপনাকে, ভাগ্য ভালো যে আমি...'

হঠাৎ থেমে গেল তোনিয়া, তার চোখদুটো বিষয়ে বিস্ময়িত হয়ে উঠল। তাদের বাগানে ঢুকে পড়েছে এই-যে ছেলেটা, এর চেহারার সঙ্গে করচাগিনের চেহারার কী আশ্চর্য মিল!

বেড়ার পাশে মূর্তিটা নড়ে উঠল।

'ভূমি!' কোমল গলায় বলল তরুণটি, 'চিনতে পারছ না আমাকে?'

চোঁচিয়ে উঠে তোনিয়া হঠাৎ উত্তেজনায় ছুটে এল তার কাছে, 'পাভেল, তুমি?'

ট্রেসার এই চিৎকারটাকে আক্রমণের ইঙ্গিত মনে করে একলাফে এগিয়ে এল।

'থাম ট্রেসার, থাম!'

তোনিয়া তাকে কয়েকটা লাথি দিতেই ট্রেসার মর্মান্বিত হয়ে তার পায়ের ফাঁকে লেজ ঝুঁজে মাথা নিচু করে চলে গেল বাড়ির দিকে।

পাভেলের দুই হাত চেপে ধরে তোনিয়া বলল, 'ছাড়া পেয়ে গেছ তুমি?'

'তুমি জানতে তাহলে?'

'সব জানি আমি', উত্তেজনা চেপে রাখতে না-পেরে একনিশ্বাসে বলে গেল তোনিয়া, 'লিজ্জা বলেছে আমাকে। কিন্তু এখানে এলে কী করে? ওরা ছেড়ে দিল নাকি তোমায়?'

'হ্যাঁ, কিন্তু সেটা ভুল করে', ক্রান্তভাবে উত্তর দিল পাভেল, 'আমি পালিয়ে এসেছি। এতক্ষণে বোধহয় ওরা আমাকে খুঁজতে লেগেছে। কী করে যে এখানে এলাম তা সত্যিই জানি না। তোমাদের বাগানের এই লতায়েরটায় একটু বিশ্রাম করব ভেবেছিলাম। ভয়ানক ক্রান্ত হয়ে পড়েছি', ক্ষমা চাওয়ার ভঙ্গিতে সে বলল।



দু-এক মুহূর্ত তার দিকে তাকিয়ে রইল তোনিয়া। একটা নিবিড় কক্ষণা আর স্নেহের আবেগে ছেয়ে গেল তার মন।

‘পাভেল, আমার পাভেল’, তার হাতদুটো নিজের হাতের মধ্যে জোরে চেপে ধরে তোনিয়া মৃদুস্বরে বলল, ‘আমি ভালোবাসি তোমায়...কিন্তু? গৌয়ার ছেলে, সেবারে তুমি অমন করে চলে গেলে কেন? আচ্ছা, এবারে তাহলে তুমি থাকছ আমাদের কাছে, আমার কাছে। কিছুতেই আর আমি যেতে দিচ্ছি না তোমায়। আমাদের বাড়ি নিশ্চিন্তে থাকবে যতদিন খুশি—কোনো গোলমাল নেই এখানে।’

মাথা নাড়ল পাভেল, ‘এখানে আমাকে ওরা যদি খুঁজে পায়, তাহলে? না, তোমার বাড়িতে থাকা চলবে না আমার।’

তোনিয়ার হাত মুচড়ে ধরল পাভেলের আঙুলগুলো, তার চোখের পাতাগুলো কেঁপে কেঁপে উঠল।

‘যদি রাজি না হও, তাহলে আর কক্ষনো আমাকে দেখতে পাবে না তুমি। আরতিগুম নেই এখানে, তাকে পাহারাঅলা দিয়ে নিয়ে যাওয়া হয়েছে রেলস্টেশনে। সমস্ত রেলের লোকজনকে জোর করে কাজে নিয়ে নেওয়া হচ্ছে। কোথায় যাবে তুমি?’

তোনিয়ার এই উদ্বেগ যে কেন তা পাভেল জানে। তবে এই-যে মেয়েটি তার বড় প্রিয় তারই বিপদ ডেকে আনার ভয়েই সে ইতস্তত করছে। কিন্তু খিদেয়, ক্লান্তিতে, এই ক’দিনের নিদারুণ অভিজ্ঞতার অবসন্নতার ফলে শেষপর্যন্ত সে রাজি হয়ে গেল।

তোনিয়ার ঘরে সোফাটায় যখন সে বসে আছে তখন রান্নাঘরে মা আর মেয়ের মধ্যে এই কথাবার্তা চলছিল, ‘শোনো মা, করচাগিন বসে আছে আমার ঘরে। ও আমার কাছে পড়তে আসত, তোমার মনে আছে তো? আমি তোমার কাছে কিছু লুকোতে চাই না। একজন বলশেভিক জাহাজিকে পালিয়ে যেতে সাহায্য করার জন্যে ও শ্রেণ্ডার হয়েছিল। ও আজ জেল থেকে পালিয়ে এসেছে, কিন্তু কোথাও যাবার জায়গা নেই ওর।’ গলাটা কেঁপে গেল তোনিয়ার, ‘মা, লক্ষ্মীটি, কয়েকদিনের জন্যে ওকে এখানে থাকার অনুমতি দাও।’

মা তাঁর মেয়ের অনুনয়-ভরা চোখের দিকে তাকিয়ে রইলেন। তারপর বললেন, ‘বেশ, আমার আপত্তি নেই। কিন্তু ওকে থাকতে দিবি কোন ঘরে?’

হঠাৎ রাগা হয়ে উঠল তোনিয়ার মুখ। বিমূঢ়ভাবে, উত্তেজিত হয়ে বলে ফেলল সে, ‘আমার ঘরে সোফাটার উপরে ও ঘুমোতে পারবে। আপাতত বাবাকে কিছু বলার দরকার নেই।’

মা সোজাসুজি মেয়ের চোখের দিকে তাকালেন। তারপর জিজ্ঞেস করলেন, ‘এরই জন্যে বুঝি তুমি কেঁদেছ?’

‘হ্যাঁ।’

‘কিন্তু ও তো এখনও নেহাত ছেলেমানুষ।’

‘তা জানি’, বিব্রতভাবে রাউজের হাতাটা আঙুল দিয়ে দলা পাকাতে পাকাতে তোনিয়া বলল, ‘কিন্তু ও না-পালিয়ে এলে ওকে ওরা গুলি করে মারত বয়স্কের মতো!’

করচাগিন তাঁর বাড়িতে থাকায় ইয়েকাতেরিনা মিখাইলভনা উদ্ভিগ্ন হয়ে উঠেছেন। শ্রেণ্ডার হয়েছিল এই ছেলেটা, যাকে তিনি চেনেন না বললেই হয়, তার প্রতি মেয়ের এই টান দেখে তিনি মনে-মনে বেশ একটু অস্বস্তিবোধ করছিলেন।

এদিকে ব্যাপারটার নিষ্পত্তি হয়ে গেছে বলে ধরে নিয়ে তোনিয়া তার অতিথির আরাম-বিরামের ব্যাপারটা ভাবতে লেগেছে, 'আগে ওর চান করা দরকার, মা। আমি এখন সেটার ব্যবস্থা করছি। ভয়ানক নোংরা হয়ে আছে ও—কয়লাঅলারই মতো। বহুদিন ওর চান-টান হয়নি।'

বাস্তব হয়ে তোনিয়া চলে এল পাভেলের স্নানের জন্য জল গরমের আর কিছু ধোয়া জামা-কাপড়ের ব্যবস্থা করতে। সব করার পর সে ছুটে এসে ঘরে ঢুকে পাভেলের হাত ধরে তুলে অনাবশ্যক বাক্যব্যয় না করে তাকে স্নানঘরে টেনে নিয়ে গেল।

'আগাগোড়া পোশাক বদলাতে হবে তোমার। এই একপ্রস্থ পোশাক তোমার পরার জন্যে। তোমার জামাকাপড়গুলো ধোয়াতে হবে। ইতিমধ্যে ওইগুলো পরবে।' একটা চেয়ারের উপরে সুন্দর করে ভাঁজ-করে-রাখা নীল রঙের আর গলার কাছে শাদা ডোরাকাটা একটা জাহাজি কোর্তা, আর পায়ের দিকে চওড়া একটা পাখলুন দিয়ে দেখাল সে।

অবাক-চোখে তাকাল পাভেল। তোনিয়া হেসে তাকে বুঝিয়ে দিল, 'আমি একবার একটা শখের পোশাকের নাচের আসরে পরেছিলাম ওটা। তোমার গায়ে ঠিক হবে। আচ্ছা, তাড়াতাড়ি করো এবার। তোমার চান হতে হতে আমি এদিকে কিছু খাবার ব্যবস্থা করছি।'

বেরিয়ে গিয়ে দরজাটা বন্ধ করে দিল সে। কাপড়চোপড় খুলে টবের জলে নেমে পড়া ছাড়া পাভেলের আর গত্যন্তর রইল না।

ঘন্টাখানেক পরে মা, মেয়ে আর পাভেল তিনজনে রান্নাঘরে খেতে বসল।

ভয়ানক খিদে পেয়েছিল পাভেলের, তিন প্লেট খেয়ে ফেলার পর সে নিজের খাওয়া সম্বন্ধে সচেতন হয়ে উঠল। প্রথমটায় সে ইয়েকাতেরিনা মিখাইলভনার সামনে কিছুটা লজ্জা পান্ছিল, কিন্তু তিনি এত বন্ধুর মতো ব্যবহার করছেন দেখে অল্পক্ষণের মধ্যেই তার সে ভাবটা কেটে গেল।

খাওয়ার পর তারা তোনিয়ার ঘরে এসে বসল। ইয়েকাতেরিনা মিখাইলভনার অনুরোধে পাভেল যা যা ঘটেছিল সব বলল। শেষে তিনি জিজ্ঞেস করলেন, 'তারপরে, এখন তুমি কী করবে বলে ভেবেছ?'

প্রশ্নটা শুনে পাভেল দু-এক মুহূর্ত ভেবে নিয়ে বলল, 'আগে একবার আরতিগুমের সঙ্গে দেখা করতে চাই, তারপরে এখান থেকে চলে যেতে হবে আমাকে।'

'কিন্তু যাবে কোথায়?'

'ভাবছি উমান কিংবা কিয়েভে চলে যেতে পারব বোধহয়। নিজেই সেটা এখনও ঠিক জানি না। কিন্তু এখান থেকে যত শিগগির পারি চলে যেতেই হবে।'

এত অল্প সময়ের মধ্যেই-যে তার পরিবেশটা সম্পূর্ণ বদলে গেছে সেটা যেন পাভেলের বিশ্বাস হচ্ছে না। মাত্র আজ সকালেই সে ছিল নোংরা একটা গারদের মধ্যে, আর এখন কিনা সে বসে আছে তোনিয়ার পাশে ফরসা জামাকাপড় পরে—আর সবচেয়ে বড় কথা, সে এখন মুক্ত।

জীবনে কত অদ্ভুত পরিবর্তন না আসতে পারে! কোনো মুহূর্তে আকাশটা রাত্রির মতো কালো মনে হয়, তারপরেই আবার সূর্যের দীপ্তি ফোটে। ফের ধরা পড়বার বিপদ যদি না থাকত, তাহলে এই মুহূর্তে তাকেই বলা যেতে পারত সবচেয়ে সুখী ছেলে।

কিন্তু সে জানে, এই বিরাট নিস্তরূপ বাড়িটায়ও সে মোটেই নিরাপদ নয়।

তাকে চলে যেতেই হবে এখন থেকে, তা সে যেখানেই হোক-না কেন।

কিন্তু চলে যাবার কথাটা ভাবতে মোটেই ভালো লাগছে না। বীর গ্যারিবন্দির জীবনী পড়তে পড়তে কী উন্মাদনায় ছেয়ে গেছে তার মন! গ্যারিবন্দির ওপরে তারি হিংসা হত পাভেলের, অথচ গ্যারিবন্দির জীবন কেটেছে নানান কষ্টের মধ্যে দিয়ে—সবসময় তাঁর পেছন পেছন তাড়া করে ফিরেছে আর তাঁকে ছুটে বেড়াতে হয়েছে এক জায়গা থেকে আরেক জায়গায়। আর পাভেলের তো মোটে সাতদিন কেটেছে কষ্ট আর নির্ধাতনের মধ্যে, তাতেই তার কাছে এই সাতদিন যেন পুরো একটি বছর বলে মনে হয়েছে। না, স্পষ্টই দেখা যাচ্ছে সে ঠিক বীরের গড়নটা পায়নি।

তোনিয়া তার দিকে ঝুঁকে পড়ে জিজ্ঞেস করল, ‘কী ভাবছ?’ তার দুই চোখের নীলিমা যেন অগাধ।

‘তোনিয়া, খুস্তিনার কথা বলব, শুনবে?’

‘হ্যাঁ, নিশ্চয়’, আগ্রহের সঙ্গে বলল তোনিয়া।

পাভেল তার কারা-সজিনীর সেই দুঃখের কাহিনী বলে গেল, ‘...আর সেই শেষ তার সঙ্গে দেখা।’ শেষের কথাগুলো অতিকষ্টে উচ্চারণ করল পাভেল।

তারপর নিস্তরূপ ঘরে ঘড়ির টিকটিক আওয়াজটা জোরালো হয়ে উঠল। মাথাটা নিচু হয়ে গেল তোনিয়ার, গলায় ঠেলে-ওঠা কান্নাটাকে আটকাবার জন্য সে জোরে ঠোট কামড়ে ধরল।

তার দিকে তাকিয়ে পাভেল মনস্থির করে বলল, ‘আজ রাat্রেই আমাকে যেতে হবে।’

‘না, না, আজ রাat্রে আমি তোমাকে কোথাও যেতে দিচ্ছি না!’

পাভেলের এলোমেলো চুলগুলোর ফাঁকে সে স্নেহে তার পেলব উষ্ণ আঙুল বুলিয়ে দিল...

‘তোনিয়া, তোমাকে একটা কাজ করতে হবে। একজন কাউকে ডিপোয় গিয়ে বোঝ নিতে হবে আরতিওমের কী হয়েছে আর সেরিওঝাকে গিয়ে একটা চিঠি দিয়ে আসতে হবে। একটা কাকের বাসায় আমার একটা পিস্তল লুকানো আছে। সেটা আনবার জন্যে আমি যেতে পারি না। কিন্তু সেরিওঝা সেটা আমাকে এনে দিতে পারবে। তুমি পারবে আমার জন্যে এই কাজটা করতে?’

উঠে দাঁড়াল তোনিয়া, ‘আমি এক্ষুনি লিজা সুখার্কোর কাছে যাচ্ছি। ও আর আমি দু’জনে একসঙ্গে ডিপোয় যাব। চিঠিটা লিখে দাও, সেরিওঝাকে দিয়ে দেব আমি। কোথায় থাকে সে? সে যদি তোমার সঙ্গে দেখা করতে চায়, তাহলে কি তাকে বলব তুমি কোথায় আছ?’

একটু ভেবে পাভেল বলল, ‘আজ সন্ধ্যায় তোমাদের বাগানে তাকে পিস্তলটা নিয়ে আসতে বোলো।’

অনেক দেরিতে তোনিয়া ফিরল। পাভেল তখন গভীর ঘুমে আচ্ছন্ন। তার হাতের ছোঁয়ায় জেগে উঠল পাভেল, চোখ মেলে দেখে তোনিয়া দাঁড়িয়ে আছে সামনে, খুশির হাসি তার মুখে।

‘কিছুক্ষণের মধ্যেই আরতিগুম আসছে এখানে। সবেমাত্র ফিরেছে সে। লিজার বাবা তার জামিন হয়েছেন, এক ঘণ্টার জন্যে তাকে ওরা আসতে দিতে রাজি হয়েছে। ইঞ্জিনটা দাঁড়িয়েই আছে ডিপোয়। তুমি-যে এখানে রয়েছ, সেটা আমি আরতিগুমকে বলে উঠতে পারিনি। শুধু বলেছি, আমার তাকে খুব জরুরি কিছু কথা বলার আছে। এই যে, এসে গেছে সে!’

ছুটে গেল তোনিয়া দরজাটা খুলে দেবার জন্যে। বিশ্বয়ে নির্বাক হয়ে আরতিগুম দাঁড়িয়ে রইল দরজাটার কাছে, নিজের চোখকে বিশ্বাস করতে পারছে না সে। আরতিগুম ঢোকার পর তোনিয়া দরজাটা বন্ধ করে দিল যাতে পড়বার ঘরটায় টাইফাসে অসুস্থ তার বাবার কানে কথাবার্তা না যায়।

আর একমুহূর্তের মধ্যেই আরতিগুম ছুটে এসে এমন দারুণ জোরে চেপে জড়িয়ে ধরল পাভেলকে যে তার হাড় মটকে উঠল। চোঁচিয়ে উঠল আরতিগুম, ‘পাভেল! ভাইটি আমার!’

\*

\*

\*

তারপর সব কথাবার্তার শেষে ঠিক হল : পাভেল পরের দিন চলে যাবে এখান থেকে; কাজাতিনগামী একটা ট্রেনে ক্রম্বাক তাকে তুলে নেবে, সে-ব্যবস্থা আরতিগুম করে দেবে।

আরতিগুম সাধারণত গভীর আর স্বল্পভাষী, কিন্তু এখন সে তার ভাইকে ফিরে পেয়ে আনন্দে আত্মহারা—পাভেলের কী হল না-হল জানতে না-পেরে তার এই ক’টা উদ্ভিগ্ন দিন কেটেছে গভীর দুচ্চিন্তায়।

‘তাহলে তাই ঠিক হল। কাল ভোর পাঁচটায় তুই মালগুদামে আসবি। ওরা যখন ইঞ্জিনে কাঠ নিতে থাকবে, তুই তখন সোঁধিয়ে যাবি। আমার ইচ্ছে করছে আরও কিছুক্ষণ বসে তোর সঙ্গে গল্প করি, কিন্তু ফিরে যেতে হবে আমাকে। কাল তোর রওনা হবার সময় দেখা করব। ওরা রেলের লোকজনদের নিয়ে একটা পল্টন গড়ে তুলবার জোগাড়ে আছে। জার্মানরা এখানে থাকার সময়ে যেমন ছিল, ঠিক তেমনি এখনও আমরা রাইফেলধারী সাক্ষীদের পাহারায় চলাফেরা করি।’

ভাইয়ের কাছ থেকে বিদায় নিয়ে চলে গেল আরতিগুম।

দ্রুত সন্ধ্যা ঘনিয়ে আসছে, সেগেই একুনি এসে পড়বে পিস্তলটা নিয়ে। সেগেইয়ের অপেক্ষায় পাভেল উত্তেজনায় অন্ধকার ঘরটায় পায়চারি করতে থাকল। তোনিয়া তার বাবার ঘরে, সেখানে তার মা-ও আছেন।

বাগানে বেড়াটার ধারে অন্ধকারে সেগেইয়ের সঙ্গে দেখা হল তার, নিবিড় আবেগে পরস্পরের করমর্দন করল দুই বন্ধু। সেগেই সঙ্গে করে নিয়ে এসেছে ভালিয়াকে। নিচুগলায় কথাবার্তা চালান তারা।

সেগেই বলল, 'আমি পিস্তলটা আনতে পারিনি। তোদের উঠোনটায় গিজগিজ করছে পেথলিউরার লোক। চারিদিকে গাড়িগুলোকে জড়ো করে রেখেছে ওরা, আগুন জ্বালিয়ে হৈ-হল্লা করছে। তাই গাছে চড়ে আর পিস্তলটা আনতে পারিনি—ভারি বেইজ্ঞত হলাম তোর কাছে!' খুব দমে গেছে সেগেই।

তাকে সাবুনা দিল পাভেল, 'যাক্ গে। এই হয়তো ভালো হল—পিস্তলটা-সমেত যদি পথে ধরা পড়ি তাহলে বরং আরও খারাপ। কিন্তু ওটা জোগাড় করে তোর কাছে রাখিস নিশ্চয়।'

পাভেলের কাছে সরে এল ভালিয়া, 'কখন যাচ্ছ?'

'কাল, ভোরের আলো ফুটে-না-ফুটে।'

'কী করে সরে পড়লে ওখান থেকে? বলো, শুনি।'

তাড়াতাড়ি ফিসফিসিয়ে পাভেল ঘটনাটা বলে গেল।

তারপরে সে তার সাথীদের কাছ থেকে বিদায় নিল। সেগেই সাধারণত বেশ হাসিখুশি, কিন্তু আজ তার কোনো ঠাট্টা নেই, সে উদ্ভিগ্ন হয়ে পড়েছে। রুদ্ধকণ্ঠে ভালিয়া বলল, 'আমাদের শুভেচ্ছা রইল, পাভেল। ভুলে যেও না আমাদের।'

তারপরে তারা চলে গেল, মুহূর্তের মধ্যে অন্ধকারে হারিয়ে গেল তারা।

বাড়ির ভেতরে সবকিছু নিস্তব্ধ, শুধু নির্দিষ্ট সময়ের ব্যবধানে ঘড়ির টিকটিক শব্দটা শোনা যাচ্ছে। এই বাড়ির দু'জন বাসিন্দার চোখে সে-রাত্রের মতো আর ঘুম নেই। ছ-ঘণ্টা পরেই তারা পরস্পরের কাছ থেকে বিদায় নেবে, বোধহয় আর তাদের মধ্যে দেখাই হবে না—সুতরাং কী করে ঘুমোবে তারা? মনের মধ্যে তাদের অজস্র না-বলা ভাবনা-চিন্তা পাক খেয়ে উঠছে—এই অল্প সময়টুকুর মধ্যে কি আর সেইসব ভাবনা-চিন্তাকে ভাষায় প্রকাশ করা সম্ভব?

আশ্চর্য মধুর আর পবিত্র সেই যৌবনের প্রারম্ভে প্রেমের মাদকতা যখন অজ্ঞাত, তখন সেটা শুধু অস্পষ্টভাবে অনুভব করা যায় হৃদয়ের দ্রুতগতি-স্পন্দনের মধ্যে দিয়ে; প্রিয়তমার বুকের হঠাৎ স্পর্শ পেয়ে তখন হাতটা যেন ভয়ে কেঁপে ওঠে আর শেষ ধাপ পর্যন্ত এগিয়ে যাওয়ার পথে প্রহরীর মতো বাধা দেয় প্রথম যৌবনের পবিত্র বন্ধুত্ব! প্রিয়তমার বাহুবন্ধনের অনুভূতি আর অগ্নিময় চুম্বন-স্পর্শের চেয়ে মধুর আর কী আছে!

তাদের এতদিনের বন্ধুত্বের মধ্যে এই হচ্ছে তাদের দ্বিতীয় চুম্বন। পাভেলের মার খাবার অভিজ্ঞতা বহুবার হয়েছে, কিন্তু আদর সে মায়ের কাছ থেকে ছাড়া আর কারুর কাছ থেকে পায়নি। তাই আজ তার হৃদয়ের গভীরতম অন্তস্তল পর্যন্ত নিবিড় আবেগে আলোড়িত হয়ে উঠছে।

এ-পর্যন্ত জীবনের নির্মম দিকটাই সে দেখে এসেছে, সে জানত না যে জীবন এত সুন্দর হতে পারে—এতদিনে তোনিয়ার কাছ থেকে সে বুঝল আনন্দ কাকে বলে।

তোনিয়ার চুলের সুগন্ধ-ভরা বাতাসে নিশ্বাস নিতে নিতে তার মনে হল যেন সে অন্ধকারে তার চোখদুটি দেখতে পাচ্ছে।

'তোনিয়া, তোমাকে যে কত ভালোবাসি কী করে বোঝাব, কী করে বলতে হয় তা তো আমার জানা নেই।'

পাভেলের মাথার মধ্যে যেন কীরকম করে উঠেছে। তোনিয়ার কোমল পেলব দেহটা কী আশ্চর্যরকম সংবেদনশীল!...কিন্তু প্রথম যৌবনের বন্ধুত্ব পরম নির্ভরে পবিত্র!

‘তোনিয়া, এই সমস্ত গোলমাল যখন কেটে যাবে, আমি নিশ্চয়ই মিস্ত্রি হিশেবে কাজ পেয়ে যাব একটা। তুমি যদি সত্যিই আমাকে চাও, যদি সত্যি সত্যিই তুমি আমাকে ভালোবাসো, আমাকে নিয়ে এটা যদি তোমার একটা খেলা না হয়, আমি তোমার খুব ভালো স্বামী হয়ে থাকব। কঙ্কনো মারধোর করব না তোমায়, তোমার মনে একটুও আঘাত দেব না কখনও—প্রতিজ্ঞা করছি।’

পরস্পরের বাহুবন্ধনের মধ্যে তারা ঘুমিয়ে পড়তে পারে, এই ভয়ে আলাদা হয়ে গেল তারা—পাছে তোনিয়ার মা তাদের দেখে ফেলে কিছু খারাপ ভেবে বসেন।

পরস্পরকে কখনও ভুলবে না—এই প্রতিজ্ঞা করার পর যখন তারা ঘুমিয়ে পড়ল, তখন রাত্রি শেষ হয়ে আসছে।

ইয়েকাতেরিনা মিখাইলভনা পাভেলকে ভোর-ভোর ডেকে তুললেন।

তাড়াতাড়ি লাফিয়ে উঠল সে বিছানা ছেড়ে।

স্নানের ঘরে গিয়ে যতক্ষণে সে তার নিজের পোশাক আর জুতো পরে দোলিন্নিকের কোর্তাটা উপরে চাপিয়ে নিচ্ছে, ততক্ষণে ইয়েকাতেরিনা মিখাইলভনা তোনিয়াকে জাগিয়ে তুললেন।

ভোরের ধূসর কুয়াশার মধ্যে দিয়ে তারা দু’জনে দ্রুত পায়ে এগুল স্টেশনমুখো। পেছনের পথটা দিয়ে কাঠের গুদামে পৌঁছে দেখে আরতিগুম কাঠ-বোঝাই একটা ইঞ্জিনের পাশে তাদের জন্য অধীরভাবে অপেক্ষা করছে।

হিসহিস্ শব্দে বাষ্প-বেরিয়ে-আসা ধোয়ায় আচ্ছন্ন একটা বিরাট ইঞ্জিন ধীরে ধীরে এগিয়ে আসছে—ক্রম্বাক জ্ঞানলার মধ্যে থেকে মাথা বের করল।

তোনিয়া আর আরতিগুমের কাছ থেকে দ্রুত বিদায় নিয়ে পাভেল লোহার শিকটা চেপে ধরে উঠে পড়ল ইঞ্জিনটার ভেতরে। পেছনে তাকিয়ে দেখল লেভেল-ক্রসিং-এর কাছে দুটো পরিচিত চেহারা : আরতিগুমের লম্বা আকৃতিটা আর তার পাশে তোনিয়ার ছোট্ট পেলব দেহখানি।

এক ঝলক বাতাস তার ব্লাউজের গলাবন্ধনীটা উড়িয়ে দিয়ে আর তার বাদামি চুলে ঢেউ খেলিয়ে দিয়ে বয়ে গেল। পাভেলের দিকে হাত নাড়ছে তোনিয়া।

তার দিকে আড়চোখে তাকিয়ে আরতিগুম দেখল, তোনিয়ার চোখে প্রায় জল এসে গেছে।

দীর্ঘনিশ্বাস ফেলে মনে-মনে ভাবল আরতিগুম, ‘হয় আমি একটা আস্ত আহাম্মক, নয়তো এদের মাথার কুঁটিলে হয়ে গেছে। বোঝো পাভেলের কাণ্ডটা! আমি কিনা এদিকে ভাবছি যে ও আজও আমাদের সেই নেহাত ছেলেমানুষটিই আছে!’

ট্রেনটা একটা বাক নিয়ে অদৃশ্য হয়ে যাবার পর সে তোনিয়ার দিকে ফিরে বলল, ‘আমরা তাহলে বন্ধু হলাম এখন থেকে, কেমন?’ তোনিয়ার ছোট্ট হাতখানা তার বিরাট থাবাটার মধ্যে হারিয়ে গেল।

ট্রেনটা গতি সম্বয় করছে—দূর থেকে তার গুম্‌গুম্‌ আওয়াজ ভেসে এল।

পুরো এক সপ্তাহ ধরে শহরের বাসিন্দারা রাত্রে ঘুমোতে যায় আর সকালে জেগে ওঠে কামানের গুম্‌গুম্‌ শব্দ আর রাইফেলের খট্‌খট্‌ আওয়াজের মধ্যে। সর্বত্র ট্রেন্স খোঁড়া হয়েছে, গোটা শহরটাকে যেন কাঁটাতারের বেড়াজালে ঘিরে ফেলেছে। শুধু মাঝরাত্রির পরে কয়েক ঘণ্টার জন্য গণ্ডগোলটা কমে আসে, কিন্তু তখনও মাঝে মাঝে নিঃশব্দতাতুর্ক ভেঙে ভেঙে যায় ফৌজি ফাঁড়িগুলোর থেকে দু-পক্ষের অস্তিত্ব জ্ঞানবার জন্য গুলি চালানোর শব্দে। ভোরবেলায় রেলস্টেশনের গোলন্দাজ-বাহিনী তাদের কামানের সারির পাশে কাজে ব্যস্ত হয়ে পড়ে। এক-একটা কামানের লম্বা নল তার কালো নাক দিয়ে হিংস্র উদ্‌গিরণ করে আর লোকগুলো দফায় দফায় তার ভেতরে গুঁজে দেয় আরও গোলা আর বিস্ফোরক। যতবার একজন গোলন্দাজ কামানের রশিটা ধরে টান মারছে, ততবারই পায়ের নিচে মাটিটা উঠছে কেঁপে-কেঁপে। শহর থেকে মাইল-দেড়েক দূরে লালবাহিনী একটা গ্রাম অধিকার করে ঘাঁটি গেড়ে আছে—গোলাগুলো সেই গ্রামের উপর দিয়ে শাঁশী শব্দে অন্যসব আওয়াজকে ছাপিয়ে বেরিয়ে যাচ্ছে, সঙ্গে সঙ্গে ফেটে পড়ছে মাটির চাঙড়।

গ্রামের মাঝখানে একটা উঁচু টিলার উপরে পুরনো পোলিশ মঠটা দাঁড়িয়ে আছে, সেইখানে তার সামনের ক্ষমিতে লালবাহিনীর কামানগুলো।

এই কামানশ্রেণীর সামরিক কমিশনার কমরেড জ্যামোস্টিন লাফিয়ে দাঁড়িয়ে উঠল। সে এতক্ষণ একটা কামানের পেছনদিকের উপরে মাথা রেখে ঘুমোচ্ছিল। ভারী একটা মাউজার পিস্তল ঝোলানো তার কোমরবন্ধনীটা আঁট করে বাঁধতে বাঁধতে জ্যামোস্টিন উড়ন্ত একটা গোলার সাঁইসাঁই শব্দ শুনতে শুনতে সেটার ফেটে-পড়া পর্যন্ত অপেক্ষা করে রইল। তারপর তার জোরালো গলার আওয়াজে প্রতিধ্বনিত হয়ে উঠল সারা জায়গাটা, 'বাকি ঘুমটা কাল হবে কমরেডসব। উঠে পড়ো!'

গোলন্দাজরা সবাই তাদের নিজের নিজের কামানের পাশে ঘুমুচ্ছিল। কমিশনার জ্যামোস্টিনের মতোই তারা সবাই চটপট উঠে দাঁড়াল—শুধু সিদোর্চুক ছাড়া। অনিচ্ছাভরে মাথাটা তুলে সে চারিদিকে তাকাল ঘুমে ভারী তার চোখদুটো তুলে, 'শুয়োরগুলো—দিনের আলো ফুটতে-না-ফুটতেই আরম্ভ করে দিয়েছে। স্রেফ বদমাইশ—যতসব বেজ্ঞম্বা!

জ্যামোস্টিন হেসে উঠল, 'সব কাণ্ডজ্ঞানহীন লোক, বুঝলে সিদোর্চুক, ওরা হচ্ছে তাই। তুমি-যে একটু ঘুমোতে চাও, সেটাও ওরা গ্রাহ্যই করে না।'

গোলন্দাজটি অসন্তুষ্ট হয়ে গজগজ করতে করতে টেনে তুলল নিজেকে।

কয়েক মিনিটের মধ্যেই মঠের সামনের কামানগুলো থেকে গোলা ছোঁড়া শুরু হয়ে গেল—শহরের মধ্যে ফেটে পড়তে লাগল গোলাগুলো। চিনিকলের লম্বা চিমনিটার মাথার উপরে কাঠের তক্তা জুড়ে একটা মাচার মতো করে নিয়ে সেখানে পাহারায় বসে রয়েছে একজন পের্‌লিউরা-অফিসার আর একজন টেলিফোন-করার লোক।

চিমনিটার ভেতরের দিককার লোহার মই বেয়ে তারা সেখানে উঠেছে।

এখান থেকে গোটা শহরটা স্পষ্ট দেখা যায়। এই সুবিধাজনক জায়গাটা থেকে তারা গোলন্দাজবাহিনীকে গোলা ছোড়ার নির্দেশ দিচ্ছে। শহর অবরোধ করে রয়েছে যে লাল-সৈন্যদল তাদের সমস্ত গতিবিধি এরা দূরবীন দিয়ে দেখতে পাচ্ছে। বলশেভিকরা আজ বিশেষভাবে সক্রিয় হয়ে উঠেছে। অনবরত গুলি চালাতে চালাতে একটা সাঁজোয়া ট্রেন ধীরে ধীরে এগুচ্ছে পদোন্নত স্টেশনের দিকে। তার ওদিকটায় হামলাদার পদাতিক ফৌজের অবস্থান দেখা যায়। হঠাৎ আক্রমণ চালিয়ে শহরটাকে অধিকার করে নেবার জন্য কয়েকবার চেষ্টা করেছে লালবাহিনী। কিন্তু শহরে ঢোকার মুখগুলোয় দৃঢ়ভাবে ঘাঁটি গেড়ে বসে আছে পের্শলিউরা-বাহিনীর সৈন্যরা। ট্রেনগুলো এক এক ঝলক বারুদের আগুন উদ্‌গিরণ করেছে, একটা কানে-তালা-ধরা আওয়াজে ভরে গেছে চারিদিক। তারপরে সেটা একটা নিরবচ্ছিন্ন গর্জনের রূপ নিয়ে আক্রমণগুলো চালাবার সময়ে চরমে উঠেছে। জ্বলন্ত সীসের সেই শিলাবৃষ্টির ঝাপটায় অমানুষিক একটা প্রয়াসের চাপ সহিতে না-পেরে বলশেভিক বাহিনীর সারিটা পিছিয়ে গেছে, সামনে মাঠের উপরে তারা ফেলে এসেছে কতকগুলো অসাড় দেহ।

আজ শহরের উপরে আঘাতগুলো আগের চেয়ে অনেক বেশি সুদৃঢ় আর ঢের বেশি ঘন ঘন। কামানের গোলা-ছোড়ার প্রতিধ্বনিতে কেঁপে উঠছে চারিদিক। চিমনির মাথায় বাঁধা মাচাটার উপর থেকে দেখতে পাওয়া যাবে—বলশেভিক সৈন্যসারি ক্রমশই ধীরে ধীরে দৃঢ়পায়ে এগিয়ে আসছে, মাঝে মাঝে মাটির উপরে গুয়ে পড়ছে মানুষগুলো, আবার উঠে দাঁড়িয়ে দুর্বীর গতিতে সামনের দিকে এগিয়ে আসছে। এতক্ষণে তারা স্টেশনটা প্রায় দখল করে নিয়েছে। পের্শলিউরা-বাহিনীর ব্যবহারযোগ্য রিজার্ভ সৈন্যদল যে-কটা ছিল, সেগুলিকেও লড়াইয়ে লাগানো হয়েছে। কিন্তু তাদের অবস্থানের বিভিন্ন জায়গায় যে-ভাঙন ধরেছে, সেটাকে ঝুঁকতে পারল না। একটা বেপরোয়া দৃঢ়তার সঙ্গে বলশেভিক বাহিনীর আক্রমণকারী দলটা ঠেলে এসে স্টেশন-সংলগ্ন রাস্তাগুলোর উপরে ছড়িয়ে পড়ল। স্টেশনের উপরে আক্রমণটাকে ঝুঁকছিল যারা, সেই পের্শলিউরা-বাহিনীর তৃতীয় রেজিমেন্ট শহরের প্রান্তে বাগান আর সবজিক্ষেতগুলোয় তাদের শেষ অবস্থানগুলি থেকে লাল সৈনিকদের একটা সংক্ষিপ্ত আর সাংঘাতিক আক্রমণের ফলে উৎখাত হয়ে শহরের ভিতরে ছড়িয়ে পড়ল। নতুন করে তাদের ঘাঁটি গাড়বার আগেই লালফৌজের সৈন্যরা শহরের রাস্তায় দলে দলে নেমে এল। পচাদরক্ষী কিছু পের্শলিউরা-সৈন্য তাদের আক্রমণ ঝুঁকতে চেষ্টা করছিল—লালফৌজের সৈন্যরা বেয়নেট চালিয়ে তাদের হঠিয়ে দিল প্রচণ্ড বেগে।

সেগেই ক্রম্বাকের পরিবার আর তাদের সবচেয়ে কাছের প্রতিবেশীরা আশ্রয় নিয়েছে মাটির তলার কুঠিরিতে—সেগেইকে সেখানে কিছুতেই আটকে রাখা গেল না। মায়ের কাকুতি-মিনতি সত্ত্বেও সে মাটির নিচের ঠাণ্ডা ঘরটা থেকে সিঁড়ি বেয়ে উঠে এসেছে। ‘সাগাইদাচনি’ নাম লেখা একটা সাঁজোয়া গাড়ি বেপরোয়া গুলি চালাতে চালাতে ঘড়ঘড় শব্দে বেরিয়ে গেল বাড়িটার পাশ দিয়ে। তার পেছন-পেছন সম্পূর্ণ বিশৃঙ্খলভাবে ছুটে পালাচ্ছে আতঙ্কগ্রস্ত পের্শলিউরার লোকজন। ওদের একজন সেগেইদের আঙিনায় ঢুকে পড়ে পাগলের মতো কোনোরকমে তাড়াতাড়ি টেনে ছিঁড়ে ফেলল তার কার্ভজের কোমরবন্ধনী, শিরস্ত্রাণ আর রাইফেলটা; তারপরে বেড়াটা



টপকে ওদিককার সবজি-বাগানের আড়ালে অদৃশ্য হয়ে গেল। রাস্তাটা দেখে নিল সেগেই। রাস্তা বেয়ে ছুটে চলেছে পেথলিউরা-সৈন্যরা দক্ষিণ-পশ্চিমের স্টেশনের দিকে; তারা যাতে পালিয়ে যাবার সুযোগ পায়, তার জন্য একটা সাঁজোয়া গাড়ি পেছন-পেছন চলেছে গুলি ছুড়তে ছুড়তে। শহরমুখো বড় রাস্তাটা একেবারে জনহীন। তারপরে একজন লালফৌজের লোককে ছুটে আসতে দেখা গেল। রাস্তার উপর শুয়ে পড়ে সে গুলি চালাতে লাগল। তার পেছনে একে একে আরও দুজন লালফৌজের লোক এসে পড়ল...সেগেই দেখতে পেল—গুঁড়ি মেরে মেরে গুলি চালাতে চালাতে এগিয়ে আসছে তারা। রোদে-পোড়া তামাটে রঙ একজন চীনা শরীরটাকে টান করে সোজা দৌড়ে আসছে—তার চোখদুটো রক্তাক্ত, গায়ে তার একটা গেঞ্জি, মেশিনগানের কার্তুজ-বন্ধনী পরা, দুই হাতে দুটো হাতবোমা। ওদের সবার আগে-আগে আসছে একজন নিতান্ত অল্পবয়সী লালফৌজের লোক, তার হাতে একটা হালকা মেশিনগান। লালফৌজের এই অগ্রগামী দলটাকে শহরে ঢুকতে দেখে সেগেইয়ের মন আনন্দে ভরে উঠল। রাস্তার উপরে ছুটে বেরিয়ে এসে সে যত জোরে পারে চেষ্টা করে উঠল, ‘কমরেডসব জিন্দাবাদ!’

এমন আকস্মিকভাবে সে ছুটে বেরিয়ে এসেছে রাস্তায় যে-চীনাটি তাকে প্রায় ধাক্কা মেরে ফেলে দিয়েছিল আর কী। লালফৌজের লোকটির প্রথম প্রতিক্রিয়া হল ছেলেটার উপরে ঝাঁপিয়ে পড়ার একটা ইচ্ছে। কিন্তু সেগেইয়ের মুখে আনন্দের উল্হাস দেখে সে সামলে নিল নিজেকে। ভয়ানক রকম হাঁফাতে হাঁফাতে চীনাটি তার দিকে তাকিয়ে চেষ্টা করে উঠল, ‘পেথলিউরা কোথায়?’

কিন্তু তার কথা শুনতে পায়নি সেগেই। বাড়ির আঙিনায় ছুটে ফিরে এসে সে ইতিমধ্যে পেথলিউরা-সৈন্যটির ফেলে-যাওয়া কার্তুজ-বন্ধনী আর রাইফেলটা তুলে নিয়ে লালফৌজের লোকদের পেছনে পেছনে ছুটেছে। দক্ষিণ-পশ্চিমের স্টেশনটা দখল করে না-নেওয়া পর্যন্ত তারা সেগেইকে লক্ষ্যই করেনি। সেখানে অস্ত্রশস্ত্র-গোলা-বারুদ আর রসদে বোঝাই কতকগুলো ট্রেন বিচ্ছিন্ন করে নিয়ে শত্রুপক্ষকে বনের মধ্যে তাড়িয়ে দেবার পর তারা একটু বিশ্রাম নিয়ে আবার নতুন করে দল সাজাবার জন্য কিছুক্ষণের মতো থামল।

সেগেইয়ের কাছে এগিয়ে এসে তরুণ মেশিনগান-গোলন্দাজটি বিম্বিত স্বরে জিজ্ঞেস করল, ‘তুমি কোথেকে এলে কমরেড?’

‘আমি এই শহরের ছেলে। আমি তোমাদের আসার অপেক্ষায় ছিলাম।’

লালফৌজের লোকেরা ঘিরে ধরল সেগেইকে।

চীনাটি ভাঙা-ভাঙা ক্লশ-ভাষায় বলল, ‘আমি জানি ওকে, ‘কমরেডসব জিন্দাবাদ!’ বলে ও চেষ্টা করে উঠেছিল। বলশেভিক, আমাদের লোক, বেশ ভালো ছেলে!’ সেগেইয়ের কাঁধে একটা সমর্থনের চাপড় মেরে একগাল হেসে সে বলল।

আনন্দে নেচে উঠল সেগেইয়ের মন। সঙ্গে সঙ্গেই এরা তাকে আপন করে নিয়েছে নিজেকে একজন হিশেবে। ওদের সঙ্গে সেও বেয়নেট-চার্জ করে স্টেশনটার দখল নিয়েছে।

নড়েচড়ে উঠেছে শহরটা। এই ক’দিনের কষ্টের অভিজ্ঞতার পর শহরের লোকজন তাদের মাটির নিচের কুঠরিগুলো থেকে বেরিয়ে ফটকে এসে দাঁড়াল লালফৌজের দলগুলোর শহরে ঢোকা দেখবার জন্য। এইভাবেই সেগেইয়ের মা আর বোন ভালিয়া

তাকে লালফৌজের সৈন্যসারির মধ্যে কদম ফেলে যেতে দেখল। তার মাথায় টুপি নেই, কিন্তু একটা কার্তুজ-বন্ধনী পরে আছে সে আর কাঁধে ঝুলছে একটা রাইফেল।

অত্যন্ত বিরক্ত হয়ে হাতদুটো নাড়ল আস্তিনিনা ভাসিলিয়েভনা।

তার ছেলেটা শেষপর্যন্ত এইসব লড়াইয়ের মধ্যে জড়িয়ে পড়েছে। এর ফল পেতে হবে ওকে! দ্যাখো একবার কাণ্ডখানা—গোটা শহরের লোকজনের সামনে দিয়ে কিনা সেরিওঝা কুচকাওয়াজ করে চলেছে রাইফেল নিয়ে! পরে ফ্যাসাদে পড়বে নিশ্চয়।

আস্তিনিনা ভাসিলিয়েভনা আর সামলাতে পারল না নিজেকে। চেষ্টায়ে উঠল, 'সেরিওঝা, এক্ষুনি বাড়ি আয়! হতভাগা, দেখাচ্ছি দাঁড়া! শিখিয়ে দেব কী করে লড়াই করতে হয়!' এই বলে সে তার ছেলেকে ফিরিয়ে আনার দৃঢ় উদ্দেশ্য নিয়ে রাস্তায় নেমে পড়ে এগিয়ে এল।

মায়ের হাতে কত কানমলা খেয়েছে সেগেই, কিন্তু এবার সে তার মায়ের দিকে দুই চোখের কঠোরদৃষ্টি মেলে তাকাল, অপমানে আর লজ্জায় লাল হয়ে সে পালটা জবাব দিল, 'চেষ্টাও না অত! আমি যাব না।' বলতে বলতে সে না-থেমেই কদম-কদম এগিয়ে গেল।

রাগে আত্মহারা হয়ে উঠেছে আস্তিনিনা ভাসিলিয়েভনা, 'এই বুঝি তোর মায়ের সঙ্গে ব্যবহার! আচ্ছা, এর পরে বাড়ি ফিরবি নে!'

'ফিরব না বাড়ি!' মুখ না-ফিরিয়েই চেষ্টায়ে উঠল সেগেই।

নিতান্ত বিমূঢ় হয়ে রাস্তার উপর দাঁড়িয়ে রইল আস্তিনিনা ভাসিলিয়েভনা। তার পাশ দিয়ে রোদে-পোড়া ধুলোয়-ভরা লালফৌজের সৈন্যের সারি পা ফেলে এগিয়ে গেল।

হাসিখুশিভরা একটা জোরালো গলায় কে-একজন বলে উঠল, 'কেন্দো না, মা! তোমার ছেলেকে আমরা কমিশার করে দেব।'

হালকা খুশিভরা হাসির একটা দমক ছড়িয়ে গেল গোটা পল্টনটার মধ্যে। সৈন্যসারির সামনের দিকে লোকেরা গলা মিলিয়ে গান ধরল :

কমরেড, শোনো ওই বেজে ওঠে ভেরি—

চলো সংগ্রামে, তুলে নাও হাতিয়ার।

মুক্তির রাজ্যকে জয় করে নিতে

যত বাধা কেটে চলি, গতি দুর্বীর।

দৃশ্য সেই ঐকতানে যোগ দিল সৈন্যরা সবাই, আর সেগেইয়ের কচি তাজা গলা মিশে গেল সেই গানের জোয়ারে। একটা নতুন পরিবারের অন্তর্ভুক্ত হয়েছে সেগেই। সেখানে তার হাতেও ধরা আছে একটা বন্দুক।

\*

\*

\*

লেনিনিস্টিদের বাড়ির ফটকে একটুকরো শাদা কার্ডবোর্ড আটকানো আছে। তার গায়ে সংক্ষেপে লেখা : 'বিপ্লবী কমিটি'।

তার পাশেই দৃষ্টি আকর্ষণ করার মতো আরেকটা পোষ্টার : লালফৌজের একজন লোক দর্শকের চোখের দিকে তাকিয়ে তার দিকে সোজা আঙুল দেখিয়ে দাঁড়িয়ে আছে, আর তার নিচে লেখা—'তুমি কি লালফৌজে ভর্তি হয়েছ?'

ডিভিশনের রাজনীতি বিভাগের লোকেরা সারারাত্রি ধরে শহরের সর্বত্র এই পোস্টারগুলো লাগিয়ে ফিরেছে। পোস্টারের কাছেই ঝুলছে শেপেতোভ্কা শহরের মেহনতিদের উদ্দেশে বিপ্লবী কমিটির প্রথম ঘোষণাপত্র :

কমরেডসব! প্রলেতারীয় ফৌজ এই শহরের দখল লইয়াছে। সোভিয়েত শাসনক্ষমতা আবার প্রতিষ্ঠিত হইয়াছে। আমরা আপনাদের আহ্বান জানাইতেছি—শৃঙ্খলা বজায় রাখুন। রক্তপিপাসু বুনীদের হঠাইয়া দেওয়া হইয়াছে। কিন্তু, তাহাদের আর কখনও ফিরিয়া আসা যদি না চাহেন, তাহারা নিঃশেষে ধ্বংস হউক—ইহাই যদি আপনাদের কাম্য হয়, তাহা হইলে লালফৌজে সৈন্যদলভুক্ত হউন। মেহনতিদের হাতে যাহাতে ক্ষমতা বজায় থাকে, তাহার জন্য সর্বপ্রকারে সাহায্য করুন। এই শহরের সামরিক কর্তৃত্ব এখানে মোতায়েন সেনাবাহিনীর অধিনায়কের হাতে থাকিবে। বেসামরিক কাজকর্মের পরিচালনা করিবেন বিপ্লবী কমিটি।

দোলিন্নিক

বিপ্লবী কমিটির সভাপতি

\*

\*

\*

নতুন একধরনের লোকজন দেখা দিয়েছে লেচিনস্কিদের বাড়িতে। যে-‘কমরেড’ কথাটির জন্য লোকের কাল পর্যন্ত প্রাণ দিতে হয়েছে, আজ সেই কথাটাই শোনা যাচ্ছে চারিদিকে। ‘কমরেড!’—কী অনির্বচনীয় আবেগে ভরা কথাটি!

দোলিন্নিকের আর এই ক’দিন ধরে ঘুম বা বিশ্রাম নেই।

বিপ্লবী সরকার প্রতিষ্ঠার কাজে সে আজকাল বড় ব্যস্ত। ছোট্ট একটা কামরার দরজায় একটা কাগজের টুকরো ঝুলছে—কাগজটার উপরে পেন্সিলে লেখা : ‘পার্টি কমিটি’। এই ঘরে কমরেড ইগ্নাতিয়েভা তার চিরাচরিত শাস্ত আর সুস্থির ভঙ্গিতে বসে আছে। ইগ্নাতিয়েভা আর দোলিন্নিকের ওপরেই সোভিয়েত সরকারের বিভিন্ন সংস্থা স্থাপনের ভার দিয়েছে রাজনীতি-বিভাগ।

একদিনের মধ্যেই ডেস্কে ডেস্কে বসে গেছে অফিসের কর্মীরা, টাইপরাইটারে উঠেছে ব্যস্ত ঝটখট আওয়াজ। একটা সরবরাহ কমিশারিয়েট সংগঠিত হয়েছে তিজ্জিব্জির নেতৃত্বে—অত্যন্ত চটপটে আর কর্মতৎপর লোক সে, আগে ছিল স্থানীয় চিনিকলের একজন সহকারী মিস্ত্রি। শহরে সোভিয়েত-সরকার কায়েম হবার পরে সে কোমর বেঁধে নেমেছে চিনিকলের কর্তাদের বিরুদ্ধে লড়াই করার জন্য। এই কর্তাদের ইদানীং সময় খারাপ যাচ্ছে, বলশেভিকদের ওপরে নিদারুণ ঘৃণা মনে চেপে রেখে তারা সুযোগের প্রতীক্ষায় রয়েছে।

কলের শ্রমিকদের এক সভায় সে রুক্ষ আর কঠোর কথা ছুড়ে দিয়েছে শ্রমিকদের মধ্যে, ‘আগের অবস্থা আর ফিরে আসতে দেব না আমরা’, কথাটার অর্থের উপরে জোর দিয়ে, মঞ্চের ধারটায় একটা ঘুসি মেরে সে পোলিশ-ভাষায় ঘোষণা করল, ‘আমাদের বাপ-দাদারা আর আমরা জীবনভোর পতোথ্জকদের কাছে ঢের গোলামি করেছি। ওদের জন্যে আমরা প্রাসাদ তৈরি করে দিয়েছি, আর মহামান্য

কাউন্টমশাই তার বদলে আমাদের পেট-ভাতা দিয়েছে যাতে আমরা একেবারে না-খেয়ে মারা না-পড়ি।

‘কতকাল ধরে এইসব পতোর্থক-কাউন্ট আর সাঙ্ঘুশ্কা-রাজপুত্রেরা আমাদের ঘাড় চেপে বেড়িয়েছে? রাশিয়ান আর ইউক্রেনীয় মজুরদের মতোই পোলিশ-মজুরদের রক্তও এই কাউন্ট পতোর্থক ভষেছে। আর এখন কিনা এই পতোর্থকের দালালরা সেই শ্রমিকদের মধ্যেই গুজব ছড়াচ্ছে যে সোভিয়েত-সরকার তাদের শক্ত মুঠোয় বেঁধে জ্বরদন্তি শাসন চালাবে।

‘কমরেডসব, এটা একটা জঘন্য মিথ্যে কথা! বিভিন্ন জাতির খেটে-খাওয়া মানুষরা এর আগে আর কখনও এতখানি আজাদি পায়নি।

‘প্রলেতারিয়ানরা সব ভাই-ভাই। আর ওই অভিজাতগুলোকে আমরা শিগগিরই ঠাণ্ডা করে দেব, ঠিক জেনো।’ বক্তৃতা-মঞ্চের বেড়াটার উপরে আবার সজোরে নেমে এল তার হাতটা, ‘কে আমাদের জাতিতে-জাতিতে ভাগ করে দিয়েছে? ভাইয়ে-ভাইয়ে রক্তারক্তিতা বাধিয়েছে কারা? শত শত বছর ধরে রাজা-রাজদ্বারা পোলিশ চাষীদের পাঠিয়েছে তুর্কিদের বিরুদ্ধে লড়াইয়ে। ওরাই বরাবর এক জাতির মানুষের বিরুদ্ধে আরেক জাতির মানুষকে উকিয়ে এসেছে। সেই নিদারুণ খুনোখুনি আর দুঃখদুর্দশার কথাটা ভেবে দেখ একবার! আর তাতে লাভের কড়ি পেয়েছে কারা? কিন্তু এসবই বন্ধ হয়ে যাবে শিগগিরই। ছুঁচোগুলোর দিন ফুরিয়েছে। বলশেভিকরা এমন একটা আওয়াজ তুলেছে যা শুনে ভয়ে আঁতকে উঠছে বুর্জোয়াদের দিল : ‘দুনিয়ার মজদুর, এক হও!’ এই ধ্বনিই আমাদের মুক্তি, আমাদের সুখী ভবিষ্যতের সেই সুদিনের আশা, যেদিন তামাম মেহনতি মানুষ ভাই-ভাই হবে। কমরেডসব সবাই এসে যোগ দাও কমিউনিস্ট পার্টিতে!

‘পোলিশ প্রজাতন্ত্রও গড়ে উঠবে একদিন—সেটা হবে সোভিয়েত প্রজাতন্ত্র, যেখানে পতোর্থকদের কোনো ঠাই থাকবে না। ওদের তখন নিচিহ্ন করে দিয়ে আমরাই হবে সেই সোভিয়েত পোল্যান্ডের মালিক। তোমরা তো সবাই ব্রোনিং প্লাম্বার্সের জ্ঞানো? বিপ্লবী কমিটি তাকেই আমাদের কারখানার কমিশনার নিযুক্ত করেছে। ‘আমরা কিছুই ছিলাম না, এবার আমরাই হবে সব।’ কমরেডসব, আমাদের আনন্দের দিন আসছে। শুধু সাবধান থাকতে হবে—চোরাগোষ্ঠী সাপগুলোর হিসহিসানিতে কান দিও না যেন! শ্রমিকদের বিশ্বাস অটুট থাকলে আমরা দুনিয়ার তামাম মানুষের ভ্রাতৃত্ব গড়ে তুলতে পারব!’

সহজ-সরল একজন মেহনতি মানুষের অন্তরের অন্তস্তল থেকে আবেগ আর আন্তরিকতার সঙ্গে উচ্চারিত হল কথাগুলি। শ্রোতাদের মধ্যে তরুণ যারা তাদের সোৎসাহ কথার মধ্যে সে নেমে এল বক্তৃতার জায়গাটা থেকে। প্রবীণ শ্রমিকরা কিন্তু ইতস্তত করতে লাগল। কে জানে—কালই হয়তো বলশেভিকরা এই শহর ছেড়ে চলে যেতে পারে, আর তারপরে যারা রয়ে যাবে তাদেরই শেষে এইসব গরম-গরম কথাবার্তার প্রত্যেকটির জন্য চড়া দাম দিতে হবে। ফাঁসির হাত থেকে বাঁচা গেলেও, চাকরিটি যাবে নিশ্চয়।

শিক্ষা-বিভাগের কমিশনার ছিমছিমে সুঠাম চের্নোপিঙ্কি এ-অঞ্চলের শিক্ষকদের মধ্যে এ-পর্যন্ত একমাত্র লোক যে বলশেভিকদের পক্ষে যোগ দিয়েছে। বিপ্লবী

কমিটির বাড়িটার ঠিক উল্টোদিকেই বিশেষ কাজের জন্য তৈরি একটি দলের ঘাঁটি। এর সৈনিকেরা বিপ্লবী কমিটির বাড়িতে ডিউটি দিচ্ছিল। রোজ রাতে বাড়িটাতে ঢোকায় মুখে বাগানে একটা ‘ম্যাক্সিম’ মেশিনগান খাড়া থাকে—তার পেছনটায় আটকে থেকে ঝোলে একটা এবড়োথেবড়ো টোটার পাত। রাইফেলধারী দু’জন সাক্ষী তার দু’পাশে পাহারা দেয়।

বিপ্লবী কমিটিতে যাবার পথে ইগুতিয়েভা ওই দু’জনের মধ্যে একজন তরুণ লালফৌজি সৈনিকের কাছে গিয়ে জিজ্ঞেস করল, ‘কত বয়েস আপনার, কমরেড?’

‘সতেরো চলছে।’

‘এইখানেই থাকেন?’

লালফৌজের ছেলেটা হাসল, ‘হ্যাঁ, আমি সবে পরশদিন লড়াইয়ের সময়ে লালফৌজে ঢুকেছি।’

তার মুখখানা ভালো করে লক্ষ করল ইগুতিয়েভা, ‘আপনার বাবা কী করেন?’

‘ইঞ্জিনচালকের সহকারী।’

এমন সময়ে আরেকজন সামরিক পোশাক-পর্যাপ্ত লোকের সঙ্গে দোলিন্নিক এসে পড়ল সেখানে। ইগুতিয়েভা দোলিন্নিকের দিকে ফিরে বলল, ‘এই যে। কমসমোলের\* জেলা কমিটির ভার নেবার মতো ঠিক ছেলেটিকে খুঁজে বের করেছি। এখানকারই ছেলে ও।’

দোলিন্নিক তাড়াতাড়ি চোখ ফেরাল সেগেইয়ের দিকে—এই ছেলেটিই সেগেই।

‘ও, আচ্ছা। তুমি তো জাখারের ছেলে, না? ঠিক আছে, যাও দেখি, ছোটদের মধ্যে একটা সাড়া জাগিয়ে তোলা।’

বিশ্বয়ের চোখে সেগেই তাকাল তাদের দিকে, ‘কিন্তু আমাদের ফৌজিদলের কী হবে?’

সিঁড়ি বেয়ে উঠতে উঠতে পেছন ফিরে দোলিন্নিক বলল, ‘ও ঠিক আছে, সে-ব্যবস্থা আমরা করব ‘খন।’

দু’দিন পরেই বিকেলের দিকে ইউক্রেনীয় যুব কমিউনিষ্ট লীগের স্থানীয় কমিটি স্থাপিত হল।

নতুন জীবনের স্পন্দন জেগে উঠল একেবারে অকস্মাৎ, সেটা সেগেইকে পেয়ে বসল সম্পূর্ণভাবে, তাকে টেনে নিল তার ঘূর্ণিপাকে। তার সমগ্র অস্তিত্বকে এটা এমনভাবে আচ্ছন্ন করল যে সে এত কাছে থেকেও নিজের পরিবারকে ভুলে গেল।

সেগেই ক্রমশঃ এখন একজন বলশেভিক। এই নিয়ে বোধহয় দশবার সে ইউক্রেনীয় কমিউনিষ্ট পার্টির কমিটির দেওয়া পরিচয়পত্রখানা পকেট থেকে বের করে দেখেছে, তাতে তাকে কমসমোলের সভ্য আর কমসমোল কমিটির সম্পাদক হিসেবে মনোনয়নের কথা লেখা। এতেও যদি কেউ কোনোরকম সন্দেহ প্রকাশ করে, তাহলে তার রয়েছে প্রিয় বন্ধু পাভেলের উপহার দেওয়া সেই ভারী আর জ্বরদন্ত মান্লিশের পিস্তলটা—হাতে তৈরি ক্যান্ডিসের খাপের মধ্যে তার কোর্তার কোমরবন্ধনীর সঙ্গে ঝোলানো। এটা নিশ্চয়ই রীতিমতো নির্ভরযোগ্য একটা পরিচয়পত্র! আহা, পাভলুশ্কা এখন এখানে নেই!

\* যুব কমিউনিষ্ট লীগের সর্গক্ষণ নাম।

বিপ্লবী কমিটির দেওয়া নানান কাজে সেগেইয়ের দিনগুলো কাটছে। আজও ইগুতিয়েভা তার অপেক্ষায় ছিল। রেলস্টেশনে ডিভিশনের রাজনীতি বিভাগে গিয়ে বিপ্লবী কমিটির জন্য খবরের কাগজ আর বইপত্র নিয়ে আসার কথা তাদের। বাড়িটার বাইরে রাস্তায় তাড়াতাড়ি বেরিয়ে এল সেগেই—রাজনীতি বিভাগের একজন লোক একটা মোটরগাড়ি নিয়ে তাদের জন্য অপেক্ষা করছিল।

স্টেশন অনেক দূরে। ইউক্রেনের প্রথম সোভিয়েত ডিভিশনের সদর দপ্তর আর রাজনীতিক বিভাগ বসেছে স্টেশনের রেল-কামরাগুলি জুড়ে। সেখানে যাবার পথে ইগুতিয়েভা সেগেইকে অনবরত প্রশ্ন করে চলল, ‘কীরকম চলছে তোমার কাজকর্ম? সংগঠনটা ইতিমধ্যে গড়ে তুলেছ নাকি? তোমার বন্ধু মজুরদের ছেলেমেয়েদের কমসমোলে যোগ দেবার জন্যে রীতিমতো উৎসাহ দিতে থাকবে। শিগগিরই তরুণ কমিউনিস্টদের একটা দল গড়ে তোলা দরকার আমাদের। কালই আমরা একটা খসড়া তৈরি করে কমসমোলে যোগ দেবার জন্যে প্রচারপত্র ছাপব। তারপর ওই থিয়েটার-ঘরটায় এখানকার তরুণদের নিয়ে বড় রকম একটা সমাবেশের ব্যবস্থা করা যাবে। রাজনীতি বিভাগে গিয়ে আমি উস্তিনোভিচের সঙ্গে তোমার আলাপ করিয়ে দিচ্ছি, চলো। যতদূর জানি, ও এখন তরুণদের মধ্যে কাজ করছে।’

দেখা গেল, উস্তিনোভিচ আঠারো-বছরবয়সী একটি মেয়ে—ছোট করে ছাঁটা কালো চুল, সফ্র চামড়ার কোমরবন্ধনী আঁটা, খাকি কাপড়ের নতুন কোর্তা পরা। সেগেইকে সে তার কাজের অনেকগুলো রীতিনীতি বাতলে দিল, তাকে সাহায্য করবে বলে কথা দিল। সেগেইয়ের চলে আসার সময় সে তাকে বই আর কাগজপত্রের মস্তবড় একটা বান্ডিল দিল, এগুলির মধ্যে একটা বই বিশেষ গুরুত্বপূর্ণ : কমসমোলের কার্যক্রম আর নিয়মকানুন ছাপা আছে তাতে।

বিপ্লবী কমিটিতে সেদিন একটু বেশি রাতে ফিরে এসে সেগেই দেখে বাগানে ভালিয়া তার জন্য অপেক্ষা করছে। সেগেইকে দেখেই চোঁচিয়ে উঠল সে, ‘এভাবে বাড়ি-ছাড়া হয়ে থাকার মানে কী? লজ্জা করে না তোরা? কেঁদে-কেঁদে মা-র চোখ গেল। বাবা তো ভীষণ চটে আছে তোরা ওপর। ভয়ানক একটা বকাবকি হবে কিন্তু।’

‘না, তা হবে না।’ সেগেই তাকে আশ্বাস দিল, ‘বাড়ি যাবার সময়ই পাচ্ছি না মোটে, সত্যি। আজও যেতে পারব না। তুই এসেছিস ভালোই হয়েছে—কথা আছে তোরা সঙ্গে। চল ভেতরে যাই।’

ভালিয়া যেন চিনতেই পারছে না তার ভাইকে—রীতিমতো বদলে গেছে সেগেই। উৎসাহে-উদ্বীপনায় ফেটে পড়ছে সে। ভালিয়া বসতে-না-বসতেই সেগেই সরাসরি কথাটা পাড়ল, ‘শোন ভালিয়া, ব্যাপারটা হচ্ছে—তোকে কমসমোলে যোগ দিতে হবে। সেটা কী জানিস না বুঝি? যুব কমিউনিস্ট লীগ। এখানে ওটার কাজকর্ম আমিই চালাচ্ছি। বিশ্বাস হচ্ছে না? আচ্ছা! দ্যাখ্ তাহলে এটা।’

কাগজটা পড়ার পর ভালিয়া অবাক-চোখে তাকালে ভাইয়ের দিকে, ‘কমসমোলে এসে আমি কী করব?’

দু-হাত ছড়িয়ে সেগেই বলল, 'বিস্তর কাজ করবার আছে, ভাই। এই আমাকেই দ্যাখ্ না—এত কাজ করতে হয় যে রাতের পর রাত জাগতে হচ্ছে। প্রচার চালাতে হবে আমাদের। ইগ্নাতিয়েভা বলছেন, শিগগিরই থিয়েটার-ঘরটায় আমাদের এক সভার ব্যবস্থা করে সোভিয়েত-রাজ্য সম্বন্ধে বলতে হবে। আমাকে বক্তৃতা দিতে বলছেন তিনি। এটা কিন্তু ঠিক হবে বলে মনে হচ্ছে না—বক্তৃতা কী করে দিতে হয়, কিছুই জানি না আমি। নির্ঘাত সব ঘুলিয়ে-টুলিয়ে ফেলব। আচ্ছা, তাহলে তোর কমসমোলে আসার কী?'

'ঠিক বুঝতে পারছি না কী জবাব দেব। মা তো একেবারে খেপে যাবে তাহলে।'

'মা-র জন্যে ভাবতে হবে না।' পীড়াপীড়ি করতে লাগল সেগেই, 'মা তো এসব বোঝে না, শুধু ছেলেমেয়েদের কাছে-কাছে আগলে রাখতে পারলেই হল। কিন্তু সোভিয়েতের বিরুদ্ধে তো মা-র কিছু বলার নেই। বরং মা তার পক্ষেই। কিন্তু মা চায় লড়াইটা করুক অন্য লোকের ছেলেরা। এটা কি ঠিক? বুঝারাই কী বলেছিল আমাদের, মনে আছে তো? আর পাভেলকে দ্যাখ্—সে তো তার মায়ের কথা ভেবে ইতস্তত করেনি। এখন সময় এসে গেছে আমাদের উচিতমতো বেঁচে থাকবার জন্যে। তুই নিশ্চয়ই নারাজ হবি না, ভালিয়া! কী চমৎকার হবে ভেবে দ্যাখ্। তুই মেয়েদের মধ্যে কাজ করবি আর আমি কাজ চালাব ছেলেদের নিয়ে। ভালো কথা মনে পড়ল—আমি আজই ওই কটা-চুলো ক্রিমকা শয়তানটার সঙ্গে একটা বোঝাপড়া করব। কী বলিস, ভালিয়া? তুই তাহলে আসছিস আমাদের দলে, নাকি? এই ছোট্ট বইটা আছে আমার কাছে—এর মধ্যেই সব বলা আছে।' কমসমোলের নিয়মকানুন ছাপা সেই পুস্তিকাটি পকেট থেকে বের করে সেগেই ভালিয়াকে দিল।

ভাইয়ের মুখের দিকে একদৃষ্টে দেখতে দেখতে ভালিয়া নিচুগলায় জিজ্ঞেস করল, 'কিন্তু পেথলিউরা যদি আবার ফিরে আসে, তাহলে?'

এই প্রশ্নটা এ-পর্যন্ত সেগেইয়ের মনে আসেনি। দু-এক মুহূর্ত সে-কথাটা ভেবে নিল। তারপর বলল, 'আর সবার সঙ্গে তাহলে আমাকেও অবশ্য শহর ছেড়ে চলে যেতে হবে। কিন্তু তোর কী হবে? হ্যাঁ, তাহলে মা ভয়ানক কষ্ট পাবে।' কিছুক্ষণ চুপ করে রইল সে।

'আচ্ছা সেরিওঝা, মাকে বা আর-কাউকে কিছু না-জানিয়ে তুই আমাকে' কমসমোলের সভ্য করে নিতে পারিস না? শুধু তুই জানবি আর আমি জানব! আমি সব কাজে সাহায্য করব। সেইটেই সবচেয়ে ভালো হবে।'

'হ্যাঁ, তোর কথাটা ঠিক মনে হচ্ছে, ভালিয়া।'

এমন সময়ে ইগ্নাতিয়েভা ঘরে ঢুকল।

'কমরেড ইগ্নাতিয়েভা, এ আমার বোন ভালিয়া। আমি এইমাত্র ওকে কমসমোলে যোগ দেবার কথা বলছিলাম। কমসমোলের সভ্য হিশেবে ও বেশ ভালোই হবে, কিন্তু আমাদের মা গণগোল বাধাতে পারে। কাউকে না-জানিয়ে কি ওকে সভ্য করে নেওয়া যেতে পারে? আমাদের শহর ছেড়ে দিতে হতেও পারে, জানেনই তো। আমি অবশ্য কৌজের সঙ্গে চলে যাব, কিন্তু ভালিয়ার তখন ভয়—মা বড় মুশকিলে পড়বে।'

টেবিলের একধারে বসে ইগ্নাতিয়েভা গভীর মনোযোগের সঙ্গে শুনল কথাটা। সেগেইয়ের সঙ্গে সে একমত হল, 'হ্যাঁ, সেইটেই সবচেয়ে ভালো হবে।'

\*

\*

\*

সারা শহর জুড়ে যে-পোষ্টার লাগানো, তারই আহ্বানে কিশোর-কিশোরীরা এসে ভর্তি করে তুলেছে থিয়েটার-ঘরটা, তাদের উত্তেজিত কলরবে জায়গাটা মুখর। চিনিকলের শ্রমিকদের ঐকতান-বাদন চলেছে। সমবেত শ্রোতার দলে আছে প্রধানত স্থানীয় স্কুল তিনটির ছাত্রছাত্রীরা—সভায় বক্তৃতা শোনার চেয়ে শেষের দিকে যে-অভিনয় হবে, সেইটার প্রতিই তাদের বেশি আগ্রহ।

শেষপর্যন্ত পর্দা উঠল। সদর পার্টি কমিটির সম্পাদক কমরেড রাজিন এইমাত্র সদর থেকে এসে পৌছেছে। সে মঞ্চের উপরে আসতেই সকলের চোখ গিয়ে পড়ল এই খাটো ছিপছিপে গড়নের ছোট তীক্ষ্ণ নাকওয়ালা মানুষটির দিকে। সবাই গভীর মনোযোগের সঙ্গে তার বক্তৃতা শুনল। গোটা দেশজুড়ে যে সংগ্রামের জোয়ার জেগেছে তার কথা বলে সে দেশের তরুণদের আহ্বান জানাল কমিউনিস্ট পার্টির চারদিকে সমবেত হবার জন্য। অভিজ্ঞ বক্তার মতোই সে বক্তৃতা দিয়ে গেল, 'গোড়া মার্কসবাদী', 'সোশ্যাল-শোভিনিষ্ট' ইত্যাদি কতকগুলো কথা সে একটু বেশি বলল, এসব কথা শ্রোতারা ঠিক বুঝে উঠছিল না। তবু, তার বক্তৃতার শেষে সবাই তাকে উচ্ছ্বসিত হাততালি দিয়ে অভিনন্দন জানাল। তারপর, তার পরবর্তী বক্তা সেগেইকে শ্রোতাদের কাছে পরিচিত করিয়ে দিয়ে সে বিদায় নিল।

সেগেই যা ভয় করেছিল, ঠিক তাই হল : শ্রোতাদের মুখোমুখি দাঁড়িয়ে সে ভেবে পেল না কী বলবে। খতমত খেয়ে গেল প্রথমটায়।

এমন সময়ে ইগ্নাতিয়েভা তাকে উদ্ধার করল : টেবিলের সামনে নিজের আসন থেকে সে ফিসফিসিয়ে বলল, 'কমসময়ের একটা 'সেল' গড়ে-তোলার কথা এদের বলো।'

সঙ্গে সঙ্গে সেগেই তার বক্তব্যটা সরাসরি পাড়ল।

'কমরেডসব, যা বলার তা তোমরা সবই শুনবে। আমাদের এখন যেটা করতে হবে সেটা হচ্ছে একটা 'সেল' গড়ে-তোলা। প্রস্তাবের পক্ষে কারা?'

একটা নিস্তব্ধতা নেমে এল শ্রোতাদের মধ্যে। উস্তিনোভিচ এগিয়ে এল সাহায্য দেবার জন্য; দাঁড়িয়ে উঠে সে বলে গেল মঞ্চের তরুণরা কীভাবে সংগঠিত হয়ে উঠছে। সেগেই সসংকোচে একপাশে দাঁড়িয়ে রইল।

'সেল' গড়ে-তোলার প্রস্তাবটায় শ্রোতাদের প্রতিক্রিয়া দেখে মনে-মনে রাগ জমে উঠছিল তার। জরুজি করে সে তাকিয়ে ছিল সভার দিকে। উস্তিনোভিচের কথায় শ্রোতারা বিশেষ কান দিচ্ছে বলে মনে হয়নি। সেগেই দেখতে পেল—বক্তৃতামঞ্চের উস্তিনোভিচের দিকে অবজ্ঞার দৃষ্টিতে তাকিয়ে জালিভানড কী যেন ফিসফিসিয়ে বলল লিজা সুখার্কোকে। হাই ইঙ্কুলের উপরের শ্রেণীর মেয়েরা পাউডার-মাখা মুখে সামনের সারিতে বসে আশেপাশে তির্যক-চোখে তাকাতে তাকাতে নিজেদের মধ্যে ফিসফিসিয়ে কথা বলছে। এককোণে মঞ্চে উঠবার সিঁড়ির কাছে একদল লালফৌজের ছেলে বসে আছে—তাদের মধ্যে সেই তরুণ মেশিনগান-গোলন্দাজটিকে সেগেই



দেখতে পেল। মঞ্চের প্রান্তটার উপরে বসে সে অস্বস্তির সঙ্গে উশখুশ করছে আর খোলাখুলি ঘণাভরা চোখে তাকিয়ে দেখছে জাঁকালো পোশাক-পরা লিজা সুখার্কো আর আন্না আদমোভকায়াকে—এরা দু'জনে তখন সম্পূর্ণ নিঃসঙ্কোচে তাদের ছেলে-বন্ধুদের সঙ্গে দিব্যি গল্প জমিয়ে তুলেছে।

কেউ তার কথায় কান দিচ্ছে না বুঝতে পেরে উত্তিনোভিচ তাড়াতাড়ি তার বক্তব্য শেষ করে নিয়ে বসে পড়ল। এরপর বক্তৃতা দিতে দাঁড়াল ইগ্নাতিয়েভা। তার ধীরস্থির বক্তৃতার প্রভাবে অস্থির শ্রোতারা এবার মনোযোগী হয়ে উঠল।

ইগ্নাতিয়েভা বলল, 'কমরেডসব, আজ এখানে যেসব কথা তোমাদের বলা হল, সেগুলো তোমাদের প্রত্যেককে আমি ভেবে দেখতে বলছি। আমি নিশ্চয় জানি, তোমাদের মধ্যে বেশ কিছুজন শুধুমাত্র দর্শকের ভূমিকায় না-থেকে বিপ্লবে সক্রিয় ভূমিকা নেবে। তোমাদের জন্যে দরজা সবসময়েই খোলা—যা হয় তোমরাই ঠিক করো। তোমাদের মতামত কী তাও আমরা জানতে চাই। কারুর কিছু বলার থাকলে, তাকে মঞ্চের উপরে এসে বলার জন্যে অনুরোধ জানানি।'

আরেকবার নিস্তব্ধতা নেমে এল হলঘরে। তারপর পেছনের দিক থেকে একটা গলা শোনা গেল, 'আমি কিছু বলতে চাই!'

অল্প ট্যারা-চোখ আর বাচ্চা-ভালুকের মতো চেহারার মিশা লেভচুকভ নামে একটি ছেলে মঞ্চের উপর উঠে এসে বলল, 'ব্যাপারটা যা শুনলাম, তাতে বলশেভিকদের সাহায্য করাই আমাদের উচিত। আমার সম্পূর্ণ সমর্থন আছে। সেরিওব্কা আমাকে জানে। আমি কমসমোলের সভ্য হব।'

উজ্জ্বল হয়ে উঠল সেগেইয়ের মুখ।

হট করে মঞ্চের মাঝখানে এসে পড়ে সে চোঁচিয়ে বলল, 'দেখলে তো কমরেডরা! আমি বরাবর বলে এসেছি—মিশা আমাদের একজন। ওর বাবা ছিলেন রেললাইনের পয়েন্টস্ম্যান, গাড়ি চাপা পড়ে মারা গেলেন, আর তাই মিশার আর লেখাপড়া শেখা হয়ে উঠল না। কিন্তু এইরকমের সময়ে কী করা দরকার সেটা বুঝবার জন্যে মিশার হাই ইঙ্কুল শেষ করার প্রয়োজন হয়নি।'

দারুণ একটা হৈ-হুন্স উঠল হলঘরের মধ্যে। সযতনে বুরুশ-করা চুলঅলা একটি তরুণ কিছু বলতে চাইল। ওকুশেভ তার নাম—স্থানীয় এক ওষুধের দোকানঅলার ছেলে, হাই ইঙ্কুলের ছাত্র। কোর্তাটা টেনে ধরে সে শুরু করল, 'মাপ করবেন, কমরেডরা। আমাদের কী করতে বলা হচ্ছে সেইটেই ঠিক বুঝে উঠতে পারছি না আমি। আমাদের কি রাজনীতি করতে বলা হচ্ছে? তা যদি হয়, তাহলে পড়াশোনা করব কখন? ইঙ্কুলটা তো ডিঙোতে হবে আমাদের। এটা যদি কোনো খেলাধুলোর সমিতি বা ক্লাব গড়ে তোলার ব্যাপার হত, যেখানে জড়ো হয়ে আমরা পড়াশোনা করতে পারতাম, তাহলে অবশ্য আলাদা কথা ছিল। কিন্তু রাজনীতিতে ঢোকা মানে, পরে ফাঁসিকাঠে ঝোলার ঝুঁকি নেওয়া। মাপ করবেন, কিন্তু এতে কেউ রাজি হবে বলে আমার মনে হয় না।'

একটা হাসির রোল উঠল হলঘরে। ওকুশেভ মঞ্চ থেকে লাফিয়ে নেমে পড়ে আবার তার নিজের জায়গায় গিয়ে বসল। পরবর্তী বক্তা সেই তরুণ মেশিনগান-গোলন্দাজটি।

সক্রেদে কপালের উপর টুপিটা টেনে নামিয়ে তীব্রদৃষ্টিতে শ্রোতাদের দিকে তাকিয়ে সে চোঁচিয়ে উঠল, 'এত হাসি কিসের, জানোয়ার যতসব?'

চোখদুটো তার দু-টুকরো জ্বলন্ত কয়লা, রাগে কাঁপছে তার সর্বাঙ্গ। সজোরে একটা নিশ্বাস টেনে নিয়ে সে বলে চলল, 'ইভান ঝার্কি আমার নাম। বাপ-মা কেউ নেই আমার, বাড়িঘর বলতেও কিছু ছিল না কখনও। রাস্তার ধারে বড় হয়ে উঠেছি, কুটির টুকরো ভিক্ষে মেগে ফিরেছি আর বেশির ভাগ দিন কেটেছে উপোস দিয়ে। কুকুরের জীবন কেটেছে আমার—সে-জীবন সম্বন্ধে তোমরা, মায়ের আদুরে গোপালরা, কিছুই জানো না। তারপরে, সোভিয়েত-রাজ্য কায়েম হল—লালফৌজের লোকেরা আমাকে কুড়িয়ে নিয়ে দেখাশোনা করতে লাগল। পুরো একটা পন্টন আমাকে তাদের পোষ্য হিসেবে নিয়েছে—জামাকাপড় দিয়েছে, লিখতে পড়তে শিখিয়েছে। কিন্তু সবচেয়ে বড় কথা : আমি-যে একজন মানুষ—সেই শিক্ষা তারা আমায় দিয়েছে। তাদের জন্যেই আমি আজ বলশেভিক হয়ে উঠেছি এবং মরবার দিনটি পর্যন্ত আমি বলশেভিক থাকব। আমি হাড়ে হাড়ে জানি আমরা লড়াই করছি কিসের জন্যে—আমাদের লড়াই আমাদের মতো এইসব গরিব মানুষদের জন্যে, মজুরদের রাজের জন্যে। তোমরা তো এখানে বসে বসে দাঁত বের করে হাসছ, আর ওদিকে যে এই শহরের জন্যে লড়াই করতে গিয়ে দুশো জন কমরেড মারা পড়েছে সেটা তোমরা জানো না...' বলতে বলতে ঝার্কির গলা ঝড়ত হয়ে উঠল টানটান করে বাঁধা বেহালার তারের মতো, 'প্রাণ দিয়েছে তারা আমাদের সুখের জন্যে, আমাদের আদর্শের জন্যে...দেশের সর্বত্র মানুষ প্রাণ দিচ্ছে—প্রত্যেকটি লড়াইয়ের মোর্চায়, আর তোমরা এদিকে নাগরদোলায় চেপে ফুর্তির খেলায় মেতে আছ। কমরেডসব!—'হঠাৎ সভাপতিমণ্ডলীর টেবিলের দিকে ফিরে বলে উঠল সে, 'আপনারা এদের এসব কথা শুনিয়ে বৃথাই সময় নষ্ট করছেন,' হলঘরের দিকে একটা আঙুল বাড়িয়ে দেখাল সে, 'এরা সব আপনাদের কথা বুঝবে ভেবেছেন? মোটেই না! খালিপেটের সঙ্গে ভরপেটের মিতাগি নেই। মাত্র একজন আজ এখান থেকে এগিয়ে এসেছে, তার কারণ সেও অনাথ, গরিবদেরই একজন।' সভার দিকে তাকিয়ে প্রচণ্ড ক্রোধে গর্জে উঠল সে, 'মরুক গে যাক! তোমাদের না হলেও আমাদের কিছু এসে যায় না। আমাদের সঙ্গে এসে যোগ দেবার জন্যে আমরা হাতজোড় করব না তোমাদের কাছে—জাহান্নামে যাও তোমরা সবসুদ্ধ! একমাত্র মেশিনগানের মারফতই তোমাদের সঙ্গে কথাবার্তা চালানো যেতে পারে!' হাঁপাতে হাঁপাতে শেষ কথা চোঁচিয়ে বলে সে মঞ্চ থেকে নেমেই কোনোদিকে না-তাকিয়ে সোজা এগিয়ে গেল বেরিয়ে যাবার দরজাটার দিকে।

সভাপতিমণ্ডলীর কেউ অভিনয়ের জন্য রইল না।

বিপ্লবী কমিটিতে ফেরার পথে সেগেই স্কোভের সঙ্গে বলল, 'সব ভুল হয়ে গেল! ঝার্কি ঠিকই বলেছে। ওই হাই ইন্সট্রলের ছেলেমেয়ের পাল নিয়ে আমরা কিছু করে উঠতে পারব না। শুধু হয়রানির চোটে রাগে পাগল হওয়াই সার হবে!'

ইগ্নাতিয়েভা তাকে বাধা দিয়ে বলল, 'এতে আশ্চর্য হবার কিছু নেই। এখানে প্রলেতারিয়ান তরুণরা আসেইনি বলতে গেলে। বেশিরভাগই এসেছে এখানকার মধ্যবিত্ত ঘরের কিংবা বুদ্ধিজীবীদের ছেলেমেয়েরা—শহরের যতসব কৃপমন্ডুক।

তোমাকে ওই চিনি-কল আর করাত-কলের মজুরদের মধ্যে কাজ চালাতে হবে। তবে, এ সভাটা-যে একেবারেই কোনো কাজের হয়নি, তা নয়। ছাত্রদের মধ্যে কিছু খুব ভালো কমরেড যে আছে সেটা দেখতে পাবে।’

উস্তিনোভিচ ইগ্নাতিয়েভার সঙ্গে একমত হল। সে বলল, ‘দেখ সেরিগুয়া, আমাদের আদর্শটাকে, আমাদের শ্রোগানগুলোকে প্রত্যেকের মনে ঢোকানো আমাদের কাজ। প্রত্যেকটি নতুন ঘটনার তাৎপর্যের দিকে পার্টি সমস্ত মেহনতি মানুষের দৃষ্টি আকর্ষণ করবে। আমাদের বহু সভা, সম্মেলন, কংগ্রেস ইত্যাদির ব্যবস্থা করতে হবে। রাজনীতি বিভাগ রেলস্টেশনে একটা গ্রীষ্মকালীন থিয়েটার খুলবে। দু-চার দিনের মধ্যেই একটা প্রচারের ট্রেন এখানে এসে পড়ার কথা—তখন আমাদের উঠে-পড়ে লাগতে হবে কাজে। লেনিনের কথাটা মনে করে দেখ : জনগণকে, কোটি কোটি খেটে-খাওয়া মানুষকে সংগ্রামের মধ্যে টেনে আনতে না-পারলে আমরা জয়ী হতে পারব না।’

সেদিন রাত্রে দিকে উস্তিনোভিচকে স্টেশনে পৌঁছে দিতে গেল সেগেই। বিদায় নেবার সময় সে দৃঢ় মুঠোয় উস্তিনোভিচের হাতখানা একটু বেশিক্ষণের জন্যই চেপে ধরে রইল। উস্তিনোভিচের মুখে একটা ক্ষীণ-হাসির রেশ খেলে গেল।

ফেব্রুয়ার পথে সেগেই নিজের বাড়িতে এল সবার সঙ্গে দেখা করতে। নিঃশব্দে সে মায়ের তিরস্কার শুনে গেল, কিন্তু তার বাবাও যখন বকাবকিতে যোগ দিলেন, তখন সেগেই এমনভাবে প্রতি-আক্রমণ শুরু করল যে বেশ একটু বেকায়দায় পড়ে গেল জাখার ভাসিলিয়েভিচ।

‘আচ্ছা, শোনো বাবা, এই শহর জার্মানদের হাতে থাকার সময়ে তুমি যখন ধর্মঘট করেছিলে আর রেল-ইঞ্জিনের সেই সাক্ষীটাকে মেয়ে ফেলেছিলে, তখন তুমি তোমার পরিবারের কথা ভেবেছিলে, না, ভাবো নি? নিশ্চয় ভেবেছিলে—কিন্তু তা সত্ত্বেও তুমি-যে পিছপাও হওনি, তার কারণ তোমার শ্রমিকের বিবেক তোমাকে ঠিকপথেই চালিয়ে নিয়ে গেছে। আমিও পরিবারের কথা ভাবছি। খুব ভালোভাবেই আমি জানি যদি আমাদের শহর ছেড়ে চলে যেতে হয়, তাহলে আমার জন্যে তোমাদের ওপরে অত্যাচার চলবে। এদিকে আমরা জিতলে আমরাই শাসন চালাব। কিন্তু তবু, বাড়িতে বসে থাকতে তো পারি না। তুমি নিজেই সব বোঝো, বাবা। তবে আর এত ঝামেলা কিসের? আমি একটা ভালো কাজে নেমেছি—বকাবকা না করে তোমার তো আমাকে উৎসাহ দেওয়াই উচিত। এসো বাবা, আমরা একটা বোঝাপড়া করে নিই, তাহলে মা-ও আর আমাকে বকুনি দিতে আসবে না।’ বাবার দিকে স্বচ্ছ নীল চোখে তাকিয়ে থেকে সেগেই স্নেহের হাসি হাসল, সে-যে ঠিক কথাই বলছে এ-সম্বন্ধে তার মনে কোনো সন্দেহ নেই।

অস্বস্তির সঙ্গে বেঞ্চিটার উপরে নড়েচড়ে বসল জাখার ভাসিলিয়েভিচ, তারপরে তার ঝাঁকড়া গৌফ আর ঝোঁচা দাড়ির আড়ালে মৃদু হাসির ফাঁকে বেরিয়ে এল হলদে দাঁতগুলো।

‘শ্রেণী-চেতনার কথাটোখা এর মধ্যে টেনে আনছিস, অ্যাঁ, হতভাগা ছোঁড়া। ওই পিস্তলটা বাগিয়ে বেড়াস বলে ভেবেছিস বুঝি আমি তোকে একচোট ধোলাই না দিয়েই ছেড়ে দেব, অ্যাঁ?’

কিন্তু তার গলার স্বরে বিন্দুমাত্র রাগের চিহ্ন নেই। অপ্রস্তুত ভাবটা কাটিয়ে উঠে সে তার গিঠে-পড়া হাতখানা ছেলের দিকে বাড়িয়ে দিয়ে বলল, ‘ঠিক আছে রে

সেরিওঝা, তোর কাজ তুই চালিয়ে যা। একবার চাবুক হাঁকিয়েছিস যখন, তখন আমি আর রাশ টেনে ধরব না। কিন্তু দেখিস, আমাদের একেবারেই ভুলে যাস না, মাঝেমধ্যে এসে দেখাটেখা করে যাস।’

\*

\*

\*

রাত্রি। বিপ্লবী কমিটির একটা আলোচনা-সভা বসেছে। দরজাটার একটা ফাটল দিয়ে একফালি আলো এসে পড়েছে সিঁড়ির উপরে। মশমলের গদি-আঁটা দামি চেয়ার আর আসবাবপত্রে সাজানো বড় ঘরটার মধ্যে উকিল লেন্চিনস্কির বিরাট টেবিলের ধারে বসেছে পাঁচজন : দোলিন্নিক, ইগ্নাতিয়েভা, ‘চেকা’র\* কর্তা তিমোশেন্কে—পশমের কসাকটুপি মাথায় তাকে দেখাচ্ছে কির্গিজের মতো, রেলকর্মী শুদিক—দৈত্যের মতো দেহখানা তার, আর, ডিপোর শ্রমিক, ভোঁতা-নাক গুস্তাপচুক।

টেবিলের উপর ঝুঁকে পড়ে ইগ্নাতিয়েভার দিকে কঠিনদৃষ্টিতে তাকিয়ে কর্কশ গলায় বলে চলল দোলিন্নিক, ‘যুদ্ধসীমান্তে সরবরাহ দিতেই হবে। শ্রমিকদের খেতে হবে তো। আমরা আসার সঙ্গে সঙ্গেই দোকানদাররা আর চোরাবাজারিরা দাম বাড়িয়ে দিয়েছে জিনিশপত্রের। সোভিয়েত মুদ্রা ওরা নিতে চায় না। এখানে চালু শুধু পুরনো জার-আমলের মুদ্রা, আর নাহয় কেরেনস্কি সরকারের কাগজের নোট। আজ আমাদের বসে সব জিনিশের দাম বেঁধে ফেলতে হবে। এটা আমরা খুব ভালোভাবেই জানি যে মুনাফাখোররা কেউই ওই বাঁধা দামে জিনিশ বেচবে না। যা আছে সব লুকিয়ে ফেলবে। সেক্ষেত্রে আমরাও খানাতল্লাশি চালিয়ে রক্তচোষাদের মালপত্র সব বাজেয়াপ্ত করে নেব। এখন আর ভালোমানুষি চলবে না। শ্রমিকদের আমরা আর উপোস করিয়ে রাখতে পারি না। কমরেড ইগ্নাতিয়েভা আমাদের সাবধান করছেন যাতে বাড়াবাড়ি রকমের লাঠির ব্যবহার না করে ফেলি। এটা বুদ্ধিজীবীদের দুর্বলচিন্তের পরিচয় বলেই আমার মনে হয়। রাগ কোরো না, জোয়া, আমি বুঝেই কথা বলছি। যাই হোক, এটা খুদে-ব্যাপারীদের ব্যাপার নয়—আজ খবর পেলাম, সরাইখানাঅলা বরিস জোন-এর বাড়িতে একটা চোরাই গুদাম আছে—পেথলিউরার দলবল আসার আগে থেকেই বড় বড় দোকানদাররা প্রচুর মাল সেখানে লুকিয়ে রেখেছে।’ একটু থেমে দোলিন্নিক তিমোশেন্কে দিকে একটা তির্যক বিদ্রূপভরা চাউনি হানল।

হঠাৎ অপ্রতুত হয়ে গিয়ে তিমোশেন্কে জিজ্ঞেস করল, ‘কী করে জানলো?’ এ খবরটা আসলে তিমোশেন্কেই রাখার কথা, কিন্তু দোলিন্নিক যে তার চেয়ে বেশি খবরাখবর রাখে—এটা জেনে সে একটু বিরক্ত হয়ে উঠল।

চাপা হেসে বলল দোলিন্নিক, ‘সব খবরই রাখি, ভাই। এই গুদামের কথাটা ছাড়াও, এও আমি জানি যে কাল ভূমি আর ডিভিশন-কম্যাভারের মোটরচালক দু’জনে মিলে আধ-বোতল ‘সামোগন’ উড়িয়েছ।’

তিমোশেন্কে নড়েচড়ে বসল তার চেয়ারে, একঝলক রক্ত উঠে এল তার ফ্যাকাসে মুখে।

\* সারা-রাশিয়া জরুরি কমিশন, সংক্ষেপে ভেচেকা কিংবা চেকা—প্রতিবিপ্লবী ও অন্তর্ঘাতমূলক কার্যকলাপের বিরুদ্ধে সংগ্রামের জন্য ১৯১৭ সালে সংগঠিত স্থানীয় সংস্থাসমূহ। ১৯২২ সাল পর্যন্ত এগুলির অস্তিত্ব ছিল।

নিজের অজান্তেই দোলিন্নিককে তারিফ জানাল সে, 'দারুণ লোক দেখছি!' কিন্তু ইগ্নাতিয়েভার মুখেচোখে ব্যাপারটাকে অনুমোদন না-করার ভ্রুকুটি দেখে সে থেমে গেল। বিপ্লবী কমিটির সভাপতি দোলিন্নিকের দিকে আড়চোখে তাকিয়ে মনে-মনে ভাবল, 'এই ছুতোর-মিস্ত্রি হতভাগাটার দেখছি নিজেরই একটা 'চেকা' আছে!'

দোলিন্নিক বলে চলল, 'সেগেই ক্রম্বাক বলেছে আমায়। স্টেশনের রেষ্টোরাঁয় কাজ করত এমন একটি ছেলেকে সে জানে। সেই ছেলেটাই রেষ্টোরাঁর রাধুনিদের কাছে জুনেছিল যে ওদের যখন যা দরকার হয় সবই প্রচুর পরিমাণে বরিস জোন্ আগে তাদের জোগান দিত। গতকাল সেগেই ওই গুদামটার অস্তিত্ব সম্বন্ধে সঠিকভাবে জানতে পেরেছে। এখন শুধু সেটা ঠিক কোন জায়গায় সেইটেই বের করার ওয়াস্তা। ছেলেদের এখুনি কাজে লাগিয়ে দাও, তিমোশেক্কো, সেগেইকেও। যদি ভাগ্যক্রমে মিলে যায়, তাহলে শ্রমিকদের আর গোটা ডিভিশনটাকে খাবার জিনিশপত্র সবই সরবরাহ করতে পারা যাবে।'

আধঘণ্টা বাদে আটজন সশস্ত্র মানুষ সরাইখানাঅলার বাড়িতে ঢুকল। সদর দরজায় পাহারায় থাকল দু'জন।

বঁটে-খাটো, তাগড়া পিপের মতো গোল শরীর মালিকের, একটা পা কাঠের, খোঁচা-খোঁচা লাল দাড়ি-ভর্তি মুখ। বিনয়ের অবতার সেজে সে এগিয়ে এল আগন্তুকদের কাছে। ভাঙা মোটা গলায় জিজ্ঞেস করল সে, 'কী খবর, কমরেডরা? এমন অসময়ে যে?'

জোন্-এর পেছনে দাঁড়িয়ে আছে তার মেয়েরা, তারা তাড়াতাড়ি কোনোক্রমে ড্রেসিং-গাউন পরে নিয়েছে, তিমোশেক্কোর টর্চের উজ্জ্বল আলোয় চোখ মিটমিট করছে। পাশের ঘরটা থেকে ভেসে আসছে জোন্-এর মুটকি বউয়ের ঘোংঘোং আওয়াজ, তাড়াহুড়া করে পোশাক পরছে সে।

'আমরা বাড়িটা খানাতল্লাশি করতে এসেছি,' সংক্ষেপে বলল তিমোশেক্কো।

তল্লাশি করে পরীক্ষা করা হল গোটা বাড়ির মেঝেটা। চালাকাঠের উঁচু স্থূপে বোঝাই একটা বিরাট গোলাঘর, গোটাকতক ভাঁড়ারঘর, রান্নাঘর আর একটা বড় তলের ভাঁড়ার—সবই সযতনে খুঁজে দেখা হল। কিন্তু কোথাও চোরা গুদামের কোনো পাস্তা পাওয়া গেল না।

রান্নাঘরের পাশে ছোট্ট একটা ঘরে একজন ঝি গভীর ঘুমে আচ্ছন্ন। এমন গভীরভাবে ঘুমোচ্ছে মেয়েটা যে সে এদের ঘরে ঢোকাটা টের পায়নি। সেগেই আন্তে করে তাকে জাগাল। জিজ্ঞেস করল, 'তুমি কাজ করো এখানে?'

ঘুমভরা চোখে হকচকিয়ে গিয়ে মেয়েটা তার কাঁধের উপর কবলটা টেনে দিয়ে আলো থেকে হাত দিয়ে আড়াল করল তার চোখদুটো। বলল, 'হ্যাঁ। তোমরা কারা?'

তার কথার উত্তর দিয়ে সেগেই তাকে জামাকাপড় পরে নিতে বলে বেরিয়ে এল ঘরটা থেকে।

তিমোশেক্কো এদিকে প্রশস্ত খাবারঘরটায় জেরা করছে সরাইখানার মালিকটাকে। খুতু ছিটিয়ে দারুণ উত্তেজনায় হাঁপাচ্ছে লোকটা, 'কী চান আপনারা? আমার আর-কোনো ভাঁড়ার-গুদাম নেই। আমি বলছি, বৃথাই সময় নষ্ট করছেন আপনারা। হ্যাঁ, একসময়ে আমার একটা সরাইখানা ছিল বটে, কিন্তু ইদানীং আমি একেবারে গরিব।

পেথলিউরার দলবল আমাকে সর্বস্বান্ত করে ছেড়েছে, প্রায় মেরেই ফেলেছিল আর একটু হলে। সোভিয়েত-রাজ কায়েম হওয়ায় খুব খুশি হয়েছি আমি। কিন্তু এই আমার সম্পত্তি বলতে যা-কিছু, সবই আপনাদের চোখের সামনে।' মোটা খাটো হাতদুটো ছড়িয়ে ধরল সে, আর সমস্তক্ষণ তার লাল চোখদুটো 'চেকা'র কর্তার মুখ থেকে সেগেইয়ের মুখের দিকে আর সেখান থেকে এককোণে আর ছাদের দিকে ঘুরেফিরে যেতে লাগল।

ঠোট কামড়ে ধরল তিমোশেকো।

'বলবেন না তাহলে? এই শেষবারের মতো হুকুম দিচ্ছি আপনাকে, কোথায় সেই গুদামটা দেখিয়ে দিন।'

সরাইখানা-মালিকের বউটা আবার আর্তস্বরে বলে উঠল, 'আমাদের নিজেদেরই কিছু খাবার নেই, কমরেড অফিসার। যা ছিল সব ওই পেথলিউরার লোকজন নিয়ে গেছে।' কান্নার চেষ্টা করল সে, কিন্তু পেরে উঠল না কাঁদতে।

সেগেই বলে উঠল, 'খেতে পান না বলছেন, এদিকে তো ঝি রেখেছেন দেখছি।'

'ও তো ঝি নয়—গরিব মেয়ে একটা, কোথাও যাবার জায়গা নেই তাই থাকে।' ঝুস্তিনার নিজের মুখেই শুনল।

ধৈর্যচ্যুতি ঘটল তিমোশেকোর। চোঁচিয়ে উঠল সে, 'আচ্ছা, বেশ, এবার তাহলে আমাদের উঠে-পড়ে লাগতেই হচ্ছে!'

দিনের আলো ফুটল। তন্ময়ি চলছে তখনও। তেরো ঘণ্টা ধরে বৃথা খোঁজাঝুঁজির পর ক্লান্ত হতাশ তিমোশেকো যখন চলে যাবে বলে মনস্থ করেছে, ঠিক সেই সময়ে ঝি-মেয়েটির ঘরটা খোঁজা শেষ করে বেরিয়ে আসার মুহূর্তে সেগেই তার পেছনে মেয়েটির ক্ষীণ ফিসফিসানি শুনল, 'রান্নাঘরে উনুনটার ভেতরে একবার দেখ্ গে।'

দশ মিনিট বাদেই সেই ডেঙে-ফেলা রুশ চুল্লিটার ফাঁকে একটা লোহার চোরা-দরজার সন্ধান পাওয়া গেল। আর এক ঘণ্টার মধ্যেই পঞ্চাশ-মণ-ভারবাহী একটা লরি পিপে আর বস্তায় বোঝাই হয়ে রওনা হয়ে গেল সরাইখানাটা থেকে। ততক্ষণে বাড়টাকে ঘিরে উৎসুক এক জনতার ভিড় জমে উঠেছে।

\*

\*

\*

মারিয়া ইয়াকোভ্লেভনা করচাগিনা গরমকালে একদিন বাড়ি ফিরে এল তার জিনিশপত্রের ছোট্ট পুঁটলিটা নিয়ে। পাভেলের ঘটনাটা আরতিগুমের কাছে শুনে ভয়ানক কান্নাকাটি করল সে। জীবনটা এখন তার কাছে শূন্য আর নিরানন্দ হয়ে উঠেছে। টাকা-পয়সা ছিল না, কাজের চেষ্টায় ঘুরতে হচ্ছে তাকে। কিছুদিনের মধ্যেই সে লালফৌজের লোকদের জামাকাপড় কেচে দেবার জন্য বাড়িতে আনা গুরু করল, তারা তাকে মজুরি বাবদ নগদ পয়সার বদলে সৈন্যদের জন্য বরাদ্দ খাবার দেয়।

একদিন সে জানলার বাইরে আরতিগুমের পায়ের শব্দ শুনল—শব্দটা যেন অন্যদিনের চেয়ে একটু দ্রুত। দরজাটা ঠেলে চৌকাঠের উপর থেকেই আরতিগুম জানাল, 'পাভকার কাছ থেকে একটা চিঠি পেয়েছি।'

পাভেল লিখেছে :

'প্রিয় ভাই আরতিগুম, আমি বেঁচে আছি, তবে খুব একটা ভালো নই।

কোমরের নিচে একটা গুলি বিধেছিল, অবশ্য এখন সেরে উঠছি

ক্রমশই। ডাক্তার বলছেন, হাড়টা অক্ষতই আছে। সুতরাং আমার জন্যে ভেবো না, ঠিক হয়ে উঠব আমি। হাসপাতাল থেকে ছাড়া পাবার পর আমি হয়তো ছুটি পাব, তখন কিছুদিনের জন্যে একবার বাড়ি যাব। আমি মা-র ওখানে যাবার ব্যবস্থা করে উঠতে পারিনি। আমি কমরেড কতোভস্কি-পরিচালিত ঘোড়সওয়ার-বাহিনীতে ঢুকেছি। তুমি তাঁর নাম শুনেছ নিশ্চয়ই, বীরত্বের জন্যে বিখ্যাত তিনি। তাঁর মতো লোক আমি আর দেখিনি, আমাদের এই কম্যান্ডার কতোভস্কির প্রতি আমার গভীরতম শ্রদ্ধা জন্মেছে। মা কি ইতিমধ্যে বাড়ি ফিরেছেন? ফিরে থাকলে তাঁকে আমার ভালোবাসা জানিও। আমার জন্যে তোমার যা যা অসুবিধে ঘটেছে, তার জন্যে মাপ কোরো।

ইতি, তোমার ভাই পাভেল।

পুনশ্চ : আরতিগুম, দয়া করে বনপরিদর্শকের বাড়ি গিয়ে এই চিঠিটার কথা একবার বলে এসো।'

মারিয়া ইয়াকোভলেভনা পাভেলের চিঠিখানা নিয়ে অনেক চোখের জল ফেলল। মাথা-মোটা ছোঁড়াটা হাসপাতালের ঠিকানাটুকু পর্যন্ত জানায়নি।

\*

\*

\*

স্টেশনের যে সবুজ-রঙের রেলগাড়িটার গায়ে লেখা আছে 'রাজনীতি বিভাগের আন্দোলন ও প্রচার-দপ্তর', সেগেই আজকাল সেখানে ঘন ঘন যাতায়াত করে। প্রচার ও আন্দোলন বিভাগের এই গাড়ির একটা কামরায় উস্তিনোভিচ আর মেদভেদেভার অফিস। সেগেই এলেই তাকে দেখে মেদভেদেভা ঠোটে সদাসর্বদা ধরে থাকা সিগারেটের ফাঁকে কৌতূকের হাসি হাসে।

রিতা উস্তিনোভিচের সঙ্গে জেলা কমসমোল কমিটির সম্পাদকের অলঙ্কে একটা ঘনিষ্ঠতা গড়ে উঠেছে। উস্তিনোভিচের সঙ্গে প্রতিবার কিছুক্ষণ আলাপ-আলোচনার পর চলে আসার সময়ে বই আর কাগজপত্রের বাউল ছাড়াও অস্পষ্ট একটা খুশির অনুভূতিও সেগেই বয়ে আনে মনে-মনে।

রাজনীতি বিভাগের খোলা থিয়েটারটায় প্রতিদিন বিস্তর শ্রমিক আর লালকৌজের লোকের সমাবেশ হচ্ছে। বারো নম্বর আর্মির প্রচার-ট্রেনটা সর্বাস্থে উজ্জ্বল রঙের পোষ্টার স্টেটে স্টেশনের একটা লাইনে দাঁড়িয়ে আছে, দিনে চব্বিশ ঘণ্টাই কর্মমুখর সেটা। ভেতরে একটা ছাপাখানা বসানো হয়েছে, সেখান থেকে নিরবচ্ছিন্ন স্রোতে ছেপে বেরিয়ে আসছে খবরের কাগজ, পুস্তিকা, ঘোষণাপত্র ইত্যাদি। লড়াইয়ের ফ্রন্ট এখান থেকে কাছাকাছিই।

একদিন বিকেলে সেগেই থিয়েটারে হঠাৎ এসে পড়ে একদল লালকৌজের লোকের সঙ্গে রিতাকে দেখতে পেল। সেদিন রাতে স্টেশনে রাজনীতি বিভাগের লোকদের থাকার জায়গায় রিতাকে পৌছে দেবার সময় সেগেই হঠাৎ বলে ফেলল, 'কমরেড রিতা সবসময়েই তোমার সঙ্গে দেখা করতে ইচ্ছে করে কেন বলো তো? তোমার সঙ্গে যতক্ষণ থাকি, এত ভালো লাগে! তোমার সঙ্গে দেখা হবার পর প্রতিবারই মনে হয় যেন আমি একটানা চব্বিশ ঘণ্টাই কাজ করে যেতে পারি।'

রিতা দাঁড়িয়ে পড়ল। তারপর বলল, 'দেখ, কমরেড ক্রম্বাক, এসো একটা বোঝাপড়া হয়ে যাক : আর কখনো এমনধারা কাব্য করে কথা বোলো না যেন। ওসব আমি পছন্দ করিনে।'

ধমক-খাওয়া স্কুলের ছেলের মতো লজ্জায় লাল হয়ে উঠে সেগেই বলল, 'আমি তো সেরকম কিছু বলিনি। ভেবেছিলাম আমরা বন্ধু দু'জনে...আমি তো প্রতিবিপ্লবী কোনো কথা বলিনি, বলেছি কি? বেশ, কমরেড উস্তিনোভিচ, আমি তেমন আর একটা কথাও বলব না!'

তাড়াতাড়ি কোনোরকমে রিতার করমর্দন করেই সে বিদায় নিয়ে প্রায় দৌড়ে ফিরে গেল শহরের দিকে।

কয়েকদিন স্টেশনের দিকে আর সেগেই যায়নি। ইগ্নাতিয়েভা তাকে আসতে বললেও সে কাজে ব্যস্ততার দোহাই পেড়ে গেল না। সত্যিই তার কাজ ছিল বিস্তর।

\*

\*

\*

একদিন রাতে বাড়ি ফেরার পথে শুদিক্ গুলিতে আহত হল। যে-রাস্তা দিয়ে সে যাচ্ছিল, সেই পাড়াটায় চিনি-কলের ওপরঅলা পোলিশ কর্তাব্যক্তিদেরই বেশির ভাগ বসবাস। খানাতদ্বাশি চালিয়ে কিছু অস্ত্রশস্ত্র আর 'তীরন্দাজ' নামে একটি পিলসুদস্কি সংগঠনের কাগজপত্র পাওয়া গেল।

বিপ্লবী কমিটিতে একটা সভা ডাকা হয়েছিল। উস্তিনোভিচ উপস্থিত ছিল। সে একপাশে সেগেইকে ডেকে শান্ত গলায় বলল, 'তোমার সঙ্কীর্ণ আত্মাভিমানের ভাবি ঘা লেগেছে দেখছি? ব্যক্তিগত ব্যাপার টেনে এনে তুমি তোমার কাজকর্মের ক্ষেত্রে ব্যাঘাত সৃষ্টি করতে চাও? তা চলবে না, কমরেড।'

অতএব সেগেই আবার আগেকার মতো স্টেশনে সেই সবুজ-রঙের রেলগাড়িটায় যাতায়াত শুরু করল।

সদর-কমিটির একটা সম্মেলনে উপস্থিত ছিল সেগেই। দু'দিন ধরে জোরালো তর্কবিতর্কে যোগ দিল সে। তারপর তৃতীয় দিনে সম্মেলনের অন্যান্য প্রতিনিধিদের সঙ্গে অস্ত্রসজ্জিত হয়ে গেল নদীর ওপারে বনের মধ্যে—পুরো একটা দিন-রাত্রি কাটল সেখানে একটা বোম্বটে দলের সঙ্গে লড়াই করে। এই দলটার নেতা জারুদ্নি নামে পের্থলউরার একজন সামরিক অফিসার। ফিরে এসে ইগ্নাতিয়েভার সঙ্গে দেখা করতে গিয়ে সেখানে উস্তিনোভিচকেও দেখতে পেল সে। পরে তাকে স্টেশনে বাড়ি পৌঁছে দিতে গিয়ে বিদায় নেবার সময়ে সে তার হাতখানা জোরে চেপে ধরল।

উস্তিনোভিচ রেগে টেনে ছাড়িয়ে নিল হাতখানা। আবার সেগেই প্রচার-আন্দোলনের রেলগাড়িটায় যাতায়াত বন্ধ করে দিল বেশ কিছুদিনের জন্য, কাজ পড়লেও রিতাকে এড়িয়ে চলতে লাগল। তার এরকম ব্যবহারের জন্য রিতা কৈফিয়ত চাইলে সে কাটা-কাটা জবাব দেয়, 'তোমার সঙ্গে কথা বলে লাভ কী? বললেই তো আমাকে হয় শ্রমিকশ্রেণীর প্রতি বিশ্বাসঘাতক, নাহয় আত্মাভিমानी সঙ্কীর্ণ, আর নাহয় ওইরকম আর একটা কিছু বলে গাল দেবে।'

\*

\*

\*

ককেশীয় 'লাল-পতাকা' অর্ডারপ্রাপ্ত ডিভিশনের ট্রেনটা স্টেশনে এসে থামল। রোদে-পোড়া তিনজন কম্যান্ডার এসে উঠল বিপ্লবী কমিটিতে। তাদের মধ্যে লম্বা, ছিপছিপে,



কোমরে পেটাই-করা রূপোর পাতের বেন্ট-আঁটা একজন সরাসরি দোলিনিকের কাছে এসে দাবি জানাল, 'এক-শো গাড়ি খড় চাই, কোনো ওজর চলবে না, যেমন করে হোক জোগাড় করে দিতেই হবে। ঘোড়াগুলো আমাদের না-খেতে পেয়ে মরে যাচ্ছে।'

সুতরাং খড় জোগাড় করে আনার জন্য সেগেইকে পাঠানো হল দু'জন লালফৌজের লোকের সঙ্গে। একটা গ্রামে একদল কুলাক তাদের আক্রমণ করল। লালফৌজের লোক দু'জনের অস্ত্র কেড়ে নিয়ে তারা নির্মম প্রহার দিয়ে ছাড়ল তাদের। ছেলেমানুষ বলে সেগেই অস্ত্রের উপর দিয়ে পার পেয়ে গেল। গরিব চাষীদের কমিটির লোকজন তাদের তিনজনকে গাড়ি করে পৌছে দিয়ে গেল শহরে।

একটা সশস্ত্র ফৌজিন্দকে পাঠানো হল সেই গ্রামে। পরের দিনই খড় জোগাড় করা হল।

ব্যাপারটা বাড়িতে জানিয়ে সবাইকে দুচ্চিন্তায় ফেলার ইচ্ছে ছিল না, তাই সেগেই সেরে না-ওঠা অবধি ইগ্লাতিয়েভার ওখানে থাকল। রিতা উস্তিনোভিচ তাকে এখানে দেখতে এসে সেই প্রথমবার তার হাত এমন নিবিড় আবেগে আর স্নেহে চেপে ধরল যে সেগেই নিজে হলে এরকম করতে সাহস করত না।

\*

\*

\*

একদিন দুপুরবেলায় বেশ গরম পড়েছিল—সেগেই প্রচার-আন্দোলনের রেলগাড়িটায় এল রিতার সঙ্গে দেখা করতে। পাভেলের চিঠিখানা সে তাকে পড়ে শুনিতে তার এই বক্তৃতির সম্বন্ধে কিছু বলল। বেরিয়ে আসার সময় পেছন ফিরে বলল, 'বনে গিয়ে একবার হুদটায় একটা ডুব দিয়ে নেব ভাবছি।'

কাজ করতে করতে মুখ তুলে রিতা বলল, 'একটু দাঁড়াও, আমিও যাব তোমার সঙ্গে।' আয়নার মতো মসৃণ আর শান্ত হুদটা। উষ্ণ স্বচ্ছ টলটলে জলে আরামের আমন্ত্রণ। রিতা হুকুম দিল, 'তুমি ওই রাস্তাটার ধারে দাঁড়াও গিয়ে। আমি এবার জলে নামব।' সাঁকোটার পাশে একটা পাথরের উপর বসে সেগেই সূর্যের দিকে তার মুখটা তুলে ধরল। পেছনে রিতার জলে ঝাঁপাঝাঁপির শব্দ তার কানে আসছে।

এমন সময়ে দেখতে পেল, প্রচার-ট্রেনের সামরিক কমিশার চুঝানিন আর তোনিয়া তুমানভা রাস্তা বেয়ে হাত-ধরাধরি করে আসছে। কেতাদুরস্ত চামড়ার কোমরবন্ধনী লাগানো অসংখ্য ফিতে-আঁটা সুন্দর সামরিক উর্দি-পরা আর ফ্রোম-চামড়ার মচমচে বুট পায়ে চুঝানিনকে দেখাচ্ছে দিব্যি সুন্দর ছোকরা। তোনিয়ার সঙ্গে গভীর মনোযোগের সঙ্গে কথা বলছে সে।

তোনিয়াকে চিনল সেগেই—এই মেয়েটিই পাভেলের চিঠি এনে দিয়েছিল। তোনিয়াও তার দিকে একদৃষ্টিতে তাকিয়ে এগিয়ে আসছে—যেন তাকে কোথায় দেখেছে মনে করার চেষ্টা করছে। সামনাসামনি যখন এসে পড়ল ওরা, তখন সেগেই পকেট থেকে পাভেলের চিঠিখানা বের করে তোনিয়ার কাছে গিয়ে বলল, 'একটু ওনুন, কমরেড। আমার এই চিঠিটায় আপনারও কিছু সংস্রব আছে।'

চুঝানিনের কাছ থেকে হাতখানা ছাড়িয়ে নিয়ে চিঠিটা নিল তোনিয়া—পড়বার সময় তার হাতের মধ্যে কাগজের টুকরোটা অল্প একটু কঁপে গেল। সেগেইকে চিঠিখানা ফিরিয়ে দিয়ে জিজ্ঞেস করল, 'ওর আর-কোনো খবর পেয়েছেন?'

'না,' সেগেই উত্তরে বলল।

সেই মুহূর্তে রিতার পায়ের নিচে পাথরের নুড়িতে কড়মড় শব্দ বাজতেই চুঝানিন তাকে দেখে তেনিয়ার দিকে ঝুঁকে পড়ে নিচুগলায় বলল, 'চলো, আমরা বরং চলে যাই।' কিন্তু রিতার বিদ্রূপ আর ভৎসনায় ভরা স্বরে থেমে পড়ল সে।

'কমরেড চুঝানিন! ট্রেনে ওরা আপনাকে সারাদিন ধরে ঝুঁজছে।'

বিরক্তির চোখে তার দিকে তাকিয়ে চুঝানিন বলল, 'ঠিক আছে, আমাদের ছাড়াই ওরা চালিয়ে নেবে 'খন'।'

তেনিয়া আর সামরিক কমিশনারের চলে যাওয়ার দিকে তাকিয়ে থেকে রিতা মস্তব্য করল, 'এই অকর্মাটাকে কবে যে বিদায় করবে!'

ওক-গাছের বিরাট উঁচু মাথাগুলো হাওয়ার দমকে নাড়া খেয়ে গোটা বনটায় মর্মরধ্বনি উঠেছে। হ্রদের বুক থেকে বিচ্ছুরিত হচ্ছে একটা সতেজ মধুরতা। সেগেই উঠে পড়ল জলে নামবার জন্য।

সাঁতার কেটে ফিরে এসে দেখে, রাস্তার অদূরে একটা কাটা ওক-গাছের গুঁড়ির উপর রিতা বসে আছে।

কথা বলতে বলতে তারা বনের গভীরে চলে এল, লম্বা ঘন ঘাসে ভরা একটা ফাঁকা জায়গায় একটু বিশ্রাম নেবার জন্য বসল তারা। বনের মধ্যে নিবিড় প্রশান্তি। ওক-গাছগুলো কানাকানি করছে নিজেরদের মধ্যে। নরম ঘাসের উপর শুয়ে পড়ে রিতা এক হাত বিছিয়ে নিল মাথার নিচে। লম্বা ঘাসের মধ্যে তার সুঠাম পাদুটি ঢাকা পড়ল।

হঠাৎ তার পায়ের দিকে চোখ পড়ল সেগেইয়ের। রিতার ভালো করে তালি-মারা বুটজোড়ার দিকে লক্ষ করে সে নিজের আঙুল-বেরিয়ে-পড়া জুতোর দিকে তাকিয়ে হেসে উঠল।

'হাসির কী দেখলে?' জিজ্ঞেস করল রিতা।

নিজের জুতোটার দিকে আঙুল দিয়ে দেখিয়ে সেগেই বলল, 'এরকম বুট পরে আমরা লড়াই করব কী করে?'

জবাব দিল না রিতা। একটা ঘাসের শিষ কামড়াতে কামড়াতে সে অন্য কথা ভাবছে বলে বোঝা গেল। শেষে বলল, 'চুঝানিনটা অতি বাজে কমিউনিস্ট। আমাদের সমস্ত রাজনীতিক কর্মী ছেঁড়া জামাকাপড় পরে, ও কিন্তু নিজেরটা ছাড়া আর কারুর কথা ভাবে না। ও পার্টির মধ্যে দৈবাৎ এসে ঢুকেছে... ফ্রন্টের অবস্থাটা এদিকে সত্যিই খুব গুরুতর। এখনও দীর্ঘ আর প্রচণ্ড লড়াইয়ের মধ্যে দিয়ে যেতে হবে আমাদের দেশকে।' একটু থেমে আবার বলল, 'কথা আর বন্ধুক—এই দুই দিয়েই আমাদের লড়াই চালিয়ে যেতে হবে, সেগেই। কমসমোলের শতকরা পঁচিশজন সভ্যকে ফৌজে যোগ দিতে হবে—কেন্দ্রীয় কমিটির এই সিদ্ধান্ত শুনেছ তো? আমার মনে হয়, এখানে আর বেশিদিন থাকার মেয়াদ আমাদের নেই।'

ওর কথা বলার মধ্যে কী একটা নতুন সুর শুনতে পেয়ে সেগেই বিম্বিত হল। নিজের ওপর রিতার কালো গভীর চোখের দৃষ্টি অনুভব করে তার সমস্ত বিচার-বিবেচনা চুলোয় দিয়ে বলে উঠতে ইচ্ছে হল, রিতার চোখদুটো যেন আয়নার মতো স্বচ্ছ, কিন্তু যথাসময়ে সে সামলে নিল নিজেকে।

কনুইয়ের উপর ভর দিয়ে একটু উঠে রিতা জিজ্ঞেস করল, 'তোমার পিস্তলটা গেল কোথায়?'

ফোভের সঙ্গে কোমরবন্ধনীটা নাড়াচাড়া করে সেগেই বলল, 'সেই কুলাকদের দলটা ছিনিয়ে নিয়েছে।'

রিতা তার কোর্তার পকেটে হাত ঢুকিয়ে ঝকঝকে একটা অটোম্যাটিক পিস্তল বের করল। ওরা যেখানে বসে আছে সেখান থেকে প্রায় পঁচিশ পা দূরে একটা গাছের খাজ-কাটা গুঁড়ির দিকে পিস্তলের নলটা উঁচিয়ে দেখিয়ে বলল, 'ওই গুক-গাছটা দেখছ তো?' বলেই প্রায় নিশানা না করেই সে চোখ-বরাবর পিস্তলটা তুলে ধরে গুলি করল। গুঁড়িটার গা থেকে খানিকটা বাকল টুকরো টুকরো হয়ে ঝরে পড়ল নিচে।

'দেখলে তো?' নিজের কৃতিত্বে ভারি খুশি হয়ে সে আবার গুলি ছুড়ল। আর একবার গাছের খানিকটা বাকল টুকরো টুকরো হয়ে ঝরে পড়ল ঘাসের বুকে।

'আচ্ছা, নাও,' পিস্তলটা সেগেইয়ের হাতে দিয়ে কৌতুক করে হেসে রিতা বলল, 'দেখা যাক তোমার দৌড় কতদূর।'

তিনবার গুলি ছুড়ে একবার তাগ ফস্কাল সেগেই।

প্রশ্নের হাসি হাসল রিতা, 'আমি ভেবেছিলাম, তাও পারবে না বুঝি।'

পিস্তলটা জমিতে রেখে গা এলিয়ে দিল সে ঘাসের উপর। তার নিটোল বুকের উপরে টানটান হয়ে আছে কোর্তাটা।

কোমল গলায় সে বলল, 'এখানে এসো, সেগেই।'

কাছে সরে এল সেগেই।

'আকাশটা দ্যাখো একবার। কী নীল! তোমার চোখেরও ওই রঙ। এটা কিন্তু ভালো নয়। চোখের রঙ হওয়া উচিত ছিল ধূসর—ইস্পাতের মতো। নীল রঙটা বড্ড কোমল।'

তারপর হঠাৎ তার সোনালি চুলে ভরা মাথাটাকে চেপে ধরে রিতা তার ঠোঁটে চুমো খেল প্রবল আবেগভরে।

\*

\*

\*

দু-মাস কেটে গেছে। শরৎকাল।

রাত্রি যেন অলঙ্ঘ্য এসে গাছগুলোকে সব কালো পর্দায় ঘিরে দিয়েছে। ডিভিশনের সদর দপ্তরের টেলিগ্রাফকর্মীটি ঝুঁকে পড়েছে তার যন্ত্রটার উপরে : টরেটকা শব্দে সঙ্কেত ফুটে উঠছে একটা সরু লম্বা কাগজের ফালির উপরে, সেটা তার আঙুলের নিচ দিয়ে একেবেঁকে বেরিয়ে যাচ্ছে, আর সে ফুটকি আর ড্যাশ্চিহ্নগুলিকে দ্রুত শব্দ আর কথায় রূপান্তরিত করে চলেছে :

এক-নম্বর ডিভিশনের সদর দপ্তরের অধিনায়ককে—কপি শেপেভোভ্কা শহরের বিপ্লবী কমিটির সভাপতির কাছে। এই তার পাবার পরে দশ ঘণ্টার মধ্যে শহরের সমস্ত সরকারি প্রতিষ্ঠান সরিয়ে ফেলুন। ফ্রন্টের ভারপ্রাপ্ত 'ক' রেজিমেন্টের সেনাপতির অধীনে একটা ব্যাটালিয়ন শহরে রেখে যান। ডিভিশনের সদর দপ্তর, রাজনীতি বিভাগ এবং সমস্ত সামরিক প্রতিষ্ঠানকে বারাক্ষেপ্ টেশনে স্থানান্তরিত করুন। এই নির্দেশ ঠিকমতো পালন করা হল কিনা, তা ডিভিশনের সর্বাধিনায়ককে জানান।

ডিভিশনের সর্বাধিনায়ক  
(স্বাক্ষরিত)

দশ মিনিট বাদেই একটা মোটরসাইকেল তার হেডলাইটের আলোয় অন্ধকার চি্রে শহরের ঘুমন্ত রাস্তা দিয়ে ছুটে চলল। হাঁফাতে হাঁফাতে এসে সেটা থামল বিপুবী কমিটির বাড়ির সদরে। মোটরসাইকেল-চালক দ্রুতপায়ে ভেতরে ঢুকে সভাপতি দোলিন্সকির হাতে টেলিগ্রামখানা দিল। সঙ্গে সঙ্গে কর্মব্যস্ততায় মুখর হয়ে উঠল জায়গাটা। বিশেষ কাজের জন্য নির্দিষ্ট কর্মীদল প্রস্তুত হয়ে নিল তাড়াতাড়ি। একঘণ্টার মধ্যেই বিপুবী কমিটির জিনিশপত্রে বোঝাই হয়ে গাড়িগুলো শহরের পথে-পথে ঘড়ঘড় আওয়াজ তুলে চলল পদোন্মুখ স্টেশনের দিকে। সেখান থেকে মালপত্রগুলো রেলগাড়িতে তুলে দেওয়া হল।

টেলিগ্রামের খবরটা শুনে সেগেই মোটরসাইকেল-চালকের পেছনে বাইরে ছুটে এসে জিজ্ঞেস করল, 'আমাকে একটু স্টেশনে পৌঁছে দেবেন, কমরেড?'

'চেপে বসো পেছনে, কিন্তু সাবধান আঁকড়ে ধরে থাকবে জোরে।'

প্রচার-আন্দোলনের গাড়িখানা ইতিমধ্যেই ট্রেনের সঙ্গে জুড়ে দেওয়া হয়েছে। সেখান থেকে দশ-বারো পা দূরে রিতাকে দেখতে পেল সেগেই। সে অনুভব করল, অত্যন্ত প্রিয় একজন মানুষ আজ তার কাছ-ছাড়া হতে চলেছে। তার কাঁধ জড়িয়ে ধরে সে ফিসফিসিয়ে বলল, 'বিদায় প্রিয় কমরেড রিতা! আবার একদিন-না-একদিন আমাদের দেখা হবেই। ভুলো না আমাকে।'

কান্নায় তার গলা ধরে আসছে বুঝতে পেরে পাছে কেঁদে ফেলে এই ভয়ে প্রাণপণে নিজেকে সামলে নিল সে। এখনি তার চলে যাওয়া দরকার। আর কথা বলতে না-পেরে সেগেই শুধু সজোরে রিতার হাতদুটো চেপে মুচড়ে দিতে লাগল।

\*

\*

\*

সকালে দেখা গেল শহর আর স্টেশন নির্জন, ফাঁকা। শেষ ট্রেনটা যেন বিদায়-ঘোষণায় সিটি বাজিয়ে বেরিয়ে গেছে। শহরে রেখে যাওয়া হয়েছে যাদের, সেই পচাদ্রক্ষী ব্যাটালিয়নটি রেললাইনের দু'ধারে তাদের নির্দিষ্ট জায়গায় শুয়ে আছে।

গাছের ডালগুলোকে রিক্ত করে দিয়ে হলদে পাতাগুলো ঝরে পড়ছে। পড়ন্ত পাতাগুলো হাওয়ার তাড়নায় মর্মরধ্বনি তুলছে পথে-পথে।

লালফৌজের ওভারকোট পরে কাঁধের উপর কার্তুজ-আঁটা ক্যান্ডিসের ফিতে ঝুলিয়ে সেগেই আরও দশজন লালফৌজের সৈনিকের সঙ্গে মিলে চিনি-কলের সামনের চৌরাস্তায় পাহারায় খাড়া। পোলিশ সৈন্যরা আসছে।

\*

\*

\*

আভ্তোনম পেত্রভিচ তার পড়শী গেরাসিম লেওস্তিয়েভিচের দরজায় কড়া নাড়ল। গেরাসিমের এখনও রাত্রির ঘুমের পোশাক ছাড়া হয়নি। দরজার ফাঁকে মুখটা বের করে শুধায়, 'কী ব্যাপার?'

রাস্তা দিয়ে চলেছে অস্ত্রসজ্জিত লালফৌজের সৈন্যরা—তাদের দিকে আঙুল দিয়ে দেখিয়ে আভ্তোনম পেত্রভিচ চোখ টিপে বলল, 'ওরা চলে যাচ্ছে।'

গেরাসিম লেওস্তিয়েভিচ চিন্তিত-মুখে তার দিকে তাকিয়ে জিজ্ঞেস করল, 'পোলিশদের প্রতীক-চিহ্ন কী রকমের, জানেন?'

‘এক-মুণ্ডালা একটা ঈগল, যতদূর জানি।’

‘কোন চুলোয় পাওয়া যেতে পারে সেটা, বলুন দেখি?’

বিব্রতভাবে তার মাথাটা একবার চুলকে নিল আভুতানম পেত্রভিচ। তারপর দু-এক মুহূর্ত ভেবে নিয়ে বলল, ‘এই এদের আর ভাবনা কী। স্রেফ গুটিয়ে নিয়ে কেটে পড়বে। আর তোমাকে-আমাকে ভেবে মরতে হবে নতুন কর্তৃপক্ষের সঙ্গে মানিয়ে চলা যায় কেমন করে।’

\*

\*

\*

নিস্তব্ধতা ভেঙে গেল মেশিনগানের ঝটাখট আওয়াজে। স্টেশনের দিক থেকে একটা ইঞ্জিনের সিটি ভেসে এল। সেইদিক থেকেই শুনতে পাওয়া গেল কামানের গুমগুম শব্দ। একটা ভারী গোলা অনেক উঁচু দিয়ে শূন্য হাওয়া কেটে এসে প্রচণ্ড শব্দে আছড়ে পড়ল চিনি-কলের ওপাশের রাস্তাটায়। একরাশ নীল ধোঁয়ায় ঢেকে গেল রাস্তার ধারের ঝোপঝাড়গুলো। নিঃশব্দে, গম্ভীরমুখে পেছনে হঠে চলা লালফৌজের সেনাদল সারি-বঁধে চলেছে রাস্তা দিয়ে, যেতে যেতে ঘন ঘন পেছন ফিরে দেখে নিচ্ছে তারা।

সেগেইয়ের গাল বেয়ে একফোঁটা চোখের জল গড়িয়ে পড়ল। তাড়াতাড়ি চোখটা মুছে ফেলে আশেপাশের কমরেডদের চোরা-চাউনিতে দেখে নিল—কেউ তা লক্ষ করেনি সে-সম্বন্ধে নিশ্চিত হবার জন্য।

সেগেইয়ের পাশাপাশি চলেছে আন্তেক ক্রপোতোভস্কি—করাত-কলের লম্বা রোগা একজন মজুর। তার রাইফেলের ঘোড়াটার উপরে ধরে রেখেছে সে আঙুলটা। বিষণ্ণ-গম্ভীর আর চিন্তামগ্ন আন্তেকের সঙ্গে সেগেইয়ের চোখাচোখি হতেই বলে উঠল সে, ‘ওরা আমাদের লোকজনের ওপরে—বিশেষ করে আমার পরিবারের ওপরে—দারুণ অত্যাচার চালাবে, কারণ আমরা পোলিশ। বলবে, পোলিশ হয়েও কিনা পোলিশ লিজিয়নের বিরুদ্ধে দাঁড়িয়েছ।’ নিশ্চয় ওরা আমার বুড়ো বাবাকে করাত-কল থেকে লাথি মেরে হাঁকিয়ে দিয়ে চাবুক-পেটা করবে। বাবাকে বলেছিলাম আমাদের সঙ্গে আসবার জন্যে, কিন্তু কিছুতেই সে পরিবারের আর-সবাইকে ছেড়ে আসতে চাইল না। আমার আর তর সইছে না ওই হারামজাদা গুয়েরগুলোকে হাতের মুঠোয় পাবার জন্যে!’ প্রায় চোখের উপরে নেমে আসা তার শিরস্ত্রাণটাকে ত্রুঙ্ক ভঙ্গিতে ঠেলে সরিয়ে দিল আন্তেক।

...বিদায়, শেপেতোভ্কা! তুমি অসুন্দর, অপরিচ্ছন্ন তোমার পথ-ঘাট, কুখসিত তোমার ছোট ছোট বাড়িগুলো, বাঁকাচোরা এলোমেলো তোমার সড়ক—তবু তুমি পুরাতনী, চিরপ্রিয়া। বিদায়, প্রিয়জনেরা—ভালিয়া, আর অন্যান্য কমরেডরা যারা গোপনে কাজকর্ম চালিয়ে যাবার জন্য থেকে গেলে, তোমাদের সকলের কাছে বিদায়। পোলিশ লিজিয়ন এগিয়ে আসছে—নির্মম, ভয়ঙ্কর, বেপরোয়া!

তেলচিটে কোর্তা গায়ে রেল-শ্রমিকরা বিষণ্ণচোখে তাকিয়ে রইল লালফৌজের চলে যাওয়ার দিকে।

‘আমরা আবার আসব, কমরেড!’—বেদনার্ত মনে চেষ্টা করে উঠল সেগেই।

প্রত্যাশের কুয়াশায় অস্পষ্ট নদীটার ঝিকিমিকি তেমন ফুটেছে না। দুই তীরের মসৃণ নুড়িগুলোয় জলের চাপড়ে মৃদু কুলকুল শব্দ উঠছে। পাড়-ঘেঁষা চড়ার কাছে অগভীর জলে নদী শান্ত, সেখানে রূপোলি বৃকে তার যেন ঢেউয়ের ওঠা-পড়া প্রায় নেই বলেই মনে হয়। মাঝ-দরিয়ায় কিন্তু জলের স্রোত গভীর আর অশান্ত বেগে পাক খেয়ে বয়ে চলেছে। নীপারের এই মহিমাময় সৌন্দর্য গোগলের রচনায় অমর হয়ে আছে। ডানদিকের উঁচুপাড়টা খাড়া নেমে গেছে জলে—যেন একটা পাহাড়ের অগ্রগতি ধমকে গেছে ফুঁসে-ওঠা জলের প্রতিরোধে। ওপারে প্রায়-সমতল বাঁ-পাড়টার বৃকে এখানে-ওখানে বালিয়াড়ি—বসন্তকালে ঢলের শেষে নদীর জল সরে গিয়ে ওগুলো জেগে উঠেছে।

নদীর পাড়ে একটা ছোট ট্রেনের মধ্যে ভোঁতা-নলঅলা একটা ‘ম্যাক্সিম’ মেশিনগানের পাশে পাঁচজন। এটা সাত-নম্বর রাইফেল-ডিভিশনের একটা সামনের ঘাঁটি। নদীর দিকে মুখ করে মেশিনগানের সবচেয়ে কাছাকাছি কাত হয়ে শুয়ে আছে সেগেই ব্রহ্মাক।

আগের দিন অবিশ্রাম লড়াইয়ের পরে নিতান্ত শ্রান্তক্লান্ত হয়ে পোলিশ গোলন্দাজ-বাহিনীর প্রচণ্ড গোলাগুলির ঝাপটায় হঠে তারা কিয়েভ ছেড়ে দিয়ে এসে এখন নদীর বাঁ-পাড়ে ঘাঁটি গেড়েছে।

এই পিছিয়ে আসা, প্রচণ্ড ক্ষতি স্বীকার এবং শেষপর্যন্ত শত্রুর হাতে কিয়েভকে ছেড়ে দিয়ে আসার ফলে এরা ভয়ানক আঘাত পেয়েছে। সাত-নম্বর ডিভিশনটি অত্যন্ত বীরত্বের সঙ্গে শত্রুপক্ষের ঘেরাও ভেঙে বেরিয়ে এসেছিল। বনের মধ্যদিয়ে পথ কেটে মালিন্ টেশনে রেললাইনের কাছে বেরিয়ে এসে তারা প্রচণ্ড একটা পাল্টা আঘাত হেনে পোলিশ-ফৌজকে পিছু হঠিয়ে দিয়ে কিয়েভের পথ পরিষ্কার করে নিয়েছিল।

কিন্তু পরে সেই সুন্দর শহরটিকে ছেড়ে দিয়ে আসতে হয়েছে; লালফৌজের সৈন্যদের মনে দারুণ আফসোস।

লাল সৈন্যদলগুলিকে দারনিৎসা থেকে হঠিয়ে দেবার পর পোলিশ সেনাবাহিনী এখন নদীর বাঁ-ধারে রেল-সাঁকোটের পাশে ছোট ঘাঁটি দখল করে আছে। কিন্তু প্রচণ্ড পাল্টা আক্রমণের মুখে তাদের এর বেশি এগুনোর সমস্ত চেষ্টা ব্যর্থ হয়েছে।

নদীর স্রোতের দিকে তাকিয়ে থাকতে থাকতে আগের দিনের ঘটনাগুলো সেগেই ভাবছিল মনে-মনে।

গতকাল দুপুরে তার সৈন্যদল পোলিশ-সৈন্যদের সঙ্গে লড়েছে। কালকেই সে প্রথম শত্রুর সঙ্গে সরাসরি হাতাহাতি লড়াই করেছে। রাইফেলের আগায় লাগানো লম্বা তলোয়ারের মতো ফরাসি বেয়নেট সামনে বাগিয়ে ধরে তার ওপরে লাফিয়ে পড়েছিল পোলিশ লিজিয়নের একজন তরুণ সৈন্য; দুর্বোধ্য ভাষায় কী যেন বলতে বলতে স্বরগোশের মতো সে সেগেইয়ের দিকে এগিয়ে এসেছিল, একমুহূর্তেরও ভগ্নাংশ সময়ের জন্য তার উন্মাদের মতো চোখদুটো সেগেই দেখতে পেয়েছিল। পরমুহূর্তেই পোলিশটার বেয়নেটের সঙ্গে সেগেইয়ের বেয়নেটের ঠোকাঠুকি হতেই

চকচকে ফরাসি বেয়নেটটা ছিটকে পড়ে গিয়েছিল একপাশে। মুখ খুবড়ে পড়েছিল পোলিশ ছেলেটা...

হাত কাঁপেনি সেগেইয়ের। সে জানে—এরকম আরও অনেক মানুষ মারতে হবে। যে-সেগেই এত নিবিড় মধুর আবেগে ভালোবাসতে পারে, প্রগাঢ় বন্ধুত্ব গড়ে তুলতে পারে, সেই সেগেইকেই আবার হত্যাও করতে হয়। তার স্বভাবের মধ্যে কোনোরকম নিষ্ঠুরতা নেই, কোনো পাপ নেই। কিন্তু সে জানে তাকে এই বিপথচালিত শত্রুসৈন্যের বিরুদ্ধে লড়াই করতেই হবে—দুনিয়ার যত পরগাছারা ওদের মনের মধ্যে পাশব-বিষেষের একটা উত্তেজনা জাগিয়ে দিয়ে ঠেলে পাঠিয়েছে সেগেইয়ের দেশের বিরুদ্ধে। সুতরাং তাকেই—সেগেইকেই—আজ হত্যা করতে হবে যাতে যেদিন মানুষ আর মানুষকে মারবে না সেইদিনটি দ্রুত এগিয়ে আসে।

পারমোনভ আস্তে করে তার কাঁধে চাপড় মারল, 'চলো, সেগেই, এবার যাওয়া যাক বরং, নইলে ওরা আমাদের দেখে ফেলতে পারে।'

\*

\*

\*

এক বছর ধরে পাভেল করচাগিন দেশের সর্বত্র ঘুরে বেড়াচ্ছে—কখনও ঘোরে মেশিনগানের গাড়িতে বা কামান-বগুয়া খোলা গাড়িতে, কখনও ঘোরে ধূসর রঙের এক-কান-কাটা ছোট ঘোড়ায় চেপে। সে এখন সুপরিণত মানুষ, নানান কষ্টের মধ্যে দিয়ে অসুবিধে সয়ে সয়ে তার মন পরিণত, তার শরীর শক্তসমর্থ। কার্তৃজ-আঁটা ভারী ফিতের ভারে তার গায়ের কোমল চামড়ায় যে-ফোসকা পড়েছিল তা অনেকদিন হল সেরে গেছে, রাইফেল-ঝোলানো চামড়ার ফালিটার নিচে কাঁধের উপর কড়া পড়ে গেছে।

এই একবছরে পাভেলের অনেককিছু নিদারুণ অভিজ্ঞতা হয়েছে। দেশের চতুর্দিকে কুচকাওয়াজ করে ফিরেছে সে তারই মতো হেঁড়াখোঁড়া অপ্রতুল পোশাক-পরা আরও হাজার হাজার মানুষের সঙ্গে—সেইসব মানুষ, যাদের মনে নিজেদের শ্রেণীর ক্ষমতা প্রতিষ্ঠা করার সংগ্রামে দুর্জয় সংকল্পের উদ্দীপনা জ্বলছে। মাত্র দু'বার সেই ঝড়ের ঝাপটার মধ্যে পাভেল উপস্থিত থাকতে পারেনি—প্রথমবার, যখন তার কোমরের নিচে গুলি বিধেছিল, আর দ্বিতীয় বার, ১৯২০-র ফেব্রুয়ারির সেই নিদারুণ শীতে, সে তখন টাইফাস্ রোগের চটচটে গরমে-ঘামে ছটফট করছিল।

বারো-নম্বর আর্মির বিভিন্ন রেজিমেন্টে আর ডিভিশনে যত লোক পোলিশ মেশিনগানের গুলিতে মারা পড়েছে, তার চেয়ে ঢের ঢের বেশি লোক মারা গেছে টাইফাস্ রোগে। সেই সময়ে বারো-নম্বর আর্মি প্রায় গোটা উত্তর-ইউক্রেন জুড়ে বিরাট একটা এলাকায় লড়াই চালাচ্ছিল, যাতে পোলিশরা আর এগুতে না পারে।

অসুখটা থেকে সেরে উঠতে-না-উঠতেই পাভেল এসে যোগ দিয়েছে তার সৈন্যদলে। তারা এখন কাজাভিন—উমান শাখা-রেললাইনের উপরে ফ্রন্টোভ্কা স্টেশনটা দখল করে আছে।

ফ্রন্টোভ্কা স্টেশনটার চারিদিকে বন। ছোট একটা স্টেশনঘর আর তার চারপাশে কতকগুলো ভাঙাচোরা ফাঁকা কুঁড়েঘর নিয়ে জায়গাটা। তিন বছর ধরে প্রায়ই যুদ্ধ চলার ফলে এই অঞ্চলের স্বাভাবিক বেসামরিক জীবন একেবারে অসম্ভব হয়ে গেছে। কতবার যে হাত-বদল হয়েছে এই ফ্রন্টোভ্কা তার ইয়ত্তা নেই।

আবার কতকগুলো গুরুতর ঘটনা ঘটতে চলেছে। বারো-নম্বর আর্মির সৈন্যসংখ্যা ভয়ানক রকম কমে গেছে, আংশিকভাবে তাদের সংগঠনও ভেঙে পড়েছে, পোলিশ সৈন্যবাহিনীর চাপে কিয়েভ পর্যন্ত পিছিয়ে আসছে তারা—এমন সময়ে জ্যোৎস্নাসে মস্ত পোলিশ শ্বেতরক্ষীদের উপরে একটা মোক্ষম আঘাত হানবার জন্য প্রজ্ঞাতন্ত্র তার সমস্ত শক্তি সংহত করতে লেগেছে।

এক-নম্বর ঘোড়সওয়ার আর্মির ডিভিশনগুলিকে সেই উত্তর ককেশাস থেকে বদলি করে আনা হচ্ছে একেবারে ইউক্রেনে। বহু যুদ্ধের আগুনে পোড়-খাওয়া সব লোক এরা। সামরিক ইতিহাসে অতুলনীয় এক অভিযানে এদের লাগানো হচ্ছে। উমান অঞ্চলে একে একে এসে জড়ো হয়েছে চার-নম্বর, ছ-নম্বর, এগারো-নম্বর আর চোদ্দ-নম্বর ঘোড়সওয়ার ডিভিশন। এখানে আসার পথে তারা মাখনোর বোম্বটে দলকে নিশ্চিহ্ন করে দিয়ে এসে, এবার ফ্রন্টের পেছন-ঘাঁটিতে নিজেদের শক্তি সংহত করে নিচ্ছে—সাড়ে ষোলো হাজার তরোয়াল, স্তেপ-অঞ্চলের কড়া রোদে পোড়-খাওয়া সাড়ে ষোলো হাজার সৈনিক।

শত্রুপক্ষ যাতে এই চরম আঘাতটা ব্যর্থ করে দিতে না পারে, সেইটেই এই সন্ধিক্ষণে লালফৌজের সর্বোচ্চ পরিচালনা পরিষদের আর দক্ষিণ-পশ্চিম ফ্রন্টের সামরিক নেতৃত্বের সবচেয়ে মুখ্য ভাবনা। এই বিরাট ঘোড়সওয়ার বাহিনীটার যাতে ঠিকমতো সমাবেশ হতে পারে সে-সম্বন্ধে নিশ্চিত হবার জন্য সবরকমের ব্যবস্থা করা হয়েছে। উমান-এর দিকটায় লড়াই বন্ধ রাখা হয়েছে। মস্কো থেকে ফ্রন্টের সদর দপ্তর খারকভ পর্যন্ত আর সেখান থেকে চোদ্দ-নম্বর আর বারো-নম্বর আর্মির সদর-ঘাঁটি পর্যন্ত যোগাযোগের টেলিগ্রাফ-লাইন অবিরাম কর্মমুখর। টেলিগ্রাফ অপারেটররা অনবরত সাংকেতিক ভাষার হুকুম-নির্দেশ নিতে ব্যস্ত : ‘ঘোড়সওয়ার বাহিনীর সমাবেশের দিক থেকে পোলিশদের নজর অন্যদিকে ঘুরিয়ে দাও।’ যখন মাঝে মাঝে পোলিশ-সৈন্যদের এগিয়ে আসার ফলে বুদিওনি-ঘোড়সওয়ার ডিভিশনগুলি বিব্রত হয়ে পড়ছে, শুধু তখনই শত্রুকে রুখবার জন্য লড়াই চালানো হচ্ছে।

সৈন্যদের তাঁবুর একপাশে আগুনের কুণ্ডলী জ্বলছে লাল শিখার ফুলকি ছড়িয়ে। আগুন থেকে ধোঁয়ার রাশি পাক খেয়ে-খেয়ে উঠে গুনগুন শব্দ-তোলা অস্থির মশার ঝাঁকগুলোকে তাড়িয়ে দিচ্ছে। জ্বলন্ত কুণ্ডলীটাকে অর্ধবৃত্তাকারে ঘিরে মানুষগুলো বসে আছে, আগুনের আলোয় একটা তামাটে আভা ফুটেছে তাদের মুখে। আগুনের ধারে-ধারে বসানো নীলচে-ধূসর গরম ছাইয়ের উপর বসানো টিনের পাত্রগুলোয় জল ফুটছে।

একটা জ্বলন্ত কাঠের তলা থেকে আগুনের একটা শিখা হঠাৎ ছিটকে বেরিয়ে এসে গুদের মধ্যে একজনদের ঝাঁকড়া এলোমেলো চুলের উপর পড়ল। মাথাটা একটা ঝাঁকুনি দিয়ে সরিয়ে নিয়ে বিরক্তিম্বরা গলায় বিড়বিড়িয়ে বলল, ‘ধুস্তোরি ছাই!’

আগুনের পাশে আর-যারা বসেছিল তাদের মধ্যে একদমক হাসির রোল উঠল।

গোফ-ছাঁটা একজন মধ্যবয়সী সৈনিক আগুনের আলোয় তার রাইফেলের নলটা পরীক্ষা করছিল—সে বলে উঠল, ‘বইপড়ায় এতই আত্মহারা ছেলেটা যে আগুনে পুড়লেও খেয়াল করে না।’



কে-একজন বলল, 'কী পড়ছ, আমাদের সবাইকে একটু শোনাও না, করচাগিনি?'  
লালফৌজের ওই তরুণ সৈনিকটি মাথা থেকে একগোছা পোড়া চুল টেনে ফেলে  
মৃদু হাসল, 'সত্যিকারের একটা ভালো বই কমরেড আন্দ্রোচুক। শেষ না করে আর  
কিছুতেই ছাড়তে পারছি না।'

করচাগিনির পাশের বোঁচা-নাক ছেলেটা অসীম ধৈর্যের সঙ্গে তার খলেটার  
ছেঁড়া-ফিতে মেরামত করছিল—সে জিজ্ঞেস করল, 'বইটা কী সম্বন্ধে?' মোটা সুতোটা  
দাঁতে কেটে বাকিটা ছুঁচের গায়ে জড়িয়ে নিতে টুপিতে সেটাকে আটকে রেখে সে  
বলল, 'যদি প্রেমের গল্প হয়, তাহলে শুনতে রাজি আছি।'

একটা হাসির হুল্লোড় পড়ে গেল এই মন্তব্যে। মাথভেইচুক তার ছোট করে ছাঁটা  
চুলঅলা মাথাটা তুলে সেই বোঁচা-নাক ছেলেটার দিকে একটা চতুর ভঙ্গিতে চোখ টিপে  
বলল, 'প্রেম বড় ভালো জিনিশ, সেরদা। আর তোমার চেহারাটাও খাসা—একেবারে  
পটের ছবিটির মতো। আমরা যেখানেই যাই, তোমার পেছনে ছুটোছুটি করে মেয়েদের  
তো জুতোর সুকতলা ক্ষয়ে যাবার জোগাড়। তবে তোমার মতো এমন সুন্দর সুপুরুষের  
চেহারাতেও একটা ছোট খুঁত আছে, এইটে বড় দুঃখের কথা : নাকের বদলে তোমার  
মুখের উপর বসিয়ে দেওয়া হয়েছে একটা পাঁচ-কোপেক মুদ্রা। কিন্তু সেটা সহজেই  
ঠিক করে নেওয়া যায়—এক রাস্তিরের জন্যে শুধু নাকের সঙ্গে একটা পাঁচ-সেরী  
'নভিথকি'\* বেঁধে ঝুলিয়ে রাখো, বাস্, সকালেই সব ঠিক হয়ে যাবে।'

ঠাট্টাটুকু শুনে এমন উচ্চকিত হাসি হেসে উঠল সবাই যে মেশিনগান বইবার  
গাড়িগুলোর সঙ্গে বাঁধা ঘোড়াগুলো পর্যন্ত ঘাবড়ে গিয়ে ছটফটিয়ে উঠল।

সেরদা গ্রাহ্য না-করার ভঙ্গিতে মুখ ফিরিয়ে আড়চোখে তাকাল। তারপর বেশ  
অর্থপূর্ণ ভঙ্গিতে কপালের পাশে ঠোকা মেরে বলল, 'মুখের সৌন্দর্যের চেয়ে এর  
ভেতরে কী আছে সেইটেই বড় কথা। এই তোমার কথাই ধরো—তোমার জিভটা তো  
বোলতার হলের মতো, কিন্তু বুদ্ধিটা তোমার পাখার চেয়ে একবিন্দুও বেশি নয়, একটা  
কথার মানে বুঝতেই তোমার এক বেলা লেগে যায়।'

দু'জনে প্রায় মারামারি বেধে যায় আর-কী, এমন সময়ে বিভাগীয় কম্যান্ডার  
তাতারিনভ তাদের শাস্ত করল, 'আহা, রাগারাগি করছ কেন, ভাই? বরং ততক্ষণ  
করচাগিনি আমাদের পড়ে শোনাক দেখি শোনার মতো কিছু যদি থাকে।'

'সেই ভালো। শুরু করো, পাভলুশ্কা!' চারিদিক থেকে বলে উঠল সবাই।

একটা ঘোড়ার জিন আগুনের কাছাকাছি টেনে নিয়ে তার উপর বসে পাভেল ছোট  
মোটা বইটা তার হাঁটুর উপর রেখে পাতা ওলটাল।

'কমরেড, বইটার নাম 'দি গ্যাডফ্লাই'। ব্যাটালিয়ন কমিশার বইটা আমাকে  
দিয়েছেন। চমৎকার বই। তোমরা যদি চুপ করে বসে শোনো, তাহলে পড়তে পারি।'

'লাগাও, লাগাও! কিছু ভেবো না—কেউ বাধা দেবে না।'

কিছুক্ষণ বাদে রেজিমেন্ট-কম্যান্ডার কমরেড পুজিরেভস্কি তার কমিশারের সঙ্গে  
এদের অলক্ষ্যে আগুনের কাছে ঘোড়া হাঁকিয়ে এসে দেখে—একজন বই পড়ছে আর

\* একধরনের হাতবোমা, প্রায় সাড়ে চার সের ওজন, কাঁটাতারের বেড়াঝাল উড়িয়ে দেবার জন্য  
ব্যবহার করা হয়।

এগারো-ছোড়া চোখ তার দিকে নিম্পলক দৃষ্টিতে তাকিয়ে আছে। কমিশারের দিকে ফিরে ওদের দেখিয়ে কম্যাভার বলল, 'আমাদের রেজিমেন্টের স্কাউট-দলের অর্ধেকই এখানে আছে দেখছি। এদের মধ্যে চারজন একেবারে সদ্য কমসমোল থেকে এসেছে, বয়েসেও ছেলেমানুষ। কিন্তু এরা সবাই খুব ভালো সৈনিক। যে-ছেলেটা পড়ছে তার নাম করচাগিন। আর ওই-যে বসে আছে, যার চোখদুটো নেকড়ের বাচ্চার মতো, ওর নাম ঝারকি। ওরা দু'জনে বন্ধু, কিন্তু আবার ওদের দু'জনের মধ্যে কাজের ক্ষেত্রে একটা নিঃশব্দ প্রতিযোগিতাও চলছে সবসময়। করচাগিনই এ-পর্যন্ত আমাদের দলে সবচেয়ে ভালো স্কাউট ছিল, কিন্তু এখন ওর রয়েছে একজন প্রবল প্রতিদ্বন্দ্বী। এখন ওরা যা করছে এটা রাজনীতিক কাজ, এতে বেশ ফলও পাওয়া যাচ্ছে। এমন ছেলেদের খুব জুতসই নাম বানানো হয়েছে 'তরুণ প্রহরী'। ভারি জুতসই হয়েছে নামটা, আমার মনে হয়।'

কমিশার জিজ্ঞেস করল, 'যে পড়ছে, ওই কি এদের রাজনীতিক পরিচালক?'

পায়ের গুঁতো মেরে ঘোড়াটা হাঁকিয়ে নিয়ে এগিয়ে এসে পুজিরেভ্‌স্কি বলল, 'না। ক্রামের এদের রাজনীতিক পরিচালক।'

'এই যে, কী খবর কমরেডরা!' হেকে উঠল সে।

সবাই ফিরে তাকাল কম্যাভারের দিকে। সে ততক্ষণে জিন থেকে লাফিয়ে নেমে পড়ে দলটার কাছে এসে দাঁড়িয়েছে।

'শরীরটাকে একটু গরম করে নিচ্ছ নাকি, ডাই?' দরাজ হাসি হেসে কথাটা বলার সময়ে তার অঙ্গ-চেরা মঙ্গোলীয় চোখের আর শক্ত মুখের কড়া ভাবটুকু একেবারে মুছে গেল।

ঘনিষ্ঠ বন্ধু আর কমরেডকে যেমন আন্তরিকতার সঙ্গে অভ্যর্থনা জানায়, এরা সবাই ঠিক তেমনিভাবেই তাদের কম্যাভারকে অভিবাদন জানাল। কমিশার নামল না ঘোড়া থেকে।

খাপে-ভরা মাউজার-পিস্তলটা একপাশে সরিয়ে দিয়ে পুজিরেভ্‌স্কি করচাগিনের পাশে বসে পড়ে জিজ্ঞেস করল, 'একটা করে সিগারেট খাওয়া যাক। খুব ভালো খানিকটা তামাক আছে আমার কাছে।'

একটা সিগারেট পাকিয়ে ধরিয়ে নিয়ে সে কমিশারের দিকে ফিরে বলল, 'তুমি এগোও দরোনি। আমি একটু বসি। আমাকে সদর-ঘাঁটিতে দরকার পড়লে জানিও।'

দরোনি চল গেল পুজিরেভ্‌স্কি করচাগিনকে বলল, 'আজ্ঞা, পড়ে যাও, আমিও গুনব।'

শেষ পর্যন্ত পড়ার পর পাভেল বইটা হাঁটুর উপরে নামিয়ে রেখে আঙনের দিকে তাকিয়ে রইল চিন্তাচ্ছন্ন হয়ে।

কয়েকমুহূর্ত কেউ কোনো কথা বলল না। সবাই ভাবছে 'গ্যাড্‌ফ্লাই'-এর মর্যাদাসিক পরিণতির কথা।

সিগারেটের ধোঁয়া ছাড়তে ছাড়তে পুজিরেভ্‌স্কি রইল আলোচনা আরও হবার অপেক্ষায়।

নিস্তব্ধতা ভেঙে সেরেদা বলল, 'বড় ভয়ানক কাহিনী। দেখা যাচ্ছে—পৃথিবীতে এমন মানুষও আছে। 'গ্যাড্‌ফ্লাই' যা করেছে, খুব কম লোকই তা পারে। কিন্তু মানুষ যখন লড়াই করবার মতো একটা আদর্শ খুঁজে পায়, তখন সে যে-কোনো কষ্ট সইবার বলিষ্ঠতা অর্জন করে।'

স্পষ্টই দেখা যাচ্ছে, দারুণ নাড়া খেয়েছে সেরেদার মন। বইটা তার মনে গভীর দাগ কেটেছে।

আন্দ্রিউশা ফমিচেভ রাগে গর্জে উঠল, ‘ওই-যে পাদরিটা ওর মুখের মধ্যে একটা ক্রুশ ঢুকিয়ে দিয়েছে, ওই হারামজাদাটাকে হাতের কাছে পেলে পিষে মারতাম এখুনি!’—ফমিচেভ বেলায়া-সেরকভ থেকে এসেছে, সেখানে ও ছিল একজন মুচির সহকারী।

কাঠি দিয়ে একটা মেস্টিন আগুনের কাছাকাছি ঠেলে দিয়ে গভীর বিশ্বাস-ভরা গলায় আন্দ্রোশুক বলল, ‘মরবার মতো একটা সত্যিকারের আদর্শ থাকলে মানুষ মরতে কুণ্ঠিত হয় না। আদর্শই মানুষকে শক্তি জোগায়। যা করছি ঠিকই করছি—এটা জানা থাকলে সব সহ্য করে বীরের মতো মরা যায়। আমি একটা ছেলেকে জানতাম, পোরাইকা তার নাম। ওদেসায় শ্বেতরক্ষীরা তাকে কোণঠাসা করে ফেললে সে একাই একটা গোটা পস্টনের বিরুদ্ধে এগিয়েছিল। তারপর ওরা তাকে বেয়নেটে বিধে ফেলবার আগেই সে একটা হাতবোমা ফাটিয়ে নিজেকে আর সেইসঙ্গে ওদের সবগুলোকে উড়িয়ে দিল। অথচ দেখতে সে এমন কিছু অসাধারণ ছিল না। বইয়ের গল্পে যাদের সম্বন্ধে পড়া যায়, ও মোটেই সেরকম ছিল না—যদিও ওকে নিয়ে গল্প লেখা উচিত। আমাদের মধ্যে এরকম বিস্তর বীর-ছেলে আছে।

মেস্টিনের ভেতরটা সে একটা চামচ দিয়ে নেড়ে ঠোট কুঁচকে একটু চা চেখে নিয়ে আবার বলতে লাগল, ‘কেউ কেউ আছে, অপমান সয়ে কুকুরের মতো অসম্মানের মরণ মরে।—ইজিয়াভাভল-এর লড়াইয়ের একটা ঘটনার কথা বলি, শোনো। গোরিন নদীর ধারে সেটা একটা পুরনো শহর, রাজারাজ্ঞাদের আমলে তৈরি হয়েছিল। কেন্দ্রার মতো করে তৈরি একটা পোলিশ গির্জা ছিল ওখানে। শহরে ঢুকে আমরা তো বাঁকাচোরা সরু রাস্তাগুলো দিয়ে একজনের পেছনে সার বেঁধে যাচ্ছি। আমাদের ডান দিকটায় পাহারায় আছে একদল লাভভিয়ান সৈন্য। বড় রাস্তাটায় পড়তেই দেখি একটা বাড়ির বেড়ার গায়ে জিন-লাগানো তিনটে ঘোড়া বাঁধা।

‘আমরা তো ভাবলাম—যাক, এতক্ষণে জনকতক পোলিশ-সৈন্যকে নাগালে পাওয়া গেছে! জন-দশেক আমরা ছুটে ঢুকে পড়লাম আন্তিনায়—আমাদের আগে-আগে সেই লাভভিয়ান সৈন্যদলের কমান্ডার দৌড়ল তার মাউজার-পিস্তলটা নাড়তে নাড়তে।

‘সামনের দরজাটা খোলা। দৌড়ে ভেতরে ঢুকে পড়লাম আমরা। কিন্তু দেখা গেল, পোলিশদের বদলে আমাদেরই লোক রয়েছে সেখানে। বোজ্জখবর নিয়ে আসবার জন্যে একটা টহলদার ঘোড়সওয়ার-দল এরা। আমাদের আগেই এসে পৌঁছেছে। যে-দৃশ্যটা আমাদের চোখে পড়ল, সেটা মোটেই শোভন নয়। এই বাড়িতে যে-পোলিশ অফিসারটি ছিল, তারই বউটার ওপরে ওরা অত্যাচার করছে। লাভভিয়ান কমান্ডার ব্যাপারটা দেখে নিয়েই তার নিজের ভাষায় চিৎকার করে কী যেন বলল। তার সৈন্যরা এসে ওই তিনজন লোককে ধরে বাইরে টেনে আনল। ঘটনাটার সময়ে আমরা মাত্র দু’জন ছিলাম রাশিয়ান, বাকি সবাই লাভভিয়ান। এই কমান্ডারটির নাম ব্রেদিস্। আমি ওদের ভাষা বুঝি না, কিন্তু বুঝতে পারলাম যে, সে এই তিনজনকে খতম করে ফেলার জন্যে হুকুম দিয়েছে। এই লাভভিয়ানরা ভারি দুর্ধর্ষ, কিছুতেই দমে না কখনও। তারা তো এই তিনজনকে টেনে-হিঁচড়ে নিয়ে চলল

আস্তাবলের দিকে। স্পষ্টই দেখতে পেলাম, ওই তিনজন লোকের আর-কিছুতেই পার নেই। ওদের মধ্যে একজনের খুব দশাসই লম্বা-চওড়া চেহারা, বিশ্রী মুখখানা। সে তো প্রাণপণে লাথি ছুড়ে যুঝছে আর চেষ্টা করে বলছে—একটা বাজে মেয়েমানুষের জন্যে তাকে গুলি করে মারার কোনো এজিয়ার তাদের নেই। অন্য দু'জনও প্রাণভিক্ষা চাইছে।

‘আমার তো ঘামে সর্বাঙ্গ ভিজছে উঠল। ব্রেডিস-এর কাছে ছুটে গিয়ে বললাম, ‘কমরেড কম্যান্ডার, সামরিক আদালতের উপরে ওদের বিচারের ভার ছেড়ে দাও, তুমি কেন ওদের রক্তে নিজের হাত নোংরা করতে যাচ্ছ? শহরে লড়াই শেষ হয়নি এখনও, এদিকে আমরা কেন এই জানোয়ারগুলোর জন্যে সময় নষ্ট করতে যাই?’ সে তো আমার দিকে বাঘের মতো জ্বলন্ত চোখে তাকাল। সত্যি বলছি, কথাটা বলে ফেলেছি বলে আমার রীতিমতো আফসোস হল। পিস্তলটা আমার দিকেই বাগিয়ে ধরল সে। সাতবছর ধরে যুদ্ধ করছি, কিন্তু সেই মুহূর্তে যে আমার সত্যিই দারুণ আতঙ্ক হয়েছিল সে-কথা স্বীকার করছি। দেখলাম, লোকটা তক্ষুনি গুলি করে মারবে। ভাঙা-ভাঙা রুশ-ভাষায় সে আমাকে প্রচণ্ড ধমক দিয়ে যা বলল, কোনোরকমে তার মানেটা বুঝলাম, ‘আমাদের ঝগড়া আমাদেরই রক্তের রঙে লাল। এই লোকগুলো গোটা লালফৌজের কলঙ্ক। দস্যুতা করার শাস্তি—মৃত্যু!’

‘দৃশ্যটা আর সহ্য করতে না-পেরে আমি আঙিনাটা থেকে প্রাণপণে ছুটে বেরিয়ে এলাম রাস্তায়, পেছনে গুলির শব্দ শুনলাম। বুঝলাম, খতম হয়ে গেল সেই তিনজন। অন্য সঙ্গীদের সঙ্গে গিয়ে যখন জুটলাম, ততক্ষণে শহরটা আমাদের দখলে চলে এসেছে।

‘একেই বলতে চাই কুকুরের মতো মরা—ওই তিনজন লোক সেইভাবেই মরেছে। ওদের তিনজনের ওই টহলদার-দলটি হচ্ছে মেলিতোপল-এ যারা আমাদের পক্ষে যোগ দিয়েছিল তাদেরই একটি দল। একসময়ে তারা মাখনোর দলে ছিল। আজ্ঞেবাজে কয়েকজন লোক—এই আর কী!’

মেস্টিনটা টেনে নিয়ে আন্দোচ্চ তার ঝটির খলিটা খুলতে আরম্ভ করল।

‘আমাদের লোকজনের মধ্যেও অমন জানোয়ারের সাক্ষাৎ মাঝে মাঝে মিলবে। সবারই ওপর নজর রাখা তো যায় না। আপাতদৃষ্টিতে তারাও বিপ্লবের পক্ষে। অথচ এদের জন্যেই আমাদের বদনাম হয়। কিন্তু দৃশ্যটা ছিল অতি অসহ্য। চট করে আমি ঘটনাটা ভুলব না।’ চায়ে চুমুক দিয়ে সে তার বক্তব্য শেষ করল।

তাঁবুর লোকজন সবাই ঘুমিয়ে পড়েছে। রাত্রি গভীর হয়ে এসেছে। নিস্তর্রতার মধ্যে সেরেদার নাক-ডাকানো বাঁশি শোনা যাচ্ছে। পুজিরেভ্‌স্কি ঘোড়ার জিনে মাথা রেখে ঘুমোচ্ছে। দলের রাজনীতিক পরিচালক ক্রামের বসে বসে নোটবুকে কী যেন লিখছে।

পরের দিন একটা স্কাউটিং-এর কাজ থেকে ফিরে এসে পাভেল একটা গাছে তার ঘোড়াটাকে বেঁধে ক্রামেরকে ডাকল। তার সবেমাত্র চা খাওয়া শেষ হয়েছে।

‘শোনো ক্রামের, আমি যদি এক-নম্বর ঘোড়সওয়ার আর্মিতে বদলি হই, তাহলে কেমন হয়? দেখে-শুনে মনে হচ্ছে, বড় রকম কিছু হবে ওদিকে। মজা দেখবার জন্যে তো আর ওদের অমন জমায়েত করা হয়নি! আমাদের এদিকে তো বিশেষ কিছু হবে মনে হচ্ছে না।’

বিস্তৃত হয়ে ক্রামের তাকাল তার দিকে, ‘বদলি হতে চাও? সিনেমা দেখতে গিয়ে জায়গা বদল করার মতোই ফৌজের দলবদল করা যায় বলে ভেবেছ নাকি? আমরা সবাই যদি এক ইউনিট থেকে আরেক ইউনিটে ছুটতে আরম্ভ করি তাহলে এ খাসা ব্যাপার হবে!’

পাভেল বাধা দিয়ে বলল, ‘কিন্তু একজন সৈন্য কোথায় লড়াই করছে তাতে কি কিছু এসে যায়? আমি তো আর পেছনে পালিয়ে যাচ্ছি না।’

কিন্তু ক্রামের সরাসরি এ-প্রস্তাবের বিরুদ্ধে মত দিল, ‘তাহলে ফৌজের শৃঙ্খলা থাকে কোথায়? তুমি মোটেই খারাপ ছেলে নও, পাভেল। কিন্তু কোনো-কোনো ব্যাপারে তোমার চালচলন একটু নৈরাজ্যবাদীর মতো। তোমার ইচ্ছেমতো সবকিছু করবে বলে ভেবেছ নাকি? তুমি ভুলে যাচ্ছ যে পার্টি আর কমসমোল কঠিন শৃঙ্খলার ভিত্তিতে দাঁড়িয়ে আছে। সব আগে পার্টি। যার যেখানে থাকা সবচেয়ে দরকার সেইখানেই তাকে থাকতে হবে, সে যেখানে থাকতে চায় সেখানে নয়। পুজিরেভস্কি তোমার বদলির দরখাস্ত একবার ফেরত দিয়েছে। এই তো তোমার কথার জবাব।’

বলতে বলতে ক্রামের এত উত্তেজিত হয়ে পড়েছে যে একদমক কেশে উঠল সে। লম্বা রোগা এই মানুষটা ছাপাখানার কম্পোজিটর ছিল, সীসের গুঁড়ো তার ফুসফুসের মধ্যে কায়েমী বাসা বেঁধেছে, মাঝে মাঝে তার গালে একটা অস্বাস্থ্যকর লালচে আভা দেখা দেয়।

সে শান্ত হয়ে আসার পর পাভেল নিচুগলায় কিন্তু দৃঢ়স্বরে বলল, ‘যা বললে সবই ঠিক, কিন্তু তাহলেও আমি বুদিওনি-বাহিনীতেই যাব।’

পরের সন্ধ্যায় তাঁবুর পাশে আগুনের কুণ্ডলীর আড্ডায় দেখা গেল—পাভেল অনুপস্থিত।

\*

\*

\*

পাশের গ্রামে পাহাড়ের উপর একটা ইঙ্কলবাড়ির বাইরে বুদিওনি-ঘোড়সওয়ার বাহিনীর একদল সৈনিক একটা বড় বৃন্তাকারে জড়ো হয়েছে। দৈত্যের মতো বিরাট-দেহ একজন একটা মেশিনগানের গাড়ির পেছনে বসে মাথার পেছনে টুপিটা ঠেলে দিয়ে অ্যাকর্ডিয়ন বাজাচ্ছে। তার অপটু আঙুল-চালনার ফলে যন্ত্রটা থেকে বেতালা নানারকম উচ্চকিত গোষ্ঠানির সুর বেরিয়ে আসছে—যেন যন্ত্রণায় কাতরাচ্ছে বাজনাটা। অবিস্বাস্যরকমের চণ্ডা আর লালরঙের ব্রিচেজ-পরা আরেকজন ঘোড়সওয়ার চক্রটার মাঝখানে উন্মত্ত হয়ে ‘হোপাক’ নাচ নাচছে—কিন্তু নাচের সঙ্গে বাজনা না-মেলাতে লোকটাও বেতালা হয়ে নাচছে।

মেশিনগান-টানা গাড়িটার চারপাশে আর বেড়ার উপর টেনে-হিঁচড়ে উঠে উৎসুক চোখে জড়ো হয়েছে গ্রামের ছেলেমেয়েরা এই সৈন্যদের মজার ব্যাপার-ট্যাপার দেখবার জন্য—সৈন্যদলটা সবমাত্রা ওদের গ্রামে ঢুকেছে।

‘লাগাও দেখি হে তোপ্তালো! হ্যাঁ, পায়ের গুঁতোয় মাটি ঝুঁড়ে ফ্যালো, তবে তো! ধাঁই ধপাধপ—হ্যাঁ, একেই তো বলে নাচ, ভায়া! ওহে, বলি ও বাজিয়ে, জোরসে বাজাও না!’

কিন্তু অ্যাকর্ডিয়ন-বাজনদারের বিরাট মোটা আঙুলগুলো লোহার ঘোড়ার নাল অতিসহজে বেকিয়ে ফেলতে পারলেও, বাজনাটার চাবির উপর নড়াচড়া করতে লাগল অত্যন্ত আনাড়িভাবে।

একজন তামাটে রঙের ঘোড়সওয়ার-সৈন্য স্কোভের সঙ্গে বলে উঠল, 'মাখনোর ডাকাত-দলের হাতে আমাদের আফনাসি কুলিয়াব্‌কো মারা পড়াতে বড় দুঃখ হচ্ছে। ছেলেটা অ্যাকর্ডিয়ন বাজাতে পারত বড় চমৎকার। আমাদের দলের ডানদিকে থাকত ও। আহা, মারা গেল ছেলেটা! খুব ভালো সৈনিক ছিল, আর সবার সেরা অ্যাকর্ডিয়ন-বাজনদার!'

পাভেল দাঁড়িয়ে ছিল জমায়েতের মধ্যে এক জায়গায়। ঐ শেষ কথাটা কানে গেল তার। ভিড় ঠেলে মেশিনগানের গাড়িটার কাছে এসে অ্যাকর্ডিয়নের হাপরটার উপরে হাত রাখল সে। বন্ধ হয়ে গেল বাজনাটা।

অ্যাকর্ডিয়ন-বাজনদার ক্রকুটি করে জানতে চাইল, 'কী চাও তুমি?'

তোপ্তালো থেমে পড়ল, ক্রুদ্ধ একটা গুঞ্জন উঠল ভিড়ের মধ্যে থেকে, 'ব্যাপার কী?'

পাভেল বাজনার ফিতেটা টেনে নিয়ে বলল, 'দেখি একবার চেষ্টা করে।'

বুদিওনি-ঘোড়সওয়ারটি এই অচেনা লালফৌজের সৈন্যটার দিকে একটু অবিস্বাস-ভরা চোখে তাকিয়ে অনিচ্ছার সঙ্গে অ্যাকর্ডিয়ন ঝুলিয়ে দেবার ফিতেটা নিজের কাঁধ থেকে খুলে দিল।

অভ্যন্তরীণ ভঙ্গিতে পাভেল তার হাঁটুর উপর অ্যাকর্ডিয়নটা রেখে পাখার মতো খুলে ছড়িয়ে ধরল ভাঁজ-করা হাপরটা। তারপর যন্ত্রটার মধ্যে থেকে বেরিয়ে এল মন-মাতানো ছন্দের মিষ্টি সুর-ঝঙ্কার—অ্যাকর্ডিয়নের সবখানি বলিষ্ঠতা উপচে উঠল সে-সুরে :

আহা-হা, ছোট্ট আপেল,

চললে কোথায় হে?

'চেকা'র হাতে পড়বে ঠিকই,

আসবে না আর ফিরে।

পরিচিত সুরের তালে তালে তোপ্তালো একটা বিরাট পাখির মতো দুই হাত ছড়িয়ে লাফিয়ে পড়ল চক্করটার মাঝখানে—অদ্ভুত কৃতিত্বের সঙ্গে পাক খেয়ে ঘুরে-ঘুরে সুরের ছন্দের সঙ্গে তাল রেখে নিজের পায়ে, হাঁটুতে, মাথায়, কপালে, জুতোর তলায় এবং শেষপর্যন্ত মুখের উপর চাপড় মেরে-মেরে নাচতে লাগল।

অ্যাকর্ডিয়নটা দ্রুত থেকে দ্রুততর বেজে চলল মন্ত মন-মাতানো সুরে আর দম একেবারে ফুরিয়ে না-আসা পর্যন্ত উদ্দাম ভঙ্গিতে পা ছুড়ে লাটুর মতো পাক খেয়ে-খেয়ে চক্করটার চারিদিকে নেচে চলল তোপ্তালো।

\*

\*

\*

১৯২০-এর ৫ জুন কয়েকটা সর্গক্ষিপ্ত কিন্তু প্রচণ্ড লড়াইয়ের শেষে সেনাপতি বুদিওনির এক-নম্বর ঘোড়সওয়ার আর্মি তৃতীয় আর চতুর্থ পোলিশ আর্মির মাঝখানে দিয়ে শত্রুব্যূহ ভেদ করে ফেলল—পথে পোলিশ-জেনারেল সাভিৎস্কির অধীনস্থ একটা ঘোড়সওয়ার ব্রিগেড ধ্বংস করে দিয়ে বন্যার মতো এগিয়ে চলল রুখিনির দিকে।

পোলিশ সামরিক কর্তৃপক্ষ তাড়াতাড়ি করে একটা হানাদার দল গড়ে তুলে সেটাকে খাড়া করে দিল ব্যূহ যেখানে ভেঙে গিয়েছিল সেখানে। পশ্চিমবিশ্বে স্টেশন

থেকে লড়াইয়ের জায়গাটায় পাঁচটা ট্যাঙ্ক তাড়াতাড়ি এনে ফেলা হল। কিন্তু পোলিশরা যেখান থেকে আক্রমণ চালাবে বলে স্থির করেছিল সেই জারদর্নিখসির পাশ কাটিয়ে গিয়ে বুদিওনি-বাহিনী পোলিশদের পশ্চাদ্ভাগে পৌঁছে গেল।

পোলিশদের এই পশ্চাদ্ভাগে কাজাতিন হচ্ছে একটা সবচেয়ে সামরিক গুরুত্বপূর্ণ জায়গা—এক-নম্বর ঘোড়সওয়ার আর্মি সেইদিকেই এগুবে বলে পোলিশ-কর্তৃপক্ষ ধরে নিয়েছিল; পেছনদিক থেকে তাদের ওপর হামলা চালাবার হুকুম দিয়ে পোলিশ-জেনারেল কর্নিখসির ঘোড়সওয়ার-ডিভিশনটাকে পাঠানো হল। এর ফলে কিন্তু পোলিশদের অবস্থার উন্নতি ঘটল না। তারা অবশ্য ভান্ডা ব্যুহটা জুড়ে দিয়ে ঘোড়সওয়ার আর্মিটাকে বিচ্ছিন্ন করে দিতে সমর্থ হল, কিন্তু নিজেদের সৈন্যসারির পেছনে শক্তিশালী একটা শত্রু ঘোড়সওয়ার-বাহিনীর উপস্থিতির ফলে তাদের পেছনের ঘাঁটিগুলো ধ্বংস হয়ে যাবার বিপদ দেখা দিল, কিয়েতে পোলিশ-ফৌজের ওপর তাদের ঝাঁপিয়ে পড়বার সম্ভাবনাও দেখা দিল—এইসবের ফলে পোলিশ ফৌজের অবস্থাটা মোটেই নিশ্চিত হবার মতো রইল না। এগিয়ে যাবার পথে লালফৌজের ঘোড়সওয়ার ডিভিশনগুলি পোলিশদের পশ্চাদপসরণের পথে বাধা সৃষ্টি করার জন্য ছোট ছোট রেল-সাঁকোগুলো উড়িয়ে দিয়ে আর রেললাইন উপড়ে ফেলতে ফেলতে চলল।

পোলিশদের একটা আর্মির সদর-ঘাঁটি আছে জিতোমির-এ (আসলে গোটা পোলিশ ফ্রন্টের সদর-ঘাঁটিটাই সেখানে)—এ-খবরটা পোলিশ যুদ্ধবন্দিদের কাছে জানতে পেরে, এক-নম্বর ঘোড়সওয়ার আর্মির কমান্ডার জিতোমির আর বের্দিচেভ দুটো জায়গাই দখল করবে বলে ঠিক করল—এই দুটোই গুরুত্বপূর্ণ রেলওয়ে জংশন আর প্রশাসন-কেন্দ্র। সাতই জুনের ভোরে চার-নম্বর ঘোড়সওয়ার ডিভিশন পুরো বেগে এগিয়ে চলল জিতোমির-এর দিকে।

পাভেল করচাগিন ঘোড়ায় চেপে চলেছে এদের একটা স্কোয়াড্রনের ডানদিকের অবস্থানে—মৃত অ্যাকর্ডিয়ন-বাজনদার কুলিয়াবকোর জায়গায়। সৈন্যদের সমবেত অনুরোধে তাকে এই দলটায় ঢুকিয়ে নেওয়া হয়েছে, এমন চমৎকার একজন অ্যাকর্ডিয়ন-বাজিয়েকে তারা হাতছাড়া করতে চায়নি।

মুখে ফেনা-ওঠা ঘোড়াগুলিকে না-থামিয়ে তারা জিতোমিরের দিকে এগোল পাখার আকারে ছড়িয়ে—সূর্যের আলোয় তাদের খোলা তলোয়ারগুলো ঝিকমিক করছে।

খুরের শব্দে মাটি কেঁপে উঠছে, সশব্দে নিশ্বাস ফেলছে ঘোড়াগুলো, রেকাবে পা রেখে ঝাড়া হয়ে দাঁড়িয়ে উঠছে মানুষগুলো।

পায়ের নিচে দ্রুত মাটি সরে যাচ্ছে। বাগান আর পার্ক দিয়ে সাজানো মস্ত শহরটা ফৌজিদলটার কাছাকাছি এসে যাচ্ছে দ্রুত। ঘোড়সওয়ার-বাহিনী বন্যার স্রোতের মতো বাগানগুলোর পাশ দিয়ে এসে পড়ল শহরের কেন্দ্রে—একেবারে মৃত্যুরই মতো অমোঘ একটা ভয়ঙ্কর রণক্ষেত্রে আকাশ-বাতাস বিদীর্ণ হল।

এই হঠাৎ আক্রমণে পোলিশরা এতই হতচকিত হয়ে পড়ল যে তারা বিশেষ কিছু প্রতিরোধ দিয়ে উঠতে পারল না। স্থানীয় রক্ষী-সেনাদল একেবারে গুঁড়িয়ে গেল।

পাভেল করচাগিন তার ঘোড়াটার কাঁধের উপর দিয়ে নিচু হয়ে ঝুঁকে বেগে ঘোড়া হাঁকাচ্ছে। পাশাপাশি চলেছে তোপ্তালো সক্র-পাঅলা একটা কালো ঘোড়ায় চেপে।

এই দুঃসাহসী ঘোড়সওয়ারটি একসময়ে তলোয়ারের অভ্রান্ত লক্ষ্যে একটি আঘাতেই একজন পোলিশ সৈন্যের মাথা উড়িয়ে দিল, লোকটা তার কাঁধে বন্দুক তুলে নেবারও সময় পেল না।—পাভেল দেখল দৃশ্যটা।

রাস্তা দিয়ে ছুটে চলেছে তাদের ঘোড়াগুলো, লোহার নাল-লাগানো খুরের শব্দ উঠছে পাথরের বুকে। তারপরে একটা মোড়ের মাথায় তারা একটা মেশিনগানের সামনে এসে পড়ল—ঠিক রাস্তার মাঝখানে বসানো রয়েছে মেশিনগানটা, নীল রঙের উর্দি-পরা চৌকোনা টুপি মাথায় তিনজন পোলিশ তার উপর ঝুঁকে রয়েছে। চতুর্থ একজন লোকও রয়েছে, তার কোটের গলার বেড়ে সোনালি কারুকর্ম, সে পাভেল আর তোপ্তালোর দিকে তার মাউজার-পিস্তলটা বাগিয়ে ধরল।

তোপ্তালো বা পাভেল কেউ ঘোড়ার গতিবেগ ক্রমশে না-পেরে মেশিনগানের উপরে একেবারে মৃত্যুর গহ্বরের মধ্যে পড়েছে। অফিসারটি পিস্তলের গুলি ছুড়ল পাভেলকে লক্ষ্য করে—কিন্তু লক্ষ্যভ্রষ্ট হল। পাভেলের গাল ঘেষে গুলিটা শা করে বেরিয়ে গেল, পরমুহূর্তেই অফিসারটির মাথা ঠুঁকে গেল পাথর-বাঁধানো রাস্তার উপরে—ঘোড়াটার গতিবেগের ধাক্কায় সে চিৎপাত হয়ে পড়েছে।

ঠিক সেই মুহূর্তেই মেশিনগানটা বর্বর আর উন্মত্তভাবে দ্রুত-ক্রমান্বয়ে গর্জে উঠল আর ডঙ্কনখানেক গুলি খেয়ে মুখ খুবড়ে মাটিতে পড়ে গেল তোপ্তালো আর তার কালো ঘোড়াটা।

পাভেলের ঘোড়াটা পেছনের পায়ে ভর করে ঝাড়া দাঁড়িয়ে উঠে একটা আতঙ্কের হাঁক ছেড়ে ওই দু'জনের প্রাণহীন দেহের উপর দিয়ে একটা লাফ মেরে এসে পড়ল মেশিনগানের লোকগুলির ওপরে। পাভেলের তলোয়ারটা শূন্যে একটা ঝিলিক তুলে বেঁকে নেমে এসে একটা নীল রঙের চৌকোনা ফৌজি টুপির মধ্যে কেটে বসে গেল।

আরেকবার ঝলকানি দিয়ে উপরে উঠে এল তলোয়ারটা আরেকটা মাথার উপরে নেমে আসার জন্য তৈরি হয়ে, কিন্তু আতঙ্কগ্রস্ত ঘোড়াটা লাফিয়ে পড়ল একপাশে।

ততক্ষণে পুরো স্কোয়াড্রনটা বন্যায় ফুঁসে-ওঠা পাহাড়ি নদীর মতো রাস্তায় নেমে এসেছে—অসংখ্য তলোয়ারের ফলা ঝিকিয়ে উঠেছে শূন্যে।

\*

\*

\*

জেলখানার লম্বা সরু বারান্দাগুলোয় চিংকারের প্রতিধ্বনি।

যন্ত্রণাবিদ্ধ শীর্ণ-মুখ মেয়ে-পুরুষে গাদাগাদি ঠাসা ছোট ছোট জেল-কুঠরিগুলোয় দারুণ চাঞ্চল্য। শহরে যে লড়াই চলেছে তার আওয়াজ তারা শুনেছে—তার মানে কি মুক্তি? শহরের বুকে হঠাৎ নেমে-আসা এই বাহিনী কি এসেছে তাদের মুক্তি দিতে?

জেলের আঙিনাটায় গুলি চলছে। লোকজন ছোটোছুটি করছে বারান্দা বেয়ে। আর তারপরেই সেই চির-আকাজিকত দীর্ঘ-প্রতীক্ষিত ঘোষণাটি শোনা গেল, 'কমরেডসব, তোমরা মুক্ত!'

পাভেল ছুটে গেল একটা তালাবন্ধ দরজার কাছে—দরজাটার গায়ে ছোট্ট একটা জানলা দিয়ে অনেক জোড়া চোখ তাকিয়ে আছে। ভীষণ জোরে তালাটার উপরে পাভেল তার রাইফেলের কুঁদোটা দিয়ে বারবার আঘাত করতে লাগল।



পাভেলকে একপাশে ঠেলে সরিয়ে দিয়ে মিরোনভ তার পকেট থেকে একটা হাতবোমা বের করে বলল, 'দাঁড়াও একটা বোমা ফাটিয়ে ভাঙি ওটাকে।'

তাদের দলের কম্যান্ডার সিগারচেঙ্কো তার হাত থেকে বোমাটা ছিনিয়ে নিল, 'থাম, থাম, আহাম্মক কোথাকার! পাগল নাকি? এক্ষুনি চাবি নিয়ে এসে পড়বে। ভাঙতে না-পারলে চাবি দিয়েই খোলাব।'

জেলখানার প্রহরীদের ততক্ষণে বারান্দা দিয়ে নিয়ে আসা হচ্ছে রিভলবার উঁচিয়ে ধরে। তারপরে জেলখানার বারান্দা ভরে উঠল ছেঁড়া পোশাক-পরা নোংরা আনন্দে উন্মত্ত মেয়ে-পুরুষের ভিড়ে।

জেল-কুঠরিটার দরজাটা সম্পূর্ণ খুলে ধরে পাভেল ছুটে ভেতরে ঢুকল, 'কমরেড, মুক্ত তোমরা! আমরা বুদিওনির সৈনিক—আমাদের ফৌজ শহর দখল করে নিয়েছে!'

একটি মেয়ে জল-ভরা চোখে পাভেলের কাছে ছুটে এসে দুইহাতে তাকে জড়িয়ে ধরে ফুঁপিয়ে ফুঁপিয়ে কাঁদতে লাগল।

পোলিশ শ্বেতরক্ষীরা এই পাথুরে আঁধার কুঠরিগুলোয় পুরে দিয়েছিল পাঁচ হাজার একাত্তর জন বলশেভিককে আর লালফৌজের দু'হাজার রাজনীতিক কর্মীকে—এরা সবাই গুলিতে কিংবা ফাঁসিতে মরবার অপেক্ষায় ছিল; এদের উদ্ধার করতে পারাটা এই সৈন্যদলের যোদ্ধাদের কাছে যুদ্ধে জিতে-নেওয়া সমস্ত জিনিশের চেয়ে বেশি গুরুত্বপূর্ণ, এমনকি যুদ্ধজয়ের চেয়েও এটা ঢের বড় পুরস্কার। সাত হাজার বিপ্লবীর চোখে রাত্রির সূচিভেদ্য অন্ধকার কেটে গিয়ে ফুটে উঠল জুন মাসের উষ্ণ দিনের সূর্যের উজ্জ্বলতা।

একজন বন্দি আনন্দের উচ্ছ্বাসে ছুটে এল পাভেলের কাছে, তার গায়ের চামড়াটা শুকনো লেবুর রঙের মতো বিবর্ণ। সে হল সামুইল লেখের—শেপেতোভ্কার সেই ছাপাখানার একজন কম্পোজিটার।

\*

\*

\*

সামুইলের মুখে তার নিজের শহরের নিদারুণ রক্তাক্ত ঘটনার বিবরণ শুনতে শুনতে পাভেলের মুখ কালো হয়ে উঠল। প্রত্যেকটা কথা যেন হৃৎপিণ্ডের মধ্যে আগুনে গলানো ধাতুর মতো কুরে কুরে দিচ্ছে।

'রাত্রিবেলায় এসে ওরা আমাদের শ্রেণ্ডার করল—আমাদের সবাইকে একসঙ্গে। কোনো হারামজাদা আমাদের ফাঁস করে দিয়ে এসেছিল সামরিক পুলিশের কাছে। একবার ওদের হাতের মুঠোয় পড়লেই আর ওদের দয়ামায়া নেই। জানো পাভেল, সাংঘাতিক মারধোর করল আমাদের। আমার তো তবু অন্যদের চেয়ে কম কষ্ট হয়েছে, কারণ গোটা কতক ঘুসি খেয়েই আমি অজ্ঞান হয়ে পড়েছিলাম। কিন্তু অন্যরা আমার চেয়ে শক্তসমর্থ ছিল।

'গোপন করার কিছুই ছিল না আমাদের। ওরা সবই আমাদের চেয়েও ভালো জানত। আমরা যা যা বন্দোবস্ত করেছিলাম তার সবই ওরা জানত। আমাদের মধ্যে বিশ্বাসঘাতক ছিল, সুতরাং এতে আর বিশ্বয়ের কী আছে! সেসব দিনের কথা বলতেও আমার কষ্ট হয়, পাভেল। যাদের শ্রেণ্ডার করা হয়েছিল, তাদের অনেককেই তুমি

জানো। ভালিয়া ক্রম্বাক্, আর রোজা গ্রিৎস্মান—চমৎকার মেয়ে, সবে সতেরো বছরে পা দিয়েছে, কী সুন্দর বিশ্বাসে-ভরা ওর চোখদুটি ছিল, পাভেল। তারপর সাশা বুনশাফ্, তুমি তো চেনো তাকে, আমাদের কম্পোজিটরদের মধ্যে একজন, আমুদে ছেলোটো, সবসময় ছাপাখানার মালিককে ব্যঙ্গ করে ছবি আঁকত। তাকে আর হাই ইকুলের দু'জন ছাত্র নভোসেল্‌স্কি আর তুমিৎস্কে শ্রেষ্ঠার করেছিল—এদেরও তুমি চেনো। অন্যরাও সবাই স্থানীয় কিংবা জেলা সদরের লোক। সবসুদ্ধ উনত্রিশ জনকে শ্রেষ্ঠার করা হয়—তাদের মধ্যে ছ-জন মেয়ে। প্রত্যেকের ওপরেই অমানুষিক অত্যাচার করা হয়। প্রথম দিনেই ভালিয়া আর রোজাকে ধর্ষণ করল। জানোয়ারগুলো যত রকমে পারে বেচারিদের ওপর অত্যাচার চালায়, তারপরে মুমূর্ষু অবস্থায় ওদের জেল-কুঠরিতে টেনে-হিচড়ে এনে ফেলে যায়। ঘটনাটার পরেই রোজা প্রলাপ বকতে শুরু করে আর দিনকয়েকের মধ্যে তার মাথা খারাপ হয়ে যায় একেবারে।

'ও পাগল হয়ে গেছে সেটা ওরা বিশ্বাস করল না। বলল, ওটা রোজার ভান মাত্র। আর প্রতিবার ওকে জেরা করার সময়ে নির্মমভাবে মার দিত। রোজাকে শেষপর্যন্ত ওরা যখন গুলি করে মারল, তখন কী সাংঘাতিক চেহারা হয়েছিল তার! মুখখানা কালো হয়ে গিয়েছিল মারের দাগে, উন্মত্ত চোখদুটিতে তাকে দেখাত বুড়ির মতো।

'ভালিয়া ক্রম্বাক্ শেষ অবধি চমৎকার বীরত্ব দেখিয়েছে। ওরা সবাই সত্যিকারের সংগ্রামী সৈনিকের মতো প্রাণ দিয়েছে। জানি না কোথা থেকে ওরা এত সহ্য করার শক্তি পেয়েছিল। ওহ্ পাভেল, ওদের মৃত্যুর ঘটনা কী করে বর্ণনা করব? বড় বীভৎস সেই মৃত্যু!

'ভালিয়া সবচেয়ে বিপজ্জনক ধরনের কাজ করছিল : পোলিশ সদর-ঘাটির বেতার-অপারেটরদের সঙ্গে আর জেলা-সদরে আমাদের লোকদের সঙ্গে ভালিয়া যোগাযোগ রাখত। তাছাড়া, ওরা ওর বাড়ি তল্লাশি করার সময়ে দুটো হাতবোমা আর একটা পিস্তল পেয়েছিল। হাতবোমাদুটো ওকে দিয়েছিল সেই উস্কানিদাতা দালাল। সবকিছুই এমনভাবে সাজানো হয়েছিল যাতে সদর-ঘাটি উড়িয়ে দিতে চেয়েছিল বলে ওদের অভিযুক্ত করা যায়।

'উহ্ পাভেল, শেষের সেই দিনগুলোর কথা বলতে গিয়ে আমার ভয়ানক যন্ত্রণা হচ্ছে, তুমি পীড়াপীড়ি করছ বলেই বলছি। সামরিক আদালতে ভালিয়াকে এবং আর দু'জনকে ফাঁসি দেবার আর বাকি সবাইকে গুলি করে মারবার হুকুম হল।

'পোলিশ সৈন্যদের মধ্যে যারা আমাদের পক্ষে কাজ করত, তাদের বিচার দু'দিন আগে হয়ে গিয়েছিল।

'কর্পোরাল স্নেগুরুকো—অল্পবয়সী একজন বেতার-অপারেটর, যুদ্ধের আগে লদজ্-এ ইলেকট্রিশিয়ান হিসেবে কাজ করত—তাকে দেশদ্রোহ আর সৈন্যদের মধ্যে কমিউনিষ্ট প্রচার চালানোর অভিযোগে গুলি করে মারবার হুকুম হল। সে আপিল করেনি, হুকুম হবার চব্বিশ ঘণ্টা পরেই গুলিতে মারা পড়ল।

'তার বিচারের সময় ভালিয়াকে সাক্ষী দেবার জন্যে নিয়ে যাওয়া হয়। পরে সে আমাদের বলেছিল—স্নেগুরুকো কমিউনিষ্ট প্রচার চালানোর অভিযোগটা স্বীকার করে নিয়েছিল, কিন্তু দেশের প্রতি বেইমানি করেছে—এ অভিযোগের তীব্র প্রতিবাদ করেছিল, 'পোলিশ সোভিয়েত সমাজতান্ত্রিক প্রজাতন্ত্রই আমার স্বদেশ। হ্যাঁ, আমি পোলিশ

কমিউনিষ্ট পার্টির সদস্য। আমার ইচ্ছার বিরুদ্ধে জোর করে আমাকে সৈন্যদলভুক্ত করা হয়েছে এবং সৈন্যদলে ঢোকার পর আমার মতো অন্যান্য যারা লড়াই করবার জন্যে ফ্রন্টে চালান হয়ে এসেছে, তাদের চোখ খুলে দেবার জন্যে আমি আমার পক্ষে যা করা সম্ভব তাই করেছি। এর জন্যে তোমরা আমাকে ফাঁসি দিতে পারো, কিন্তু দেশদ্রোহী হিসেবে নয়—দেশদ্রোহী আমি কিছুতেই নই, কখনো হবও না। তোমাদের স্বদেশ আর আমার স্বদেশ এক নয়। তোমাদের দেশ ধনীদেব, আমার দেশ চাষী-মজুরদের মাতৃভূমি। এবং আমার সেই স্বদেশে—যে স্বদেশ একদিন প্রতিষ্ঠিত হবে বলে আমার সুদৃঢ় বিশ্বাস—সেই স্বদেশে আমাকে কেউ কোনোদিন দেশদ্রোহী বলবে না।’

‘দু ঘোষণার পর আমাদের সবাইকে একসঙ্গে রাখা হয়েছিল। মারবার আগে আমাদের জেলে বদলি করে দেওয়া হল। রাত্রিবেলায় ওরা হাসপাতালের পাশে জেলখানার সামনের দিকটায় ফাঁসির মঞ্চ তৈরি করল। গুলি করে মারবার জন্যে বনের ওধারে রাস্তার কাছাকাছি একটা বড় খানা-মতো জায়গা বেছে নিল। আমাদের সবাইকে একসঙ্গে গোর দেবার জন্যে একটা বড় কবর খোঁড়া হল।

‘মৃত্যুদণ্ডের খবরটা সারা শহরে বিজ্ঞপ্তি লটকে জানিয়ে দেওয়া হয়েছিল, যাতে সবাই জানতে পারে। জনসাধারণকে ভয় পাইয়ে দেবার জন্যেই পোলিশরা প্রকাশ্যভাবে আমাদের মারবার ব্যবস্থা করেছিল। সকাল থেকেই তারা সেই জায়গাটায় শহরের লোকদের তাড়িয়ে নিয়ে আসতে শুরু করে দিল। কেউ কেউ গেছে কৌতূহলের বশে—যদিও দৃশ্যটা বড় সাংঘাতিক। কিছুক্ষণের মধ্যেই জেল-দেয়ালের বাইরে জমে উঠেছে একটা বিরাট ভিড়। আমাদের কুঠরির মধ্যে থেকে তাদের গুল্লনের শব্দ শুনতে পাচ্ছি। জনতার পেছনে রাস্তার উপরে ওরা সব মেশিনগান খাড়া রেখেছে। সমস্ত জায়গা থেকে ঘোড়সওয়ার-সাত্তী আর সাধারণ সেপাইদের এনে মোতায়ন করেছে। গোটা একটা ব্যাটালিয়ন লাগিয়েছে রাস্তাগুলো আর আশেপাশের ক্ষেত-বাগানগুলো ঘিরে রাখবার জন্যে। যাদের ফাঁসি হবে, তাদের জন্যে মঞ্চটার পাশে একটা গর্ত খুঁড়ে রাখা হয়েছে।

‘নিঃশব্দে আমরা শেষ মুহূর্তের অপেক্ষায় আছি। মাঝে মাঝে এক-আধটা কথা বলছি নিজেদের মধ্যে। পারস্পরিক যা বলার ছিল সবই আমাদের আগের রাতে বলা হয়ে গেছে, বিদায়ও নিয়ে রেখেছি। শুধু কুঠরিটার এককোণে বসে রোজা আপনমনে ফিসফিসিয়ে কথা বলছে। ভালিয়া এতদিন ধরে নিদারুণ মারধোর আর অত্যাচার সয়ে অত্যন্ত দুর্বল হয়ে পড়েছে—নড়াচড়া করতে পারছে না বলে চুপ করে শুয়ে আছে বেশির ভাগ সময়। স্থানীয় দু’জন কমিউনিষ্ট মেয়ে—এরা দুই বোন—পরস্পরকে জড়িয়ে ধরে শেষ বিদায় নেবার সময় চোখের জল আর সামলাতে পারেনি। গ্রামের একজন জোয়ান তরুণ স্ত্রোপানভ—ওকে গ্রেপ্তার করতে গিয়ে দু’জন সামরিক পুলিশ ঘায়েল হয়েছিল ওর হাতে—সে এগিয়ে এসে বোনদুটিকে বলল, ‘কান্না নয়, কমরেড! এখানে কেঁদে যাও, কিন্তু বাইরে বেরিয়ে ওখানে যেন কেঁদো না। এই হারামজাদা জ্ঞানোয়ারগুলোকে হাসাহাসি করার সুযোগ যেন আমরা না দিই। ওরা তো কিছুতেই কোনোরকম দয়া দেখাবে না। মরতেই হবে আমাদের, সুতরাং সুন্দরভাবে মরব। নতজানু হব না আমরা। মনে রেখো কমরেডসব, আমরা মাথা উঁচু করে মরব।’

‘তারপর ওরা আমাদের নিতে এল। সবার আগে শ্ভারকেভ্‌স্কি—গোয়েন্দাকর্তা, পাগলা কুস্তার মতো, নির্ধাতন চালিয়ে আনন্দ পায়। নিজে যখন ধর্ষণ করে না, তখনও সে তার পুলিশদের ধর্ষণ করতে দিয়ে দেখে মজা উপভোগ করে। রাত্তার উপর দুই সারি পাহারাঅলার মাঝখান দিয়ে আমাদের হাঁটিয়ে নিয়ে আসা হল ফাঁসিমঞ্চটার কাছে। এই সামরিক পাহারাঅলাদের কাঁধের উপর হলদে রঙের পটি দেখে আমরা নাম দিয়েছিলাম ‘ক্যানারি’ পাখি। খোলা তলোয়ার হাতে নিয়ে ‘ক্যানারিরা’ দাঁড়িয়ে ছিল।

‘রাইফেলের গুঁতোয় ঠেলে ওরা আমাদের জেল-আঙিনাটায় বের করে এনে এক-এক সারিতে চারজন করে দাঁড় করিয়ে দিল। তারপরে ফটক খুলে রাত্তায় বের করে এনে ফাঁসিমঞ্চের দিকে মুখ করে আমাদের দাঁড় করিয়ে দিল যাতে নিজের নিজের পালা আসার আগে আমরা আমাদের কমরেডদের মরণটা দেখতে পাই। মোটা-মোটা গুঁড়ি দিয়ে তৈরি উঁচু ফাঁসিমঞ্চ। মাথার উপরে আড়কাঠটা থেকে ফাঁস-লাগানো তিনটে ভারী দড়ি ঝুলছে। ফাঁসের নিচে সিঁড়িঅলা একটা মঞ্চ, কাঠের ছোট খুঁটি দিয়ে ঠেকা দেওয়া, যাতে সেটাকে পায়ের গুঁতোয় ঠেলে সরিয়ে দেওয়া যায়। উত্তাল জনসমুদ্র থেকে একটা ক্ষীণ গুঞ্জন উঠছে। প্রত্যেকের দৃষ্টি আমাদের ওপর আটকে গেছে যেন। আমাদের কিছু লোককে ভিড়ের মধ্যে দেখতে পাচ্ছিলাম।

‘কিছুদূরে একটা উঁচু বারান্দায় একদল পোলিশ অভিজাত আর অফিসার দূরবীন নিয়ে দাঁড়িয়ে আছে। বলশেভিকদের ফাঁসি দেখতে এসেছে ওরা।

‘পায়ের নিচে বরফ নরম ঠেকল। বনটা বরফে শাদা হয়ে আছে, পঁজা তুলোর মতো ঘন তুষারে ঢাকা পড়েছে গাছগুলো। তুষারের কণাগুলো ধীরে পাক খেয়ে-খেয়ে আমাদের উত্তণ্ড মুখের উপর পড়ে গলে যাচ্ছে, ফাঁসিমঞ্চের সিঁড়িগুলো বরফের গালিচায় ঢেকে গেছে। আমাদের গায়ে জামাকাপড় সামান্যই, কিন্তু কেউই ঠাণ্ডা বোধ করছি না। স্তোপানভ লক্ষ্যই করেনি যে সে খালি মোজা-পায়ে চলেছে।

‘ফাঁসিমঞ্চের পাশে দাঁড়িয়ে আছে সামরিক অভিশংসক আর বড় বড় অফিসার। শেষপর্যন্ত ভালিয়াকে আর অন্য যে-দু’জন কমরেডকে ফাঁসি দেওয়া হবে, তাদের বের করে আনা হল জেলখানা থেকে। ওরা তিনজনেই হাত-ধরাধরি করে আসছে। ভালিয়াকে মাঝখানে ধরে দু’পাশে দু’জন নিয়ে আসছে, কারণ তার নিজে হেঁটে আসার শক্তি নেই। কিন্তু, ‘সুন্দরভাবে মরব আমরা, কমরেড!’ স্তোপানভের সেই কথা মনে রেখে সে প্রাণপণে নিজেকে খাড়া রাখবার চেষ্টা করছে। একটা পশমের কোর্তা তার গায়ে, কিন্তু কোট নেই।

‘ওদের হাত-ধরাধরি করে আসাটা-যে শ্ভারকেভ্‌স্কির পছন্দ হয়নি, সেটা স্পষ্টই বোঝা গেল, কারণ সে ওদের পেছনদিক থেকে ঠেলা দিল। ভালিয়া কী যেন বলে উঠতেই একজন ঘোড়সওয়ার সেপাই তার মুখের উপর প্রচণ্ড জোরে চাবুক কষিয়ে দিল। ভিড়ের মধ্যে থেকে একটি স্ত্রীলোক আতঁচিৎকার করে পাগলের মতো ছটফট করেছে সাক্ষীদের বেড়া ভেঙে বন্দিদের কাছে আসার চেষ্টায়। কিন্তু ওকে ধরে টেনে সরিয়ে দেওয়া হল। সে নিশ্চয়ই ভালিয়ার মা। ওরা ফাঁসিমঞ্চের কাছাকাছি আসতেই ভালিয়া গাইতে শুরু করল। এমন স্বর আর কখনও শুনিনি—মৃত্যুর মুখে যে এগিয়ে

চলেছে কেবল সে-ই ওরকম আবেগ দিয়ে গাইতে পারে। ভালিয়া গাইছিল ‘ভারশাভিয়াঙ্কা’ গানটা, তার সঙ্গে অন্য দু’জনও গলা মেলাল। ঘোড়সওয়ার পাহারাঅলারা মস্ত আক্রোশে চাবুক চালাতে লাগল, কিন্তু ওদের তিনজনের গায়ে লাগছে বলেই মনে হল না। মাটিতে পেড়ে ফেলে ওদের বস্তার মতো টেনে নিয়ে তোলা হল ফাঁসিমঞ্চ। হুকুমনামাটা তাড়াতাড়ি পড়ে যাবার পরেই ওদের গলায় ফাঁস পরিয়ে দেওয়া হল। সেই মুহূর্তে আমরা গাইতে শুরু করলাম :

ওঠো জাগো, ভুঞ্চে-বন্দি...

‘চারদিক থেকে সেপাই-সাজীরা ছুটে এল আমাদের দিকে; শুধু এইটুকু দেখতে পেলাম—মঞ্চের নিচে ঠেকা দেওয়া কাঠের খুঁটিটা রাইফেলের কুঁদোয় ঠেলে সরিয়ে দেওয়া হল আর তিনটে দেহ দড়ির ফাঁসে আটকে গিয়ে কেঁপে উঠল...

‘বাদবাকি আমাদের সবাইকেই দেয়ালে দাঁড় করিয়ে দেওয়া হয়েছে, এমন সময়ে ঘোষণা হল যে আমাদের মধ্যে দশজনের মৃত্যুদণ্ড মকুব করে কুড়ি বছর করে কারাদণ্ডের হুকুম হয়েছে। বাকি ষোলোজনকে গুলি করে মারা হল।’

সামুইল তার জামার কলারটা চেপে টানল—যেন দমবন্ধ হয়ে আসছে তার।

‘তিনদিন ধরে ওদের দেহ ওইখানে দড়ির ফাঁসে ঝুলে রইল। দিন-রাত্রি পাহারা দিত ফাঁসিমঞ্চটাকে। তারপরে আর-একদল নতুন বন্দি জেলখানায় এসে আমাদের বলল, ‘চারদিনের দিন কমরেড তবোল্‌দিনের দেহটা দড়ি ছিঁড়ে পড়ে যায়—তবোল্‌দিন ওদের তিনজনের মধ্যে সবচেয়ে ভারী ছিল। তারপরে ওরা বাকি দু’জনকেও নামিয়ে নিয়ে সবাইকেই সেইখানেই গোর দিয়েছে।’

‘কিন্তু ফাঁসিমঞ্চটাকে নামিয়ে নেওয়া হয়নি। আমাদের যখন এখানে নিয়ে আসা হয়, তখনও সেটা ঝাড়া ছিল। নতুন শিকারের জন্যে সেটা দড়ির ফাঁস ঝুলিয়ে দাঁড়িয়ে রইল।’

চুপ করে সামুইল দৃষ্টিহীন অপলক চোখে তাকিয়ে রইল সামনের দিকে—কিন্তু পাভেলের খেয়াল নেই যে তার বলা শেষ হয়ে গেছে। তিনটি দেহ দড়িতে লটকানো আর মাথাটা ভয়ঙ্করভাবে একপাশে হেলে-যাওয়া অবস্থায় নিঃশব্দে ঝুলতে থাকল তার চোখের সামনে।

বাইরে সমস্ত সৈন্যকে জড়ো হবার আহ্বান জানিয়ে বিউগল বেজে উঠতেই পাভেল চমকে সচেতন হয়ে উঠল। প্রায় শোনা যায় না এমন গলায় সে বলল, ‘চলো সামুইল, যাওয়া যাক।’

সারি দিয়ে ঘোড়সওয়ার দাঁড়ানো রাস্তা দিয়ে হাঁকিয়ে নিয়ে যাওয়া হচ্ছে একসারি পোলিশ-বন্দি। জেলখানার ফটকে দাঁড়িয়ে রেজিমেন্টের কমিশার ফৌজি নোটবইয়ে একটা হুকুম লিখে নিচ্ছে।

একজন খাটো চওড়া-কাঁধ স্কোয়াড্রন কম্যান্ডারকে কাগজের টুকরোটা এগিয়ে দিয়ে সে বলল, ‘কমরেড আন্টিপভ, এটা নিন, আর সমস্ত বন্দিকে নিয়ে যান নভোগ্রাদ ভলিন্‌স্কির দিকে ঘোড়সওয়ার-পাহারায়। আহতদের চিকিৎসার ব্যবস্থা হয়েছে কিনা দেখুন। তারপরে তাদের গাড়িতে তুলে সেই একই দিকে পাঠান। শহর থেকে মাইল

চোন্দ্র দূরে নিয়ে গিয়ে ছেড়ে দিন। ওদের নিয়ে ঝামেলা সওয়ার মতো সময় আমাদের নেই। কিন্তু বন্দিদের ওপর কোনোরকম দুর্ব্যবহার চলবে না কিছুতেই।’

ঘোড়াটায় চেপে বসে পাভেল সামুইলের দিকে ফিরে তাকাল, ‘তুনলে তো? ওরা আমাদের লোকজনকে ফাঁসি দেয়, কিন্তু সেই আমরাই ওদের আবার পাহারাধীনে পৌছে দিই ওদের স্বপক্ষের লোকজনের কাছে, আর তাছাড়া, ভালো ব্যবহারও করি। কোথেকে শক্তি পাই তার জন্যে?’

রেজিমেন্টের কমিশনার ঘুরে দাঁড়িয়ে বক্তার দিকে কঠিন-চোখে তাকাল। পাভেল তুনল, সে যেন নিজেকেই বলছে, ‘নিরস্ত্র কয়েদির উপর নিষ্ঠুর ব্যবহার করার শাস্তি—মৃত্যু। আমরা স্বেতরক্ষী নই!’

ঘোড়া হাঁকিয়ে যেতে-যেতে পাভেলের মনে পড়ল ফৌজের সবাইকে যেটা পড়ে শোনানো হয়েছিল সেই বিপুলী সামরিক পরিষদের নির্দেশনামার শেষ কথাগুলো :

‘শ্রমিক-কৃষকের এই দেশ তার লালফৌজকে ভালোবাসে, তার জন্যে গর্ব বোধ করে। সেই ফৌজের পতাকায় একটাও কালো দাগ লাগতে দেওয়া চলবে না।’

আপন মনেই বলে উঠল পাভেল, ‘একটাও কালো দাগ লাগতে দেওয়া চলবে না।’

\*

\*

\*

চার-নম্বর ঘোড়সওয়ার ডিভিশন যখন জিতোমির দখল করে নিয়েছে, তখন সাত-নম্বর রাইফেল ডিভিশনের কুড়ি-নম্বর ব্রিগেড কমরেড গোলিকভের নেতৃত্বাধীন একটা আক্রমণকারী দলের অংশ হিসেবে ওকুনিনোভো গ্রামের এলাকায় নীপার নদী পার হচ্ছিল।

পঁচিশ-নম্বর রাইফেল ডিভিশন এবং একটা বাশ্কির ঘোড়সওয়ার ব্রিগেড নিয়ে গড়া আর-একটা বাহিনীর উপর নির্দেশ আছে—নীপার পার হয়ে ইব্রশা স্টেশনের কাছে কিয়েভ—কোরোস্তেন রেললাইনটাকে বিচ্ছিন্ন করে ফেলতে হবে। এই কাজটা করতে পারলে কিয়েভ থেকে পোলিশদের পিছু হঠে যাবার একমাত্র পথটা বন্ধ হয়ে যাবে।

এই নদী পার হবার সময়েই শেপেতোভ্কা কমসমোল সংগঠনের সভ্য মিশা লেভচুকভ মারা পড়ল। নড়বড়ে ভাসমান সাঁকোটোর উপর দিয়ে তারা দৌড়ে চলেছে, এমন সময় নদীর ওপারে ঝাড়া পাড়টার কোনো জায়গা থেকে ছোড়া একটা গোলা মাথার উপর দিয়ে বিপ্রীভাবে শিস কেটে নদীতে এসে পড়ল জলটা তোলপাড় করে দিয়ে। ঠিক সেই মুহূর্তে মিশা অদৃশ্য হয়ে গেল সাঁকোর একটা ভেলার নিচে। নদী গ্রাস করে নিল তাকে—ফিরিয়ে দিল না। ইয়াকিমেন্জো নামে একজন ছেঁড়া-টুপি-পরা সোনালি চুলওয়া সৈন্য চোঁচিয়ে উঠল, ‘মিশকা! আরে, ও যে মিশকা! পাখরের মতো ডুবে গেল, বেচারার!’ একমুহূর্ত সে আতঙ্কভরা চোখে কালো জলের দিকে তাকিয়ে রইল, কিন্তু তার পেছনে যারা দৌড়ে আসছে তারা তাকে ধাক্কা দিয়ে ঠেলে দিল সামনে, ‘হাঁ করে ওখানে দেখছ কী, মুখ্য কোথাকার! এগিয়ে চলো!’

কান্নার জন্য অপেক্ষা করবার অবসর নেই—ব্রিগেডটা এমনিতেই পিছিয়ে পড়েছে, আর সবাই ইতিমধ্যেই নদীর ডান পাড়টা দখল করে নিয়েছে।

সেগেই মিশার মৃত্যুর খবরটা জানতে প্যরে চারদিন পরে। ততদিনে ব্রিগেডটা বুচা স্টেশন দখল করে নেবার পর কিয়েভের দিকে মুখ করে ঘুরে দাঁড়িয়ে পোলিশদের প্রচণ্ড আক্রমণ রুখছে। ওরা কোরোস্তেনের ব্যুহ ভেঙে বেরিয়ে যাবার চেষ্টা করছে।

সামনের সারিতে যারা গুলি ছুড়ছে, তাদের মধ্যে সেগেইয়ের পাশে মাটির উপরে উপুড় হয়ে শুয়ে পড়ে আছে ইয়াকিমেকো। বেশ কিছুক্ষণ ধরে সে অবিরাম গুলি ছুড়ছে। ফলে, তার রাইফেলটা এখন বড়বেশি গরম হয়ে গেছে—বল্টুটাকে ঠেলে পেছনদিকে সরাতে গিয়ে মুশকিল হচ্ছে। মাথাটা সাবধানে নিচু করে রেখে সেগেইয়ের দিকে ফিরে সে বলল, ‘কিছুক্ষণ বিশ্রাম দিতে হবে রাইফেলটাকে। তেতে লাল হয়ে গেছে একেবারে!’

গুলির আওয়াজের মধ্যে সেগেই কোনোমতে শুনতে পেল তার কথাটা। আওয়াজ একটু কমে এলে ইয়াকিমেকো যেন নেহাত প্রসঙ্গক্রমেই কথাটা বলল, ‘তোমার কমরেড নীপারে ডুবে মারা গেছে। আমি কিছু করতে পারার আগেই সে তলিয়ে যায়।’ এইটুকুই শুধু সে বলল। রাইফেলের বল্টুটা পরখ করে নিয়ে আরেকটা ক্লিপ বের করে নিয়ে সে বন্দুকটায় আর-এক দফা গুলি ভরতে লাগল।

\*

\*

\*

বের্দিচেভ দখল করার জন্য যাদের পাঠানো হয়েছিল, সেই এগারো-নম্বর ডিভিশনটা পোলিশদের প্রচণ্ড প্রতিরোধের মুখে পড়ল। রক্তাক্ত লড়াই চলল শহরের রাস্তায় রাস্তায়। মেশিনগান থেকে ঝাঁকে ঝাঁকে গুলিবর্ষণের মধ্যে লালফৌজের ঘোড়সওয়াররা এগুতে থাকল। তবুও শহর দখল হয়ে গেল, বিপর্যস্ত পোলিশ ফৌজের অবশেষটা পালিয়ে গেল। ট্রেনগুলো রেলস্টেশনে অক্ষত অবস্থাতেই পাওয়া গেল। কিন্তু পোলিশদের সবচেয়ে সাংঘাতিক ক্ষতি হল গুলিগোলা মজুদ-করা একটা গুদাম উড়ে যাবার ফলে—তাদের গোটা ফ্রন্টে গুলিগোলা সরবরাহ করা হচ্ছিল এখন থেকে। লক্ষ লক্ষ গোলা শূন্য ছিটকে উঠল। বিস্ফোরণের ফলে জানলার শার্সিগুলো টুকরো টুকরো হয়ে ভেঙে পড়ল, বাড়িগুলো তাদের ঘরের মতো কেঁপে-কেঁপে উঠল।

জিতোমির আর বের্দিচেভ দখল হয়ে যাবার ফলে পোলিশরা তাদের পশ্চাদ্ভাগে একটা বড়রকম ঘা খেল। দু’দিক দিয়ে দুটো স্রোতের মতো তারা কিয়েভ থেকে বেরিয়ে আসছে—চারপাশের ইস্পাতের বেটিনীর ভেতর থেকে পথ কেটে বেরুবার জন্য তারা বেপরোয়া হয়ে লড়ছে।

যুদ্ধের এই ঝড়ঝাপটায় আচ্ছন্ন হয়ে গিয়ে পাভেলের কাছে ইদানীং তার নিজের চিন্তাটা একেবারেই তুচ্ছ হয়ে গেছে। তার ব্যক্তিসত্তা মিশে গেছে সমষ্টির মধ্যে। প্রত্যেকটি সংগ্রামী সৈনিকের মতোই পাভেলও ‘আমি’ কথাটি ভুলে গেছে; বাকি থাকল শুধু ‘আমরা’—আমাদের রেজিমেন্ট, আমাদের স্কোয়াড্রন, আমাদের ব্রিগেড।

ঘূর্ণিবাত্যার মতো প্রচণ্ড বেগে চলেছে ঘটনাপ্রবাহ। প্রত্যেকটা দিন বয়ে আনে নতুন কিছু।

আঘাতের পর আঘাত হেনে পোলিশদের গোটা পশ্চাদ্ভাগ একেবারে গুঁড়িয়ে দিয়ে দুর্বার গতিতে এগিয়ে চলেছে বুদ্ধিগনির ঘোড়সওয়ার-বাহিনী—পাহাড় ভেঙে নেমে আসে তুষারস্তুপের মতো। জয়ের পর জয়ের উত্তেজনায় মাতাল ঘোড়সওয়ারের ডিভিশনগুলো নিদারুণ একটা প্রচণ্ডতা নিয়ে পোলিশদের পশ্চাদ্ভাগের একেবারে কেন্দ্রে নভোম্বাদ-ভলিন্‌স্কির ওপরে নেমে এসেছে।

সমুদ্রের ঢেউ যেমন খাড়া পাহাড়ের পাথুরে তীরের বুকে আছড়ে পড়ে, পিছিয়ে যায়, ঠিক সেইরকম তারা মাঝে মাঝে পিছিয়ে আসছে, তারপর আক্রমণ করবারই জন্য এগিয়ে গিয়ে নিদারুণ চিংকারে বলে উঠছে : 'এগিয়ে চলো! আরও এগিয়ে!'

কিছুতেই রক্ষা পেল না পোলিশরা—কাঁটাতারের বেড়া জালেও না, শহরে ঘাঁটি গেড়ে মোতায়ন বাহিনীর বেপরোয়া প্রতিরোধেও না। সাতাশে জুন সকালে বুদিওনির ঘোড়সওয়ার-বাহিনী ঘোড়া থেকে না-নেমেই হুচ নদী পার হয়ে এসে নভোগ্রাদভলিন্‌স্কির মধ্যে ঢুকে পড়ল। পোলিশদের তারা শহর থেকে বের করে দিয়ে কোরেৎসের দিকে হাঁকিয়ে দিল। সেই একই সময়ে ইয়াকিরের পর্য্যতাশ্লিশ-নম্বর ডিভিশন নোভিমিরোপোলের কাছে হুচ নদী পার হয়ে এল এবং কতোভ্‌স্কির ঘোড়সওয়ার ব্রিগেড ছোট শহর লিউবারের উপর ঝাঁপিয়ে পড়ল।

এক-নম্বর ঘোড়সওয়ার আর্মির বেতারকেন্দ্র ফ্রন্টের সর্বাধিনায়কের কাছ থেকে একটা নির্দেশ পেল—রোভনো দখল করবার জন্য তাদের পুরো ঘোড়সওয়ার ফৌজকে লাগাতে বলা হচ্ছে। লালফৌজের ডিভিশনগুলির দুর্নিবার আক্রমণে পোলিশরা ভগ্নোদ্যম আর আতঙ্কগ্রস্ত হয়ে অনেকগুলো ছোট ছোট দলে ছড়িয়ে-ছিটিয়ে পড়ল।

এই উদ্দাম দিনগুলোর মধ্যে একদিন একজনের সঙ্গে অত্যন্ত অপ্রত্যাশিতভাবে পাভেল করচাগিনের দেখা হয়ে গেল। তাদের ব্রিগেডের অধিনায়ক তাকে স্টেশনে পাঠিয়েছিল, সেখানে একটা সাঁজোয়া রেলগাড়ি দাঁড়িয়ে আছে। ঘোড়া হাঁকিয়ে খাড়া রেল-বাঁধের উপর উঠে সে ইম্পাত-ধূসর রেল-কামরাটার সামনে লাগাম টানল। কামানের কালো নলগুলো গাড়িটার কামান-বুজের মধ্যে লুকিয়ে আছে, সাঁজোয়া ট্রেনটাকে ভয়ঙ্কর আর দুর্ভেদ্য বলে মনে হচ্ছে। গাড়িটার চাকা ঢেকে-রাখা ভারী ইম্পাতের সাঁজোয়া-পাতটা তুলে ধরে জনকতক লোক তেল-লাগা পোশাকে কাজ করছিল।

চামড়ার কোর্তা-পরা লালফৌজের একজন এক-বালতি জল বয়ে আনছিল, তার কাছে গিয়ে পাভেল জিজ্ঞেস করল, 'এই ট্রেনের কম্যান্ডার কোথায়?'

ইঞ্জিনটার দিকে দেখিয়ে লোকটা বলল, 'ওইখানে।'

ইঞ্জিনের কাছে ঘোড়া থামিয়ে পাভেল বলল, 'আমি কম্যান্ডারের সঙ্গে একবার দেখা করতে চাই।'

বসন্তের দাগঅলা-মুখ আপাদমস্তক চামড়ায় ঢাকা একজন লোক ঘুরে দাঁড়িয়ে বলল, 'আমিই কম্যান্ডার।'

পাভেল পকেট থেকে একটা খাম বের করল, 'আমাদের ব্রিগেডের অধিনায়ক এই নির্দেশনামাটা দিয়েছেন। খামটা সই করে দিন।'

কম্যান্ডার খামটা হাঁটুর উপরে রেখে নাম সই করে দিল। একজন লোক একটা তেলের টিন নিয়ে ইঞ্জিনের মাঝখানের চাকাটায় কাজ করছিল। পাভেল শুধু তার চওড়া পিঠের দিকটা আর তার চামড়ার পাতলুনের পকেট থেকে বেরিয়ে-পড়া পিস্তলের বাঁটটা দেখতে পাচ্ছিল।

ট্রেন-কম্যান্ডার খামটা পাভেলের হাতে ফিরিয়ে দেবার পর সে লাগাম টেনে রওনা হতে যাবে, এমন সময় তেলের টিন হাতে লোকটা খাড়া হয়ে ঘুরে দাঁড়াল।



পরমুহূর্তেই যেন একটা ভীষণ দমকা হাওয়ার ঝাপটায় পাভেল নেমে পড়ল তার ঘোড়ার উপর থেকে।

‘দাদা, তুমি!’

লোকটা চটপট মাটিতে রাখল তেলের টিনটা। ভালুকের মতো সর্বাত্ম দিয়ে সে তরুণ লালফৌজের সৈনিকটিকে জড়িয়ে ধরল।

‘পাভকা! আরে হতভাগা! তুই!’ নিজের চোখকে বিশ্বাস করতে না-পেরে সে চিৎকার করে উঠল।

সাঁজোয়া ট্রেনের কম্যান্ডার অবাক হয়ে তাকিয়ে রইল, আর জনকতক গোলন্দাজ পাশে দাঁড়িয়ে হাসিমুখে দেখছিল দুই ভাইয়ে হঠাৎ দেখা হবার আনন্দের দৃশ্যটা।

\*

\*

\*

উনিশে অগস্ট লডোভ অঞ্চলে একটা যুদ্ধ চলার সময়ে ব্যাপারটা ঘটল। লড়াইয়ের সময়ে টুপিটা হারিয়ে ফেলে পাভেল তার ঘোড়াটার রাশ টেনে ধরেছে। সামনের স্কোয়াড্রনগুলো ইতিমধ্যেই পোলিশবাহিনীর মধ্যে ঢুকে গেছে। এমন সময়ে ঝোপঝাড়গুলোর মধ্যে দিয়ে নদীর দিকে দ্রুত ঘোড়া হাঁকিয়ে দেমিদোভ এসে পাভেলের পাশ কাটিয়ে যাবার সময়ে চিৎকার করে উঠল, ‘আমাদের ডিভিশনের কম্যান্ডার মারা পড়েছেন!’

চমকে উঠল পাভেল। তার আদর্শ বীর কম্যান্ডার লেতুনভ অসীম বীরত্বে-ভরা মানুষটি মারা পড়েছেন! একটা উন্মত্ত ক্রোধে আচ্ছন্ন হয়ে গেল পাভেল।

তলোয়ারটার উল্টো পিঠ দিয়ে সে তার ঘোড়া গ্নেদকোকে তাড়া দিল—ঘোড়াটা ক্লান্ত হয়ে পড়েছে, তার মুখের দুইপাশে লাগামে রক্তমাখা ফেনা জমে উঠেছে। তবু পাভেল তার পিঠে চেপে লড়াইয়ের একেবারে মাঝখানে ঝাঁপিয়ে পড়ল।

‘মেরে ফ্যালো, খতম করে ফ্যালো নরকের কীটগুলোকে! এইসব পোলিশ শ্লিয়াখতাকে\* দাও শেষ করে! ওরা লেতুনভকে মেরে ফেলেছে!’ অন্ধের মতো সে তলোয়ারের চোট বসিয়ে দিল সবুজ উর্দিপরা একটা লোকের ওপর। ডিভিশনের কম্যান্ডারের মৃত্যুতে উন্মাদ ক্রোধে আচ্ছন্ন হয়ে লালফৌজের ঘোড়সওয়াররা একটা গোটা পোলিশ পল্টনকে একেবারে নিশ্চিহ্ন করে দিল।

লড়াইয়ের মাঠের উপর দিয়ে শত্রুসৈন্যের পেছন পেছন ওরা তাড়া করে ঘোড়া হাঁকাল—কিন্তু এতক্ষণে একটা পোলিশ-গোলন্দাজদল গোলা ছুড়তে শুরু করে দিয়েছে। চারিদিকে মৃত্যু হেনে গোলার টুকরোগুলো বাতাস কেটে বেরিয়ে যাচ্ছে।

হঠাৎ একঝলক তীব্র সবুজ আলোর বিদ্যুৎ খেলে গেল পাভেলের চোখের সামনে। বাজের শব্দে কানে তালা ধরে গেল তার। মাথার খুলির মধ্যে ফুঁড়ে ঢুকে গেল আগুনে লাল করে তাতানো লোহার শিক। অদ্ভুতভাবে ভয়ানক রকম টলছে মাটিটা, যেন উল্টে যাচ্ছে পৃথিবীটা।

\* শ্লিয়াখতা (পলীয় ভাষায় Szlachta)—মধ্য ইউরোপের অনেকগুলি দেশে (পোল্যান্ড, লিথুয়ানিয়া ইত্যাদি) অভিজাত সম্প্রদায়ের সমর্থনীয়ত্বক সামন্তরা এই আখ্যায় অভিহিত হত।

একটা কুটোর মতো পড়ে গেল পাভেল তার জ্বিনের উপর থেকে। সোজা গ্লেন্ডকোর মাথার উপর দিয়ে ধুপ্ করে সে মাটির উপর দিয়ে গিয়ে পড়ল।  
কালো রাত্রি ঘনিয়ে এল সঙ্গে সঙ্গে ...

## নবম অধ্যায়

অষ্টোপাসের ঠেলে-বেরোনো চোখটা বেড়ালের মাথার মতো বড়, জ্বলজ্বলে লাল একটা চোখ, মণিটা সবুজ, সজীব দ্যুতিতে দপদপ করছে। অষ্টোপাসের কুৎসিত আর ভয়ঙ্কর গুঁড়গুলো—জট-পাকানো কতকগুলো সাপের মতো কুণ্ডলী বেঁধে পাক খেয়ে এপাশ-ওপাশ করছে, কর্কশ আঁশে ঢাকা চামড়া আতঙ্ক জাগিয়ে খসখস শব্দে নড়াচড়া করছে। নড়ে উঠল অষ্টোপাসটা। একেবারে চোখের উপরই ও যেন অষ্টোপাসটাকে দেখতে পাচ্ছে। অষ্টোপাসের গুঁড়গুলো এবার ওর শরীরের উপর দিয়ে সুড়সুড় করে এগিয়ে এল। ঠাণ্ডা গুঁড়গুলোর স্পর্শে বোলতার কামড়ের যন্ত্রণা। হুল বের করে অষ্টোপাসটা তার মাথার মধ্যে কামড় বসাচ্ছে জোঁকের মতো। পাকে পাকে জড়িয়ে ধরে অষ্টোপাসটা ওর রক্ত শুষে নিচ্ছে। ও স্পষ্ট অনুভব করছে—ওর দেহের রক্ত বেরিয়ে গিয়ে ঢুকছে অষ্টোপাসটার ফুলে-ওঠা দেহের মধ্যে। হুলের মধ্যে দিয়ে রক্ত শুষেই চলেছে অষ্টোপাসটা—কী অসহ্য রক্ত-শোষণের সেই যন্ত্রণা!

কোথায় যেন অনেক অনেক দূরে ও মানুষের গলার স্বর শুনতে পাচ্ছে :

‘ওর নাড়িটা এখন কেমন?’

আরেকটা নারীকণ্ঠ নরম স্বরে জবাব দিচ্ছে, ‘নাড়ির গতি এক-শো-আটত্রিশ। জ্বরের তাপমাত্রা ১০৩.১। সমস্তক্ষণ ভুল বকছে।’

অষ্টোপাসটা মিলিয়ে গেল, কিন্তু যন্ত্রণাটা থেকে গেল। পাভেল অনুভব করল কে যেন তার কজিটা ধরেছে। চোখদুটো খুলতে চেষ্টা করল সে, কিন্তু পাতাদুটো এত ভারী যে মেলে ধরবার শক্তি নেই তার। গরম লাগছে কেন? মা নিশ্চয় উনুনটায় আগুন দিয়েছে। আবার সে শুনতে পাচ্ছে সেই গলার স্বর :

‘নাড়ির গতি এখন এক-শো-বাইশ।’

চোখের পাতাটা খুলবার চেষ্টা করল পাভেল—কিন্তু শরীরের ভেতরে যেন আগুন জ্বলছে, দম বন্ধ হয়ে আসছে তার।

নিদারুণ তেষ্টা পেয়েছে—এক্ষুনি তাকে উঠেপড়ে খানিকটা জল খেতেই হবে। কিন্তু উঠছে না কেন সে? নড়তে চেষ্টা করছে—কিন্তু হাত-পাগুলো তাকে মানছে না কিছুতেই, দেহটা যেন নিজের নয়। মা তাকে এক্ষুনি খানিকটা জল এনে দেবে। মাকে বলবে পাভেল, ‘জল খাব আমি।’ কী যেন নড়ে উঠছে তার পাশে—অষ্টোপাসটা আবার তার ওপরে গুঁড়ি মেরে এগিয়ে আসছে নাকি? ওই-যে আসছে, লাল চোখটা তার দেখতে পাচ্ছে ও...

বহু দূর থেকে সেই কোমল গলার স্বরটা আসছে :

‘ফ্রিসিয়া, একটু জল আনুন!’

‘কার নাম ওটা?’ কিন্তু মনে করার চেষ্টা করতে গিয়ে মানসিক অবসাদে আর-একবার অন্ধকার এসে আচ্ছন্ন করল তাকে। আচ্ছন্ন ভাবটা কেটে যেতেই তার মনে পড়ল, ‘আমার তেষ্ঠা পেয়েছে।’

আবার গলার স্বর শুনতে পেল :

‘জ্ঞান ফিরে আসছে বলে মনে হচ্ছে।’

আরও কাছে, আরও স্পষ্ট সেই মিষ্টি গলার স্বর :

‘জল খাবে, কমরেড?’

‘আমাকে জিজ্ঞেস করছে নাকি? আমি কি অসুস্থ? ও হ্যাঁ, আমাকে ওই টাইফাসের অসুখে পেড়েছে।’ তৃতীয়বারের মতো সে তার চোখের পাতা খুলবার চেষ্টা করল। এবং শেষপর্যন্ত পারল। চেতনা ফিরে আসতেই, তার অল্প-খোলা চোখের সংকীর্ণ দৃষ্টিপথে প্রথমেই নজরে পড়ল—তার মাথার উপরে ঝুলছে একটা লাল গোল জিনিশ। কিন্তু কী একটা কালো জিনিশ তার দিকে ঝুঁকে এগিয়ে আসতেই তার পেছনে আড়াল হয়ে গেল ওই লাল গোল জিনিশটা। তারপর তার ঠোঁটের উপর গেলাশের শক্ত কাচের স্পর্শ, জলের স্পর্শ—প্রাণদায়িনী জল। শরীরের ভেতরের আগুনটা তার নিভে গেল।

ভ্রম্মা মিটেতে শান্তস্বরে ফিসফিসিয়ে পাভেল বলল, ‘এবার একটু ভালো লাগছে।’

‘দেখতে পাচ্ছেন আমায়, কমরেড?’

তার ওপরে ঝুঁকে-পড়া সেই কালোমূর্তিটা জিজ্ঞেস করল—তারপর ঘুমে আচ্ছন্ন হয়ে পড়ার ঠিক আগের মুহূর্তে সে কোনোরকমে বলল, ‘দেখতে পাচ্ছি না, তবে শুনতে পাচ্ছি...’

‘কেই বা বিশ্বাস করতে পেরেছিল যে ও সামলে উঠবে? তবু ও আবার টেনে-হিচড়ে বেঁচে উঠেছে! অত্যন্ত মজবুত ওর শরীর। নিনা ভ্রাদিমিরভনা, আপনি গর্ব করতে পারেন। আপনি সত্যিই ওর প্রাণ বাঁচিয়েছেন।’

মেয়েটি অল্প একটু কেঁপে-ওঠা গলায় জবাব দিল, ‘ভারি আনন্দ হচ্ছে আমার!’

তেরো দিন ধরে অচৈতন্য হয়ে থাকার পর পাভেল করচাগিনের জ্ঞান ফিরে এল।

তরুণ দেহখানা তার মৃত্যুকে মেনে নিতে চায়নি, ধীরে ধীরে সে শক্তি ফিরে পেয়েছে। যেন নতুন করে জন্ম নেবার মতো সবকিছু নতুন আর আশ্চর্য ঠেকেছে। শুধু মাথাটা তার অনড় হয়ে পড়ে আছে—প্র্যাক্টারের হাঁচে আটকানো দুর্বিসহ রকমের ভারী—মাথাটাকে নড়াবার শক্তি ওর নেই। কিন্তু অন্যান্য প্রত্যঙ্গের অনুভূতি শিগগিরই ফিরে এল, অল্প কয়েকদিনেই ও নিজের আঙুলগুলো বাঁকাতে পারল।

\*

\*

\*

সামরিক ক্লিনিক্যাল হাসপাতালের সহকারী ডাক্তার নিনা ভ্রাদিমিরভনা তার ঘরে একটা ছোট টেবিলের সামনে বসে লাইলাক্-ফুলের মতো রঙের মলাট-দেওয়া একটা মোটা নোটবইয়ের পাতা ওলটাইল। নোটবইটার পাতায় পাতায় পরিষ্কার হাতের বাঁকা-বাঁকা অক্ষরে সর্গক্ষিপ্ত নোট লেখা আছে :

অ্যাথল্যাগ ট্রেনে আজ কয়েকজন গুরুতর রকম আহত লোককে আনা হয়েছে। একজন আহতের মাথায় সাংঘাতিক চোট লেগেছে। কোণের দিকে জানলাটার পাশে ওকে আমরা রেখেছি। মোটে সতেরো বছর বয়েস। ওর পকেটে পাওয়া কাগজপত্র আর ও কীভাবে আহত হল তার পূর্ণ বিবরণ-সমেত আমাকে ওরা একটা খাম দিয়েছে। ওর নাম করচাগিন, পান্ডেল আন্দ্রেয়েভিচ। ওর কাগজপত্রের মধ্যে পাওয়া গেছে—ইউক্রেনের কমসমোলের বেশ জীর্ণ সভ্য-কার্ড (নং ৯৬৭), ছেঁড়া একটা লালফৌজের পরিচয়পত্র আর ফৌজি নির্দেশের একটা কপি, যাতে বলা হয়েছে যে লালফৌজের সৈন্য পান্ডেল করচাগিন একটা স্ট্রাউটিঙের কাজ অত্যন্ত কৃতিত্বের সঙ্গে করেছে বলে তাকে সাধুবাদ দেওয়া হচ্ছে। সেইসঙ্গে তার নিজেরই লেখা একটা নোটও আছে : 'যদি আমি মারা যাই, তাহলে দয়া করে এই ঠিকানায় আমার আত্মীয়দের চিঠি দেবেন : শেপেতোভ্কা শহর, ডিপো, কারিগর আরতিওম করচাগিন।'

১৯ অগস্ট একটা গোলার টুকরোর আঘাত পাবার পর থেকেই ও অজ্ঞান হয়ে আছে। কাল আনাতোলি শ্বেপানভিচ ওকে পরীক্ষা করবেন।

২৭ অগস্ট

আজ করচাগিনের ক্ষতটা পরীক্ষা করে দেখা হয়েছে। ক্ষতটা খুব গভীর, খুলি ফেটে গেছে এবং মাথার ডানদিকের গোটাটাই অসাড় হয়ে গেছে। ডান চোখের একটা রক্তবহ ফেটে গিয়ে চোখটা ভয়ানক রকম ফুটে উঠেছে।

প্রদাহ এড়াবার জন্য আনাতোলি শ্বেপানভিচ চোখটা ভুলে ফেলতে চেয়েছিলেন, কিন্তু কোলাটা কমে যাবার সম্ভাবনা আছে বলে মনে হওয়ায় আমি তাঁকে সেটা না-করতে মিনতি করেছি। উনি সন্মত হয়েছেন।

ছেলেটির মুখের সৌন্দর্য নষ্ট হয়ে যাবে—একমাত্র এই কারণেই আমি তাঁকে সেটা করতে দিইনি। ছেলেটি সেরে উঠতে পারে; সেক্ষেত্রে তার অঙ্গহানি হলে ভারি দুঃখের কারণ হবে। ছেলেটি সমস্তক্ষণ ভুল বকছে আর ভয়ানক ছটফট করছে। আমাদের মধ্যে একজন করে সবসময় ওর বিছানার পাশে ডিউটিতে রয়েছে। আমি ওর পেছনে অনেক সময় দিই। মারা যাবার পক্ষে ওর বয়স নিতান্তই অল্প। আমি দৃঢ় সংকল্প করেছি মৃত্যুর মুঠো থেকে এই তরুণ প্রাণটিকে আমি ছিনিয়ে আনবই। হয়তো সফল হবে।

কাল আমার কাজের সময় শেষ হয়ে যাবার পর ওর ওয়ার্ডে আমি কয়েক ঘণ্টা ছিলাম, সেখানে ওর অবস্থাটা সবচেয়ে গুরুতর। বসে বসে আমি ওর ভুল বকা শুন্লাম। মাঝে মাঝে সেগুলো একটা গল্পের মতো শোনায়—ওর জীবনের অনেক কিছু জানতে পারলাম। কিন্তু মাঝে মাঝে আবার ছেলেটি অতি বিশ্রীকম গালাগাল দিতে থাকে। ওর ভাষাটা জঘন্য। ওর মুখে এরকম গালাগালি শুনে কী জানি কেন আমার বড় ক্ষোভ হচ্ছে। ও বাঁচবে বলে আনাতোলি শ্বেপানভিচ মনে করেন না। বুড়োমানুষটি অভিযোগের সঙ্গে সঙ্কোচে বিভ্রিবিড় করে বললেন, 'এইসব প্রায় বাচ্চাদের কেন ফৌজে আনে তা বুঝি নে। ভারি বিশ্রী ব্যাপার!'

৩০ অগস্ট

করচাগিন এখনও অজ্ঞান হয়ে আছে। যেসব ক্লীদেবর সঙ্কে কোনো আশা নেই, তাদের যে-ওয়ার্ডে পাঠানো হয়, তাকেও সেখানে পাঠানো হয়েছে। নার্স ব্রিসিয়া প্রায় সদাসর্বদাই তার পাশে আছে। দেখা গেল, সে ছেলেটিকে চেনে। একসময়ে ওরা একসঙ্গে কাজ করেছে। কী অসীম যতন করেছে সে ছেলেটিকে! এখন আমিও বুঝছি তার কোনো আশাই নেই।

রাত ১১টা। আজ আমার বড় চমৎকার দিন। আমার রুগী করচাগিন জ্ঞান ফিরে পেয়েছে। সংকট কেটে গেছে। গত দু'দিন আমি বাড়ি ফিরিনি, হাসপাতালেই সমস্তক্ষণ কাটিয়েছি।

আরও একটি জীবন রক্ষা পেল—এতে আমার যে কী আনন্দ হচ্ছে, তা বলে বোঝাতে পারব না। আমাদের ওয়ার্ডে একটা মৃত্যুর সংখ্যা কমল। আমার এই দারুণ ষাটুনির কাজে একজন রুগীর সেরে ওঠাটাই সবচেয়ে ভালো ব্যাপার। ওরা শিশুর মতো স্নেহাসক্ত হয়ে পড়ে আমার প্রতি।

ওদের বন্ধুত্ব সরল আর আন্তরিক এবং ওদের বিদায় নেবার সময়ে আমিও প্রায়ই কঁদে ফেলি। এটা-যে একটু হাস্যকর তা জানি। কিন্তু তবু কিছুতেই সামলাতে পারি না।

১০ সেপ্টেম্বর

করচাগিন আজ তার বাড়িতে প্রথম চিঠি পাঠাল—ও যা যা বলে গেল, সেইমতো আমিই চিঠিখানা লিখে দিলাম। ও জানাচ্ছে—আঘাতটাও ওর এমন কিছু গুরুতর নয়, শিগগিরই সেরে উঠে ও একবার বাড়ি যাবে। দারুণ রক্তক্ষয় হয়েছে ওর, মড়ার মতো ফ্যাকাসে হয়ে গেছে। এখনও ও খুব দুর্বল।

১৪ সেপ্টেম্বর

করচাগিন আজ প্রথম হাসল। ওর হাসিটা বড় সুন্দর। সাধারণত ওর বয়সের তুলনায় ও খুবই গম্ভীর। খুব আশ্চর্য দ্রুত সেরে উঠছে ও। করচাগিন আর ফ্রিসিয়ার মধ্যে গম্ভীর বন্ধুত্ব। প্রায়ই ফ্রিসিয়াকে ওর বিছানার পাশে দেখি। সে নিশ্চয়ই ওকে আমার কথা বলেছে—আমার গুণকীর্তন করেছে বলে বোঝা যাচ্ছে—ইদানীং করচাগিন আমাকে দেখলেই একটা ক্ষীণ হাসি হেসে অভ্যর্থনা জানায়। গতকাল সে জিজ্ঞেস করেছিল, 'আপনার হাতে ওই কালো কালো দাগ কিসের, ডাক্তার?'

আমি ওকে বলিনি যে ওই দাগগুলো ওরই আঙুলের চিহ্ন—জ্বরের ঘোরে ভুল বকার সময়ে সে সজোরে আঙুল দিয়ে আমার বাহু চেপে ধরেছিল।

১৭ সেপ্টেম্বর

করচাগিনের কপালের ক্ষতটা চমৎকার সেরে উঠছে। ক্ষতটা ধুয়ে বেঁধে দেবার সময়ে যে আশ্চর্য সহিষ্ণুতার সঙ্গে এই ছেলটি যত্না সহ্য করে, তা দেখে আমরা ডাক্তাররা বিম্বিত হয়েছি।

সাধারণত এরকম ক্ষেত্রে রুগীরা দারুণ চোঁচায় আর বেশিরভাগ ক্ষেত্রেই এদের নিয়ে মহা-অসুবিধেয় পড়তে হয়। কিন্তু এই রুগীটি শান্তভাবে শুয়ে থাকে। খোলা ক্ষতটা যখন আয়োডিন দিয়ে ধুয়ে দেওয়া হয় তখন সে শক্ত হয়ে নিজেকে টান টান করে রাখে তারের মতো। মাঝে মাঝে অজ্ঞানও হয়ে যায়—কিন্তু একবারও আমরা ওর মুখ থেকে যন্ত্রণার আওয়াজ বেরুতে শুনিনি।

এখন সবাই বুঝতে পারি, করচাগিন যখন কাতরায় তখন সে অজ্ঞান। কী জানি, কোথা থেকে ছেলটি এই প্রচণ্ড সহ্যশক্তি পেল।

২১ সেপ্টেম্বর

আজ আমরা প্রথম করচাগিনকে ঠেলা-চেয়ারে করে বড় বারান্দাটার এনে বসাই। বাগানটা দেখে কী উজ্জ্বল হয়ে উঠল ওর মুখ, কীরকম লোভীর মতো ও মুক্ত বাতাস টেনে নিল।

নিশ্বাসের সঙ্গে! ওর মাথাটা ব্যাভেজ্ঞে ঢাকা, মাত্র একটা চোখ খোলা। সেই প্রাণোচ্ছল চোখটা পৃথিবীর দিকে চেয়ে রয়েছে—পৃথিবীর সঙ্গে যেন এই প্রথম তার দৃষ্টি-বিনিময়।

২৬ সেপ্টেম্বর

আজ দুটি তরুণী হাসপাতালে এসেছিল করচাগিনের সঙ্গে দেখা করার জন্য। ওদের সঙ্গে কথা বলার জন্য বাইরের লোকদের বসার নিচের ঘরটায় আমি নেমে গেলাম। মেয়েদুটির মধ্যে একজন ভারি সুন্দরী। ওরা নিজেদের নাম বলল, তোনিয়া তুমানভা আর ভাতিয়ানা বুরানোভ্‌স্কায়া। তোনিয়ার কথা আমি শুনেছি—জুরের ঘোরে প্রলাপ বকার সময়ে করচাগিন নামটা বলত। তার সঙ্গে দেখা করার অনুমতি আমি দিলাম ওদের।

৮ অক্টোবর

করচাগিন এখন প্রথমবার নিজে নিজেই বাগানে হেঁটে বেড়িয়েছে। ঘন ঘন আমাকে জিজ্ঞেস করছে—হাসপাতাল থেকে ছাড়া পাবে কবে। আমি বলেছি—শিগগিরই। রুগীদের সঙ্গে দেখা করার প্রত্যেকটি নির্দিষ্ট দিনে মেয়েদুটি ওকে দেখতে আসে। কেন-যে করচাগিন কাতরায়নি তা এখন জানতে পেরেছি। আমি জিজ্ঞেস করতে ও বলল, ‘দি গ্যাড্‌ফ্রাই’ বইটা পড়ে দেখুন, তাহলেই বুঝতে পারবেন।’

১৪ অক্টোবর

করচাগিন ছাড়া পেয়ে গেছে। গভীর আবেগের সঙ্গে সে আমার কাছে বিদায় নিল। চোখের উপর থেকে ব্যাভেজ্ঞটা তার খুল দেওয়া হয়েছে, এখন শুধু তার মাথাটা বাঁধা। ডান-চোখটা অন্ধ হয়ে গেছে, কিন্তু দেখতে বেশ স্বাভাবিকই আছে। এই চমৎকার তরুণ কমরেডটির সঙ্গে ছাড়াছাড়ি হবার সময়ে গভীর বেদনা জন্মে উঠল মনে।

কিন্তু এই তো রীতি : সেরে উঠলেই ওরা আমাদের ছেড়ে চলে যায়, হয়তো আর দেখা হবে না কখনও।

বিদায় নেবার সময় করচাগিন বলল, ‘আহা, বাঁ-চোখটা গেল না কেন? এখন আমি গুলি ছুড়ব কী করে?’

ও এখনও ফ্রন্টের কথা ভাবছে।

\*

\*

\*

হাসপাতাল থেকে ছাড়া পাবার পর পাভেল কিছুদিন বুরানোভ্‌স্কির বাড়িতে রইল—তোনিয়া এখানেই আছে।

পাভেল তোনিয়াকে অবিলম্বে কমসমোলের কাজকর্মের মধ্যে টেনে নেবার চেষ্টা করল। শহরের কমসমোলের একটা সভায় উপস্থিত থাকার জন্য তোনিয়াকে আমন্ত্রণ জানিয়ে সে এ-ব্যাপারে সূত্রপাত করল। তোনিয়া যেতে রাজি, কিন্তু সভায় যাবার জন্য পোশাক বদলে সে যখন তার ঘর থেকে বেরিয়ে এল তখন তাকে দেখে পাভেল দারুণ বিরক্তির সঙ্গে নিজের চোঁট কামড়ে ধরল। খুব কেতাদুরস্ত পোশাক পরে নিজেকে রীতিমতো চটকদার করে তুলেছে সে—পাভেল বুঝতে পারল যে এটা তার মহলে একেবারেই বেখাপ্পা হয়ে পড়বে।

তাদের মধ্যে প্রথম ঝগড়ার কারণ ঘটল এই নিয়ে। কেন ওরকম পোশাক পরতে গেল—পাভেল এই প্রশ্ন তোলাতে তোনিয়া অসন্তুষ্ট হল।

‘কেন-যে আমাকে আর-সবার মতোই দেখতে হতে হবে, তা তো বুঝে উঠতে পারছি না। আমার পোশাকে যদি তোমার না-পোষায়, তাহলে আমি নাহয় বাড়িতেই থাকি।’

ক্লাবঘরে আর-সবার বিবর্ণ কোর্তা আর অতি-সাধারণ ব্লাউজের মধ্যে তোনিয়ার সুন্দর পোশাকটা এত চোখে ঠেকল যে পাভেল দারুণ অস্বস্তিবোধ করতে লাগল। তরুণ-তরুণীরা সবাই তাকে বাইরের লোক হিশেবে ধরে নিল, সে-সম্বন্ধে সচেতন হয়ে উঠে তোনিয়াও সবাইকে অগ্রাহ্য করার একটা উন্মাসিক মনোভাব দেখাল।

মোটা সুতি জামা-পরা চওড়া-কাঁধ ডক-খালসি জাহাজ-ঘাটার কমসমোল সংগঠনের সম্পাদক পানক্রাতভ পাভেলকে একপাশে ডেকে চোখের ইশারায় তোনিয়াকে দেখিয়ে জুড়ুটি করে বলল, ‘এই পুতুলটিকে তুমিই এখানে নিয়ে এসেছ নাকি?’

‘হ্যাঁ’, কাটা জবাব দিল পাভেল।

‘হুম’, পানক্রাতভ মস্তব্য করল, ‘চেহারা দেখে মনে হচ্ছে, এখানকার সঙ্গে ও ঠিক খাপ খাচ্ছে না। বড় বেশিরকম বুর্জোয়া-গোছের দেখতে। এখানে ঢুকতে পেল কী করে?’

রগদুটো দপদপ করে উঠল পাভেলের।

‘ও আমার এক বন্ধু। আমিই ওকে এনেছি এখানে। বুঝলে? আমাদের প্রতি ওর মোটেই কোনো বিরুদ্ধ মনোভাব নেই, যদিও নিজের সাজপোশাকের দিকে ওর বড় বেশি নজর। তবু কে কীরকম পোশাক পরছে তাই দেখে সবসময়ে মানুষকে যাচাই করা উচিত নয়। তুমি যেমন জানো তেমনি আমিও জানি কাকে এখানে আনা যায় না-যায়—সুতরাং তোমার অত খবরদারি করার কোনো দরকার নেই, কমরেড!’

সে বেশ একটু ঝাজালো আর অপমানজনক কিছু বলতে যাচ্ছিল, কিন্তু পানক্রাতভ-যে সবার সাধারণ মতটাকেই প্রকাশ করেছে সেটা বুঝতে পেরে সে সামলে নিল। এবং তার ফলে তোনিয়ার ওপর রাগটা বেড়েই গেল। ‘যা ওকে বলেছিলাম, ঠিক তাই হল! কী দরকারটা পড়েছিল ওর গুমনিধারা চাল দেখাতে যাবার?’

সেইদিন সন্ধ্যায় তাদের বন্ধুত্বের শেষ অধ্যায়ের সূত্রপাত হল। ‘পাভেল যে- সম্পর্কটাকে এতদিন চিরস্থায়ী বলে ভেবে এসেছে, গভীর স্কোভ আর হতাশার সঙ্গে সেই সম্পর্কটার ভাঙন লক্ষ করতে লাগল সে।

আরও কয়েকটা দিন কেটে গেল—প্রত্যেকবার দেখাশোনার মধ্যে দিয়ে, প্রত্যেকটা সংলাপের মধ্যে দিয়ে তারা ক্রমশই পরস্পরের কাছ থেকে আরও দূরে সরে যেতে থাকল। তোনিয়ার খেলো ব্যক্তিস্বাতন্ত্র্য পাভেলের কাছে ক্রমশই অসহ্য হয়ে উঠছে।

দু’জনেই অনুভব করছে—ওদের মধ্যে ছাড়াছাড়িটা অনিবার্য।

আজ তারা শেষবারের মতো কুপেচেন্সি-বাগানে মিলিত হয়েছে। শুকনো পাতায় পঞ্চলো ঢেকে গেছে। উঁচু খাড়াইটার মাথায় ওরা বেড়ার ধারে এসে দাঁড়িয়ে নিচে নীপারের ধূসর জলের দিকে তাকিয়ে আছে। সাঁকোটার মস্ত উঁচু খিলানের ওপাশ থেকে একটা গাধাবোট পেছনে দুটো ভারী বক্সরা টেনে নিয়ে ক্লাস্তভাবে নদী বেয়ে ধীরে ধীরে এগিয়ে আসছে। অস্তগামী সূর্য ওপারের ক্রুখানভ দ্বীপের বুকে সোনার ছোপ দিয়েছে—ঘরবাড়িগুলোর জানলায় আগুন ধরে গেছে যেন।

সূর্যের ফালি-ফালি সোনালি আলোর দিকে তাকিয়ে তোনিয়া গভীর বিষাদের সঙ্গে বলল, ‘ওই ডুবন্ত সূর্যের মতোই আমাদের বন্ধুত্বও কি মিলিয়ে যাবে?’

পাভেল একদৃষ্টে তাকিয়ে ছিল ওর মুখের দিকে। কঠিন-চোখে জ্রুকুটি করে নিচুগলায় উত্তর দিল, 'তোনিয়া, আমাদের মধ্যে এসব কথা আগেও হয়ে গেছে। তুমি তো জানো, আমি ভালোবেসেছিলাম তোমাকে, এখনও আমার ভালোবাসা ফিরে আসতে পারে—কিন্তু তার জন্যে তোমাকে মিলতে হবে আমাদের সঙ্গে। আমি আর সেই আগেকার পাভলুশা নই। পার্টির চেয়ে তোমাকে বড় করে দেখব—এ-কথা যদি ভেবে থাকো, তাহলে আমি খারাপ স্বামী হব। কারণ, আমি সর্বদা পার্টিকে আগে স্থান দেব, তারপরে স্থান দেব তোমাকে আর অন্যসব আত্মীয়স্বজনদের।'

নিবিড় বেদনাভরা চোখে তোনিয়া তাকিয়ে রইল নিচের ঘন নীল জলের দিকে—তার চোখ ভরে উঠল জলে।

পাভেল তার বাদামি রঙের ঘন চুলের দিকে, তার পাশ-ফেরানো মুখখানার দিকে একদৃষ্টে তাকিয়ে রইল—যে-মুখখানাকে সে এত নিবিড়ভাবে চেনে। মেয়েটির প্রতি একটা করুণার উচ্ছ্বাসে ভরে উঠল তার মন—সে তার কাছে একসময়ে এত প্রিয় ছিল! তোনিয়ার কাঁধের উপরে আঙুল হাতখানা রাখল সে।

'তোনিয়া, তোমার বাঁধন ছিড়ে ফেলে আমাদের সঙ্গে এসে মিলে যাও। একসঙ্গে আমরা মালিক-শ্রেণীকে খতম করব। আমাদের মধ্যে বহু চমৎকার মেয়ে আছে—তারা এই নিদারুণ লড়াইয়ের সবরকম বোঝা বইছে, সবরকমের কষ্ট আর অসুবিধে সইছে। তারা তোমার মতো শিক্ষিতা না হতে পারে। কিন্তু কেন, কেন তুমি আমাদের মধ্যে আসতে চাও না? তুমি বলেছ—চুখানিন তোমাকে চরিত্রভ্রষ্ট করবার চেষ্টা করেছিল—কিন্তু চুখানিনটা তো একটা অধঃপতিত লোক, ও যোদ্ধা নয়। তুমি বলেছ, কমরেডরা নাকি তোমার সঙ্গে বন্ধুর মতো ব্যবহার করেনি। কিন্তু তুমিই বা কেন সেদিন ওরকম বড়লোকদের নাচের আসরে যাবার মতো পোশাক পরেছিলে? দোষটা তোমারই ত্রুণকো আত্মাভিমানের : আর-সবাই পরছে বলেই আমাকেও এই পুরনো নোংরা ফৌজি কোর্তা পরতে হবে কেন?—এইরকম ভেবেছিলে তুমি। একজন শ্রমিককে ভালোবাসার সাহস তোমার ছিল—কিন্তু তুমি একটা আদর্শকে ভালোবাসতে পারছ না। তোমার সঙ্গে ছাড়াছাড়ি হয়ে যাচ্ছে বলে আমি দুঃখিত, তোমাকে নিয়ে ভালো কথাই মনে রাখতে চাই।'

আর কিছু বলল না পাভেল।

পরের দিন পাভেল রাস্তায় দেখতে পেল আঞ্চলিক 'চেকা' কমিটির সভাপতির একটা নির্দেশ লটকানো রয়েছে দেয়ালের গায়ে—তাতে নাম-সই করা আছে—ঝুখরাই। তার স্বর্ষিপুটা যেন লাফিয়ে উঠল। অনেক হাস্যামার পর সে সেই জাহাজির দণ্ডের ঢুকতে পেল। সত্বীরা কিছুতেই তাকে ঢুকতে দেবে না। ফলে, পাভেল এমন একটা হৈ-চৈ বাধিয়ে দিল যে প্রায় শ্রেণ্ডার হয় আর-কী। অবশ্য শেষপর্যন্ত ঢুকতে পেল সে।

ফিওদর তাকে আন্তরিক খুশির সঙ্গে অভ্যর্থনা জানাল। তার একটা হাত কাটা গেছে—গোলা লেগে উড়ে গিয়েছিল হাতখানা। ওদের কথাবার্তা তৎক্ষণাৎ কাজের আলোচনায় মোড় নিল।

'ফ্রন্টে ফিরে যাবার জন্যে উপযুক্ত না হয়ে ওঠা পর্যন্ত তুমি আমাকে এখানকার প্রতিবিপ্লবীদের উৎখাত করার কাজে সাহায্য করতে পারো। কাল থেকেই কাজ শুরু করে দাও,' বলল ঝুখরাই।



পোলিশ স্বৈতরক্ষীদের সঙ্গে লড়াই শেষ হয়ে গেছে। লালফৌজ শত্রুপক্ষকে প্রায় একেবারে ওয়ারশ-এর দেয়াল পর্যন্ত হঠিয়ে নিয়ে গিয়েছিল। কিন্তু তাদের বৈষয়িক আর শারীরিক শক্তি কমে আসায় এবং রসদ জোগান দেবার ঘাঁটি অনেক পেছনে পড়ে থাকায় তারা পোলিশদের এই শেষ ঘাঁটিটা দখল করে নিতে পারেনি। তাই তারা ফিরে এসেছে। ওয়ারশ থেকে লালফৌজের এই পিছিয়ে আসার ব্যাপারটাকে পোলিশরা নাম দিয়েছে 'ভিটুলার অলৌকিক ঘটনা'। এর ফলে, অভিজ্ঞতাদের করায়ত্ত পোল্যান্ড আরও কিছুদিনের মতো আয়ু ফিরে পেল—পোলিশ সোভিয়েত সমাজতান্ত্রিক প্রজাতন্ত্রের স্বপ্ন কার্যকরী করে তুলতে কিছুটা দেরি থেকে গেল।

রক্তাক্ত দেশ এখন খানিকটা বিশ্রাম চায়।

পাভেল তার আত্মীয়স্বজনদের সঙ্গে দেখা করার সুযোগ পেল না, কারণ শেপেতোভ্কা আবার পোলিশদের দখলে চলে গেছে এবং সেটা সাময়িকভাবে একটা সীমান্ত-ঘাঁটি হয়ে দাঁড়িয়েছে। শান্তি-আলোচনা চলছে। 'চেকা'র জন্য নানান ধরনের কাজে পাভেলের দিনরাত্রি কাটছে। থাকল ঝুঝরাইয়ের ঘরে। তার নিজের শহর পোলিশদের দখলে চলে গেছে শুনে সে খুব দুচ্ছিন্তায় পড়ে গেছে। ঝুঝরাইকে সে জিজ্ঞেস করল, 'এখন যদি যুদ্ধবিরতি চুক্তি হয়ে যায়, তাহলে আমার মা কি সীমান্তের অন্যদিকে পড়ে যাবে?'

ফিওদর তার ভয় দূর করল, 'খুব সম্ভব গোরিন নদীটার গতিপথ ধরে সীমান্ত নির্দিষ্ট হবে। তার মানে, তোমাদের শহরটা আমাদের এলাকার মধ্যে পড়বে। যাই হোক, খুব শিগগিরই জানতে পারব আমরা।'

পোলিশ সীমান্ত থেকে দক্ষিণে ডিভিশনের পর ডিভিশন চালান করে দেওয়া হচ্ছে। কারণ, ওদিকে সোভিয়েত প্রজাতন্ত্র যখন পোলিশ সীমান্তে তার সমস্ত মনোযোগ সংহত করেছে, তখন ব্রাসেল এদিকে এই বিরতির সুযোগে ক্রিমিয়ায় তার গোপন ঘাঁটি থেকে ঠুঁড়ি মেরে বেরিয়ে এসে নীপারের ধার ঘেঁষে উত্তরদিকে তার অব্যবহিত লক্ষ্য ইয়েকাতেরিনস্লাভ এলাকা দখল করবার জন্য এগিয়ে আসতে শুরু করেছে।

পোলিশদের সঙ্গে লড়াই শেষ হয়ে যাওয়ায় সোভিয়েত সরকার প্রতিবিপ্লবীদের এই শেষ ঘাঁটিটাকে নিশ্চিহ্ন করে দেবার জন্য অবিলম্বে ফৌজ পাঠিয়ে দিল ক্রিমিয়ায়।

ট্রেন-ভর্তি সৈন্যদল, ঠেলাগাড়ি, রান্নার সরঞ্জাম আর কামান দক্ষিণদিকে যাবার পথে কিয়েভের মধ্যে দিয়ে বেরিয়ে যাচ্ছে। এই অঞ্চলে যানবাহন-চলাচলের জন্য যে 'চেকা' আছে তারা ইদানীং প্রাণপণে পরিশ্রম করেছে। যানবাহন-চলাচল অসম্ভব রকম বেড়ে যাওয়ায় মাঝে মাঝে যে বিশৃঙ্খলার সৃষ্টি হয়ে চলাচল একদম বন্ধ হয়ে যাচ্ছে, তাদের সেসব দিনরাত নিয়ন্ত্রণ করতে হচ্ছে। স্টেশনগুলোয় সব ট্রেন আটকে আছে, খালি লাইন পাওয়া না-যাওয়ায় চলাচল প্রায়ই বন্ধ থাকছে। কোনো-না-কোনো ডিভিশনের চলার পথ পরিষ্কার করে দেবার হুকুম দিয়ে টেলিগ্রাফ-অপারেটররা অসংখ্য জরুরি তার পাঠাচ্ছে ট্রে-টকা শব্দে। টেলিগ্রাফ যন্ত্রের মধ্যে থেকে ফুটকি আর ড্যাশ-চিহ্নিত অন্তহীন লম্বা কাগজের ফিতে বেরিয়ে আসছে—প্রত্যেকটাই সর্বাত্মে বিবেচনার জন্য দাবি জানাচ্ছে, 'অন্য সবকিছুর আগে এটা করা চাই...এটা সামগ্রিক হুকুম....অবিলম্বে পথ পরিষ্কার করে

দাও...’। প্রায় প্রত্যেকটা তারবার্তাতেই একবার করে মনে করিয়ে দেওয়া হচ্ছে যে এই হুকুম না-মানা হলে দোষীদের বিপ্লবী সামরিক আদালতে অভিযুক্ত করা হবে।

যানবাহন বিনা-বাধায় চলাচলের দায়িত্ব পড়েছে স্থানীয় পরিবহন সংক্রান্ত ‘চেকা’র ওপর।

বিভিন্ন সৈন্যদলের অধিনায়করা অনবরত ‘চেকা’র সদর-দপ্তরে রিভলবার বাগিয়ে ঢুকে পড়ে দাবি জানাচ্ছে যে ফৌজের সর্বাধিনায়কের সহ-করা অমুক নম্বরের টেলিগ্রাম অনুযায়ী তাদের ট্রেনগুলোকেই আগে রওনা করে দেওয়া হোক।

সেটা করা যে অসম্ভব—এ কৈফিয়ত স্তনতে কেউ রাজি নয়, ‘আমাদের ট্রেনটা রওনা করে দিতেই হবে—তা করতে গিয়ে যদি তোমাদের কলিজা ফেটেও যায়, তবুও!’ এবং একদমক ভীষণ গালাগাল বেরিয়ে আসছে তারপর। বিশেষ গুরুতর ব্যাপারগুলোয় যুদ্ধরাইয়ের জরুরি তলব পড়ে। তখন এইসব উত্তেজিত মানুষগুলো—যারা পরস্পরকে ওইখানেই যেন গুলি করে মারবার জন্য তৈরি—তারা শান্ত হয়ে পড়ে।

এই লৌহদৃঢ় মানুষটির শান্ত আর বরফের মতো ঠাণ্ডা গলার স্বরের কাছে কোনো আপত্তি টেকে না—তার উপস্থিতির ফলেই ঝাপের মধ্যে রিভলবারগুলো ফের ঢুকে যায়।

মাথার মধ্যে একটা ভীষণ যন্ত্রণা নিয়ে পাভেল অফিস থেকে টলতে টলতে স্টেশনের প্র্যাটফর্ম বেরিয়ে আসে। ‘চেকা’র কাছে তার স্বায়ুর ওপরে ভয়ানক রকম চাপ পড়ছে।

একদিন সে হঠাৎ একটা গুলিগোলায় বাঞ্চে বোঝাই ছাদখোলা গাড়ির উপরে সেগেই ক্রঝাককে দেখতে পেল। সেগেই গাড়িটার উপর থেকে লাফিয়ে পাভেলের ওপর ঝাপিয়ে পড়ে প্রায় তাকে চিৎপাত করে ফেলে দিয়ে দুহাতে জড়িয়ে ধরল বন্ধুকে।

‘পাভকা, ওরে শয়তান! তোর ওপর চোখ পড়ার সঙ্গে সঙ্গেই বুঝেছি—এ তুই ছাড়া আর কেউ নয়।’

এই দুই তরুণ বন্ধুর মধ্যে এত কথা বলার আছে যে কোথা থেকে তারা শুরু করবে বুঝে উঠতে পারছে না যেন। ওদের দু’জনের শেষ দেখা হবার পর কত কী ঘটে গেছে! পরস্পরকে প্রশ্নে প্রশ্নে জর্জরিত করে উত্তরের অপেক্ষা না করেই ওরা কথা বলে যেতে লাগল। ইঞ্জিনের হুইসল তাদের কানে যায়নি। ট্রেনটা যখন স্টেশন ছেড়ে বেরিয়ে যাবার জন্য চলা শুরু করেছে, তখন মাত্রই ওরা আলিঙ্গনমুগ্ধ হল।

তখনও তাদের অনেক কথা বলতে বাকি ছিল পরস্পরকে। কিন্তু ট্রেনটা ক্রমশই দ্রুতগতি নিচ্ছে। সেগেই তার বন্ধুর উদ্দেশে চোঁচিয়ে কী একটা বলে প্র্যাটফর্ম বেয়ে ছুটে ছুটে একটা মাল-কামরার খোলা দরজা ধরে ফেলল। ভেতর থেকে কয়েকটা হাত বেরিয়ে এসে তাকে ধরে টেনে তুলে নিল ভেতরে। তার চলে যাওয়ার দিকে তাকিয়ে থাকতে থাকতে হঠাৎ পাভেলের মনে পড়ল, ভালিয়ার মৃত্যু সম্বন্ধে সেগেই কিছুই জানে না। কারণ, শেপেতোভ্কা ছাড়ার পর ও আর সেখানে যায়নি—আর, আজকের এই অপ্রত্যাশিতভাবে দেখা হয়ে যাবার এই সময়টুকুর মধ্যে পাভেলেরও সে-কথাটা বলতে ভুল হয়ে গেছে।

পাভেল ভাবল, ‘না-জানাটাই ভালো। ওর মনের শান্তি তাতে বজায় থাকবে।’ সে জানত না যে বন্ধুর সঙ্গে আর কোনোদিন তার দেখা হবে না। শরতের বাতাসের দিকে

বুক-খোলা অবস্থায় গাড়ির ছাদে দাঁড়িয়ে সেগেইও জানত না যে সে তার মৃত্যুর মুখে এগিয়ে চলেছে।

দরোশেঙ্কো নামে একজন লালকৌজের সৈন্য সেগেইকে তাড়া দিল, 'ওখান থেকে নেমে এসো, সেরিওঝা।'—দরোশেঙ্কোর গায়ে একটা কোট যার পেছনদিকটা পুড়ে গিয়ে গর্ত হয়ে গেছে।

হেসে বলল সেগেই, 'ঠিক আছে, বাতাসের সঙ্গে আমার খুব ভাব আছে।'

এক সপ্তাহ বাদে প্রথম লড়াইয়ের দিনেই একটা এলোপাতাড়ি বুলেট এসে সেগেইয়ের বুকে বিধল।

টলতে টলতে একটু এগোল, যন্ত্রণায় যেন ছিড়ে গেল বুকটা, শূন্যে কী যেন মুঠো করে ধরবার চেষ্টা করল, তারপর বুকে হাতদুটো জোরে চেপে ধরে কয়েক পা টলতে টলতে এগিয়ে গিয়ে ঘুরে পড়ে গেল সে মাটির উপর ভারী একটা বোঝার মতো। ইউক্রেনের সীমাহীন স্তেপভূমির দিকে তার দৃষ্টিহীন নীল চোখদুটি নিম্পলক তাকিয়ে রইল।

\*

\*

\*

'চেকা'র স্নায়ুপেশা কাজকর্ম পাভেলের দুর্বল শরীরের উপরে দারুণ একটা প্রতিক্রিয়ার সৃষ্টি করেছে। সেই পুরনো ক্ষতের জন্য প্রচণ্ড মাথাধরাটা তার ক্রমশই বাড়ছে। একবার একাদিক্রমে দু-রাত্রি জাগার ফলে অজ্ঞান হয়ে পড়ার পর তবেই সে বুখরাইয়ের সঙ্গে ব্যাপারটা আলোচনা করবে বলে ঠিক করল।

'তোমার কী মত, ফিওদর—আমি যদি অন্য কোনো কাজে লাগার চেষ্টা করি, তাহলে কেমন হয়? আমার নিজের সবচেয়ে পছন্দ রেল-কারখানায় আমার নিজের কাজটাই করি। ভয় হচ্ছে—আমার মাথার মধ্যে কী যেন গোলমাল হয়েছে। চিকিৎসা কমিশনে ওরা আমাকে কৌজের কাজের পক্ষে অনুপযুক্ত বলে দিয়েছে। কিন্তু এ-ধরনের কাজ ফ্রন্টে লড়াইয়ের কাজের চেয়েও খারাপ। এই দু'দিন ধরে সূতির-এর ডাকাত-দলটাকে পাকড়াও করতে গিয়ে আমার শরীরটা একেবারে ভেঙে পড়েছে। এইসব মারামারির কাজ থেকে আমি সম্পূর্ণ বিশ্রাম চাই কিছুদিনের জন্যে। দেখতেই পাচ্ছি ফিওদর, আমি যদি ঝাড়া হয়ে দাঁড়াতেই না পারি তাহলে আর তোমার কী কাজে লাগব বলো?'

উদ্বেগভরা চোখে বুখরাই পাভেলের মুখখানা ভালো করে দেখল।

'হ্যাঁ, তোমাকে বিশেষ ভালো দেখাচ্ছে না। আমারই দোষ। অনেক আগেই আমার তোমাকে ছেড়ে দেওয়া উচিত ছিল। কিন্তু বড্ড ব্যস্ত ছিলাম বলে লক্ষ করিনি।'

এই কথাবার্তার অঙ্ককিছু পরেই পাভেল কমসমোলের আঞ্চলিক কমিটিতে এসে উপস্থিত হল। তার হাতে একটা কাগজ—যাতে বলা হয়েছে যে তাকে কাজ দেবার জন্য কমিটির কাছে পেশ করা হল।

টুপিটা কায়দা করে প্রায় নাকের উপর ঠেলে-দেওয়া একটি ছেলে কাগজটার উপরে তাড়াতাড়ি চোখ বুলিয়ে নিয়ে ধূর্তভাবে বলল, 'চেকা' থেকে আসছ, অ্যাঁ? ভারি ফুর্তির ওই সংগঠনটা। এখানে আমরা তোমার জন্যে একুনি কাজ জুটিয়ে দিচ্ছি। ছেলেকের আমাদের দরকার। কোথায় যেতে চাও ভূমি? খাদ্য জন-কমিশারিয়েট? না? আচ্ছ, তাহলে জাহাজ-ঘাটায় প্রচার-আন্দোলনের বিভাগ সম্বন্ধে কী মনে করো? তাও না? তাহলে তো মুশকিল হল। ওখানকার কাজটা সুবিধের—আলাদা বিশেষ রেশনও পাওয়া যায়।'

পাভেল তার কথায় বাধা দিল।

‘আমি রেলওয়ের মেরামত কারখানাটায় যেতে চাই’, বলল সে।

‘রেলওয়ে কারখানায়?’ হাঁ হয়ে গেল ছেলেটির মুখ, ‘হুম্....সেখানে আমাদের কাউকে দরকার পড়বে বলে আমার মনে হয় না। তবে, তুমি উত্তিনোভিচের কাছে একবার যাও। সে তোমাকে একটা কোথাও কাজে লাগিয়ে দেবে।’

ঘোর-রঙের এই মেয়েটির সঙ্গে দেখা করার পর অল্পক্ষণ কথাবার্তার শেষে ঠিক হয়ে গেল, পাভেল রেলওয়ে কারখানায় কাজ করবে আর সেখানকার কমসমোল সংগঠনের সম্পাদক হিসেবে নিযুক্ত হবে।

\*

\*

\*

ইতিমধ্যে শ্বেতরক্ষীরা ক্রিমিয়ার প্রবেশপথটায় জড়ো হয়ে প্রতিরোধ গড়ে তুলছে। এককালে এই সৰু ভূখণ্ডটি ছিল ক্রিমিয়ার তাতার আর জাপোরোঝিয়ে-কসাকদের বাসভূমির মধ্যবর্তী সীমান্তরেখা—এখন এটা আধুনিক সশস্ত্র সৈন্যবৃহৎ সাজানো পেরেকপ্-এর ফ্রন্ট।

এই ক্রিমিয়াতেই পেরেকপের পেছনে গোটা দেশের সব জায়গা থেকে তাড়া খেয়ে এসে আশ্রয় নিয়েছে পুরনো দুনিয়াটা, তার বিনাশ অবধারিত; এখানে নিজেদের সম্পূর্ণ নিরাপদ ভেবে তারা মদের নেশায় চুর হয়ে হত্যাড করে বেড়ায়।

শরতের এক শীতাত স্নাতসেঁতে রায়ে শ্রমজীবী মানুষের হাজার হাজার সন্তান ঝাঁপিয়ে পড়ল সিভাশের হিম-শীতল জলের বুকে—অন্ধকারের আড়ালে প্রণালীটা পার হয়ে এসে দুর্গের ভেতরে সুরক্ষিত হয়ে অবস্থিত শত্রুকে পেছন থেকে হঠাৎ আক্রমণ করা তাদের উদ্দেশ্য। এই হাজার হাজার লোকের মধ্যে একজন ইভান ঝার্কি—মেশিনগানটা যাতে জলে ভিজে না যায় তার জন্য সেটাকে মাথার উপরে তুলে ধরে সে জল কেটে চলেছে।

তারপর, ভোরবেলায় পেরেকপের উপর যখন মরিয়া সংগ্রাম শুরু হয়েছে, সামনের দিক থেকে হঠাৎ আক্রমণ চলেছে দুর্গের উপর, তখন সিভাশ প্রণালী পার-হয়ে-আসা প্রথম দলটি লিতোভ্‌স্কি উপদ্বীপের উপর তীরে উঠে পড়েছে শ্বেতরক্ষীদের পেছন থেকে আক্রমণ করার জন্য। এবং প্রথম যারা টেনে-হিঁচড়ে পাথুরে ডাঙাটায় এসে উঠেছে, তাদের মধ্যে ইভান ঝার্কি একজন।

এরকম হিংস্র লড়াই আগে কখনো হয়নি। জল থেকে উঠে-আসা লালফৌজের সৈন্যদের উপর বর্বর নির্মমতার সঙ্গে ঝাঁপিয়ে পড়ল শ্বেতরক্ষী ঘোড়সওয়াররা। ঝার্কির মেশিনগান অনর্গল মৃত্যু উদ্‌গিরণ করে চলল একবারও না-থেমে। সীসের বৃষ্টির মধ্যে ঘোড়া আর মানুষের দেহের ছুপ জমে উঠল। দ্রুত ক্রমান্বয়ে নতুন গোলার মালা পরিণিয়ে নিচ্ছে ঝার্কি তার মেশিনগানে।

শত শত কামানের গোলার আওয়াজে পেরেকপ্ গর্জন করে উঠল। গোটা পৃথিবীটাই যেন একটা অতল গহবরের মধ্যে তলিয়ে যাচ্ছে, হাজার হাজার মৃত্যুবাহী

গোলাব কান-ফাটানো আৰ্ভ আওয়াজ বিদীৰ্ণ কৰে দিছে আকাশকে, গোলাগুলো বহুদূৰ পৰ্যন্ত অসংখ্য ছোট ছোট টুকৰো ছড়িয়ে দিয়ে ফেটে পড়ছে। ছিন্নভিন্ন মাটি কালো মেঘ হয়ে শূন্যে উঠে যাচ্ছে সূৰ্যকে ঢেকে দিয়ে।

বীভৎস জ্ঞানোন্মাদৰটাৰ মাথাটা ওঁড়ো হয়ে গেল। ক্রিমিয়াৰ ভেতৰে বয়ে চলল এক-নম্বৰ ঘোড়সওয়ার বাহিনীৰ লাল বন্যা—ওৱা চলেছে শেষ অমোঘ আঘাতটা হানবাবৰ জন্য। প্ৰাণেৰ ভয়ে দিশেহাৱা শ্বেতৱক্ষীৰা আতঙ্কে আত্মহাৱা হয়ে ছুটে চলল বন্দৰ ছেড়ে-যাওয়া জাহাজগুলোয় চাপবাবৰ জন্য।

লালফৌজের বহু ছেঁড়াখোঁড়া কোৰ্তাৰ গায়ে প্ৰজাতন্ত্রী সৰকাৰ সোনাৰ 'লাল পতাকা অৰ্দ্ধাৰ' আটকে দিল। ওই কোৰ্তাগুলিৰ মধ্যে একটা কোৰ্তা—কমসমোলেৰ মেশিনগান-গোলন্দাজ ইভান ঝাৰ্কিৰ।

\*

\*

\*

পোলিশদের সঙ্গে যুদ্ধবিৰতিৰ চুক্তি হয়ে গেল এবং কুখৰাইয়ের ভবিষ্যদ্বাণী অনুসাৰে শেপেতোভ্কা সোভিয়েত ইউক্ৰেনেই থেকে গেল। শহৰ থেকে প্ৰায় বাইশ মাইল দূৰে একটা নদী এখন সীমান্তেৰ চিহ্ন।

১৯২০-ৰ ডিসেম্বৰেৰ এক স্মৰণীয় সকালে পাভেল তাৰ নিজের শহৰে ফিৰে এল। বৰফে-ঢাকা প্ল্যাটফৰ্মটাৰ উপৰে নেমে সে একনজৰ তাকাল 'শেপেতোভ্কা-১' লেখা সাইনবোৰ্ডটাৰ দিকে। তাৰপৰ বাঁয়ে ঘূৰে সোজা ষ্টেশনেৰ ডিপোয় গিয়ে আৱতিগমেৰ খোঁজ কৰল। কিন্তু তাৰ দাদা সেখানে নেই। গায়েৰ উপৰে সামৰিক কোটটা আঁট কৰে নিয়ে পাভেল বনেৰ মধ্যে দিয়ে শহৰেৰ দিকে চলল।

দরজায় ঘা পড়তে মারিয়া ইয়াকোভ্লেভনা উঠে বলল, 'ভেতৰে আসুন।' দরজা ঠেলে ঘৰে ঢুকল একটা বৰফে-ঢাকা মূৰ্তি—মা তাৰ ছেলেৰ প্ৰিয় মুখখানা দেখতে পেল। হাতদুটো বুক্কেৰ উপৰ চেপে ধৰল সে। আনন্দেৰ আত্মনতায় সে মুখেৰ কথা হাৰিয়ে ফেলেছে।

ছেলেৰ বুক্কেৰ উপৰে ঝাঁপিয়ে পড়ে চুমোয় চুমোয় ভৰে দিল সে তাৰ মুখ। গাল বেয়ে ঝৰে পড়ল আনন্দেৰ অশ্রু।

আৰ পাভেল সেই হালকা ছোট্ট দেহখানিকে সজোৱে আঁকড়ে ধৰে একদৃষ্টিতে তাকিয়ে ৱইল মায়েৰ দুচিন্তাৰ ছাপ-ধৰা, কষ্টেৰ আৰ উদ্বেগেৰ বলি-চিহ্নিত মুখেৰ দিকে। তাৰ শান্ত-হয়ে-আসা পৰ্যন্ত অপেক্ষা কৰে ৱইল সে।

অনেক কষ্ট সয়েছে মারিয়া ইয়াকোভ্লেভনা। এবাৰ আবাৰ তাৰ চোখেৰ দৃষ্টিতে সুখেৰ উজ্জ্বলতা ফিৰে এল। যে-ছেলেকে আৰ কোনোদিন দেখতে পাবাৰ আশা সে একেবাৰেই ছেড়ে দিয়ে বসেছিল, সেই ছেলে আবাৰ ফিৰে আসায় তাৰ মুখেৰ দিকে তাকিয়ে তাকিয়ে যেন তাৰ আশ মেটে না।

তিনদিন পৰে একদিন গভীৰ ৱাত্ৰে কাঁধেৰ উপৰ সৈনিকেৰ বোঁচকাটা বেঁধে যখন আৱতিগমও ফিৰে এসে ছোট্ট ঘৰখানাকে ভৰাট কৰে তুলল, তখন মারিয়া ইয়াকোভ্লেভনাৰ সুখেৰ আৰ সীমা ৱইল না।

করচাগিন-পরিবার এতদিনে আবার পুনর্মিলিত হয়েছে। দুই ভাই-ই মৃত্যুকে এড়িয়ে ঘরে ফিরে এসেছে। নিদারুণ কষ্ট আর নানান পরীক্ষার মধ্যে দিয়ে পার হয়ে এসে আবার পরস্পরের সঙ্গে মিলেছে তারা।

মা তার ছেলেদের জিজ্ঞেস করল, 'এখন কী করবি তোরা?'

হালকা সুরে আরতিওম জবাব দিল, 'আমি আবার ওই রেল-কারখানাতেই গিয়ে ঢুকব, মা!'

আর পাভেল দু-সপ্তাহ বাড়িতে কাটানোর পর কিয়েভে ফিরে গেল—সেখানে কাজ পড়ে রয়েছে তার।

### প্রথম ভাগ শেষ



## ଦ୍ଵିତୀୟ ଭାଗ







## প্রথম অধ্যায়

রাত্রি-দুপুর। শেষ ট্রামগাড়িখানা অনেকক্ষণ আগে তার নড়বড়ে দেহখানা টেনে নিয়ে ফিরে গেছে ডিপোয়। জ্ঞানলার গোড়ায় চাঁদের একফালি ঠাণ্ডা আলো এসে পড়েছে। বিছানার ওপরে তারই আভার চাদর বিছিয়ে দিয়েছে। ঘরের বাকি অংশটুকু আধা-অন্ধকার। কোণের দিকে টেবিলটার ওপরে একটা ঠুলি-পরানো ডেস্ক-আলোর বৃন্তের নিচে ঝুঁকে বসে আছে রিতা তার মোটা নোটবইটার সামনে।

এটা তার রোজনামচা। পেন্সিলের সরু সীসটা লিখে চলেছে এই কথাগুলো :

২৪ মে

আমার স্মৃতিগুলোকে লিখে রাখবার জন্য আমি আরেকবার চেষ্টা করতে বসেছি। এই রোজনামচা লেখার ব্যাপারে আরেকবার একটা বড়রকম ফাঁক পড়েছে। শেষবার লেখার পর দেড়মাস কেটে গেছে। কিন্তু উপায় ছিল না।

রোজনামচা লেখার সময় পাই কোথায়? রাস্তির বারোটা বেজে গেছে, এদিকে এই আমি এখনও লিখে চলেছি। ঘুম আসছে না কিছুতেই। কমরেড সেগাল চলে যাবেন কেন্দ্রীয় কমিটিতে কাজ করবার জন্য। খবরটা পেয়ে আমরা সবাই খুব বিচলিত হয়ে পড়েছি। ভারি চমৎকার লোক—আমাদের এই লাক্সার আলেক্সান্দ্রভিচ। তাঁর বন্ধুত্ব-যে আমাদের পক্ষে কতখানি, সেটা আমি এর আগে পর্যন্ত বুঝে উঠতে পারিনি। উনি চলে গেলে হৃদমূলক বস্তুবাদের ক্লাসটা ভেঙে যেতে বাধ্য। আমাদের 'ছাত্ররা' কতদূর এগিয়েছে হিশেব নেবার জন্য আমরা কাল তাঁর ওখানে অনেক রাত পর্যন্ত ছিলাম। প্রাদেশিক কমসমোল কমিটির সম্পাদক আকিম এসেছিল। আর সেই অসহ্য তুফতা-টাও এসেছিল। ওই সবজ্ঞান্ধাটাকে আমি কিছুতেই সহ্য করতে পারিনি! পার্টির ইতিহাস সম্বন্ধে একটা তর্ক উঠেছিল। সেগালের ছাত্র করচাগিন যখন তুফতাকে চমৎকার যুক্তি দিয়ে তর্কে হারিয়ে দিল, তখন ভারি খুশি হয়ে উঠেছিলেন তিনি। না, এই দুটো মাস কৃথা যায়নি। এমন চমৎকার ফল যদি পাওয়া যায়, তাহলে পরিশ্রম করার জন্য কোনো

কোড থাকে না। কানাঘুষো শোনা যাচ্ছে, বুখরাইকে নাকি সামরিক অঞ্চলের বিশেষ বিভাগে বদলি করা হচ্ছে। কী জানি কেন।

লাজার আলেক্সান্দ্রিচি তাঁর ছাত্রটির ভার আমার ওপর দিয়ে বললেন, 'যে কাজটা শুরু করেছিল, আপনাকে সেটা শেষ করতে হবে। কিছুদূর এগিয়ে গিয়ে থামলে চলবে না। দেখবেন রিতা, আপনি আর ও—দু'জনে দু'জনের কাছ থেকে অনেক কিছু শিখতে পারবেন। ছেলেটির মধ্যে এখনও স্থানিকটা শৃঙ্খলার অভাব আছে। ওর স্বভাবটা উদ্দাম রকমের, আবেগের উচ্ছ্বাসে পরিচালিত হবার সম্ভাবনা। আমার মনে হচ্ছে, আপনিই ওকে সবচেয়ে ভালোভাবে পথ দেখিয়ে নিয়ে যেতে পারবেন, রিতা। আপনার সাফল্য কামনা করছি। আমাকে মজ্ঞোতে চিঠি লিখতে ভুলবেন না।'

আত্র সলোমেনকা জেলা কমিটির জন্য কেন্দ্রীয় কমিটি থেকে একজন নতুন সম্পাদক পাঠানো হয়েছে। ঝার্কি তার নাম। সৈন্যদলে তাকে আমি চিনতাম।

কাল দ্মিত্রি দুবাতা আসবে করচাগিনকে নিয়ে। দুবাতার একটু বর্ণনা দেবার চেষ্টা করে রাখা যাক : মাঝারি গড়নের শক্তসমর্থ, পেশিবহুল। ১৯১৮-য় কমসমোলে ঢুকেছে। ১৯২০ থেকে পার্টি-সভা। 'বিরোধীপক্ষ শ্রমিকদল'-এ থাকার জন্য যে-তিনজনকে প্রাদেশিক কমসমোল কমিটি থেকে বের করে দেওয়া হয়েছিল, তাদের মধ্যে সে একজন। তাকে শেখানো বড় শক্ত ব্যাপার ছিল। প্রত্যেক দিন অসংখ্য প্রশ্ন তুলে আসল বিষয়টা থেকে আমাকে অনেক দূরে সরিয়ে দিয়ে সে সমস্ত আলোচনাটাকে ভেঙে দিত। সে আর আমার আরেকজন ছাত্রী ওলগা ইউরেনেভার মধ্যে প্রায় ঝগড়া হত। প্রথম আলাপ-পরিচয়ের দিনেই ওলগার আপাদমস্তক দেখে নিয়ে দুবাতা মস্তব্য করে বসল, 'তোমার সাজ-পোশাকটা কিন্তু মোটেই ঠিক হয়নি, বুড়ি। পরা উচিত ছিল পেছনদিকে চামড়ার পটি-লাগানো প্যান্ট, নাল্‌অলা জুতো, বুদিওনি টুপি আর একটা তলোয়ার। এই পোশাকে তুমি না-মেয়ে না-মরদ।'

ওলগা অবশ্য এ-ধরনের কথা সহ্য করার পাত্রী নয়। আমাকেই শেষপর্যন্ত থামাতে হল। আমার মনে হয় দুবাতা করচাগিনের বন্ধু। আচ্ছা, আজ রাত্তিরের মতো এই পর্যন্ত। শুতে যাবার সময় হল।

\*

\*

\*

জ্বলন্ত রোদে শুকনো মাটি ঝাঁ-ঝাঁ করছে। রেলওয়ে-প্ল্যাটফর্মগুলোর ওপর দিয়ে ওভারব্রিজটার লোহার রেলিং তেতে আগুন হয়ে উঠেছে। গরমে ঘর্মাক্ত অবসন্ন শরীর নিয়ে মানুষগুলো ক্লান্তভাবে পুলটায় উঠছে। এদের বেশির ভাগই ট্রেনযাত্রী নয়, রেলওয়ে-অঞ্চলের লোক এরা—খাস শহরে যাবার জন্য এরা এই পুলটা ব্যবহার করে।

সিঁড়ি দিয়ে নেমে আসার সময় পাভেল রিতাকে দেখতে পেল। ও তার আগেই স্টেশনে এসে গেছে—পুলটা থেকে যারা নেমে আসছে তাদের লক্ষ করছে।

ওর কাছ থেকে গজ-তিনেক দূরে একপাশে এসে পাভেল একটু থামল। রিতা দেখতে পায়নি তাকে। রিতার স্বহৃদে পাভেলের সম্প্রতি যে-নতুন আগ্রহটা জেগেছে, সেই আগ্রহ নিয়ে ওকে লক্ষ করতে লাগল সে। ডোরাকাটা একটা ব্লাউজ আর সস্তা কাপড়ের ছোট একটা গাঢ় নীল রঙের স্কার্ট রিতার পরনে। কাঁধের ওপর ঝোলানো

একটা নরম চামড়ার কোর্তা। ঝাঁকড়া এলোমেলো চুলের ফাঁকে রোদে-পোড়া মুখখানা পেছনদিকে একটু হেলিয়ে ও দাঁড়িয়ে আছে, রোদের তেজে কুঁচকে গেছে চোখ—দেখতে দেখতে এই প্রথম করচাগিনের হঠাৎ মনে হল : তার বন্ধু আর শিক্ষক এই রিতা শুধুমাত্র প্রাদেশিক কমসমোল কমিটির একজন সভ্য নয়, আরও কিছু ... কিন্তু এ-ধরনের ‘পাপচিন্তা’কে সে প্রশ্রয় দিচ্ছে বুঝতে পেরেই পাভেল নিজের ওপর অভ্যস্ত বিরক্ত হয়ে উঠল। রিতার কাছে গেল সে।

‘পুরো একঘণ্টা ধরে তোমার দিকে তাকিয়ে আছি, লক্ষ্যই করোনি আমাকে,’ তাকে বলল পাভেল, ‘চলো, আমাদের ট্রেন এসে গেছে।’

প্যাটফর্মে ঢোকার দরজাটার দিকে এগিয়ে গেল তারা।

কমসমোলের জেলা সম্মেলনে প্রতিনিধি হিসেবে রিতাকে ওদের প্রাদেশিক কমিটি আগের দিন মনোনীত করেছে। আর, করচাগিনকে যেতে হবে রিতার সহকারী হিসেবে। আজকেই তাদের ট্রেনে চাপতে হবে—মোটাই সহজ নয় কাজটা। একেই তো ট্রেন যাতায়াত করে কুচিং কখনও। যখন যায়, তখন আবার গোটা স্টেশনটাকেই দখলে নিয়ে নেয় সর্বশক্তিমান ‘পাঁচ-জনের কমিটি’—এদের কাছ থেকে অনুমতিসূচক ছাড়পত্র না-পেলে কাউকে প্যাটফর্মে ঢুকতে দেওয়া হয় না। প্যাটফর্মে ঢোকার বা বের করার সমস্ত পথ এই কমিটির লোকজন পাহারা দেয়। মানুষে অতিরিক্ত বোঝাই হয়ে ট্রেনগুলো আসে, উদ্ভিগ্ন যাত্রীদের অতি সামান্য অংশমাত্র তাতে চাপতে পারে, কিন্তু আবার কবে দৈবাৎ কখন একটা ট্রেন এসে পড়বে—এই ভরসায় কেউই আর দিনের-পর-দিন পড়ে থাকতে চায় না। সুতরাং, প্যাটফর্মে ঢোকার দরজার ওপরে ঝাঁপিয়ে পড়ে হাজার হাজার লোক দুর্ভেদ্য সবুজ কামরাগুলোতে গিয়ে চাপার আশায়। তখনকার দিনে স্টেশনগুলোকে আক্ষরিক অর্থেই জনতা অবরোধ করে থাকত আর কোনো কোনো ক্ষেত্রে রীতিমতো হাতাহাতিতে পর্যন্ত গড়াত।

প্যাটফর্মের প্রবেশপথে যে-ভিড় জমায়েত হয়েছে, তার মধ্যে দিয়ে বারকতক ঠেলে ঢোকার ব্যর্থ চেষ্টা করার পর পাভেল মাল-গুদামের পথটা দিয়ে রিতাকে সঙ্গে নিয়ে ভেতরে এল। স্টেশনের এইসব আঁটঘাটগুলো পাভেল ভালোভাবেই জানে। চার নম্বর কামরাটার কাছে অতিকষ্টে এসে পৌঁছাল তারা। কামরাটার দরজার সামনে একজন ‘চেকা’র লোক গরমে দারুণ ঘামতে ঘামতে ভিড় ঠেকাচ্ছে আর অনবরত বলে চলেছে, ‘কামরা ভর্তি হয়ে গেছে। পেছনে জোড়ের ওপর কিংবা ছাদে চড়ে যাওয়াটা নিষেধ।’

ফুঁক নাগরিকরা তাকে চারদিক থেকে ঘিরে ফেলে কমিটির দেওয়া টিকিটগুলো তার নাকের সামনে উঁচিয়ে ধরেছে। ফুঁক গালাগাল, চোঁচামেচি আর প্রচণ্ড ধাক্কাধাক্কি চলেছে প্রত্যেকটি কামরায়। পাভেল বুঝতে পারল—চলিত রীতিতে ট্রেনে চাপা অসম্ভব। কিন্তু চাপতেই হবে, নইলে সম্মেলনটা বানচাল হয়ে যাবে।

রিতাকে একপাশে নিয়ে সে নিজের কার্যক্রমটা ছকে নিয়ে তাকে জানাল : গাড়িটার ভেতরে ঠেলে ঢুকে একটা জানলা খুলে ফেলে সে তার ফাঁক দিয়ে রিতাকে ভেতরে উঠে আসতে সাহায্য করবে। এছাড়া আর কোনো উপায় নেই।

‘তোমার ওই কোর্তাটা আমাকে দাও। এটা যে-কোনো পরিচয়পত্রের চেয়ে ভালো।’

কোর্তটা পরে নিয়ে পাভেল তার পিস্তল পকেটে এমনভাবে পুরে নিল যাতে সেটার হাতল আর খোলাবার দড়িটা বাইরে থেকে দেখা যায়। খাবারের ব্যাগটা রিতার কাছে রেখে কামরাটার দরজায় গিয়ে উত্তেজিত ট্রেনযাত্রীদের দঙ্গলটাকে কনুইয়ের ঠোঁটোয় ঠেলে সরিয়ে সে দরজার হাতলটা মুঠোর মধ্যে ধরে ফেলল।

‘এই কমরেড! ঢুকছ কোথায়?’

পাভেল ঘাড় ফিরিয়ে গাটাগোটা ‘চেকা’র লোকটির দিকে তাকাল, ‘আমি বিশেষ বিভাগের লোক। এই গাড়ির সব যাত্রীর কাছে কমিটির দেওয়া টিকিট আছে কিনা দেখতে চাই।’ এমন স্বরে সে কথাগুলো বলল যাতে তার এ-কাজ করার অধিকার সম্বন্ধে আর কোনো সন্দেহ রইল না।

‘চেকা’র লোকটি একনজর পাভেলের পকেটের দিকে তাকিয়ে ঘামে-ভেজা কপালটা জামার হাতায় মুছে নিয়ে ক্লান্তভাবে বলল, ‘ঢুকতে যদি পারো তো যাও।’

হাত দিয়ে কাঁধ দিয়ে ঠেলে, মাঝে মাঝে আশেপাশে দু-চারটে ঘুসি চালিয়ে, অন্যের কাঁধের ওপর চড়ে দু’হাতে ভর দিয়ে, ওপরের তাকে ভর করে, মাঝের পথটুকুতে যে-যাত্রীরা তাদের মোটঘাটের ওপর গেড়ে বসেছিল তাদের ওপর দিয়ে এগিয়ে পাভেল কামরাটার মাঝখানে গিয়ে পৌঁছল। চারিদিক থেকে তার ওপরে যে গালাগালির বর্ষণ চলল তা সে গ্রাহ্যও করল না।

কামরার মেঝেয় নামবার সময় দৈবক্রমে পাভেলের পা পড়ে গিয়েছিল একজন মোটাসোটা মহিলার হাঁটুর উপর। সে চিৎকার করে উঠল, ‘আ মোলো যা, চোখ মেলে দেখিস্নে কোথায় পা রাখছিস!’ বিরাট একটা তেলের টিন দুই হাঁটুর মাঝে চেপে ধরে কোনোক্রমে তার ভিন-মণী দেহখানাকে বেষ্টিটার একপ্রান্তে গুঁজে দেবার ব্যবস্থা করেছিল মহিলাটি। এইরকম সব টিন, বাক্স, বস্তা আর ঝুড়িতে বোঝাই হয়ে আছে প্রত্যেকটা তাক। কামরাটার মধ্যে দম বন্ধ হয়ে আসার মতো অবস্থা।

গালাগালির দিকে জ্রঙ্কপ না করে, পাভেল মহিলাটির কাছে দাবি জানাল, ‘দেখি তো আপনার টিকিটখানা!’

‘কী!’ খঁকিয়ে উঠল মহিলাটি এই অব্যাহতীয় টিকিট-পরীক্ষকটির দিকে।

সবার ওপরের তাকটা থেকে একটা মাথা বেরিয়ে এল আর একটা বিশ্রী কর্কশ গলা শোনা গেল, ‘ভাস্কা, এ ব্যাটা আবার এখানে কী করতে এল? দিয়ে দাও দেখি ওকে একখানা যমের বাড়ির টিকিট।’

পাভেলের ঠিক মাথার ওপরেই আবির্ভূত হল একটা বিরাট দেহ আর লোমশ বুক—স্পষ্টতই এই লোকটা ভাস্কা। একজোড়া রক্তাক্ত-চোখে খ্যাপা ঝাঁড়ের মতো নিম্পলক চাউনিতে সে তাকিয়ে আছে পাভেলের দিকে।

‘ছেড়ে দাও না মেয়েছেলেটিকে। আবার টিকিট চাও কেন?’

পাশে ওপরের তাক থেকে চারজোড়া পা ঝুলছে। এই পা-জোড়াগুলির মালিক যারা, তারা পরস্পরের কাঁধে হাত রেখে সোৎসাহে পটপট শব্দে সূর্যমুখী ফুলের বিচি চিবোচ্ছে। এদের মুখের দিকে একনজর তাকিয়েই পাভেল বুঝে নিল এরা কারা : খাবার-জিনিশের চোরাকারবারীদের একটা পুরো দঙ্গল—ঝানু জোচ্চোর, এক জায়গা থেকে খাবার জিনিশপত্র কিনে নিয়ে অন্য জায়গায় ফাটকা-দরে বিক্রি করে দেয়।

এদের সঙ্গে বকবক করে নষ্ট করার মতো সময় পাভেলের হাতে নেই। যে করে হোক, রিতাকে কামরার ভেতরে নিয়ে আসা চাই।

‘এটা কার বাস্তব?’ জানলাটার নিচে রাখা কাঠের একটা বাস্তব দেখিয়ে পাভেল একজন রেলকর্মচারীর পোশাক-পরা বয়স্ক লোককে জিজ্ঞেস করল।

বাদামি রঙের মোজা-পরা একজোড়া মোটাসোটা পায়ের দিকে দেখিয়ে লোকটা বলল, ‘ওই মেয়েটির।’

জানলাটা খুলতে হবে, অথচ ওই বাস্তবটা পথ আটকে রেখেছে। কোনোদিকে সরাবার জায়গা নেই দেখে পাভেল বাস্তবটাকে নিয়ে ওপরের তাকে বসে-থাকা তার মালিকের হাতেই তুলে দিল।

‘একটু ধরুন এটা দয়া করে, জানলাটা খুলব।’

খ্যাদা-নাক স্ত্রীলোকটির হাঁটুর ওপরে বাস্তবটা বসিয়ে দিতেই সে চিৎকার করে উঠল, ‘অন্যের জিনিশে হাত দিও না বলে দিচ্ছি!’

পাশে-বসা লোকটিকে সে বলে উঠল, ‘এই মোত্কা, এই উটকো লোকটা কী আরম্ভ করেছে দেখ দিকি!’ সেই লোকটা পাভেলের পিঠের ওপর তার স্যাভাল-পরা পায়ের একটা গুঁতো মারল।

‘দেখ হে! আর এক ঘা বসাবার আগেই কেটে পড়ো এখান থেকে!’

পাভেল নিঃশব্দে সহ্য করে গেল লাখিটা। ঠোঁট কামড়ে জানলাটা খোলার দিকে মনোনিবেশ করল।

রেল-কর্মচারীটিকে সে বলল, ‘একটু সরুন দয়া করে।’

পাভেল আরেকটা টিন সরিয়ে দিতেই জানলার সামনেটা ফাঁকা হয়ে গেল। নিচে প্র্যাটফর্মের ওপর রিতা। তাড়াতাড়ি সে ব্যাগটা পাভেলের হাতে তুলে দিল। তেলের টিনঅলা সেই মোটা মেয়েটির হাঁটুর ওপরে ব্যাগটা ছুড়ে দিয়ে পাভেল নিচু হয়ে ঝুঁকে রিতার হাত ধরে তাকে ভেতরে টেনে তুলল। প্র্যাটফর্মের প্রহরীটি এই নিয়ম-লঙ্ঘনটুকু লক্ষ করার আগেই রিতা ভেতরে ঢুকে গেছে। প্রহরীটা কিছু করতে না-পেরে বাইরে থেকে গালাগাল করতে লাগল। রিতা ঢুকতেই ওই ফাটকাবাজের দলটা এমন বিশ্রী হৈ-হুন্সা তুলল যে হঠাৎ ঘাবড়ে গেল রিতা। মেঝের ওপরে দাঁড়াবারও জায়গাটুকু পর্যন্ত নেই। নিচের বেঞ্চিটার একপ্রান্তে কোনোরকমে পাদুটো রাখার মতো জায়গা করে নিয়ে রিতা ওপরের তাকটা ধরে দাঁড়িয়ে রইল। চারিদিকে কুৎসিত গালাগাল। ওপর থেকে সেই বিশ্রীগুলার ভাঙা আওয়াজ শোনা গেল, ‘কাও দেখ ভয়োরটার! নিজে ঢুকে গিয়ে আবার পেছন পেছন ওর মাগটাকেও টেনে তুলল!’

ওপর থেকে একটা কর্কশ গলা বলে উঠল, ‘মোত্কা, দাও তো ওর নাকের ওপর একটা গোস্তা বসিয়ে!’

স্ত্রীলোকটি যথাসাধ্য চেষ্টা করছিল পাভেলের মাথার ওপরে তার কাঠের বাস্তবটা খাড়া রাখার জন্য। কামরাটায় এই দুটি নতুন আগন্তুকের চারিদিকে ঘিরে রয়েছে একসার শয়তানিতে ভরা বর্বর মুখ। রিতাকে যে এহেন একটা অবস্থার মধ্যে এনে ফেলতে হয়েছে, তার জন্য পাভেলের দুঃখ হল। কিন্তু যা হোক করে মানিয়ে নেওয়া ছাড়া তো আর উপায় নেই।

মোত্কা বলে যে-লোকটিকে ডাকা হয়েছিল, তার দিকে ফিরে পাভেল বলল, 'দাঁড়াবার জায়গাটা থেকে তোমার বস্তাগুলো সরিয়ে নিয়ে এই কমরেডকে একটু জায়গা দাও।'

কিন্তু উত্তরে লোকটা এমন কুৎসিত একটা গালাগাল দিয়ে উঠল যে রাগে সর্বাঙ্গ জ্বলে গেল পাভেলের। ডান চোখের ভুরুর ওপরকার রংটা তার যন্ত্রণায় দপদপ করতে লাগল।

শয়তান লোকটাকে সে বলে উঠল, 'দাঁড়াও বদমায়েশ, এর ফল পাইয়ে দিচ্ছি তোমায়!' কিন্তু উত্তরে শুধু ওপর থেকে একটা লাথি নেমে এল তার মাথায়।

'বেশ করেছে, ভাস্কা, লাগাও আরেকটা গুতো!' চারিদিক থেকে সমর্থনের চিৎকার উঠল।

শেষপর্যন্ত পাভেল তার আত্মসংযম হারাল এবং এসব ক্ষেত্রে বরাবরের মতোই তার করণীয়গুলোকে সে সুনির্দিষ্ট দ্রুতগতিতে করে গেল।

চিৎকার করে উঠল সে, 'বেজন্না ফাটকাবাজ যতসব, পার পেয়ে যাবি ভেবেছিস?' আর অতি সহজ তৎপরতার সঙ্গে ওপরের তাকে উঠে গিয়েই মোত্কার তেড়া-চোখো হেঁড়ে-মুখের ওপর ঝাড়ল একটা প্রচণ্ড ঘুসি। এত জোরে মেরেছিল ঘুসিটা যে ফাটকাবাজ লোকটা অন্য যাত্রীদের মাথার ওপর দিয়ে গড়িয়ে গিয়ে পড়ল।

'বেরো এখান থেকে, শুয়ার, নইলে গুলি করে মারব তোদের গোটা দলটাকে!' ওদের চারজনের নাকের সামনে পিস্তলটা বাগিয়ে ধরে চিৎকার করে উঠল পাভেল।

এবারে একেবারে উল্টে গেল অবস্থাটা, করচাগিনকে কেউ আক্রমণ করলেই রিতাও যাতে সঙ্গে সঙ্গে গুলি চালাতে পারে, তার জন্য তৈরি হয়ে সে ঘটনাটার ওপর সতর্ক নজর রেখেছে। ওপরের তাকটা দ্রুত খালি হয়ে গেল। ফাটকাবাজের দলটা তাড়াতাড়ি সবে পড়ল পাশের কামরাটায়।

ওপরের খালি তাকটায় রিতাকে উঠে যেতে সাহায্য করার সময় পাভেল ফিসফিসিয়ে বলল, 'তুমি থাকো এখানে, এই লোকগুলোর কী করা যায় একবার দেখে আসি।'

তাকে আটকাবার চেষ্টা করল রিতা, 'আবার ওদের সঙ্গে মারামারি করতে চললে নাকি?'

'না,' পাভেল আশ্বস্ত করল তাকে, 'এক্ষুনি আসছি।'

জ্ঞানলাটা আবার খুলে ফেলে সে তার ফাঁক গলিয়ে নেমে এল প্ল্যাটফর্মে। দু-এক মিনিটের মধ্যেই সে তার ভূতপূর্ব ওপরঅলা যানবাহন বিভাগের 'চেকা'র কর্তা বুর্মেইস্তের-এর সঙ্গে দেখা করল। লাভভিয়ার এই লোকটি তার সব কথা শোনার পর হুকুম দিল—গোটা গাড়িটা খালি করে দিয়ে যাত্রীদের কাগজপত্র পরীক্ষা করে নিতে হবে।

চাপা ক্রোধের সঙ্গে বুর্মেইস্তের বলল, 'আমিও ঠিক এই কথাই বলছিলাম। ট্রেনগুলো সব এই স্টেশনে এসে পৌছানোর আগে থেকেই ফাটকাবাজদের দলে বোঝাই হয়ে আসে।'

‘চেকা’র দশজন লোকের একটা দল গাড়িটাকে খালি করে দিল। পাভেল তার আগেকার কাজের দায়িত্ব নিয়ে যাত্রীদের কাগজপত্র পরীক্ষা করার কাজে সাহায্য করতে লাগল। সে তার আগেকার ‘চেকা’ কমরেডদের সঙ্গে সম্পর্কটা পুরোপুরি ছিন্ন করেনি। কমসমোলের সম্পাদক হিশেবে পাভেল সেখানকার শ্রেষ্ঠ কয়েকজন কর্মীকে এখানে কাজ করবার জন্য পাঠিয়েছিল। যাত্রীদের মধ্যে থেকে বাজে লোকদের বের করে দেবার পর পাভেল রিতার কাছে ফিরে এল। এবারে গাড়িটায় চেপে যারা চলেছে তারা সম্পূর্ণ অন্য ধরনের যাত্রিদল : লালফৌজের লোক আর অফিস-কামরানার কর্মী—যারা দরকারি কাজে চলেছে।

কামরার এককোণে ওপরের তাকে বসেছে রিতা আর পাভেল। খবরের কাগজের বাড়িলেই জায়গাটা এত জুড়ে গেছে যে শুধু রিতার শোবার মতো জায়গাটুকুই আছে।

‘ঠিক আছে,’ বলল রিতা, ‘কোনোরকমে কুলিয়ে নেব আমরা।’

শেষপর্যন্ত চলতে শুরু করেছে ট্রেনটা।

ধীরে ধীরে গাড়িটা স্টেশনের বাইরে গড়িয়ে চলেছে, এমন সময়ে দু-এক মুহূর্তের জন্য ওরা দু’জনে দেখতে পেল—প্র্যাটফর্মে একগাদা বস্তার ওপরে সেই মোটা স্ত্রীলোকটি বসে রয়েছে। তার চোঁচানি ওদের কানে গেল, ‘ওরে, মানকা, আমার তেলের টিনটা গেল কোথায়?’

কোণঠাসা হয়ে জায়গাটুকুর মধ্যে বসেছে পাভেল আর রিতা। খবরের কাগজের বাড়িলগুলো ওদের আড়াল করেছে অন্যান্য সহযাত্রীদের দৃষ্টি থেকে। আপেল আর কুটির টুকরো চিবুতে চিবুতে ওরা ওদের যাত্রারস্ত্রের ঘটনাটা বলাবলি করছে আর হাসছে—যদিও ঘটনাটা মোটেই হাস্যকর নয়।

গড়িয়ে গড়িয়ে চলেছে ট্রেনটা। যতটা বইতে পারা সম্ভব তার চেয়ে ঢের বেশি যাত্রীবোঝাই হয়ে পুরনো, জীর্ণ কামরাগুলো ক্যাচক্যাচ শব্দে আর্তনাদ তুলছে আর রেলের প্রত্যেকটি জোড়ের মুখে একবার করে ভয়ানকভাবে কেঁপে উঠছে। কামরার মধ্যে গোধূলির ঘন নীল আলো নামল জানলার ফাঁকে। তারপর রাত্রি এসে অন্ধকারে ঢেকে দিল গাড়িটাকে।

ক্রান্ত হয়ে পড়েছিল রিতা। ব্যাগটার ওপরে মাথা রেখে ঝিমুচ্ছে সে। তাকটার ধারে বসে পাভেল সিগারেট খাচ্ছে। সে-ও ক্রান্ত, কিন্তু শোবার জায়গা নেই। খোলা জানলা দিয়ে রাত্রির তাজা হাওয়া ঢুকছে। হঠাৎ একটা ঝাঁকুনিতে রিতা জেগে উঠে অন্ধকারে পাভেলের সিগারেটের লাল আভা দেখতে পেল। বুঝল, এমনই তার স্বভাব—ওর অসুবিধে ঘটানোর চেয়ে সে বরং গোটা রাত বসেই কাটাবে।

হালকা স্বরে ও বলল, ‘কমরেড করচাগিন, ওসব বুর্জোয়া রীতি ছেড়ে শুয়ে পড়ো।’

বাধ্যভাবে পাভেল ওর পাশে শুয়ে পড়ে আরাম করে তার ধরে-ওঠা পা-দুটো বিছিয়ে দিল।

‘কাল অনেক কাজ আছে আমাদের। সুতরাং ঘুমিয়ে নেবার চেষ্টা করো খানিকটা—ডানপিটে কোথাকার!’ বন্ধুভাবে রিতা ওর গলা জড়িয়ে ধরল। পাভেল নিজের গালের ওপরে অনুভব করল রিতার চুলের স্পর্শ।

পাভেলের কাছে রিতা অতি পবিত্র। পাভেলের সে বন্ধু, কমরেড, রাজনীতিক শিক্ষক। কিন্তু আবার সে নারীও বটে। এ-সম্বন্ধে পাভেল প্রথম সচেতন হয়ে ওঠে সেই

রেল-পুলটার কাছে এবং এইজন্যই রিতার বাহুবন্ধন তাকে এখন এতটা আলোড়িত করে তুলেছে। রিতার গভীর আর নিয়মিত নিশ্বাস অনুভব করছে পাভেল। তার খুব কাছাকাছি এক জায়গায় রিতার ঠোটদুটি। এই নৈকট্য তার মনে একটা তীব্র কামনা জাগাল সেই ঠোটদুটির স্পর্শ পাবার জন্য। প্রাণপণ চেষ্টায় ঝোকটাকে দমন করল সে।

অন্ধকারের মধ্যে মৃদু হাসল রিতা, যেন পাভেলের মনোভাবকে আন্দাজ করেই। প্রেমের আবেগভরা আনন্দ আর বিচ্ছেদের বেদনা—এই দুইয়েরই অভিজ্ঞতা তার ইতিমধ্যেই হয়েছে। দু'জন বলশেভিককে সে ভালোবেসেছে। শ্বেতরক্ষীদের গুলি এসে সেই দু'জনকেই ছিনিয়ে নিয়েছে তার কাছ থেকে। এদের মধ্যে একজন ছিল বিরাট-দেহ সাহসভরা সুপুরুষ, একটা ব্রিগেডের কমান্ডার; অপরজন উজ্জ্বল নীল-চোখ একটি তরুণ।

চাকার নিয়মিত ছন্দের দোলায় পাভেল অল্পক্ষণের মধ্যেই ঘুমিয়ে পড়ল। পরের দিন সকালে ইঞ্জিনের তীব্র সিটিটা না-বেজে-ওঠা পর্যন্ত তার ঘুম ভাঙল না।

\*

\*

\*

প্রতিদিনই গভীর রাত্রি পর্যন্ত কাজে ব্যস্ত থাকতে হয় রিতাকে, তাই রোজনামচা লেখার প্রায় সময়ই পায় না সে। কিছুদিন বাদ যাবার পর আরও কতকগুলো ছোট ছোট লেখা দেখা গেল তার রোজনামচার পাতায় :

### ১১ অগস্ট

প্রাদেশিক সম্মেলন শেষ হয়েছে। আকিম, মিখাইলো এবং আরও জনকতক খারকভে গেছে সারা ইউক্রেন সম্মেলনে—আমার ওপরে লেখালেখির কাজের ভারগুলো সব দিয়ে গেছে। প্রাদেশিক কমিটিতে কাজ করার জন্য দু'ভাষা আর পাভেলকে পাঠানো হয়েছে। দমিত্রিকে পেচোর্স জেলার কমসমোল কমিটির সম্পাদক করে দেবার পর থেকে তার পড়াশোনার ক্লাসে আসা বন্ধ হয়ে গেছে। একগাদা কাজের মধ্যে ডুবে গেছে সে। পাভেল খানিকটা পড়াশোনা করবার চেষ্টা করে বটে, কিন্তু বিশেষ কিছু করে উঠতে পারছি না আমরা, কারণ, হয় আমি ভয়ানক ব্যস্ত থাকি, আর নাইয় তাকে কোনো-একটা কাজের দায়িত্ব দিয়ে কোথাও পাঠানো হয়। রেলপথের অবস্থাটায় ইদানীং এমন সংকট দেখা দিয়েছে যে কমসমোলের কর্মীদের সেখানে কাজ করার জন্য অনবরত দলে-দলে নিয়ে নেওয়া হচ্ছে। ঝার্কি কাল আমার সঙ্গে দেখা করতে এসেছিল। কমসমোলের ছেলেরদের অন্য কাজে নিয়ে নেওয়া হচ্ছে বলে সে অভিযোগ করছিল। বলছিল, তাদের নিজেদের কাজের জন্য ওদের ভীষণ দরকার।

### ২৩ অগস্ট

আজ যখন বারান্দাটা দিয়ে যাচ্ছিলাম, তখন দেখতে পেলাম—ম্যানেজারের দপ্তরের বাইরে পানক্রাতভ আর আরেকজন লোকের সঙ্গে পাভেল দাঁড়িয়ে আছে। আরেকটি কাছাকাছি আসতেই গুনলাম, পাভেল বলছে, 'ওখানে বসা লোকগুলোকে গুলি করা উচিত। লোকটা বলে কিনা—'আমাদের হুকুম ব্যতিল করে দেবার কোনো অধিকার তোমাদের নেই, রেলওয়ের জ্বালানিকাঠ-সংগ্রহকারী কমিটিই হচ্ছে এখানকার কর্তা,



এ-ব্যাপারের মধ্যে কমসময়ের না-আসাই ভালো।—লোকটার আশ্পর্ধাটা যদি দেখতে একবার! ... গোটা জায়গাটাই এই এদেরই মতো সব পরগাছায় ভর্তি!’ অত্যন্ত কুর্ষসিত একটা কথা বলে সে তার বক্তব্য শেষ করল। পানক্রান্তভ আমাকে দেখতে পেয়ে ওর গা টিপল। ঘুরে দাঁড়িয়ে পাভেল আমাকে দেখেই বিবর্ণ-মুখে আমার সঙ্গে চোখাচোখি না-করেই চলে গেল। এখন আর ও বেশ কিছুদিন আমার কাছে ঘেঁষবে না। ও জানে, খারাপ কথা আমি সহ্য করব না।

২৭ অগস্ট

আমাদের ব্যারো-সভাদের একটা আলোচনা-বৈঠক হয়েছে। অবস্থাটা ক্রমশই খুব গুরুতর হয়ে উঠছে। এখনই আমি খুব বিশদভাবে সব লিখে উঠতে পারছি না। জেলা সম্মেলন থেকে আকিম ফিরে এসেছে। দেখে মনে হল ও খুবই দুশ্চিন্তাম্বিত। গতকাল আরেকখানা মাল-সরবরাহের গাড়ি লাইনচ্যুত হয়েছে। এই রোজনামচা লিখে রাখার চেষ্টা আর করে উঠতে পারব বলে আমার মনে হচ্ছে না। এমনতেই এটা বেশ খানিকটা এলোমেলো হয়ে পড়েছে। আমি করচাগিনের আসার অপেক্ষায় আছি। সেদিন ওর সঙ্গে আমার দেখা হয়েছিল—ও আর ঝারকি একটি পাঁচজনের কমিউন সংগঠিত করে তুলছে।

\*

\*

\*

একদিন রেল-কারখানায় কাজ করার সময়ে টেলিফোনে পাভেলের ডাক এল। রিতা ডাকছে। সেদিন সন্দের দিকে ওর কোনো কাজ নেই, তাই ও প্রস্তাব করছে—প্যারিস কমিউনের পরাজয়ের কারণ সম্বন্ধে তারা যে-অধ্যায়টা পড়া শুরু করেছিল, সেটা শেষ করে ফেলবে।

ইউনিভার্সিটি স্ট্রিটে রিতার বাড়ির কাছাকাছি এসে পাভেল ওপরের দিকে তাকিয়ে তার জানলায় আলো দেখতে পেল। ওপরে দ্রুত উঠে এসে সে বরাবরের মতো দরজায় একটু ঘুসি মেরে আওয়াজ করে উত্তরের অপেক্ষায় না-থেকে ভেতরে ঢুকে পড়ল।

ঘরের মধ্যে বিছানাটার ওপরে—যে-বিছানায় কোনো তরুণ কমরেডকে মুহূর্তের জন্যও বসতে পর্যন্ত দেওয়া হত না—ভয়ে আছে একজন সৈনিকের উর্দি-পরা লোক। টেবিলের ওপরে একটা পিস্তল, ন্যাপস্যাক আর একটা লাল তারকা-চিহ্নিত টুপি। পাভেলের অপরিচিত এই লোকটাকে নিবিড়ভাবে দুই হাতে জড়িয়ে ধরে পাশে বসে আছে রিতা। ঘনিষ্ঠ আলাপে ব্যস্ত ওরা দু’জন, এমন সময় পাভেল ঢুকতেই রিতা উজ্জ্বল-মুখে তাকাল তার দিকে।

রিতার বাহুবন্ধন থেকে নিজেকে ছাড়িয়ে নিয়ে উঠল লোকটি।

পাভেলের সঙ্গে করমর্দন করে রিতা বলল, ‘পাভেল, এই হচ্ছে ...’

‘দাভিদ উস্তিনোভিচ,’ বলল লোকটি পাভেলের হাত সজোরে চেপে ধরে।

খুশির হাসি হেসে রিতা বলল, ‘বেশ একটু অপ্রত্যাশিতাবেই এসে পড়েছে ও।’

পাভেল নিষ্পৃহভাবে এই আগন্তুকটির সঙ্গে করমর্দন করল, তার চোখে একটা অপমানের ঝিলিক খেলে গেল। লোকটির কোর্টার হাতার ওপরে পর-পর চারটে পটি বসানো চিহ্ন লক্ষ করল সে—কম্পানি অধিনায়কের চিহ্ন এটা।

রিতা কিছু বলতে যাবে, এমন সময় পাভেল তাকে বাধা দিল, 'আমি তোমাকে বলতে এসেছিলাম—আজ সন্ধ্যায় জাহাজঘাটায় আমি কাঠবোঝাই করার কাজে ব্যস্ত থাকব। আমার জন্যে তোমার অপেক্ষা করার দরকার নেই। তাছাড়া, তোমার কাছেও তো একজন অতিথিও আছেন দেখছি। আচ্ছা, চলি তাহলে। ছেলেরা আমার জন্যে নিচে অপেক্ষা করছে।'।

বলেই, যেমন হঠাৎ সে এসে পড়েছিল তেমনি আবার হঠাৎ সে বেরিয়ে গেল। এরা ওর সিঁড়ি বেয়ে তাড়াতাড়ি নিচে নামার শব্দ শুনতে পেল। তারপরে বাইরের দরজা সশব্দে বন্ধ হয়ে গিয়ে সব আবার নিস্তব্ধ হয়ে গেল।

দাভিদের সপ্তশ্রু চোখের দিকে তাকিয়ে উত্তরে রিতা ইতস্তত করে বলল, 'কী যেন একটা কিছু হয়েছে ওর।'।

... পুলটার নিচে ওখানে একটা রেল-ইঞ্জিন গভীর দীর্ঘনিশ্বাস ছেড়ে তার বিরাট বলিষ্ঠ ফুসফুসের ভেতর থেকে বের করে দিলে একঝাঁক সোনালি আগুনের ফুলকি। অদ্ভুত আর অপরূপ নাচের ভঙ্গিতে ফুলকিগুলো হাওয়ায় ভেসে ওপরে উঠে গিয়ে ধোঁয়ায় মিলিয়ে গেল।

রেলিংটার গায়ে ভর দিয়ে দাঁড়িয়ে পাভেল তাকিয়ে রইল রেল-পয়েন্টের ওপর সিগন্যালের রঙিন আলোগুলোর মিটমিটানির দিকে। চোখ কুঁচকে তাকিয়ে নিজের সঙ্গে মনে-মনে কথা বলতে লাগল সে।

'এইটে তো কিছুতেই বুঝতে পারছি না, কমরেড করচাগিন, যে রিতার স্বামী আছে আবিষ্কার করে তুমি এত আঘাত পেলে কেন? স্বামী নেই এমন কথা সে কি তোমায় বলেছিল কখনও? আর বললেই বা, তোমার তাতে কী? এভাবে নিচ্ছ কেন ব্যাপারটাকে? তুমি ভেবেছিলে, কমরেড, যে তোমাদের মধ্যে সম্পর্কটা একটা সম্পূর্ণ কামনাহীন আদর্শ বন্ধুত্ব ছাড়া আর কিছু নয় .... এরকম ধারণাটা গড়ে উঠতে দিলে কী করে?' নিজেকে তীব্র ব্যঙ্গ করে বলে উঠল সে মনে-মনে, 'কিন্তু ও যদি রিতার স্বামী না হয়? দাভিদ উস্তিনোভিচ ওর ভাই বা কাকা হতে পারে .... সেক্ষেত্রে তুমি লোকটার প্রতি অবিচার করেছ—আহাম্মক কোথাকার! অন্য যে-কোনো মরদের চেয়ে তুমি ভালো কিসে? লোকটা ওর ভাই কিনা জানাটা খুবই সহজ। মনে করো, লোকটিকে শেষপর্যন্ত ওর ভাই বা কাকা বলে জানা গেল, তখন এই ব্যবহারের পর তুমি রিতার সামনে দাঁড়াবে কোন মুখে? না, ওর সঙ্গে দেখাশোনা বন্ধ করতেই হবে তোমায়!'

ইঞ্জিনের একটা তীব্র সিটির আওয়াজ এসে বাধা দিল তার চিন্তায়।

'দেরি হয়ে যাচ্ছে। বাড়ি ফেরার সময় হল। যথেষ্ট হয়েছে এইসব বাজে চিন্তা!'

\*

\*

\*

রেল-শ্রমিকরা যেখানে থাকে, সেই অঞ্চলটাকে বলা হয় সলোমেন্কা। এখানে পাঁচজন তরুণ মিলে একটা খুদে কমিউন গড়েছে। এরা হচ্ছে ঝারকি, পাভেল, ক্লাভিচেক নামে একজন হাসিখুশি সোনালি-চুলওয়ালা চেক্‌ ছেলে, রেল-কারখানার কমসমোল সম্পাদক নিকোলাই ওকুনেভ, আর স্তেপান আরতিউখিন নামে একজন বয়লার-মেরামতি মিস্ত্রি যে ইদানীং রেলওয়ে-‘চেকা’য় কাজ করছে।

একখানা ঘর জোগাড় করে নিয়েছে তারা। তিনদিন ধরে সমস্ত অবসরের সময়টুকু তারা ঝাড়পোছ করে, চুনকাম করে ঘরটা সাজিয়ে কাটিয়েছে। বালতি নিয়ে তারা এতবার দৌড়াদৌড়ি করেছে যে পড়শীরা ভাবতে শুরু করেছিল যে বাড়িটায় আগুনই লেগে গেছে বুঝি। নিজেদের জন্য শোবার খাট বানিয়ে নিল ওরা, পার্ক থেকে ম্যাপল গাছের পাতা কুড়িয়ে তাই ভর্তি করে তোশক তৈরি করে নিল। তারপর চতুর্থ দিনে দেয়ালে লটকানো পেত্রভক্তির একটা ছবি আর বিরাট একটা মানচিত্রে সজ্জিত হয়ে ঘরটা একেবারে আক্ষরিক অর্থেই পরিচ্ছন্নতায় ঝকঝক করতে লাগল।

জানলাদুটোর ফাঁকে একটা তাক উঁচু করে বইয়ের সারিতে সাজানো। দুটো কাঠের বাক্সের ওপর কার্ডবোর্ড বসিয়ে নিয়ে চেয়ারের কাজ চালিয়ে নেওয়া হচ্ছে। আরেকটু বড় আরেকটা বাক্স দেয়াল-আলমারি হিশেবে কাজে লাগছে। ঘরের মাঝখানে বিলিয়ার্ড খেলার একটা বিরাট টেবিল—তার ওপরকার বনাতটা নেই। ঘরের বাসিন্দারা এটাকে নিজেদের কাঁধে চাপিয়ে বয়ে এনেছে মালগুদাম থেকে। দিনের বেলায় এটা টেবিল হিশেবে ব্যবহৃত হয়, রাতে ক্লাভিচেक এটার ওপরে শোয়। এই পাঁচটি ছেলের প্রত্যেকেই নিজের নিজের যা-কিছু জিনিশপত্র সব নিয়ে এল। গৃহস্থালির বুদ্ধিসম্পন্ন ক্লাভিচেक এইসব কমিউনের জিনিশপত্রের একটা ফর্দ বানিয়ে ফেলেছে। সে ফর্দটাকে দেয়ালে টাঙিয়ে দিতে চেয়েছিল, কিন্তু অন্যেরা তাতে আপত্তি জানাল। ঘরের সমস্ত জিনিশপত্র পাঁচজনের সাধারণ সম্পত্তি বলে ঘোষণা করা হল। রোজগার, রেশন এবং বাড়ি থেকে মাঝে মাঝে যেসব জিনিশ আসে—সবই সমান ভাগে ভাগ হয়ে যায়। একমাত্র ব্যক্তিগত সম্পত্তি বলতে যার-যার অস্ত্র। সর্বসম্মতভাবে স্থির হল : কমিউনের কোনো সভ্য যদি সাধারণ-মালিকানার নিয়ম ভেঙে তার কমরেডদের প্রতি বিশ্বাসঘাতকতা করে, তাহলে সে কমিউন থেকে বিতাড়িত হবে। ওকুনেভ আর ক্লাভিচেক দাবি করল : কমিউন থেকে বের করে দেবার সঙ্গে সঙ্গে তাকে ঘরও ছেড়ে চলে যেতে হবে। এই প্রস্তাবও গৃহীত হল।

জেলা কমসমোলের সমস্ত সক্রিয় সভ্য এই কমিউনের গৃহপ্রবেশ অনুষ্ঠানে যোগ দিল। পাশের বাড়ির পড়শীর কাছ থেকে বিরাট একটা সামোভার ধার করে আনা হল। এদের চা-খাওয়ানো উপলক্ষে কমিউনের মজুত স্যাকারিনের সবটাই খরচ হয়ে গেল। চা-পানের পর তারা সবাই একসঙ্গে গান ধরল—বলিষ্ঠ তরুণ গলার আওয়াজে কেঁপে উঠল ঘরের কড়ি-বরগা :

চোখের জলে ভুবেছে এই তামাম দুনিয়াটা,  
কী নিদারুণ মেহনতে দিন আমাদের কাটে।  
কিন্তু এবার, দেরি নেই, দীর্ঘ ভোরের ছটা  
উঠছে কুটে...

তালিয়া লাগুতিনা এই সমবেত-সংগীত পরিচালনা করছিল। তামাক-কারখানায় কাজ করে মেয়েটা। তার মাথায় জড়ানো লাল রুমালটা একপাশে হেলে পড়েছে, দুইমিতে ভরা তার চোখদুটো নাচছে—সে চোখের গভীরতার মাপ এ-পর্যন্ত কেউ নেয়নি। তালিয়ার হাসিটা অত্যন্ত সংক্রামক, দুনিয়াটাকে সে দেখে তার আঠারো বছর বয়সের

উজ্জ্বল চূড়া থেকে। বাহুদুটো তার ওপর দিকে দৃষ্টভঙ্গিতে উঠে গেছে, গানের সুর বেরিয়ে আসছে যেন একসঙ্গে অনেকগুলো তুরীভেরী বাজছে :

যাক ছড়িয়ে বিশ্বজুড়ে বন্যাসম বেগে  
এ গান মোদের—গর্বভরে উড়ছে রে নিশান,  
আমাদেরই কলিজার এই খুনের রঙে লাল,  
দুনিয়া জুড়ে জ্বলছে যে ওই ঝাণ্ডা খরশাল...

অনেক রাতে মজলিশ শেষ হল। ছেলেমেয়েদের সতেজ তরুণ গলার আওয়াজের প্রতিধ্বনিতে জেগে উঠল নিস্তরঙ্গ রাস্তাগুলো।

\*

\*

\*

টেলিফোনটা বেজে উঠতে ঝার্কি রিসিভারটা তুলে নিল। সম্পাদকের দপ্তরে জমায়েত একদল কমসমোল সভ্য চেষ্টামেচি করছিল, তাদের উদ্দেশ্যে চিৎকার করে বলল সে, 'চুপ করো, কিছু শুনতে পাচ্ছি না!'

গোলমালটা একটু কমে এল।

'হ্যালো! ও, তুমি। হ্যাঁ, এক্ষুনি। আলোচনার বিষয়টা কী? ও, সেই পুরনো ব্যাপার—জাহাজঘাটা থেকে জ্বালানিকাঠ বয়ে আনা। কী বলছ? না, ওকে কোথাও পাঠানো হয়নি। এখানেই আছে। ওর সঙ্গে কথা বলতে চাও? আচ্ছা, একটু ধরো।'

ঝার্কি পাভেলকে ইশারায় ডাকল।

'কমরেড উস্তিনোভিচ তোমার সঙ্গে কথা বলতে চায়,' রিসিভারটা ওর হাতে দিয়ে বলল সে।

পাভেল শুনল রিতার গলা, 'ভেবেছিলাম তুমি শহরের বাইরে গেছ বুঝি। আজ সন্ধ্যায় আমার কোনো কাজ নেই। এসো না একবার? আমার ভাই চলে গেছে। এই শহর দিয়ে যাচ্ছিল সে, আমার সঙ্গে একবার দেখা করে যাবে বলে ঠিক করেছিল। দু-বছরের মধ্যে আমাদের দেখা হয়নি।'

রিতার ভাই!

আর কিছু কানে ঢুকল না পাভেলের। সেদিনের সন্ধ্যার বিশ্রী ঘটনাটার কথা আর সেই রাতে রেল-পুলের ধারে সে যে প্রতিজ্ঞা করেছিল সে-কথা মনে পড়ছিল। হ্যাঁ, আজ সন্ধ্যাতেই রিতার কাছে গিয়ে সে সমস্ত ব্যাপারটা চুকিয়ে ফেলবে। ভালোবাসা সঙ্গে করে আনে নিদারুণ বেদনা আর উদ্বেগ। এখন কি আর ওসবের মধ্যে যাওয়ার সময়?

রিতার স্বর তার কানে এল, 'শুনতে পাচ্ছ না আমার কথা?'

'হ্যাঁ, হ্যাঁ, শুনতে পাচ্ছি। ঠিক আছে। আমি ব্যুরোর মিটিংটার শেষে যাব।'

রিসিভারটা রেখে দিল সে।

\*

\*

\*

সরাসরি রিতার চোখের দিকে তাকিয়ে, ওক-কাঠের টেবিলের ধারটা চেপে ধরে সে বলল, 'তোমার সঙ্গে আর দেখা করার জন্যে আসতে পারব বলে মনে হয় না।'

পাভেল দেখতে পেল, তার এই কথা শুনে রিতার চোখের ঘন পল্লব উঠে এল ওপরের দিকে। কাগজের ওপরে তার পেন্সিলটা চলতে চলতে ইতস্তত করে থেমে গেল খোলা খাতাটার বুকে।

‘কেন?’

‘আমার পক্ষে সময় পাওয়া খুব মুশকিল হয়ে দাঁড়াচ্ছে। তুমি তো জানোই, সময়টা আমাদের এখন বড় সুবিধের যাচ্ছে না। আমি দুঃখিত, কিন্তু আমাদের এটা এখন বন্ধ করে দিতে হবে...’

সে অনুভব করল তার শেষ কথাগুলো যথেষ্ট স্থির-নিশ্চিত মতো শোনাচ্ছে না।

মনের মধ্যে একটা ক্রোধ জমে উঠছিল পাভেলের, ‘আসল কথাটা এড়িয়ে গিয়ে এভাবে ঘুরিয়ে-ফিরিয়ে বলা কেন? সরাসরি স্পষ্ট করে ফয়সালা করে ফেলার মতো সাহস তোমার নেই!’

জৈদের সঙ্গে সে বলে চলল, ‘তাছাড়া, আমি তোমাকে কিছুদিন থেকেই বলতে চাচ্ছিলাম—তোমার ব্যাখ্যাগুলো ঠিকমতো বুঝে নিতে আমার অসুবিধে হচ্ছে। সেগালের কাছে যখন আমি পড়তাম, তখন যা শিখতাম সেটা আমার মাথার মধ্যে থেকে যেত। কিন্তু তোমার কাছে পড়ে তা থাকে না। তোমার পড়ানোর পরে আমাকে প্রত্যেকবারই তোকারেভের কাছে গিয়ে আরেকবার সব ঠিকমতো বুঝে নিতে হয়। আমারই দোষ এটা—আমার ভোঁতা বুদ্ধি ঠিকমতো নিতে পারে না তোমার সব কথা। আরেকটু মাথাঅলা কোনো ছাত্র তোমায় বুঝে নিতে হবে।’

রিতার সুতীক্ষ্ণ দৃষ্টি থেকে মুখ ঘুরিয়ে নিয়ে পাভেল রিতার সঙ্গে ইচ্ছে করেই সমস্ত যোগসূত্রগুলো ছিন্ন করে দিয়ে গৌয়ারের মতো বলল, ‘দেখতেই তো পাচ্ছ, এভাবে চালিয়ে গেলে আমাদের পক্ষে শুধু সময় নষ্ট করাই হবে।’

তারপরে উঠে দাঁড়িয়ে সে চেয়ারটা সাবধানে পা দিয়ে পাশে ঠেলে দিল। রিতার নুয়ে-পড়া মাথা আর মুখটার দিকে তাকাল পাভেল—বাতির আলোয় বিবর্ণ দেখাচ্ছে মুখখানা। টুপিটা মাথায় দিল সে।

‘আচ্ছা, বিদায়, কমরেড রিতা। এতদিন ধরে তোমার সময় নষ্ট করেছি বলে আমি দুঃখিত। এর অনেক আগেই আমার কথাটা বলা উচিত ছিল তোমাকে। এইটেই আমার দোষ হয়ে গেছে।’

রিতা যান্ত্রিকভাবে তার হাতখানা এগিয়ে দিল পাভেলের দিকে, কিন্তু পাভেলের এই আকস্মিক নিস্পৃহতায় সে এত স্তম্ভিত হয়েছে যে, সামান্য কয়েকটা কথা ছাড়া বেশি কিছু আর সে বলতে পারল না, ‘তোমায় দোষ দেব না, পাভেল। পরিষ্কার করে বুঝিয়ে বলার কোনো উপায় যদি আমি বের করতে না-পেরে থাকি, তাহলে দোষটা তো আমারই।’

ভারী পায়ে দরজার দিকে এগিয়ে এল পাভেল। বেরিয়ে এসে আঙুল করে বন্ধ করে দিল দরজাটা। নিচে এসে একমুহূর্ত দাঁড়াল—ফিরে গিয়ে সবকিছু খোলসা করে বলার সময় এখনও বয়ে যায়নি...কিন্তু কী লাভ? কিসের জন্য? রিতার ঘৃণাভরা জবাব ফের বেরিয়ে আসার জন্য? না।

\*

\*

\*

রেলগুয়ে সাইডিং ভাঙাচোরা রেলগাড়ি আর অকর্মণ্য ইঞ্জিনের কবরখানা হয়ে উঠেছে। বাতাসের ঘূর্ণি এসে ছড়িয়ে ছিটিয়ে দিচ্ছে ফাঁকা জ্বালানিকাঠ ওদামের শুকনো

কাঠের গুঁড়োগুলো ।

শহরটার চারিধারে বনের ঝোপেঝাড়ে আর খাদে-খন্দে গুর্লিক-এর দস্যুদলের লোকজন গুঁৎ পেতে আছে । দিনের বেলায় এরা আশেপাশের গ্রামগুলো কিংবা বনের মধ্যে এখানে-ওখানে লুকিয়ে থাকে, আর রাত্রিবেলায় গুঁড়ি মেরে এগিয়ে আসে রেলপথের ওপরে, লাইন উপড়ে ফেলে দেয় বেপরোয়াভাবে, তারপরে সেই শয়তানির শেষে গুঁড়ি মেরে ফিরে যায় তাদের ঘাঁটিগুলোয় ।

রেলপথের এই উঁচুপাড় বেয়ে গড়িয়ে পড়ে ধ্বংস হয়ে গেছে অনেকগুলি ইঞ্জিন । কামরাগাড়িগুলো ভেঙে পড়ে গুঁড়িয়ে গেছে । তাদের ধ্বংসাবশেষের নিচে চাপা পড়ে ঘুমন্ত মানুষের দল চাপাটির মতো চেন্টে গেছে, বহুমূল্য খাদ্যশস্য রক্তে কাদায় মাখামাখি হয়ে গেছে ।

দস্যুদলটা হঠাৎ এসে ঝাঁপিয়ে পড়ে কোনো ছোটখাটো শহরের মধ্যে, ভয়-পাওয়া মুরগিগুলো ডাক ছেড়ে ছড়িয়ে পড়ে চারিধারে । কয়েকটা গুলি ছুড়ে দেয় ওরা যদিও-সেদিকে । জেলা সোভিয়েতের বাড়ির বাইরে সামান্য কিছুক্ষণ রাইফেল-ছোড়ার আওয়াজ শোনা যায়—শব্দটা পায়ের নিচে শুকনো সরু গাছের ডাল মাড়িয়ে চলার চড়চড়ে আওয়াজের মতো । তারপরে ডাকাতরা তাদের হস্তপুষ্ট ঘোড়াগুলোয় চেপে সবগে ছুটে চলে গ্রামের মধ্যে দিয়ে, সামনে যাকে পায় তাকেই কেটে ফেলে । মানুষের ওপরে তারা এমন শাস্তভাবে কোপ বসায় যেন কাঠ চিরছে । গুলি ছোড়ে খুব কম, কারণ বুলেট দুশ্পাণ্য ।

দলটা যেমন দ্রুত আসে, তেমনি দ্রুত চলেও যায় । সর্বত্র ডাকাতদের চোখ আর কান কাজ করে চলেছে । জেলা সোভিয়েতের ছোট শাদা বাড়িটার দেয়াল ভেদ করে সেইসব চোখ দেখতে পায় পাদরির বাড়ি আর কুলাকদের বামারবাড়িগুলো—সেখান থেকে একটা অদৃশ্য সুতো চলে গেছে বনের ঝোপঝাড়গুলোর দিকে । অস্ত্রশস্ত্রের বাস্তব, টাটকা মাংসের টুকরো, নীলচে রঙের নির্জলা মদের বোতল ইত্যাদিও চালান হয়ে যায় সেই একই দিকে । ছোটখাটো আত্মমানদের কানে-কানে ফিসফিসিয়ে বলা খবরাখবরও চলে যায়, আর তাদের কাছ থেকে প্যাঁচালো পথে সেটা গিয়ে পৌছোয় স্বয়ং গুর্লিকের কাছে ।

যদিও দলটায় দু-তিনশোর বেশি বোম্বটে নেই, তবু তারা এতদিন ধরে ধরাপড়ার হাত এড়িয়েছে । কতকগুলো ছোট ছোট দলে ভাগ হয়ে গিয়ে এরা একই সঙ্গে দু-তিনটে অঞ্চলে কাজ চালায় । ওদের সবাইকে ধরা অসম্ভব । আগের রাত্রের ডাকাতটাকে হয়তো পরদিন সকালে দেখা যাবে নির্বিরোধী একজন চাষী—ক্ষত-বাগানে এটা-ওটা কাজে বাস্তব, ঘোড়াটাকে ঝাওয়াচ্ছে কিংবা দিব্যি পাইপ ফুকতে ফুকতে বেড়ার সামনে দাঁড়িয়ে ঝাপসা দৃষ্টিতে তাকিয়ে আছে টহলদার ঘোড়সওয়ার-দলের ঘোড়া হাঁকিয়ে যাওয়ার দিকে ।

আলেক্সান্দর পুজিরেভস্কি এই তিনটি অঞ্চলে তাঁর রেজিমেন্টের সঙ্গে নাছোড়বান্দার জেদ নিয়ে অবিশ্রাম তাড়া করে ফিরছেন ডাকাতদলটাকে । মাঝে মাঝে তিনি তাদের লেজের ঘা দিতে সমর্থ হয়েছেন; একমাস বাদে গুর্লিক দুটো অঞ্চল থেকে তার গুণদলকে সরিয়ে নিতে বাধ্য হয়েছে । ইদানীং সে সংকীর্ণ একফালি জায়গার মধ্যে কোণঠাসা হয়ে পড়েছে ।

শহরের জীবন চিরাচরিত টিমে চালে বয়ে চলেছে। এখানকার পাঁচটি বাজারে কোলাহলরত জনতা জমে ওঠে। এই প্রচণ্ড ভিড়ের মধ্যে দুটো দিকে প্রবণতা সবচেয়ে বেশি স্পষ্ট হয়ে উঠতে দেখা যায় : যতটা বেশি পারা যায় হাতিয়ে নেওয়া, আর যতটা কম দিতে পারা যায়। যত রকমের সব ঠক আর জোক্তোর তাদের উদ্যম আর যোগ্যতাকে খাটিয়ে নেবার অজস্র সুযোগ পায় এই পরিবেশে। ভিড়ের মধ্যে ওঁৎ পেতে ঘুরে বেড়ায় শত শত সন্দেহজনক চরিত্রের লোক যাদের চোখের দৃষ্টিতে প্রকাশ পায় সততা ছাড়া আর সবকিছু। গোবরগাদায় মাছির মতো এসে জড়ো হয় এখানে শহরের যত বদমায়েশ লোক একটা মাত্র উদ্দেশ্য নিয়ে : নিরীহ শাদাসিধে লোকদের ঠকানো। যে-সামান্য কয়েকটা ট্রেন আসে, তাদের ভেতর থেকে বেরিয়ে পড়ে দলে-দলে বস্তা-কাঁধে লোক—এরা তৎক্ষণাৎ সোজা বাজারমুখো রওনা দেয়।

রাত্রে যখন বাজার-অঞ্চলটা নির্জন হয়ে পড়ে তখন অন্ধকার দোকানঘরের সারিগুলো বীভৎস আর বিদ্যুটে দেখায়।

এই জনহীন অঞ্চলটায়, যেখানে প্রত্যেকটি দোকানঘরের পেছনে বিপদ রয়েছে ওঁৎ পেতে, সেখানে অন্ধকার নামার পর যে-কোনো সাহসী লোকও যাবার ঝুঁকি নেবে না। প্রায়ই রাত্রিবেলায় গুলি ছোড়ার আওয়াজ ওঠে লোহার ওপর হাতুড়ির আঘাত এসে পড়ার মতো শব্দ তুলে, আর দেখা যায় হয়তো কোনো মানুষের কণ্ঠ রুদ্ধ হয়ে যায় তার নিজেরই চাপ-চাপ রক্তে। সবচেয়ে কাছাকাছি জায়গাগুলো থেকে জনকতক মিলিশিয়ার লোক (তারা একা এদিকে আসতে সাহস করে না) এখানে এসে পড়তে পড়তে দুমড়ানো বিকৃত মৃতদেহটা ছাড়া আর কিছুই দেখতে পায় না। স্থানীরা ততক্ষণে পালিয়ে গেছে, আর বাজার-চত্বরের নিয়মিত রাত্রির বাসিন্দা লোক সেই গোলমালের মধ্যে এক-দমক হাওয়ার মতো উড়ে গেছে।

বাজারের সামনেই 'ওয়ারিয়ন' সিনেমা। রাস্তা আর চত্বরটা বৈদ্যুতিক আলোয় উজ্জ্বল। প্রবেশপথে জনতা ভিড় জমিয়ে তোলে।

হলের ভেতরে সিনেমার প্রজেক্টর-যন্ত্রটা মৃদু আওয়াজের সঙ্গে সঙ্গে পর্দার ওপরে ফুটিয়ে তোলে হতাশ প্রেমিকদের খুনোখুনি। মাঝে মাঝে ফিল্ম কেটে যায়, দর্শকরা আপত্তি জানিয়ে চিৎকার করে। শহরতলীতে আর শহরের কেন্দ্রে জীবন তার স্বাভাবিক গতিতেই চলেছে বলে মনে হয়। এমনকি বিপ্লবী-কর্তৃত্বের প্রাণকেন্দ্র যে পার্টির প্রাদেশিক কমিটি, সেখানেও সবকিছু বেশ শান্ত। কিন্তু এটা শুধু বাইরের প্রশান্তি।

একটা ঝড় ঘনিয়ে উঠছে শহরে।

নানান দিক থেকে যারা তাদের সামরিক রাইফেলগুলো চাষাড়ে লম্বা জামার নিচে তেমন একটা না-লুকিয়ে চলাফেরা করে, তাদের অনেকে এই আসন্ন ঝড়ের কথাটা জানে। খাবার-জিনিসপত্রের ফটকাবাজ সেজে যারা ট্রেনের ছাদে চেপে আসে, তারাও কথাটা জানে। এরা তাদের বস্তাগুলো নিয়ে বাজারে যাবার বদলে যায় সাবধানে মনে করে রাখা কতকগুলো ঠিকানায়।

এরা জানে। কিন্তু শ্রমিক-অঞ্চলের লোকেরা এবং এমনকি বলশেভিকরাও আসন্ন এই ঝড়ের কোনো আঁচ পায়নি।

শহরের মাত্র পাঁচজন বলশেভিক জানে কিসের ষড়যন্ত্র চলেছে।

পেথলিউরার দলের বাদবাকি লোককে লালফৌজ শ্বেত পোল্যাভে তাড়িয়ে দিয়েছিল। এরা ওয়ারশ'তে কতকগুলো বৈদেশিক মহলের সহযোগিতায় প্রতিবিপ্লবী অভ্যুত্থানে যোগ দেবার জন্য তোড়জোড় চালাচ্ছে।

পেথলিউরার ফৌজের যে-অংশটুকু তখনও টিকে আছে, তাদের নিয়ে একটা হামলাদার-দল তৈরি হচ্ছে।

প্রতিবিপ্লবীদের কেন্দ্রীয় একটা কমিটি আছে শেপেতোভ্‌কায়-ও। সাতচল্লিশজন লোক আছে এতে। এদের অধিকাংশই হচ্ছে ভূতপূর্ব সক্রিয় প্রতিবিপ্লবী যাদের স্থানীয় 'চেকা' বিশ্বাস করে স্বাধীনভাবে চলাফেরা করতে দিয়েছে।

এই সংগঠনের নেতা ফাদার ভাসিলি, ইনসাইন ভিন্নিক আর কুজ্‌মেঙ্কো নামে একজন পেথলিউরা-অফিসার। গোয়েন্দাগিরির কাজটা চালায় পাদরির মেয়েগুলো, ভিন্নিক-এর বাবা আর ভাই এবং সামোতিয়া নামে একজন লোক। এই লোকটা যা হোক করে কার্যনির্বাহক কমিটির দপ্তরে ঢুকে গেছে।

পরিকল্পনাটা ছিল সীমান্তের বিশেষ বিভাগটির ওপর রাড্রে হাতবোমা ছুড়ে হামলা চালিয়ে কয়েদিদের খালাস করে নেওয়া এবং, সম্ভব হলে, রেলস্টেশনটাকে দখল করে ফেলা।

ইতিমধ্যে, গোপনে অফিসারদের এনে জড়ো করা হচ্ছে বড় শহরে, সেটা অভ্যুত্থানের কেন্দ্র হবার কথা। আশেপাশের বনে-জঙ্গলে সরিয়ে আনা হচ্ছে ডাকাতদের দলগুলোকে। বিশ্বাসভাজন লোকদের মারফত এখান থেকে রুম্যানিয়ার সঙ্গে আর স্বয়ং পেথলিউরার সঙ্গে যোগাযোগ রাখা হচ্ছে।

\*

\*

\*

বিশেষ বিভাগে তার দপ্তরে ফিওদর য়ুখ্‌রাই ছ-রাত্রি ঘুমোয়নি। যে-পাঁচজন বলশেভিক জানে কী ঘটতে চলেছে তাদের মধ্যে সে একজন। বড়রকম শিকার তাকের মধ্যে পাবার পর জন্তুটার উপর ঝাঁপিয়ে পড়ার জন্য অপেক্ষা করার সময় বাঘ-সিংহ-মারনেঅলা শিকারিদের যেমন হয়, এই ভূতপূর্ব নাবিকটি ইদানীং সেইরকম একটা উদ্বেজনা অনুভব করছে।

শোরগোল তুলে সবাইকে সাবধান করে দেবার ঝুঁকি নিতে পারে না সে। রক্তপিপাসু রাফ্‌সটাকে বধ করতেই হবে। তারপর, একমাত্র তখনই প্রত্যেকটা ঝোপের পেছনে সচকিত হয়ে না-তাকিয়ে, শাস্তভাবে কাজ করে যাওয়া সম্ভব হবে। কিন্তু জানোয়ারটা যেন ভয় পেয়ে পালিয়ে না যায় কিছুতেই। এই ধরনের জীবন-মরণ সংগ্রামে ধৈর্য আর দৃঢ়তাই শেষপর্যন্ত জয়ী হয়।

আসল সংকটের মুহূর্তটা এগিয়ে এসেছে।

শহরের কোনো-এক স্থানে ষড়যন্ত্রের গোপন জায়গাগুলোর গোলকধাঁধার মধ্যে একটা সময় ঠিক করে ফেলা হয়েছে : আগামীকাল রাড্রে।

কিন্তু যে-পাঁচজন বলশেভিক ব্যাপারটা জানত তারা আগেই আঘাত হানবার সিদ্ধান্ত নিল। তাদের সময় হল—আজ রাড্রে।



এইদিন সন্দের সময় ডিপো থেকে নিঃশব্দে বেরিয়ে এল একটা সাজোয়া-ট্রেন আর তেমন নিঃশব্দে তার পেছনে বন্ধ হয়ে গেল ভারী গেট।

সাংকেতিক টেলিগ্রাম চলে গেল তার বেয়ে, আর, যে-সমস্ত সজাগ আর সতর্ক লোকদের ওপর প্রজ্ঞাতন্ত্র নিরাপত্তার দায়িত্ব দিয়েছে, তারা এই জরুরি তলবের জবাবে তৎক্ষণাৎ ভিমরুলের চাকটিকে পিষে মারবার ব্যবস্থা করল।

ঝার্কিকে টেলিফোন করল আকিম।

‘সেল-মিটিংগুলোর ব্যবস্থা ঠিক আছে তো? বেশ। এঙ্কুনি একটা আলোচনা-বৈঠকের জন্যে চলে এসো, আর জেলা পার্টি কমিটির সম্পাদককে সঙ্গে করে নিয়ে এসো। জ্বালানির সমস্যাটা যতটা ভেবেছি আমরা তার চেয়েও গুরুতর। তোমরা এখানে এসে পৌঁছালে বিস্তৃতভাবে আলোচনা করা যাবে,’ দৃঢ় গলায় দ্রুত বলে গেল আকিম কথাগুলো।

‘এই জ্বালানিকাঠের ব্যাপারটা দেখছি আমাদের পাগল করে ছাড়বে,’ বিরজিভরা গলায় ঝার্কি উত্তর দিল রিসিভারটা রাখতে রাখতে।

লিথকে ঝড়ের বেগে মোটর হাঁকিয়ে সদর-দপ্তরে পৌঁছে দিল সম্পাদক দু’জনকে। সিঁড়ি বেয়ে দোতলায় উঠতে উঠতেই তারা সঙ্গে সঙ্গে বুঝতে পারল যে জ্বালানিকাঠের সম্বন্ধে আলোচনা করার জন্য তাদের এখানে তলব করা হয়নি।

দপ্তর-ব্যবস্থাপকের ডেস্ক-এর ওপরে মেশিনগান রাখা আছে, আর এটার পাশে বিশেষ সৈন্যবাহিনীর গোলন্দাজরা ব্যস্ত। শহরের পার্টি আর কমসমোল সংগঠনগুলোর সাক্ষীরা নিঃশব্দে দাঁড়িয়ে আছে বারান্দাগুলোয়। সম্পাদকের দপ্তরের চওড়া দরজাটার পেছনে প্রাদেশিক পার্টি কমিটির ব্যারোর জরুরি বৈঠক প্রায় শেষ হয়ে এসেছে।

রাস্তার দিকে জানলার ঘুলঘুলির ফাঁকে তার বেরিয়ে গিয়ে যুক্ত হয়েছে দুটো চলমান ফৌজি টেলিফোনের সঙ্গে।

ঘরটার মধ্যে কথাবার্তার একটা চাপা গুঞ্জন। এই ঘরে রয়েছে আকিম, রিতা আর মিখাইলো। লম্বা ঝুলের স্ট্রোটকোটের উপর কাঁধের বেল্ট আর কোমরবন্ধনী এবং কোমরবন্ধনীর সঙ্গে ঝোলানো খাপসুদ্ধ নাগান-রিভলবার—এই বেশে শ্কেলেঙ্কোকে চট করে চেনা যায় না। রিতার মাথায় একটা লালফৌজের শিরদ্বাগ, পরনে খাকি-স্কার্ট, চামড়ার কোর্তা, কোমরবন্ধনীটা থেকে ভারী একটা মাউজার-পিস্তল ঝুলছে—একটা কম্পানির রাজনৈতিক নেতা হিশেবে কাজ করার সময় সে এইরকম উর্দি পরে থাকত।

ঝার্কি অবাক হয়ে জিজ্ঞেস করল তাকে, ‘ব্যাপারখানা কী?’

‘সতর্কতাসূচক একটা মহলা। ভানিয়া, এখনই আমরা তোমার পাড়ায় যাব। পাঁচ-নম্বর পদাতিক-বাহিনীর ইঙ্কুলে আমরা জড়ো হব। কমসমোল আর পার্টি-সভারা তাদের সেল-মিটিংয়ের পরে সরাসরি ওখানে যাবে। আসল কথাটা হচ্ছে—কারুর দৃষ্টি আকর্ষণ না করে ওখানে যেতে হবে,’ বলল রিতা।

পুরনো সামরিক স্কুলের বন। তার বিরাট প্রাচীন ওক-গাছগুলো, জোলোঘাস আর শ্যাওলা-জমা পুকুর, আর চওড়া ধুলোভর্তি বীধি নিয়ে নিস্তব্ধ হয়ে পড়ে আছে। বনের মাঝখানে একটা উঁচু শাদা দেয়ালের পেছনে ইঙ্কুল-বাড়ি—যেটা ইদানীং লালফৌজের পদাতিক বাহিনীর অধিনায়কদের জন্য পাঁচ-নম্বরের ইঙ্কুলের

জায়গা। গভীর রাত্রি এখন। বাড়িটার উপরতলা অন্ধকার। বাইরে থেকে একটা গভীর প্রশান্তির ভাব। এমনি যদি কেউ এদিক দিয়ে দৈবাৎ যায়, তাহলে ভাববে—ইকুলের লোকজন ঘুমিয়ে আছে। কিন্তু তাহলে লোহার ফটক খোলা কেন, আর তার পাশে ওই বিরাট ব্যাণ্ডের মতো দেখতে কালো জিনিশদুটোই বা কী? রেলওয়ে-অঞ্চলের চারিদিক থেকে যারা এই জায়গাটায় এসে জড়ো হচ্ছে, তারা জানে, রাত্রির সতর্কতাসূচক সংকেত পাবার পর আর স্কুলের বাসিন্দারা কেউ ঘুমতে পারে না। তারা তাদের কমসমোলের আর পার্টি সেল-মিটিঙের সংক্ষিপ্ত ঘোষণাটা শোনার পর সঙ্গে সঙ্গে এখানে চলে আসছে। নিঃশব্দে, একে একে, জোড়ায় জোড়ায় আসছে, একসঙ্গে তিনজনের বেশি কেউ আসে না এবং প্রত্যেকে নিজের নিজের কমিউনিষ্ট পার্টি-সভ্যের কার্ড কিংবা ইউক্রেন কমসমোলের কার্ড সঙ্গে আনছে। এই কার্ড ছাড়া লোহার ফটক দিয়ে ঢুকতে পারবে না কেউ।

সবার জড়ো হবার জন্য বড় হলঘরটা আলোয় উজ্জ্বল, ইতিমধ্যেই সেখানে বহু লোক এসে গেছে। জানলাগুলো ভারী মোটা ক্যাম্বিসের কাপড়ে মোড়া। যে-সমস্ত বলশেভিক এখানে তলব হয়ে এসেছে, তারা শান্তভাবে তাদের ঘরে-তৈরি সিগারেট খাচ্ছে আর মামুলি একটা সতর্কতাসূচক সমাবেশের জন্য এতবেশি সাবধানতা নেওয়া হয়েছে দেখে নিজেদের মধ্যে হাসিঠাট্টা আরম্ভ করে দিয়েছে। এটা যে সত্যিকারের একটা বিপদসংকেত, তা কেউই বুঝে উঠতে পারেনি। বিশেষ বিভাগের সৈন্যদলগুলোয় শৃঙ্খলা আর অভ্যেস বজায় রাখার জন্য এটা করা হয়েছে বলে ধরে নেওয়া হয়েছে। অভিজ্ঞ সৈনিক যারা, তারা কিন্তু ইকুল-বাড়ির আঙিনায় ঢোকামাত্র এটাকে একটা সত্যিকারের বিপদসংকেত বলে বুঝতে পেরেছে। সাবধানতাটুকু বড় বেশিরকম দেখা যাচ্ছে। ফিসফিসিয়ে বলা হুকুম-অনুযায়ী ফৌজি ছাত্রেরা সব বাইরে সারি বেঁধে দাঁড়াচ্ছে। মেশিনগানগুলোকে নিঃশব্দে হাতে করে বয়ে আনা হচ্ছে আঙিনায় এবং বাড়িটার কোনো জানলায় একবিন্দু আলোর রেখা দেখা যাচ্ছে না।

জানলার ধারে একটা মেয়ের পাশে দুবাতা বসেছিল—তার কাছে গিয়ে পাভেল করচাগিন জিজ্ঞেস করল, ‘গুরুতর কিছু ঘটতে চলেছে নাকি, মিতিয়াই?’ তার পাশের মেয়েটাকে পাভেল দিনদুয়েক আগে ঝার্কির ওখানে দেখেছে বলে মনে পড়ল।

দুবাতা কৌতূকের সঙ্গে পাভেলের কাঁধে চাপড় মেরে বলল, ‘পা কাঁপছে বুঝি, অ্যা? কিছু ঘাবড়াবার নেই, কী করে লড়াই করতে হয়, আমরা ঠিকমতো শিখিয়ে দেব তোমাদের। তোমাদের মধ্যে আলাপ নেই, না?’ মেয়েটিকে মাথা নেড়ে দেখাল সে, ‘ওর নাম আন্না, পদবিটা জানিনে, তবে পদটা জানি—ও হচ্ছে প্রচার-আন্দোলন কেন্দ্রের ভারপ্রাপ্ত কর্মী।’

দুবাতা এইভাবে যার পরিচয় দিল, সেই মেয়েটি তার মাথায় বাঁধা বেগুনি রঙের ক্রমালটার ফাঁকে বেরিয়ে-পড়া একগোছা চুল ঠেলে সরিয়ে দিয়ে সাগ্রহে করচাগিনকে দেখছিল। তার সঙ্গে করচাগিনের চোখাচোখি হতেই দু-এক মুহূর্তের জন্য নিঃশব্দে একটা প্রতিঘন্দিতা হয়ে গেল। দীর্ঘ চোখের পাতার নিচে তার উজ্জ্বল আর নিবিড় কালো চাউনি পাভেলের চাউনিকে প্রতিঘন্দিতায় আহ্বান করল। আরম্ভ হচ্ছে বুঝে

পাভেল ভুরু কঁচকে দৃষ্টি সরিয়ে নিয়ে দুবাজার দিকে তাকাল। জোর করে মুখে হাসি এনে সে জিজ্ঞেস করল, 'তোমাদের মধ্যে আন্দোলনের কাজটা চালায় কে?'

সেই মুহূর্তে হলঘরে একটা সাড়া উঠল। মিখাইলো শ্কোলেঙ্কো একটা চেয়ারের উপর দাঁড়িয়ে উঠে চোঁচিয়ে বলল, 'এক-নম্বর কম্পানির সৈন্যরা সারি বাঁধো! জলদি করো, কমরেড, চটপট!'

প্রাদেশিক কার্যনির্বাহক কমিটির সভাপতি আর আকিমের সঙ্গে ঢুকল ঝুখরাই। তারা এইমাত্র এসে পৌঁছেছে।

হলঘরটা এখন এক প্রান্ত থেকে আরেক প্রান্ত পর্যন্ত সারি বেঁধে দাঁড়ানো মানুষে ভরে উঠেছে।

ট্রেনিংয়ের জন্য ব্যবহৃত একটা মেশিনগানের মঞ্চের উপর উঠে দাঁড়িয়ে প্রাদেশিক কার্যনির্বাহক কমিটির সভাপতি হাত তুলে বলল, 'কমরেডসব! অত্যন্ত গুরুতর আর জরুরি একটা ব্যাপারে আপনাদের এখানে তলব করা হয়েছে। আমি এখন যে-কথাগুলো বলব, সে-কথাগুলো নিরাপত্তামূলক কারণে এমনকি গতকাল পর্যন্তও বলা যেত না। আগামীকাল রাতে এই শহরে আর ইউক্রেনের সর্বত্র একটা প্রতিবিপ্লবী অভ্যুত্থানের সময় নির্ধারিত হয়ে আছে। শ্বেতরক্ষী অফিসারে ছেয়ে গেছে শহর। শহরের চারিদিক ঘিরে ডাকাতদের দল জমা করা হয়েছে। চক্রান্তকারীদের একাংশ সাংজোয়া-গাড়িবাহিনীতে ঢুকে পড়েছে এবং সেখানে তারা ড্রাইভার হিশেবে কাজ করছে। কিন্তু সময় হাতে থাকতেই 'চেকা' ষড়যন্ত্রটা ধরে ফেলেছে এবং আমরা তাই গোটা পার্টি আর কমসমোল সংগঠনগুলিকে সশস্ত্র করে তুলছি। সামরিক ইঙ্কুলের বাহিনী আর 'চেকা'র ফৌজিদলের সঙ্গে এক-নম্বর আর দু-নম্বর কমিউনিস্ট ব্যাটালিয়ন কাজ করবে। সামরিক ইঙ্কুলের সৈন্যদলগুলো ইতিমধ্যেই কাজে নেমে গেছে। এবার আপনাদের পালা, কমরেডসব। পনেরো মিনিটের মধ্যে যে-যার হাতিয়ার নিয়ে সার বেঁধে দাঁড়াতে হবে। সমস্ত কাজটা পরিচালনা করবেন কমরেড ঝুখরাই। সৈন্যদলের অধিনায়করা তাঁর কাছ থেকে নিজের কাজের নির্দেশ নেবেন। অবস্থার গুরুত্বটা বারবার করে বলার কোনো দরকার দেখি না। আগামীকালকের প্রতিবিপ্লবী অভ্যুত্থানকে আজকেই রোখা চাই।'

সিকি ঘণ্টা বাদে সশস্ত্র ব্যাটালিয়নটা ইঙ্কুল-বাড়ির আঙিনায় দাঁড়াল সার বেঁধে।

স্থিরভাবে দাঁড়িয়ে থাকা সৈন্যদলটার ওপরে একবার চোখ বুলিয়ে নিল ঝুখরাই।

সারির তিন-পা আগে সামনে দাঁড়িয়ে আছে চামড়ার কোমরবন্ধনীপরা দু'জন লোক : ব্যাটালিয়ন কমান্ডার মেনিয়াইলো—ঢালাই-কারখানার মজুর সে, উরাল অঞ্চলের বিরাটকায় মানুষ, এবং তার পাশে কমিশার আকিম। বাঁদিকে এক-নম্বর কম্পানির পল্টনগুলো, তাদের দু-পা সামনে কম্পানির কমান্ডার শ্কোলেঙ্কো আর রাজনীতিক নেতা উস্তিনোভিচ। এদের পেছনে কমিউনিস্ট ব্যাটালিয়নের নিস্তদ্ধ সারি দাঁড়িয়ে আছে; এদের সংখ্যা তিনশো।

ফিওদর সংকেত জানাল :

'কাজে নামবার সময় হয়েছে।'

নির্জন রাস্তা দিয়ে কুচকাওয়াজ করে চলল তিনশো মানুষ।

শহরটা ঘুমোচ্ছে তখন।

লভোভ্‌স্কায়া স্ট্রিট আর দিকায়্যা স্ট্রিটের মোড়ে এসে এরা থামল। এইখান থেকে কাজ শুরু হবে।

নিঃশব্দে ঘিরে ফেলল তারা পাড়াগুলো। একটা দোকানের সামনের সিঁড়িতে হেডকোয়ার্টার বসানো হল।

শহরের কেন্দ্রের দিক থেকে একটা মোটরগাড়ি তার হেডলাইটের উজ্জ্বলতায় একটা আলোর পথ কেটে লভোভ্‌স্কায়া স্ট্রিট বেয়ে দ্রুত এসে পড়ল। ব্যাটালিয়নের ঘাঁটির সামনে এসে গাড়িটা হঠাৎ থামল।

এই দফায় লিথকে তার বাবাকে নিয়ে এসেছে। গাড়ি থেকে লাফিয়ে নেমে পড়ে ছেলের দিকে মাথাটা ফিরিয়ে লাভভিয়ান ভাষায় অল্প গোটাকতক কাটা-কাটা কথা বললেন কম্যান্ড্যান্ট। সামনে একটা লাফ দিয়েই গাড়িটা রাস্তার বাঁকে একমুহূর্তে অদৃশ্য হয়ে গেল। দৈত্যের মতো গাড়ি হাঁকাচ্ছে গুগো—স্টিয়ারিং হুইলে তার হাতদুটো এত জোরে চেপে বসেছে যেন সে-দুটো হুইলেরই অংশ, তার চোখজোড়া রাস্তার ওপরে আটকানো।

হ্যাঁ, আজ রাতে গুগোর এই উন্মত্ত গাড়ি-চালনার দরকার আছে! এত জোরে গাড়ি হাঁকালে তার দু-রাত্রি হাজতবাসের শাস্তি পাবার কোনো সম্ভাবনা নেই!

উষ্কার বেগে রাস্তা বেয়ে উড়ে চলেছে গুগো লিথকে।

চক্ষের পলকে শহরের একপ্রান্ত থেকে আরেক প্রান্তে ঝুঝুঝুঝু গাড়ি হাঁকিয়ে এনে ফেলেছে তরুণ লিথকে। ঝুঝুঝু তাকে তারিফ না-জানিয়ে পারল না, ‘আজ রাতে যদি তুমি কাউকে চাপা না দাও তাহলে কাল তুমি একটা সোনার ঘড়ি পাবে।’

খুশিতে উপছে উঠল গুগো, ‘আমি তো ভেবেছিলাম, ওই মোড়টা ফেরার জন্যে দশ দিনের হাজতবাস সাজা পাব...’

প্রথম আঘাত হানা হল ষড়যন্ত্রীদের সদর-ঘাঁটির উপর। কিছুক্ষণের মধ্যেই শ্রেণ্ডার-করা প্রথম লোকগুলোকে আর দলিলপত্রের বাড়িল পৌছে দেওয়া হল বিশেষ বিভাগে।

দিকায়্যা স্ট্রিটের এগারো নম্বর বাড়িতে ছুর্বেট নামে একজন লোক থাকে—‘চেকা’র কাছে যে-খবর এসেছিল, তাতে এই শ্বেতরক্ষী ষড়যন্ত্রে লোকটার হাত বড় কম ছিল না। অফিসারদের যে-দলটার পদোন্নতি অঞ্চলে অভ্যুত্থান ঘটানোর কথা, তাদের নামের তালিকা এর কাছে ছিল।

কম্যান্ড্যান্ট লিথকে স্বয়ং দিকায়্যা স্ট্রিটে এলেন লোকটাকে শ্রেণ্ডার করার জন্য। ছুর্বেটের ঘরের জানলাগুলো বাড়ির বাগানের দিকে। এই বাগানটা আর ভূতপূর্ব একটা মঠ-বাড়ির মাঝখানে উঁচু দেয়ালের ব্যবধান। ছুর্বেট বাড়ি নেই। প্রতিবেশীরা বলল, তাকে সেদিন সারাদিনের মধ্যে দেখা যায়নি। খানাতল্লাশি করে সেই নাম-ঠিকানার তালিকাগুলো আর এক-বাক্স হাতবোমা পাওয়া গেল। বাইরে পাহারাদার সৈন্য মোতায়েনের নির্দেশ দিয়ে লিথকে কাগজপত্রগুলো পরীক্ষা করার জন্য ঘরটার মধ্যে কিছুক্ষণ রইলেন।

সামরিক কুলের তরুণ ছাত্রটিকে নিচে বাগানের এককোণে পাহারা দেবার জন্য দাঁড় করিয়ে দেওয়া হয়েছিল, সেখান থেকে সে আলোকিত জানলাটি দেখতে পাচ্ছিল। এখানে একা অন্ধকারে দাঁড়িয়ে থাকতে একটু ভয়-ভয় করছিল তার। দেয়ালটার উপর নজর রাখার জন্য বলা হয়েছিল তাকে। তার পাহারাদারির জায়গাটা থেকে এই ভরসা-জাগানো আলোর রেখাটা বড় দূরে বলে মনে হল তার। এবং, হতভাগা চাঁদটা কেবলই মেঘের পেছনে আড়াল হয়ে গিয়ে অবস্থাটাকে আরও খারাপ করে তুলছে। রাত্রিবেলায় ঝোপঝাড়গুলো যেন তাদের নিজস্ব একধরনের অশুভ জীবনসম্মুখীন প্রাণ পেয়ে ওঠে। তরুণ সৈন্যটি তার নিজের চারিধারের অন্ধকারকে বিধল তার বেয়নেটের ঝোঁচায়। না, কিছু নেই।

‘আমাকে এখানে ঝাড়া করে দিয়েছে কেন? এই দেয়ালটা বেয়ে তো আর কারুর পক্ষে ওঠা সম্ভব নয়—এটা ঢের বেশি উঁচু। জানলাটার কাছে গিয়ে বরং ভেতরে একনজর দেখে নেওয়া যাক।’ দেয়ালটার দিকে একনজর তাকিয়ে নিয়ে সে তার সোঁদা শ্যাঙা-গন্ধী কোণটা থেকে বেরিয়ে এল। জানলাটার কাছাকাছি এসে একমুহূর্তের জন্য দাঁড়াল। লিথক দ্রুত কাগজগুলো গুছিয়ে নিয়ে ঘর থেকে বেরোবার উদ্যোগ করছেন, ঠিক সেই মুহূর্তে দেয়ালের মাথায় একটা ছায়া দেখা গেল, যেখান থেকে জানলার পাশে সাক্ষীটাকে আর ঘরের ভেতরে লিথকে দু’জনকেই স্পষ্ট দেখতে পাওয়া যায়। বেড়ালের মতো তৎপরতার সঙ্গে একটা গাছের ডালে ঝুলে পড়ল ছায়াটা, তারপর মাটিতে নেমে পড়ল। নিঃশব্দে এগিয়ে এল শিকারটার দিকে গুঁড়ি মেরে। একটা মাত্র আঘাতেই নাবিকের লম্বা সরু একটা ছোরা হাতল পর্যন্ত গলায় বিধে গিয়ে মুখ খুবড়ে মাটিতে পড়ে গেল সাক্ষীটি।

আশেপাশের বাড়িগুলো ঘিরে দাঁড়িয়ে আছে যে-সৈন্যরা, তাদের চমকে দিয়ে বাগানে একটা গুলির আওয়াজ উঠল।

ছ’জন লোক ছুটে এল বাড়িটার দিকে, রাত্রির অন্ধকারে তাদের পা-ফেলার জোরালো আওয়াজ উঠল।

টেবিলটার ওপরে ঝুঁকে নেতিয়ে পড়ে আছেন লিথকে, তাঁর মাথার ক্ষত থেকে রক্ত ছুঁয়ে পড়ছে। মারা গেছেন তিনি। গুঁড়িয়ে গেছে জানলার শার্সিটা। কিন্তু হত্যাকারী দলিলপত্রগুলো হাতিয়ে নেবার সময় পায়নি।

মঠ-বাড়ির দেয়ালটার পিছনে আরও কতকগুলো গুলির আওয়াজ শোনা গেল। দেয়াল টপকে এসে রাস্তায় পড়ে খুঁচীটা পতিত জমির দিকটা দিয়ে পালাবার চেষ্টায় গুলি ছুড়তে ছুড়তে দৌড়াচ্ছিল। কিন্তু একটা বুলেট এসে তার দৌড়ানো রুখে দিল।

সারা রাত্রি ধরে খানাতল্লাশি চলল। বাসিন্দার তালিকায় যাদের নাম ছিল না আর যাদের কাছ থেকে সন্দেহজনক কাগজপত্র আর অস্ত্রশস্ত্র পাওয়া গেল, সেই শত শত লোকদের চালান করে দেওয়া হল ‘চেকা’র কাছে। সেখানে একটা কমিশন সন্দেহভাজন লোকদের বাছাই করার কাজে ব্যস্ত থাকল।

এখানে-ওখানে চক্রান্তকারীরা পাশ্টা আক্রমণ চালাল। জিলিয়ানস্কায়া স্ট্রিটে একটা বাড়িতে খানাতল্লাশি চলবার সময়ে আশুন লেবেদেভ একটা গুলিতে মারা গেল।

সলোমেন্কা ব্যাটালিয়ন পাঁচজন লোক হারাল সেই রাতে, আর 'চেকা' হারাল সেই একাধ্র বলশেভিক আর প্রজাতন্ত্রের বিশ্বস্ত সাত্রী ইয়ান লিথকে-কে।

কিন্তু শ্বেতরক্ষী অভ্যুত্থানটিকে অঙ্কুরেই বিনাশ করে দেওয়া হল।

সেই রাতেই শেপেতোভ্কাই ফাদার ভাসিলিকে তার মেয়েদের সঙ্গে এবং দলের আর-সবাইয়ের সঙ্গে খেণ্ডার করা হল।

উদ্ভেজনাটা কমল।

কিন্তু শিগগিরই আরেকটা নতুন শত্রু শহরটাকে বিপন্ন করল : রেল-চলাচল একেবারে বন্ধ, কপালে আসন্ন শীতকালের অনাহার আর ঠাণ্ডায় দুর্ভোগ।

সবকিছু এখন নির্ভর করছে খাদ্যশস্য আর জ্বালানিকাঠের ওপর।

## দ্বিতীয় অধ্যায়

ফিওদর চিন্তিতভাবে তার খাটো পাইপটা মুখ থেকে নামিয়ে নিয়ে পাইপের বাটিটার মধ্যে ছাইটুকু আঙুল দিয়ে ছুঁয়ে দেখল সাবধানে। নিভে গেছে পাইপটা।

ডজনখানেক সিগারেটের ধূসর ধোঁয়ার একটা ঘন মেঘ জমে উঠেছে ঘরের ছাদের নিচে আর প্রাদেশিক কার্যনির্বাহক কমিটির সভাপতি যেখানে বসে আছে সেই চেয়ারটার উপরদিকে। টেবিলের চারধারে আর ঘরের কোণে-কোণে যারা বসে আছে, তাদের মুখগুলো ধোঁয়ার মধ্যে অস্পষ্টভাবে দেখা যাচ্ছে।

সভাপতির পাশেই বসে আছে তোকারেভ, সামনের দিকে ঝুঁকে পড়ে বিরক্তির সঙ্গে সে তার পাতলা দাড়ি টানছে, আর মাঝে মাঝে আড়চোখে তাকিয়ে দেখছে বেঁটে টাক-মাথা একটা লোকের দিকে; এই লোকটা চড়া সৰু গলায় অনর্গল কথা বলে চলেছে—অর্থহীন ফাঁকা বুলিগুলো তার শূন্যগর্ভ ডিমের খোলার মতোই অন্তঃসারশূন্য।

বৃদ্ধ শ্রমিক তোকারেভের চোখের দিকে তাকিয়ে আকিমের মনে পড়ল—ছেলেবেলায় তার গ্রামে 'চোখ খুবলানি' নামে একটা লড়ায়ে-মোরগ ছিল, প্রতিপক্ষের ওপর ঝাঁপিয়ে পড়ার আগে সেই মোরগটার চোখে ঠিক এইরকম তীব্র দৃষ্টি ফুটে উঠত।

পার্টির প্রাদেশিক কমিটি একঘণ্টার ওপর আলোচনা-বৈঠকে বসেছে। টেকো লোকটা রেলওয়ের জ্বালানিকাঠ-কমিটির সভাপতি।

সামনের কাগজের স্তূপের মধ্যে দ্রুত আঙুল চালিয়ে টাক-মাথা লোকটা গড়গড়িয়ে বলে চলেছে : '...এ অবস্থায় স্পষ্টই দেখা যাচ্ছে যে প্রাদেশিক কমিটির আর রেলওয়ে-পরিচালনা দপ্তরের সিদ্ধান্তকে কার্যকরী করা অসম্ভব। আমি আবার বলছি, আজ থেকে একমাসের মধ্যেও আমরা চারশো ঘনমিটার বেশি জ্বালানিকাঠ দিয়ে উঠতে পারব না। আর এই-যে এক লক্ষ আশি হাজার ঘনমিটার দরকার, এটা হল গিয়ে নিতান্তই...' উপযুক্ত কথাটা হাতড়াবার চেষ্টা করতে সে বলল, 'ইয়ে...মানে, নিতান্তই আকাশকুসুম কল্পনা!' বক্তব্য শেষ করে সে তার ছোট্ট মুখটাকে একটা আহত ভঙ্গিতে বন্ধ করে দিল।

বেশ কিছুক্ষণের জন্য একটা নিস্তব্ধতা নেমে এল।

ফিওদর তার আঙুলের ডগায় পাইপ ঠুকে ছাই ঝেড়ে ফেলল। শেষপর্যন্ত নিস্তব্ধতা ভাঙল তোকারেভ।

‘ওধু ওধু কথা চিবিয়ে কোনো লাভ নেই,’ গুরুগম্ভীর গলায় সে বলতে শুরু করল, ‘রেলওয়ের জ্বালানিকাঠ-কমিটির হাতে জ্বালানিকাঠ নেই, কোনোদিন ছিল না, ভবিষ্যতেও হবে না...এই তো?’

টাকঅলা লোকটি কাঁধ-ঝাঁকুনি দিল।

‘মাপ করবেন, কমরেড, জ্বালানিকাঠ আমরা মজুত করেছিলাম ঠিকই, কিন্তু রেলপথ ছাড়া অন্যপথে মাল-চলাচলের ব্যবস্থার ঘাটতির ফলে...’ ঢোক গিলে একটা চৌখুপি-ছক-কাটা রুমাল বের করে সে তার চকচকে মাথাটা মুছে নিল। রুমালটা পকেটে গোঁজার জন্য বারকতক ব্যর্থ চেষ্টা করার পর শেষপর্যন্ত সেটাকে অবস্থির সঙ্গে পোর্টফোলিওর নিচে গুঁজে দিল সে।

এককোণ থেকে দেনেকো মস্তব্য করল, ‘জ্বালানিকাঠগুলো সরবরাহের জন্যে কী ব্যবস্থা করেছেন আপনি? এ-ব্যাপারে যেসব বিশেষজ্ঞ ষড়যন্ত্রের সঙ্গে জড়িত তাদের শ্রেণ্ডার করার পর অনেক দিনই তো কেটে গেছে।’

টাকঅলা লোকটি তার দিকে ফিরে বলল, ‘রেলপথের কর্তৃপক্ষকে আমি তিনবার লিখে জানিয়েছি যে, আমাদের যদি মাল-চালানির উপযুক্ত ব্যবস্থা না-দেওয়া হয়, তাহলে অসম্ভব হয়ে দাঁড়াবে...’

তোকারেভ বাধা দিল তাকে।

‘ও-কথা তো আমাদের শোনা হয়ে গেছে,’ শত্রুভাষ্য চোখে লোকটার দিকে তাকিয়ে সে শুকনো গলায় বলল, ‘আপনি কি আমাদের বোকার দল বলে ঠাউরেছেন?’

এই কথায় টাকঅলা মানুষটি অনুভব করল তার শিরদাঁড়া বেয়ে যেন একটা শীতল শিহরণ নেমে গেল।

নিচুগলায় বলল সে, ‘প্রতিবিপ্লবীদের কাজের কৈফিয়ত তো আমি দিতে পারি না।’

‘কিন্তু আপনি তো জানতেন যে রেললাইন থেকে বহুদূরের বনে গাছকাটা হয়—জানতেন কি-না?’ আকিম জিজ্ঞেস করল।

‘সে-কথা শুনেছি, কিন্তু আমার এলাকার বাইরে অনিয়ম ঘটেছে, সেদিকে আমার ওপরঅলাদের দৃষ্টি আকর্ষণ করতে পারিনি।’

ট্রেড ইউনিয়ন কাউন্সিলের সভাপতি জানতে চাইল, ‘কতজন লোক আছে আপনার বিভাগে?’

‘প্রায় দু-শো’, জবাব দিল টেকো লোকটি।

হিসহিসিয়ে বলে উঠল তোকারেভ, ‘তার মানে পরগাছাগুলোর মাথাপিছু বছরে এক ঘনমিটার কাঠ!’

‘রেলওয়ের জ্বালানিকাঠ-কমিটির জন্যে খাদ্যের বিশেষ রেশন বরাদ্দ হয়েছে—শ্রমিকদের যে-খাবারটা পাওয়া উচিত তার থেকে কেটে নিয়ে এই ব্যবস্থা করা হয়েছে। আর আপনারা কী করছেন বলুন তো? মজুরদের জন্যে যে দু-গাড়ি ময়দা পেলেন, সেটার কী হল?’ চেপে ধরল ট্রেড ইউনিয়নের সভাপতি।

চারদিক থেকে এইরকম চোখা-চোখা প্রশ্নের বর্ষণ হতে থাকল টাক-মাথা লোকটার ওপর, আর বিরজিকর পাওনাদারদের হাত এড়াবার মতো সে তাদের কথা এড়াবার চেষ্টা করল।

পাঁকাল মাছের মতো পাক খেয়ে সে একেবেঁকে সরাসরি জবাব এড়িয়ে যেতে লাগল, কিন্তু চোখদুটো তার অস্বস্তির সঙ্গে নিজের চারদিকে ঘোরাফেরা করেছে। বিপদ আন্দাজ করে তার ভীক-মন শুধু একটা জিনিশের জন্য উদ্‌যীব হয়ে উঠেছে : এখান থেকে যত তাড়াতাড়ি পারা যায় সরে পড়ে তার আরামে-ভরা বাড়িটার মধ্যে সঁধিয়ে যাওয়া—সেখানে তার রাত্রে খাবার সাজানো রয়েছে আর তার স্ত্রী—যৌবন যার এখনও ফুরিয়ে যায়নি—আরাম করে বসে পল-দ্য কক্-এর লেখা হালকা উপন্যাস পড়ে সময় কাটাচ্ছে।

টাক-মাথা লোকটার জবাবগুলো মনোযোগের সঙ্গে শুনতে শুনতে ফিওদর তার নোটবুকে লিখল, 'আমার মনে হয়, এই লোকটাকে খুব ভালো করে যাচাই করা উচিত। ব্যাপারটা শুধু অযোগ্যতাই নয়, তার চেয়েও বেশি কিছু। আমি এর সম্বন্ধে দু-একটা কথা জানি...এই আলোচনা বন্ধ করে দিয়ে ওকে চলে যেতে দাও, যাতে আমরা কাজের কথায় আসতে পারি।'

প্রাদেশিক কার্যনির্বাহক কমিটির সভাপতি তার এই নোট পড়ে ফিওদরের দিকে মাথা নাড়ল।

ঝুঝরাই উঠে গিয়ে বারান্দায় এল একটা টেলিফোন করার জন্য। সে ফিরে এল যখন, তখন সভাপতি প্রস্তাবটা পড়ছে :

'...অন্তর্ঘাতী কাজের জন্যে রেলওয়ের জ্বালানিকাঠ-কমিটির কর্তাদের বরখাস্ত করা হোক এবং কাঠ-সংক্রান্ত সমস্ত ব্যাপারটা অনুসন্ধান-বিভাগের কর্তৃপক্ষের হাতে দেওয়া হোক।'

টেকো লোকটি আরও খারাপ কিছু হবে ভেবেছিল। এ-কথা ঠিক যে অন্তর্ঘাতী কাজের জন্য পদ থেকে বরখাস্ত হওয়ার ফলে সাধারণভাবে তার বিস্মৃততা সম্বন্ধে প্রশ্ন উঠতে পারে, কিন্তু সেটা সামান্য ব্যাপার। আর ওই বোয়ার্ডকার ব্যাপারটা সম্বন্ধে তার কোনো ভাবনা নেই, ওটা তো আর তার এলাকা নয়। একটা স্বস্তির নিশ্বাস ফেলে মনে মনে বলল সে, 'আমি তো ভেবেছিলাম, সত্যিই কিছু কিছু ঝুড়ে বের করেছে বুঝি ওরা...'

এখন প্রায় পুরোপুরি আশ্বস্ত হয়েই, নিজের কাগজপত্রগুলো তার পোর্টফোলিওতে পুরতে পুরতে সে বলল, 'আমি অবশ্য পার্টির বাইরেকার একজন বিশেষজ্ঞ। আপনারা আমাকে অবশ্যই অবিশ্বাস করতে পারেন। কিন্তু আমার বিবেকের কাছে আমি খালাস। আমার যেটা করবার কথা, সেটা করা অসম্ভব ছিল বলেই আমি করে উঠতে পারিনি।'

কেউ কোনো মন্তব্য করল না। টেকো লোকটি ঘর থেকে বেরিয়ে দ্রুতপায়ে সিঁড়ি দিয়ে নেমে এসে রাস্তার দরজাটা খুলল দারুণ একটা স্বস্তির সঙ্গে।

সামরিক উর্দি-পরা একটা লোক তার দিকে এগিয়ে এল, 'মশাই, আপনার নামটা?' ধুকধুক করে উঠল তার বুকের ভেতর, খতমত খেয়ে বলল সে, 'চের... ভিন্‌কি...'

ওপরের ঘরে এই লোকটি বেরিয়ে যাবার সঙ্গে সঙ্গে বড় মিটিং-টেবিলটার চারধারে তেরোটা মাথা ঝুঁকে পড়ল।



মেলে-ধরা মানচিত্রটার ওপরে আঙুল চালিয়ে ঝুঝুরাই বলল, 'এইখানে দেখুন। এইটে বোয়ার্কা স্টেশন। এখান থেকে চার মাইল দূরে গাছ-কাটা হয়। এই জায়গায় দু-লক্ষ দশ হাজার ঘনমিটার কাঠ জমা হয়ে আছে। পুরো একটা শ্রমবাহিনী এই কাঠটা জড়ো করে তুলেছে আট মাসের কঠিন পরিশ্রমে। আর, ফলটা কী হয়েছে? বিশ্বাসঘাতকতা। রেলওয়েতে আর শহরে জ্বালানিকাঠ নেই। এই কাঠগুলো চার মাইল রাস্তা বেয়ে স্টেশনে নিয়ে আসতে পাঁচ-হাজার গাড়ি লাগালেও একমাসের কম লাগবে না—তাও আবার যদি দৈনিক দুটো করে খেপ দেয়। সবচেয়ে কাছের গ্রামটা প্রায় দশ মাইল দূরে। তার উপর, ওরুলিক আর তার দল এই অঞ্চলটায় শিকারের চেষ্টায় ঘোরাঘুরি করে বেড়াচ্ছে...এর মানেটা কী বুঝতে পারছেন তো?...এই দেখুন, পরিকল্পনা অনুযায়ী গাছ-কাটা এইখান থেকে শুরু হয়ে স্টেশনের দিকটায় এগিয়ে আসতে থাকার কথা—আর ওই বদম্যেশগুলো সেটাকে একেবারে বনের ভেতরের দিকে নিয়ে গেছে। উদ্দেশ্যটা—যাতে আমরা রেললাইনের দিকে কাঠগুলো বয়ে আনতে না পারি। এবং ওরা বিশেষ ভুলও করেনি—আমরা কাঠ বয়ে আনার এই কাজটার জন্যে মাত্র এক-শোটা গাড়িও পাব না। এটা ওরা একটা সাংঘাতিক ঘা বসিয়েছে আমাদের ওপর...অভ্যুত্থানের ব্যাপারটার চেয়ে এটা কম গুরুতর নয়।'

মানচিত্রের মোমে-মাজা কাগজটার ওপরে ঝুঝুরাইয়ের শক্ত ভারী মুঠিটা এসে পড়ল।

ঝুঝুরাই যেটা বলতে বাকি রেখেছে, অবস্থার সেই আরও ভীষণ দিকটা এই তেরোজনের প্রত্যেকেই স্পষ্ট দেখতে পেল। শীত আসন্ন। এরা দেখতে পেল—তুষারপাতের হিমশীতল মুঠোর মধ্যে আটকে গেছে হাসপাতাল, স্কুল, অফিস-বাড়ি আর লক্ষ লক্ষ মানুষ; লোকের ভিড়ে ছেয়ে গেছে স্টেশন, আর এদিকে যাত্রী বয়ে নিয়ে যাবার জন্য সগুাহে মাত্র একখানা করে ট্রেন।

গভীর একটা নিস্তব্ধতার মধ্যে অবস্থাটা প্রত্যেকে কল্পনা করতে লাগল।

শেষে ফিওদর তার হাতের মুঠিটা খুলল।

'একটামাত্র উপায় আছে, কমরেডসব,' বলল সে, 'তিন মাসের মধ্যে স্টেশন থেকে গাছ-কাটার জায়গাটা পর্যন্ত চার মাইল ছোট-লাইনের একটা রেলপথ আমাদের তৈরি করে নিতেই হবে। কাঠ-কাটা শুরু হয়েছে যেখানটায়, সেখান পর্যন্ত লাইনের প্রথম অংশটা ছ-সপ্তাহের মধ্যেই তৈরি করে নেওয়া চাই। আমি গত এক সপ্তাহ ধরে এ-ব্যাপারে লেগে আছি। আমাদের দরকার,' গলাটা শুকিয়ে এসেছে ঝুঝুরাইয়ের, 'ভাঙা স্বরে সে বলে চলল, 'সাড়ে তিন-শো শ্রমিক আর দু'জন ইঞ্জিনিয়ার। যথেষ্ট রেলের মাল আর সাতটা ইঞ্জিনও আছে পুচ্চা-ভোদিংসায়। কমসমালের কমীরা গুদামঘরে ঝুঁজে ঝুঁজে বের করেছে। যুদ্ধের আগে পুচ্চা-ভোদিংসা থেকে শহর পর্যন্ত একটা ছোট রেললাইন বসাবার বন্দোবস্ত করা হয়েছিল। মুশকিলটা হচ্ছে, বোয়ার্কায় শ্রমিকদের থাকার মতো জায়গা নেই, একটামাত্র ভাঙাচোরা বাড়ি আছে—ইকুল। ছোট ছোট দলে ভাগ করে দিয়ে এক-একবারে দু'সপ্তাহের জন্যে ওখানে লোক পাঠাতে হবে আমাদের। তার বেশিদিন ওরা ওখানে থাকতে পারবে না।

কমসমোলীদের কি পাঠাব আমরা ওখানে, আকিম?’ উত্তরের জন্য অপেক্ষা না করেই সে বলে যেতে লাগল, ‘কমসমোল যতবেশি সংখ্যায় সম্ভব সভ্যদের ওখানে পাঠিয়ে দেবে। প্রথমে ধরা যাক সলোমেন্কা সংগঠনটিকে আর শহরের সংগঠনের একটা অংশকে। কাজটা কঠিন, খুবই কঠিন, কিন্তু ছেলেদের যদি বুঝিয়ে বলা হয় যে এর ফলে শহর আর রেলপথ রক্ষা পাবে, তাহলে আমি নিশ্চয় বলতে পারি ওরা করবে।’

রেলওয়ের বড়কর্তা সন্দেহের সঙ্গে মাথা নাড়ল।

‘আমার মনে হয়, কোনো লাভ নেই। বনের ভেতর দিয়ে এরকম অবস্থায় শরতের বৃষ্টির মুখোমুখি আর আসন্ন তুষারপাতের মধ্যে চার মাইল লাইন পাতা...’ ক্রান্তভাবে বলা শুরু করেছিল সে। কিন্তু বুখরাই তাকে থামিয়ে দিল।

‘জ্বালানিকাঠের সমস্যাটার দিকে তোমার বেশি নজর রাখা উচিত ছিল, আন্দ্রেই ভাসিলিয়েভিচ। লাইনটা পাততেই হবে, এবং পেতে ফেলবও আমরা। হাত গুটিয়ে বসে থেকে ঠাণ্ডায় জমে গিয়ে নিশ্চয়ই মরতে চাইনে আমরা।’

\*

\*

\*

হাতিয়ার-সরঞ্জামের শেষ বোঝাটা ট্রেনে চাপিয়ে নেওয়া হল। ট্রেনের লোকজন তাদের নিজের নিজের জায়গায় গেল। খিরখির বৃষ্টি পড়ছে। রিতার চকচকে চামড়ার কোর্তাটা বেয়ে মুক্তোর মতো জলের ফোঁটা গড়িয়ে পড়ছে।

তোকারেভের হাত জোরে চেপে ধরে রিতা নরম-গলায় বলল, ‘আমাদের শুভকামনা রইল।’

বৃদ্ধ তার ঘন ধূসর তুল্লুর নিচ দিয়ে রিতার দিকে স্নেহে তাকাল।

নিজের মনের কথা জবাবেই যেন সে বলল, ‘হ্যাঁ, বেশকিছুটা অসুবিধার মধ্যেই আমাদের ফেলেছে ওই শয়তানগুলো। তোমরা বরং এদিকের ব্যাপারগুলোর দিকে একটু নজর রেখো—যাতে ওখানে কোনো গোলমাল বাধলে তোমরা ঠিক জায়গাটিতে গিয়ে চাপ দিতে পারো। এখানকার এইসব অকর্মাগুলো গড়িমসি ছাড়া কিছু করতে পারে না। আচ্ছা, এবার ট্রেনে চাপার সময় হল, মেয়ে।’

বৃদ্ধ তার কোর্তার বোতাম আঁটল। শেষমুহূর্তে রিতা প্রসঙ্গক্রমে জিজ্ঞেস করল, ‘করচাগিন যাচ্ছে না? তাকে তো কই ছেলেদের মধ্যে দেখতে পেলাম না।’

‘না, সে আর কার্যার্থক ট্রলি চেপে গতকাল চলে গেছে আমাদের আসার ব্যবস্থা করার জন্যে।’

সেই মুহূর্তে তাদের দিকে প্র্যাটফর্ম বেয়ে তাড়াতাড়ি আসছিল জার্কি, দুবাভা আর আল্লা বোরহার্হ—আল্লার কাঁধের উপর কোর্তাটা আলতোভাবে রাখা, আর সরু আঙুলের ফাঁকে একটা সিগারেট ধরা।

এরা এসে পড়ার আগে তোকারেভকে রিতার আর একটামাত্র প্রশ্ন করার মতো সময় ছিল।

‘করচাগিনকে তোমার পড়ানো চলছে কেমন?’

বিস্মিত হয়ে বৃদ্ধ তাকাল রিতার দিকে।

‘কিসের পড়ানো? ওর ভার তো তোমার ওপর, তাই না? তোমার কথা অনেক বলেছে ও আমায়। কী প্রশংসাই না করে তোমার!’

অবিশ্বাসের চোখে তাকাল রিতা। 'ঠিক বলছ, কমরেড তোকারেড? আমার কাছে পড়ার পর ও কি বরাবর তোমার কাছে ঠিকমতো সবকিছু বুঝে নেবার জন্যে যায়নি?' জোরে হেসে উঠল বৃদ্ধ। 'আমার কাছে? কই, আমি তো কোনোদিন ওর টিকিও দেখতে পাইনে।'

আওয়াজ ছাড়ল ইঞ্জিনটা। একটা কামরা থেকে ক্লাভিচেক চেঁচিয়ে উঠল, 'এই, কমরেড উস্তিনোভিচ, আমাদের খুড়োকে ছেড়ে দাও! ওঁকে না হলে আমাদের চলবে কী করে?'

চেক-ছেলোটি আরও কী যেন বলতে যাচ্ছিল। কিন্তু এসে-পড়া আর তিনজনকে দেখে নিজেকে সামলে নিল সে। একমুহূর্তের জন্য তার নজর পড়ল আল্লার চোখের উদ্বেগভরা চাউনির দিকে, দুবাতার দিকে আল্লার বিদায়ের হাসিটুকু লক্ষ করে একটু যন্ত্রণাবোধও হল তার। তাড়াতাড়ি সে জানলার দিক থেকে মুখ ঘুরিয়ে নিল।

\*

\*

\*

শরতের বৃষ্টি নেমেছে। ছাট এসে লাগছে মুখে। সীসের মতো কালো, জলে ভারী, নিচু মেঘের স্তর গুঁড়ি মেরে এগিয়ে আসছে মাটির বুকের উপর দিয়ে। শরতের এই শেষের দিনগুলি এসে অরণ্যপ্রহরীদের নিষ্পত্র করে দিয়েছে। প্রাচীন হর্নবিমগাছগুলোকে কেমন যেন শীর্ণ আর দুর্বল দেখাচ্ছে—তাদের বলি-রেখাঙ্কিত গুঁড়িগুলো বাদামি শেওলায় ঢেকে গেছে। নির্মম শরৎ তাদের শ্যামলশোভাময় পত্রচ্ছদ কেড়ে নিয়েছে। গাছগুলো দাঁড়িয়ে আছে নগ্ন আর অসহায়।

স্টেশনের ছোট্ট বাড়িটা যেন বনের নির্জনতার মধ্যে হারিয়ে গেছে। স্টেশনের মাল-তোলার পাথুরে প্র্যাটফর্মটা থেকে সদ্য-কেটে-তোলা মাটির একফালি পথ চলে গেছে বনের দিকে। এই পথটার চারধারে পিপড়ের মতো মানুষের ভিড়।

পায়ের নিচে বিশ্রীভাবে আটকে যাচ্ছে চটচটে কাদামাটি। বাঁধটার পাড়-যেঁষে মানুষগুলো প্রচণ্ড বেগে ঝুঁড়ে চলেছে আর পাথরের সঙ্গে ঠুকে গিয়ে গাঁতি-বেলচার আওয়াজ উঠছে।

সবু চালুনির ফাঁক দিয়ে জল ঝরে পড়ার মতো বৃষ্টি নেমেছে। হিমশীতল জলের ফোঁটা মানুষগুলোর পোশাক ভেদ করে গায়ে এসে লাগছে। বৃষ্টিতে তাদের এত পরিশ্রমের ফল ধুয়ে যাবার আশঙ্কা দেখা দিয়েছে—মাটিটা কাদা হয়ে গড়িয়ে পড়ছে বাঁধটার ঢালু বেয়ে।

সর্বান্ত ভিজে গিয়ে তাদের পোশাকগুলো কনকনে ঠাণ্ডা আর ফুলে ঢোল হয়ে যাচ্ছে, তাই নিয়েই মানুষগুলো অঙ্ককার নেমে আসার পরেও অনেকক্ষণ পর্যন্ত কাজ চালিয়ে যাচ্ছে। আর, রোজ্জ একটু একটু করে মাটির এই বাঁধটা এগিয়ে চলেছে বনের ভেতর দিকে।

আগে একটা পাকা বাড়ি ছিল, তারই কুঁচসিত কঙ্কালটা দাঁড়িয়ে আছে স্টেশন থেকে অনতিদূরে। টেনে-হিঁচড়ে কিংবা ঝুঁড়ে তুলে যা-কিছু বয়ে নিয়ে যাওয়া সম্ভব, বাড়িটার থেকে সেসবই নিয়ে গেছে লুটেরার দল অনেক আগেই। দরজা-জানলার জায়গাগুলোয় হাঁ-করা গর্ত। এককালে যেখানে উনুনের পাল্লা ছিল, এখন সেখানে কালো অঙ্ককার। ভাঙাচোরা ছাতটার গর্তগুলোর ফাঁকে বর্গাগুলো দেখাচ্ছে কঙ্কালের পাঁজরার মতো।

চারটে বড় কামরায় মাত্র কংক্রিটের মেঝেটুকু আস্ত আছে। রাত্রে চার-শো লোক এই মেঝের উপর তাদের জলে-ভেজা কাদা-লেপা পোশাকে শুয়ে থাকে। দরজার কাছে যখন তারা জামাকাপড়গুলো নিংড়ে নেয়, তখন তার থেকে কাদাটে জল চুইয়ে পড়ে। বৃষ্টির উদ্দেশ্যে আর এই পাঁকালো জমির উদ্দেশ্যে মানুষগুলো নিদারুণ গাল পাড়ে। কংক্রিটের মেঝেতে ঝড়ের পাতলা আস্তরণের উপর ঘন সারি বেঁধে তারা একটু গরম পাবার জন্য গা ঘেঁষাঘেঁষি করে শুয়ে থাকে। তাদের পোশাকগুলো থেকে অল্প অল্প বাষ্প ওঠে, কিন্তু শুকিয়ে যায় না। ফাঁকা জানলার কাঠামোগুলোয় আটকে দেওয়া চটের ছালাগুলোর ফাঁকে বৃষ্টির ছাট এসে পড়ে আর মেঝে দিয়ে জল চুইয়ে আসে। টিনের ছাদটার যেটুকু বাকি আছে, তার ওপরে বৃষ্টির চড়বড়ে শব্দ ওঠে আর দরজার বিরাট ফাঁকগুলো দিয়ে বাতাস ঢোকে শিস কেটে।

সকালে এরা চা খায় ভেঙে-নুয়ে-পড়া একটা ব্যারাক-ঘরে, যেটার মধ্যে রান্নার কাজ চালিয়ে নেওয়া হচ্ছে। তারপর কাছে যায় সবাই। দুপুরে খাবার স্রেফ মুসুরির ডাল সেদ্ধ—দিনের-পর-দিন এই একই অসহ্য একঘেয়ে খাদ্য। আর, দৈনিক বরাদ্দ—কয়লার মতো কালো দেড়-পাউন্ড কুটি।

শহর থেকে এর বেশি আর জোগান দেওয়া সম্ভব নয়।

কার্যার্থক্য ভালে রিয়ান নিকোদিমভিচ পাতোশকিন—লম্বা, রোগাটে বৃদ্ধ, দুই গাল তার বসে গেছে, আর প্রধান-মন্ত্রী ভাকুলেক্সো—গাঁটাগোঁটা, মোটা নাক আর কর্কশ মুখের ভাব—এরা দু'জন স্টেশনকর্তার বাড়িতে রয়েছে।

স্টেশনে 'চেকা'র প্রতিনিধির নাম খোলিয়াভা—বেঁটেখাটো চটপটে এই লোকটির ছোট্ট কামরায় তার সঙ্গে রয়েছে তোকারেভ।

অবিচলিত ধৈর্যের সঙ্গে মানুষগুলো কষ্ট সহ্য করে চলেছে আর রেললাইন পাতার জন্য এই বাঁধটা দিনের-পর-দিন বনের মধ্যে ক্রমশই এগিয়ে চলেছে।

কিছু লোক অবশ্য পালিয়ে গেছে : প্রথমে ন'জন, তার কয়েকদিন বাদেই আরও পাঁচজন।

প্রথম বড় বিপদ ঘটল কাজ শুরু হবার এক সপ্তাহ বাদে : রাত্রির ট্রেনে কুটির সরবরাহ এসে পৌঁছল না।

তোকারেভকে জাগিয়ে তুলে দুবাতা খবরটা জানাল।

পার্টি ফ্রন্টের সম্পাদকটি বিছানার ধারে তার লোমশ পাদুটো ঝুলিয়ে বসে বগলের নিচে চুলকাতে লাগল প্রাণপণে।

'খেল্ শুরু হল!' ঘোঁঘোঁ করে বলে সে তাড়াতাড়ি পোশাক পরতে লাগল।

খোলিয়াভা তার ছোট ছোট পা দ্রুত চালিয়ে এসে ঘরে ঢুকল।

'এক্ষুনি ছুটে গিয়ে বিশেষ বিভাগকে টেলিফোন করো।' তাকে নির্দেশ দিয়ে তোকারেভ দুবাতার দিকে ফিরে বলল, 'কুটি সম্বন্ধে একটি কথাও কাউকে বলবে না, মনে থাকে যেন।'

রেলওয়ে টেলিফোন-অপারেটরদের সঙ্গে পুরো আধঘণ্টা চেষ্টামেচি করার পর অদম্য খোলিয়াভা শেষপর্যন্ত বিশেষ বিভাগের প্রধান-সহকারী বুখরাইয়ের সঙ্গে যোগাযোগ করতে সমর্থ হল। এই সমস্ত সময়টুকু তার পাশে অধৈর্যের সঙ্গে ছটফট করেছে তোকারেভ।

‘কী! ক্লটি গিয়ে পৌছয়নি? এখনি দেখছি এর জন্যে কে দায়ী!’ টেলিফোনের তার বেয়ে আসা ঝুঝরাইয়ের গলাটা ভয়ঙ্কর শোনাল।

ক্রুদ্ধ তোকারেড চোঁচিয়ে বলল, ‘কাল লোকগুলোকে খেতে দেব কী?’

অনেকক্ষণ চুপচাপ—বোঝা গেল ঝুঝরাই একটা-কিছু ব্যবস্থা করার কথা ভাবছে।

শেষে বলল, ‘আজ রাট্রেই পেয়ে যাবে ক্লটি। আমি গুগো লিথকে-কে পাঠাচ্ছি গাড়িতে। ও রাস্তা জানে। সকালের মধ্যে ক্লটি পেয়ে যাবে।’

ভোরের দিকে সর্বাস্ত্রে কাদা-লেপা একটা গাড়ি ক্লটি-বোঝাই সব বস্তা নিয়ে স্টেশনে এসে পৌছল। ক্লান্তভাবে নেমে এল লিথকে—নিদ্রাহীন একটা রাত্রির শেষে তার মুখ বিবর্ণ আর শীর্ণ।

রেললাইন পাতার কাজটা নিয়ে একটা লড়াই ক্রমশ তীব্রতর হয়ে দাঁড়াল। রেলওয়ের পরিচালনা-দপ্তর জানাল—লাইন-পাতার জন্য স্লিপার পাওয়া যাচ্ছে না। শহরের কর্তৃপক্ষ লাইন-পাতার জায়গায় রেললাইন আর ইঞ্জিন পাঠাবার কোনো উপায় করে উঠতে পারল না। ইঞ্জিনগুলোরও দেখা গেল বেশকিছু মেরামতি দরকার। প্রথম দলে যে-শ্রমিকরা কাজে গিয়েছিল, তাদের বদলি হিশেবে যাবার জন্য আর-কোনো শ্রমিক পাওয়া যাচ্ছে না। অতঃ প্রথম দলের শ্রমিকরা এত ক্লান্ত যে তাদের আর আটকে রাখার কোনো প্রশ্নই ওঠে না।

নেতৃস্থানীয় পার্টি-সভারা এসে জড়ো হল ভেঙে-নুয়ে-পড়া চালাটার নিচে—একটা বাতির পলতের আলোয় ঘরটা আবছা আলোকিত। এখানে তারা অনেক রাত পর্যন্ত জেগে অবস্থা সম্বন্ধে আলোচনা করল।

পরদিন সকালে তোকারেড, দুবাবা আর ক্লাভিচেক শহরে এল ছ’জন লোক সঙ্গে নিয়ে ইঞ্জিনগুলো মেরামত করে নেবার জন্য যাতে রেলগুলো তাড়াতাড়ি পৌছাতে পারে। ক্লাভিচেকের পেশা ছিল ক্লটি তৈরি করা, তাকে সরবরাহ বিভাগে পাঠানো হল পরিদর্শক হিসেবে; অন্যেরা রওনা হল পুচ্চা-ভোদিংসার দিকে।

এদিকে সমস্তক্ষণ বৃষ্টি পড়েই চলল অবিরাম ধারায়। পাভেল করচাগিন কাদায় আটকে যাওয়া তার পা-টা বেশ একটু জোরেই টানল। সঙ্গে সঙ্গে দারুণ একটা ঠাণ্ডার অনুভূতি তাকে জানিয়ে দিল—ক্ষয়ে-যাওয়া তলাটা তার শেষপর্যন্ত জুতো থেকে বিচ্ছিন্ন হয়ে গেছে। এই কাজে আসার সময় থেকেই তার ছেঁড়া বুট-জোড়াটা অত্যন্ত অস্বস্তির কারণ হয়ে আছে। কখনও শুকোয় না জুতোটা আর ভেতরে চুকে-যাওয়া কাদা প্যাচপ্যাচ করে হাঁটার সময়। এখন তো একটা তলা একেবারেই গেল—বরফ-ঠাণ্ডা কাদাজমি তার নগ্ন পায়ের তলাটা যেন কেটে দিতে লাগল। জুতোর তলাটা কাদা থেকে টেনে তুলে গভীর হতাশার সঙ্গে সেটার দিকে তাকিয়ে, সে যে আর গাল পাড়বে না বলে মনে-মনে প্রতিজ্ঞা করেছিল, সেই প্রতিজ্ঞা ভঙ্গ করল। একটা খালি-পা নিয়ে কাজ চালানো সম্ভব নয়—খুঁড়িয়ে খুঁড়িয়ে তাই সে ব্যারাক-ঘরটায় ফিরে এসে তোলা-উনুনটার পাশে বসল। কাদা-লেপা পায়ের পটিটা খুলে নিয়ে আড়ষ্ট পার্টিকে মেলে দিল আগুনের দিকে।

রেললাইনম্যানের বউ ওদারকা রান্নাঘরের টেবিলটায় বিট কাটছিল—এখানকার রাঁধুনির সহকারী হিশেবে কাজ করে সে—বেশ লম্বা-চওড়া জ্বীলোক, এখনও বয়েস

আছে তার, চণ্ডা কাঁধ প্রায় পুরুষালি ধরনের, পীনোন্নত বুক, বেশ গুরুনিতম্বিনী। বেশ জোরের সঙ্গে ছুরি চালাচ্ছে সে আর সবজির টুকরোগুলো তার ক্ষিপ্র আঙুলগুলোর নিচে পাহাড়ের মতো দ্রুত জমে উঠছে।

পাভেলের দিকে তাকাল্যভরে একনজর তাকিয়ে ওদারকা তার উদ্দেশ্যে বিরক্তির সঙ্গে বলে উঠল, 'খাবার পাবার আশায় যদি এসে থাকো, তাহলে একটু আগেই এসে গেছ হে ছেলে। কাজে ফাঁকি দিয়ে এভাবে কেটে পড়ার জন্যে লজ্জা পাওয়া উচিত তোমার! পা সরিয়ে নাও উনুন থেকে। এটা রান্নাঘর, স্নানঘর নয়!'

ঠিক সেই সময় একটি বয়স্ক রাধুনি এসে পড়ল।

অসময়ে রান্নাঘরে তার এই এসে পড়ার কারণটা ব্যাখ্যা করল পাভেল, 'হতভাগা বুটটা আমার ছিড়ে টুকরো টুকরো হয়ে গেছে একেবারে।'

বৃদ্ধ রাধুনি ছেঁড়া বুটটার দিকে তাকিয়ে দেখে মাথা নেড়ে ওদারকাকে দেখিয়ে বলল, 'ওর স্বামী হয়তো কিছু-একটা ব্যবস্থা করতে পারবে—লোকটা একটু-আধটু মুচিগিরি জানে। সেই ব্যবস্থা বরং করো, নইলে ভয়ানক অসুবিধেয় পড়বে। বুট ছাড়া তো চালাতে পারবে না।'

কথাটা শুনে ওদারকা পাভেলের দিকে আরেকবার তাকিয়ে দেখল। অনুতাপের সঙ্গে স্বীকার করল সে, 'আমি তোমাকে কাজে-ফাঁকিদেনেঅলা বলে ধরে নিয়েছিলাম।'

পাভেল-যে কিছু মনে করেনি, সেইটে বোঝাবার জন্য হাসল। ওদারকা বিশেষজ্ঞের চোখ দিয়ে পরীক্ষা করে দেখল বুটটা।

'আমার স্বামী এটা সেলাই করবে না—সে চেষ্টা করে কোনো লাভও নেই', সিদ্ধান্ত করল সে, 'আচ্ছা, আমি যেটুকু করতে পারি সেটা বলছি। আমাদের বাড়ির পিছনে একটা গালোশ্-জুতো পড়ে রয়েছে—সেটা তোমাকে এনে দেব। তুমি সেটা বুটের ওপরে পরে নিতে পারো। এভাবে তো চলাফেরা করতে পারবে না, অসুখে পড়বে তাহলে! যে-কোনো দিন বরফ-পড়া শুরু হবে এখন!'

ওদারকা এবার গভীর সহানুভূতির সঙ্গে তার ছুরিটা নামিয়ে রেখে তাড়াতাড়ি বেরিয়ে গেল এবং অন্ধকারের মধ্যে উঁচু একটা গালোশ্-জুতো আর খানিকটা মোটা কাপড়ের ফালি নিয়ে ফিরে এল।

এতক্ষণে পাভেলের পা শুকনো আর গরম হয়ে উঠেছে, মোটা কাপড়ে পা জড়িয়ে গালোশ্-জুতোর মধ্যে ঢুকিয়ে নিয়ে সে এর প্রতিদানে ওদারকার দিকে কৃতজ্ঞতার দৃষ্টিতে তাকাল।

\*

\*

\*

তোকারেভ রাগে ছটফট করতে করতে ফিরে এল শহর থেকে। খোলিয়াভার ঘরে সে সক্রিয় কমিউনিস্টদের একটা আলোচনা-বৈঠক ডেকে অপ্রিয় খবরটা শোনাও তাদের।

'গোটা পথ জুড়ে কেবল বাধা আর বাধা। যেখানেই যাও, চাকা ঘুরছে বলে মনে হলেও, দেখবে সামনে এগুচ্ছে না একটুও। ওই 'শাদা ইঁদুরগুলো' সংখ্যায় বড় বেশি, আর মনে হচ্ছে—আমাদের জীবনভর ওরাও টিকে থাকবে। আমি বলে দিচ্ছি তোমাদের—অবস্থাটা খুব খারাপ ঠেকছে। আমাদের বদলি-লোকদের আসার এখনও

কোনো ব্যবস্থা করে ওঠা যায়নি, আর কতজন যে আসবে তাও কেউ জানে না। যে-কোনো দিন বরফ পড়তে পারে, আর তার আগেই ওই জলো বাদার উপর দিয়ে লাইন-পাতার কাজটা যেমন করে হোক শেষ করতেই হবে আমাদের—কারণ মাটি জমাট বেঁধে গেলে বড্ড দেরি হয়ে যাবে। অর্থাৎ, শহরের লোকজন যারা সবকিছুর মধ্যে তালগোল বাধিয়ে ফেলছে, তাদের ওরা চাক্ষা করে তুলবে, এদিকে আমাদের এখানে কাজের গতি ডবল বাড়িয়ে দিতে হবে। রেললাইনটা পাততেই হবে এবং মরে গেলেও আমরা পাতবই লাইনটা। যদি না পারি, তাহলে আমরা বলশেভিক নই—একতাল কাদামাটি।’ কোতারেভের ভাঙা গম্বীর গলার স্বরে ইস্পাতের দৃঢ়তা, ঘন ভুরু নিচে চোখদুটোয় তার জেদভরা দৃষ্টি।

‘আজ নিজেদের মধ্যে আমরা একটা আলোচনা-বৈঠক ডাকব এবং পার্টি-সভ্যদের সবাইকে ব্যাপারটা ব্যাখ্যা করে দিয়ে আগামীকাল থেকে সবাই কাজে লেগে যাব। যারা পার্টি-সভ্য নয়, তাদের আমরা সকালে ছেড়ে দেব; বাদবাকি আমরা থাকব—এই হচ্ছে প্রাদেশিক কমিটির সিদ্ধান্ত,’ ভাঁজ-করা একটা কাগজ পানক্রাতভের হাতে দিয়ে সে বলল।

পানক্রাতভের কাঁধের উপর দিয়ে ঝুঁকে দেখে পাভেল করচাগিন লেখাটা পড়ল:

জরুরি অবস্থার দরুন কমসমোলের প্রত্যেকটি সভ্যকে কাজে লেগে থাকতে হবে এবং জ্বালানিকাঠের প্রথম কিত্টিটা না-পৌছানো পর্যন্ত কেউ ছাড়া পাবে না।

ব্রিতা উত্তিনোভিচ

কমসমোলের প্রাদেশিক কমিটির সম্পাদকের পক্ষে।

নিচু ব্যারাকটা লোকে ভর্তি—সংকীর্ণ জায়গাটুকুর মধ্যে একশো-কুড়ি জন মানুষের গাদাগাদি। দেয়ালে ঠেস দিয়ে দাঁড়িয়ে আছে, টেবিলের ওপরে উঠেছে, এমনকি, কেউ কেউ তোলা-উনুনটার ওপরেও চেপে বসেছে।

পানক্রাতভ মিটিং আরম্ভ করল। তারপরে তোকারেভ ছোট একটু বক্তৃতা দিয়ে যে-ঘোষণাটা দিয়ে তার বক্তব্য শেষ করল, তার ফলটা হল একটা বোমা ফেটে পড়ার মতো :

‘কমিউনিষ্ট আর কমসমোল সভ্যরা কেউ কাল কাজ ছেড়ে যেতে পারবে না।’

বৃদ্ধ মানুষটি তার এই ঘোষণাটা করবার সময় হাত নেড়ে এমন একটা ভঙ্গি করল যাতে এই সিদ্ধান্তের যে আর-কোনো নড়চড় নেই সেটা স্পষ্ট হয়ে উঠল। এই গর্ত থেকে বেরিয়ে শহরে যাবার, বাড়ি যাবার সমস্ত আশা-আকাঙ্ক্ষা নির্মূল করে দিল তার এই কথা। তুচ্ছ কতকগুলো গলার আওয়াজে কয়েক মুহূর্তের জন্য আর সবকিছু চাপা পড়ে গেল। নড়েচড়ে-ওঠা দেহগুলো ক্ষীণ তেলের আলোর শিখাটিকে ভয়ানকরকম কাঁপিয়ে তুলল। আধা-অন্ধকারে কারও মুখ স্পষ্ট দেখা যাচ্ছিল না, বেড়েই চলল গোলমাল। অনেকে ঘরে ফেরার জন্য ব্যাকুলতা প্রকাশ করল। অন্যরা বিরক্তির সঙ্গে প্রতিবাদ জানিয়ে বলল, যতদূর পারা যায় তারা কষ্ট সহ্য করেছে। কেউ কেউ চুপ করে শুনল খবরটা। ছেড়ে যাবার কথা বলল একজন মাত্র।

‘জাহান্নামে যাক সব!’ এককোণ থেকে কুখসিত একরাশ গালাগাল ছেড়ে সে বলে উঠল, ‘এখানে আমি আর একদিনও থাকছি না। এমন সশ্রম দণ্ডভোগ করা যেতে পারে বেআইনি অপরাধ কিছু করে থাকলে তার শাস্তি হিশেবে। কিন্তু আমরা কী করেছি? দু-সপ্তাহ হয়েছি আমরা, খুব হয়েছে। এই সিদ্ধান্ত যারা করেছে, তারা এগিয়ে এসে নিজেরা নামুক-না কাজে! এমন কেউ কেউ হয়তো আছে যারা এই পচা কাদায় খোঁচারুঁচি করে মরতে চায়, কিন্তু আমার তো এই একটাই মোটে জীবন! আমি চললাম কাল।’

গলাটা আসছিল গুকুনেভের পেছনদিক থেকে। লোকটাকে দেখবার জন্য একটা দেশলাই জ্বালাল সে। দেশলাইয়ের আলোয় একমুহূর্তের জন্য অন্ধকারের মধ্যে ফুটে উঠল বস্তার রাগে বিকৃত হাঁ-করা মুখখানা। প্রাদেশিক খাদ্য-বিভাগের এক কেরানির ছেলেটিকে চিনে নেবার জন্য গুকুনেভের পক্ষে সেই একমুহূর্তই যথেষ্ট।

‘দেখে রাখছ, অ্যা?’ খিচিয়ে উঠল ছেলেটি, ‘বেশ, বেশ। আমি ভয় পাইনে, চোর নই আমি।’

দেশলাইয়ের কাঠিটা নিভে গেল। পানক্রাতভ উঠে শরীরটাকে টান করে দাঁড়াল। ‘এ কী ধরনের কথা? পার্টি-কাজকে সশ্রম দণ্ডভোগের সঙ্গে তুলনা করার গোস্তাকি কার?’ সামনের সারিগুলোর ওপরে ভারী-চোখে তাকিয়ে নিয়ে সে বজ্রস্বরে বলে উঠল, ‘না, কমরেড, আমাদের শহরে ফিরে যাওয়া চলবে না। আমাদের জায়গা এটাই। আমরা যদি এখন সরে পড়ি, তাহলে শীতে জমে মারা যাবে লোকজন। যত তাড়াতাড়ি কাজটা শেষ করব আমরা, তত শিগগির বাড়ি ফিরতে পারব। পেছনদিক থেকে ওই কাঁদুনে ইঁদুরটা যে পালিয়ে যাবার কথা বলছে, সেটা আমাদের আদর্শের সঙ্গে বা শৃঙ্খলার সঙ্গে খাপ খায় না।’

ডক-মজুর পানক্রাতভ—লম্বা বক্তৃতা করতে ভালোবাসে না সে। কিন্তু এই ছোট্ট বিবৃতিটুকুতেও বাধা দিল সেই একই ক্রুদ্ধ গলার স্বর, ‘পার্টি-সভা নয় যারা, তারা তো চলে যাবে, নাকি?’

‘হ্যাঁ।’

খাটো ওভারকোট-পরা একটি ছেলে কনুই দিয়ে ভিড় ঠেলে সামনে এল। একটা কমসমোল কার্ড বাদুড়ের মতো উড়ে ঘরটা পার হয়ে এসে পানক্রাতভের বুকের উপর ঝুঁকে গিয়ে টেবিলের উপর পড়ে খাড়া হয়ে রইল।

‘এই নাও তোমাদের কার্ড। একটুকরো কার্ডবোর্ডের জন্যে আমি আমার শরীর বলি দিয়ে বসার ঝুঁকি নিতে চাইনে!’

শেষ কথাগুলো তার ডুবে গেল ক্রুদ্ধ কতকগুলো গলার গর্জনে :

‘যেটা ছুড়ে দিলে, সেটাকে কী মনে করেছে?’

‘বেইমান কোথাকার!’

‘আরামে থাকার কথা ভেবে কমসমোলে ঢুকেছিল।’

‘তাড়িয়ে দাও ওকে!’

‘আমরা তোকে মাথায় ভুলে রাখব বলে ভেবেছি, হারপোকা!’

দলত্যাগী ছেলেটা মাথা নিচু করে বেরোবার দরজাটার দিকে এগিয়ে গেল। ছোঁয়াচে রোগীর সামনে লোকে যেমন সংকুচিত হয়ে আসে, তেমনিভাবে সরে গিয়ে



তাকে সবাই বেরিয়ে যাবার পথ করে দিল। তার পেছনে দরজাটা একটা ক্যাচকোঁচ শব্দ তুলে বন্ধ হয়ে গেল।

ছুড়ে ফেলে-দেওয়া সেই কমসমোল সভ্যকার্ডখানা তুলে নিয়ে পানক্রান্ত সেটাকে তেলের আলোর শিখার উপর ধরল। কার্ডবোর্ডের টুকরোটা জ্বলে উঠে পুড়ে যাবার সঙ্গে সঙ্গে দুমড়ে কুঁকড়ে যেতে লাগল।

\*

\*

\*

বনের মধ্যে একটা গুলির শব্দ প্রতিধ্বনিত হল। নুয়ে-পড়া ব্যারাক-ঘরটার দিক থেকে একজন ঘোড়সওয়ার ছুটে অদৃশ্য হয়ে গেল বনের অন্ধকারে। একমুহূর্তে ইকুল-বাড়ি আর ব্যারাক-ঘরটার মধ্যে থেকে লোকজন দৌড়ে বেরিয়ে এল। একজন হোঁচট খেয়ে আবিষ্কার করল—দরজার বাজুটার ফাঁকে একটুকরো হালকা কাঠের তক্তা আটকানো। দেশলাইয়ের একটা কাঠি জ্বলে উঠল, অস্থির শিখাটাকে বাতাস থেকে আড়াল করে সবাই পড়ল :

এখান থেকে সরে পড়ো, যেখান থেকে এসেছ সেইখানে ফিরে যাও। যদি না যাও, তাহলে তোমাদের প্রত্যেকটি লোককে ধরে ধরে গুলি করে মারব। আগামী কাল রাত্রি পর্যন্ত তোমাদের চলে যাবার জন্য সময় দিলাম।

আত্মমান চেস্নক

চেস্নক গুলিকের দলের লোক।

\*

\*

\*

রিতার কামরায় টেবিলের উপর রয়েছে একটা খোলা রোজনামচার খাতা।

২ ডিসেম্বর

আজ সকালে আমাদের এখানে প্রথম তুষারপাত হল। প্রচণ্ড ঠাণ্ডা পড়েছে। ভিয়াচেন্নাভ গুলশিনস্কির সঙ্গে সিঁড়িতে দেখা হল, আমরা দু'জনে একসঙ্গে রাস্তায় নেমে হেঁটে চললাম।

গুলশিনস্কি বলছিল, 'এই প্রথম তুষারপাতটা আমি ভারি উপভোগ করি সবসময়। বিশেষ করে, এইরকম ঠাণ্ডা যখন পড়ে। ভারি সুন্দর, না?'

আমি কিন্তু বোয়ারস্কার কথা ভাবছিলাম—বললাম, তুষারপাত আর ঠাণ্ডা মোটেই খুশি করে না আমাকে, বরং দমিয়ে দেয়। কেন, সেটা বললাম ওকে।

গুলশিনস্কি বলল, 'ওটা নেহাতই একটা আত্মমুখী প্রতিক্রিয়া। এই কথা থেকে যদি কেউ যুক্তি দেখায়, তাহলে, বলতে গেলে, যুদ্ধের সময় যে-কোনো আমোদ-প্রমোদ, যে-কোনো আনন্দের প্রকাশকেই নিষিদ্ধ করে দিতে হয়। কিন্তু জীবন তো তা নয়। লড়াই যেখানে চলছে, সেই একফালি সীমান্ত-এলাকাতেই দুঃখ-বিষাদ সীমাবদ্ধ। সেখানেই মৃত্যুর আসন্নতায় জীবন ছায়াচ্ছন্ন। তবু সেখানেও লোকে হাসে। এবং যুদ্ধ-সীমান্ত থেকে দূরে জীবনের শ্রোত চিরাচরিতভাবেই বয়ে চলে : মানুষ হাসে, কাঁদে, দুঃখ পায়, আনন্দ করে, ভালোবাসে, আমোদ-প্রমোদ আর উদ্বেজনা চায়...'

গুলশিনকির এই কথাগুলির মধ্যে কোনোরকম ব্যঙ্গের আভাস খুঁজে পাওয়া কঠিন। পররাষ্ট্র জন-কমিশারিয়েটের একজন প্রতিনিধি এই গুলশিনকি। ১৯১৭ থেকে পার্টি-সভ্য। ভালোভাবে পোশাক-আশাক পরে সে, সর্বদা পরিষ্কার করে দাড়ি কামানো, সবসময়ে তার গায়ে একটা মৃদু সুগন্ধ। আমাদের বাড়িতে সেগালের ঘরে সে আছে। মাঝে মাঝে সন্দের দিকে আমার সঙ্গে দেখা করতে আসে। ওর সঙ্গে কথাবার্তা বলতে বেশ আশ্রয় জাগে—ইউরোপ সঙ্ঘে অনেক কিছু জানে, প্যারিসে বহু বছর ছিল। কিন্তু ওর সঙ্গে আমার ভালোরকম বন্ধুত্ব গড়ে উঠতে পারে কিনা, সে-সঙ্ঘে আমার সন্দেহ আছে। কারণ, ওর কাছে আমি মুখ্যত নারী; আমি-যে ওর পার্টি-কমরেড, এ-ব্যাপারটা ওর কাছে পরবর্তী বিবেচনার বিষয়। এটা ঠিক যে এ-সঙ্ঘে গুলশিনকি তার মনোভাব আর মতামত লুকোবার চেষ্টা করে না—নিজের মতবাদ সঙ্ঘে খুলে বলার পৌরুষ ওর আছে এবং আমার প্রতি ওর মনোযোগের মধ্যে কোনোরকম স্থূলতা নেই। একধরনের সৌন্দর্যের সঙ্গে সেটাকে প্রকাশ করার দিকে ওর একটা পটুত্ব আছে। তবু, আমি ওকে পছন্দ করি না।

গুলশিনকির এই সুমার্জিত ইউরোপীয় আদর-কেতার চেয়ে বুখরাইয়ের ক্লক সরলতা আমার ঢের বেশি রুচিসম্মত।

বোয়ারুকা থেকে খবর আসে সংক্ষিপ্ত রিপোর্টের আকারে। প্রতিদিন আরও দু-শো গজ লাইন পাতা হচ্ছে। ওরা সরাসরি বরফ-জমাট মাটির ওপরে ত্রিপার পাতছে—তার জন্য অল্প গর্ত খুঁড়ে মাটি কেটে তুলছে। মাত্র দু-শো চল্লিশ জন লোক কাজ চালাচ্ছে। বদলি হিশেবে যারা গিয়েছিল, তাদের অর্ধেক লোক পালিয়ে গেছে। অবস্থা সেখানে সত্যিই ভয়ানক। বরফে যখন সবকিছু ঢেকে যাবে, তখন তার মধ্যে কী করে-যে ওরা কাজ চালাবে তা আমি তো কল্পনা করতে পারছি না। দুবাতা আজ একসঙ্গেই হগ গেছে। পুচা-ভোদিংসায় ওরা আটটা ইঞ্জিনের মধ্যে মাত্র পাঁচটা মেরামত করে নিতে পেরেছে। বাকিগুলোর জন্য যথেষ্ট পরিমাণে যন্ত্রপাতির অংশ পাওয়া যায়নি।

দমিত্রি দুবাতার বিরুদ্ধে ট্রামওয়ে-কর্তৃপক্ষ অপরাধমূলক কাজের অভিযোগ রুজু করেছে। পুচা-ভোদিংসা থেকে শহর অবধি ট্রামওয়ের যতগুলো খোলা-গাড়ি যাতায়াত করে, তার সবগুলোকে দমিত্রি আর তার কর্মীদল আটক করে যাত্রীদের নামিয়ে দিয়ে বোয়ারুকার ওদিকে লাইন-পাতার জন্য রেল-বোঝাই করেছিল। শহরে রেলস্টেশনে ওরা ট্রামলাইন বেয়ে উনিশ গাড়ি-ভর্তি রেল এনে ফেলেছিল। ট্রামের কর্মীরা যথাসাধ্য সাহায্য করেছিল ওদের।

সলোমেনকা'য় কমসমোলের যারা তখনও ছিল, তারা ট্রেনের মালগাড়িগুলোয় রেলগুলো তুলে দেবার কাজ সারারাত্রি ধরে করল। তারপরে এদের নিয়ে দমিত্রি দুবাতা আর তার কর্মীদল বোয়ারুকায় রওনা হয়ে যায়।

দুবাতার এই কাজটা সঙ্ঘে কমসমোল ব্যুরোয় আলোচনা তুলতে গররাজি হয়েছে আকিম। ট্রামওয়ে পরিচালনা বিভাগে যে-বিশ্রীকম আমলাতন্ত্র আর গড়িমসি আছে, সে-কথা দমিত্রি দুবাতা আমাদের বলেছে। ওরা এই কাজটার জন্য দু'খানার বেশি গাড়ি দিতে সরাসরি অস্বীকার করেছিল।

তুফতা অবশ্য আড়ালে দুবাতাকে ডেকে নিয়ে গিয়ে তিরস্কার করেছে। 'এইসব পার্টিজানসুলভ কৌশল ছেড়ে দেবার সময় এসেছে,' বলেছিল সে, 'নইলে একদিন নিজের অজান্তেই জেলে গিয়ে পড়বে। অস্ত্রের জ্বরদস্তির সাহায্য না নিয়ে তুমি কি একটা বোঝাপড়ায় আসতে পারোনি?'

দুবাভাকে আমি আর কোনোদিন এতটা ত্রুষ্ক হতে দেখিনি। রাগে চিৎকার করে উঠেছিল সে, 'তা তুমি নিজে গিয়ে ওদের সঙ্গে কথাবার্তা বলার চেষ্টা করে দেখলে পারতে, ঘুণ-ধরা কলমনবিশ কোথাকার! বসে বসে চেয়ার গরম করতে আর মুখ নাড়তেই তো পারো খালি। ওই রেলগুলো না নিয়ে বোয়ার্‌কায় ফিরে গেলে লোকে আমায় মেরে ফেলত। এখানে বসে-বসে সবার পেছনে লেগে না-থেকে কিছু দরকারি কাজ করিয়ে নেবার জন্যে তোমাকে একবার ওখানে পাঠিয়ে দেওয়া উচিত। তোকারেভ তোমার মাথায় কিছু বুদ্ধিসূদ্ধি ঢুকিয়ে দিতে পারবে!' দমিত্রি এত জোরে চেঁচাচ্ছিল যে গোটা বাড়ি জুড়ে তার কথা শোনা যাচ্ছিল।

তুফ্তা দুবাভার বিরুদ্ধে একটা অভিযোগ লিখছিল, কিন্তু আকিম আমাকে ঘরের বাইরে যেতে বলে মিনিট-দশেক তার সঙ্গে আলাদাভাবে কথা বলল। তারপর তুফ্তা রাগে লাল হয়ে হাঁপাতে হাঁপাতে বেরিয়ে এল।

৩ ডিসেম্বর

প্রাদেশিক কমিটির কাছে আরেকটা অভিযোগ এসেছে—এবার যানবাহন-চলাচলের 'চেকা' থেকে। পানক্রাতভ, ওকুনেভ এবং আরও জনকতক কমরেড নাকি মতোভিলভ্কা স্টেশনে গিয়ে সেখানকার খালি বাড়িগুলো থেকে সমস্ত দরজা-জানলার কাঠামোগুলো খুলে নিয়ে এসেছে। ওরা যখন এইসব জিনিশ ট্রেনের মালগাড়িতে তুলছিল, তখন স্টেশনে 'চেকা'র কর্মীটি ওদের গ্রেপ্তার করার চেষ্টা করেছিল। ওরা তাকে নিরস্ত্র করে তার রিভলবারের সমস্ত টোটা বের করে ফেলে দেয় এবং ট্রেনটা চলতে আরম্ভ করার পর অস্ত্রটা তাকে ফেরত দেয়। ওরা দরজা-জানলার কাঠামোগুলো নিয়ে চলে এল। রেলওয়ারের সরবরাহ বিভাগ তোকারেভের বিরুদ্ধে অভিযোগ এনেছে যে সে বোয়ার্‌কায় স্টেশনের মালগুদাম থেকে কুড়ি পুদ\* পেরেক নিয়েছে। ত্রিপারের জন্য তারা যে-কাঠ ব্যবহার করছে, সেই কাঠের গুঁড়ি বয়ে আনার জন্য যে-চাষীরা তাদের সাহায্য করেছিল, মজুরি হিশেবে তোকারেভ এই পেরেকগুলো তাদের দিয়েছে।

আমি এইসব অভিযোগের কথা কমরেড কুখরাইকে বললাম। সে কিন্তু শুধু হাসল। বলল, 'এ সবগুলোরই ব্যবস্থা আমরা করব।'

রেললাইন পাতার কাজের ওখানে অবস্থাটা অত্যন্ত সঙ্গিন : এখন প্রতিটি দিনই অত্যন্ত মূল্যবান। প্রত্যেকটি খুঁটিনাটি জিনিশের জন্য এখানে আমাদের চাপ দিতে হচ্ছে। যারা নানা ব্যাপারে প্রতিবন্ধক সৃষ্টি করছে, তাদের প্রায়ই প্রাদেশিক কমিটিতে হাজির করাতে হচ্ছে। আর ওদিকে, কাজের খাতিরে ছেলেরা ক্রমশই বেশি-বেশি মাত্রায় মামুলি দ্রব্যগুলো ডিঙিয়ে চলেছে।

ওলশিনকি আমায় একটা ছোট ইলেকট্রিক উনুন এনে দিয়েছে। আমি আর ওল্গা ইউরেনেভা তাতে আমাদের হাত গরম করি, কিন্তু ঘরটা ও দিয়ে বিশেষ কিছু গরম হয় না। এই প্রচণ্ড শীতের রাতে বনের মধ্যে ওই লোকগুলো কী করে কাটাচ্ছে, তাই ভাবি। ওল্গা বলছিল, হাসপাতালে এত ঠাণ্ডা যে রোগীরা কবলের নিচে শীতে কাঁপে। সেখানে মাত্র দুদিন অন্তর একবার আন্তন জ্বালিয়ে ঘরগুলো গরম করা হয়। না, কমরেড ওলশিনকি, যুদ্ধসীমান্তের দুঃখদুর্দশা আমাদের এই পেছনের ঘাঁটিরও দুঃখদুর্দশা।

\* পুদ—১৬ কিলোগ্রাম।

সারারাত্রি বরফ পড়েছে। বোয়ারকা থেকে ওরা লিখছে—সমস্ত কিছু বরফে ঢেকে গেছে, লাইন-পথ পরিষ্কার করার জন্য ওদের কাজ বন্ধ করে দিতে হয়েছে। আজ প্রাদেশিক কমিটি একটা সিদ্ধান্ত নিয়েছে যে, কাঠ-কাটার জায়গাটা পর্যন্ত রেললাইন পাতার প্রথম অংশটুকু ১৯২২-র পয়লা জানুয়ারির মধ্যে শেষ করতে হবে। তাদের এই সিদ্ধান্ত বোয়ারকায় পৌঁছালে তোকারেভ নাকি মন্তব্য করেছে, ‘তা আমরা করব—যদি তার আগেই আমরা শিঙে না ফুঁকি।’

করচাগিন স্বপ্নে কিছুই খবর পাই না। পানক্রাতভের ওই ‘ঘটনা’টার মতো কোনোকিছুতে সে জড়িয়ে পড়েনি দেখে আমি একটু আশ্চর্যই হচ্ছি। আমাকে সে এড়িয়ে চলেছে কেন, তা এখনও বুঝতে পারছি না।

গভাকাল রেললাইন পাতার জায়গার ওখানে ডাকাতদলের একটা হামলা হয়ে গেছে।

\*

\*

\*

নরম তুষারের মধ্যে সাবধানে পা ফেলে ফেলে চলেছে ঘোড়াগুলো। তুষারের স্থূপ বসে-বসে যাচ্ছে তাদের পায়ের নিচে। মাঝে মাঝে বরফের নিচে ঢাকা পড়ে যাওয়া দু-একটা গাছের সরু ডাল কোনো ঘোড়ার খুরের চাপে মট করে ভেঙে যাচ্ছে আর ঘোড়াটা ভড়কে গিয়ে ঘোঁঘোঁ শব্দ করে একপাশে লাফিয়ে উঠছে। তখন তার বসা কানের উপর বন্দুকের চাপ পড়ে আর সে ছুটে চলে আর সকলের পিছু পিছু।

জন-দেশেক ঘোড়সওয়ার পার হয়ে এল সরু লম্বা পাহাড়ি উঁচু জায়গাটা, যার ওধারে একফালি কালো জমি—এখনও জমিটুকু বরফের চাদরে ঢাকা পড়েনি।

এখানে এসে ঘোড়সওয়াররা লাগাম টেনে থামল তাদের ঘোড়াগুলো। রেকাবগুলো ঠোকাঠুকি হয়ে ক্ষীণ একটা আওয়াজ উঠল। দলের নেতার বিরাট জোয়ান ঘোড়াটা সশব্দে গা-ঝাড়া দিল, অনেকক্ষণ একটানা দৌড়ানোর পর তার সর্বান্ত ঘামে চকচকে হয়ে উঠেছে।

ঘোড়সওয়ার দলের নেতা ইউক্রেনীয় ভাষায় বলল, ‘এখানে হতভাগাদের অনেকগুলোই আছে দেখছি। যাই হোক, আমরা ওদের মনে পরকালের ভয় ঢুকিয়ে দিচ্ছি, দাঁড়াও! আতামান বলেছেন, কালকের মধ্যেই বেজন্মানাগুলোকে এখান থেকে তাড়িয়ে দিতে হবে। ব্যাটারা জ্বালানিকাঠ কাটার জায়গাটার বড় কাছাকাছি এসে যাচ্ছে।’

সরু রেললাইনের ধার ঘেঁষে একজনের পেছনে আর একজন সারি বেঁধে এরা ঘোড়া হাঁকিয়ে স্টেশন পর্যন্ত এল। পায়ে হাঁটার গতিতে ঘোড়ার বেগ কমিয়ে তারা পুরনো ইকুল-বাড়িটার কাছে ফাঁকা জায়গাটায় গাছগুলোর পেছনে এসে থামল।

রাত্রির নিস্তব্ধতাকে চিরে দিল একঝাঁক গুলির আওয়াজ। তুষারে আচ্ছন্ন একটা বার্চগাছের ডাল চাঁদের আলোয় রূপোর মতো ঝকঝক করছিল, বরফের স্তরটা ডাল থেকে খসে পড়ল লাফিয়ে-পড়া কাঠবেড়ালির মতো। গাছগুলোর ফাঁকে-ফাঁকে বন্দুকের স্কলিঙ্গ দেখা যাচ্ছে, দেয়ালের উপর খসে-আসা চুন-বালির আন্তরণ ফুটো করে দিয়ে গুলি ঢুকে যাচ্ছে। পানক্রাতভের আনা জানলার শার্সি ভেঙে গুঁড়ো গুঁড়ো হয়ে গিয়ে কাচের ঝনঝনানির আওয়াজ উঠল।

কংক্রিটের মেঝের উপর থেকে মানুষগুলো গুলির আওয়াজে লাফিয়ে উঠেই আবার সঙ্গে সঙ্গে মারাত্মক সব বস্তু ঘরের মধ্যে উড়ে বেড়াচ্ছে দেখেই একজনের ওপরে আরেকজন চেপে শুয়ে পড়ল।

পাভেলের কোটের প্রান্তটা টেনে ধরল দুবাবা, ‘যাচ্ছ কোথায়?’  
‘বাইরে।’

‘উপুড় হয়ে শুয়ে পড়ো, আহাশ্বক কোথাকার!’ হিসহিসিয়ে উঠল দ্মিত্রি দুবাবা, ‘বাইরে মাথা বের করেছ কি ওরা তোমায় খতম করে দেবে।’

দরজাটার ঠিক কাছে তারা পাশাপাশি পড়ে রইল। দুবাবা তার পিস্তল দরজার দিকে তাক করে ধরে মেঝের উপর সটান হয়ে আছে। উবু হয়ে বসে পাভেল তার রিভলবারের টোটা ভরবার ঘরগুলো আঙুল দিয়ে নাড়াচাড়া করছে একটা স্নায়বিক উত্তেজনার সঙ্গে। পাঁচবার গুলি চালাবার মতো টোটা ভরা আছে ওটায়, বাকি ঘর খালি। টোটা ভরার চাকতিটা ঘুরিয়ে নিয়ে তৈরি করল সে।

হঠাৎ বন্ধ হয়ে গেলে গুলি-ছোড়া। পরবর্তী নিশ্চলতাটুকু অবাক করে দি সবাইকে।

ভাঙা গলায় ফিসফিসিয়ে দুবাবা হুকুম দিল, ‘যাদের অস্ত্র আছে, তারা এদিকে এসো।’

সাবধানে দরজাটা খুলল পাভেল। খোলা জায়গাটা জনহীন। হালকাভাবে ঝরে পড়ছে বরফের চিলতে।

বনের মধ্যে ততক্ষণে দশজন সওয়ার তাদের ঘোড়াগুলোকে চাবুক মেরে দ্রুত দৌড় করিয়ে নিয়ে চলেছে।

\*

\*

\*

পরের দিন দুপুরবেলায় শহর থেকে একটা ট্রলি এসে পৌছল। বুখরাই আর আকিম নেমে এল—তাদের নিতে এসেছে তোকারেভ আর খোলিয়াভা। একটা ‘মাস্ত্রিম’ মেশিনগান, কয়েক বাব্ব টোটা-ভর্তি মেশিনগানের বেল্ট আর দু-ডজন রাইফেল নামিয়ে আনা হল প্র্যাটফর্মে।

রেললাইন পাতার জায়গাটার দিকে তারা এগুল তাড়াতাড়ি। ফিওদরের লম্বা ওভারকোটের নিচের দিকটা বরফের ওপরে আঁকাবাঁকা নকশা কেটে নেতিয়ে চলেছে তার পিছু পিছু। সে এখনও জাহাজি মানুষের মতোই খপখপে ভঙ্গিতে হাঁটে—যেন কোনো ডেক্ট্রারের দোলায়মান পাটাতনের ওপরে পায়চারি করছে। ফিওদরের পাশাপাশি হেঁটে চলেছে লম্বা পা-অলা আকিম, কিন্তু এদের সঙ্গে তাল রেখে চলবার জন্য তোকারেভকে মাঝে মাঝে অল্প অল্প দৌড়াতে হচ্ছে।

‘ডাকাত-দলের হামলাটাই আমাদের সবচেয়ে বড় হান্সামা নয়। লাইন পাতার ঠিক পথের ওপরেই একজায়গায় জমিটা বিশ্রীকরম উঁচু হয়ে উঠেছে। মন্দ কপাল আমাদের আর কী। তার মানে, আরও অনেকটা বাড়তি খোঁড়ার কাজ করতে হবে।’

বৃদ্ধ থেমে পড়ল। বাতাসের দিকে পেছন ফিরে দু’হাতের তালুর পুটে দেশলাইয়ের কাঠ আড়াল করে সে একটা সিগারেট জ্বালাল। কয়েকটা টান দিয়ে ধোঁয়া ছেড়ে সে দ্রুত এগুল আর দু’জনের সঙ্গ ধরবার জন্য। তোকারেভের অপেক্ষায় দাঁড়িয়ে পড়েছিল আকিম, কিন্তু বুখরাই এগিয়ে চলেছে।

তোকারেভকে জিজ্ঞেস করল আকিম, 'তোমার কী মনে হয়—নির্দিষ্ট সময়ের মধ্যে লাইন পেতে ফেলতে পারবে?'

জবাব দিতে গিয়ে একমুহূর্ত ইতস্তত করল তোকারেভ। শেষে বলল, 'দেখ, ছেলে, কথাটা হচ্ছে সাধারণ নিয়মে কাজটা করে ওঠা যায় না। তবে, আমাদের করতেই হবে—ব্যাপারটা দাঁড়াচ্ছে এই।'

ফিওদরের সঙ্গ ধরে পাশাপাশি হাঁটতে থাকল তারা। উত্তেজনার সঙ্গে বলে চলল তোকারেভ, 'অবস্থাটা এই—পাতোশ্‌কিন আর আমি, মাত্র দু'জনে আমরা জানি এই যৎসামান্য মালমশলা আর কাজ করার লোক নিয়ে এ অবস্থার মধ্যে একটা লাইন পাতা অসম্ভব। কিন্তু আর সবাই, প্রত্যেকেই জানে যে লাইনটা পেতে ফেলতেই হবে যে-কোনো উপায়ে। সেইজন্যেই তো বলছি যে শীতে জমে যদি আমরা মরে না যাই, তাহলে লাইন পাতা হবে ঠিকই। তোমরা নিজেরাই বিবেচনা করে দ্যাখো : এক মাসেরও বেশি আমরা এখানে মাটি খুঁড়ে চলেছি, আমাদের কাজে বদলি হিশেবে আসা চার-নম্বর দলটাকে বিশ্রাম দেবার সময় হয়েছে, কিন্তু এখন পর্যন্ত সমস্তক্ষণ গোড়ার শ্রমিকদলের বেশির ভাগটা কাজ করেই চলেছে। শুধু বয়েসে তরুণ বলেই এরা চালিয়ে যেতে পারছে। কিন্তু এদের অর্ধেক লোকেরই ঠাণ্ডা লেগেছে শীতে। দেখে তোমাদের সত্যিই দুঃখ হবে। সোনার টুকরো ছেলে সব—কিন্তু এই হতচ্ছাড়া জায়গাটা একাধিক লোকের মৃত্যুর কারণ হয়ে দাঁড়াবে।'

\*

\*

\*

সবু করে পাতা রেললাইনটা স্টেশন থেকে প্রায় পৌনে-এক মাইল দূরে এসে শেষ হয়েছে। সেটাকে ছাড়িয়ে প্রায় এক মাইল লম্বা একফালি জায়গা জুড়ে সমান উঁচু পথটার ওপরে যা ছাড়িয়ে পড়ে আছে, তা দেখে মনে হয় যেন একটা কাঠের গুঁড়ির বেড়া ঝড়ের ঝাপটায় পড়ে গেছে—এগুলো রেল বসাবার স্লিপার কাঠ, সব ঠিকমতো জায়গায় দৃঢ়ভাবে আটকে বসানো। আর এটাকে ছাড়িয়ে চড়াইয়ের জায়গাটা পর্যন্ত সমস্তটা শুধু একটা সমান উঁচু পথ।

এই অংশটায় কাজ করছে পানক্রাতভের রেলপথ-কর্মীদের এক-নম্বর দল। চল্লিশজন লোক স্লিপারগুলো আটকাবার শিক গাঁথছে আর লালচে-রঙের দাড়িঅলা একজন চাষী নতুন একজোড়া বাকলের জুতো পায়ে দিয়ে ধীরেসুস্থে রাস্তার বুকে গুঁড়িকাঠের বোঝা নামাচ্ছে। কিছুদূরে আরও কতকগুলো ব্রেজগাড়ি থেকে মাল নামানো হচ্ছে। দুটো লম্বা লোহার ডাঙা পড়ে আছে মাটিতে—স্লিপারগুলোকে ঠিকমতো সমান্তরাল করে বসাবার জন্য এগুলো ব্যবহার করা হয়। পাথরকুচিগুলো সমান করে বসাবার জন্য কোদাল-শাবল-বেলচা সবই ব্যবহার করা হচ্ছে।

\*

\*

\*

রেললাইনের স্লিপার পাতার কাজটা মন্থর আর শ্রমসাপেক্ষ। মাটির বুকের উপর দৃঢ়ভাবে আটকে দেওয়া চাই স্লিপারগুলো, যাতে প্রত্যেকটার ওপরে রেলের চাপ সমানভাবে পড়ে।

দলের মাত্র একজন লোক স্নিপার বসাবার পদ্ধতিটা জানে। সে হল তালিয়ার বাবা, রেললাইন সর্দার লাগুতিন—চুয়ান্ন বছর বয়েস তার, কয়লার মতো কালো দাড়ি মাঝখানে সিঁথি কাটা, মাথার একটা চুলও পাকেনি। এই কাজের গোড়া থেকেই সে বোয়ার্কায় বাটছে, তরুণ কর্মীদের সঙ্গে সমস্ত রকমের কষ্ট সমানে সহ্য করে চলেছে এবং গোটা শ্রমিকদলটার শ্রদ্ধা অর্জন করেছে। পার্টি-সভ্য না হলেও লাগুতিন সমস্ত পার্টি-সভায় সম্মানের আসন পায়। এজন্য তার ভারি গর্ব এবং সে কথা দিয়েছে কাজটা শেষ না-হওয়া পর্যন্ত সে এখান থেকে যাবে না।

বদলির লোক এলেই সে প্রতিবারেই খাসা মেজাজেই বলে, 'তোমাদের ওপর কাজ চালাবার ভার ছেড়ে দিয়ে আমি কী করে চলে যাব? একজন অভিজ্ঞ লোক যদি সবকিছুর ওপর নজর না-রাখে, তাহলে একটা-না-একটা গোলমাল বাধবেই। অভিজ্ঞতার কথাই যদি বলো, আমার জীবনে যে আমি দেশের নানা জায়গায় কত অসংখ্য স্নিপার ঠুকে বসিয়েছি, তা আজ আর মনেও করতে পারি না।' সুতরাং সে থেকে গেছে।

লাগুতিন যে তার কাজ ভালো করেই জানে, সেটা পাতোশ্‌কিন জানে আর তাই সে তার এলাকায় কাজকর্ম দেখাশোনার জন্য কুচিং কখনও আসে। পানক্রাতভ একটা স্নিপার বসানোর জন্য গর্ত খুঁড়ছিল, পরিশ্রমে ঘোমে গেছে সে। তার মুখ লাল হয়ে উঠেছে—এমন সময়ে আকিম আর ঝুখ্‌রাইয়ের সঙ্গে তোকারেভ সেখানে এসে পড়ল।

জাহাজের মাল-খালাসি তরুণটিকে আকিম প্রায় চিনতেই পারেনি। পানক্রাতভ খুব রোগা হয়ে গেছে, তার শুকনো গালবসা গম্ভীর মুখের উপর চওড়া চোয়ালের হাড় ঠেলে বেরিয়ে এসেছে।

ঘামে-ভেজা উষ্ণ একটা হাত আকিমের দিকে বাড়িয়ে দিয়ে সে বলে উঠল, 'আরে, এই-যে, বড়কর্তারা সব এসে গেছেন!'

কোদালের ঠুনঠুন আওয়াজ বন্ধ হয়ে গেল। চারিধারে বিবর্ণ আর শুকনো মুখগুলোর দিকে ভালো করে তাকিয়ে দেখল আকিম। এদের কোট আর কোর্তাগুলো বরফের ওপরে হেলাফেলায় স্থপীকৃত।

লাগুতিনের সঙ্গে অল্প কিছুক্ষণ কথাবার্তার পর তোকারেভ পানক্রাতভকে নিয়ে মাটি-খোঁড়ার জায়গাটায় নিয়ে এল আগন্তুকদের। ঝুখ্‌রাইয়ের পাশাপাশি হেঁটে চলেছে মাল-খালাসি ছেলেটি।

'মতোভিলড্‌কায় কী ঘটেছিল বলো তো, পানক্রাতভ? ওই 'চেকা' লোকটির অস্ত্র কেড়ে নেওয়াটা বাড়াবাড়ি হয়ে গেছে বলে কি তোমাদের মনে হয় না?' গম্ভীর মুখে ফিওদর জিজ্ঞেস করল স্বল্পভাষী মাল-খালাসি ছেলেটিকে।

পানক্রাতভ বিব্রত ভঙ্গিতে হাসল।

'উভয়পক্ষের সম্মতি অনুসারেই সবটা করা হয়েছিল', ব্যাখ্যা করে বলল সে, 'ওর অস্ত্র কেড়ে নেবার জন্যে ও বলেছিল আমাদের। ও যে আমাদেরই একজন। ব্যাপারটা সব যখন আমরা শুকে বুঝিয়ে বললাম, ও তখন বলল, 'তোমাদের মুশকিলটা আমি বুঝতে পারছি ভাই, কিন্তু ওই জানলা-দরজাগুলো তোমাদের নিয়ে যেতে দেবার অধিকার আমার নেই। রেলওয়ের সম্পত্তি লোপাট হওয়া বন্ধ করার জন্যে কমরেড

জের্জিন্সির হুকুম আছে। এখানকার এই স্টেশন-মাস্টারটা আমার ওপরে লাঠি উঠিয়ে বসে আছে। বেজনা ব্যাটা এটা-ওটা চুরি করছে আর আমিও ওর সে-পথ বন্ধ করে দিচ্ছি। আমি যদি তোমাদের এই কাজটা বিনা-বাধায় করতে দিই, তাহলে সে নিশ্চয়ই আমার বিরুদ্ধে রিপোর্ট করবে আর বিপুবী আদালতে আমার বিচার হবে। তবে, তোমরা আমাকে নিরস্ত্র করে ফেলে সরে পড়তে পারো। আর যদি স্টেশন-মাস্টার রিপোর্ট না করে, তাহলে ব্যাপারটা ওইখানেই চুকে যাবে।’ সুতরাং আমরা তাই করেছি। আর যাই হোক, আমরা তো ওই দরজা-জানলাগুলো নিজেদের জন্যেই নিই নি, নাকি?’

ঝুঝরাইয়ের চোখদুটো একনিমেষের জন্য উজ্জ্বল হয়ে উঠতে দেখে সে বলে চলল, ‘যদি চাও তো তোমরা শাস্তি দিতে পারো, কিন্তু কমরেড ঝুঝরাই, ওই ছেলেটিকে কোনো কড়ারকম শাস্তি দিয়ো না যেন।’

‘ব্যাপারটা ওইখানেই চুকিয়ে দেওয়া গেল। কিন্তু দেখবে যাতে আর ভবিষ্যতে এরকম কিছু না হয়—শৃঙ্খলার দিক থেকে এটা খারাপ। আমলাতন্ত্রকে সংগঠিতভাবেই গুঁড়িয়ে দেবার মতো শক্তি এখন আমাদের হয়েছে। এসো এখন আরও গুরুতর বিষয়ে কিছু কথা বলা যাক।’ তারপর ডাকাতদলের হামলার ব্যাপারটা সম্বন্ধে খুঁটিয়ে জিজ্ঞাসাবাদ করতে লাগল ফিওদর।

\*

\*

\*

বোয়ারকা স্টেশন থেকে তিন মাইল দূরে যেখানে রেললাইনের পথ আটকে মাটিটা খানিকটা উঁচু হয়ে উঠেছে, সেখানে একদল লোক ভীষণ জোরে মাটি কোপাচ্ছে।

এই গোটা শ্রমিকদলটার যা-কিছু অস্ত্রশস্ত্র আছে তাই নিয়ে সশস্ত্র হয়ে সাতজন লোক পাহারা দিচ্ছে। খোলিয়াভার রাইফেল আর করচাগিন-পানক্রাতভ-দুবাতা-লোমুতোভের পিস্তল—হচ্ছে এদের মোট অস্ত্রশস্ত্র।

ঢালুতে বসে পাতোশ্কিন তার নোটবইয়ে নানা অঙ্ক টুকে রাখছে। এই কাজে সেই একমাত্র ইঞ্জিনিয়ার। ভাকুলেক্সে সেদিন সকালে পালিয়ে গেছে—ডাকাতদের হাতে মারা পড়ার চেয়ে পালিয়ে যাবার জন্য কাঠগড়ায় দাঁড়ানোটাকেই সে শ্রেয় বলে মনে করেছে।

‘এই টিবিটাকে কেটে পথ করার জন্যে দু-সপ্তাহ লাগবে। মাটিটা ঠাণ্ডায় জমে শক্ত হয়ে গেছে’, পাতোশ্কিন নিচুগলায় বলল ঝমুতোভকে। সে তার পাশে বিষণ্ণমুখে দাঁড়িয়ে আছে।

ঝমুতোভ তার গোর্ফের প্রাস্টটা মুখে টেনে ঘোঁৎঘোঁৎ করে বলল, ‘পুরো লাইনটা পাতার জন্যে আমাদের পঁচিশ দিন সময় দেওয়া হয়েছে, আর আপনি এইটুকুর জন্যেই পনেরো দিনের হিশেব কমছেন!’

‘হয়ে উঠবে না বলেই তো আমি মনে করি। অবশ্য আমি এর আগে কখনও এরকম অবস্থার মধ্যে আর এরকম শ্রমিকদের নিয়ে কাজ করিনি। আমার ভুল হতে পারে। বাস্তবিকপক্ষে, আমার আগে আরও দু’বার ভুল হয়েছে।’

এমন সময়ে ঝুঝরাই, আকিম আর পানক্রাতভকে ঢালুটার দিকে আসতে দেখা গেল।

‘দেখ, ওদিকে কারা আসছে!’ চোঁচিয়ে উঠল পিওতর ত্রফিমভ—রেল-কারখানার একজন মিস্ত্রি এই তরুণ ছেলেটি, তার গায়ে কনুইয়ের কাছে ছেঁড়া একটা পুরনো



সোয়েটার। করচাগিনের গায়ে একটা ঠেলা দিয়ে সে আগন্তুকদের দিকে আঙুল বাড়িয়ে দেখাল। পরমুহূর্তেই করচাগিন হাতে কোদাল ধরেই ছুটে নেমে এল টিবিটা বেয়ে। মাথায় চাপানো হেলমেটের নিচে তার চোখে আবেগদীপ্ত সজ্জাঘণের হাসি। করমর্দনের সময় ফিওদর তার হাতখানা কিছুক্ষণ চেপে ধরে রইল।

‘এই যে, পাভেল! এই অদ্ভুত পোশাকে তোমায় দেখে প্রায় চিনতেই পারিনি।’

শুকনো গলায় হাসল পানক্রাভ, ‘অদ্ভুত পোশাক বৈকি। আলো-বাতাস খেলার জন্যে যথেষ্ট খোলা জায়গা তো আছে জামাটায়। পালিয়ে গেছে যারা, তাদের মধ্যে কেউ-একজন ওর ওভারকোটটা মেরে নিয়ে গেছে। ওকুনেভ ওকে দিয়েছে ওই কোর্তাটা—ওরা কমিউন করে আছে জানো তো। কিন্তু পাভেল ঠিক আছে, ওর গায়ের রক্ত খুব গরম। আরও একটা সপ্তাহ ও কনক্রিটের মেঝেটায় গড়াগড়ি দিয়ে নিজেকে গরম রাখবে—বিচালির আন্তরণে কোনো কাজই হয় না—তারপরে দিব্যি একটা পাইন-কাঠের কফিনের মধ্যে শোবার জন্যে ও তৈরি হয়ে উঠবে,’ মর্মান্তিক একটা কৌতুক করল জাহাজের মাল-খালাসিটি।

কালো ডুফ্র আর ভোতা নাকঅলা ওকুনেভ তার দুষ্টমিডরা চোখদুটো কুঁচকে প্রতিবাদ জানাল, ‘কিছু ভেবো না, আমরা পাভলুশ্কার ভালোমন্দের তার নিচ্ছি। আমরা সবাই ভোট দিয়ে ওকে রান্নাঘরে ওদারকাকে সাহায্য করার জন্যে পাঠিয়ে দেব। ওর যদি বুদ্ধিভঙ্গি থাকে, তাহলে দু’মুঠো বাড়তি খাবারও ভরে নিতে পারবে, আবার শরীরটাকে গরম করার জন্যে উনুন ঘেঁষে কিংবা স্বয়ং ওদারকার গায়ে সঁটে থাকতেও পারবে।’

এক-দমক হাসির হুল্লোড় উঠল এই মন্তব্যে।

সেদিন ওরা হাসল এই প্রথম।

\*

\*

\*

ফিওদর টিবি-জমিটা ভালো করে দেখার পর তোকারেভ আর পাতোশ্‌কিনের সঙ্গে স্নেহজগাড়িতে চেপে কাঠ-কাটার জায়গাটায় গেল। ওরা ফিরল যখন, তখন মানুষগুলো সব দুর্নিবার সঙ্কল্প নিয়ে টিবিটা খুঁড়ে চলেছে। কোদালের দ্রুত ওঠানামা আর পরিশ্রমের চাপে নুয়ে-পড়া শ্রমিকদের পিঠগুলো লক্ষ করল ফিওদর। আকিমের দিকে ফিরে সে নিচুগলায় বলল, ‘সভা-সমিতির দরকার নেই। এখানে কোনো আন্দোলনেরও প্রয়োজন নেই। তুমি ঠিকই বলেছ তোকারেভ—সোনার টুকরো ছেলে সব এরা। ইম্পাত কঠিনতর হয়ে উঠছে এইখানেই।’

মাটি খুঁড়ছে যারা, তাদের দিকে তাকিয়ে রইল বুখরাই সপ্রশংসে আর কঠিন অথচ স্নেহভরা গর্বের সঙ্গে। এদের মধ্যে কেউ কেউ মাত্র অল্প কিছুদিন আগেও এসে দাঁড়িয়েছিল তাদের বেয়নেটের ইম্পাত-ফলা বাগিয়ে ধরে। সেটা অভ্যুত্থানের আগের রাত্রের ঘটনা। আর এখন, একমাত্র উদ্দেশ্যসাধনের দৃঢ়তা নিয়ে এরা খেটে চলেছে যাতে রেলপথের ইম্পাত-ধমনিটা গিয়ে পৌছায় উষ্ণ-স্বাস্থ্য আর জীবনের মহার্ঘ উৎসমুখে।

\*

\*

\*

বিনীতভাবে, কিন্তু দৃঢ়ভাবে, পাতোশ্‌কিন ফিওদরকে বুঝিয়ে দিল যে দু-সপ্তাহের কম সময়ের মধ্যে উঁচু জমিটা খুঁড়ে সমান করা অসম্ভব। ফিওদর তার যুক্তিগুলো শুনে গেল

অন্য একটা চিন্তায় আচ্ছন্ন মন নিয়ে। স্পষ্টতই অন্য কোনো-একটা বিশেষ সমস্যায় তার চিন্তা নিবিস্ট।

শেষপর্যন্ত সে বলল, 'টিবি কাটার সব কাজ বন্ধ রেখে ওদিক থেকে লাইন-পাতার কাজ চালিয়ে যাও। টিবিটার ব্যবস্থা আমরা অন্যভাবে করব।'

স্টেশনে এসে টেলিফোনে সে অনেকক্ষণ ধরে কথাবার্তা চালাল। দরজার বাইরে পাহারায় ছিল খোলিয়াভা। ভেতর থেকে ফিওদরের কর্কশ গম্ভীর গলা শুনতে পাচ্ছিল সে : 'সামরিক এলাকার সেনানী-মণ্ডলীর অধিনায়ককে টেলিফোনে আমার নাম করে বলো পুজিরেভস্কির রেজিমেন্টকে এখনি এই লাইন-পাতার অঞ্চলে বদলি করে দিক। ডাকাডাকলোকে অবিলম্বে এই অঞ্চল থেকে হঠিয়ে দিতেই হবে। বিস্ফোরণকর্মীদের দল নিয়ে একটা সাঁজোয়া-ট্রেন পাঠাও। বাকিটুকুর ব্যবস্থা আমি নিজে করব। রাত্রিবেলায় ফিরে আসব। লিথকেকে বলে দিও রাত্রি বারোটায় সময়ে যেন গাড়ি নিয়ে স্টেশনে থাকে।'

ব্যারাক-ঘরটার মধ্যে আকিমের একটা সখক্ষিণ বস্তুতার শেষে ঝুঝুর্নাই বলবার জন্য উঠে দাঁড়াল। কমরেডসুলভ আলাপ-আলোচনার মধ্যে দিয়ে একঘণ্টা অলক্ষ্যে কেটে গেল। ফিওদর সবাইকে জানাল...কাজটা শেষ করার জন্য যে পয়লা জানুয়ারি পর্যন্ত সময় বেঁধে দেওয়া হয়েছে, সেটা আর বাড়ানোর কোনো প্রশ্ন ওঠে না।

'এখন থেকে আমরা কাজটাকে সামরিক ভিত্তিতে চালাব' বলল সে। 'পার্টি-সভাদের নিয়ে কমরেড দুবাজার নেতৃত্বে বিশেষ একটা বাহিনী গড়া হবে। এই বাহিনীর ছ'টা দলের প্রত্যেকের ওপর এক-একটা বিশেষ কাজের দায়িত্ব থাকবে। বাকি কাজটুকু ছ'টা সমান ভাগে ভাগ করে নিয়ে প্রত্যেকটা দলকে তার এক-একটা দেওয়া হবে। পয়লা জানুয়ারির মধ্যে পুরো কাজটা শেষ হওয়াই চাই। যে-দলটা প্রথমে তাদের কাজ শেষ করবে, তাদের শহরে ফিরে বিশ্রাম করতে দেওয়া হবে। তাছাড়া, যে-দল প্রথমে কাজ শেষ করবে, সেই দলের শ্রেষ্ঠ কর্মীকে 'লাল পতাকা অর্ডার' পুরস্কার দেওয়ার জন্যে প্রাদেশিক কার্যনির্বাহক কমিটি সরকারকে অনুরোধ জানাবে।'

বিভিন্ন দলের নেতা হিশেবে এরা নিযুক্ত হল : ১ নং দলে—কমরেড পানক্রাতভ; ২নং দলে—কমরেড দুবাজা; ৩ নং দলে—কমরেড খমুতোভ; ৪ নং দলে—কমরেড লাগুতিন; ৫নং দলে—কমরেড করচাগিন; ৬ নং দলে—কমরেড ওকুনেভ।

'রেললাইন পাতার কাজের প্রধান হিশেবে এবং রাজনৈতিক নেতা ও ব্যবস্থাপক হিশেবে আগেকার মতোই থাকবেন কমরেড আস্তান নিকিফরোভিচ তোকারেভ', এই কথা বলে তার বক্তব্য শেষ করল ঝুঝুর্নাই।

একঝাঁক পাখির হঠাৎ ডানা ছড়িয়ে উড়ে যাবার মতো হাততালির আওয়াজ উঠল এবং দৃঢ়তায় ভরা গম্ভীর মুখগুলো শ্বিতহাসিতে কোমল হয়ে এল। ঝুঝুর্নাইয়ের বস্তুতার এই কৌতুকে-ভরা বন্ধুসুলভ পরিসমাণিটুকু একঝলক হাসির দমকে সভার গুমেট মনোযোগের আবহাওয়াটাকে সহজ করে দিল।

আকিম আর ফিওদরকে ট্রলিতে তুলে দিয়ে আসার জন্য প্রায় কুড়িজন লোক ভিড় করে স্টেশনে এল।

করচাগিনের সঙ্গে করমর্দন করার সময়ে ফিওদর তার তুষারে-ঢাকা গালোশ জুতোটার দিকে নজর করল। নিচুগলায় সে বলল, 'একজোড়া বুটজুতো তোমায় পাঠিয়ে দেব আমি। ঠাণ্ডায় তোমার পা এখনও টাটিয়ে ওঠেনি, আশা করি।'

পাভেল জবাব দিল, 'একটু ফুলে উঠেছে পাদুটো।' তারপরে অনেকদিন আগে সে যে একটা জিনিশ চেয়েছিল, সে-কথা মনে পড়তেই সে ফিওদরের বাহু ধরে বলে উঠল, 'আমার পিস্তলটার জন্যে গোটাকতক কার্তুজ দিতে পারো? আমার মোটে তিনটে ভালো কার্তুজ বাকি আছে দেখছি।'

ঝুঝরাই দুঃখিতভাবে মাথা নাড়ল। কিন্তু পাভেলের হতাশ চাউনি লক্ষ করে সে তাড়াতাড়ি চামড়ার বেন্টসুন্ধ মাউজার-পিস্তল খুলে নিল, 'এই নাও, এটা উপহার দিলাম তোমাকে।'

অনেককাল ধরে যে-জিনিশটা সে মনেপ্রাণে একান্তভাবে কামনা করে আসছে, সত্যি সত্যিই পাছে দেখে যেন পাভেলের প্রথমে বিশ্বাসই হতে চাইল না। কিন্তু ঝুঝরাই চামড়ার পটিটা তার কাঁধে পরিয়ে দিয়ে বলল, 'নাও, এটা নাও! আমি জানি, অনেকদিন ধরেই তোমার এ জিনিশের ওপর নজর। কিন্তু সাবধান, আমাদের নিজ্জেদের কোনো লোককে এটা দিয়ে গুলি করে বোসো না যেন। গুটার সঙ্গে পুরো তিন-ক্লিপ গুলি আছে।'

অন্য সবাই ঈর্ষার দৃষ্টিতে তাকে দেখল। কে একজন চোঁচিয়ে উঠল, 'এই, পাভকা, আমি গুটার বদলে একজোড়া বুট দেব তোমায়—সেইসঙ্গে একটা কোটও।'

পানক্রাতভ তার পিঠে একটা গুঁতো মেরে হেসে বলল, 'এসো, গুটার জন্যে আমি তোমাকে একজোড়া ফেস্ট-এর বুট-জুতো দেব। এই গালোশ-জুতো পরলে তুমি তো বড়দিনের আগেই মরে যাবে।'

ট্রিলিটার পাদানির ওপরে একটা পা ঠেকা রেখে ঝুঝরাই পিস্তলটার জন্যে একটা পারমিট লিখে দিল।

\*

\*

\*

পরের দিন ভোরে একটা সাঁজোয়া-ট্রেন সিগন্যাল-পয়েন্টের উপর গড়গড়িয়ে এসে স্টেশনে থামল। একঝলক হাঁস-পালকের মতো শাদা বাষ্পের নিশ্বাস ছাড়ল ইঞ্জিনটা, স্বচ্ছ শীতাত বাতাসে মিলিয়ে গেল বাষ্পটা। ইস্পাত-মোড়া কামারগুলো থেকে চামড়ার পোশাক-পরা কতকগুলো মূর্তি বেরিয়ে এল। কয়েক ঘণ্টা বাদে, তিনজন বিস্ফোরণকর্মী ট্রেন থেকে নেমে এসে টিবিটার মাটির নিচে দুটো বিরাট কালো তরমুজের মতো জিনিশ বসিয়ে দিল। এই দুটো জিনিশের সঙ্গে লম্বা পলতে আটকানো। সাবধানী-সংকেত হিসেবে তারা একটা গুলি ছুড়ল। টিবিটা এখন মারাত্মক হয়ে উঠেছে। মানুষগুলো সেখান থেকে দূরে দূরে চারিদিকে ছড়িয়ে পড়ল। দেশলাই জ্বালিয়ে পলতেটার একপ্রান্তে ধরিয়ে দিতেই ছোট্ট একটা অনুপ্রভ শিখা জ্বলে উঠল।

কিছুক্ষণের জন্যে মানুষগুলো নিশ্বাস বন্ধ করে রইল। দু-এক মুহূর্তের উৎকর্ষ অনিশ্চয়তা, আর তারপরেই কেঁপে উঠল মাটি, প্রচণ্ড একটা শক্তি টিবিটাকে ছিঁড়ে-ঝুড়ে

দিল, আকাশের দিকে উৎক্ষিপ্ত হয়ে উঠল বিরাট বিরাট মাটির চাঙড়। দ্বিতীয় বিস্ফোরণটা প্রথমটার চেয়েও জোরালো। ভীষণ বাজ পড়ার মতো তার শব্দটা অনেকক্ষণ ধরে চারপাশের বনের মধ্যে প্রতিধ্বনিত হয়ে চারিদিক ভরে তুলল নানারকমের এলোমেলো শব্দে।

ধুলো আর ধোঁয়া পরিষ্কার হয়ে আসার পর দেখা গেল এখনি যেখানে ঢিবিটা দাঁড়িয়ে ছিল, সেখানে একটা গভীর গর্ত হাঁ করে রয়েছে, আর চারিদিকে বেশ কয়েক গজ জায়গা ঘিরে চিনির মতো শ্বেত বরফের উপর ছড়িয়ে পড়ে রয়েছে গুঁড়ো গুঁড়ো মাটি।

বিস্ফোরণের ফলে তৈরি এই গর্তটার দিকে মানুষগুলো ছুটে এল গাঁইতি-বেলচা নিয়ে।

\*

\*

\*

ঝুঝুর্নাই চলে যাবার পর সর্বপ্রথম কাজ শেষ করার সম্মান অর্জনের জন্য দলগুলির মধ্যে একান্ত প্রতিযোগিতা আরম্ভ হল।

ভোর হবার অনেক আগেই করচাগিন নিঃশব্দে উঠে দাঁড়াল যাতে অন্যেরা না জেগে যায়। ঠাণ্ডা মেঝের উপর তার শীতে-জমে-যাওয়া পা বহুকষ্টে ফেলে রান্নাঘরের দিকে এল। সেখানে চায়ের জন্য জল গরম করে তার দলকে জাগিয়ে তোলার জন্য ফিরে এল।

অন্য সবার যখন ঘুম ভাঙল, তখন পরিষ্কার দিনের আলো ফুটে গেছে। সেদিন সকালে পানক্রাতভ কনুইয়ের গুঁতোয় ব্যারাক-ঘরের ভিড় ঠেলে এগিয়ে এল যেখানে দুবাবা আর তার দল সকালের খাবার খাচ্ছে।

উস্বেজিতভাবে সে বলল, ‘উনছ, মিতিয়াই? পাভকা তার দলের ছেলেদের সকাল হবার আগেই জাগিয়ে তুলেছে। এতক্ষণে ওরা পুরো কুড়ি গজ লাইন পেতে ফেলেছে—তা আমি বাজি রেখে বলতে পারি। সবাই বলছে, পাভেল তার রেল-কারখানার ছেলেদের মাতিয়ে তুলেছে যাতে ওরা পঁচিশ তারিখের মধ্যেই ওদের অংশটা শেষ করে ফেলতে পারে। আমাদের সবাইকে হারিয়ে দিয়ে বোকা বানাতে চায়। কিন্তু, আমি বলছি—ওসব চলবে না!’

দুবাবা তিক্ত হাসি হাসল। রেল-কারখানার কর্মীরা যা করেছে, তার জন্য বন্দরের কমসমালের এই সম্পাদকটির যে কেন এত আঁতে ঘা লেগেছে, সেটা দুবাবা বোঝে। বাস্তবিকপক্ষে, তার বন্ধু দুবাবাকেও পাভেল খুঁচিয়ে দিয়েছে—মুখে কিছু না-বললেও, সে গোটা দলটাকেই প্রতিদ্বন্দ্বিতায় আহ্বান জানিয়েছে।

পানক্রাতভ বলল, ‘বন্ধুই হোক আর যাই হোক, এখানে লড়াই চলবে বৈকি।’

বেলা বারোটোর কাছাকাছি করচাগিনের দল যখন খুব জোরে কাজ চালিয়েছে তখন একটা অপ্রত্যাশিত ব্যাঘাত ঘটল। রাইফেলগুলো যেখানে জড়ো করা রয়েছে, সেখানে যে-সাত্ত্বীটি পাহারায় ছিল, সে গাছের ফাঁকে একদল ঘোড়সওয়ারকে এগিয়ে আসতে দেখে একটা বিপদ-সংকেতসূচক গুলির আওয়াজ করল।

‘অস্ত্র নিয়ে নাও, ভাইসব! ডাকাতদল!’ চৈচিয়ে উঠল পাভেল। কোদালটা ছুড়ে ফেলে সে ছুটে গেল একটা গাছের দিকে যেখানে তার মাউজার-পিস্তলটা ঝোলানো।

রাইফেলগুলো তাড়াতাড়ি তুলে নিয়ে দলটি রেললাইনের ধার ঘেঁষে সটান বরফের ওপরে শুয়ে পড়ল। সামনের সারির ঘোড়সওয়াররা তাদের টুপি নাড়ল। তাদের মধ্যে থেকে একজন চোঁচিয়ে উঠল, 'সামলে, কমরেড, গুলি ছুড়ো না!'

উজ্জ্বল লাল তারা-আঁটা বুদ্ধিগনি-টুপি মাথায় প্রায় পঞ্চাশজন ঘোড়সওয়ার সৈন্য রাস্তা বেয়ে এল।

রেললাইনের কাজের জায়গায় দেখাশোনা করতে এসেছে পুজিরেভ্‌স্কির রেজিমেন্টের একটা দল। এই দলের কম্যান্ডারের সুন্দর ধূসর রঙের মাদি ঘোড়াটাকে লক্ষ করল পাভেল—কপালের উপর খানিকটা জায়গা জুড়ে শাদা রঙ, একটা কানের প্রান্তটা তার কাটা। সওয়ারকে পিঠে নিয়ে সে অস্থিরভাবে পা ঠুকছে। পাভেল ছুটে গিয়ে তার লাগামটা চেপে ধরতেই সে ঘাবড়ে গিয়ে পিছিয়ে গেল।

'কি রে, লিস্কা দুইটা! ভাবতেও পারিনি যে তোর সঙ্গে আবার দেখা হয়ে যাবে! তাহলে দেখছি বুলেট বিধতে পারেনি তোর গায়ে—কান-কাটা সুন্দরী আমার!'

পাভেল স্নেহের সঙ্গে ঘোড়াটার ছিমছাম গলাটা জড়িয়ে ধরে তার কঁপে-ওঠা নাকের প্রান্তে আদর করে চাপড় মারল। একমুহূর্তে পাভেলের দিকে তাকিয়ে থেকে কম্যান্ডার বিশ্বাসে চোঁচিয়ে উঠল, 'আরে! করচাগিন না? ঘোড়াটাকে চিনতে পারলে, আর তোমার পুরনো বন্ধু সেরেদাকে একবার তাকিয়েও দেখলে না! ভালো আছ, ভাই?'

\*

\*

\*

ইতিমধ্যে, রেললাইন পাতার কাজটা যাতে খুব তাড়াতাড়ি শেষ হয়, তার জন্য শহরে সর্ববিভাগে চাপ দেওয়া হচ্ছে। কাজের জায়গায় সেটা সঙ্গে সঙ্গেই স্পষ্ট হতে লাগল। জেলা কমসমোল কমিটি থেকে একেবারে সমস্ত পুরুষকর্মীদের সরিয়ে নিয়ে ঝার্কি তাদের পাঠিয়ে দিয়েছে বোয়ার্‌কায়। সলোমেন্‌কায় রয়েছে শুধু মেয়েরা। রেলওয়ের কলেজ থেকে আরেকদল ছাত্র পাঠাবার ব্যবস্থাও সে করেছে।

তার কাজের ফলাফল আকিমের কাছে রিপোর্ট করার সময়ে সে ঠাট্টা করে বলল, 'আমি এখানে পড়ে রয়েছি শুধু নারী-প্রলেতারিয়েত নিয়ে। ভাবছি—তালিয়া লাগুতিনাকে আমার জায়গায় এনে বসিয়ে, দরজার গায়ে 'মহিলা-বিভাগ' লেখা তক্তা ঝুলিয়ে দিয়ে, নিজে বোয়ার্‌কায় কেটে পড়ব। এতগুলো মেয়ের মধ্যে আমি একমাত্র পুরুষ—ভারি অস্বস্তিকর হয়ে দাঁড়াচ্ছে আমার পক্ষে। কী বিশ্রীভাবে যে ওরা আমার দিকে তাকায়, যদি দেখতে একবার! ওরা নিশ্চয় বলাবলি করে : 'এই যে, ঘাগী অকর্মাটা, সবাইকে পাঠিয়ে দিয়ে নিজে এখানে বসে আছে।' কিংবা এর চেয়ে খারাপ কিছুও বলে হয়তো। আমাকে যেতে দিতে হবে তোমায়।'

কিন্তু আকিম শুধু হাসল তার কথায়, সম্মতি দিল না।

বোয়ার্‌কায় নতুন নতুন কর্মীদল আসতে থাকল। এদের মধ্যে এল রেল-কারখানা স্কুল থেকে ষাটজন ছাত্র।

নতুন যারা এসেছে, তাদের থাকার জন্য যাত্রীবাহী ট্রেনের চারখানা কামরা পাঠাতে রেলওয়ের পরিচালন বিভাগকে রাজি করাল বুখরাই।

দুবাভার দলকে এখানকার কাজ থেকে খালাস দিয়ে পুচ্চা-ভোদিংসায় পাঠানো হয়েছে—সেখান থেকে ইঞ্জিন কটা আর পঁয়ষট্টিখানা সৰু রেলপথের মালবাহী খোলা গাড়ি নিয়ে আসার জন্য। এই কাজটাকে তাদের রেললাইন-পাতার কাজের অংশ হিসেবেই গণ্য করা হবে।

ক্লাভিচেচকে শহর থেকে ফিরিয়ে এনে বোয়ার্‌কায় নতুনভাবে সংগঠিত কর্মীদের ভার তার ওপরে দেবার জন্য দুবাভা যাবার আগে তোকারেভকে পরামর্শ দিয়ে গেল। তাই করল তোকারেভ। দুবাভার এই অনুরোধের আসল কারণটা সে জানত না। সেটা হচ্ছে—সলোমেনকা থেকে নতুন যারা এসেছে তাদের মারফত পাঠানো আল্লার একখানা চিঠি।

আল্লা লিখেছে :

দমিত্রি! ক্লাভিচেচ আর আমি তোমাদের জন্যে একগাদা বই জোগাড় করেছি। তোমাকে, আর বোয়ার্‌কায় সমস্ত তড়িৎকর্মীকে আমাদের অভিনন্দন। তোমরা সবাই চমৎকার! কাজ চালিয়ে যাবার জন্যে আমরা তোমাদের শক্তি ও উদ্যম কামনা করছি। গতকাল এখানে জ্বালানিকাঠের শেষদফা বিলি করা হয়ে গেছে। ক্লাভিচেচ তোমাদের তার শুভেচ্ছা জানানোর জন্যে আমাকে লিখতে বলেছে। চমৎকার ছেলে সে। বোয়ার্‌কায় পাঠাবার জন্যে সমস্ত রুটি সেই সৈঁকে, ময়দা ঝাড়ে আর জল দিয়ে নিজেই ময়দা মেখে রাখে। রুটি-কারখানার আর কাউকে এ-কাজ করতে দিতে ভরসা পায় না ও। খুব ভালো ময়দা পাবার বন্দোবস্ত ও করে নিয়েছে, ওর রুটিগুলো দিবি। হয়—আমি যেরকম রুটি পাই তার চেয়ে ঢের ভালো। সন্ধ্যার দিকে আমার এখানে বন্ধুবান্ধবরা সব আসে—শান্তিনা, আরতিউখিন, ক্লাভিচেচ এবং মাঝে মাঝে ঝার্কি। আমরা একটু-আধটু পড়ি, তবে বেশির ভাগই সবার সম্বন্ধ আর সব বিষয়েই গল্প করি—প্রধানত বোয়ার্‌কায় তোমাদের কথাই বেশি বলাবলি করি। ওখানে কাজ করার জন্যে যেতে দেওয়া হয়নি বলে মেয়েরা সব ভীষণ চটে আছে তোকারেভের ওপর। এরা বলছে, কষ্ট সহ্য করার ব্যাপারে ওরা কারুর চেয়ে কম যায় না। তালিয়া বলে দিয়েছে—তার বাবার পোশাক পরে সে নিজেই বোয়ার্‌কায় গিয়ে বাবার কাছে হাজির হবে; বলছে : ‘দেখি, কী করে ও আমাকে তাড়ায়!’

তালিয়া যদি ওর কথামতো কাজ করে বসে, তাহলে আশ্চর্য হবার কিছু নেই। তোমার সেই কালা-চোখ বন্ধুটিকে আমার নমস্কার জানিও।

\*

\*

\*

আল্লা’

তুষার-ঝড় শুরু হয়ে গেল হঠাৎ। আকাশ ছেয়ে গেল ধূসর মেঘের নিচু-স্তরে, আর তুষার পড়তে লাগল পুরু হয়ে। রাত্রিবেলায় চিমনির মুখে শৌ-শৌ আওয়াজ তুলে আর গাছের ফাঁকে কান্নার শব্দে বাতাস বইতে লাগল, পাক-খাওয়া তুষারের চিলকেতুলোকে তাড়া করে ফিরল হাওয়া তার অন্তত গোঙানির আরণ্যক প্রতিধ্বনি জাগিয়ে।

সারারাত্রি ধরে দুরন্ত উন্মত্ততায় ঝড় বয়ে গেল। সারারাত্রি ধরে উনুনগুলো জ্বালিয়ে রাখা হলেও মানুষগুলো শীতে কঁপেছে। ভাঙাচোরা স্টেশন-বাড়িটায় শীত আটকায়নি।

সকালে লোকগুলোকে কাজের জায়গায় যাবার সময় বরফের স্তূপের মধ্যে পথ কেটে যেতে হল। গাছগুলোর মাথায় অনেক উঁচুতে নীল আকাশের বুকে সূর্য জ্বলছে, তার উজ্জ্বল ছটাকে ম্লান করার মতো একটুকরো মেঘও কোথাও নেই।

করচাগিন আর তার কর্মীদল তাদের কাজের জায়গায় এল তুষারস্তুপ সরাবার জন্য। শীতে-যে মানুষের কতখানি কষ্ট হতে পারে, সেটা পাভেল এই এতক্ষণে উপলব্ধি করছে। ওকুনেভের হেঁড়াখোঁড়া কোর্টাটা তার শরীরকে মোটেই গরম করতে পারছে না। গালোশ-জুতোটা অনবরত বরফে ভরে যাচ্ছে। বরফের মধ্যে আটকে গিয়ে গালোশটা প্রায়ই খুলে আসছে। কাঁধের ওপরে তার বিরাট দুটো ফোড়া উঠেছে—ঠাণ্ডা মেঝের ওপরে শোবার ফল। মাফলারের বদলে পরার জন্য তোকারেভ তাকে তার তোয়ালেটা দিয়েছে।

শীর্ণদেহে লাল দুটো চোখ নিয়ে পাভেল তার বরফ-কাটা কাঠের বেলচাটা সবগে চালাচ্ছে, এমন সময় একটা যাত্রীবাহী ট্রেন মন্থর নিশ্বাস ছেড়ে স্টেশনে এসে থামল। দম-ফুরিয়ে-আসা ইঞ্জিনটা এই পর্যন্ত কোনোক্রমে ট্রেনটাকে টেনে আনতে পেরেছে। তার জ্বালানিকাঠের বাষ্পটায় একটা কাঠের গুঁড়িও নেই। বয়লারে শেষ কাঠের টুকরোগুলোর আগুনও মিইয়ে আসছে।

ইঞ্জিন-ড্রাইভার চেষ্টা করে বলল স্টেশন-মাস্টারের উদ্দেশ্যে, ‘জ্বালানিকাঠ দাও, তবেই যেতে পারব আমরা। আর তা নইলে, যেটুকু চলার শক্তি অবশিষ্ট আছে, সেটুকু থাকতে থাকতে পাশের কোনো লাইনে আমাদের আসতে দাও।’

পাশের একটা লাইনে সরিয়ে আনা হল ট্রেনটাকে। বিরক্ত আর অসন্তুষ্ট যাত্রীদের কাছে ট্রেন থামিয়ে দেবার কারণটা জানাতেই একটা আপত্তি আর গালাগালির ঝড় উঠল ভিড়াক্রান্ত কামরাগুলো থেকে।

তোকারেভ যাচ্ছিল প্র্যাটফর্মের উপর দিয়ে—তার দিকে ট্রেনের গার্ডদের দেখিয়ে স্টেশন-মাস্টার পরামর্শ দিল, ‘ওই বুড়োমানুষটার সঙ্গে গিয়ে কথা বলো। ও এখনকার লাইন-পাতার কাজের প্রধান কর্তা। ও হয়তো স্নেহগাড়ি করে ইঞ্জিনের জন্যে জ্বালানিকাঠ আনবার ব্যবস্থা করতে পারে। ওরা স্নিপারের জন্যে কাঠের গুঁড়ি ব্যবহার করছে।’

গার্ডরা তার কাছে গিয়ে আবেদন জানাতে তোকারেভ বলল, ‘কাঠ আমি দেব তোমাদের, তবে তোমাদেরও তার জন্যে কিছু দিতে হবে। ওই কাঠ তো আমাদের রেললাইন পাতার উপকরণ। আপাতত বরফ পড়ার ফলে আমাদের কাজ বন্ধ হয়ে আছে। তোমাদের ট্রেনে নিশ্চয়ই প্রায় ছয়-সাতশো যাত্রী আছে। মেয়েরা আর শিশুরা যেমন আছে থাকুক, কিন্তু পুরুষদের নেমে এসে বিকেল পর্যন্ত বরফ সাফ করার কাজে হাত লাগাতে হবে। তাহলে আমি তোমাদের কাঠ দেব। যদি আসতে না চায়, তাহলে নতুন বছর না-আসা পর্যন্ত ওরা যেখানে আছে, সেইখানেই থাকুক।’

\*

\*

\*

করচাগিন তার পেছন দিকে একটা বিষয়ভরা উজ্জ্বল, ‘দেখ, দেখ, কত লোক আসছে এদিকে! মেয়েরা পর্যন্ত!’

ঘুরে দাঁড়াল সে।

তোকারেও এসে বলল, 'এই একশো জন এসেছে তোমাদের সাহায্য করবার জন্যে। ওদের কাজ দাও, আর দেখো যেন কেউ ফাঁকি না দেয়।'

আগন্তুকদের কাজে লাগিয়ে দিল করচাগিন। রেলওয়ে অফিসারের কেতাদুরস্ত উর্দি গায়ে, লোনের কলার জুড়ানো, আর মাথায় পশমের উঁচু টুপি-পরা লম্বা একজন লোক বিরক্তির সঙ্গে তার হাতের মধ্যে বেলচাটা ঘোরাতে ঘোরাতে তার সঙ্গিনীর দিকে ফিরল। এই সঙ্গিনীটি একটি তরুণী, তার মাথায় সিল-এর চামড়ার টুপির ওপরে চটকদার রোয়াঅলা একটা ছোট্ট গোলা বসানো।

'আমি বরফ কাটব না, আর জোর করে আমাকে দিয়ে এ-কাজ করানোর অধিকার কারও নেই। ওরা যদি আমাকে বলে, তাহলে রেলওয়ে-ইঞ্জিনিয়ার হিশেবে আমি এ-কাজটা পরিচালনা করার ভার নিতে পারি। কিন্তু তোমার বা আমার বেলচা দিয়ে বরফ কাটার কোনো দরকার পড়েনি—ওটা রেলওয়ের কানুনের বিরোধী। ওই বুড়োটা আইন ভাঙছে। আমি ওকে আইনে অভিযুক্ত করতে পারি। তোমাদের কাজের সর্দার কোথায়?' লোকটা তার সবচেয়ে কাছাকাছি শ্রমিকটির দিকে ফিরে জানতে চাইল।

এগিয়ে এল করচাগিন।

'কাজ করছেন না কেন, মশাই?'

পাভেলের আপাদমস্তক অত্যন্ত অবজ্ঞার সঙ্গে তাকিয়ে দেখল লোকটা।

'তা, আপনি কৈ বটেন?'

'আমি একজন মজুর।'

'তাহলে আপনাকে কিছু বলার নেই। আপনাদের সর্দারকে—কিংবা যাই বলুন আপনারা তাকে—পাঠিয়ে দিন এখানে...'

জুকুটি করে করচাগিন তাকাল তার দিকে।

'যদি কাজ করতে না চান তো করবেন না। কিন্তু আপনার টিকিটে আমরা সই করে না দিলে আপনি ট্রেনে চাপতে পারবেন না। আমাদের বড়কর্তার এই হুকুম।'

মহিলাটির দিকে ফিরে পাভেল বলল, 'আর, আপনিও কি কাজ করতে চান না?'

বলেই সে বিশ্বয়ে নির্বাক হয়ে গেল। তার সামনে দাঁড়িয়ে আছে তোনিয়া তুমানভা! তোনিয়ার যেন বিশ্বাসই হতে চায় না যে শতচ্ছিন্ন পোশাক-পরা, অদ্ভুত জুতো-পায়ে, গলায় একটা নোংরা তোয়ালে জুড়ানো, বহুদিনের না-ধোয়া ময়লা-ভরা মুখেও তার সামনে দাঁড়িয়ে আছে করচাগিন। কেবল চোখদুটো তার আগের মতোই তীব্র নীলিতে জ্বলছে। এ সেই পাভেলের চোখ, যে-পাভেলকে তার মনে আছে। আর, যেন ভাবতেই পারা যায় না যে ভবঘুরে চেহারার এই নিতান্ত হতশ্রী প্রাণীটিকেই সে অল্প কিছুকাল আগে ভালোবেসেছিল। কীভাবে যে বদলে গেছে সবকিছু!

তোনিয়া সম্প্রতি বিয়ে করেছে; সে আর তার স্বামী চলেছে বড় শহরে। সেখানে রেলওয়ের পরিচালনা বিভাগে তার স্বামী একজন ওপরঅলা চাকুরে। কেই বা ভাবতে পেরেছিল যে তার কিশোরী-বয়সের ভালোবাসার পাত্রটির সঙ্গে দেখা হয়ে থাকে এইভাবে? এমনকি সে পাভেলের দিকে তার হাতটা এগিয়ে দিতেও ইতস্তত করছে। কী ভাববে ভাসিলি? করচাগিন এত নিচে নেমে গেছে—কী দুর্ভাগ্য! স্পষ্টই



দেখা যাচ্ছে, বয়লারের কয়লা-জোগানদার ছেলেটি রেল-মজুরের বেশি উঁচুতে আর উঠতে পারেনি।

অনিচ্ছিতভাবে দাঁড়িয়ে রইল সে আর তার গালদুটো লাল হয়ে উঠল। ইতিমধ্যে, এই ভবঘুরেটি যে তার স্ত্রীর দিকে অপলক চোখে তাকিয়ে আছে, সেটাকে ঠুগুতা বলে ধরে নিয়ে সেই রেলওয়ে-ইঞ্জিনিয়ারটি ক্রুদ্ধ হয়ে তার বেলচাটা ফেলে দিয়ে তোনিয়ার পাশে এসে দাঁড়াল।

‘চলো তোনিয়া, আমরা যাই। এই লাৎসারোনিটাকে\* আর দেখতে পারি না।’

করচাগিনের ‘জুসেপে গ্যারিবল্দি’ বইটা পড়া ছিল, তাই ওই কথাটার মানে জানা ছিল তার।

কর্কশ গলায় সে বলল, ‘আমি লাৎসারোনি হতে পারি, কিন্তু তুমি একটা ঘুণ-ধরা বুর্জোয়ার বেশি কিছু নও।’ তোনিয়ার দিকে ফিরে কঠিনস্বরে বলল সে, ‘কমরেড তুমানভা, বেলচাটা তুলে নিয়ে কাজের সারিতে शामिल হন। এই নাদুসনুদুস ষাঁড়টির উদাহরণ অনুসরণ করবেন না...এখানে...মাপ করবেন, জানি না ওর সঙ্গে আপনার কী সম্বন্ধ।’

তোনিয়ার ফার-বুটের দিকে একনজর তাকিয়ে পাভেল একটু নির্মম হাসি হেসে প্রসঙ্গক্রমে কথা বলার ভঙ্গিতে বলল, ‘এখানে আপনার থেকে-যাওয়ার পরামর্শটা আমি দিতে পারি না। সেদিন রাতে ডাকাতদলের হামলা হয়েছিল।’

বলেই সে পেছনে ফিরে চলে গেল তার গালোশ-জুতোয় ঢপঢপ আওয়াজ তুলে।

তার শেষ কথাগুলির ফল রেলওয়ে-ইঞ্জিনিয়ারটির ওপরেও ফলল এবং এখানে কাজ করার জন্য তাকে রাজি করাতে পারল তোনিয়া।

সেদিন সন্ধ্যার দিকে সারাদিনের কাজের শেষে লোকজন দলে-দলে স্টেশনে ফিরছে, তোনিয়ার স্বামী ট্রেনে জায়গা পাবার জন্য ব্যস্ত হয়ে তাড়াতাড়ি এগিয়ে চলেছে। একদল শ্রমিককে বেরিয়ে যেতে দেবার জন্য একটুখানি দাঁড়িয়ে পড়তেই তোনিয়া দেখল—পাভেল আর সবার পেছনে ক্রান্তভাবে পা ফেলে চলেছে তার বেলচাটার ওপরে ভর দিয়ে দিয়ে।

‘এই যে, পাভুলুশা’, তার পাশে এসে একসঙ্গে হাঁটতে হাঁটতে তোনিয়া বলল, ‘এতটা দুস্থ অবস্থায় তোমাকে দেখতে পাব বলে ভাবিনি কিন্তু। কর্তৃপক্ষের অবশ্যই জানা উচিত ছিল যে এই রেল-মজুরের কাজের চেয়ে তুমি আরও ভালো কিছুর যোগ্য। আমি ভেবেছিলাম—এতদিনে তুমি কমিশনার কিংবা ওইরকম কিছু হয়েছ বুঝি। বড় দুঃখের কথা যে জীবন তোমার প্রতি এতটা বিমুখ হয়েছে...’

পাভেল দাঁড়িয়ে পড়ে বিম্বিত হয়ে তোনিয়াকে লক্ষ করল।

‘আমিও তোমাকে এতটা...এতটা মরকুটে দেখব বলে আশা করিনি’, নিজের মনোভাব প্রকাশের জন্য সবচেয়ে নরম কথাটা সে যা ভাবতে পারে তাই বেছে নিয়ে বলল পাভেল।

\* ইতালির নেপলস শহরের অতি দুস্থ আর অকর্মণ্য একশ্রেণীর লোককে ‘লাৎসারোনি’ (lazzarone) বলা হত। ইতালীয় মুক্টিসংগ্রামের নেতা জুসেপে গ্যারিবল্দি এদের একটা বড় অংশকে বিপ্লবী কর্মী হিসেবে সংগঠিত করে তুলেছিলেন।

তোনিয়ার দুই কানের লতি লাল হয়ে উঠল।

‘তুমি ঠিক আগের মতোই অভদ্র আছ!’

করচাগিন তার বেলচাটা কাঁধের উপর ফেলে এগিয়ে গেল। কয়েক পা গিয়েই সে থামল।

‘কমরেড তুমানভা’, বলল সে, ‘তোমাদের তথাকথিত ভদ্রতা মানুষকে যতটা আঘাত দেয়, আমার এই অভদ্রতা তার অর্ধেক আঘাতও দিতে পারে না। আর, দয়া করে আমার জীবন সম্বন্ধে তুমি কিছু ভেবো না। আমার জীবনের মধ্যে কোথাও কোনো গোলমাল নেই। তোমার জীবনটাই একদম গোলমাল হয়ে গেছে—যতটা ভেবেছিলাম তার চেয়েও ঢের বেশি খারাপ দেখছি। দু-বছর আগে তুমি এর চেয়ে ভালো ছিলে, তখন তুমি কোনো শ্রমিকের সঙ্গে করমর্দন করতে লজ্জা পেতে না। কিন্তু এখন তোমার সর্বত্র দিয়ে পুরনো কালের গন্ধ বেরুচ্ছে। সত্যি বলতে কী, তোমার আমার মধ্যে এখন আর কোনো কথা বলার নেই।’

\*

\*

\*

আরতিওমের কাছ থেকে একটা চিঠি পেল পাভেল। সে বিয়ে করতে চলেছে জানিয়ে বিশেষ করে লিখেছে পাভেল সে-উপলক্ষে যেন অবশ্যই আসে।

একটা দমকা বাতাস এসে পাভেলের হাত থেকে কাগজখানা ছিনিয়ে উড়িয়ে নিয়ে গেল হাওয়ায় ভাসিয়ে। বিয়ের আনন্দ-উৎসব পাভেলের জন্য নয়। এরকম সময়ে সে কাজ ছেড়ে যাবে কী করে? মাত্র গতকাল ওই ভালুক পানক্রান্তভটা তার দলের চেয়ে কাজে বেশ খানিকটা এগিয়ে গেছে। ও ইঠাৎ এতটা কাজ এগিয়ে নিয়ে গেছে যে সবাই অবাক হয়ে গেছে। বন্দরের মাল-খালসি ছেলেটা প্রতিযোগিতায় প্রথম হবার জন্য মরিয়া হয়ে উঠেছে। সাধারণত তার মধ্যে যে একটা নিরুদ্ভাপ ভাব ছিল, সেটা কেটে গেছে এবং ছেলেদের পেছনে লেগে থেকে সে তাদের কাজের গতিবেগ প্রচণ্ডরকম বাড়িয়ে দিয়েছে।

লোকগুলো-যে নিঃশব্দ একাগ্রতার সঙ্গে প্রাণপণে কাজ করে চলেছে, সেটা লক্ষ করে পাতোশ্কিন বিমূঢ়ভাবে তার মাথাটা চুলকোতে চুলকোতে অবাক হয়ে ভাবল, ‘এরা মানুষ না দৈত্য? এরা এই অবিশ্বাস্য রকমের শক্তি পায় কোথা থেকে? আর মাত্র আটটা দিন যদি আবহাওয়াটা এরকম থেকে যায়, তাহলে তো আমরা কাঠ-কাটাইয়ের জায়গায় পৌঁছেই যাব! সেই-যে বলে, সারাজীবন ধরে যতই দ্যাখো আর শেখো, বুড়ো বয়সে বোকাই থেকে যাবে! এই লোকগুলো তো সমস্ত হিশেব ভেঙে দিয়ে আগেকার সব রেকর্ড ভেঙে দিল দেখছি।’

ক্লাভিচেক তার সৈঁকা-ক্লটির শেষ-বোঝাটা নিয়ে শহর থেকে এল। তোকারেভের সঙ্গে কিছুক্ষণ কথা বলে সে বেরিয়ে পড়ল করচাগিনের খোঁজে। আন্তরিক খুশির সঙ্গে করমর্দন করল তারা দু’জনে। একগাল হেসে ক্লাভিচেক তার ন্যাপস্যাঁকটার ভেতরে হাত ঢুকিয়ে বের করে আনল নিচের দিকে লোম-বসানো সুইডেনের তৈরি অতি সুন্দর একটা চামড়ার কোর্তা।

নরম চামড়াটার ওপরে মৃদু চাপড় মেরে সে বলল, ‘এটা তোমার জন্যে। বলো দেখি কে পাঠিয়েছে? সে কি জানো না? তুমি একটা বুদ্ধ! কমরেড উস্তিনোভিচ

পাঠিয়েছে, যাতে তোমার ঠাণ্ডা না লাগে। ওকে ওল্‌শিনস্কি দিয়েছিল এটা। রিতা এটা গিয়ে তোমাকে পৌঁছে দেবার হুকুম দিয়ে সোজা আমার হাতে তুলে দিল। আকিম রিতাকে বলেছিল যে এখানে বরফে সব জমে যাচ্ছে আর তারই মধ্যে তোমার গায়ে একটা পাতলা কোর্তা ছাড়া আর কিছুই নেই। ওল্‌শিনস্কি এ-ব্যাপারে বেশ একটু কান-মলা খেয়ে গেল। ‘আমি ওই কমরেডটিকে একটা সামরিক কোট পাঠাবার জন্যে দিতে পারি’, বলেছিল সে। কিন্তু রিতা তার উত্তরে শুধু হেসে উঠে বলেছিল, ‘ঠিক আছে, এই কোর্তাটা গায়ে দিয়েই ওর কাজ করতে বেশি সুবিধে হবে।’

বিস্মিত পাভেল এই শৌখিন কোর্তাটা নিয়ে একটু ইতস্তত করে জমে-যাওয়া শরীরের উপর পরে নিল সেটা। প্রায় সঙ্গে সঙ্গেই সে অনুভব করল তার কাঁধ আর বুকের ওপরে নরম লোমের আন্তরণের উষ্ণতা।

\*

\*

\*

রিতা তার রোজনামচায় লিখেছে :

২০ ডিসেম্বর

তুষার-ঝড়ের একটা পালা চলছে আমাদের ওপর দিয়ে। বরফ পড়ছে আর ঝড় বইছে। বোয়ার্‌কায় ওরা প্রায় ওদের লক্ষ্যে পৌঁছবে, এমন সময়ে তুষার-ঝড় এসে ওদের থামিয়ে দিয়েছে। একরাশ বরফের মধ্যে পড়ে গেছে ওরা, বরফে জমে-যাওয়া মাটি কেটে তোলাও সহজ নয়। আর মাত্র আধ-মাইলটাক এগুতে বাকি আছে ওদের, কিন্তু কাজের এই অংশটুকুই সবচেয়ে কঠিন।

তোকারেভ রিপোর্ট করছে—ওখানে টাইফাস দেখা দিয়েছে, তিনজন অসুখে পড়েছে।

২২ ডিসেম্বর

প্রাদেশিক কমসমোল কমিটির সমস্ত সভ্যদের নিয়ে একটা পূর্ণ অধিবেশন হয়ে গেছে, কিন্তু বোয়ার্‌কা থেকে কেউ উপস্থিত ছিল না। বোয়ার্‌কা থেকে বারো মাইল দূরে ডাকাতরা শস্য-বোঝাই একটা ট্রেন লাইনচ্যুত করে দিয়েছে এবং যারা লাইন-পাতার কাজে আছে, সেই সমস্ত কর্মীকে ঘটনাস্থলে পাঠাবার জন্য হুকুম জারি করেছে খাদ্য জন-কমিশারের প্রতিনিধি।

২৩ ডিসেম্বর

বোয়ার্‌কা থেকে আরও সাতজন টাইফাসের-রুগীকে শহরে আনা হয়েছে। এদের মধ্যে ওকুনেন্ত একজন। আজ স্টেশনে গিয়ে দেখলাম খারকভ থেকে আসা একটা ট্রেনের বাফারে চেপে জনকডক লোক আসছিল, ঠাণ্ডায় জমে-যাওয়া তাদের মৃতদেহগুলো নামিয়ে নেওয়া হল। হাসপাতালগুলো গরম রাখার কোনো ব্যবস্থা নেই। এই হতচ্ছাড়া তুষার-ঝড়টা যে কবে থামবে?

২৪ ডিসেম্বর

এইমাত্র বুখরাইয়ের সঙ্গে দেখা হল। আগের রাত্রি ওরুলিক তার দলটা নিয়ে বোয়ার্‌কা আক্রমণ করেছিল বলে যে-কথাটা শোনা যাচ্ছে, সেটাকে সে ঠিক বলে জানাল। দু-ঘণ্টা ধরে লড়াই চলেছিল। যোগাযোগ বিচ্ছিন্ন হয়ে গিয়েছিল এবং আজ সকালের

আগে পর্যন্ত ঝুঝুয়াই সঠিক রিপোর্ট পায়নি। ডাকাতদলটাকে হঠিয়ে দেওয়া হয়েছে, কিন্তু তোকারেভ আহত হয়েছে—একটা বুলেট সরাসরি তার বুকে বিধেছে। আজ তাকে শহরে নিয়ে আসা হবে। সেদিন রাতে পাহারার ভার ছিল ফ্রান্স ক্লাভিচেকের ওপরে, সে নিহত হয়েছে। ডাকাতদলটাকে আসতে দেখে সেই সাবধান-সংকেত জানায়। হামলাকারীদের উপরে সে গুলি চালাতে শুরু করে, কিন্তু ইকুল-বাড়িটায় গিয়ে পৌছবার আগেই তাকে ওরা ধরে ফেলে। তলোয়ারের একটা চোটে ও কাটা পড়ে। কর্মীদের মধ্যে এগারো জন আহত হয়েছে। এতক্ষণে এখানে একটা সাজোয়া-ট্রেন আর ঘোড়সওয়ার বাহিনীর দুটো কোয়াড্রন গিয়ে পৌছেছে।

লাইন-পাতার কাজের ভার নিয়েছে পানক্রাতভ। আজ যুবোবিক গ্রামে ডাকাতদলের একটা অংশকে পুজিরেভস্কি পাকড়াও করে একদম খতম করে দিয়েছে। পার্টি-সভা নয়, এমন কিছু শ্রমিক ট্রেন আসার অপেক্ষায় না-থেকে রেললাইন ধরে পায়ে হেঁটেই শহরের দিকে চলে গিয়েছে।

২৫ ডিসেম্বর

তোকারেভ আর অন্যান্য আহত লোকেরা শহরে এসে পৌছেছে; তাদের হাসপাতালে দেওয়া হয়েছে। বৃদ্ধকে বাঁচাবার প্রতিশ্রুতি দিচ্ছে ডাক্তাররা। সে এখনও অচেতন হয়ে আছে। অন্যদের প্রাণের কোনো আশঙ্কা নেই।

আমাদের আর প্রাদেশিক পার্টি কমিটির উদ্দেশ্যে লেখা একটা টেলিগ্রাফ এসেছে বোয়ারুকা থেকে :

‘এই সভায় সমবেত আমরা—রেললাইন-কর্মীরা, ‘সোভিয়েত রাজ্যের জন্য’ নামে সাজোয়া-ট্রেনের চালক-রক্ষীদল আর লালফৌজের ঘোড়সওয়ার রেজিমেন্টের সৈন্যরা—ডাকাতদলের হামলার জবাবে তোমাদের কাছে প্রতিজ্ঞা করছি যে সমস্তরকম বাধাবিপত্তি সত্ত্বেও পয়লা জানুয়ারির মধ্যেই শহর জ্বালানিকাঠ পাবে। আমাদের সমস্ত শক্তি সংহত করে আমরা কাজে নেমেছি। কমিউনিস্ট পার্টি আমাদের এই কাজে পাঠিয়েছে—কমিউনিস্ট পার্টি জিন্দাবাদ!

সভার সভাপতি করচাগিন

সম্পাদক বেরজিন।’

ক্লাভিচেককে সলোমেনকায় সামরিক সম্মানের সঙ্গে গোর দেওয়া হয়েছে।

\*

\*

\*

এতদিনের কামনার লক্ষ্যস্থল জ্বালানিকাঠ দৃষ্টিপথে এসেছে, কিন্তু সেদিকে এগিয়ে চলার গতিটা যন্ত্রণাদায়কভাবে মন্ডুর হয়ে পড়েছে—কারণ, প্রতিদিন কর্মীদের মধ্যে থেকে উজ্জন উজ্জন করে অত্যন্ত প্রয়োজনীয় লোককে টাইফাস এসে ছিনিয়ে নিচ্ছে।

কাজ সেরে স্টেশনে ফেরবার পথে করচাগিন মাতালের মতো টলতে লাগল। তার পাদুটো যেন আর চলে না। বেশ কয়েকদিন ধরেই তার একটু জ্বর-জ্বর ভাব যাচ্ছে, কিন্তু আজ তাকে অসুখটা যেন নির্মমভাবে চেপে ধরেছে।

রেলপথ-তৈরির কর্মীদের সংখ্যাকে টাইফাস দিন-দিন কমিয়ে আনছে। সেই টাইফাস আজ একটা নতুন শিকার ধরেছে। কিন্তু মজবুত শরীরের জোরেই পাভেল

অসুখকে ক্রমশঃ। কংক্রিটের মেঝেয় পাতা খড়ের আন্তরণের উপর থেকে নিজেকে পরপর পাঁচদিন টেনে তুলে এনেছে সে। আর সবার সঙ্গে কাজে যোগ দেবার মতো শক্তিটুকু তখনও তার শরীরে ছিল। কিন্তু এখন অসুখটা তাকে সম্পূর্ণভাবে আচ্ছন্ন করেছে—গরম কোর্তাটায় কিংবা বরফের ছোঁয়া লেগে ঘা হয়ে যাওয়া পায়ের-পরা ফিণ্ডদের উপহার ওই ফেন্টের বুটজোড়ায় আর কাজ হচ্ছে না।

প্রতি পদক্ষেপে একটা তীব্র যন্ত্রণা তার বুক দশে দিচ্ছে, দাঁত ঠকঠক করছে, দৃষ্টি ঝাপসা হয়ে আসছে—গাছপালাগুলো যেন অদ্ভুত রকমের পাক খেয়ে-খেয়ে ঘুরে যাচ্ছে বলে মনে হচ্ছে।

অতিকষ্টে সে নিজেকে টেনে নিয়ে এল স্টেশনে। একটা অস্বাভাবিক গোলমালে সে থেমে গিয়ে জুরের ঘোরে অস্পষ্ট-হয়ে-আসা চোখে কষ্ট করে চেয়ে দেখল—গোটা প্র্যাটফর্ম জুড়ে পর পর অনেকগুলো খোলা মালগাড়ি-জোড়া একটা ট্রেন। ট্রেনটায় যারা এসেছে, তারা লোহার রেল, স্লিপার-কাঠ আর ছোট রেললাইনে চলার মতো ইঞ্জিন ইত্যাদি নামিয়ে আনতে ব্যস্ত। টলতে টলতে সামনের দিকে এগিয়ে যেতেই পা ফসকে গেল পাভেলের। মাথাটা তার মাটিতে ঠুকে যেতে একটা ভোঁতা যন্ত্রণা আর তার জুরে-পোড়া গালের উপর বরফের আরামদায়ক একটা শীতলতা অনুভব করল।

কয়েক ঘণ্টা পরে তাকে সেই অবস্থায় পাওয়া গেল এবং ব্যারাক-ঘরে নিয়ে যাওয়া হল। ঘন ঘন নিশ্বাস পড়ছে তার, পারিপার্শ্বিক সম্বন্ধে সম্পূর্ণ অচেতন। সাঁজোয়া-ট্রেনটি থেকে ডাক্তারের সহকারীকে ডেকে আনা হল এবং সে পাভেলের নিউমোনিয়া আর টাইফাস রোগ নির্ণয় করল। জুরের তাপমাত্রা ১০৬ ডিগ্রিরও বেশি। পাভেলের ঘাড়ের ফোড়াগুলো আর তার শরীরে গিটের জায়গাগুলোর ফুলে-গুঠাটা ডাক্তারের সহকারী লক্ষ করল, কিন্তু জানাল যে নিউমোনিয়া আর টাইফাসের তুলনায় ওটা যৎসামান্য ব্যাপার—প্রথমদুটো রোগই তাকে মেরে ফেলার পক্ষে যথেষ্ট।

দুবাভা শহর থেকে এসেছে। সে আর পানক্রাতভ পাভেলকে বাঁচাবার জন্য যথাসাধ্য করল।

আলিওশা কোখানস্কির বাড়ি পাভেলের শেপেতোভ্কা শহরেই। সেখানে পাভেলকে নিয়ে গিয়ে বাড়িতে তার আত্মীয়দের কাছে পৌঁছে দেবার জন্য তার ওপরে ভার দেওয়া হল।

করচাগিনের দলের ছেলেদের সাহায্যে এবং প্রধানত খোলিয়াভার প্রভাবে পানক্রাতভ আর দুবাভা কোনোরকমে মানুষ-গাদাগাদি ট্রেনের কামরাটার মধ্যে আলিওশাকে আর অচেতন করচাগিনকে ঢুকিয়ে দিতে পারল। যাত্রীরা সবাই সংক্রামক টাইফাস সন্দেহ করে প্রচণ্ডভাবে বাধা দিল এবং মাঝপথে তাকে ছুড়ে ফেলে দেবে বলে শাসাল।

খোলিয়াভা তাদের নাকের ডগায় পিস্তল বাগিয়ে ধরে চিৎকার করে বলল, 'এর অসুখ ছোঁয়াচে নয়! আর ও এই ট্রেনেই যাবে—যদি তার জন্যে তোমাদের সবাইকে এই ট্রেন থেকে নামিয়ে দিতে হয় তবুও! আর, মনে রেখো, শুয়োরের দল, যদি ওর গায়ে একটা আঙুলও ঠেকাও কেউ, তাহলে আমি এই রেলপথের প্রত্যেকটি স্টেশনে খবর পাঠিয়ে দিচ্ছি—তোমাদের সবাইকে ট্রেন থেকে নামিয়ে নিয়ে জেলে পুরে দেবে। এই নাও, আলিওশা, পাভকার মাউজার-পিস্তলটা ধরো—প্রথম যে-লোকটা ওকে ট্রেন

থেকে নামিয়ে দেবার চেষ্টা করবে, তাকেই গুলি করবে।' নিজের কথায় খানিকটা বাড়তি গুরুত্ব আরোপ করার জন্য খোলিয়াভা এই বলে শেষ করল।

ট্রেনটা ধোঁয়া ছেড়ে স্টেশন থেকে বেরিয়ে গেল। নির্জন প্ল্যাটফর্মের ওপরে দু'ভাড়া দাঁড়িয়ে আছে—তার কাছে এগিয়ে এল পানক্রান্তভ।

'তোমার কি মনে হয়—ও সেরে উঠবে?'

প্রশ্নের জবাবটা অনুভূতি থেকে গেল।

'চলো, মিতিয়াই, যা হবার তাই হবে। এখন সবকিছুর দায়িত্ব আমাদের ওপরে। রাত্রির মধ্যে এই ইঞ্জিনগুলো আমাদের নামিয়ে ফেলতেই হবে, কাল সকালে ওগুলো চালাবার চেষ্টা করতে হবে।'

খোলিয়াভা রেলপথের প্রত্যেকটি স্টেশনে তার 'চেকা'র বন্ধুদের কাছে টেলিফোন করে বিশেষভাবে অনুরোধ জানাল—মাঝপথে কোথাও ট্রেন থেকে করচাগিনকে যাতে নামিয়ে না-দেওয়া হয় সেদিকে যেন তারা নিশ্চয়ই লক্ষ রাখে। এটা-যে করা হবে, সে-সম্বন্ধে নিশ্চিত প্রতিশ্রুতি না-পাওয়া পর্যন্ত সে ঘুমোতে গেল না।

\*

\*

\*

রেলপথ বেয়ে আরও কিছুদূরে একটা জংশন-স্টেশনে চলতি যাত্রী-ট্রেনটা কিছুক্ষণের জন্য যখন থামল, তখন একটা কামরা থেকে একজন শণ-রঙের চুলঅলা তরুণের দেহ নামিয়ে এনে রাখা হল প্ল্যাটফর্মে। কেউ জানে না সে কে বা কিসে সে মারা গেছে। স্টেশনে 'চেকা'র লোকজন খোলিয়াভার অনুরোধ স্বরণ করে কামরাটার কাছে ছুটে এল ছেলেটির নামিয়ে দেওয়াটা আটকাবার জন্য। কিন্তু তরুণটি মারা গেছে দেখে তারা মৃতদেহটিকে লাশঘরে চালান দেবার জন্য নির্দেশ দিয়ে সঙ্গে সঙ্গে বোয়ার্‌কায় টেলিফোন করে খোলিয়াভাকে জানিয়ে দিল যে-ছেলেটিকে বাঁচাবার জন্য সে এত উৎকর্ষিত ছিল, সে মারা গেছে।

করচাগিনের মৃত্যুর খবর জানিয়ে বোয়ার্‌কা থেকে একটা সংক্ষিপ্ত টেলিগ্রাম পাঠিয়ে দেওয়া হল প্রাদেশিক কমসমোল কমিটির কাছে।

ইতিমধ্যে, আলিওশা কোখান্‌স্কি কিন্তু অসুস্থ করচাগিনকে তার বাড়িতে পৌঁছে দিয়ে নিজে ঐ জুরে পড়ল।

\*

\*

\*

## ৯ জানুয়ারি

আমার মনে এত যন্ত্রণা হচ্ছে কেন? লিখতে বসার আগে ভয়ানক কঁদেছি। কে বিশ্বাস করবে যে রিডা কঁদতে পারে এবং কঁদতে পারে এমন যন্ত্রণাভরা কান্না? কিন্তু কান্না কি সবসময়েই দুর্বলতার লক্ষণ? আজ আমার এই চোখের জল বুক-জুলা দুঃখের কান্না। ঠাণ্ডা ভীষণতাকে জয় করা গেছে, রেল-স্টেশনগুলোর মহামূল্য জ্বালানিকাঠের স্থপ জমে উঠেছে, শহর-সোভিয়েতের একটা বিরহ-অনুষ্ঠান থেকে যখন ফিরে এসেছি—সমস্ত সভ্যদের নিয়ে একটা বড় সভার রেলপথ-কর্মী বীরদের সমস্তরকম সম্মান জানানো হয়েছে সেখানে, আজকের এই বিজয়-উৎসবের দিনে দুঃখ-শোক এল

কেন?—আমাদের জয় হয়েছে, কিন্তু তার জন্য দু'জন মানুষ প্রাণ দিয়েছে—ক্লাভিচেক আর করচাগিন।

পাভেলের মৃত্যুতে আমার চোখে সত্যটা উদ্ঘাটিত হয়েছে—আমি যতটা ভেবেছিলাম, তার চেয়েও ঢের বেশি প্রিয় ছিল সে আমার।

আপাতত এই রোজনাট্য লেখা শেষ করব। আর কখনও লিখব কি-না সন্দেহ। ইউক্রেনীয় কমসমোলের কেন্দ্রীয় কমিটিতে আমাকে যে-কাজ দেবার কথা ছিল সে-কাজটা নেব জানিয়ে আমি কাল খারকভে চিঠি লিখব।

## তৃতীয় অধ্যায়

কিন্তু যৌবন জয়ী হল। পাভেল টাইফাসে মারা পড়েনি। এই নিয়ে চারবার সে মৃত্যুর সীমান্তরেখা ছাড়িয়ে গিয়ে আবার জীবনের এলাকায় ফিরে এল। তার বিছানা ছেড়ে ওঠার সামর্থ্য ফিরে পেতে পুরো একমাস কেটে গেছে। শীর্ণ বিবর্ণ দেহে কাঁপন-ধরা পায়ে দেয়াল-ঘেঁষে শরীরের ভর রেখে সে দুর্বলভাবে টলতে টলতে ঘরের মধ্যে চলাফেরা করছে। মায়ের সাহায্যে জানলাটার কাছে এসে অনেকক্ষণ ধরে দাঁড়িয়ে রইল বাইরে রাস্তাটার দিকে চেয়ে যেখানে বরফগলা জল জমে উঠে প্রথম বসন্ত সূর্যের আলোয় চিকচিক করছে। বছরের প্রথম উষ্ণ হাওয়া বইতে শুরু করেছে।

জানলাটার ঠিক সামনেই চেরিগাছের ডালে বসে ধূসর বুকঅলা একটা চডুইপাখি ঠোট দিয়ে তার পালকগুলো আঁচড়ে পরিষ্কার করে নিচ্ছিল আর মাঝে মাঝে দ্রুত চোখে অবস্থির সঙ্গে তাকিয়ে দেখছিল পাভেলের দিকে।

জানলাটার শার্সির গায়ে আঙুলের মৃদু চাপড় মেরে পাভেল বলল, 'তাহলে দেখছি, তুই আর আমি শীতকালটা পেরিয়ে এসেছি।'

চমকে উঠে তার মা তাকাল তার দিকে।

'কার সঙ্গে কথা বলছিস ওখানে?'

'চডুই একটা...এই যাহ্, উড়ে গেছে—খুদে শয়তানটা!' শীর্ণ একটা হাসি ফুটে উঠল তার মুখে।

পূর্ণ বসন্ত নেমে আসতেই পাভেল শহরে ফেরার কথা ভাবতে আরম্ভ করেছে। সে এখন হেঁটে চলার মতো যথেষ্ট শক্ত হয়ে উঠেছে। কিন্তু কী যেন একটা রহস্যময় ব্যাধি তার শক্তি ক্ষইয়ে দিচ্ছে।

একদিন যখন সে বাগানে হেঁটে বেড়াচ্ছে, তখন শিরদাঁড়ায় হঠাৎ একটা নিদারুণ যন্ত্রণা হতেই সে মাটিতে পড়ে গেল। অতিকষ্টে সে নিজেকে টেনে নিয়ে এল ঘরের মধ্যে।

পরের দিন একজন ডাক্তারকে দিয়ে খুব ভালো করে সে নিজেকে পরীক্ষা করাল। পাভেলের পিঠের দিকটা পরীক্ষা করতে করতে ডাক্তার তার শিরদাঁড়ায় বেশ খানিকটা বসে-যাওয়া একটা জায়গা লক্ষ করে বিস্মিত হয়ে জিজ্ঞাসা করলেন, 'এটা হল কী করে?'

‘রোভনোর কাছে লড়াইয়ে ওটা হয়েছিল। তিন ইঞ্চির একটা কামানের মুখ থেকে একটা গোলা এসে পড়ে আমাদের পেছনের রাস্তাটাকে ছিঁড়েখুঁড়ে দিয়েছিল, তখন একটা পাথর ছিটকে এসে আমার পেছনে লাগে।’

‘কিন্তু আপনি এতদিন হাঁটাহাঁটি করতে পারলেন কী করে? এর জন্যে কোনো কষ্ট হয়নি কখনও?’

‘না। ওই ঘটনার পর আমি দু-এক ঘণ্টার জন্যে উঠতে পারিনি। তারপরে যন্ত্রণাটা কেটে গিয়েছিল, আর আমিও ঘোড়ার জিনের উপর চেপে বসে এগিয়ে গিয়েছিলাম। তারপরে এই প্রথম যন্ত্রণাটা ফের জেগেছে।’

শিরদাঁড়ার বসে-যাওয়া জায়গাটা বিশেষ মনোযোগের সঙ্গে পরীক্ষা করার সময়ে ডাক্তারের মুখখানা দারুণ গম্ভীর হয়ে উঠল।

‘হ্যাঁ ভাই, বড় বিশ্রী দাঁড়িয়েছে ব্যাপারটা। শিরদাঁড়ায় এমন চোট সয় না। আশা করা যাক, পরে আর জ্ঞানান দেবে না। আচ্ছা, এবারে জামাটা পরে ফেলুন কমরেড করচাগিন।’

পাভেলের জামা পরে নেবার সময় ডাক্তার তাঁর ওই রোগীটিকে লক্ষ করতে লাগলেন সহানুভূতির সঙ্গে, মনোভাবটাকে তিনি গোপন করতে পারলেন না।

\*

\*

\*

আরতিওম থাকে তার স্ত্রীর আত্মীয়দের সঙ্গে। তার বউ স্তেশা খুব সাধারণ চেহারার চাষী-মেয়ে। অতি গরিব পরিবারে তার জন্ম। পাভেল একদিন তার দাদার সঙ্গে দেখা করতে এল। ময়লা চেহারার ট্যারা-চোখ একটা বাক্তা নোংরা সংকীর্ণ-উঠোনটায় খেলা করছিল, পাভেলের দিকে উদ্ধতভাবে তাকিয়ে থেকে নাক খুঁটতে খুঁটতে জবাব চাইল, ‘কী চাই? চোর নও তো? কেটে পড়ো বরং, নইলে মা রাগ করলে বুঝবে মজা!’

পুরনো নিচু কুটিরটার একটা ছোট জ্ঞানলা খুলে গেল, বাইরের দিকে তাকাল আরতিওম।

‘ভেতরে চলে আয়, পাভেল’, ডাক দিল সে।

একটি বৃড়ি উনুনটার কাছে কাজে ব্যস্ত—পুরনো পার্চমেন্ট কাগজের মতো হলদে তার মুখ। তার পাশ কাটিয়ে যাবার সময় সে পাভেলের দিকে একটা বিরূপ দৃষ্টি হেনে বাসনপত্রগুলো নিয়ে আবার ঠুংঠাং শুরু করল।

ছোট বিনুনি-বাঁধা দুটি মেয়ে উনুনটার ওপরে চড়ে বসে সেখান থেকে তাকিয়ে রইল পাভেলের দিকে, বর্বরসুলভ কৌতূহলে হাঁ হয়ে গেছে তাদের মুখ।

টেবিলের সামনে বসে আরতিওম কিছুটা অস্বস্তিবোধ করছে বলে মনে হচ্ছিল। সে জানে যে তার মা আর ভাই কেউই এই বিয়ে সমর্থন করেনি। আরতিওমদের পরিবার পুরুষানুক্রমে শ্রমিক, রাজমিস্ত্রির সুন্দরী মেয়ে পেশাদার দর্জি গালিয়ার সঙ্গে তিন বছর ধরে বন্ধুত্ব করার পর কেন-যে আরতিওম তাকে ছেড়ে স্তেশার মতো মামুলি একটা মেয়ের সঙ্গে গিয়ে বসবাস শুরু করল, আর পাঁচজন মানুষের একটা পরিবারের রুজি-রোজগারের ভার তুলে নিল, সেটা তারা বুঝতে পারেনি। ইদানীং তাকে



রেল-কারখানায় সারাদিনের পরিশ্রমের পর ফিরে এসে অচল একটা খামার আবার জিইয়ে তোলার চেষ্টায় লাঙল ঠেলতে হয়।

\*

\*

\*

নিজের জগৎ ছেড়ে 'পেটি বুর্জোয়ার জগতে' আরতিগুণের এসে-যাওয়াটাকে পাভেল-যে সমর্থন করেনি, তা আরতিগুণ জানে। তাই তার ভাই তার এই পরিবেশকে কী চোখে দেখছে সেটা লক্ষ করতে লাগল আরতিগুণ।

বসে বসে কিছুক্ষণ ধরে তারা খুব সাধারণ রকমের এটা-ওটা কথাবার্তা চালাল। একটু বাদেই পাভেল যাবার জন্য উঠে দাঁড়াল। কিন্তু আরতিগুণ আটকাল তাকে, 'বোস একটু, যা হোক কিছু খেয়ে যা আমাদের সঙ্গে বসে। স্তেশা এখনি দুধ নিয়ে এসে যাবে। তাহলে, তুই কালই আবার চলে যাচ্ছিস? গায়ে যথেষ্ট জোর ফিরে এসেছে বলে তো মনে হচ্ছে না।'

স্তেশা ঢুকল। পাভেলকে অভিবাদন জানিয়ে সে আরতিগুণকে বলল তার সঙ্গে গিয়ে গোলাঘর থেকে কী একটা জিনিশ নিয়ে আসবার জন্য তাকে সাহায্য করতে। পাভেল বসে রইল সেই গোমড়ামুখো বুড়িটার সঙ্গে। জানলার ফাঁকে ভেসে এল গির্জার ঘণ্টার শব্দ। বুড়ি তার শিকটা নামিয়ে রেখে বিরক্তিম্রা গলায় বিড়বিড় করে উঠল, 'হায় ভগবান! ঘরদোরের এই হতচ্ছাড়া কাজকর্ম করে কি আর মানুষে একটু প্রার্থনা করারও সময় পায়!'

শালটা খুলে ফেলে আগন্তুকটির দিকে আড়চোখে তাকিয়ে সে এগিয়ে গেল ঘরের কোণে যেখানে দেবতা-সন্তদের বহুকালের কালো রঙের আইকনগুলো আছে। হাড়-জিরজিরে তিনটি আঙুল জড়ো করে সে নিজের বুকের ওপরে ক্রুশ-চিহ্ন আঁকল।

জীর্ণ শুকনো ঠোটে ফিসফিসিয়ে বলল, 'হে আমাদের স্বর্গস্থিত পিতা, তোমার নাম ধন্য হউক!'

বাইরের উঠানে সেই বাচ্চাটা খেলা করতে করতে লাফিয়ে চেপে বসেছে একটা কালো রঙের কান-ঝোলা শুয়োরের পিঠে। ছোট ছোট খালি পাদুটো দিয়ে শুয়োরটার দুইপাশ চট করে আঁকড়ে ফেলে লোমগুলো চেপে ধরে সে চিৎকার করছে ঘোংঘোং শব্দে ছুটে-চলা শুয়োরটার উদ্দেশ্যে, 'জোরসে চালাও, হেইও! হট্ হট্, হেই!'

পিঠের উপর ছেলেটাকে নিয়ে শুয়োরটা পাগলের মতো উঠানে ছুটে বেড়াচ্ছে তাকে ছুড়ে ফেলে দেবার জন্য বেপরোয়া চেষ্টা করতে করতে। কিন্তু ট্যারা-চোখ খুদে শয়তানটা দিব্যি গদি বাগিয়ে বসে আছে।

বুড়ি প্রার্থনা থামিয়ে জানলা দিয়ে গলিয়ে দিল তার মাথাটা।

'ওরে ও জাহান্নামের কুস্তা! নেমে পড় এক্ষুনি শুয়োরটার পিঠ থেকে, নইলে ছাল ছাড়িয়ে নেব তোর!'

শেষপর্যন্ত শুয়োরটা অত্যাচারী ছেলেটাকে পিঠ থেকে ফেলে দিতে সমর্থ হল। বুড়ি তাতে খুশি হয়ে ঘরের কোণে আইকনগুলোর কাছে ফিরে এসে চেহারায় একটা ভক্তির ভাব ফুটিয়ে তুলে ফের আরম্ভ করল, 'তোমার রাজ্য প্রতিষ্ঠিত হউক...'

সেই মুহূর্তে ছেলেটা কান্নায় ফোলা মুখ নিয়ে দরজায় দেখা দিল। জামার হাতা দিয়ে তার ছড়ে-যাওয়া নাকটা মুছতে মুছতে আর যন্ত্রণায় ফোঁপাতে ফোঁপাতে সে নাকী-সুরে বলল, 'একটা বড়া দাও, মা-আ-আ!'

প্রচণ্ড রাগে তার দিকে ফিরে তাকাল বুড়ি।

'দেখছিস নে আমি প্রার্থনা করছি, ট্যারা-চোখ শয়তান কোথাকার? দাঁড়া, দিচ্ছি তোকে বড়া বজ্জাত কোথাকার!...' বেষ্ট্রের উপর থেকে একটা চাবুক তুলে নিল সে। চক্ষের পলকে উধাও হয়ে গেল ছেলেটা। উনুনের ওপরে বসে মেয়েদুটো ফিকফিক করে হাসছে।

বুড়ি তার ধর্মকর্মে তৃতীয়বার মন বসাবার চেষ্টা করল।

পাভেল তার দাদার জন্য আর অপেক্ষা না করে উঠে বেরিয়ে এল। বেড়ার দরজাটা পেছনে বন্ধ করে দেবার সময় সে লক্ষ করল—বুড়ি বাড়ির শেষ জানলাটা দিয়ে মুখ বাড়িয়ে সন্দেহভরা চোখে তাকিয়ে আছে।

'আরতিওমের মাথায় এ কোন দুর্বুদ্ধি ভর করেছিল যার টানে সে এখানে এসে পড়ল? এখন তো সে তার বাকি জীবনটার মতো এখানেই বাঁধা পড়ে গেল। স্ত্রেশা বছরে বছরে একটা করে ছেলে বিয়োবে। আর, আরতিওমকে এখানে স্টেট থাকতে হবে গোবরগাদায় গুবরে পোকায় মতো। এমনকি, হয়তো সে ডিপোয় চাকরিও ছেড়ে দেবে।' বিষণ্ণ মনে ভাবতে ভাবতে পাভেল ছোট্ট শহরটার নির্জন রাস্তা বেয়ে হেঁটে চলেছে। 'আর, আমি কিনা আশা করেছিলাম যে রাজনীতিক কাজে ওর আগ্রহ জাগিয়ে তুলতে পারব।'

আগামীকাল যে সে এই জায়গা ছেড়ে বড় শহরে ফিরে যাবে, আর যারা তার এত প্রিয় সেই বন্ধু আর কমরেডদের সঙ্গে মিলিত হবে—এই চিন্তায় আনন্দ পেল পাভেল। বিশাল ওই শহরের কর্মব্যস্ত মুখের জীবন, অসংখ্য মানুষের অন্তহীন স্রোত, ট্রামের ঘড়ঘড়ানি আর মোটরগাড়ির গতিশব্দ যেন পাভেলকে চুষকের মতো টানছে। কিন্তু সবচেয়ে বেশি সে কামনা করছে ইন্টার্নের তৈরি সেই বিরাট কারখানা-বাড়িটার ধোয়ায় মলিন কর্মশালাগুলোর যন্ত্রপাতি আর চাকা-ঘোরানো বেল্টগুলোর কাছে ফিরে যাবার জন্য। বিরাট ফ্লাই-হুইলটা যেখানে উন্মত্তের মতো পাক খেয়ে ঘুরছে সেখানে ফিরে যাবার জন্য, যন্ত্রে লাগানো তেলের ঘ্রাণ নেবার জন্য, আর যেসব জিনিশ তার অস্তিত্বের অঙ্গ হয়ে উঠেছে সেইসবের সঙ্গ পাবার জন্য ব্যাকুল হয়ে উঠেছে সে। এই নিস্তরঙ্গ মফস্বল শহর—যার পথ বেয়ে সে এখন চলেছে—সেটা কেমন একটা অস্পষ্ট বিষণ্ণতার অনুভূতিতে আচ্ছন্ন করে তুলল তার মন। এখন-যে তার নিজেকে এখানে বিদেশী বলে মনে হচ্ছে, এতে আশ্চর্য হল না সে। এমনকি, দিনের বেলাতেও এই শহরে একপাক ঘুরে-আসাটা যেন রীতিমতো অস্বস্তিকর লাগল। গিন্নি-মেয়েরা বাড়ির দাওয়ায় বসে গালগল্প করছে, তাদের পাশ কাটিয়ে যাবার সময় ওদের অলস মস্তব্যস্তলো পাভেল স্তন্যে পেল :

'এই চোয়াড়ে চেহারার লোকটা আবার কে?'

'দেখে তো মনে হচ্ছে ক্ষয়রোগ হয়েছিল ওর—যাকে বলে, ফুসফুসের ব্যারাম।'

'সুন্দর কোর্তাখানা পরেছে তো—চুরি করা জিনিশ নিশ্চয়...'

এই ধরনের আরও অনেক উক্তি। এসবে ঘেন্না ধরে যায় পাভেলের।

বহুদিন আগেই সে নিজেকে শেকড়সুদ্ধ বিচ্ছিন্ন করে নিয়েছে এইসব থেকে। ওই বিরাট শহরের সঙ্গে সে নিজের ঢের বেশি ঘনিষ্ঠ আত্মীয়তা অনুভব করল—যে-শহরের সঙ্গে শ্রমের আর বন্ধুত্বের প্রাণশক্তিতে পরিপূর্ণ যোগসূত্রে সে বাঁধা।

পাভেল লক্ষ করেনি কখন সে পাইনবনটার কাছে এসে পড়েছে। রাস্তাটা যেখানে দু'ভাগে ভাগ হয়ে গেছে, সেখানে সে একমুহূর্ত দাঁড়িয়ে রইল। তার ডানদিকে পুরনো জেলখানা—চারিদিকে উঁচু উঁচু কাঠের গুঁড়ির বেড়া দিয়ে বন থেকে আলাদা করা। তার পেছনে হাসপাতালের শাদা বাড়িগুলো।

এইখানে ওই চণ্ডা খোলা জায়গাটায় ফাঁসুড়ের দড়ির গোয়াল রুদ্ধশ্বাস হয়ে ভালিয়া আর তার কমরেডরা তাদের তাজা জীবন দিয়েছে। ফাঁসির মঞ্চটা যেখানে ছিল, সেখানে নিঃশব্দে দাঁড়িয়ে রইল পাভেল। তারপরে খাড়াইটার ওখানে গিয়ে উত্তরাই বেয়ে নেমে এল ছোট গোরস্থানটায় যেখানে সাধারণ একটা কবরের নিচে একসঙ্গে শুয়ে রয়েছে 'শ্বেতরক্ষী সন্তাসের' সময়কার সেই শহীদরা।

কারা যেন সন্নেহ হাতে কবরটার ওপরে বিছিয়ে দিয়েছে ফারগাছের কচি ডাল আর চারিধারে সযতনে তৈরি করে দিয়েছে সবুজ রঙের সুন্দর বেড়া। খাড়াইটার মাথায় পাইনগাছগুলো উঠে গেছে খাড়া আর ঝঞ্ঝু হয়ে, ঢালু বেয়ে কচি ঘাসের রেশম-সবুজ গালিচা বিছানো।

শহরের বাইরের এই দিকটায় একটা বিষণ্ণ নিঃশব্দতা। গাছগুলোর মৃদু ফিসফিসানি আর নতুন প্রাণ-পাওয়া মাটির বুকে বসন্তের তাজা গন্ধ...এই জায়গায় পাভেলের কমরেডরা বীরের মতো এগিয়ে গেছে মৃত্যুর দিকে, যাতে সুন্দর হয়ে ওঠে তাদের জীবন যারা জন্ম নিয়েছে দারিদ্র্যের মধ্যে।

ধীরে ধীরে পাভেল হাত তুলে টুপিটা খুলে নিল মাথা থেকে। নিবিড় একটা বিষণ্ণতায় আচ্ছন্ন হয়ে গেল তার সমগ্র সত্তা।

জীবন মানুষের সবচেয়ে প্রিয় সম্পদ। এই জীবন সে পায় মাত্র একটি বার। তাই, এমনভাবে বাঁচতে হবে যাতে বছরের পর বছর লক্ষ্যহীন জীবনযাপন করার যন্ত্রণাভরা অনুশোচনায় ভুগতে না হয়, যাতে বিগত জীবনের গ্লানিভরা হীনতার লজ্জার দঙ্কানি সইতে না হয়; এমনভাবে বাঁচতে হবে যাতে মৃত্যুর মুহূর্তে মানুষ বলতে পারে : আমার সমগ্র জীবন, সমগ্র শক্তি আমি ব্যয় করেছি এবং এই দুনিয়ার সবচেয়ে বড় আদর্শের জন্যে—মানুষের মুক্তির জন্যে সংগ্রামে। পাছে হঠাৎ কোনো ব্যাধি বা কোনো মর্মান্তিক দুর্ঘটনা জীবনে আকস্মিক ছেদ টেনে দেয় তাই জীবনের প্রত্যেকটি মুহূর্তকে কাজে লাগাতে হবে।

এইসব কথা ভাবতে ভাবতে করচাগিন ফিরে চলল কবরখানা থেকে।

\*

\*

\*

বাড়িতে তার মা বিষণ্ণ-মনে ছেলের রওনা হবার ব্যবস্থা করছিল। মাকে লক্ষ করে পাভেল বুঝতে পারল যে সে তার চোখের জল লুকোবার চেষ্টা করছে।

শেষে সাহস করে মা বলল, 'তুই থেকে যা না, পাভলুশা! এই বুড়ো বয়সে আমার একা পড়ে থাকা যে কী কষ্ট! ছেলেপুলে যতই থাক-না কেন, বড় হয়ে সবাই ছেড়ে চলে যায়। শহরে ছুটতেই কেন হবে তোকে, বল তো? এখানেও তো দিবি থাকতে পারিস। নাকি, হয়তো কোনো বব-করা চুলঅলা ছোট্ট দোয়েল পাখি তোর মন টেনেছে সেখানে? তোরা ছেলেরা তোদের বুড়ো মাকে কখনও কিছু বলিসনে। আরতিওম আমাকে একটাও কথা না বলে চলে গিয়ে বিয়ে করল। আর, তুই তো এদিক থেকে ওর চেয়েও খারাপ। অসুখ হয়ে যখন আর চলতে পারিসনে, শুধু তখনই আমি তোদের দেখা পাই।' পাভেলের সামান্য কয়েকটা জিনিশ পরিষ্কার একটা থলয়ে ভরতে ভরতে মা মৃদুস্বরে অনুযোগ করল।

পাভেল মার কাঁধদুটো ধরে তাকে নিজের কাছে টেনে নিল।

'দোয়েল পাখি-টাখি আমার জন্যে নয়, মা! জানো না, পাখিরা তাদের নিজের নিজের জাত থেকেই সঙ্গী বেছে নেয়? আর, আমি দোয়েল পাখি, তাই বলতে চাও নাকি?'

নিজের অজান্তেই হেসে ফেলল তার মা।

'না, মা, আমি প্রতিজ্ঞা করেছি—দুনিয়ার সমস্ত বুর্জোয়াকে খতম না-করা পর্যন্ত মেয়েদের কাছে ঘেঁষব না। তাহলে আমাকে অনেকদিন অপেক্ষা করে থাকতে হবে বলে তোমার মনে হচ্ছে, না? না মা, বুর্জোয়ারা এখন আর খুব বেশিদিন টিকতে পারবে না...শিগগিরই দুনিয়ার তামাম মানুষের জন্যে একটা মস্তবড় লোকতন্ত্র গড়ে উঠবে। তোমরা বুড়োমানুষরা, যারা জীবনভর খেটেছ, তারা সমুদ্রের ধারে সেই সুন্দর উষ্ণ দেশ ইতালিতে যাবে। সেখানে শীত নেই মা। বড়লোকদের প্রাসাদগুলোয় আমরা তোমাদের নিয়ে গিয়ে তুলব সেখানে। তোমরা বসে বসে রোদ্দুর পোয়াবে আর বুড়ো হাড়গুলোকে তাজা করে তুলবে, আর আমরা ততক্ষণে আমেরিকায় গিয়ে সেখানকার বুর্জোয়াদের সাবাড় করে দিয়ে আসব।'

'ওসব ভারি সুন্দর রূপকথার গল্প, বাবা। কিন্তু আমি তো আর ওসব সত্যি হয়ে ওঠা পর্যন্ত বেঁচে থাকব না...তুই হয়েছিস ঠিক তোর জাহাজি ঠাকুরদার মতো, নানান ধরনের ধারণায় ভর্তি ছিল লোকটার মাথা। রীতিমতো বোম্বটে ছিল একটা—ভগবান ক্ষমা করুন তাকে! সেভাস্তপোলের যুদ্ধে ঘায়েল হয়ে একটা হাত আর একটা পা হারিয়ে, বুকের ওপরে দুটো জুশ সার ফিতেয় বাঁধা দুটো রূপোর মেডেল ঝুলিয়ে ঘরে এল। কিন্তু মারা গিয়েছিল গরিব অবস্থার মধ্যে। মেজাজটাও ছিল তার দারুণ তিরিক্কা; চলে-ফিরে বেড়াবার ঠেকোলাঠিটা দিয়ে একবার একজন অফিসারের মাথায় মেরে বসেছিল। ফলে, বছরখানেক জেল হয়েছিল। তখন তার সামরিক জুশগুলো দেখিয়েও কোনো ফল হয়নি। হ্যাঁ, তুই ঠিক তোর ঠাকুরদার মতোই হয়েছিস, কোনো ভুল নেই এতে।'

'আমাদের এমন মন-খারাপের মধ্যে দিয়ে বিদায় নেওয়া চলে না তো মা, কী বলো? আমার অ্যাকর্ডিয়নটা দাও। অনেকদিন আমি ওটা ছুইনি পর্যন্ত।'

ঝিনুকের চাবিগুলোর ওপরে মাথাটা নুইয়ে সে বাজাতে আরম্ভ করল। শুনতে শুনতে তার বাজানায় একটা নতুন উপাদান লক্ষ করল মা।

ও তো কখনও এরকম বাজাত না। সেই হালকা নাচের জলদ তালে সুরমূর্ছনা, সেই মন-মাতানো ছন্দ—যার জন্য এই তরুণ অ্যাকর্ডিয়ন-বাজিয়ে বিখ্যাত ছিল—সেসব আর পাভেলের বাজনায় নেই। পাভেলের আঙুলগুলোর দক্ষতা বা শক্তি কিছুমাত্র কমেনি, কিন্তু সেই আঙুলগুলোর চাপে চাপে এখন যে—সুরলহরি বেরিয়ে আসছে, তা হয়ে উঠেছে আরও ঐশ্বর্যময়, আরও গভীর।

\*

\*

\*

স্টেশনে একাই এল পাভেল।

শেষ বিদায়ের মুহূর্তে মা বড় বেশিরকম বিচলিত হয়ে পড়বে বলে বুঝতে পেরে মাকে সে বাড়িতে থাকতে রাজি করিয়েছে।

অপেক্ষমাণ জনতার ভিড়। বিশৃঙ্খলভাবে মানুষে গাদাগাদি হয়ে উঠল ট্রেন। সবচেয়ে উঁচু একটা তাকে উঠে বসে পাভেল সেখান থেকে দেখতে থাকল নিচে উত্তেজিত যাত্রীদের চিৎকার, তর্কবিতর্ক আর হাতপা নাড়া।

যথারীতি প্রত্যেকের সঙ্গে বক্তা আর পোটলা-পুঁটলি—সেগুলোকে বসবার বেঞ্চির নিচে ঢুকিয়ে দেওয়া হয়েছে।

ট্রেনটা চলতে আরম্ভ করার পর গোলমাল কিছুটা কমে এল; যাত্রীরা সব খেয়ে পেট বোঝাই করার কাজে লাগল।

অল্পক্ষণের মধ্যেই ঘুমিয়ে পড়ল পাভেল।

\*

\*

\*

কিয়েভে পৌছেই পাভেল সঙ্গে সঙ্গে শহরের মাঝখানে ফ্রেন্চাভিক স্ট্রিটের দিকে রওনা হল। ধীরে ধীরে উঠল সে সিঁড়িতে। সবকিছুই যেমন ছিল তেমনি আছে, কিছুই বদলায়নি। মসৃণ রেলিংটার উপর দিয়ে হাত টেনে টেনে উঠল পুলটায়। পুলটার ওপরে জনমানুষ নেই। নামতে শুরু করার আগে একটু দাঁড়াল। তার বিমুগ্ধ চোখের সামনে এক মহিমাময় সৌন্দর্যসমারোহ। অন্ধকারের মখমল আন্তরণে ঢাকা পড়েছে দিগন্ত। অসংখ্য উজ্জ্বল তারা নীলচে সবুজ আভায় জ্বলজ্বল করছে। আর দূরে নিচে যেখানে কোনো-এক অদৃশ্য সীমারেখায় পৃথিবী গিয়ে মিশেছে আকাশের সঙ্গে, সেখানে অসংখ্য আলো জ্বালিয়ে শহরটা অন্ধকারকে ছিড়েখুঁড়ে দিয়েছে...

রাত্রির নিঃশব্দতা ভেঙে দিয়ে কথাবার্তার স্বর উঠল, পাভেলকে জাগিয়ে দিল তার স্বপ্নাঙ্কনতা থেকে। কয়েকজন লোক আসছে এদিকে। শহরের আলোগুলোর দিক থেকে চোখদুটোকে টেনে এনে পাভেল সিঁড়ি বেয়ে নিচে নামল।

অঞ্চলের বিশেষ বিভাগে যে-লোকটি ডিউটিতে ছিল, সে পাভেলকে জানাল বুখরাই অনেক দিন আগেই শহর থেকে চলে গেছে।

এই তরুণটি-যে সত্যিই বুখরাইয়ের একজন ব্যক্তিগত বন্ধু, সে-সম্বন্ধে নিশ্চিত হবার জন্য সে পাভেলকে খুঁটিয়ে খুঁটিয়ে প্রশ্ন করে শেষপর্যন্ত জানাল—তুর্কিস্তান ফ্রন্টে

তাশবন্দে কাজ করার জন্য ফিওদরকে পাঠানো হয়েছে। খবরটা শুনে পাভেল এত বিচলিত হয়ে পড়ল যে, সে আর-কোনোকিছু বিস্তৃতভাবে জানতে না-চেয়েই ঘুরে দাঁড়িয়ে বাইরে চলে এল। হঠাৎ একটা শান্তির ভারে আচ্ছন্ন হয়ে তাকে দরজার গোড়ায় বসে পড়তে হল বিশ্রাম করার জন্য।

ঘর্ষর শব্দে রাস্তাটাকে মুখরিত করে তুলে একটা ট্রামগাড়ি চলে গেল। জনতার অস্বহীন শ্রোত চলেছে তার সামনে দিয়ে। বিচ্ছিন্নভাবে পাভেলের কানে ঢুকছে মেয়েদের খুলিভরা হালকা হাসি, গুরুগম্ভীর একটা গলার কথার টুকরো, সৰু চড়া-পর্দার বালক-কণ্ঠ, একজন বৃদ্ধের কাঁপন-ধরা খাদের গলা। দ্রুত চলমান ভিড়ের বিরতিহীন জোয়ার-ভাঁটা। উজ্জ্বল আলোকিত ট্রামগাড়ি, মোটরগাড়ির হেডলাইটের ধাঁধা-লাগানো দীপ্তি, কাছের একটা সিনেমাগৃহের প্রবেশমুখে বিজলি আলোর জ্যোতি...আর, সর্বত্র জনতা—অবিশ্রাম কথার গুঞ্জন পথ-মুখর করে-তোলা জনতা। রাত্রির এই বিরাট শহর।

ফিওদরের চলে যাবার খবরে পাভেলের মনে যে-বেদনা জেগেছিল, তার তীক্ষ্ণতা কিছুটা কমে এল রাস্তার কোলাহলে। কোথায় যাবে সে এখন? যেখানে তার বন্ধুরা থাকে, সেই সলোমেন্কা এখান থেকে অনেক দূরে। এখান থেকে অনতিদূরে ইউনিভার্সিটি স্ট্রিটের বাড়িটার কথা পাভেলের হঠাৎ মনে পড়ল। সেখানেই যাবে সে। ফিওদরের পরেই যে-কমরেডের সঙ্গে দেখা করার কামনা পাভেলের মনে সবচেয়ে বেশি, সে তো রিতা। আর হয়তো আকিমের নয় মিখাইলের ঘরে রাতটা কাটানোর ব্যবস্থাও করতে পারবে পাভেল।

দূর থেকে সে শেষের জানলাটায় আলো দেখতে পেল। মনের আবেগচঞ্চলতাটুকু জ্ঞোর করে সামলে নিয়ে সে বাইরের ওক-কাঠের ভারী দরজাটা ঠেলে খুলল। কয়েক মুহূর্ত দাঁড়িয়ে রইল সিঁড়ির চাতালে। রিতার ঘর থেকে গলার আওয়াজ আসছে। কেউ একজন গিটার বাজাচ্ছে।

‘আরে, ও দেখছি আজকাল গিটার বাজাতে দেয় ওর ঘরে—কড়াকড়ি শাসনটা একটু ঢিলে করেছে দেখছি’; মনে মনে ভাবল পাভেল। ভেতরের উত্তেজনাটা চাপা দেবার জন্য সে ঠোঁট কামড়ে দরজার ওপরে মৃদু ঠুক-ঠুক আওয়াজ করল।

কোঁকড়ানো-চুল একটি তরুণী দরজাটা খুলে প্রশ্ণভরা চোখে তাকাল করচাগিনের দিকে।

‘কাকে চাই?’

দরজাটা পুরোপুরি খুলে ধরেছিল মেয়েটি। ভেতরে একনজর তাকিয়েই পাভেল বুঝে নিল যে তার এখানে আসাটা নিষ্ফল হয়েছে।

‘উত্তিনোভিচের সঙ্গে একবার দেখা করতে পারি?’

‘সে তো এখানে নেই। গত জানুয়ারি মাসে সে খারকভে গেছে। শুনেছি, এখন সে আছে মস্কোতে।’

‘কমরেড আকিম কি এখনও এখানে থাকে? নাকি, সেও চলে গেছে?’

‘কমরেড আকিমও এখানে নেই। সে এখন ওদেসা জেলা কমসমোলের সম্পাদক।’

ফিরে যাওয়া ছাড়া গতাস্তর নেই পাভেলের। শহরে ফিরে আসার আনন্দটা তার মাইয়ে এসেছে।

রাত্রি কাটাবার মতো একটা জায়গা খুঁজে নেওয়া এখনকার মতো অব্যবহিত সমস্যা। নৈরাশ্যটুকু হজম করে নিয়ে সে মনে-মনে ঘোঁষাঘোঁষ করে নিজেকেই বলল, 'পুরনো বন্ধুদের খোঁজে হেঁটে হেঁটে পা খোঁড়া করে আর লাভটা কী হবে, তারা যে আদর্শেই নেই এখানে।' তবু যা হোক, আরেকবার ভাগ্য পরীক্ষা করবে বলে স্থির করে সে দেখতে চলল পানক্রাতভ এখনও শহরে আছে কিনা। জাহাজের মাল-খালসিটি থাকে জাহাজঘাটার অদূরে—সেটা সলোমেন্কার চেয়ে কাছে।

পানক্রাতভের বাসায় এসে পৌছতে পৌছতে অত্যন্ত পরিশ্রান্ত হয়ে পড়ল পাভেল। দরজাটার ওপরে এককালে একপোঁচ হলদে রঙের জলুশ ছিল, তার ওপরে ঠোকা দিতেই পাভেল মনে-মনে স্থির করল, 'পানক্রাতভও যদি এখানে না থাকে, তাহলে খোঁজাখুঁজি ছেড়ে দিয়ে ঘাটে গিয়ে একটা ডিঙির নিচে গুঁড়ি মেরে ঢুকে ওখানেই রাতটা কাটিয়ে দেব।'

মাথার উপর দিয়ে ধুতনির নিচে রুমাল-বাঁধা এক বৃদ্ধা এসে দরজা খুলে দিল। পানক্রাতভের মা ইনি।

'ইগ্নাৎ বাড়ি আছে, মা?'

'এইমাত্র এসেছে ও। ওকে চান বুঝি আপনি?'

পাভেলকে চিনতে না-পেরে তিনি ঘুরে দাঁড়িয়ে ডাকলেন, 'ইগ্নাৎ, একজন ডাকছে তোকে!'

পাভেল তাঁর পেছন পেছন ঘরের মধ্যে ঢুকে মেঝের ওপরে তার ন্যাপস্যাকটা রাখল। পানক্রাতভ টেবিলে বসে রাত্রির খাওয়া সারছিল, পেছন ফিরে আগন্তুকের দিকে একনজর দেখে নিল।

'আমার কাছেই এসে থাকো যদি, তাহলে বসে বলে যাও যা বলার আছে', বললে সে, 'আমি ততক্ষণে কিছু পুরে নেই পেটে। সকাল থেকে জল ছাড়া আর কিছু পেটে পড়েনি।' বলেই সে মন্তবড় একটা কাঠের চামচ তুলে নিল।

একপাশে একটা নড়বড়ে চেয়ারে পাভেল বসল। টুপিটা খুলে নিয়ে তার একটা পুরনো অভোস অনুযায়ী সেটা দিয়ে মুছে নিল কপালটা।

মনে-মনে ভাবল, 'এতই কি আমি বদলে গেছি যে ইগ্নাৎও আমাকে চিনতে পারছে না?'

দু-চামচ সুপ গিলে নিয়ে, আগন্তুকটি কিছু বলল না দেখে পানক্রাতভ মাথা ফিরিয়ে তার দিকে তাকাল।

'আচ্ছা, বলে ফেলো দিকি, কী বলতে চাও?'

একটুকরো রুটি-খরা হাতখানা তার মাঝপথে শূন্য থেমে রইল। বিশ্বয়ে চোখদুটো মিটমিট করতে করতে সে তাকিয়ে রইল তার অতিথির দিকে।

'আরে...এ কী?...আচ্ছা! এমনটি তো কখনও...?'

পানক্রাতভের লালচে মুখখানায় বিমূঢ় বিশ্বয়ের ভাব ফুটে উঠতে দেখে পাভেল আর থাকতে না-পেরে সশব্দে হেসে উঠল।

‘পাভকা!’ চিৎকার করে উঠল পানক্রাতভ, ‘কিন্তু আমরা-যে সবাই এদিকে জানি যে তুই মারা গেছিস! অরে, দাঁড়াও, দাঁড়াও এক মিনিট—তোমার নামটা বলো দিকি?’

তার চিৎকার শুনে পানক্রাতভের দিদি আর মা পাশের ঘর থেকে ছুটে এল। ও-যে পাভেল করচাগিন ছাড়া আর কেউ নয়, সে-সম্বন্ধে সম্পূর্ণ সন্দ্বিষ্ট না-হওয়া পর্যন্ত তারা তিনজনে মিলে প্রশ্ন-বৃষ্টি করে চলল পাভেলের ওপর।

বাড়ির সবাই অনেকক্ষণ গভীর ঘুমে আচ্ছন্ন, তখনও পর্যন্ত পানক্রাতভ গত চারমাসে যা যা ঘটেছে তার সমস্ত বিবরণ দিয়ে চলেছে পাভেলের কাছে।

‘গেল শীতে ঝারকি, মিতিয়াই আর মিখাইলো খারকভে চলে গেল। কোথায় গেল জানিস নচ্ছারগুলো? কমিউনিস্ট বিশ্ববিদ্যালয়ে, অন্য কোথাও নয়! ঝারকি আর মিতিয়াই প্রাথমিক পাঠ নেবার ক্লাসে ঢুকল, এদিকে মিখাইলো সোজা প্রথম কোর্সে ঢুকল। গোড়ার দিকে আমরা ছিলাম পনেরো জন। আমিও মেতে উঠে দরখাস্ত করলাম। ভাবলাম, এবার একটু নিরেট মাথাটা সাকসুফ করে নেওয়া যাক। তবে পরীক্ষকমণ্ডলী আমাকে সোজা বাতিল করে দিলে!’

ঘটনাটা মনে পড়ে যেতে ক্রুদ্ধভাবে সশব্দ একটা নিশ্বাস টেনে পানক্রাতভ বলে চলল, ‘গোড়ার দিকে সবকিছুই বেশ দিব্যি চলছিল। আর সবদিক থেকেই আমি যোগ্যতার পরিচয় দিতে পেরেছিলাম—আমার পার্টি-কার্ড ছিল, কমসমোলে আমি অনেকদিন ছিলাম, আমার ব্যক্তিগত জীবন আর জন্মপরিচয়ে আমার এতদিনে কোনো গোলমাল ছিল না। কিন্তু রাজনীতিক জ্ঞানের ব্যাপারে এসে গাড্ডায় পড়লাম।

‘পরীক্ষকমণ্ডলীর একজন কমরেডের সঙ্গে আমি একটা তর্কাতর্কির মধ্যে জড়িয়ে পড়েছিলাম। সে আমাকে এই ধরনের একটা বিদ্যুটে প্রশ্ন করে বসল, ‘আচ্ছা, বলুন তো কমরেড পানক্রাতভ, দর্শন সম্বন্ধে আপনি কী জানেন?’ আসলে দর্শন সম্বন্ধে আমি তো ঘোড়ার ডিম কিছু জানতাম না। কিন্তু জাহাজঘাটায় আমাদের সঙ্গে একটি ছেলে কিছুদিন কাজ করেছিল—ইঙ্কুলের ছাত্র ছিল ছেলেটা, ভবঘুরে হয়ে বেরিয়ে পড়ে এমনি দিনকতক লোক-দেখাবার জন্যে জাহাজের মাল-খালাসির কাজ নিয়েছিল। হ্যাঁ, আমার মনে আছে—সেই ছেলেটা গ্রিসের জনকতক মাথাঅলা লোকের গল্প করেছিল, তারা নিজেদের কথা খুব বড় করে ভাবত, তাদের সবাই বলত দার্শনিক—ছেলেটার কাছে শুনেছিলাম। এই এদেরই একজন ছিল—এখন আর তার নামটা মনে করতে পারছি না—দিওজিনিশ, না ওই-ধরনের কিছু—লোকটা সারাজীবন কাটিয়েছিল একটা পিপের মধ্যে... এদের মধ্যে সবচেয়ে চৌকস ছিল যে-লোকটা, সে চন্নিশবার কালোকে শাদা আর শাদাকে কালো বলে প্রমাণ করতে পারত। যতসব বুজবুজের দল, বুঝলি তো? ছাত্রটি যা বলেছিল, মনে পড়ে গেল আমার। মনে-মনে ভাবলাম, ‘হুঁ, লোকটা আমাকে প্যাঁচে ফেলতে চাচ্ছে।’ দেখলাম, পরীক্ষা যে নিচ্ছে সে আমার দিকে কৌতুক করে তাকাচ্ছে। আর, আমিও তাই ওর মুখের ওপর জবাব দিলাম, বললাম, ‘দর্শন হচ্ছে শ্রেফ বুজবুজকি, চোখে ধুলো দেওয়া মাত্র। এবং, আমি ও-জিনিশের পেছনে অনর্থক মাথা ঘামাতে চাই নে, কমরেড। পার্টি-ইতিহাস যদি বলেন, হ্যাঁ, সেটা অন্য জিনিশ। সে-সম্বন্ধে জানবার-শোনবার সুযোগ পেলে আমি খুশিমনেই তা করব।’ তারপরে ওরা



উঠেপড়ে লাগল আমার পেছনে—দর্শন সম্বন্ধে আমার এই অদ্ভুত ধারণাটা হল কোথা থেকে জানতে চাইল। তখন সেই ছাত্র ছেলেটার কথা ভেবে আরো কিছু বললাম ওদের, ও যা-যা বলেছিল আমায় তার কিছু কিছু বললাম, আর পরীক্ষা নিতে বসেছিল যারা প্রচণ্ড হাসির চোটে পেটে তো তাদের খিল ধরে গেল। হাসিটা আমাকে লক্ষ করেই। ভারি চটে গেলাম। ‘মুখ্য বলে ঠাউরেছে আমায়, না?’ বলেই বেরিয়ে চলে এলাম।

‘পরে প্রাদেশিক কমিটিতে সেই পরীক্ষকটি আমাকে পাকড়াও করে ঝাড়া তিনঘণ্টা ধরে বক্তৃতা শোনাল। দেখা গেল, জাহাজঘাটার সেই ছাত্রটি সব ঘুলিয়ে ফেলেছিল। দর্শন জিনিশটা ভালো বলেই মনে হল, ভয়ানক দরকারি জিনিশ বলতে গেলে।

‘এদিকে দুবাতা আর ঝার্কি পরীক্ষায় পাস করে গেল। মিতিয়াই তো বরাবরই লেখাপড়ায় ভালো, কিন্তু ঝার্কি আমার চেয়ে বিশেষ দড় নয়। নিশ্চয়ই ওর মেডেলটাই ওকে পার পাইয়ে দিয়েছে। যাই হোক, আমি তো এখানেই পড়ে রইলাম। ওরা চলে যাবার পর আমাকে জাহাজঘাটায় ব্যবস্থাবিভাগের একটা কাজ দেওয়া হল—মাল-বোঝাইয়ের ঘাটায় প্রধানের সহকারী। আগে তরুণদের সম্বন্ধে আমার সঙ্গে ম্যানেজারদের ঝগড়াঝাঁটি লেগেই ছিল, এখন আমি নিজেই একজন ম্যানেজার হয়েছি। কাজের বেলায় কুঁড়ে বা হাঁদা যদি কাউকে আজকাল আমি দেখতে পাই, তাহলে তাকে আমি একই সঙ্গে ম্যানেজার হিশেবে আর কমসমোল সম্পাদক হিশেবে খুব একচোট নিই। আমার চোখে তো ধুলো দিতে পারবে না! আচ্ছা যাক, নিজের কথা তো ঢের বলা হল। আর কী খবর তোকে দেবার আছে? আকিমের কথা তো জানিসই। প্রাদেশিক কমিটিতে একমাত্র তুফতাই আছে পুরনোদের মধ্যে থেকে। তার সেই পুরনো কাজই এখনও করছে। তোকারেভ সলোমেন্‌কায় পার্টির জেলা কমিটির সম্পাদক। তোর সঙ্গে কমিউনে ছিল যে ওকুনেভ, সে আছে জেলা কমসমোল কমিটিতে। তালিয়া কাজ করছে রাজনীতিক শিক্ষা বিভাগে। স্ভেতায়েভ মেরামত-কারখানায় তোর কাজটা করছে। আমি তার সম্বন্ধে বেশিকিছু জানি না। মাঝে মাঝে শুধু প্রাদেশিক কমিটিতে দেখা হয়—বেশ বুদ্ধিমান বলেই তো ওকে মনে হয়, কিন্তু একটু যেন দাঙ্কি প্রকৃতির। আল্লা বোরহাটকে মনে আছে? সেও সলোমেন্‌কায় আছে—জেলা পার্টি কমিটির মহিলা বিভাগের প্রধান। বাকি সবার কথা তো বলেছি তোকে। হ্যাঁ, পড়াশোনা করার জন্যে প্রচুর লোককে পার্টি পাঠিয়েছে, পাড়লুশা। পুরনো সক্রিয় কর্মীরা সবাই আজকাল প্রাদেশিক সোভিয়েত পার্টিস্কুলে যায়। আসছে বছর আমাকেও পাঠাবে বলে কথা দিয়েছে।’

বারোটা বেজে যাবার অনেক পরে তারা ঘুমোল। পরদিন সকালে যখন পাভেলের ঘুম ভাঙল, তখন পানক্রাতভ জাহাজঘাটায় চলে গেছে। তার বোন দুসিয়া—মজবুত গড়নের মেয়েটি, ভাইয়ের সঙ্গে তার চেহারার ঘনিষ্ঠ মিল আছে—সমস্তক্ষণ নানা বিষয়ে কথা বলতে বলতে পাভেলকে চা খাওয়াল। পানক্রাতভের বাবা জাহাজের ইঞ্জিনচালক, তিনি বাড়িতে নেই।

পাভেল বেক্‌বার জন্য তৈরি হচ্ছে, তখন দুসিয়া তাকে মনে করিয়ে দিল, ‘ভুলে যাবেন না যেন, দুপুরে খাওয়ার সময় আমরা আপনার অপেক্ষায় থাকব।’

পার্টির প্রাদেশিক কমিটিতে সেই চিরাচরিত মুখের কর্মতৎপরতার দৃশ্য। সামনের দরজাটা অনবরত খুলছে আর বন্ধ হচ্ছে। বারান্দা আর দপ্তর-ঘরগুলো ভিড়াক্রান্ত, পরিচালনা-বিভাগের বন্ধ-দরজার ভেতর থেকে টাইপরাইটারের চাপা শব্দ আসছে।

একটা কোনো চেনা মুখের সন্ধানে পাভেল বারান্দায় কিছুক্ষণ ঘোরাফেরা করল, কিন্তু চেনা কাউকে না-পেয়ে সে সরাসরি সম্পাদকের সঙ্গে দেখা করতে ঢুকল। নীল রঙের একটা রাশিয়ান শার্ট পরে সম্পাদক বসে আছে বিরাট একটা রাইটিং টেবিলের সামনে। পাভেল ঢুকতে একনজর তাকিয়ে নিয়ে লিখেই চলল সে।

পাভেল তার সামনে একটা চেয়ারে বসে আকিমের এই উত্তরাধিকারীটির চেহারা লক্ষ করতে লাগল।

লেখটা শেষ করে রাশিয়ান শার্ট-পরা সম্পাদক জিজ্ঞেস করল, 'কী করতে পারি তোমার জন্যে, বলো?'

পাভেল তার বৃত্তান্ত জ্ঞানিয়ে বক্তব্যের শেষে বলল, 'এখন, এইটে করতে হবে, কমরেড : পার্টি-সভ্যের তালিকায় আমাকে ফের ঢুকিয়ে দিতে হবে, আর তারপরে রেল-কারখানায় আমাকে পাঠাতে হবে। দরকারি নির্দেশ যা দেবার তা দিয়ে দাও।'

সম্পাদক তার চেয়ারে হেলান দিয়ে বসল।

'আমরা অবশ্যই তোমাকে তালিকায় ঢুকিয়ে দেব, সে-সম্বন্ধে বলার কিছু নেই', একটু ইতস্তত করে বলল সম্পাদক, 'কিন্তু কারখানায় তোমাকে পাঠানোটা একটু খারাপ দেখাবে। ওখানে স্ভেভায়েভ কাজ করছে। সে প্রাদেশিক কমিটির সভ্য। তোমার কাজের জন্যে আমাদের অন্যকিছু দেখে দিতে হবে।'

চোখদুটো কুঁচকাল করচাগিন।

'স্ভেভায়েভের কাজে হস্তক্ষেপ করার কিছুমাত্র ইচ্ছে আমার নেই', বলল সে, 'আমি আমার পেশায় ফিরে যেতে চাই—সম্পাদক হিসেবে নয়। আর তাছাড়া, আমার স্বাস্থ্য খারাপ বলে তোমাকে অনুরোধ জানাতে চাই—অন্য কোনো কাজ আমাকে দেবে না।'

সম্মত হল সম্পাদক। একটুকরো কাগজে কয়েকটা কথা লিখে দিয়ে বলল, 'এটা কমরেড তুফ্তাকে দিও, সে সব ব্যবস্থা করে দেবে।'

কমী-বিভাগে গিয়ে পাভেল দেখে তুফ্তা তার সহকারীকে খুব একচোট ধমক দিচ্ছে। দু-এক মিনিট দাঁড়িয়ে উত্তেজিত কথা-কাটাকাটি শুনল সে। কিন্তু ব্যাপারটা বহুক্ষণ ধরে চলার আশঙ্কা দেখে সে ওদের কথার মধ্যেই বলল, 'আচ্ছা, তুফ্তা, তোমার তর্কটা পরে কোনো সময়ে শেষ করো এখন। আমার কাগজপত্রগুলো ঠিকঠাক করে দেবার জন্যে তোমার নামে এই একটা চিরকুট।'

তুফ্তা কিছুক্ষণ ধরে একবার কাগজটার দিকে, একবার পাভেলের দিকে তাকাতে লাগল।

শেষপর্যন্ত ব্যাপারটা ধীরে ধীরে স্পষ্ট হয়ে এল তার মাথায়।

'আরে! এ কী, দাঁড়াও, দাঁড়াও! তাহলে মরো নি তুমি? কী করা যায় তাহলে এখন? তালিকা থেকে তো তোমার নাম কাটা গেছে। আমি নিজেই তোমার কার্ড কেন্দ্রীয় কমিটিতে পাঠিয়ে দিয়েছি। আরও কী জানো, তুমি পার্টির আদমশুমারি থেকে বাদ

গেছ—কমসমোল কেন্দ্রীয় কমিটির নির্দেশপত্রে আছে, যারা আদমশুমারিতে তালিকাভুক্ত হয়নি, তারা বাদ যাবে। সুতরাং, তুমি আবার নতুন করে একটা দরখাস্ত দাও—এছাড়া তোমার আর কিছু করার নেই।’ তুফতার গলার স্বরে বোঝা গেল, আর কোনো তর্ক চলবে না।

ভুরু কুঁচকাল পাভেল।

‘তোমার সেইসব পুরনো প্যাচ কষতে শুরু করেছে, অ্যাঁ? বয়সে তরুণ হলেও তুমি দেখছি আমাদের ওই মহাফেজখানার সবচেয়ে বুড়ো নোংরা ইঁদুরটার চেয়েও খারাপ। মানুষের মতো মানুষ হবে কবে, ভলোদকা?’

লাফিয়ে উঠল তুফতা—যেন বোলতায় কামড়েছে তাকে।

‘আমার কাছে বক্তৃতা ঝাড়তে এসো না বলে দিছি। এই বিভাগের ভার আমার ওপর। নির্দেশপত্র জারি করা হয় মানবার জন্যেই, অমান্য করার জন্যে নয়। আর, অভিযোগ করলে বলে তোমার জবাবদিহি করতে হবে।’

শেষ কথাগুলো একটা শাসানির সুরে উচ্চারণ করে, পাভেলের সঙ্গে তার সাক্ষাৎকার শেষ হয়ে গেছে এমন একটা ভঙ্গিতে হাত বাড়িয়ে তুফতা খাম-না-খোলা চিঠিপত্রগুলো নিজের দিকে টেনে নিল।

ধীরে ধীরে দরজার দিকে এগিয়ে গেল পাভেল। তারপরে, কী একটা কথা মনে পড়াতে টেবিলের কাছে ফিরে এসে তুফতার সামনে থেকে সম্পাদকের লেখা চিরকুটটা ভুলে নিল। তুফতা সমস্তক্ষণ লক্ষ করে যাচ্ছে পাভেলকে। কর্মী-বিভাগের কেরানি এই তুফতার চেহারায় একই সঙ্গে কেমন যেন একটা বিশ্রী আর হাস্যকর ভাব মেশানো—বয়সে তরুণ অথচ বুড়োমানুষের মতো খুঁতখুঁতে আর বদরাগী, বড় বড় কানদুটো তার যেন সবসময় উৎকর্ষ হয়ে আছে।

‘বেশ’, ব্যঙ্গভরা শাস্ত গলায় পাভেল বলল, ‘যদি খুশি হয় তাহলে তোমার ‘পরিসংখ্যানে তালগোল’ পাকিয়ে ফেলার জন্যে আমার বিরুদ্ধে অভিযোগ আনতে পারো তুমি। কিন্তু, যারা আগে থাকতে কেতামাফিক নোটিশ না দিয়েই মরে, তাদের শাসন করার মতো কী ব্যবস্থা তুমি করো, বলো দিকি? আর যাই হোক, চাইলে লোকে অসুখে পড়তে পারে তো, কিংবা তেমন তেমন মনে হলে মারতেও পারে যে-কেউ—কিন্তু, বাজি রেখে বলতে পারি, নির্দেশপত্রে সে-সম্বন্ধে কিছু বলা নেই।’

তুফতার সহকারীটি এতক্ষণে আর তার নিরপেক্ষতা বজায় রাখতে না-পেরে উচ্চকিত হেসে উঠল, ‘ওঃ হোঃ হোঃ!’

তুফতার পেন্সিলের সীসটা ভেঙে গেল। ছুড়ে ফেলে দিল সে পেন্সিলটা মেঝের উপর। কিন্তু প্রতিপক্ষের কথার পাল্টা জবাব দেবার আগেই জনকতক লোক হাসতে হাসতে কথা বলতে বলতে দরজা ঠেলে ঘরে ঢুকে পড়ল। এদের মধ্যে একজন ওকুনেভ। পাভেলকে চিনতে পারার পর ওদের মধ্যে দারুণ উত্তেজনা। অসংখ্য প্রশ্নের বাণ ছোড়া হল তার দিকে।

কয়েক মিনিট বাদে আরেকদল তরুণ-তরুণীর সঙ্গে ঘরে ঢুকল ওলগা ইউরেনেভা। পাভেলকে আবার দেখতে পেয়ে হতভম্ব হয়ে কিন্তু আনন্দে ওলগা অনেকক্ষণ তার হাতখানা চেপে ধরে রইল।

পাভেলকে তার বৃত্তান্তটুকু ফের গোড়া থেকে সবটা বলতে হল। কমরেডদের আন্তরিক আনন্দ, তাদের মনখোলা বন্ধুত্ব আর দরদ, উষ্ণ করমর্দন আর পিঠের উপর শ্রীতিভরা চাপড় পাভেলকে সেই মুহূর্তের জন্য তুফতার কথা ভুলিয়ে দিল।

কিন্তু নিজের কথা বলার পরে সে যখন তুফতার সঙ্গে তার কথাবার্তা যা হয়েছে সব বলল, তখন সমবেত-কণ্ঠে ত্রুঙ্ক-মস্তব্যের একটা গুঞ্জন উঠল। ওলগা তুফতার দিকে এমন দৃষ্টিতে তাকাল, যেন তাকে ভস্ম করে ফেলবে। তারপরে সে ঢুকল সম্পাদকের দপ্তরঘরে।

ওকুনেভ চোঁচিয়ে বলল, 'এসো, সবাই আমরা নেবাদানভের কাছে যাই। সে ওর মগজ সাফ করে দেবে।' এই বলে পাভেলের কাঁধে হাত রাখল সে। ওলগার পিছু পিছু তরুণবন্ধুদের পুরো দলটি এসে ঢুকল সম্পাদকের ঘরে।

'ওই তুফতাকে কাজ থেকে সরিয়ে দেওয়াই উচিত, ওকে বরং বছরখানেকের জন্যে পানক্রাতভের অধীনে জাহাজঘাটায় মাল-বোঝাইয়ের কাজ করতে দেওয়া হোক। ও একটা মার্কামারা আমলা!' রাগে গরগর করে বলল ওলগা।

তুফতাকে কর্মী-বিভাগ থেকে খারিজ করে দেবার জন্য ওকুনেভ, ওলগা এবং আর সবাই দাবি তোলাতে মৃদু প্রশ্নের হাসি হাসল প্রাদেশিক কমিটির সম্পাদক।

'করচাগিনকে যে ফের পার্টিতে নেওয়া হবে, সে-সম্বন্ধে কোনো প্রশ্নই ওঠে না', ওলগাকে ভরসা দিয়ে বলল সে, 'ওকে একুনি একটা নতুন কার্ড দেওয়া হবে। তুফতা যে একটু বেশিরকম আচার-অনুষ্ঠানমায়িক চলে সে-সম্বন্ধে আমিও তোমাদের সঙ্গে একমত', বলে চলল সে, 'ওইটে ওর প্রধান দোষ। কিন্তু স্বীকার করতেই হবে, নিজের কাজে সে তেমন মন নয়। আমি যেখানেই কাজ করেছি, সর্বত্রই কমসমোল কর্মীদের সংখ্যার হিশেবনিকেশগুলো ছিল অবর্ণনীয় রকম বিশৃঙ্খল অবস্থায়। কোনো হিশেবের ওপরে ভরসা করা যেত না। আমাদের এখনকার কর্মী-বিভাগে সংখ্যার হিশেবগুলো ঠিক অবস্থায় আছে। তোমরা নিজেরাই তো জানো, তুফতা প্রায়ই রাত জেগে কাজ করে। আমি তো ব্যাপারটাকে এইভাবে দেখি : ওকে যে-কোনো সময়েই সরিয়ে দেওয়া যেতে পারে, কিন্তু ওর জায়গায় যদি এমন একজন হালকা স্বভাবের শাদাসিখে ছেলেকে এনে বসানো যায় যে দলিল-হিশেবপত্র রাখার ব্যাপারে কিছুই জানে না, তাহলে আমাদের এখানে আমলাতন্ত্র বলে কিছু হয়তো থাকবে না বটে, কিন্তু কাজের শৃঙ্খলাও কিছু থাকবে না। ওকে ওর কাজেই থাকতে দেওয়া যাক। আমি ওকে ভালো করে কড়কে দেব 'খন। তাতে কিছু সময়ের জন্যে কাজ হবে, আর তার পরে কী হয় দেখা যাবে।'

'বেশ, থাকুক ও,' সম্পাদকের সঙ্গে একমত হল ওকুনেভ, 'চল্ ক্লাবে পাভলুশা, সলোমেনকায় যাই আমরা। আজ রাতে ওখানে সক্রিয় কর্মীদের একটা সভা আছে। এখনও কেউ জানে না যে তুই ফিরে এসেছিস। আমরা যখন ঘোষণা করব 'এবার করচাগিন কিছু বলবে!' তখন সবাই কীরকম আশ্চর্য হয়ে যাবে, একবার ভাব দিকি। মারা না-গিয়ে তুই বড় ভালো কাজ করেছিস রে পাভলুশা। মরে গেলে আর তুই শ্রমিকশ্রেনীর কী কাজে লাগতিস?' বন্ধুর গলা জড়িয়ে ধরে ওকুনেভ তাকে বারান্দা বেয়ে নিয়ে এল।

'তুমি আসছ নাকি, ওলগা?'

'নিশ্চয় আসব!'

খাবার জন্য পানক্রান্তদের ওখানে ফিরল না পাভেল। আসলে সে সারাদিনের মধ্যেই ওখানে ফেরেনি। 'সোভিয়েত ভবনে' তার নিজের ঘরে ওকুনেভ তাকে নিয়ে এল। যা-কিছু খাবার ছিল ওকুনেভ খাওয়াত তাকে। তারপরে একতাড়া খবরের কাগজ আর জেলা কমসমোল ব্যারের বিভিন্ন সভার সংক্ষিপ্ত বিবরণের দুটো মোটা ফাইল তার সামনে রেখে ওকুনেভ বলল, 'এগুলোর ওপরে চোখ বুলিয়ে নে। যখন টাইফাস-রোগে সময় নষ্ট করছিলি, তখন এদিকে অনেক কিছু ঘটে গেছে। আমি সন্দের দিকে ফিরে আসব, তারপরে একসঙ্গে ক্লাবে যাওয়া যাবে। যদি ক্লাস্ত হয়ে পড়িস, তাহলে শুয়ে কিছুক্ষণ ঘুমিয়ে নিতে পারিস।'

নানারকম দলিল আর কাগজপত্রে পকেটদুটো ঠেসে ভর্তি করে (ওকুনেভ নীতির দিক থেকে পোর্টফোলিও ব্যবহার করাটাকে ঘৃণা করে, পোর্টফোলিওটা অবহেলায় পড়ে থাকে তার বিছানার নিচে) ঘরের মধ্যে একটা পাক ঘুরে বিদায় নিয়ে বেরিয়ে গেল জেলা কমিটির সম্পাদক।

সন্ধ্যার দিকে যখন সে ফিরল, তখন ঘরের গোটা মেঝেটায় খবরের কাগজ ছড়ানো আর খাটের নিচ থেকে বের করে রাখা আছে একগাদা বই। কিছু বই টেবিলের ওপরে স্থগীকৃত। পাভেল বিছানায় বসে বন্ধুর বালিশের নিচ থেকে খুঁজে-পাওয়া কেন্দ্রীয় কমিটির শেষ চিঠিগুলো পড়ছিল।

'আমার ঘরের এ কী বিশ্রী তছনছ অবস্থা করে তুলেছিস, লক্ষ্মীছাড়া কোথাকার!' কৃত্রিম ক্রোধে বলল ওকুনেভ, 'এই, দাঁড়া কমরেড! এসব গোপনীয় দলিল তুই পড়ে ফেলেছিস! তোর মতো গোলমালবাহানেঅলা ছেলেকে নিজের কুঠরিতে ঢুকতে দেবার এই ফল!'

পাভেল হাসিমুখে পাশে সরিয়ে রাখল চিঠিখানা।

'এই চিঠিখানা গোপনীয় নয়', বলল সে, 'কিন্তু ওই-যে ওটা তুমি বাতির ঘেরাটোপ হিসেবে লাগিয়েছ, ওটার গায়ে 'গোপনীয়' লেখা আছে। দ্যাখো, চারধারে ঝলসে গেছে কাগজটা!'

ঝলসে-যাওয়া কাগজখানা নিয়ে শিরোনামটার দিকে একনজর তাকিয়ে ওকুনেভ সঙ্কোভে কপাল চাপড়াল, 'এই হতভাগা কাগজখানাকে আজ তিনদিন ধরে আমি খুঁজছি! কোথায়-যে গেল কিছুতেই আর ভেবে পাইনে। এবার মনে পড়েছে : ভলিনসেভ সেদিন এটা দিয়ে বাতিটার ঘেরাটোপ বানিয়েছিল—পরে আবার সে নিজেই এটা খুঁজল তন্নতন্ন করে।' দলিলখানা সযতনে ভাঁজ করে ওকুনেভ সেটা গুঁজে রাখল তোশকের নিচে। ভরসা দিয়ে বলল, 'পরে সব ঠিকমতো গোছগাছ করে রাখব। এখন আপাতত কিছু খাওয়া যাক। তারপর ক্লাবে রওনা হয়ে যাব। আয় পাভেল, টেবিলে এসে বোস।'

ওকুনেভ একটা পকেট থেকে টেনে বের করল খবরের কাগজের জড়ানো লম্বা একটা গুঁটকো রোচ্ মাছ আর অন্য পকেট থেকে দু-টুকরো ক্রটি। খবরের কাগজটা টেবিলের ওপরে বিছিয়ে নিয়ে রোচ্টার মাথা চেপে ধরে নিপুণ-হাতে সেটা টেবিলের ধারটায় আছাড় মেরে-মেরে নরম করে নিল।

টেবিলের ওপরে বসে আর চোয়াল জোরসে চালাতে চালাতে হাসিঠাট্টা করতে করতে খোশমেজাজি ওকুনেভ পাভেলকে সব খবরাখবর দিয়ে যেতে লাগল।

\*

\*

\*

ক্লাবে এসে ওকুনেভ করচাগিনকে খিড়কিদরজাটা দিয়ে নিয়ে এল মঞ্চের পেছনদিকটায়। প্রশস্ত হলঘরটার এককোণে মঞ্চের ডানদিকে পিয়ানোর কাছে একদল রেল-এলাকার কমসমোল সভ্যের সঙ্গে বসে আছে তালিয়া লাগুতিনা আর আন্না বোরহাট। ডিপোর কমসমোল সম্পাদক ভলিনসেভ আন্নার সামনে বসে-বসে চেয়ারে দোল খাচ্ছে। আগস্ট-মাসের আপেলের মতো তার মুখখানা টকটকে লাল, চুল আর চোখের ভুরুর রঙ পাকা ধানের মতো। তার অতি জীর্ণ চামড়ার কোর্তটার রঙ এককালে কালো ছিল।

তার পাশেই, পিয়ানোর ঢাকনিটার ওপরে আলগোছে কনুইয়ের ভর রেখে বসে আছে স্ভেভায়েভ—ভরুণ সুপুরুষ, বাদামি রঙের চুল আর যেন সুন্দর করে কুঁদে কাটা ঠোঁটদুটি। তার শার্টের গলার বোতাম খোলা।

দলটার কাছে আসতে ওকুনেভ গুনল আন্না বলছে, ‘নতুন সভ্যদের ভর্তি করার ব্যাপারটাকে জটিল করে তোলবার জন্যে কিছু লোক যতদূর পারে চেষ্টা করছে। এদের মধ্যে স্ভেভায়েভ একজন।’

একগুঁয়ে অবজ্ঞার সঙ্গে পাষ্টা জবাব দিল স্ভেভায়েভ, ‘কমসমোলটা চড়ুইভাতি করার জায়গা নয়।’

ওকুনেভকে দেখতে পেয়ে তালিয়া চৈঁচিয়ে উঠল, ‘নিকোলাইকে দ্যাখো! ও আজ পালিশ-করা সামোভারের মতো খুশিতে চকচক করছে!’

ওকুনেভকে দলটার মধ্যে টেনে এনে প্রশ্নের গোলাবর্ষণ চলল তার ওপর :

‘কোথায় ছিলে তুমি?’

\*

\*

\*

‘এসো, আরও করে দেওয়া যাক।’

ওদের চূপ-করানোর জন্য হাতটা তুলল ওকুনেভ, ‘একটু দাঁড়াও, ভাইসব। তোকারেভ এলেই আমরা শুরু করে দেব।’

‘ওই-যে ও আসছে,’ বলে উঠল আন্না।

সত্যিই এসে পড়েছে জেলা পার্টি কমিটির সম্পাদক। ওকুনেভ ছুটে গেল তার দিকে।

‘এই-যে, এসো খুড়ো। তোমার এক বন্ধুর সঙ্গে দেখা করিয়ে দেবার জন্যে তোমাকে একবার মঞ্চের পেছনে নিয়ে যাই, চলো। স্তম্ভিত হয়ে যাবার জন্যে ভৈরি হও!’

সিগারেট টানতে টানতে ঘোঁৎঘোঁৎ করে বলল বৃদ্ধ, ‘ব্যাপার কী হে?’ কিন্তু ওকুনেভ ততক্ষণে জামার হাতটা ধরে তাকে টেনে নিয়ে চলেছে।

...ওকুনেভ সভাপতির টেবিলের ঘণ্টাটা এমন প্রচণ্ড জোরে বাজাল যে শ্রোতাদের মধ্যে থেকে যারা সবচেয়ে বেশি বকবক করছিল তারা পর্যন্ত তৎক্ষণাৎ চুপ মেরে গেল।

তোকারেভের পেছনে, ফারগাছের সবুজ পাতা-ঘেরা একটা কাঠামোর মধ্যে থেকে সভার দিকে চেয়ে আছে 'কমিউনিষ্ট ইশতেহার' রচয়িতার সিংহের মতো মুখখানা। সভার কাজ শুরু করে ওকুনেভ যখন বক্তৃতা দিচ্ছে, তখন উইংস-এর আড়ালে দাঁড়িয়ে ইশারার জন্য অপেক্ষারত করচাগিনের দিক থেকে তোকারেভ তার চোখদুটোকে কিছুতেই ফিরিয়ে নিতে পারছে না।

'কমরেডসব! আজকের বিষয়সূচির সংগঠন-সংক্রান্ত চলতি প্রশ্নগুলো নিয়ে আমাদের আলোচনা শুরু করার আগে উপস্থিত একজন কমরেড কিছু বলতে চেয়েছে। আমি আর তোকারেভ প্রস্তাব করছি—তাকে বলতে দেওয়া হোক।

হলঘরের সমর্থনের গুঞ্জনধ্বনি উঠতেই ওকুনেভ চোঁচিয়ে বলে উঠল, 'আমি পাভকা করচাগিনকে বলবার জন্যে আহ্বান করছি!'

হলঘরের একশো জনের মধ্যে অন্তত আশিজন করচাগিনকে চিনত। পরিচিত চেহারার এই লম্বা, ফ্যাকাসে রঙের তরুণটি যখন দাঁড়িয়ে বক্তৃতা দিতে শুরু করল, তখন খুশির চিৎকার আর প্রচণ্ড হাততালির একটা ঝড় বয়ে গেল হলঘরের মধ্যে।

'প্রিয় কমরেডসব!'

করচাগিনের গলা অকম্পিত, কিন্তু মনের আবেগকে সে সামলাতে পারছে না।

'বন্ধুগণ, আমি তোমাদের মধ্যে ফিরে এসেছি কর্মী হিশেবে আমার জায়গা নেবার জন্যে। ফিরে আসতে পেরেছি বলে আমি আনন্দিত। এই সভায় আমার অনেক বন্ধু রয়েছে দেখছি। জানতে পারলাম সলোমেন্কা কমসমোলে সভ্যের সংখ্যা এখন আগের চেয়ে শতকরা তিরিশ জন বেড়েছে। ডিপোতে শ্রমিকরা যে আজকাল সিগারেট জ্বালাবার যন্ত্র তৈরি করা বন্ধ করেছে এবং যন্ত্রপাতির জঞ্জাল ঘেঁটে পুরনো ইঞ্জিন ইত্যাদি উদ্ধার করে এনে মেরামত করে তুলে ফের কাজে লাগানো হচ্ছে, তাও শুনেছি। তার মানে, আমাদের দেশে নতুন প্রাণের একটা জোয়ার আসছে, সমস্ত শক্তি সংহত করে আনছি আমরা। এইজন্যেই তো বেঁচে থাকা দরকার! এরকম সময়ে আমি কী করে মারা যেতে পারি!' আনন্দের হাসিতে উজ্জ্বল হয়ে উঠল করচাগিনের চোখ।

হাততালি আর অভিনন্দনের প্রচণ্ড কোলাহলের মধ্যে সে মঞ্চ থেকে নেমে এগিয়ে এল যেখানে আন্না আর তালিয়া বসে আছে। অভিনন্দন জানাবার জন্য তাদের বাড়িয়ে-ধরা হাত ধরে ঝাঁকুনি দিল সে। দুই বন্ধু সরে বসে নিজেদের মাঝখানে তার বসার জায়গা করে দিল। পাভেলের হাতখানা মুঠোর মধ্যে চেপে ধরল তালিয়া।

আন্নার চোখদুটো তখনও বিশ্বাসে বিস্ফারিত, চোখের পাতা কাঁপছে মৃদু মৃদু, তার চোখের দৃষ্টিতে পাভেলের প্রতি আন্তরিক সংবর্ধনার অভিব্যক্তি।

দ্রুত কেটে যাচ্ছে দিনগুলো। তবু এই কেটে যাওয়ার মধ্যে একটু একঘেয়েমি নেই; প্রতিদিনই নতুন কিছু ঘটে এবং রোজ সকালে সারাদিনের কাজটা ছকে নেবার সময়ে

পাভেল অত্যন্ত বিরক্ত হয়ে লক্ষ করে যে দিনটা বড় ছোট আর সে যা যা করবে বলে ভেবেছিল, তার অনেকগুলোই করে উঠতে পারেনি।

পাভেল ওকুনেভের সঙ্গেই আছে। রেলওয়ে-কারখানায় সহকারী ইলেকট্রিক্যাল ফিটার হিসেবে কাজ করছে সে।

কমসমোলে নেতৃত্বের কাজ থেকে পাভেল সাময়িকভাবে সরে থাকবে—এতে ওকুনেভকে রাজি করাবার জন্য তাকে বহুক্ষণ তর্ক করতে হয়েছে।

‘আমাদের লোকজন এত কম যে তোকে রেলওয়ে-কারখানায় জিরিয়ে নেবার জন্যে ছেড়ে দেওয়া চলে না,’ আপত্তি জানিয়ে বলেছিল ওকুনেভ, ‘তোরা শরীর খারাপ—ও-কথা বলিস না। আমি নিজেই তো টাইফাসের পর পুরো একমাস লাঠি ধরে ঝুড়িয়ে ঝুড়িয়ে হেঁটেছি। আমাকে বোকা বোঝাতে পারবি না পাভকা। তোকে তো জানি, নিশ্চয়ই আরও গভীর কোনো কারণ আছে। বলে ফেল্ দিকি—ব্যাপারখানা কী’, পীড়াপীড়ি করতে লাগল ওকুনেভ।

‘ঠিক বলেছ, কোলিয়া। হ্যাঁ, আছে। আমি পড়াশোনা করতে চাই।’

‘তাই বল!’ বিজয়ীর সুরে চিৎকার করে উঠল ওকুনেভ, ‘আমি জানতাম কিছু-একটা আছে। আমিও কি পড়াশোনা করতে চাই না ভাবিস? এটা তোর স্রেফ আত্মকেন্দ্রিকতা। ভাবছিস, আমরা চাকায় কাঁধ লাগিয়ে ঠেলাঠেলি করে মরব, আর তুই ওদিকে দিব্যি গিয়ে পড়াশোনা করবি। ওসব চলবে না হে ছোকরা, কালকেই তুই সংগঠক হিসেবে কাজে লাগছিস।’

শেষপর্যন্ত যা হোক, দীর্ঘ তর্কাতর্কির পর ওকুনেভ হার মানল।

‘আচ্ছা বেশ, দু-মাসের মতো আমি তোকে ছেড়ে দিচ্ছি। আশা করি, আমার এই উদারতাটুকুর তারিফ করবি তুই। কিন্তু স্বেচ্ছায়ের সঙ্গে মানিয়ে চলতে পারবি বলে আমার মনে হচ্ছে না—ও বেশ একটু আত্মাভিমানী।’

রেল-কারখানায় পাভেলের ফিরে-আসাটা স্বেচ্ছায়ের সচকিত করে তুলেছে। সে নিশ্চিত ছিল যে, করচাগিনের আসার ফলে নেতৃত্ব নিয়ে একটা লড়াই বাধবে। তার আত্মাভিमानে ঘা লাগল বলে সুদৃঢ় একটা প্রতিরোধ দেবার জন্য সে তৈরি হল। অবশ্য অল্প কিছুদিনের মধ্যেই সে বুঝতে পারল যে তার ভুল হয়েছে। করচাগিন যখন জানতে পারল যে তাকে কমসমোল ব্যারের সভ্য করে নেবার জন্য একটা পরিকল্পনা হয়েছে, তখন সে সরাসরি কমসমোল সম্পাদকের দপ্তরে গিয়ে বিষয়সূচি থেকে ওই আলোচনাটাকে বাতিল করে দেবার জন্য তাকে রাজি করাল। ওকুনেভের সঙ্গে তার যে বোঝাপড়া হয়েছে সেটাকে সে অজুহাত হিসেবে দেখাল। কারখানার কমসমোল সেলে পাভেল একটা রাজনীতিক পড়াশোনার ক্লাস নিচ্ছে বটে, কিন্তু ব্যারোতে কাজ করতে চায়নি। তবু, নেতৃত্বের ব্যাপারে তার কোনোরকম অনুমোদিত ভূমিকা না-থাকলেও, কমসমোল সংগঠনের প্রত্যেকটি কাজের ক্ষেত্রে তার প্রভাব সবাই অনুভব করছে। কমরেডসুলভ সংযত ধরনে পাভেল একাধিকবার স্বেচ্ছায়ের সচকিত করে সমস্যা থেকে মুক্ত করে দিয়েছে।

কারখানায় ঢুকে একদিন স্বেচ্ছায়ের অবাক বিশ্বয়ে লক্ষ করল কমসমোল সেলের সবাই আর ডজন-তিনেক পার্টির বাইরের ছেলে মহাব্যস্ত হয়ে জানলা ধুয়ে পরিষ্কার



করছে, যন্ত্রপাতিগুলোর উপর থেকে বহু বছরের জমা ময়লা সাফ করছে, ঠেলাগাড়ি করে জঞ্জালের স্তুপ এনে ফেলছে বাইরের আঙিনায়। যন্ত্রের তেলে আঠায় আচ্ছন্ন সিমেন্টের মেঝেটা পাভেল নিজেই প্রাণপণে ঘষছে বিরাট একটা বুরুশ দিয়ে।

‘ঝাড়পোছের উপলক্ষটা কী?’ পাভেলকে জিজ্ঞেস করল স্ভেতায়েভ।

‘এই নোংরার মধ্যে কাজ করে-করে এলিয়ে পড়েছি আমরা। এই কুড়ি বছরের মধ্যে জায়গাটা সাফ হয়নি। একসপ্তাহের মধ্যে আমরা কর্মশালাটাকে দেখতে একেবারে নতুন করে তুলব,’ সংক্ষেপে বলল পাভেল।

কাঁধ-ঝাঁকুনি দিয়ে স্ভেতায়েভ চলে গেল।

ওধু কর্মশালাটাকে পরিষ্কার করেই ওরা খুশি নয়, ইলেকট্রিশিয়ানরা কারখানার আঙিনাটার ব্যবস্থাও করল। বছরের-পর-বছর ধরে যতরকমের সব বাতিল সরঞ্জামের আঁসাকুড় হিসেবে আঙিনাটাকে ব্যবহার করা হয়েছে। শত শত কামরার চাকা আর চাকার আল, মরচে-পড়া লোহা, রেল, শিশু, আল-বাল্ল ইত্যাদির পাহাড়—কয়েক হাজার টন ধাতু খোলা-আকাশের নিচে পড়ে মরচে ধরে ক্ষয়ে যাচ্ছে।

কিন্তু কারখানার ব্যবস্থাপনা বিভাগ তরুণ কর্মীদের এই কাজটা বন্ধ করে দিল। ‘আরও বেশি দরকারি কাজে মন দিতে হবে আমাদের। আঙিনার ব্যবস্থাটা পরে করলেও চলবে’, বলা হল তাদের।

তখন ইলেকট্রিশিয়ানরা তাদের কর্মশালায় ঢোকার পথের বাইরে আঙিনাটার খানিকটা জায়গা ইটে বাঁধিয়ে নিয়ে দরজারটার সামনে জুতোর কাদা সাফ করার জন্য একটা তারের মাদুর বিছিয়ে দিয়েই ক্ষান্ত হল। কিন্তু কর্মশালার ভেতরে সাফ করাটা তারা চালিয়ে গেল কাজের সময়ের পরে। প্রধান ইঞ্জিনিয়ার ত্রিঝ্ সপ্তাহখানেক বাদে একদিন এসে দেখল, কর্মশালাটা আলোয় উজ্জ্বল। ধুলো আর তেলের পুরু স্তর উঠে গিয়ে বড় বড় লোহার গরাদে বসানো জানলাগুলো দিয়ে সূর্যের আলো এসে ডিজেল-ইঞ্জিনগুলোর পালিশ-করা তামার পাভের ওপরে ঠিকরে গিয়ে উজ্জ্বল প্রতিবিম্ব ফেলছে। যন্ত্রপাতির ছাঁচে ঢালাই-করা লোহার অংশগুলোর ওপরে সবুজ রঙের সদ্য-লাগানো একটা পোঁচ ঝকঝক করছে। এমনকি চাকার পাখ-ডাঙাগুলোর গায়ে কে যেন হলদে তীর ঝঁকে দিয়েছে।

বিস্ময়ে বিড়বিড় করল ত্রিঝ্, ‘এ কী? আচ্ছা!...’

কর্মশালার একপ্রান্তে জনকতক শ্রমিক তাদের কাজ শেষ করছিল। ত্রিঝ্ সেদিকে এগিয়ে যেতে গিয়ে মাঝপথে করচাগিনকে দেখতে পেল—একটা রঙভর্তি টিন নিয়ে যাচ্ছে সে।

‘এই যে, এক সেকেন্ড শোনো দিকি,’ ইঞ্জিনিয়ার থামাল তাকে, ‘তোমাদের এই কাজে আমার সম্পূর্ণ সমর্থন আছে, কিন্তু ওই রঙটা পেলে কোথায়? আমি খুব কড়া নির্দেশ দিয়েছিলাম না যে আমার অনুমতি ছাড়া কোনো রঙ খরচ করা চলবে না? এই ধরনের কাজে রঙ নষ্ট করা চলে না তো আমাদের। যেটুকু রঙ আমাদের আছে, তার সবটাই রেল-ইঞ্জিনে লাগাবার জন্যে দরকার পড়বে।’

‘ফেলে-দেওয়া রঙের টিনগুলোর তলা ঘষে-ঘষে এই রঙটুকু উদ্ধার করা হয়েছে। দুদিন লেগেছে আমাদের এটা করতে, কিন্তু প্রায় পঁচিশ পাউন্ড রঙ আমরা এইভাবে ঘষে-ঘষে তুলেছি। এক্ষেত্রে আমরা কোনোরকম নিয়ম ভাঙিনি, কমরেড ইঞ্জিনিয়ার।’

ইঞ্জিনিয়ার আরেকবার ঘোঁঘোঁৎ আওয়াজ করল, কিন্তু দেখে মনে হল বেশ একটু সংকুচিত হয়ে পড়ল সে।

‘হ্যাঁ, তাহলে অবশ্য যা করছ করে যাও... তা, ব্যাপারটা তো বেশ আশ্রহ জাগাবার মতো মনে হচ্ছে...কীভাবে ব্যাপারটাকে ধরা যায়...মানে, নিজেদের উদ্যোগে একটা কর্মশালা পরিষ্কার-পরিচ্ছন্ন রাখার কাজে এই-যে চেষ্টাটা, কী বলা যেতে পারে এটাকে? নিশ্চয়ই ধরে নিতে পারি যে এই সবটাই কাজের সময়ের পরে করা হয়েছে?’

ইঞ্জিনিয়ারের গলার স্বরে সত্যিকারের একটা বিমূঢ়তার আভাস পেল করচাগিন।

‘হ্যাঁ নিশ্চয়,’ বলল সে, ‘আপনি কী ভেবেছিলেন?’

‘হ্যাঁ, তবে...’

‘অবাক হবার কিছু নেই এতে, কমরেড ব্রিঝ্। বলশেভিকরা নোংরা জমিয়ে রাখে—এ-কথা কে বলেছে আপনাকে? দাঁড়ান না, সব ঠিকঠাক করে নিই এখনটায়, তারপর দেখবেন, অবাক করে দেবার মতো আরও কিছুও আপনার জন্যে রয়েছে।’

এই বলে, যাতে ইঞ্জিনিয়ারের গায়ে রঙ না-লেগে যায় তার জন্য সাবধানে তার পাশ কাটিয়ে চলে গেল পাভেল।

রোজ সন্ধ্যায় পাভেল সাধারণ পাঠাগারে যায় আর অনেক রাত পর্যন্ত কাটায় সেখানে। তিনজন লাইব্রেরিয়ানের প্রত্যেকের সঙ্গেই সে বন্ধুত্ব জমিয়ে তুলেছে এবং অন্যকে কোনোকিছুতে রাজি করাবার যতখানি ক্ষমতা তার আছে, তার সবটা ব্যবহার করে সে বইপত্র খুশিমতো ঘাঁটাঘাঁটি করার অধিকারটুকু এদের কাছ থেকে আদায় করে নিয়েছে। উঁচু উঁচু বইয়ের তাকগুলোর গায়ে মইটা ঠেস দিয়ে তার ওপরে উঠে গিয়ে সে বইয়ের-পর-বই ধরে-ধরে পাতা উল্টে যায় ঘটান-পর ঘটান। বেশির ভাগই পুরনো বই। ছোট্ট একটা বুককেস-ভর্তি আধুনিক সাহিত্য—গোটাকতক গৃহযুদ্ধ-সংক্রান্ত পুস্তিকা, মার্কসের ‘পুঁজি’, জ্যাক লভনের ‘দি আয়রন হিল’ এবং আরও গোটাকয়েক বই। পুরনো বই ঘাঁটতে ঘাঁটতে সে ‘স্পার্টাকাস’ নামে একটা উপন্যাস পেয়ে গেল। দু-রাত্রের মধ্যে সে বইটা পড়ে ফেলল এবং শেষ করার পর বইটা তাকের ওপরে রেখে দিল মাক্সিম গোর্কির রচনাবলীর পাশে। এইভাবে, তার কাছে সবচেয়ে প্রিয় আর আগ্রহজনক বইগুলোর একটা ক্রমিক মনোনয়ন চলল কিছুদিন ধরে।

লাইব্রেরিয়ানরা কোনো আপত্তি তোলেনি, তাদের কিছু এসে যায় না এতে।

রেল-কারখানায় কমসমালের শান্ত দৈনন্দিন জীবনের মধ্যে হঠাৎ একটা গোলযোগ সৃষ্টি হল। উপলক্ষটাকে প্রথমে নেহাত তুচ্ছ ব্যাপার বলেই মনে হয়েছিল : সেল-ব্যুরোর সভ্য এবং মেরামত-বিভাগের মিস্ত্রি কোস্তিয়া ফিদিন একটুকরো লোহার পাত ফুটো করতে গিয়ে বিদেশ থেকে আনা একটা দামি ড্রিলিং-যন্ত্র ভেঙে ফেলেছিল—চ্যান্টা নাক আর মুখে বসন্তের দাগ-ভরা অলস প্রকৃতির ছেলে এই ফিদিন। দুর্ঘটনা ঘটেছিল নিতান্তই অমনোযোগিতার ফলে, তার চেয়েও খারাপ : ঘটনাটা দেখে মনে হচ্ছিল, ফিদিনের পক্ষ থেকে প্রায় ইচ্ছাকৃতভাবে অনিষ্ট করার মনোভাবের ফলেই ব্যাপারটা ঘটেছে। ব্যাপারটা ঘটেছিল সকালের দিকে। মেরামত-বিভাগের সিনিয়র ফোরম্যান খদোরভ একটা লোহার পাতের ওপরে গোটাকতক ফুটো করার জন্য কোস্তিয়াকে

বলেছিল। প্রথমে কাজটা করতে চায়নি কোস্তিয়া, কিন্তু ফোরম্যান জোর করে বলাতে সে লোহার পাতটা তুলে নিয়ে ড্রিল করতে শুরু করে। ফোরম্যান খদোরভ কাজ করিয়ে নেবার দিকে বড় কড়া নজর রাখে, তাই শ্রমিকদের মধ্যে সে জনপ্রিয় নয়। আগে সে ছিল মেনশেভিক, কারখানার সামাজিক জীবনে যোগ দেয় না এবং কমসমোলকে সে ভালো নজরে দেখে না। কিন্তু নিজের কাজ স্বত্বকে সে একজন বিশেষজ্ঞ এবং অত্যন্ত কর্তব্যপরায়ণতার সঙ্গে সে তার কাজ করে থাকে। খদোরভ লক্ষ করল—কোস্তিয়া ড্রিলের মুখে তেল না-লাগিয়েই লোহার পাতটা ফুটো করতে লেগেছে। তাড়াতাড়ি লেদটার কাছে এসে সেটাকে থামিয়ে দিল সে।

‘কানা নাকি? নতুন কাজে ঢুকেছ নাকি?’ চোঁচিয়ে উঠল সে কোস্তিয়ার উদ্দেশ্যে। সে জানে, এভাবে চালালে ড্রিলটা বেশিদিন টিকবে না।

কিন্তু কোস্তিয়া শুধু পাল্টা চিংকার করে লেদটাকে আবার চালিয়ে দিল। খদোরভ অভিযোগ পেশ করার জন্য গেল বিভাগীয় বড়কর্তার কাছে। ইতিমধ্যে, কোস্তিয়া লেদটাকে চালু রেখেই চট করে একটা তেলের টিন জোগাড় করে আনার জন্য গিয়েছিল, যাতে কিনা বিভাগীয় বড়কর্তা এসে পড়ার আগেই সব ঠিকঠাক হয়ে থাকে। তেল নিয়ে ফিরে এসে দেখে ড্রিলটা ভেঙে গেছে। বিভাগীয় বড়কর্তা কোস্তিয়া ফিদিনকে বরখাস্ত করার দাবি করে রিপোর্ট পেশ করল। কিন্তু কমসমোল সভ্যদের ওপরে খদোরভ চাপ সৃষ্টি করে—এই অজুহাতে কমসমোল সেলের ব্যুরো ফিদিনের পক্ষ সমর্থনের জন্য উঠেপড়ে লাগল। কারখানার ব্যবস্থাপনা বিভাগ ফিদিনকে বরখাস্ত করার মতটাকে চালু রাখল এবং গোটা কারখানার কমসমোল ব্যুরোর কাছে ব্যাপারটাকে উপস্থিত করা হল। লড়াই বেধে গেল।

ব্যুরোর পাঁচজন সভ্যের মধ্যে তিনজনের মত—কোস্তিয়াকে সরকারিভাবে কঠিন তিরস্কার করে অন্য কাজে বদলি করে দেওয়া হোক। এই তিনজনের মধ্যে একজন স্ভেভায়েভ। অন্য দুজন কোস্তিয়াকে আদৌ দোষী বলে মনে করে না।

ব্যাপারটা নিয়ে আলোচনা করার জন্য স্ভেভায়েভের দপ্তর-ঘরে ব্যুরোর সভা ডাকা হয়েছে। লাল কাপড়ে ঢাকা একটা বড় টেবিলের চারধারে সাজানো কতকগুলো বেঞ্চি আর টুল—ছুতোর-কর্মশালার কমসমোল কর্মীরা এগুলো বানিয়েছে। দেয়ালে দেয়ালে নেতাদের ছবি আর টেবিলের পেছনের গোটা দেয়াল জুড়ে রেল-কারখানার ঝাণ্ডা টাঙানো।

স্ভেভায়েভ ইদানীং কমসমোলে ‘সারাক্ষণের কর্মী’। পেশার দিক থেকে সে কামার, কিন্তু তার সাংগঠনিক ক্ষমতার ফলে কমসমোলের নেতৃত্বের আসনে উঠে এসেছে। সে এখন কমসমোলের জেলা কমিটির ব্যুরোর একজন সভ্য, তাছাড়া প্রাদেশিক কমিটির সভ্য। যন্ত্রপাতি তৈরির একটা কারখানায় সে কামার ছিল, রেল-কারখানায় নতুন এসেছে। প্রথম থেকেই সে দৃঢ়হাতে ব্যবস্থাপনার লাগাম তুলে নিয়েছে। অতিরিক্ত মাত্রায় তার আত্মপ্রত্যয়—যে-কোনো সিদ্ধান্ত গ্রহণ করে বসে ছড়মুড় করে। গোড়া থেকেই সে অন্যান্য কমসমোল কর্মীদের স্বতঃপ্রবৃত্তি হয়ে কাজে নামার প্রয়াসটাকে চেপে দিয়েছে। নিজেই সবকিছু করার দিকে তার জোক—এমনকি, আপিসঘরটা পর্যন্ত তার ব্যক্তিগত তদারকে সাজানো হয়েছে। সমস্ত কাজের তাল

যখন একা সামলাতে পারে না, তখন সহযোগী কর্মীদের বিরুদ্ধে অকর্মণ্যতার অভিযোগ তুলে সে চোঁচামেচি করে।

এই ঘরের একমাত্র নরম গদি-আঁটা আরামকেদারাটায় গা এলিয়ে দিয়ে সে বৈঠকের কাজ পরিচালনা করছে। আরামকেদারাটাকে নিয়ে আসা হয়েছে ক্লাবঘর থেকে। শুধু ব্যারোর সভ্যদের নিয়েই এই সভা। পার্টি-সংগঠক ঋমুতোভ সবমাত্র কিছু বলবার জন্য অনুমতি চেয়েছে, এমন সময় দরজার গায়ে ঠকঠক আওয়াজ উঠল— ভেতর থেকে ছিটকিনি তুলে বন্ধ করা ছিল দরজাটা। আলোচনায় বাধা পড়তে স্ভেতায়েভ বিরক্ত হয়ে জ্রুটি করল। ফের ঠকঠক আওয়াজ উঠল। কাতিয়া জ্বেলেনোভা উঠে দরজা খুলে দিল। চৌকাঠে দাঁড়িয়ে আছে করচাগিন। কাতিয়া চুকতে দিল তাকে।

খালি একখানা চেয়ারে পাভেল বসতে যাবে, এমন সময় স্ভেতায়েভ তাকে উদ্দেশ করে বলল, 'করচাগিন, শুধু ব্যারোর সভ্যদের নিয়েই আমাদের আজকের এই বৈঠক।'

মুখ লাল হয়ে উঠল পাভেলের। ধীরে ধীরে মুখ ঘুরিয়ে সে টেবিলের দিকে তাকাল।

'তা জানি। ফিদিনের ব্যাপারটা সম্বন্ধে তোমাদের মতামত জানানোর আগ্রহ আছে আমার। এ-সম্বন্ধে আমার একটা কথা বলবার আছে। ব্যাপারটা কী, আমার উপস্থিত থাকতে কি তোমার আপত্তি আছে?'

'আমার আপত্তি নেই। কিন্তু তোমার জানা উচিত এ-ধরনের আলোচনা-সভায় শুধু ব্যারোর সভ্যরাই উপস্থিত থাকতে পারে। যতবেশি লোক থাকবে, ঠিকমতো ফয়সালা করার ব্যাপারটা ততই কঠিন হয়ে উঠবে। কিন্তু তুমি এসে গেছ যখন, তখন থাকতে পারো।'

করচাগিনকে এ-ধরনের অপমান এর আগে কখনও সইতে হয়নি। তার কপালে একটা ভাঁজ দেখা দিল।

'এত কেতা-কানুন কিসের জন্যে?' বিরক্ত হয়ে ঋমুতোভ বলে উঠতেই, করচাগিন হাতের ইশারায় তাকে থামিয়ে দিয়ে বসে পড়ল।

ঋমুতোভ তার বক্তব্য বলে চলল, 'আচ্ছা, আমি যেটা বলতে যাচ্ছিলাম : খদোরভ যে প্রাচীনপন্থী, সে-কথা ঠিক। কিন্তু শৃঙ্খলা রক্ষার ব্যাপারে কিছু-একটা করা দরকার। কমসমোল কর্মীরা সবাই যদি এমনি ড্রিল ভেঙে ফেলতে শুরু করে, তাহলে কী দিয়ে কাজকর্ম চালাব আমরা? আরও বড় কথা, পার্টির বাইরের কার কর্মীদের সামনে আমরা খুব খারাপ উদাহরণ উপস্থিত করছি। আমার মতে, ছেলটাকে শাসানি দেওয়া দরকার।'

তাকে শেষ করবার সুযোগ না দিয়েই, স্ভেতায়েভ আপত্তি তুলতে শুরু করল। দশ মিনিট কেটে গেল। ইতিমধ্যে পাভেল বুঝে নিয়েছে যে হাওয়াটা কোনদিকে বইছে। যখন চূড়ান্ত নিষ্পত্তির জন্য প্রস্তাবটাকে ভোট দেওয়া হবে, তখন সে দাঁড়িয়ে উঠে কিছু বলতে চাইল। অনিচ্ছার সঙ্গে তাকে বলার অনুমতি দিল স্ভেতায়েভ।

'কমরেডসব, আমি ফিদিনের ঘটনাটা সম্বন্ধে আমার মতামত আপনাদের জানাতে চাই,' শুরু করল পাভেল।

নিজের ইচ্ছার বিরুদ্ধেই তার গলার স্বরটা কর্কশ শোনাল।

‘ফিদিনের ঘটনাকে একটা লক্ষণ বলা যেতে পারে, এক্ষেত্রে শুধু কোস্তিয়ার অপরাধটা সবচেয়ে গুরুতর ব্যাপার নয়। আমি কাল গোটাকতক তথ্য সংগ্রহ করেছি।’ পকেট থেকে একটা নোটবই বের করল পাভেল। ‘কারখানার হাজিরা রাখে যে, তার কাছ থেকে আমি এই তথ্যগুলো পেয়েছি। বেশ মন দিয়ে শোনো : আমাদের কমসমোল সভ্যদের শতকরা তেইশ জন প্রতিদিন পাঁচ থেকে পনেরো মিনিট পর্যন্ত দেরিতে কাজে আসে। এটা একটা নিয়মে দাঁড়িয়ে গেছে। প্রতি মাসে শতকরা সতেরো জন একদিন বা দু’দিন করে আদৌ কাজে আসেই না। কমসমোলের বাইরেরকার তরুণ কর্মীদের মধ্যে কাজ-কামাইয়ের সংখ্যা শতকরা চোদ্দ। কমরেডসব, এই হিশেবগুলো যেন চাবুকের চেয়ে কড়া চাবকানি লাগাচ্ছে আমাদের। আরও কয়েকটা তথ্য আমি লিখে এনেছি : পার্টি-সভ্যদের মধ্যে শতকরা চারজন মাসে একদিন করে কামাই করে, আর শতকরা চারজন দেরি করে কাজে আসে। পার্টি-সভ্য নয় যারা, সেইসব বয়স্ক শ্রমিকদের মধ্যে শতকরা এগারো জন মাসে একদিন করে কামাই করে, আর শতকরা তেরো জন নিয়মিতভাবে দেরি করে কাজে আসে। যন্ত্রপাতির ভাঙচুর যা হয়, তার মধ্যে শতকরা নব্বুইটার জন্যে দায়ী তরুণ শ্রমিকরা—এদের মধ্যে শতকরা সাতজন নতুন কাজে ঢুকেছে। এইসব হিশেব থেকে এই সিদ্ধান্তেই আসতে হয় যে, পার্টি-সভ্য আর বয়স্ক শ্রমিকদের চেয়ে কমসমোলের তরুণ শ্রমিকদের কাজ অনেক খারাপ চলছে। কিন্তু অবস্থাটা সর্বত্রই একরকম নয়। ঢালাই বিভাগে কাজের হিশেব চমৎকার, ইলেকট্রিশিয়ানদের কাজও তেমন খারাপ নয়, কিন্তু বাদবাকিদের অবস্থা মোটামুটি একই। আমার মতে, কমরেড খমুতোভ শৃঙ্খলা সম্বন্ধে যা বলেছে, সেটা যা বলা উচিত তার একটা অতি সামান্য অংশ মাত্র। এইসব ঘোরপ্যাচগুলোকে সিধে করে দেওয়াই আমাদের আশ্রয় সমস্যা। এখানে বস্তুত দিয়ে আন্দোলন চালাবার ইচ্ছে আমার নেই। কিন্তু কাজে ঢিলেমি আর অমনোযোগিতা বন্ধ করতেই হবে আমাদের। পুরনো শ্রমিকরা খোলাখুলি স্বীকার করছে যে মালিকদের অধীনে, পুঞ্জিপতিদের অধীনে, তারা এর চেয়ে ঢের ভালো কাজ করত। এখন কিন্তু আমরাই মালিক, তাই খারাপভাবে কাজ করার সপক্ষে কোনো যুক্তিই নেই। কোস্তিয়া কিংবা আর-কোনো শ্রমিকের দোষটা ততটা নয়। দোষটা আমাদের সবার। কারণ, দোষত্রুটিগুলোকে দূর করার জন্যে ঠিকভাবে লড়াই না-চালিয়ে আমরা কোনো-কোনো ক্ষেত্রে কোস্তিয়ার মতো শ্রমিকদের একটা-না-একটা ছুতো ধরে পক্ষ সমর্থন করেছি।

‘সামোখিন আর বুতিলিয়াঙ্ক এইমাত্র এখানে বলেছে যে ফিদিন আমাদেরই ছেলে, সক্রিয় কমসমোল কর্মী, ইত্যাদি; একটা ড্রিল ভেঙে ফেলেছে, তাতে আর হয়েছে কী, অন্য যে-কোনো লোকের হাতেও তো ওটা ভাঙতে পারত; ও আমাদের একজন, কিন্তু ফোরম্যান তো তা নয়...কিন্তু খদেরভের সঙ্গে কেউ কখনও আলোচনা করেনি। সে সবসময় গজ্জগজ্জ করে বটে, কিন্তু তার ত্রিশ বছরের অভিজ্ঞতার কথাটা ভুলে যেও না! আজকে আমরা তার রাজনীতিক মতামত নিয়ে আলোচনা করব না। এই বিশেষ ক্ষেত্রে তার কাজটাকেই ঠিক বলব, কারণ, সে বাইরের লোক হয়েও রাষ্ট্রের সম্পত্তির দিকে নজর রেখেছে, আর আমরাই কিনা দামি দামি বিদেশী যন্ত্রপাতি ভাঙতে লেগে

গেছি। এ-ধরনের অবস্থাটাকে কী বলতে চাও তোমরা? আমি মনে করি, আমাদের একুনি প্রথম আঘাতটা হানা দরকার এবং কারখানায় কাজের এই গলতিটাকে বন্ধ করার জন্যে একুনি কোমর বেঁধে লাগা উচিত।

‘আমি প্রস্তাব করছি—কাজে টিলেমির জন্যে এবং উৎপাদনে বিশৃঙ্খলা সৃষ্টি করার জন্যে ফিদিনকে কমসমোল থেকে বের করে দেওয়া হোক। দেয়াল-পত্রিকায় তার ব্যাপারটা সম্বন্ধে আলোচনা হওয়া উচিত। আর, ফলাফলের কোনো ভয় না করে এই হিশাবগুলোও একটা সম্পাদকীয় প্রবন্ধে খোলাখুলি প্রকাশিত হওয়া উচিত। আমরা যথেষ্ট শক্তিশালী, নির্ভর করার মতো সমর্থন আমাদের পেছনে আছে। কমসমোল সভাদের অধিকাংশই ভালো কর্মী। এদের মধ্যে ষাটজন বোয়ার্‌কায় কাজ করে এসেছে এবং সেখানে তাদের প্রচুরকমের একটা পরীক্ষা হয়ে গেছে। এদের সাহায্যে আর সহযোগিতায় আমরা সমস্ত অসুবিধা দূর করতে পারি। শুধু গোটা ব্যাপারটার প্রতি আমাদের সমগ্র দৃষ্টিভঙ্গিটা একেবারে বরাবরের মতো বদলে ফেলতে হবে।’

করচাগিন সাধারণত শান্ত আর গভীর প্রকৃতির। কিন্তু এখন সে এমন উত্তেজিত হয়ে রুঢ়ভাবে কথাগুলো বলল যে স্ভেতায়েড বিস্মিত হয়ে গেল। আসল পাভেলকে সে এই প্রথম দেখল। পাভেল যে ঠিক বলেছে, সেটা উপলব্ধি করেছে সে, কিন্তু খোলাখুলি তার মতটাকে মেনে নেওয়ার ব্যাপারে সে বড় সাবধানী। করচাগিনের বক্তব্যটাকে স্ভেতায়েড সাধারণভাবে সাংগঠনিক অবস্থার একটা তীব্র সমালোচনা হিশেবে আর তার নিজের কর্তৃত্বকে খাটো করে দেখানোর চেষ্টা হিশেবেই ধরে নিল এবং তার প্রতিপক্ষকে তক্ষুনি জয় করবে বলে মনস্থ করল সে। মেনশেভিক খদোরভের পক্ষ সমর্থন করেছে বলে পাভেলের বিরুদ্ধে অভিযোগ তুলে সে তার বক্তব্য শুরু করল।

তর্কের ঝড় বয়ে গেল তিনঘণ্টা ধরে। সেদিন অনেক রাতে আলোচনা চূড়ান্ত পর্যায়ে পৌঁছল। তথ্যের অমোঘ যুক্তিতে পরাস্ত হয়ে, আর সংখ্যাগরিষ্ঠ অংশ করচাগিনের পক্ষে চলে যাচ্ছে দেখে, স্ভেতায়েড একটা ভুল করে বসল। চূড়ান্ত ভোট নেওয়ার ঠিক আগে করচাগিনকে ঘর ছেড়ে চলে যাবার নির্দেশ দিয়ে সে গণতান্ত্রিক নিয়মটাকে লঙ্ঘন করল।

‘আচ্ছা বেশ, আমি যাচ্ছি, যদিও তোমার ব্যবহারটা মোটেই তোমার পক্ষে বিশেষ গৌরবজনক নয় স্ভেতায়েড, তুমি যদি তোমার মতটাকে চালু রাখার জন্যে জেদ করতে থাকো, তাহলে তোমায় সাবধান করে দিচ্ছি—আমি কাল সাধারণ সভাদের সভায় সমস্ত ব্যাপারটা উপস্থিত করব এবং আমি নিশ্চয় জানি যে সেখানে তুমি অধিকাংশ ভোটে হেরে যাবে। তুমি ভুল করছ, স্ভেতায়েড। কমরেড খমুতোভ, আমার মনে হয় সাধারণ সভার আগে পার্টি-গ্রুপে তোমার এই আলোচনাটা তোলা উচিত।’

উদ্ধৃত ভঙ্গিতে চোঁচিয়ে উঠল স্ভেতায়েড, ‘ভয় দেখাতে এসো না আমাকে। আমি নিজেই পার্টি-গ্রুপের কাছে যেতে পারি—সেখানে তোমার সম্বন্ধেও আমার কিছু বলার আছে। নিজে যদি কাজ করতে না চাও, তাহলে যারা করেছে তাদের কাজে ব্যাঘাত সৃষ্টি করতে এসো না।’

বেরিয়ে এসে পাভেল দরজাটা বন্ধ করে দিল। গরম-হয়ে-ওঠা কপালটার ওপরে হাত বুলিয়ে নিয়ে ফাঁকা আপিসটা পার হয়ে বাইরে রাস্তায় এসে খোলা হাওয়ায় গভীর একটা নিশ্বাস নিল সে। একটা সিগারেট ধরিয়ে রওনা হল বাতিয়েভা পাহাড়ের দিকে, যেখানে ছোট একটা বাড়িতে তোকারেভ থাকে।

এসে দেখে, বৃদ্ধ মিস্ত্রি তখন খেতে বসেছে।

তোকারেভ পাভেলকে টেবিলে এসে বসবার আমন্ত্রণ জানিয়ে বলল, ‘এসো, খবর-টবর শোনা যাক। দারিয়া, ওকে এক বাটি জাউ এনে দাও।’

তোকারেভ যেমন ছোটখাটো রোগা মানুষটি, তার স্ত্রী দারিয়া ফমিনিচনা ঠিক তেমনিই লম্বাচওড়া আর মোটাসোটা। এক প্রেট কাউনের জাউ এনে পাভেলের সামনে রেখে শাদা অ্যাপ্রনের খুঁটে ভিজ্ঞে ঠোঁটদুটো মুছে নিয়ে সে সম্মেহে বলল, ‘খাও, বাবা।’

\*

\*

\*

তোকারেভ যখন মেরামত-কারখানায় কাজ করত, তখন পাভেল তার বাড়িতে প্রায়ই এসেছে, অনেক রাত অবধি কাটিয়েছে। কিন্তু শহরে ফিরে আসার পর এখানে সে এল এই প্রথম।

চামচ চালাতে চালাতে বৃদ্ধ মিস্ত্রিটি মন দিয়ে পাভেলের কাহিনীটা শুনে গেল, মাঝে মাঝে ঘোংঘোং শব্দ করা ছাড়া কোনো মন্তব্য করল না। জাউ শেষ করে রুমাল দিয়ে গৌফ মুছে ঝাঁকারি দিয়ে গলাটা সাফ করে নিল সে।

‘ঠিক কথাই বলেছ তুমি,’ বলল সে, ‘প্রশ্নটাকে ঠিকমতো তোলার সময় হয়েছে। এই জেলায় অন্য যে-কোনো উদ্যোগের চেয়ে এই কারখানায় মানুষের সংখ্যা বেশি, সুতরাং এখান থেকেই আমাদের শুরু করা উচিত। তাহলে, শেষপর্যন্ত স্বেচ্ছাসেবকের সঙ্গে তোমার খটাখটি বেধে গেছে, অ্যা? খুব খারাপ। ও ছেলেটার মেজাজ আছে বৈকি, কিন্তু তুমি তো সব ছেলেদের সঙ্গে বেশ মানিয়ে চলতে, তাই না? হ্যাঁ, ভালো কথা, কারখানায় তোমার কাজটা ঠিক কী?’

‘আমি একটা কর্মশালায় কাজ করছি, আর সাধারণভাবে যা যা হয় তার সবকিছুর মধ্যেই আমি থাকি। আমার নিজের সেলে আমি একটা রাজনীতিক পড়াশোনার ক্লাস নিই।’

‘আর, ব্যুরোয় কী করো?’

ইভস্তত করল করচাগিন।

‘শরীরটা সম্পূর্ণ সেরে না-ওঠা পর্যন্ত, আর কিছু পড়াশোনা করতে চাই বলে কিছুদিন ঠিক বিধিবদ্ধভাবে নেতৃত্বের ব্যাপারে কোনোরকম অংশ নেব না বলেই ভেবে রেখেছি।’

‘তাই বলো!’ আপত্তির সুরে বলে উঠল তোকারেভ, ‘শোনো বাপু, তোমার শরীরটা খারাপ না থাকলে একচোট ঝাড়তাম আমি তোমায়। আচ্ছা যাক, এখন কেমন বোধ করছ? একটু সেরে উঠেছ তো?’

‘হ্যাঁ।’

‘বেশ। তাহলে এবার মন দিয়ে কাজে লেগে যাও। আসল কাজটা এড়িয়ে গিয়ে এলোমেলো টুঁ-মারাটা বন্ধ করো। কোণঘেষে বসে থেকে কোনো লাভ হবে না। তুমি যে দায়িত্ব এড়িয়ে যাবার চেষ্টা করছ, তা যে-কেউ বলবে। কাল থেকেই তোমাকে সব ঠিকমতো গুছিয়ে ফেলার জন্যে লাগতে হবে। আমি এ-সম্বন্ধে গুকুনেভের সঙ্গে কথা বলব।’ তোকারেভের গলার স্বরে বিরক্তি ফুটে উঠল।

তাড়াতাড়ি আপত্তি জানাল পাভেল, ‘না, খুড়ো, ওকে কিছু বলার দরকার নেই। আমাকে কোনো কাজ না-দেবার জন্যে আমি নিজেই ওকে বলেছিলাম।’

তাচ্ছিল্যের চোটে হিসিয়ে উঠল তোকারেভ।

‘তুমি বললে, অ্যা, আর ও তোমাকে দিব্যি ছেড়ে দিল? তোমাদের এই কমসমোলীদের নিয়ে কী করা যায় বলো দিকি...কাজটা একটু পড়ে শোনাবে বাবা, আগে যেমন পড়ে শোনাতে? আমার চোখের আর তেমন জোর নেই।’

\*

\*

\*

কমসমোল ব্যারের অধিকাংশ সভ্যের সিদ্ধান্তটাকেই কারখানার পার্টি-ব্যুরো বহাল রাখল এবং কাজে শৃঙ্খলার গুরুত্বপূর্ণ আর আয়াসসাধ্য কাজে দৃষ্টান্ত স্থাপন করার জন্য পার্টির আর কমসমোলের দলগুলো উঠেপড়ে লাগল। ব্যারের সভায় সভেভায়েভের কড়া সমালোচনা করা হল। প্রথম দিকটায় সে একটু ফোঁসফোঁস করার চেষ্টা করেছিল, কিন্তু সম্পাদক লপাখিনের কাছে কোণঠাসা হয়ে সমালোচনাটুকু মেনে নিয়ে সে নিজের ভুল কিছুটা স্বীকার করল। বয়েস হয়েছে লপাখিনের, মোমের মতো বিবর্ণ তার গায়ের রঙ দেখে বোঝা যায় যে ভেতরে ভেতরে সে যন্ত্রায় ক্ষয়ে যাচ্ছে।

পরের দিন দেয়াল-পত্রিকাগুলোয় কতকগুলো প্রবন্ধ প্রকাশিত হবার ফলে রেল-কারখানায় বেশ চাঞ্চল্য সৃষ্টি হল। চাঁচিয়ে চাঁচিয়ে পড়ল সবাই লেখাগুলো, দারুণ আলোচনা হল তাই নিয়ে। সেদিন সন্ধ্যায় যে তরুণকর্মীদের সভা ডাকা হয়েছিল, তাতে উপস্থিতির সংখ্যা অসাধারণ রকম বেশি দেখা গেল। দেয়াল-পত্রিকার প্রবন্ধে যেসব সমস্যার কথা তোলা হয়েছিল, সেই সভায় কেবল তাই নিয়েই আলোচনা হল।

ফিদিনকে কমসমোল থেকে বহিস্কার করে দেওয়া হল এবং রাজনীতিক শিক্ষার ভার দিয়ে একজন নতুন সভ্যকে ব্যুরোয় নেওয়া হল—করচাগিন।

এই নতুন অবস্থায় রেল-কারখানার কর্মীদের সামনে যে-নতুন কর্তব্যগুলি দেখা দিয়েছে, সে-সম্বন্ধে নেতৃদানভ যখন একটা ছক দিয়ে গেল, তখন নিস্তব্ধতার মধ্যে হলঘরসুদূর সবাই তা মনোযোগের সঙ্গে শুনল; সভা সাধারণত এত নিস্তব্ধ থাকে না।

সভার শেষে বাইরে এসে সভেভায়েভ দেখে করচাগিন তারই অপেক্ষায় দাঁড়িয়ে আছে।

পাভেল বলল, ‘চলো একসঙ্গে যাই, কিছু কথা আছে তোমার সঙ্গে।’

‘কী সম্বন্ধে?’ একটু রুদ্ধভাবে জিজ্ঞেস করল সভেভায়েভ। পাভেল তার হাত ধরে কয়েক গজ এসে থামল একটা বেঞ্চির কাছে।

‘একটু বসা যাক এখানে, কেমন?’ বলে সে নিজেই আগে বসে পড়ল।



স্বেতায়েভের সিগারেটের জ্বলন্ত মুখটা মাঝে মাঝে লাল দীপ্তিতে উজ্জ্বল হয়ে উঠছে, মাঝে মাঝে নিভন্ত হয়ে আসছে।

‘আমার বিরুদ্ধে তোমার অভিযোগটা কী, স্বেতায়েভ?’

দু-এক মিনিট নিস্তব্ধতা।

‘ও, এই ব্যাপার? আমি ভেবেছিলাম তুমি কোনো কাজের কথা বলতে চাও,’ বিশ্বয়ের ভান করে বলল স্বেতায়েভ, কিন্তু তার গলাটা কঁপে গেল।

পাভেল তার হাঁটুটা চেপে ধরল দৃঢ় হাতে।

‘উচুপালে ভাবটা ছাড়ো, দিম্কা। ও-ধরনের কথা কূটনীতিকদের মুখেই শোভা পায়। এইটে শুধু বলো দিকি : তুমি আমাকে এত অপছন্দ করো কেন?’

অস্বস্তির সঙ্গে নড়েচড়ে বসল স্বেতায়েভ।

‘কী বলতে চাও তুমি? তোমার বিরুদ্ধে আমার অভিযোগ কী থাকতে পারে? আমি নিজেই তো তোমাকে কাজ করার জন্যে বলেছিলাম নাকি? তুমি রাজি হলে না, আর এখন আমি তোমাকে কাজে ঢুকতে দিইনি বলে আমার ওপরেই দোষ চাপাচ্ছ?’

কিন্তু, তার এই কথার মধ্যে কোনো অকপটতা ছিল না। তাই স্বেতায়েভের হাঁটুর ওপরে হাতখানা রেখেই পাভেল আবেগের সঙ্গে বলল, ‘তুমি যদি না বলো তাহলে আমি বলছি কথটা : তুমি ভাবছ আমি তোমার পথের কাঁটা, তুমি ভাবছ আমি তোমার পদ কেড়ে নিতে চাই। তা যদি না-ভাবতে, তাহলে কোস্তিয়া ফিদিনের ব্যাপারটা নিয়ে আমাদের ঝগড়া বাধত না। নিজেদের মধ্যে এ-ধরনের সম্পর্কের ফলে আমাদের সমস্ত কাজকর্মে ক্ষতি হয়। এটা যদি শুধু আমাদের দু’জনের মধ্যে একটা ব্যাপার হত, তাহলে কিছুমাত্র এসে যেত না—আমার সম্বন্ধে তুমি কী ভাবছ, তা আমি গ্রাহ্য করতাম না। কিন্তু কাল থেকে আমরা একসঙ্গে কাজ করব। এভাবে আমরা কাজ চালাব কী করে? শোনো : আমাদের মধ্যে কোনোরকম মনোমালিন্য থাকলে চলবে না। আমরা দু’জনেই মেহনতি মানুষ। যে-আদর্শের জন্যে আমরা দু’জনেই লড়াই, সেই আদর্শই যদি তোমার কাছে আর সবকিছুর চেয়ে বড় হয়, তাহলে নিশ্চয়ই তুমি আমার দিকে তোমার হাত বাড়িয়ে দেবে, আর কাল থেকেই তাহলে আমরা বন্ধু হিসেবে কাজে লেগে যেতে পারব। কিন্তু যতক্ষণ পর্যন্ত তুমি এইসব আজেবাজে ধারণা তোমার মাথা থেকে না-তাড়াচ্ছ এবং প্যাচ-কষা ছেড়ে সোজা পথে না আসছ, ততক্ষণ পর্যন্ত কাজের ক্ষেত্রে যতবার অসুবিধা দেখা দেবে ততবারই আমরা দু’জন কামড়াকামড়ি করব। এখনও তোমার প্রতি আমার বন্ধুত্ব বজায় থাকতে থাকতে এই আমি আমার হাত বাড়িয়ে ধরছি তোমার দিকে, ধরো।’

স্বেতায়েভের গাঁট-ধরা আঙুলগুলো যখন তার হাতখানা চেপে ধরল, তখন গভীর একটা পরিভ্রমের অনুভূতিতে ভরে উঠল পাভেলের সমস্ত মন।

\*

\*

\*

এক সপ্তাহ কেটে গেছে। সেদিনকার মতো পার্টির জেলা কমিটিতে কাজকর্ম শেষ হয়ে আসছে। দপ্তর-ঘরগুলো নিস্তব্ধ। কিন্তু তোকারেভ তখনও তার ডেস্কের সামনে বসে আছে। চেয়ারে বসে সে সাম্প্রতিক রিপোর্টগুলো পড়ছে, এমন সময়ে দরজায় ঠুকঠুক আওয়াজ হল।

‘ভেতরে এসো!’

ভেতরে ঢুকে করচাগিন সম্পাদকের ডেস্কে রাখল ভর্তি-করা দুটো প্রশ্নমালার ফরম।

‘এটা কী?’

‘দায়িত্বহীনতাকে চুকিয়ে দেবার জন্যে এটা করা হয়েছে, খুড়ো। মনে হয় এটা করার সময়ও হয়েছে। তোমারও যদি তাই মনে হয়, তাহলে তোমার সমর্থন পেলে আমি কৃতজ্ঞ হব।’

শিরোনামটার দিকে একনজর দেখে নিয়ে এই ভরুশক্তিটির দিকে তাকাল তোকারেভ। তারপর কলমটা তুলে নিল সে। যেখানে লেখা রয়েছে—‘রাশিয়ার কমিউনিস্ট (বলশেভিক) পার্টির সভাপদপ্রার্থী হিশেবে পাভেল আন্দ্রেয়েভিচ করচাগিনকে যেসব কমরেড সুপারিশ করছেন, তাঁরা পার্টিতে কতদিন ধরে আছেন’—সেইখানটায় তোকারেভ দৃঢ়হাতে ‘১৯০৩ সাল’ লিখে নিজের নাম সই করে দিল।

‘এই নাও, বাবা। আমি জানি, তুমি কোনোদিন আমার এই বুড়ো পাকাচুলঅলা মাথার ওপরে লজ্জার বোঝা চাপাবে না।’

\*

\*

\*

গুমটে নিশ্বাস বন্ধ হয়ে আসছে ঘরের মধ্যে। সবার মনেই একটি চিন্তা সবচেয়ে বেশি ঘোরাফেরা করছে : যত তাড়াতাড়ি পারা যায় সলোমেন্কার বাদামগাছের শীতল ছায়ায় গিয়ে আশ্রয় নিতে হবে।

স্ভেভায়েভ অনুনয় জ্ঞানাল, ‘শেষ করে দাও, পাভকা। এই গরম আর একমুহূর্তও সহ্য করতে পারছি না।’ দারুণ ঘাম ঝরছে তার সর্বাঙ্গ দিয়ে। কাতিউশা এবং অন্য সবাই স্ভেভায়েভকে সমর্থন করল। পাভেল বইটা বন্ধ করে দিতেই পড়াশোনার বৈঠকটা ভেঙে গেল।

একসঙ্গে সবাই উঠে দাঁড়ানোর সঙ্গে সঙ্গে দেয়ালে লটকানো পুরনো ধাঁচের এরিক্সন-টেলিফোনের বাস্রটার মধ্যে থেকে ঝনঝন আওয়াজ উঠল। ঘরের মধ্যে টেচামেচির রোল ছাপিয়ে উঁচুপর্দায় গলা চড়িয়ে জবাব দিতে হল স্ভেভায়েভকে, যাতে অপরগ্রাস্তে তার গলা শোনা যায়।

রিসিভারটা ঝুলিয়ে রেখে করচাগিনের দিকে ফিরল সে।

‘পোলিশ দূতস্থানের দুটো কূটনীতিক রেল-কামরা দাঁড়িয়ে আছে স্টেশনে। কামরাদুটোর আলো নিভে গেছে—তারের কী একটা গোলমাল হয়েছে। একঘণ্টার মধ্যে ট্রেনটা ছেড়ে যাবে। যন্ত্রপাতি জোগাড় করে নিয়ে ওখানে চট করে চলে যাও, পাভেল। জরুরি ব্যাপার।’

এক-নম্বর প্র্যাট্‌ফর্মে দাঁড়িয়ে আছে আন্তর্জাতিক ট্রেনের কামরাদুটো। চকচকে পেতলের হাতলে আর জানলার কাছে ঝকঝক করছে গাড়িখানা। চণ্ডা জানলাঅলা সেলুন-কামরাটা আলোয় উজ্জ্বল। কিন্তু পাশের কামরাটা অন্ধকার।

এই জাঁকজমকের কামরাটায় ঢোকার উদ্দেশ্যে সিঁড়ি বেয়ে উঠে পাভেল হাতলটা চেপে ধরতেই স্টেশনের দেয়াল-ঘেঁষে দাঁড়িয়ে-থাকা একটা মূর্তি তাড়াতাড়ি এগিয়ে এসে তার কাঁধে হাত রাখল।

‘কোথায় যাচ্ছেন, মশাই?’

গলার স্বরটা চেনা। ঘুরে দাঁড়িয়ে পাভেল তাকাল চামড়ার কোর্তা-পরা, চওড়া কানঅলা টুপি মাথায়, সরু আঁকশির মতো নাকঅলা মানুষটার দিকে। তার চোখে সন্দেহভরা দৃষ্টি।

লোকটি আরতিউষ্মিন। পাভেলকে সে চিনতে পারেনি প্রথমে। কিন্তু তার হাতখানা নেমে গেল পাভেলের কাঁধ থেকে আর তার মুখের ওপর থেকে গাষ্টিয়টুকু কেটে গেল—যদিও যন্ত্রপাতির বাস্তবতার ওপরে সপ্রশ্ন দৃষ্টিতে তাকিয়ে রইল সে। তার গলার স্বরে কেতাদুরস্ত ভাবটা আরেকটু কমিয়ে এনে জিজ্ঞেস করল সে, ‘যাচ্ছ কোথায়?’

সংক্ষেপে তাকে তার উদ্দেশ্য জানাল পাভেল। গাড়িটার পেছনদিক থেকে আরেকটা মূর্তি এগিয়ে এল।

‘আচ্ছা, এক সেকেন্ড। আমি এদের কভাষ্টিরকে ডেকে আনছি।’

কভাষ্টিরের পেছনে গাড়ির মধ্যে ঢুকে পাভেল দেখে, সেলুন-কামরাটায় দামি দামি ভ্রাম্যমাণের পোশাক-পরা জনকতক লোক বসে আছে। রেশমের কাপড়ে ঢাকা একটা টেবিলের কাছে একজন মেয়ে বসে আছে দরজার দিকে পেছন ফিরে। পাভেল যখন ঢুকল, তখন সে সামনে-দাঁড়ানো একজন লম্বা অফিসারের সঙ্গে কথা বলছিল। ইলেকট্রিশিয়ানটি আসতেই তারা কথা বন্ধ করল।

তারের যোগাযোগটা দ্রুত পরীক্ষা করে নিল করচাগিন—এখানকার শেষ বাতিটা থেকে কামরার বারান্দাটার দিকে চলে গেছে তারটা। এখানে সেটা ঠিক আছে দেখে নিয়ে কোথায় গুগোলটা হয়েছে খুঁজে বের করার জন্য বেরিয়ে এল সে। তাকে পায়-পায়ে অনুসরণ করে ফিরছে গাট্টাগোট্টা আর ষাঁড়ের মতো ঘাড়অলা কভাষ্টিরটি। পোলিশ ঈগল-আঁকা বড় বড় পেতলের বোতাম-লাগানো উর্দি গায়ে লোকটাকে খুব জাঁকালো দেখাচ্ছে।

‘পরের কামরাটা দেখা যাক, এখানে তো সব ঠিক আছে। গোলমালটা নিশ্চয়ই বেধেছে ওই কামরাটায়।’

দরজার চাবিটা ঘোরাল কভাষ্টির এবং দু’জনে তারা বেরিয়ে এল কামরার অন্ধকার বারান্দাটায়। তারের উপর দিয়ে বিজ্জলিবাতির আলোটা ফেলতে ফেলতে এগিয়ে এসে পাভেল অন্ধকারের মধ্যেই তারটা যেখানে পুড়ে গেছে সেই জায়গাটা পেয়ে গেল। কিছুক্ষণের মধ্যেই কামরার বারান্দার প্রথম আলোটা জ্বলে উঠে জায়গাটাকে ভরে তুলল অনতিউজ্জ্বল আলোয়।

করচাগিন তার সঙ্গে লোকটিকে বলল, ‘কামরার ভেতরকার বাল্বগুলো বদলাতে হবে। পুড়ে গেছে গুলো।’

‘তাহলে আমাকে একবার ওই মহিলাটিকে ডাকতে হবে, ওঁর কাছে চাবি আছে।’ ইলেকট্রিশিয়ানটিকে এখানে একা রেখে যাবার ইচ্ছে না-থাকায় সে তাকে সঙ্গে আসতে বলল।

মেয়েটি প্রথমে ঢুকল কামরায়, তারপরে পাভেল। ঢোকান পথটা জুড়ে দাঁড়িয়ে রইল কভাষ্টির। ভ্রমণের উপযোগী চটকদার চামড়ার ব্যাগ, বসবার জায়গাটার ওপরে অযতনে পড়ে-থাকা সিল্কের জোকা, সুগন্ধির শিশি আর জানলার পাশে টেবিলের

ওপরে রাখা ছোট্ট পাউডারের কৌটা লক্ষ করল পাভেল। গদি-আঁটা আসনের এককোণে বসল মেয়েটি, শণ-রঙের চুলগুলো নাড়াচাড়া করে নিয়ে ইলেকট্রিশিয়ানের কাজ লক্ষ করতে লাগল সে।

কভাষ্টরটি অত্যন্ত বিনম্রভাবে বলল, 'ম্যাডাম, যদি আমাকে মুহূর্তের জন্যে যেতে অনুমতি দেন। মেজর একটু ঠাণ্ডা বিয়ার চেয়েছেন।' ঘাড়ের মতো ঘাড়টা নোয়াবার সময় বেশ একটু কষ্ট করতে হল তাকে।

কৃত্রিম সুরেলা গলায় বলল মেয়েটি, 'যেতে পারেন।'

কথাবার্তা হল পোলিশ-ভাষায়।

কামরার বারান্দাটা থেকে একফালি আলো এসে পড়েছে মেয়েটার কাঁধে। প্যারিসের সবচেয়ে ভালো দর্জীদের হাতে বানানো সূক্ষ্ম রেশমি গাউনটায় তার কাঁধ আর হাতদুটো ঢাকা পড়েনি। কমনীয় তার কর্ণপুট-দুটিতে হীরের দুটি বিন্দু জ্বলে-জ্বলে উঠছে। করচাগিন শুধু তার গজদস্তের মতো শুভ্র একটা কাঁধ আর বাহু দেখতে পাচ্ছিল। মুখটা অন্ধকারে। দ্রুত স্কু-ড্রাইভারটা ঘুরিয়ে ঘুরিয়ে পাভেল কামরার ছাদের বাল্‌বটা বদলে দিতেই একমুহূর্তের মধ্যে ভেতরের আলোগুলো জ্বলে উঠল। এখন তাকে শুধু একবার অন্য বাল্‌বটা পরীক্ষা করে দেখতে হবে—ওটা আটকানো রয়েছে সোফার ওপরে যেখানে মেয়েটি বসে রয়েছে তারই মাথায়।

মেয়েটির সামনে এসে দাঁড়িয়ে বলল করচাগিন, 'এই বাল্‌বটা একবার আমার পরীক্ষা করা দরকার।'

খাঁটি রাশিয়ান ভাষায় উত্তর দিল মহিলাটি 'ও, হ্যাঁ, আমি পথ আটকে রেখেছি।' হালকাভাবে উঠেপড়ে সে করচাগিনের পাশে কাছাকাছি দাঁড়িয়ে রইল। এবারে পাভেল তাকে সম্পূর্ণভাবে দেখতে পেল। চোখের বাঁকা ভুরু আর অবজ্রায়-ভরা চোঁটদুটো পাভেলের পরিচিত। কোনো সন্দেহ নেই : নেলি লেচিনস্কায়া, সেই উকিলের মেয়েটা। পাভেলের বিশ্বয়ভরা চাউনিটা নেলি লক্ষ না-করে পারল না। কিন্তু পাভেল তাকে চিনতে পারলেও, এই ইলেকট্রিশিয়ান ছেলেটিই-যে তার সেই এককালের ডানপিটে প্রতিবেশী, সেটা নেলির পক্ষে বুঝে-ওঠা সম্ভব নয়—কারণ, পাভেলের চেহারা এই চার বছরে অনেকখানি বদলে গেছে।

পাভেলের বিশ্বয়ভরা চাউনি দেখে বিরক্তিতে ভুরু কুঁচকে নেলি কামরাটার দরজার কাছে এগিয়ে গেল, দাঁড়িয়ে পড়ে অধৈর্যের সঙ্গে তার পেটেন্ট-চামড়ার জুতোর গোড়ালিটা ঠুকতে লাগল। দ্বিতীয় বাল্‌বটার দিকে মনোযোগ দিল পাভেল। প্যাঁচ ঘুরিয়ে খুলে নিয়ে সেটাকে আলোর দিকে তুলে ধরে পোলিশ-ভাষায় জিজ্ঞেস করে বসল, 'ভিক্টরও এই গাড়িতে আছে নাকি?'

মাথাটা না-ঘুরিয়েই প্রশ্ন করেছিল পাভেল। নেলির মুখটা দেখতে পায়নি সে। কিন্তু প্রশ্নটা করার পর অনেকক্ষণ পর্যন্ত যে সে নিরুত্তর হয়ে রইল, তার থেকেই নেলির বিমূঢ়তাটুকু বোঝা গেল।

'কেন, আপনি তাকে চেনেন নাকি?'

'হ্যাঁ, খুব ভালো করেই চিনি। আমরা পড়শী ছিলাম যে।' মুখটা ফিরিয়ে পাভেল তাকাল তার দিকে।

‘আপনি...আপনি পাভেল, আমাদের ওই...’ হতবুদ্ধি হয়ে থেমে গেল নেলি।

‘...রাধুনির ছেলে,’ তাকে খেই ধরিয়ে দিল করচাগিন।

‘কিন্তু কত বড় হয়ে গেছেন আপনি! আমি আপনাকে যখন দেখেছিলাম, তখন তো আপনি ছিলেন একটা দুর্দান্ত ছোঁড়া!’

অসংকোচে তার আপাদমস্তক লক্ষ করল নেলি।

‘ভিক্টরের কথা জিজ্ঞেস করছেন কেন? আমার যতদূর মনে পড়ছে—তার সঙ্গে আপনার ঠিক বন্ধুত্ব ছিল বলা যায় না,’ সুরেলা গলায় বলল নেলি। পাভেলের সঙ্গে তার এই অপ্রত্যাশিতভাবে দেখা হয়ে যাবার ফলে এই একঘেয়েমির মধ্যে কিছুক্ষণের মতো একটু মুখরোচক বৈচিত্র্যের স্বাদ পাবে বলে আশা জেগেছে নেলির মনে।

ছুটা দ্রুত বসে গেল দেয়ালের গায়ে।

‘ভিক্টরের একটা দেনা আছে আমার কাছে, এখনও সেটা শোধ দেয়নি সে। দেখা হলে তাকে বলে দেবেন, হিশেবটা চুকিয়ে নেবার আশা আমি ছাড়িনি।’

‘আপনার পাওনাটা কত বলুন তো, আমিই নাহয় ভিক্টরের হয়ে মিটিয়ে দিচ্ছি।’

করচাগিন যে কোন দেনার কথা বলছে, তা নেলি খুব ভালো করেই জানে। পের্থলিউরা-শাস্ত্রীদের নিয়ে ঘটনাটা নেলি জানত। কিন্তু এই ইতরটাকে নিয়ে মজা করার লোভ সে সামলাতে পারল না।

কোনো উত্তর দিল না করচাগিন।

‘আচ্ছা, আমাদের বাড়িতে নাকি লুটপাট হয়ে গেছে, সব ভেঙেচুরে পড়েছে, সত্যি নাকি? কুজ্জটা আর ফুলের কেয়ারিগুলো সব তছনছ করে দিয়েছে নিশ্চয়ই?’ জিজ্ঞেস করল নেলি বিষণ্ণ গলায়।

‘ও-বাড়িটা এখন আর আপনাদের নয়, আমাদের। আর, আমাদের নিজেদের জিনিশ আমরা নিজেরা নষ্ট করব—এমন সম্ভাবনা নেই।’

বিদ্রূপের সঙ্গে অল্প একটু হেসে উঠল নেলি।

‘হ্যাঁ, শিক্ষাটা তো বেশ ভালোই হয়েছে দেখছি! তা প্রসঙ্গক্রমে বলতে পারি, এই গাড়িটা পোলিশ মিশনের, আমি হচ্ছি এখানকার কন্স্ট্রাক্টর আর আপনি চাকর মাত্র—আগেও যেমন ছিলেন। দেখতেই পাচ্ছেন, আপনি আলোটা ঠিক করে দেবার জন্যে ঝাটছেন, যাতে কিনা আমি আরাম করে ওই সোফাটায় শুয়ে বই পড়তে পারি। আপনার মা আমাদের কাপড়চোপড় কাচত আর আপনি জ্বল বয়ে দিতেন। ঠিক সেই একই অবস্থার মধ্যে আবার আমাদের দেখা হয়ে গেল।’

বিদ্রূপ-ভরা একটা জয়ের সুর ধ্বনিত হল তার গলায়। ছুরিটা দিয়ে তারের ওপরকার রবারের আস্তরণটা চটে তুলে পাভেল মেয়েটির দিকে সুস্পষ্ট ঘৃণার দৃষ্টিতে তাকাল।

‘আপনার জন্যে হলে আমি একটা মরচে-ধরা পেরেকও ঠুকতে যেতাম না। কিন্তু যেহেতু বুর্জোয়ারা কূটনীতিক বলে একটা জিনিশ উদ্ভাবন করেছে, তাই আমরাও খেলাটা চালিয়ে যাচ্ছি। আমরা তাদের মাথা কেটে ফেলি না—এমনকি, আমরা বাস্তবিকপক্ষে তাদের সঙ্গে ভদ্র ব্যবহারই করে থাকি, যেটা আপনাদের কাছ থেকে মোটেই আশা করা যায় না।’

নেলির গালদুটো লাল হয়ে উঠল।

‘ওয়ারশ যদি দখল করে নিতে পারতেন, তাহলে আমাকে নিয়ে কী করতেন আপনি? বোধহয় খেঁতলে কিমা বানিয়ে ফেলতেন, কিংবা হয়তো আমাকে আপনার উপপত্নী হিসেবে রাখতেন?’

দরজাটায় কমণীয় ভঙ্গিতে দাঁড়িয়ে আছে নেলি। তার কোমল টিকলো নাক মৃদু মৃদু কাঁপছে—বোঝা যায়, ও নাকের সঙ্গে কোকেন-এর পরিচয় আছে। সোফার ওপরে আলোটা জ্বলে উঠল। খাড়া হয়ে দাঁড়াল পাভেল।

‘তাকে? তোদের মতো লোকদের মারার জন্যে মাথা ঘামাতে যাবে কে! আমাদের কিছু করতে হবে না, কোকেন টানার ফলেই তুই মারা পড়বি। আর, উপপত্নী হিসেবেও তুই কারও পক্ষে গ্রহণযোগ্য নোস।’

যন্ত্রপাতির বাস্তুটা ভুলে নিয়ে দরজার দিকে এগিয়ে এল সে। তাকে যেতে দেবার জন্য সেরে দাঁড়াল নেলি। পাভেল যখন কামরার বারান্দাটার শেষে এসে পড়েছে, তখন পেছনদিকে তীব্রস্বরে নেলিকে গালাগাল দিয়ে উঠতে শুনল সে : ‘হতভাগা বলশেভিক!’

\*

\*

\*

পরের দিন বিকেলে লাইব্রেরিতে যাবার পথে পাভেলের সঙ্গে কাতিউশা জেলেনোভার দেখা। পাভেলের জামার হাতাটা তার ছোট্ট হাতে চেপে ধরে কাতিউশা হাসতে হাসতে পাভেলের পথ রুখে দাঁড়াল।

‘কোথায় ছুটে চলেছ, রাজনীতিক আর জ্ঞানবুড়ো?’

‘লাইব্রেরিতে যাচ্ছি খুড়ী, সরো, যেতে দাও,’ তারই মতো কৌতুকভরা গলায় জবাব দিল পাভেল। মৃদুভাবে তার কাঁধ চেপে ধরে তাকে পাশে সরিয়ে দিল পাভেল। ঝাঁকানি দিয়ে নিজেকে তার হাত থেকে ছাড়িয়ে নিয়ে কাতিউশা তার পাশাপাশি হাঁটতে থাকল।

‘শোনো, পাভুলুশা! দিনরাত তোমার পড়াশোনা করা চলবে না। বলছিলাম কী—আজ রাতে চলো একটা পার্টিতে যাই। জিনা গ্রাদিশ-এর ওখানে আসবে সবাই। মেয়েরা প্রায়ই আমাকে বলে তোমাকে নিয়ে আসবার জন্যে। কিন্তু তুমি তো আজকাল রাজনীতি ছাড়া আর কিছুই ভাবো না দেখি। মাঝে মাঝে একটু আমোদ-টামোদ কি একেবারেই করতে চাও না? এক-আধবার পড়াশোনা বাদ দেওয়াটা ভালোই হবে তোমার পক্ষে,’ পাভেলকে প্রলুব্ধ করার চেষ্টা করল কাতিউশা।

‘কী ধরনের পার্টি? কী করব সেখানে গিয়ে?’

‘কী করব সেখানে গিয়ে!’ টিটকিরি দিয়ে হেসে উঠল কাতিউশা। ‘প্রার্থনার শ্লোক উচ্চারণ করব না নিশ্চয়ই, একটু মজা জমিয়ে সময় কাটাব আর কী। তুমি না অ্যাকর্ডিয়ন বাজাতে পারো? আমি একবারও তোমার বাজনা শুনিনি। আজ সন্ধ্যায় এসে আমাদের বাজিয়ে শোনাও, কেমন? আমার জন্যেই নাহয় বাজালে একবার। জিনার মামার একটা অ্যাকর্ডিয়ন আছে, কিন্তু একদম বাজাতে পারে না সে। মেয়েদের ভারি আগ্রহ তোমার স্বন্ধে, কিন্তু তুমি তো বইয়ের পোকা একটা। কমসমোল সভ্যদের আমোদ-আহ্লাদ করতে নেই—এ-কথা কে বলেছে তোমায়? এসো

বলছি, তা নইলে তোমাকে রাজি করাতে গিয়ে এমন রাগ ধরে যাবে যে ঝগড়া বাধিয়ে দিয়ে একমাস কথা বলব না তোমার সঙ্গে ।

বাড়িঘর রঙ করে কাতিয়া—ভালো কমরেড সে, প্রথম সারির কমসমোল কর্মী । পাভেল তার মনে আঘাত দিতে চায় না বলেই রাজি হয়ে গেল, যদিও ওই ধরনের আসরে গিয়ে অস্বস্তিবোধ করে সে, বেজায়গায় এসে পড়ছে বলে মনে হয় তার ।

ইঞ্জিন-ড্রাইভার গ্লাদিশ-এর বাড়িতে একদল তরুণ-তরুণী ভিড় জমিয়ে তুলে গোলমাল শুরু করে দিয়েছে । বড়রা আরেকটা ঘরে চলে এসেছে । ছোট বাগানটার সামনে বারান্দাঅলা বড়ঘরের মধ্যে গোটা পনেরো ছেলেমেয়ে । বাগানের পথ বেয়ে কাতিউশা যখন পাভেলকে সঙ্গে নিয়ে বারান্দায় এসে উঠল, তখন ‘পায়রাদের খাওয়ানো’ নামে একটা খেলা চলছিল । বারান্দার মাঝখানে পিঠাপিঠি দুটো চেয়ার বসানো । গৃহকর্ত্রী খেলাটা পরিচালনা করছে—তার ডাকে একটি ছেলে আর একটি মেয়ে এসে চেয়ারদুটোয় বসেছে পরস্পরের দিকে পেছন ফিরে । সে যেই বলছে : ‘এবার পায়রাদের খাওয়াও!’ অমনি ছেলেমেয়ে-দুটি পেছনদিকে মাথা হেলিয়ে সবাইকার সামনে পরস্পরের ঠোঁটে ঠোঁট লাগিয়ে চুমু খাচ্ছে । এর পরে ওরা খেলা শুরু করল—‘আঙটি’ আর ‘ডাকপেয়াদা’—দুটোই চুমো-খাওয়ার খেলা, যদিও এই শেষের খেলাটায় খেলোয়াড়রা আলোয় উজ্জ্বল বারান্দায় প্রকাশ্যে চুমো-খাওয়াটা এড়িয়ে গিয়ে আলো-নেভানো ঘরের মধ্যে ঢুকে চুমো খাচ্ছে । যারা এইসব খেলায় বিশেষ উৎসাহী নয়, তাদের জন্য এককোণে ছোট্ট একটা গোল টেবিলের উপর রাখা আছে নানারকম ফুলের ছবি-আঁকা এক-প্যাকেট তাস—এই তাসের খেলাটাকে বলে ‘ফুল-পিরিতি’ । পাভেলের পাশ থেকে একটি মেয়ে এগিয়ে এল—বছর-ষোলো বয়েস, চোখের রঙ হালকা নীল, নাম বলে জানাল নিজের পরিচয়—মুরা; চটুল চোখে পাভেলের দিকে একনজর তাকিয়ে তার হাতে একটা তাস তুলে দিয়ে নিচুগলায় বলল, ‘ভায়েলেট ফুল’ ।

কয়েক বছর আগে পাভেল এই ধরনের পার্টিতে উপস্থিত থেকেছে এবং এসব চপলতায় সরাসরি যোগ না দিলেও সে এগুলোকে সাধারণ ব্যাপার বলেই মনে করে এসেছে । কিন্তু এখন সে মফস্বল শহরের এইসব পেটিবুর্জোয়াসুলভ হালচাল থেকে নিজেকে একেবারেই বিচ্ছিন্ন করে ফেলেছে, তাই আজকের এই পার্টিটা তার কাছে ন্যাকারজনক আর নিতান্তই হাস্যকর বলে মনে হল ।

কিন্তু তা সত্ত্বেও, আপাতত তার হাতে ধরা রয়েছে ওই ‘ফুল-পিরিতি’র তাসখানা । ভায়েলেট ফুলের উল্টোদিকে তাসখানার গায়ে লেখা আছে : ‘আপনাকে আমার ভারি ভালো লাগে ।’

মেয়েটির দিকে তাকাল পাভেল । বিন্দুমাত্র সংকোচ না করে সে পাল্টা তাকিয়ে রইল পাভেলের দিকে ।

‘কেন?’

কেমন যেন ভোঁতা শোনাগ পাভেলের প্রশ্নটা । কিন্তু খেলার নিয়ম অনুসারে মুরার উত্তরও তৈরি আছে ।

‘গোলাপফুল’, বলে সে তার হাতে আরেকটা তাস তুলে দিল ।

গোলাপফুল-আঁকা তাসটার গায়ে লেখা আছে : ‘আপনিই আমার আদর্শ’। পাভেল মেয়েটির দিকে ফিরে গলার স্বরটাকে নরম শোনাবার চেষ্টা করে জিজ্ঞেস করল, ‘এইসব বাজ্জে ব্যাপারের মধ্যে কেন যাও?’

মুরা এমন অপ্রস্তুত হয়ে গেল যে সে কী বলবে ভেবে পেল না।

অভিমানের ভঙ্গিতে ঠোঁট ফুলিয়ে সে জিজ্ঞেস করল, ‘আমার এই স্বীকৃতি কি আপনার ভালো লাগল না?’

প্রশ্নটার কোনো উত্তর দিল না পাভেল। কিন্তু এই মেয়েটির সম্বন্ধে আরও জানার আগ্রহ জেগেছে তার মনে। কতকগুলো প্রশ্ন করল সে মেয়েটিকে। বেশ আগ্রহের সঙ্গেই উত্তর দিল মুরা। কয়েক মিনিটের মধ্যেই পাভেল জেনে ফেলেছে যে সে মাধ্যমিক স্কুলে লেখাপড়া করছে, তার বাবা মেরামত-কারখানায় কাজ করে, পাভেলকে সে অনেকদিন ধরে জানে এবং তার সঙ্গে আলাপ করার ইচ্ছেও ছিল তার।

‘তোমার পদবিটা কী?’ জিজ্ঞেস করল পাভেল।

‘ভলিন্সেভা।’

‘তোমার ভাই তো ডিপোর একটি বিভাগীয় কমসমোল সেলের সম্পাদক, না?’

‘হ্যাঁ।’

পাভেল স্পষ্টই দেখতে পেল—এই জেলার কমসমোল কর্মীদের মধ্যে যারা সবচেয়ে কর্মঠ, ভলিন্সেভা তাদের একজন হওয়া সত্ত্বেও, নিজের বোনটিকে একটি অজ্ঞ আর নিতান্ত হালকা স্বভাবের মেয়ে হিসেবে সে বেড়ে উঠতে দিচ্ছে। গত একবছর ধরে মুরা তার বন্ধুবান্ধবীদের সঙ্গে এই ধরনের পার্টিতে এসে অসংখ্যবার এরকম চুমো-খাওয়া-খেলায় যোগ দিয়েছে। মুরা জানাল, সে তার ভাইয়ের ওখানে কয়েকবার পাভেলকে দেখেছে।

মুরা বুঝতে পেরেছে যে পাভেল তার হালচালকে ঠিক সমর্থন করছে না। তাই তার যখন খেলায় ডাক পড়ল, তখন পাভেল করচাগিনের মুখে উপহাসের হাসিটা লক্ষ করে মুরা ‘পায়রাদের খাওয়ানো’র জন্য আসতে সরাসরি অস্বীকার করে বসল।

কয়েক মিনিট বসে বসে কথাবার্তা বলল ওরা দু’জনে, মুরা তার নিজের সম্বন্ধে আরও খবরাখবর জানাল। তারপর জেলেনোভা এগিয়ে এল ওদের দিকে।

‘আকর্ডিয়নটা এনে দেব?’ জিজ্ঞেস করেই মুরার দিকে দুটুমিভরা চোখে একনজর তাকিয়ে নিয়ে সে বলল, ‘তোমরা দু’জনে খাতির জমিয়ে ফেলেছ দেখছি?’

পাভেল নিজের পাশে কতিউশাকে বসিয়ে চারদিকে যে গোলমাল আর হাসাহাসির রোল উঠেছে তারই অজুহাতে বলল, ‘আজ্ঞ আর বাজাব না, থাক। আমি আর মুরা চলি।’

‘ওহ্ হো! তুমি তাহলে পটেছ ওর সঙ্গে?’ ঠাট্টা করল জেলেনোভা।

‘হ্যাঁ, তাই। আচ্ছা কতিউশা, এখানে আমরা ছাড়া আর কোনো কমসমোল সভ্য আছে কিনা বলো তো? নাকি, শুধু আমরাই এই ‘পায়রা খাওয়ানো’ ব্যাপারে জড়িয়ে পড়েছি?’

‘এসব বাজ্জে ব্যাপারে আর না,’ বলল কতিউশা পাভেলকে শাস্ত করার উদ্দেশ্যে, ‘এবার নাচব আমরা।’

উঠে দাঁড়াল পাভেল।

‘আচ্ছা বেশ, তাহলে নাচো তোমরা। মুরা আর আমি চললাম কিন্তু।’



আন্না বোরহাট একদিন বিকেলের দিকে ওকুনেভের ঘরে এসে দেখে পাভেল সেখানে একা রয়েছে।

‘খুব ব্যস্ত আছ নাকি, পাভেল? শহর সোভিয়েতের সভায় চলো না? আমি ঠিক একা যেতে চাচ্ছি না, বিশেষ করে ফিরতে রাত হবে বলেই।’

পাভেল তৎক্ষণাৎ রাজি হল। বিছানার ওপরে পেরেকে ঝোলানো তার মাউজার-পিস্তল নিতে গিয়ে, বড় ভারী হবে বলে পাভেল সেটা না-নিতেই মনস্থ করল। তার বদলে দেরাজটার ভেতরে থেকে ওকুনেভের পিস্তলটা বের করে পকেটে গুঁজে নিল। ওকুনেভের জন্য একটা চিরকুট লিখে রেখে চাবিটা একটা আগে-স্থির-করা জায়গায় রেখে দিল।

খিয়েটার-বাড়িতে যেখানে সভা বসেছে, সেখানে এসে পানক্রাতভ আর ওলগা ইউরেনেভার সঙ্গে ওদের দেখা হল। হলঘরের মধ্যে সবাই একসঙ্গে বসল, সভার কাজের বিরতির সময়ে দল বেঁধে তারা ঘুরে বেড়াল সামনের ময়দানে। আন্না যা ভেবেছিল তাই—সভা শেষ হল অনেক রাত্রিতে।

ওলগা জিজ্ঞেস করল, ‘রাত্রিটা বরং আমার এখানেই থেকে যাও! অনেক রাত হয়ে গেছে, যেতেও তো হবে বহু দূর।’

কিন্তু আন্না রাজি হল না। ‘পাভেল আমাকে বাড়ি পৌঁছে দেবে বলেছে,’ বলল সে।

পানক্রাতভ আর ওলগা বড় রাস্তা ধরে রওনা হয়ে গেল, আর ওরা দু’জনে চলল সলোমেন্কার চড়াই রাস্তাটা ধরে।

অন্ধকার, গুমোট রাত্রি। সভায় যোগ দিতে এসেছিল যারা, তারা যখন বিভিন্ন রাস্তা বেয়ে বাড়িমুখো রওনা হল, তখন গোটা শহরটা ঘুমিয়ে পড়েছে। তাদের কথাবার্তা আর পায়ের শব্দ ক্রমশ মিলিয়ে গেল। শহরের কেন্দ্র থেকে দূরের পথে আন্না আর পাভেল দ্রুতপায়ে হেঁটে চলেছে। বাজারের জায়গায় একজন টহলদার পাহারাঅলা তাদের থামিয়ে কাগজপত্র পরীক্ষা করে তারপর যেতে দিল। দু-ধারে গাছের সারি বসানো চওড়া রাস্তাটা পার হয়ে তারা এসে পড়ল একটা অন্ধকার নিস্তব্ধ রাস্তায়, যেটা চলে গেছে একটা ফাঁকা জমির উপর দিয়ে। বাঁয়ে ঘুরে তারা দু’জনে চলল রেলের বড় ওদামবাড়িগুলোর সমান্তরাল সড়কটা বেয়ে—রাস্তার পাশে সার বেঁধে দাঁড়িয়ে আছে কংক্রিটের লম্বা বিষণ্ণ বিদ্যুটে চেহারার ওদামবাড়িগুলো। কিসের যেন একটা অস্পষ্ট আশঙ্কায় ভরে উঠেছে আন্নার মন। উদ্ভিগ্ন-চোখে অন্ধকার ভেদ করে তাকিয়ে দেখবার চেষ্টা করছে সে, সঙ্গীর প্রশ্নের উত্তরে ঘাবড়ে-যাওয়া গলায় ভাঙা-ভাঙা জবাব দিচ্ছে। ভয়ঙ্কর একটা ছায়াকে যখন লক্ষ করে দেখা গেল যে সেটা টেলিফোনের একটা খুঁটি মাত্র, তার চেয়ে ভয়ানক কিছু নয়, তখন জোরে হেসে উঠল আন্না, পাভেলকে তার মানসিক উদ্বেগের কথাটা খুলে বলল। পাভেলের বাহটা চেপে ধরল সে, তার কাঁধে চাপ পড়ায় ভরসা বোধ করল।

‘মোটো বাইশ বছর বয়েস আমার, কিন্তু বুড়ির মতো স্নায়বিক উত্তেজনায় ভুগি আমি। আমাকে ভিড় বলে ভাবলে কিন্তু তোমার ভুল হবে। কিন্তু আজ রাতে আমার

স্নায়ুগুলো সব কেমন যেন টানটান হয়ে আছে। অবশ্য তুমি সঙ্গে থাকতে আমার নিজেকে দিবা নিরাপদ বলে মনে হচ্ছে। সত্যি ভয় পাচ্ছি বলে লজ্জা হচ্ছে আমার।’

সত্যিই, রাত্রির অন্ধকার, জায়গাটার নির্জনতা আর এইমাত্র সভায় শুনে-আসা আগের রাতে শহরতলীর একটা বীভৎস হত্যার ঘটনা আন্নার মনে যে-আতঙ্ক জাগিয়ে তুলেছিল, সেটা পাভেলের ধীর শাস্ত ভাব দেখে কেটে গেল—জ্বলন্ত সিগারেটের আভায় পাভেলের মুখের একটা পাশ একমুহূর্তের জন্য আলোকিত হয়ে উঠল, তার চোখের ভুরুদুটোর বলিষ্ঠ বাঁকা টান দেখে সাহস পেল আন্না।

মাল-ওদামের বাড়িগুলো পেছনে পড়ে গেছে। ছোট একটা নদীর উপর দিয়ে সাঁকোটা পার হয়ে ওরা সড়কটা ধরে এসে পড়ল রেললাইনের বাঁধের নিচে সুড়ঙ্গটার কাছাকাছি, যেটা শহরের এই দিকটার সঙ্গে রেলওয়ে অঞ্চলের যোগসূত্র।

এতক্ষণে ওদের ডানদিকে অনেক পেছনে পড়ে গেছে রেলস্টেশনের বাড়িগুলো। সুড়ঙ্গটা এসে পড়েছে একটা কানা গলিতে, ডিপোর ওদিকে। ওরা দু’জনে পরিচিত জায়গায় এসে পড়েছে ইতিমধ্যেই।

রেললাইনের গায়ে দূরে অন্ধকারে দপদপ করছে সিগন্যাল-সংকেতের রঙিন আলোগুলো, ডিপোর পাশে একটা শান্টিং ইঞ্জিন রাত্রির মতো ডিপোয় ফিরে যাবার পথে ক্লান্ত নিশ্বাস ছাড়ছে।

সুড়ঙ্গের মুখটার উপরে মরচে-ধরা আঁকশির গায়ে ঝুলছে রাস্তার আলোটা। বাতাসে দুলছে সেটা অল্প অল্প, তার ঘোলাটে হলদে আলোটা সুড়ঙ্গের এ-দেয়াল থেকে ও-দেয়ালে সরে-সরে যাচ্ছে।

সুড়ঙ্গের মুখটা থেকে গজ-দশেক দূরে সড়কটার পাশে ছোট একটা নিঃসঙ্গ কুটির। দু’বছর আগে একটা বিরাট গোলা এসে ওটার গায়ে লেগে ভেতরটা একেবারে জ্বালিয়ে পুড়িয়ে দিয়েছে, ধসে পড়েছে সামনের অংশটা, ফলে এখন কুটিরখানা একটা বিরাট গর্তের মতো হাঁ করে দাঁড়িয়ে আছে, পথের ধারে ভিখিরি যেমন দাঁড়িয়ে থাকে তার অঙ্গহানির প্রদর্শনী খুলে। বাঁধের উপর দিয়ে সশব্দে একটা ট্রেন বেরিয়ে গেল।

স্বস্তির নিশ্বাস ছেড়ে আন্না বলল, ‘এবার প্রায় বাড়ি পৌঁছে গেছি আমরা।’

পাভেল আলগোছে নিজের বাহটা ছাড়িয়ে নেবার একবার চেষ্টা করল। সড়কটার কাছাকাছি চলে আসতে নিজের অজান্তেই বান্ধবীর বন্ধন থেকে হাতটা ছাড়িয়ে নেওয়ার ইচ্ছে হচ্ছিল তার।

কিন্তু আন্না ছাড়ল না তার হাত।

ভেঙে-পড়া বাড়িটাকে ছাড়িয়ে এল তারা।

হঠাৎ একটা হুড়মুড় শব্দ হল তাদের পেছনে—ছুটে-চলা পায়ের শব্দ, ঘোংঘোং নিশ্বাসের শব্দ।

পাভেল একটা ঝাঁকুনি দিল হাতটা ছাড়িয়ে নেবার জন্য কিন্তু ভয়ে কাঁঠ হয়ে গিয়ে আন্না প্রাণপণে চেপে ধরেছে তাকে। পাভেল যখন জোর করে হাতটা ছিনিয়ে নিল, তখন বড্ড দেরি হয়ে গেছে। সাঁড়াশির মতো একটা চাপে আটকা পড়ে গেছে তার ঘাড়টা। আর একমুহূর্ত পরে একটা পাক খেয়ে তাকে ঘুরে দাঁড়াতে হল

আক্রমণকারীর মুখোমুখি। সেই হাতটা উঠে এসেছে পাভেলের গলার ওপরে, শার্টের কলারটা এমনভাবে মুচড়ে ধরেছে যাতে তার প্রায় দম বন্ধ হয়ে এসেছে, চেপে ধরে দাঁড় করিয়ে রেখেছে তাকে একটা পিস্তলের নলের মুখোমুখি, চোখের ওপরে পিস্তলের নলটা ধীরে ধীরে ঘুরে যাচ্ছে।

অতিমানুষিক একটা স্নায়বিক উত্তেজনার সঙ্গে পাভেলের চোখদুটো সম্মোহিতভাবে পিস্তলের নলটার ঘুরে-যাওয়াটাকে অনুসরণ করছে। ওই নলটার ফাঁক দিয়ে মৃত্যু চেয়ে আছে তার দিকে, কিন্তু নিজের চোখদুটোকে ওখান থেকে সরিয়ে নেবার মতো শক্তি তার নেই। শেষ মুহূর্তটির জন্য অপেক্ষা করছে সে। কিন্তু আক্রমণকারীটা গুলি করল না। বিস্ফারিত চোখে পাভেল ডাকাতটার মুখখানা দেখল—বিরাট মাথা, ভারী চোয়াল, গৌফ আর না-কামানো দাড়ির কালো ছায়া। কিন্তু টুপিটার চওড়া বেড়ের নিচে তার চোখদুটো দেখা যাচ্ছে না।

পাভেল আড়চোখে একনজর আন্নার খড়ির মতো শাদা মুখখানার দিকে তাকিয়ে দেখল—তাকে ততক্ষণে আক্রমণকারীদের তিনজনের মধ্যে একজন কুটিরটার দেয়ালে হাঁ-করা গর্তের দিকে হিচড়ে নিয়ে চলেছে। নির্মমভাবে তার হাতদুটো মুচড়ে ধরে লোকটা তাকে মাটিতে ফেলে দিল। আরেকটা কালো মূর্তি লাফিয়ে এগিয়ে এল তাদের দিকে। পাভেল শুধু সুড়ঙ্গের গায়ে তার ছায়াটা দেখতে পেল। পেছনে ভাঙা বাড়িটার মধ্যে ধস্তাধস্তির শব্দ শুনতে পেল সে। বেপরোয়া হয়ে যুঝছে আন্না—মুখের মধ্যে একটা টুপি ঠুঁজে দিতেই দমবন্ধ হয়ে আসা তার চিৎকারটা হঠাৎ থেমে গেল। বিরাট মাথাঅলা যে-দুর্বৃত্ত পাভেলকে সম্পূর্ণ আয়ত্ত্বের মধ্যে এনে ফেলেছে, সে আন্নার ওপরে ধর্ষণের জায়গাটায় যেতে চাইল—জানোয়ার যেমন তার শিকারের দিকে এগিয়ে যায়। স্পষ্ট বোঝা গেল—এই লোকটাই দলের সর্দার এবং এই অবস্থায় নিষ্ক্রিয় দর্শকের ভূমিকাটা ঠিক তাকে সাজে না। এই-যে ছোঁড়াটাকে সে কাবু করে রেখেছে, ওটা একটা আনাড়ি মাত্র, দেখে মনে হয় ওই ‘ডিপোর চ্যাংড়া’দের একটা। ওরকম একটা পোঁটা-নাক বাচ্চার কাছ থেকে ভয় পাবার কিছু নেই। ‘ওটার মাথার ওপরে বেশ গোটাকতক গোস্তা বসিয়ে দিয়ে ওই মাঠটার উপর দিয়ে কেটে পড়তে বললেই পেছনদিকে একবারও না-তাকিয়ে ও শহর পর্যন্ত গোটা পথটা ছুটে চলে যাবে,’ ভাবল ডাকাতটা।

পাভেলকে চেপে-ধরা মুঠোটায় ঢিল দিয়ে সে বলল, ‘পা চালা হে, এই!... যে-পথে এসেছিলি সেইদিকে কেটে পড়, কিন্তু খবরদার, চোঁচালেই একটি গুলি গিয়ে চুকবে মাথায়।’

পাভেলের কপালের ওপরে পিস্তলের নলটাকে চেপে ধরল সে।

‘যা, দৌড়ে পালা!’ কর্কশ স্বরে ফিসফিসিয়ে বলে পিস্তলটা নামিয়ে নিল সে, যাতে ছেলোটা পেছনদিক থেকে পিঠে গুলি এসে বিধবে বলে ভয় না পায়।

টলতে টলতে পিছু হটে গেল পাভেল, আক্রমণকারীর ওপরে চোখ রেখে পাশ ফিরে দৌড়াতে লাগল সে।

দুর্বৃত্তটা ভাবল যে সে গুলি করবে বলে ছোঁড়াটা এখনও ভয় পাচ্ছে, তখন সে ঘুরে দাঁড়িয়ে ভাঙা বাড়িটার দিকে এগিয়ে গেল।

পাভেলের হাতখানা মুহূর্তের মধ্যে ঢুকে গেল তার পকেটের মধ্যে। খুব দ্রুত কাজ সারতে হবে তাকে! ঘুরে দাঁড়াল সে, বাঁ হাতখানা টান করে বাড়িয়ে ধরল, দ্রুত নিশানা ঠিক করে নিয়েই গুলি ছুড়ল।

ডাকাতটা যখন নিজের ভুল বুঝতে পারল, তখন বড় দেরি হয়ে গেছে। হাতখানা ভুলবার আগেই গুলিটা তার পাশ ফুঁড়ে বিধে গেছে।

গুলির ধাক্কায় একটা গোষ্ঠানির শব্দ করে লোকটা সুড়ঙ্গের দেয়ালের গায়ে হুমড়ি খেয়ে পড়ে গেল, দেয়ালটা আঁকড়ে ধরবার চেষ্টা করতে করতে মাটিতে পড়ল সে। বাড়িটার মধ্যে থেকে একটা ছায়া বেরিয়ে এসে নিচে নালিটার দিকে ছুটে গেল। তার দিকে ধাওয়া করে পাভেল আরেকটা গুলি ছুড়ল। দ্বিতীয় একটা ছায়া নিচু হয়ে গুঁড়ি মেরে একদৌড়ে ছুটে গেল সুড়ঙ্গটার নিবিড় অন্ধকারের মধ্যে। গুলির আওয়াজ হল আর-একটা। দেয়ালের গা থেকে গুলি লেগে ঝরে-পড়া কংক্রিটের ধুলোয় আচ্ছন্ন হয়ে কালোমূর্তিটা একপাশে লাফিয়ে পড়ে অন্ধকারের মধ্যে অদৃশ্য হয়ে গেল। আরেকবার ব্রাউনিং-পিস্তলের আওয়াজে রাত্রির নিস্তব্ধতা খানখান হয়ে গেল। দেয়ালের গায়ে বিরাট মাথাঅলা সেই ডাকাতটার দেহ মৃত্যুযজ্ঞগায় মোচড় খাচ্ছে।

আন্না কে তুলে ধরে দাঁড় করিয়ে দিল পাভেল। বিহ্বল হয়ে পড়েছে আন্না; বিপদটা কেটে গেছে বলে বিশ্বাস করতে পারছে না সে—বিস্ফারিত চোখে চেয়ে আছে ডাকাতটার দেহের খিচুনির দিকে।

পাভেল তাকে সুড়ঙ্গের উপরকার আলোর বৃত্তটার বাইরে অন্ধকারের দিকে ধরে নিয়ে এসে ফিরে চলল শহরের দিকে। রেলস্টেশনের দিকে যখন তারা ছুটে চলেছে, তখন সুড়ঙ্গের কাছে বাঁধটার ওপরে গোটাকতক আলো মিটমিট করছে, রেললাইনের উপর দিয়ে একটা রাইফেলের গুলির আওয়াজ ভেসে এল।

\*

\*

\*

আন্নার ঘরে এসে যখন তারা পৌঁছল, তখন বাতিয়েভা পাহাড়ে কোথাও মোরগ ডাকছে। আন্না শুয়ে পড়ল বিছানায়। পাশের টেবিলে বসে পাভেল সিগারেট টানতে টানতে উপরদিকে উঠে-যাওয়া ধোঁয়ার কুণ্ডলীগুলো লক্ষ্য করছে...এই নিয়ে জীবনে চারবার সে মানুষ খুন করল।

সাহস বলে কোনো জিনিশ আছে নাকি—অবাক হয়ে ভাবছে সে—এমন জিনিশ যা সবসময়ে একেবারে নিখুঁতভাবে প্রকাশ পায়? ঘটনাটার সমস্ত অনুভূতিগুলিকে মনে-মনে আরেকবার অনুভব করে নিয়ে সে স্বীকার করল যে পিস্তলের নলটার ভয়ঙ্কর কালো চোখটা যখন তার দিকে তাকিয়ে ছিল, তখন সেই প্রথম কয়েক মুহূর্তের জন্যে তার হৃৎপিণ্ডটাকে হিমশীতল মুঠোয় চেপে ধরেছিল আতঙ্ক। আর, ঐ-যে ছায়ামূর্তি দুটো পালিয়ে যেতে পারল, সেটা কি শুধুই তার দুর্বল দৃষ্টিশক্তির জন্য, আর তাকে বাঁ-হাতে গুলি করতে হয়েছে বলেই? না। ওই কয়েক পা দূর থেকে তার লক্ষ্যভ্রষ্ট হবার কথা নয়। স্নায়বিক উত্তেজনার ফলে আর তাড়াতাড়ি করতে গিয়েই তার হাত কেঁপে গেছে—এই দুটোই ঘাবড়ে যাবার লক্ষণ।

টেবিল-ল্যাম্পটার আলো পড়েছে তার মুখে। তাকে লক্ষ করতে করতে আন্থা তার মুখে প্রত্যেকটি অদলবদল লক্ষ করছে। পাভেলের চোখের দৃষ্টি শান্ত, শুধু ভুরুর কুঁচকানিতে তার মনের একাগ্রতা ফুটে উঠেছে।

‘কী ভাবছ, পাভেল?’

আলোর বৃন্তের বাইরে ধোঁয়াটা যেমন মিলিয়ে যাচ্ছে, ঠিক তেমনি এই আকস্মিক প্রশ্নে তার চিন্তার সূত্রটা ছিঁড়ে গেল এবং প্রথমেই যে-কথাটা তার মাথায় এল সেইটেই সে বলল, ‘একবার কম্যাড্যান্টের দপ্তরে যেতে হবে আমাকে। এই ব্যাপারটা এখনি রিপোর্ট করা দরকার।’

ভয়ানক একটা ক্লাস্তির চেতনায় সে অনিচ্ছার সঙ্গে উঠে দাঁড়াল।

একলা থাকার চিন্তায় একটু আড়ষ্ট হয়ে পড়ল আন্থা, পাভেলের হাতখানা চেপে ধরে রইল সে। তারপরে দরজা পর্যন্ত তাকে এগিয়ে দিয়ে, রাত্রির অন্ধকারে সে মিলিয়ে না-যাওয়া পর্যন্ত চৌকাঠের উপর দাঁড়িয়ে রইল। এখন বড় আত্মীয় হয়ে উঠল পাভেল তার কাছে।

রেলওয়ের পাহারাঅলারা এই খুনের ব্যাপারটা নিয়ে ধাঁধায় পড়ে গিয়েছিল, পাভেল করচাগিনের রিপোর্ট পাবার পর সমস্ত ঘটনাটা পরিষ্কার হয়ে গেল। মৃতদেহটাকে ‘মড়ামাথা ফিম্কা’ নামে একজন কুখ্যাত বদমাইশের বলে শনাক্ত করা গেল, লোকটা দীর্ঘকাল জেল-খাটা একজন খুনী ডাকাত।

সুড়ঙ্গের কাছের ওই ঘটনাটা নিয়ে পরের দিন সবাই বলাবলি করতে লেগে গেল। এদিকে পাভেল আর স্ভেতায়েভের মধ্যে একটা অপ্রত্যাশিত সংঘর্ষের কারণ হয়ে দাঁড়াল ঘটনাটা।

শিফ্টের মাঝখানে কর্মশালায় এসে স্ভেতায়েভ পাভেল করচাগিনকে একবার বাইরে আসতে বলল। নিঃশব্দে সে পাভেলকে পথ দেখিয়ে নিয়ে এল বারান্দার দূর প্রান্তের এককোণে। দারুণ রকম উত্তেজিত হয়ে উঠেছে সে, কীভাবে কথাটা পাড়বে ভেবে পাচ্ছে না। শেষপর্যন্ত সে হঠাৎ বলে উঠল, ‘কাল কী ঘটেছিল বলো।’

‘তুমি তো জানোই।’

অস্বস্তির সঙ্গে কাঁধ-ঝাঁকুনি দিল স্ভেতায়েভ। সুড়ঙ্গের ঘটনাটা সম্বন্ধে স্ভেতায়েভের যে আর সবার চেয়ে বেশি আগ্রহ থাকতে পারে, পাভেল তা জানত না। বাইরের দিক থেকে সে যতই ঔদাসীন্য দেখাক, আন্থা বোরহাট-এর প্রতি এই কামার-ছেলেটির মনে একটা গভীর আকর্ষণ জন্মেছে, তা সে জানত না। মেয়েটির প্রতি-যে সে একাই আকৃষ্ট, তা নয়, কিন্তু সে ভীষণ অভিভূত হয়ে পড়েছে। কিছুক্ষণ আগেই লাগুতিনা তাকে গত রাত্রে সুড়ঙ্গের ঘটনাটার কথা বলেছিল। শোনার পর থেকেই সে একটি জ্বাবাব না-পাওয়া প্রশ্নের যন্ত্রণায় মনে-মনে জর্জরিত হচ্ছে। পাভেলের কাছে সে সরাসরি প্রশ্নটা তুলতে পারছে না, অথচ উত্তরটা তার জানাই চাই। তার চেতনার খোঁচায় সে বুঝতে পারল যে তার এই প্রশ্নটা হীন আর স্বার্থপ্রণোদিত, কিন্তু তার মনের মধ্যে যেসব বিরোধী আবেগের সংঘাত চলেছে, সেই সংঘাতে বর্বর আর আদিম মানুষটিই জয়ী হল।

‘শোনো, করচাগিন,’ চাপা গলায় বলল সে, ‘এটা শুধু তোমার-আমার মধ্যে। আমি জানি, আন্থার কথা ভেবেই তুমি এ-সম্বন্ধে কিছু বলতে চাইবে না, কিন্তু তুমি নিশ্চয়ই

আমাকে বিশ্বাস করতে পারো। আমাকে শুধু বলো, তোমাকে যখন ডাকাতটা পিস্তল ধরে আটকে রেখেছিল তখন অন্য দু'জন আন্নার ওপরে বলাৎকার করেছে কিনা?' বিমূঢ়তায় আচ্ছন্ন হয়ে গিয়ে সে কথাটা শেষ করবার আগেই চোখ ফিরিয়ে নিল।

অস্পষ্টভাবে ক্রমশ করচাগিন বুঝতে থাকল—স্ভেতায়েডকে পীড়িত করছে কোন প্রশ্নটা। 'আন্নার জন্যে যদি ওর কিছুমাত্র ভাবনা না-থাকত, তাহলে ও এতটা বিহ্বল হয়ে পড়ত না। কিন্তু আন্না'কে যদি ও ভালোবাসেই, তাহলে...' ভাবতে ভাবতে পাভেল আন্নার হয়ে অপমানিত বোধ করল।

'এ-কথা জিজ্ঞেস করছ কেন?'

স্ভেতায়েড জড়িয়ে কতকগুলো অসংলগ্ন কথা বলল। তার আসল প্রশ্নটা যে পাভেল বুঝতে পেরেছে, সেটা অনুভব করে সে চটে উঠল। বলল, 'আমাকে পাশটা প্রশ্ন করে পাশ কেটে বেরিয়ে যাবার চেষ্টা কোরো না। আমি শুধু সরাসরি জবাব চাই।'

'আন্না'কে ভালোবাসো তুমি?'

অনেকক্ষণ চুপ করে থাকার পর জোর করে নিজেকে দিয়ে বলল স্ভেতায়েড 'হ্যাঁ।' চেষ্টা করে রাগটাকে চেপে গিয়ে করচাগিন ঘুরে দাঁড়িয়ে চলে গেল বারান্দা বেয়ে, একবারও পেছন ফিরে তাকাল না।

\*

\*

\*

একদিন রাত্রে দিকে ওকুনেভ তার বন্ধুর বিছানাটার আশেপাশে অনিশ্চিতভাবে কিছুক্ষণ ঘোরাফেরা করার পর শেষপর্যন্ত একধারে বসে পড়ে পাভেল যে-বইটা পড়ছিল, সেটার ওপরে হাতখানা রাখল।

'শোন, পাভলুশা, একটা কথা বলে মনের বোঝাটা নামিয়ে ফেলতে চাই। একদিক থেকে অবশ্য এটাকে তেমন গুরুতর বলে মনে না হতে পারে, কিন্তু আরেক দিক থেকে আবার ব্যাপারটা সম্পূর্ণ অন্যরকম। তালিয়া লাগুতিনা আর আমার মধ্যে একটা কাণ্ড ঘটেছে। বুঝলি কিনা, প্রথম প্রথম আমার ওকে বেশ ভালো লাগত।' ওকুনেভ বোকার মতো মাথাটা চুলকোতে থাকল, কিন্তু বন্ধুর মুখে হাসির চিহ্নমাত্র নেই দেখে, ভরসা পেয়ে সে বলে চলল, 'কিন্তু তারপরে, তালিয়া...মানে বুঝতেই পারছি। আচ্ছা যাক, অতসব খুঁটিনাটি বলার দরকার নেই, ওসব না-বললেও ব্যাপারটা বেশ বোঝা যায়। আমি আর তালিয়া একসঙ্গে থাকব বলে গতকাল ঠিক করেছি, দেখা যাক কেমন চলে। আমার বয়েস বাইশ বছর, আমরা দু'জনেই সাবালক। আমরা দু'জনে সমান সমান অধিকারের ভিত্তিতে সংসার পাততে চাই। কী মনে হয় তোর?'

প্রশ্নটা একটু ভেবে দেখল পাভেল।

'আমি আর কী বলব, কোলিয়া? তোমরা দু'জনেই আমার বন্ধু, একই গোষ্ঠীভুক্ত, আর সবকিছুতেই তোমাদের পরস্পরের মধ্যে মিল আছে। তালিয়া ভারী চমৎকার মেয়ে। সবকিছু বেশ বোঝা যায়।'

পরের দিন করচাগিন শ্রমিকদের হোস্টেলে এসে উঠল এবং আরও দিনকতক বাদে তালিয়া লাগুতিনা আর নিকোলাই ওকুনেভের সম্মানে আন্না বোরহাট একটা পার্টি দিল—কমিউনিষ্ট ছেলেমেয়েদের অনাড়ম্বর পার্টি, তাতে পান-ভোজনের ব্যবস্থা নেই।

পরস্পরে মিলে অতীতদিনের স্মৃতিমুছন করে আর প্রিয় লেখকের বই থেকে জায়গা-বিশেষ পড়ে-গুনে কাটল সন্ধেটা। অনেকগুলো গান গাইল তারা, সুন্দর গাইল সবাই। প্রাণমাতানো সুর অনেকদূর পর্যন্ত প্রতিধ্বনিত হয়ে ফিরল। তারপরে কাতিউশা জেলেনোভা আর ভলিনসেভা একটা অ্যাকর্ডিয়ন নিয়ে এল—মোটো তারের খাদের মসৃণ আওয়াজের সঙ্গে মিহি তারের রূপোলি ঝঙ্কার মিশে গিয়ে সুরের লহরি ঘর ভরিয়ে তুলল। সেদিন সন্ধ্যে পাভেল অন্যদিনের চেয়েও ভালো অ্যাকর্ডিয়ন বাজাল। আর, সবার খুশির মধ্যে পানক্রাতভ যখন তার বিরাট দেহটা নিয়ে নাচতে শুরু করে দিল, তখন পাভেল অ্যাকর্ডিয়ন বাজানোর নতুন-শেখা ভঙ্গিটা ভুলে গিয়ে আগেকার উচ্ছ্বাসের সঙ্গে বাজানো আরম্ভ করল :

রাস্তা, আমার রাস্তা রে!  
 দেনিকিন সেথা খাস্তা রে,  
 আহা, সাইবেরিয়ার 'চেকা'য়  
 সেথা খতম করল কলচাকে হায়!

অতীতদিনের গান গেয়ে উঠল তার অ্যাকর্ডিয়ন, সেই আঙনে সব দিনগুলোর গান, আর আজকের মৈত্রী আর সংগ্রাম আর আনন্দের গান। কিন্তু তারপরে যখন যন্ত্রটা ভলিনসেভকে এগিয়ে দেওয়া হল আর সে ঘূর্ণি-মাতানো 'ইয়াব্লোচকো' নাচের হৃন্দ বাজাতে শুরু করে দিল, তখন করচাগিন সবাইকে অবাক করে উদ্দাম ট্যাপ নাচ জুড়ে দিল—জীবনে এই তৃতীয় এবং শেষবারের মতো নাচল সে।

### চতুর্থ অধ্যায়

এখানে সীমাস্ত। মৌন শত্রুতায় মুখোমুখি দাঁড়িয়ে আছে দুটো খুঁটি, প্রত্যেকটা দাঁড়িয়েছে তার নিজস্ব জগতের স্বপক্ষে। একটা খুঁটি চাঁচাছোলা, পালিশ করা। পাহারাদার পুলিশের চৌকির গায়ে যেমন থাকে তেমন শাদায়-কালোয় রঙ-করা, মাথার ওপরে শক্ত শক্ত পেরেক ঠুকে আটকানো একটা এক-মাথাঅলা ঈগল পাখি : দুই পাখা ছড়িয়ে, ডোরাকাটা খুঁটিটা ধাবা দিয়ে চেপে, বাকানো ঠোঁট সামনের দিকে তীক্ষ্ণভাবে বাড়িয়ে ধরে শিকারি পাখিটা বিচ্ছেদভরা চোখে তাকিয়ে আছে উল্টোদিকে—খুঁটিটার গায়ে আটকানো ঢালাই-করা লোহার বর্মের ওপরে খোদাই-করা কাস্তে-হাতুড়ির চিহ্নটার দিকে। ভারী, গোল, ওক-কাঠের এই খুঁটিটা মাটির বুকে শক্ত করে গেড়ে-বসানো। খুঁটিদুটো পোতা আছে সমতল জমির বুকে পরস্পর থেকে পনেরো ফুট দূরে, কিন্তু এই দুটো খুঁটির মধ্যে গভীর একটা ব্যবধান—দুই জগতের ব্যবধান। প্রাণের ঝুঁকি না নিয়ে এদের মাঝখানকার এই ছ'পা জমির ব্যবধান পার হওয়া যাবে না।

সীমাস্ত।

কৃষ্ণ সাগর থেকে দূর উত্তরে সুমেরু সাগর পর্যন্ত শত শত মাইল জুড়ে সোভিয়েত সমাজতান্ত্রিক প্রজাতন্ত্রের প্রহরায় এই মৌন নিশ্চল সাক্ষীরা সার বেঁধে

দাঁড়িয়ে আছে—তাদের লোহার বর্মের বুকে আঁকা শ্রমের মহৎ নিদর্শন কাস্তে-হাতুড়ির চিহ্ন নিয়ে। হিংস্র ঈগল পাখিটাকে মাথায় নিয়ে যেখানে ওই খুঁটিটা দাঁড়িয়ে আছে, সেই জায়গাটা সোভিয়েত ইউক্রেন আর বুর্জোয়া পোল্যান্ডের সীমান্তরেখাকে চিহ্নিত করছে। ছোট্ট বেরেজদভ শহর থেকে এটা সাত মাইল দূরে—ইউক্রেনের উপাস্তে যেন হারিয়ে গেছে শহরটা। আর এর উল্টোদিকে ছোট্ট পোলিশ শহর কোরেৎস। স্নাভুতা থেকে আনাপোল পর্যন্ত সীমান্ত-অঞ্চলটাকে পাহারা দেয় সীমান্তরক্ষী ফৌজের একটা ব্যাটালিয়ন।

সীমান্ত চিহ্নিত করে এই খুঁটিগুলো চলে গেছে বরফ-ঢাকা মাঠের বুকের উপর দিয়ে, বনের মধ্যে জঙ্গল কেটে সাফ-করা জায়গার ফাঁকে-ফাঁকে, উপত্যকার উৎরাই ভেঙে, আর পাহাড়ের চড়াই বেয়ে উঠে চূড়োর আড়ালে অদৃশ্য হয়ে গিয়ে থমকে দাঁড়িয়েছে একটা নদীর উচুপাড়ের ধারে—সেখানে দাঁড়িয়ে বরফের আন্তরণে ঢাকা ভিনদেশী মাঠপ্রান্তরকে লক্ষ করছে।

কনকনে ঠাণ্ডা পড়েছে। ফেন্টবুটের তলায় জমাট বরফ ঝচঝচ-কড়মড় করছে। দৈত্যের মতো বিরাট একজন লালফৌজের লোক পুরাকাহিনীর অসুরের মাথার উপযোগী একটা মস্তবড় শিরস্ত্রাণ মাথায় চাপিয়ে ভারী পা ফেলে ফেলে কাস্তে-হাতুড়ি আঁকা বর্ম-আঁটা একটা খুঁটির কাছ থেকে এগিয়ে রৌদ দিচ্ছে। কলারে আর বোতামের মধ্যে সবুজ পটি লাগানো ধূসর রঙের একটা ওভারকোট তার গায়ে, পায়ে ফেন্টের বুট। ওভারকোটের ওপরে আবার গোড়ালি পর্যন্ত নামানো বিরাট কলারঅলা ভেড়ার চামড়ার জোকা—এই জোকা প্রচণ্ডতম তুষার-ঝড়েও মানুষের শরীরকে গরম রাখে। তার মাথায় পশমি কাপড়ের শিরস্ত্রাণ, হাতদুটো ভেড়ার চামড়ার দস্তানায় ঢাকা। সে রাইফেলটা কাঁধে ঝুলিয়ে নিয়েছে। রৌদে চলতে চলতে বরফের বুকে তার ওভারকোটের প্রান্তটা দাগ কেটে চলেছে। হাঁটতে হাঁটতে সে মাঝেরকা তামাকের একটা সিগারেট পাকিয়ে টানছে—দেখে বোঝা যায় ভারি ভালো লাগছে। সোভিয়েত সীমান্ত-প্রহরীরা ওরকম খোলা জায়গায় প্রায় এক মাইল অন্তর একজন করে থাকে, যাতে প্রত্যেকে তার পরবর্তী সাত্ত্বীকে সবসময়ে দেখতে পায়। সীমান্তের পোলিশ অঞ্চলে মাইলখানেক অন্তর একজন করে সাত্ত্বী।

একটি পোলিশ পদাতিক সৈন্য থপথপ করে পা ফেলে রৌদ দিতে দিতে এগিয়ে আসছে লালফৌজের সৈনিকটির দিকে। তার পায়ে মোটা চামড়ার ফৌজি বুট, পরনে ধূসর সবুজ রঙের উর্দির ওপরে দুই-সারি চকচকে বোতাম-লাগানো একটা কালো কোট। মাথায় শাদা ঈগল-চিহ্নিত চার-কোনায় ভাঁজ-করা ফৌজি ক্যাপ। কাঁধে কাপড়ের পটিতে আর কলারে আরও গোটাকতক শাদা ঈগল আটকানো—কিন্তু তাতে সে একটুও বেশি উষ্ণতা বোধ করছে না। সাংঘাতিক ঠাণ্ডায় তার হাড় পর্যন্ত জমে আসছে, চলতে চলতে সে অসাড় কানদুটোকে অনবরত ঘষছে আর গোড়ালিদুটো ঠুকছে। পাতলা দস্তানায় তার হাতদুটো ঠাণ্ডায় আড়ষ্ট। পোলিশ সৈন্যটি একমুহূর্তের জন্যও হাঁটা বন্ধ করার ঝুঁকি নিতে পারে না। মাঝে মাঝে সে দৌড়াচ্ছে—নইলে একমুহূর্তের মধ্যে ঠাণ্ডায় অসাড় হয়ে যাবে তার গাঁটগুলো। রৌদ



দিতে দিতে সাত্রী দু'জন যখন কাছাকাছি আসছে, তখন পোলিশ সৈন্যটি ঘুরে দাঁড়িয়ে লালফৌজের সৈন্যটির পাশাপাশি হাঁটছে।

সীমান্ত-অঞ্চলে কথা বলা বারণ কিন্তু মাইলখানেকের মধ্যে যখন আর কোথাও কেউ নেই, তখন দু-দিকে দু'জন মানুষ নিঃশব্দে টহল দিচ্ছে, না আন্তর্জাতিক আইন ভঙ্গ করছে, কে আর ধরতে যাবে।

পোলিশ সৈন্যটির একটা সিগারেট খাওয়ার একান্ত ইচ্ছে, কিন্তু ব্যারাক-ঘরে সে তার দেশলাইটা ফেলে এসেছে, এদিকে বাতাসটা সোভিয়েত-অঞ্চলের ওদার থেকে তামাকের লোভ-জাগানো সুগন্ধ বয়ে আনছে। পোলিশ সৈন্যটি কান-রগড়ানো ধামিয়ে পেছন ফিরে একনজর তাকিয়ে নিল—কে জানে, আবার ক্যান্টেন-মশাই কিংবা স্বয়ং পান্ লেফটেন্যান্ট হয়তো একদল টহলদার ঘোড়সওয়ার নিয়ে তদারকি রোদে বেরিয়ে হঠাৎ একটা টিবির আড়াল থেকে এসে আবির্ভূত হবেন। কিন্তু রোদ-ঠিকরানো চোখ-ধাঁধানো বরফের গুহ্রতা ছাড়া আর-কিছুই তার চোখে পড়ল না। আকাশের বুকে মেঘের লেশমাত্র নেই।

'দেশলাই আছে, কমরেড?' ক্লশ আর পোলিশ ভাষা মিশিয়ে আইনের পবিত্র নির্দেশটিকে প্রথম লঙ্ঘন করল পোলিশ সৈন্যটি এবং তলোয়ারের মতো বেয়নেটের ফলা-আটকানো ফরাসি ফৌজি রাইফেলটা একটু কাঁধের উপর থেকে সরিয়ে নিয়ে সে তার কোটের পকেটের তলা থেকে আড়ষ্ট আঙুলে হাতড়ে হাতড়ে টেনে বের করল এক-প্যাকেট সস্তা দামের সিগারেট।

লালফৌজের সৈন্যটি তার কথা শুনতে পেয়েছে, কিন্তু ফৌজি কানুনে সীমান্তের পারাপারে কথা বলা বারণ। তাছাড়া, সৈন্যটা কী বলতে চায় সেটাও ঠিকমতো বুঝে উঠতে পারেনি সে। তাই সে ভারী ভারী পা ফেলে উষ্ণ নরম ফেস্টবুটের নিচে বরফ কচকচিয়ে টহল দিয়েই চলল।

এবারে পোলিশ সৈন্যটি ক্লশভাষায় বলল, 'কমরেড বলশেভিক, দেশলাই আছে? ছুড়ে দাও না?'

লালফৌজের লোকটি তার প্রতিবেশীকে তীক্ষ্ণদৃষ্টিতে ভালো করে দেখে নিল। মনে মনে ভাবল, 'বরফ-ঝরা এই শীতে 'পানটি' বেশ ঘায়েল হয়ে পড়েছে দেখছি। হতভাগাটা বুর্জোয়া সৈন্য হলেও, বড় কষ্টের জীবন বেচারির। ভাবো দিকি—ওই বস্ত্রাপচা পোশাকে এই ঠাণ্ডায় বেকুতে হয়েছে লোকটাকে, খরগোশের মতো লাফিয়ে লাফিয়ে ওকে চলে বেড়াতে হচ্ছে তাতে আর এমন অবাক হবার কী আছে। একটা সিগারেট খাওয়া তো চাইই।' ঘুরে না-দাঁড়িয়েই লালফৌজের লোকটি দেশলাইয়ের একটা বাত্ন ছুড়ে দিল তার দিকে। লুফে নিল সেটা পোলিশ সৈন্যটি, বারকতক ব্যর্থ চেষ্টার পর সিগারেটটা জ্বালিয়ে নিয়ে সঙ্গে সঙ্গে আবার ছুড়ে দিল দেশলাইটা যেদিক থেকে এসেছিল সেইদিকে। লালফৌজের লোকটি নিয়মকানুন ভেঙে বলে ফেলল, 'রেখে দাও, আমার আরও আছে।'

সীমান্তের ওপার থেকে জবাব এল, 'ধন্যবাদ। তবে, না-রাখাই ভালো। আমার পকেটে এই বাত্নটা যদি দেখতে পায় ওরা, তাহলে আমার দু'বছর জেল খাটতে হবে।'

লালফৌজের লোকটি ভালো করে দেখল দেশলাইয়ের বাজ্রটি। লেবেলের ওপরে ছাপা একটা বিমান, সেটার সামনের হাওয়া-কেটে-চলা পাখনাটার জায়গায় একটা বলিষ্ঠ মুঠো-বাঁধা হাত, আর তার নিচে 'চরমপত্র' কথাটা লেখা।

'তাই তো, এ কি আর ওদের রাখা চলে!'

লালফৌজের লোকটির পাশাপাশি পা মিলিয়ে হেঁটে চলেছে পোলিশ সৈন্যটি। এই নির্জন প্রান্তরে বড় একা ঠেকছে তার।

\*

\*

\*

সমান মসৃণ গতিতে ঘোড়াদুটো পা ফেলে পাশাপাশি এগিয়ে চলছে, তাদের পিঠের জিনগুলো থেকে তালে তালে ক্যাচকোঁচ আওয়াজ উঠছে। শীতাত বাতাসে ঘোড়াদুটোর নিশ্বাস জমে গিয়ে দু-এক মুহূর্তের জন্য শাদা বাষ্প হয়ে যাচ্ছে। কালো মন্ডা-ঘোড়াটার নাকের চারপাশ ঘিরে বিন্দু-বিন্দু বরফ জমে উঠেছে। কমনীয় ভঙ্গিতে পা ফেলে ফেলে ঘাড় বেঁকিয়ে চলেছে ব্যাটালিয়ন-কম্যান্ডারের রঙচঙে ফোঁটাকাটা মাদিটা মুখে-আটকানো লাগামটা দোলাতে দোলাতে। ঘোড়সওয়ার দু'জনেরই গায়ে কোমরবন্ধনী জড়ানো ফৌজি ওভারকোট, হাতার ওপরে তিনটে লাল কাপড়ের চৌখুপি আঁটা। তফাৎ শুধু এই যে ব্যাটালিয়ন-কমান্ডার গাব্রিলভের কলারে পটিগুলো সবুজ, আর তার সঙ্গীর কলারে সেগুলো লাল। গাব্রিলভ রয়েছে সীমান্তরক্ষী বাহিনীতে—চল্লিশ-পঁয়তাল্লিশ মাইল জুড়ে এই সীমান্ত-অঞ্চলটায় তার ব্যাটালিয়নের সৈন্যরা পাহারা দেয়। সীমান্তরেখার এই অঞ্চলটুকু রক্ষণাবেক্ষণের দায়িত্ব তার ওপর। তার যে-সঙ্গীটি বেরেজ্‌দভ শহর থেকে এই সীমান্ত-অঞ্চলটা দেখতে এসেছে সে হল সার্বিক সামরিক ট্রেনিং কেন্দ্রের ব্যাটালিয়ন-কমিশনার পাভেল করচাগিন।

আগের রাতে বরফ পড়েছিল। তাজা আর শাদা নরম তুষার-আস্তরণের উপর মানুষ বা জন্তুর পায়ের ছোঁয়া লাগেনি এখনও। ঘোড়া কদমে হাঁকিয়ে ওরা বন থেকে খোলা জায়গায় বেরিয়ে এসেছে, প্রায় চল্লিশ পা দূরে ফের দুটো খুঁটি।

এমন সময়ে গাব্রিলভ হঠাৎ ঘোড়ার লাগাম টেনে দাঁড়িয়ে গেল। ঘোড়ার মুখ ঘুরিয়ে নিয়ে করচাগিন দেখে—জিনের উপর থেকে ঝুঁকে পড়ে গাব্রিলভ বরফের ওপরে একটা অদ্ভুত দাগ লক্ষ্য করছে। দাগটাকে দেখে মনে হয়, কেউ যেন ঝাঁজ-কাটা একটা ছোট চাকা গড়িয়ে নিয়ে গেছে বরফের উপর দিয়ে: এই জটিল আর হঠাৎ ধাঁধা-লাগানো নকশার দাগ কেটে ধূর্ত কোনো-এক ছোট জন্তু এখন দিয়ে চলে গেছে। জন্তুটা কোন দিক থেকে কোন দিকে গেছে বোঝা মুশকিল। কিন্তু ব্যাটালিয়ন-কমান্ডার থেমে পড়েছে এই দাগটা দেখে নয়। দু'পা দূরে গুঁড়ো গুঁড়ো বরফের একটা পাতলা আস্তরণের নিচে আরেক সারি দাগ—মানুষের পায়ের ছাপ। এগুলো-যে মানুষেরই পায়ের ছাপ, সে-সম্বন্ধে সন্দেহের অবকাশ নেই—সরাসরি বনের দিকে চলে গেছে পায়ের দাগগুলো, সীমান্তের পোলিশ-অঞ্চল থেকেই-যে অনধিকার প্রবেশকারী এই লোকটি এদিকে ঢুকেছিল, সে-সম্বন্ধে লেশমাত্র সন্দেহ

নেই। ব্যাটালিয়ন-কম্যান্ডার লাগামটা টেনে ঘোড়া চালিয়ে পায়ের ছাপটাকে অনুসরণ করে সাত্ত্বীর টহল দেবার পথটা পর্যন্ত চলে এল। পোলিশ-অধিকারভুক্ত জায়গাটায় প্রায় দশ পা পর্যন্ত পায়ের দাগটা স্পষ্ট দেখা যাচ্ছে।

‘কেউ একজন কাল রাতে সীমান্ত পার হয়ে ঢুকেছিল,’ বিড়বিড় করে বলল ব্যাটালিয়ন-কম্যান্ডার, ‘তিন-নম্বর পল্টনটা দেখছি ফের ঘুমুতে শুরু করেছে—সকালের রিপোর্টে এই ব্যাপারটার কোনো উল্লেখ নেই।’

গাব্রিলভের গৌফে পাক ধরেছে, সেই গৌফের ওপরে ঠাণ্ডায়-জমে-যাওয়া নিশ্বাসের জলবিন্দুর একটা রূপোলি স্তর। ঠোঁটের উপর ঝুলে-পড়া সেই গৌফে তাকে ভীষণ গম্ভীর দেখাল।

দূর থেকে দুটো মূর্তি এগিয়ে আসছিল। একজন ছোটখাটো, কালো জামা গায়ে, তার ফরাসি বেয়নেটের ফলাটা রোদ্দুরে চিকচিক করছে; অন্যজন লম্বা-চওড়া অসুরের মতো, গায়ে ভেড়ার চামড়ার হলদে কোট। পেটের নিচে পাশের দিকে জুতোর একটা ধাক্কা খেয়ে ফোঁটা-কাটা মাদিটা জোরে দৌড়তে শুরু করল। ঘোড়সওয়ার দু’জন দ্রুত এসে পড়ল এগিয়ে-আসা মূর্তিজোড়ার দিকে। ওরা এসে পড়লে লালফৌজের লোকটি কাঁধের ওপরে ঝোলানো তার রাইফেলটা টেনে ধরে মুখ থেকে সিগারেটের প্রান্তটা থুথুকে ছুড়ে দিল বরফের ওপরে।

‘হ্যালো, কমরেড। আপনাদের এলাকায় সব খবর-টবর কী?’ লালফৌজের সৈন্যটির দিকে ব্যাটালিয়ন-কম্যান্ডার হাত বাড়িয়ে দিতে সে তাড়াতাড়ি একটা দস্তানা খুলে ফেলে করমর্দন করল। সীমান্তের এই প্রহরীটি এত লম্বা যে তার হাত ধরবার জন্য কম্যান্ডারকে তার জিনের উপর থেকে একটুও ঝুঁকে পড়তে হয়নি বললেই হয়।

দূর থেকে তাকিয়ে রইল পোলিশ সৈন্যটি। লালফৌজের দু’জন অফিসার একজন সাধারণ সৈন্যকে সম্ভাষণ জানাচ্ছে ঘনিষ্ঠ বন্ধুকে যেমন জানায়। একমুহূর্তের জন্য কল্পনা করার চেষ্টা করল যে সে যেন করমর্দন করছে মেজর জাফ্রিয়াজেভস্কির সঙ্গে—কিন্তু সে-চিন্তাটাও এতই অদ্ভুত যে, সৈন্যটি চমকে উঠে চারিদিকে তাকিয়ে নিল।

লালফৌজের লোকটি জানাল, ‘আমি এইমাত্র পাহারায় হাজির হয়েছি, কমরেড কম্যান্ডার।’

‘ওখানে ওই দাগটা দেখেছেন?’

‘না তো, এখনও দেখিনি।’

‘রাতে দুটো থেকে ছটা পর্যন্ত এখানে পাহারায় ছিল কে?’

‘সিরোতেঙ্কো, কমরেড ব্যাটালিয়ন-কম্যান্ডার।’

‘ঠিক আছে, কিন্তু চোখ খোলা রাখবেন।’

ঘোড়া হাঁকিয়ে এগিয়ে যাবার আগে কম্যান্ডার কড়া গলায় একটা সাবধানবাণী ঘোষণা করল, ‘ওসব লোকের থেকে দূরে দূরে থাকলেই ভালো হয়।’

সীমান্ত থেকে বেরোজদভের দিকে চওড়া রাস্তাটা বেয়ে তাদের ঘোড়াদুটো যখন কদমে এগিয়ে চলেছে তখন কম্যান্ডার তার সঙ্গীকে বলল, ‘এই সীমান্ত-অঞ্চলে সবসময়ে চোখ খোলা রাখা দরকার। সামান্য ত্রুটি হলেই তার জন্যে পরে দারুণ

পদ্মাত্তে হতে পারে। আমাদের এ-ধরনের কাজে চোখটি বুজবার সময় নেই। খোলাখুলি দিনের আলোয় সীমান্ত উপকণ্ঠে আসাটা তত সহজ নয়, কিন্তু রাতে সমস্তক্ষণ সচকিত থাকতে হবে। নিজেই ভেবে দ্যাখো, কমরেড করচাগিন। আমার এই এলাকায় সীমান্তরেখা চারটে গ্রামের মাঝখানে দিয়ে গেছে। এর ফলে ব্যাপারটা বেশকিছুটা ঘোরালো হয়ে দাঁড়িয়েছে। যতই কাছাকাছি সাত্ত্বীদের দাঁড় করানো হোক-না কেন, সীমান্তের একধারের যত আত্মীয়স্বজন আরেক ধারের প্রত্যেকটা বিয়ে বা উৎসবে যোগ দেবেই। এতে আশ্চর্য হবারও কিছু নেই—সীমান্তের পারাপারে কুটিরগুলোর মধ্যে দূরত্ব তো মাত্র বিশ-পঁচিশ পা, আর নদীতেও জল এত কম যে মুরগির ছানাও হেঁটে পার হতে পারে। তাছাড়া, কিছু বেআইনি মাল-চালাচালিও হয়ে থাকে। এর বেশির ভাগটাই-যে খুব ছোটখাটো জিনিশ নিয়ে, তা ঠিক—কোনো বুড়ি হয়তো সীমানা পার করে দু-এক বোতল পোলিশ ভোদকা পাচার করল, কিংবা ওইরকম কিছু। কিন্তু বড়রকম বেআইনি চালানও বেশকিছু চলে—বিরাট টাকাঅলা সব লোক এইসব কারবার চালায়। সীমান্তের সব গ্রামে পোলিশরা দোকান খুলেছে, সেখানে প্রায় সবকিছুই পাওয়া যায়—ওনেছ তো? ওদের নিজেদের গরিব নিঃস্ব চাষীদের জন্যে-যে ওসব দোকান খোলা হয়নি, তা নিশ্চয় জেনো।’

ব্যাটালিয়ন-কম্যান্ডারের কথা শুনে শুনে পাভেলের মনে হচ্ছিল : সীমান্ত-অঞ্চলের এই জীবন যেন সমস্তক্ষণ একটা সতর্ক প্রহরা।

‘বেআইনি মাল-চালাচালি ছাড়াও আরও গুরুতর কিছুও হয়তো ঘটে থাকে, কি বলো কমরেড গাব্রিলভ?’

‘সেই তো মুশকিল’, বিষণ্ণভাবে বলল ব্যাটালিয়ন কম্যান্ডার।

\*

\*

\*

পাণ্ডববর্জিত ছোট শহর এই বেরেজ্‌দভ্‌। ইহুদিরা যেসব জায়গায় আগে বসবাস করত সেইরকম একটা জায়গা। এলোমেলোভাবে ছড়ানো দু-শো কি তিন-শো ঘরবাড়ি আর মাঝখানে ডজন-দুয়েক দোকানঅলা মস্তবড় একটা বাজার-চত্বর। গোবরে ভর্তি নোংরা বাজারের চত্বরটা। খাস শহরের আশপাশ ঘিরে চাষীদের কুঁড়েঘর। কসাইখানায় যাবার পথে ইহুদি-পাড়ার মাঝখানে দাঁড়িয়ে আছে ইহুদিদের পুরনো একটি প্রার্থনা-মন্দির—জীর্ণশীর্ণ একটা বাড়ি। এখনও প্রতি শনিবারে এই প্রার্থনা-মন্দিরে লোকের ভিড় জমে বটে, কিন্তু এর সে ফালাও দিন আর নেই। রাক্ষসকে যেভাবে দিন চালাতে হয়, সেটা মোটেই তার মনঃপূত নয়। ১৯১৭ সালে যেটা ঘটে গেছে, সেটা নিশ্চয়ই একটা পাপাচার—এই-যে বেরেজ্‌দভ্‌ শহর, যার কথা স্বয়ং ভগবানও ভুলে বসে আছেন, এখানকার তরুণরাও আর তাকে মর্যাদা অনুযায়ী সম্মানটুকু দেয় না। বুড়োবুড়িরা অবশ্য এখন পর্যন্ত শাস্ত্রসম্মত খাবার ছাড়া আর-কিছু খায় না, কিন্তু তরুণদের অনেকেই তো দিব্যি শুয়োরের মাংসের সসেজ্‌ খায়—যে-শুয়োরের মাংসের ওপরে ঈশ্বর অভিশাপ দিয়েছিলেন। কথাটা ভাবতেই ঘেন্নায় মন শিউরে ওঠে! ভাবতে ভাবতে রাক্ষ বোঝা রাগের

চোটে একটা শুয়োরের গায়ে লাথি ঝেড়ে বসল—শুয়োরটা খাবারের খোঁজে অভিনিবেশের সঙ্গে একটা গোবরগাদা খুঁড়ছিল। বেরেজ্‌দভ্‌ যে একটা জেলা-সদর হয়ে উঠেছে, এতে রাব্বিটি মোটেই খুশি নয়। আর কমিউনিষ্টরা যে কোথা থেকে এখানে উড়ে এসে জুড়ে বসল তা শয়তানই জানে—সমস্ত বিধিব্যবস্থাকে যে ওরা একেবারে উল্টেপাল্টে দিচ্ছে, এটাও মোটেই তার মনঃপূত নয়। রোজই নতুন কোনো-একটা অপ্রীতিকর ঘটনা ঘটছে। যেমন, গতকাল সে পাদরির বাড়ির ফটকে একটা লেখা দেখেছে :

ইউক্রেন যুব কমিউনিষ্ট লিগের  
বেরেজ্‌দভ্‌ জেলা কমিটি

এই লেখাটা থেকে মন্দ ছাড়া আর কিছু হবে বলে আশা করাটাই বৃথা—মনে মনে ভাবছিল রাব্বি। নিজের চিন্তায় সে এত আচ্ছন্ন ছিল যে, অলক্ষ্যে সমস্ত পথটা পার হয়ে তারই প্রার্থনা-মন্দিরের দরজার ওপরে সাঁটা একটা কাগজের গায়ে ছোট ঘোষণাটুকু চোখে পড়ার আগে তার হুঁশ ফিরে আসেনি। ঘোষণাটা এই :

আজ ক্লাবঘরে শ্রমজীবী-ভরুণদের জনসভা। বক্তা : কার্যনির্বাহক কমিটির  
সভাপতি লিসিবসিন এবং জেলা কমসমোল কমিটির অস্থায়ী সম্পাদক করচাগিন।  
সভার শেষে কুলের ছাত্রদের যন্ত্রসংগীতের অনুষ্ঠান।

প্রচণ্ড রাগে রাব্বিটা টেনে ছিড়ে ফেলল কাগজখানা।

‘এই গুরু হল কাণ্ডটা!’

স্থানীয় গির্জার গা ঘেঁষে বড় বাগানটার মাঝখানে পুরনো একটা বাড়ি, এটা আগে ছিল পাদরির। বাড়িটার পুরনো নোংরা ঘরগুলোয় শূন্যতা জুড়ে রয়েছে বুকচাপা একটা একঘেয়েমির আবহাওয়া। এই ঘরগুলোয় এতদিন পর্যন্ত ছিল পাদরি আর তার স্ত্রী—এই বাড়িটার মতোই জীর্ণ আর ভোঁতা স্বভাবের দুটি মানুষ, যারা নিজেরা পরস্পরের কাছে হয়ে উঠেছে অত্যন্ত ক্লান্তিকর। এখন যারা এই বাড়িটার নতুন মালিক হয়ে এল, তাদের আসার সঙ্গে সঙ্গেই এখানকার ক্লান্ত্যাস নিরানন্দ আবহাওয়াটা কেটে গেল। আগেকার এই ধর্মপরায়ণ বাসিন্দা দু’জন কেবল ধর্মেৎসব উপলক্ষে যে বড় হলঘরটায় অতিথিদের আদর-আপ্যায়ন করত, সেটা এখন সবসময়েই লোকে ভর্তি থাকে—এখন বাড়িটা হয়েছে বেরেজ্‌দভ্‌ কমিউনিষ্ট পার্টি কমিটির সদর-দপ্তর। প্রধান ফটকের ডানদিকে যে ছোট ঘরখানা, তার দরজায় খড়ি দিয়ে লেখা আছে : ‘জেলার কমসমোল কমিটি’। পাভেল করচাগিন তার দৈনিক কাজের কিছুটা সময় এখানে কাটায়। সার্বিক সামরিক ট্রেনিংের দু-নম্বর ব্যাটালিয়নের সামরিক কমিশার ছাড়াও সে সেইসঙ্গে সদস্যসংগঠিত জেলা কমসমোল কমিটির অস্থায়ী সম্পাদক হিশেবেও কাজ করছে।

আল্লা বোরহাট-এর ঘরে সেই জমায়েতটার পর আট মাস কেটে গেছে, তবু মনে হয় যেন সেটা গতকালকের ঘটনা। কাগজের স্তূপটা একপাশে ঠেলে সরিয়ে রেখে চেয়ারটায় হেলান দিয়ে বসে পাভেল করচাগিন নিজের চিন্তায় ডুবে গেল...

নিখুম হয়ে এসেছে বাড়িটা। অনেক রাত্রি হয়ে গেছে। পার্টি-কমিটির অফিসটা ফাঁকা। কমিটি-সম্পাদক ত্রিফিমভ কিছুক্ষণ আগে বাড়ি চলে গেছে, গোটা বাড়িটায় করচাগিন এখন একা। জানলার গায়ে বরফের একটা অদ্ভুত নকশা বুনে উঠেছে, কিন্তু ঘরের ভেতরটা উষ্ণ। টেবিলের ওপরে জ্বলছে একটা প্যারাফিনের আলো। সাম্প্রতিক ঘটনাগুলো পাভেলের মনে পড়ছে। মনে পড়ছে—অগস্ট মাসে রেল-কারখানার কমসমোল সংগঠন থেকে যুব-সংগঠক হিসেবে তাকে একটা মেরামতি ট্রেনের সঙ্গে পাঠানো হয়েছিল ইয়েকাতেরিনম্নাভে; শরৎকাল শেষ হয়ে আসা পর্যন্ত দেড়-শো জন যুবক ওই ট্রেনে চেপে এক স্টেশন থেকে আরেক স্টেশন ঘুরে বেড়িয়েছে, যুদ্ধ-পরবর্তী বিশৃঙ্খল অবস্থার মধ্যে শৃঙ্খলা এনে দিয়েছে, ক্ষয়ক্ষতি মেরামত করে তুলেছে, ভাঙাচোরা আর পুড়ে-যাওয়া রেলগাড়ির কামরাগুলোকে সরিয়ে সাফ করে দিয়েছে। সিনেলনিকোভো থেকে তাদের যেতে হয়েছে পোলোগি পর্যন্ত অঞ্চলটার মধ্যে দিয়ে, যেখানে একসময়ে ডাকাত মাখনো-র দল লুটপাট চালিয়েছিল। গোটা এলাকা জুড়ে বেপরোয়া লুটপাট আর ধ্বংসের চিহ্ন রেখে গেছে তারা। গুলিয়াই-পোলে শহরে জলের জন্য ইটের বুরুজটাকে মেরামত করতে আর ডিনামাইটে ভেঙে-পড়া জলের ট্যাঙ্কটাকে লোহার পাত জুড়ে ঠিক করতে পুরো একসপ্তাহ কেটে গিয়েছিল। ফিটার-মিস্ত্রির কাজের কলাকৌশল তার জানা নেই এবং এ-ধরনের খাটুনির কাজেও সে অভ্যস্ত নয়, কিন্তু তা সত্ত্বেও সে আর সবার সঙ্গে রেঞ্চ-সাঁড়াশি বাগিয়ে ধরে কত-যে হাজার হাজার মর্চে-ধরা বস্তু স্টেটেছে তা মনে নেই পাভেলের।

শরতের শেষদিকে ট্রেনটা ফিরে এল তার নিজের জায়গায়, রেল-কারখানায় আবার দেড়-শো জন কাজের লোক বাড়ল...

আন্নার ওখানে পাভেল আগের চেয়ে এখন বেশি যায়। তার কপালের উপর-কোঁচকানিটা মসৃণ হয়ে এসেছে। তার সংক্রামক হাসির আওয়াজ এখন আবার শোনা যায়।

রেল-কারখানার বন্ধুর দল আবার আগেকার মতো পাভেলকে ঘিরে জড়ো হতে শুরু করেছে : তারা শোনে অতীতদিনের সংগ্রামের কথা, দেশের বুকের ওপরে চেপে বসা, মাথায় রাজমুকুট-পরা সেই রাক্সসটাকে উৎখাত করার জন্য শেকলে-বাঁধা বিদ্রোহী রাশিয়ার চাষীদের নানা চেষ্টার কাহিনী, স্তেপান রাজিন আর পুগাচভের অভ্যুত্থানের বর্ণনা।

একদিন সন্দের সময় আন্নার ওখানে যখন অন্যদিনের চেয়ে বেশি সংখ্যায় ছেলেমেয়েরা এসে জড়ো হয়েছে, তখন পাভেল ঘোষণা করল, সিগারেট-খাওয়া ছেড়ে দেবে সে—এই অস্বাস্থ্যকর বদ-অভ্যেসটাতে বলতে গেলে শিশু-বয়েস থেকেই সে অভ্যস্ত।

‘আমি আর সিগারেট খাব না’, অনমনীয় একটা দৃঢ়তার সঙ্গে ঘোষণা করল সে।

ব্যাপারটা ঘটেছিল অত্যন্ত অপ্রত্যাশিতভাবে। উপস্থিত একজন তরুণ বলেছিল যে অভ্যেস—যেমন ধরা যাক, সিগারেট খাওয়ার অভ্যেস—ইচ্ছাশক্তির চেয়েও জোরালো। মতভেদ দেখা দিল। প্রথমে পাভেল কিছু বলেনি, কিন্তু তালিয়া তার মতামত জিজ্ঞেস করাতে সে শেষপর্যন্ত তর্কের মধ্যে ভিড়ে গেল।

‘মানুষই তার অভ্যেস নিয়ন্ত্রিত করে, উল্টোটাই নয়। উল্টোটাই যদি হত, তাহলে কী দাঁড়াত?’











‘কথাটা শুনে চমৎকার বটে, অ্যা?’ এককোণ থেকে বলে উঠল স্ভেতায়েভ। ‘বড় বড় কথা বলতে ভালোবাসে করচাগিন। কিন্তু এই জ্ঞানগর্ভ সিদ্ধান্তটি ও নিজের উপর খাটায় না কেন? ও তো সিগারেট খায়, নাকি? ও জানে যে ওটা একটা অতি বাজে অভ্যাস। অবশ্যই জানে। কিন্তু অভ্যাসটা ছেড়ে দেবার মতো শক্তি ওর নেই।’ তারপর গলার স্বরটা বদলে কঠিন অবজ্ঞার সঙ্গে সে বলল, ‘এই তো অল্পদিন আগে ও আমাদের পড়াশোনার আলোচনা-বৈঠকে ‘সংস্কৃতির প্রসারে’ ভারি ব্যস্ত ছিল। কিন্তু তাতে কি ওর বিশ্রী গালাগাল দেওয়াটা আটকে ছিল? পাভকাকে যারা জানে তারা সবাই স্বীকার করবে যে ও খুব ঘন ঘন গালাগাল করে না তা বটে, কিন্তু যখন করে তখন আর নিজেকে সামলাতে পারে না। নিজে সাধু হওয়ার চেয়ে অন্যের কাছে বক্তৃতা ঝাড়াটা ঢের সোজা।’

কিছুক্ষণের জন্য একটা অস্বস্তিকর নিস্তব্ধতা নেমে এল। স্ভেতায়েভের গলার তীক্ষ্ণতায় একটা অপ্রীতিকর ভাব নেমে এল উপস্থিত সবার মনে। করচাগিন সঙ্গে সঙ্গে কোনো জবাব দিল না। ঠোটদুটোর ফাঁক থেকে ধীরে ধীরে সিগারেটটা সরিয়ে নিয়ে শান্তস্বরে সে বলল, ‘আমি আর সিগারেট খাব না।’

তারপরে কিছুক্ষণ থেমে সে বলল, ‘দিম্কার কথা শুনে যতটা নয়, তার চেয়েও বেশি আমার নিজের জন্যেই আমি এই অভ্যাসটা ছেড়ে দিচ্ছি। যে-মানুষ একটা বদ-অভ্যাস ছাড়তে পারে না, সে কোনো কাজের নয়। এবার শুধু ওই গাল-পাড়াটার দিকে নজর দিতে হবে। আমি জানি, এই নিতান্ত লজ্জাকর অভ্যাসটা আমি ঠিকমতো কাটিয়ে উঠতে পারিনি। কিন্তু, এমনকি দিম্কাও স্বীকার করছে যে খুব ঘন ঘন খারাপ কথা ও আমাকে বলতে শোনেনি। সিগারেট খাওয়াটা বন্ধ করার চেয়ে মুখ দিয়ে একটা খারাপ কথা বেরিয়ে আসাটা বন্ধ করা বেশি কঠিন। সুতরাং এই মুহূর্তেই আমি ওই বদ-অভ্যাসটাও ছেড়ে দেবার কথাটা ঠিক বলতে পারছি না। তবে, ছেড়ে দেব নিশ্চয়ই।’

\*

\*

\*

বরফ-পড়া শুরু হবার ঠিক আগে নদীর স্রোত বেয়ে নেমে-আসা জ্বালানিকাঠের স্থূপ জমে উঠে খালটাকে একদম আটকে দিল। তারপরেই শরৎ-শেষের বন্যা এসে জলের তোড়ে সেই অতিপ্রয়োজনীয় জ্বালানিকাঠের স্থূপ এলোমেলো করে দিয়ে ভাসিয়ে নিয়ে গেল। আরেকবার বিপদ থেকে উদ্ধার পাবার জন্য সলোমেন্কা থেকে লোক পাঠানো হল—ওই মহামূল্যবান জ্বালানিকাঠ বাঁচানো এবারকার কাজ।

সেই সময় বিশ্রীকর ঠাণ্ডা লেগে কয়েকদিন থেকে ভুগছিল পাভেল, কিন্তু অন্য সকলের পেছনে পড়ে থাকবার ইচ্ছে ছিল না তার। এক সপ্তাহ লেগে গেল নদীর ধারে-ধারে জ্বালানিকাঠের স্থূপ জড়ো করে তুলতে—ততদিন পর্যন্ত সে তার ঠাণ্ডা লাগার কথাটা চেপে গিয়েছিল। এতদিন শত্রুটা তার দেহের মধ্যে প্রচ্ছন্ন হয়ে মিশে ছিল, এখন বরফের মতো ঠাণ্ডা জলে আর শরতের কনকনে ভিজে হাওয়ায় সেই শত্রুটা মাথাচাড়া দিয়ে উঠল—ভীষণ জ্বরে পড়ে গেল পাভেল। দু-সপ্তাহ ধরে কঠিন গিঠেবাতের যন্ত্রণায় সারা শরীরটা যেন তার ছিড়েখুঁড়ে গেল।

হাসপাতাল থেকে ছাড়া পাবার পর, কারখানায় এসে বাইস-যন্ত্রটা চালাবার সময়ে পাভেলকে বেঞ্চটার উপর ভর দিতে হত। ফোরম্যান তার দিকে তাকিয়ে তাকিয়ে বিষণ্ণভাবে মাথা নাড়ত।

কিছুদিন বাদে চিকিৎসা-বোর্ড নিরপেক্ষ বিচারে তাকে কাজের অনুপযুক্ত বলে ঘোষণা করল। কারখানা থেকে হিশাবপত্র চুকিয়ে দিয়ে দেওয়া হল তাকে এবং যাতে সে পেনশন পায় তার জন্য বিশেষ পত্র দেওয়া হল। অত্যন্ত বিরক্তির সঙ্গে সে অবশ্য এটা নিতে গররাজি হয়েছিল।

ভারী মন নিয়ে রেল-কারখানা ছেড়ে এল সে। লাঠিতে ভর দিয়ে সে ধীরে ধীরে হেঁটে বেড়ায়, পা ফেলার সঙ্গে সঙ্গে প্রত্যেকবার দারুণ যন্ত্রণা হতে থাকে। মায়ের কাছ থেকে কতকগুলো চিঠি এসেছে, বাড়িতে একবার যাবার জন্য লিখেছে মা। মায়ের কথা ভাবতে গিয়ে সেবারকার বিদায় নেবার সময়ে মার শেষ কথাগুলো মনে পড়ে গেল, 'তোরা তো অসুখে ভুগে কারু না হয়ে পড়লে আমার কাছে আসিস নে!'

প্রাদেশিক কমিটি থেকে তাকে তার কমসমোল দলিল আর পার্টি সভ্যত্বের দলিল দু'খানা দিয়ে দেওয়া হল। শোকের প্রদাহ যাতে প্রবল না হয় তার জন্য বিদায় নেবার আগে বন্ধুদের সঙ্গে যতটা কম দেখা করা সম্ভব তাই করল। শহর ছেড়ে চলে এল মার কাছে। দু-সপ্তাহ ধরে মা তার ফোলা-পাদুটোয় সৈঁক দিল আর মালিশ করল। তারপর, একমাস বাদে লাঠির সাহায্য ছাড়াই চলে-হেঁটে বেড়াতে থাকল পাভেল।

আরেকবার আনন্দে মন ভরে উঠল তার, আবার অন্ধকার চিরে এল আলো। শিগগিরই সে ফিরে এল প্রাদেশিক কেন্দ্রে। তিনদিন বাদে সেখানকার সাংগঠনিক বিভাগ তাকে পাঠাল আঞ্চলিক সামরিক বিভাগে—তাকে সামরিক ট্রেনিংয়ের কোনো-একটা ইউনিটে রাজনীতিক কর্মী হিসেবে কাজে লাগানোর জন্য।

আরও এক সপ্তাহ বাদে পাভেল তুম্বারাক্কান্ন একটা ছোট্ট শহরে এসে পৌঁছল দু-নম্বর ব্যাটালিয়নে সামরিক কমিশার হিসেবে। কমসমোলের আঞ্চলিক কমিটিও তার ওপরে একটা কাজের ভার দিল : এখানকার ছড়িয়ে-পড়া কমসমোল সভ্যদের জড়ো করে স্থানীয় একটা কমসমোল সংগঠন গড়ে-তোলার কাজ। এইভাবে তার জীবনের নতুন পদক্ষেপ শুরু হল।

\*

\*

\*

বাইরে দম-আটকানো গরম। কার্যনির্বাহক কমিটির সভাপতির আপিস-ঘরের খোলা জানলাটা দিয়ে একটা চেরিগাছের ডাল ভেতরে উঁকি দিচ্ছে। রাস্তার ওপারে পোলিশ গির্জাটার গথিক ধাঁচের ঘণ্টাঘরের ওপরে সোনালি ক্রুশটা রোদে জ্বলজ্বল করছে। জানলার সামনে নিচের আঙিনায় খাবারের ঝোঁজে ভারি ব্যস্ত চারপাশের ঘাসের মতোই সবুজ রঙের ছোট রাজহাঁসের বাচ্চাগুলো—কার্যনির্বাহক কমিটির এই বাড়িটা দেখাশোনা করে যে-মেয়েটি তারই সম্পত্তি এগুলো।

কার্যনির্বাহক কমিটির সভাপতি এইমাত্র যে-রিপোর্টটা পেয়েছে সেটা পড়ে শেষ করল। মুখের উপর দিয়ে একটা ছায়া খেলে গেল তার, লম্বা ঘন চুলের ফাঁকে আঙুল চালাতে চালাতে থেমে গেল তার একখানা বিরাট ধাবাঅলা গিঠে-পড়া হাত।

বেরেজ্‌দভ্‌ কার্যনির্বাহক কমিটির সভাপতি নিকোলাই নিকোলায়েভিচ লিসিৎসিন-এর বয়েস মোটে চব্বিশ বছর, কিন্তু তার সহযোগী কর্মীদের মধ্যে কিংবা স্থানীয় পার্টি-কর্মীদের মধ্যে কেউই তা জানে না। লম্বা চওড়া জোয়ান মানুষটার গম্ভীর আর মাঝে মাঝে ভয়ানকরকম রাশভারি চেহারাটা দেখে তার বয়েস অন্তত পঁয়ত্রিশ বছর বলে মনে হয়। বলিষ্ঠ শরীরখানা তার, মোটা ঘাড়ের উপর বিরাট মাথাটা দৃঢ়ভাবে বসানো, কটা-চোখের তীব্র চাউনিতে ইম্পাত-কঠিন উজ্জ্বলতা, শক্ত চোয়াল দেখে বোঝা যায় অত্যন্ত কর্মঠ প্রকৃতির লোক। তার পরনে নীল ব্রিচেজ এবং পুরনো ধূসর-রঙের কোর্তা, তার বাঁদিকে বুকপকেটের ওপরে ‘লাল পতাকার অর্ডার’ আটকানো।

তার বাবা আর ঠাকুরদার মতোই লিসিৎসিনও বলতে গেলে ছেলেবেলা থেকেই ছিল ধাতু-শ্রমিক। অক্টোবর-বিপ্লবের আগেই সে তুলা-শহরের অন্ত-তৈরির কারখানায় একটা লেদযন্ত্রের ‘কম্যান্ডে’ ছিল।

শরতের সেই রাত্তিরে যেদিন এই অন্ত-কারিগরটি প্রথম অন্ত হাতে তুলে নিয়ে শ্রমিকের রাজ্য প্রতিষ্ঠার জন্য লড়াই করতে যায়, সেদিন থেকে সে ঘটনার ঘূর্ণিজালে জড়িয়ে গেছে। বিপ্লবের আর পার্টির ডাকে কোলিয়া লিসিৎসিন একটা সংগ্রামের কেন্দ্র থেকে আরেকটা সংগ্রামের কেন্দ্র ঘুরে-ঘুরে বেড়িয়েছে—লালফৌজের একজন সাধারণ সৈন্য থেকে অত্যন্ত গৌরবজনক বীরত্ব দেখিয়ে সে উঠে এসেছে একটা রেজিমেন্টের অধিনায়ক এবং কমিশনারের পদে।

যুদ্ধের আগুন আর কামানের আগওয়াজ আজ অতীতের ঘটনা। নিকোলাই লিসিৎসিন এখন সীমান্ত-অঞ্চলের একটা জেলায় কাজ করছে। শান্ত আর নির্দিষ্ট গতিতে এখানে বয়ে চলেছে জীবনের স্রোত। কার্যনির্বাহক কমিটির সভাপতি ইদানীং তার দপ্তরে বসে রাত্রির পর রাত্রি অনেকক্ষণ জেগে ফসল-সংক্রান্ত রিপোর্ট পড়ে। অবশ্য এখন যে-রিপোর্টটা সে পড়ছে সেটা অব্যবহিত অতীতের স্মৃতি জাগিয়ে তুলল তার মনে। টেলিগ্রাফের সংক্ষিপ্ত ভাষায় লেখা এটা একটা হুঁশিয়ারি :

বিশেষ গোপনীয়। বেরেজ্‌দভ্‌ কার্যনির্বাহক কমিটির সভাপতি লিসিৎসিনের কাছে।  
সীমান্ত-এলাকায় ইদানীং পোলিশদের বিশেষ কর্মতৎপরতা লক্ষ করা যাচ্ছে।  
সীমান্ত-জেলাগুলিতে সন্ত্রাস সৃষ্টি করার জন্য পোলিশরা সীমানা-পারে বড় একটা দল পাঠাবার চেষ্টা করছে। সতর্কতামূলক ব্যবস্থা নিন। সংগৃহীত করসুদ্ধ অর্থ-বিভাগের দামি সমস্ত জিনিশপত্র আঞ্চলিক কেন্দ্রে পাঠিয়ে দেবার চেষ্টা করুন।

জেলা কার্যনির্বাহক কমিটির এই দপ্তর-বাড়িটায় কেউ ঢুকলে তাকে এই জানলাটা দিয়ে লিসিৎসিন দেখতে পায়। মুখ ঘুরিয়ে তাকাতোই সে সামনের বারান্দাটায় সিঁড়িতে পাভেল করচাগিনকে দেখতে পেল এবং একমুহূর্ত পরেই তার দরজার ওপরে ঠুকঠাক শব্দ উঠল।

পাভেলের সঙ্গে করমর্দন করার পর লিসিৎসিন বলল, ‘বসো। কথা আছে তোমার সঙ্গে।’

পুরো একঘণ্টা ধরে দণ্ডর-ঘরে নিভৃতে বসে-বসে কথাবার্তা বলল দু'জনে।

পাভেল যখন দণ্ডর থেকে বেরিয়ে এল তখন বেলা দুপুর। বাইরে বেরুতেই লিসিথসিনের ছোট বোনটি আনিউৎকা বাগানের দিক থেকে ছুটে এল তার কাছে। ভীষণ স্বভাবের বাচ্চামেয়েটি তার বয়সের তুলনায় দারুণ গম্ভীর। করচাগিনকে দেখেই সে সবসময়ে খুশির হাসি হাসে। এবারও পাভেলকে দেখে সে তার কপালের উপর এসে-পড়া ছাঁটা চুলের একটা গোছা আলগোছে সরিয়ে দিয়ে সলজ্জ খুশির হাসি হাসল।

'কোলিয়া খুব ব্যস্ত নাকি?' জিজ্ঞেস করল সে, 'মারিয়া মিখাইলভনা অনেকক্ষণ থেকে তার খাবার তৈরি করে বসে আছেন।'

'ভেতরে চলে যাও, আনিউৎকা, ও একাই আছে।'

পরের দিন ভোরের আলো ফোটার অনেক আগে তিনটে গাড়ি এসে থামল কার্যনির্বাহক কমিটির বাড়িটার সামনে। হুটপুট সব ঘোড়া জোতা আছে গাড়িগুলোর সঙ্গে। গাড়িগুলোর সঙ্গে যে-কয়েকজন লোক ছিল তারা নিচুগলায় কয়েকটা কথা বলাবলি করল, তারপর অর্থ-বিভাগের ঘর থেকে গোটাকতক সিলমোহর-করা বস্তা বের করে এনে গাড়িতে চাপানো হল এবং কয়েক মিনিট বাদে বড় রাস্তার বুক বেয়ে মিলিয়ে গেল চাকার ঘর্ঘর শব্দ। করচাগিনের নেতৃত্বে একটা সান্দ্ৰীদল এই গাড়িগুলো পাহারা দিয়ে নিয়ে চলেছে। আঞ্চলিক কেন্দ্র অবধি পঁচিশ মাইল রাস্তা (তার মধ্যে ঘোলা-সতেরো মাইল পথ বনের মধ্যে দিয়ে গেছে) তারা নিরাপদে পার হয়ে এল এবং দামি জিনিশগুলো পৌছে গেল আঞ্চলিক অর্থ-বিভাগের সিন্দুকে।

এর কয়েক দিন বাদে সীমান্তের দিক থেকে একজন ঘোড়সওয়ার দারুণ জোরে ঘোড়া হাঁকিয়ে এসে ঢুকল বেরেজ্‌দভ শহরে। রাস্তা দিয়ে ছুটে চলার সময়ে পথের ধারের আড্ডাবাজ স্থানীয় লোকেরা বিস্মিত-চোখে তার দিকে তাকিয়ে রইল।

কার্যনির্বাহক কমিটির বাড়ির দেউড়িতে এসে ঘোড়সওয়ারটি লাফিয়ে নেমে পড়ল মাটিতে, এক হাতে তার তলোয়ারটা চেপে ধরে ভারী বুটের আওয়াজ তুলে সামনের সিঁড়ি বেয়ে উঠে গেল। দুর্ভাবনায় জরাজীর্ণ করে লিসিথসিন তার হাত থেকে আঁটা-চিঠিখানা নিল, সিলমোহর খুলে খামের উপর সই করল। গলদঘর্ম ঘোড়াটাকে বিশ্রামের অবকাশ না দিয়ে কয়েক মিনিট পরেই বার্তাবহটি জোরে ঘোড়া হাঁকিয়ে চলে গেল যেদিক থেকে এসেছিল সেইদিকে।

কার্যনির্বাহক কমিটির সভাপতি ছাড়া আর কেউ জানল না কী লেখা ছিল ঐ চিঠিতে। কিন্তু স্থানীয় অধিবাসীদের ঘ্রাণশক্তি যেন কুকুরের মতো। স্থানীয় দোকানদারদের অধিকাংশই অল্পবয়সী চোরাই চালান করে থাকে। এই কারবার করতে করতে তাদের যেন একটা সহজ প্রবৃত্তি গড়ে উঠেছে যাতে কোথাও কোনো বিপদ আসন্ন হয়ে উঠলে সেটা তারা সঙ্গে সঙ্গে বুঝতে পারে।

সার্বিক সামরিক ট্রেনিং ব্যাটালিয়নের সদর-দণ্ডরের দিকে রাস্তার পাশে বাঁধানো পথের উপর দিয়ে দ্রুত হেঁটে চলেছে দু'জন। এদের একজন পাভেল করচাগিন, তার কোমরে পিস্তল ঝুলছে। কিন্তু তা দেখে পথচারী দর্শকদের মনে বিশ্বাস জাগল না—কারণ, ওটা তার থাকে সবসময়েই। কিন্তু তার সঙ্গে পার্টি-কমিটির

সম্পাদক ত্রিফিমভের কোমরেও-যে পিস্তল বাঁধা, সেইটেই কেমন যেন দুর্লক্ষণ বলে মনে হল।

কয়েক মিনিট বাদে বেয়নেট-লাগানো রাইফেল এবং পিস্তল-হাতে সদর-দণ্ডর থেকে বেরিয়ে পড়ল জন বারো-লোক, চৌমাথার মোড়ে ময়দা-কলের বাড়িটার কাছে ছুটে এল তারা। পার্টি-কমিটির দপ্তরে স্থানীয় কমিউনিস্ট পার্টি এবং কমসমোল সভ্যদের বাকি সবাইকে অন্ত্র দেওয়া হল। কার্যনির্বাহক কমিটির সভাপতি ঘোড়া হাঁকিয়ে বেরিয়ে গেল, তার মাথায় কসাক টুপি, তার কোমরবন্ধনীতে যথারীতি ঝুলছে মাউজার-পিস্তলটা। স্পষ্টই বোঝা যাচ্ছে, কিছু-একটা ব্যাপার ঘটছে। বড় ময়দানটা আর আশেপাশের রাস্তাগুলো নির্জন হয়ে গেল। জনপ্রাণীও চোখে পড়ে না কোথাও। চক্ষের পলকে ছোট্ট ছোট্ট দোকানঘরগুলোর দরজায় বিরাট আকারের মধ্যযুগীয় কুলুপ পড়ে গেল আর জানলার উপরে হুড়কো আটকে খড়খড়ি বন্ধ করে দেওয়া হল। শুধু নির্ভীক মুরগি আর গুয়োরগুলো জঞ্জালের স্থূপে ঘেঁটে চলেছে।

শহরের প্রান্তে বাগানগুলোর আড়ালে আড়ালে পাহারা মোতায়ন করে দেওয়া হল। সেখান থেকে ফাঁকা মাঠগুলো আর দূরে মিলিয়ে-যাওয়া সোজা রাস্তাটা তারা বেশ ভালোরকম দেখতে পাচ্ছে।

লিসিবসিনের কাছে পাঠানো ওই চিঠিতে যে-খবরটা এসেছিল, তা খুব সংক্ষিপ্ত :

গত রাতে পোদ্ভুসি এলাকায় একটা সংঘর্ষের পর প্রায় এক-শো জন ঘোড়সওয়ার-সৈন্য দুটো হালকা মেশিনগান নিয়ে সোভিয়েত-অঞ্চলে ঢুকে পড়েছে। সতর্কতামূলক ব্যবস্থা নিন। ঘোড়সওয়ার দলটা কোন দিকে গেছে তার চিহ্নটা স্নানুভার বন পর্যন্ত গিয়ে হারিয়ে গেছে। দলটাকে খুঁজে বের করার জন্য লালফৌজের একটা কসাক-কম্পানি পাঠানো হয়েছে। আজ দিনের বেলায় কোনো-একসময়ে ঐ কসাক-বাহিনী বেরেজদভের মধ্যে দিয়ে যাবে—এদের শত্রু বলে ভুল করবেন না।

গাব্রিলভ

স্বতন্ত্র সীমান্তরক্ষী ব্যাটালিয়ন-কম্যান্ডার

ঘণ্টাখানেকও কাটেনি, শহরমুখো সড়কটার উপর একজন ঘোড়সওয়ার দেখা দিল। তার প্রায় একমাইল পেছনে পেছনে একদল ঘোড়সওয়ার এগিয়ে আসছে। পাভেল করচাগিন তীক্ষ্ণদৃষ্টিতে তাদের গতিবিধি লক্ষ্য করছে। যে-ঘোড়সওয়ারটি একা সতর্কভাবে এগিয়ে আসছে সে লালফৌজের সাত-নম্বর কসাক রেজিমেন্টের একটি তরুণ সৈনিক, শত্রুপক্ষের ঘাঁটি সম্বন্ধে খোঁজ নেবার কাজে বেরিয়েছে, কিন্তু এই ধরনের কাজে সে এখনও আনাড়ি, তাই, পথের ধারে বাগানের গাছগাছালির আড়াল থেকে যখন সশস্ত্র লোকের দল রাস্তায় বেরিয়ে এসে ঘিরে ফেলেছে তাকে, তখন তাদের কোর্তার উপরে কমসমোলের চিহ্ন দেখে বোকার মতো হাসল সে। সংক্ষেপে সমস্ত ব্যাপারটা বলে নিয়ে ঘোড়ার মুখ ঘুরিয়ে সে দ্রুত ফিরে গেল পেছনের ঘোড়সওয়ার দলটার দিকে, তারা ততক্ষণে দুলকি চালে এগিয়ে আসছে। পাহারার কাজে যারা আছে তারা লালফৌজের কসাক দলটাকে এগিয়ে যেতে দিয়ে ফের বাগানের মধ্যে ঢুকে পাহারাদারির কাজে লেগে গেল।

কয়েকটা উষ্ণ দিন কেটে যাবার পর লিসিৎসিন খবর পেল যে ওই ঘোড়সওয়ার দলটার হানা ব্যর্থ হয়েছে। লালফৌজের ঘোড়সওয়ার বাহিনীর কাছ থেকে তাড়া খেয়ে তাদের হড়মুড় করে সীমান্তের ওপারে পালাতে হয়েছে।

মুষ্টিমেয় জনকতক বলশেভিক—সংখ্যায় তারা মোটে উনিশ জন—এই জেলায় নতুন সোভিয়েত জীবন গড়ে-তোলার কাজে উৎসাহের সঙ্গে উঠে-পড়ে লেগে গেল। এটা একটা নতুন প্রশাসনিক এলাকা, সুতরাং সমস্ত কিছুই একেবারে গোড়া থেকে গড়ে-তোলা দরকার। তাছাড়া, সীমান্তের কাছাকাছি হবার ফলে সদাসতর্ক প্রহরার দিকে নজর রাখার দরকার পড়ল।

লিসিৎসিন, ত্রিফমভ, করচাগিন আর সক্রিয় কর্মীদের নিয়ে যে ছোট দলটি তারা গড়ে তুলেছে তাদের প্রত্যেককেই সকাল থেকে সন্ধ্যা পর্যন্ত সারাদিন খাটতে হয়—সোভিয়েত সংগঠনগুলির পুনর্নির্বাচনের ব্যবস্থা করতে হয়, ডাকাতদলগুলোকে রুখবার জন্য লড়াইতে হয়, সাংস্কৃতিক কাজকর্ম গড়ে তুলতে হয়, বেআইনি মাল আমদানি-রপ্তানি বন্ধ করার ব্যবস্থা করতে হয়, সামরিক ব্যবস্থা শক্তিশালী করতে হয়; তাছাড়া, পার্টির এবং কমসমোলের সব কাজের দায়িত্বও তাদের ওপর।

ঘোড়ার জিন থেকে লেখার ডেস্ক আর ডেস্ক থেকে ময়দানে, যেখানে তরুণ সামরিক শিক্ষার্থীরা ধৈর্যের সঙ্গে কুচকাওয়াজ করে চলেছে, ঘোরাঘুরি করার পর ক্লাবে আর স্কুলে এবং তার ওপর আবার দু-তিনটে কমিটির সভা—এই হচ্ছে দু-নম্বর ব্যাটালিয়নের সামরিক কমিশনারের দৈনিক কাজের তালিকা। রাত্রিগুলো তার প্রায়ই ঘোড়ার পিঠেই কাটে, মাউজার-পিস্তলটা থাকে কোমরে। সেসব রাত্রির নিস্তর্রতা চিরে ভীষণ আওয়াজ ওঠে : ‘খামো! কে যায়?’ আর সীমান্তের ওপার থেকে বেআইনিভাবে চালান-দেওয়া মালে-বোঝাই দ্রুতগতি একটা গাড়ির শব্দ শোনা যায়।

বেরেজ্‌দভের জেলা কমসমোল কমিটিতে আছে পাভেল করচাগিন, লিদা পলেভিখ—ভোলগা এলাকার মেয়ে, মহিলা-বিভাগের নেত্রী, আর কেন্‌কা রাজ্‌ভালিখিন—লম্বা, সুন্দর চেহারার তরুণ, মাত্র অল্প কিছুদিন আগেও সে ছিল হাই ইঙ্কলের ছাত্র। লোমহর্ষক অ্যাডভেঞ্চারের গল্পের প্রতি রাজ্‌ভালিখিনের একটা দুর্বলতা আছে, শার্লক হোমস আর লুই বুসেনার সম্বন্ধে সে একজন বিশেষজ্ঞ। ইতিপূর্বে সে পার্টির জেলা কমিটির দপ্তর ম্যানেজার ছিল এবং মাত্র চার মাস আগে কমসমোলে যোগ দিলেও সে নিজেকে একজন ‘পুরনো বলশেভিক’ বলে জাহির করত। বেশ খানিকটা ইতস্তত করার পর আঞ্চলিক কমিটি তাকে বেরেজ্‌দভে পাঠিয়েছিল রাজনীতিক শিক্ষার কাজের ভার নেবার জন্য—কারণ, সেখানে এ-কাজে লোক দরকার, অথচ আর কাউকে পাঠাবার মতো পাওয়া যায়নি।

\*

\*

\*

সূর্য মাথার উপরে উঠেছে। সবকিছু আড়াল ভেদ করে তাপ ঢুকছে সর্বত্র। সমস্ত প্রাণী ছায়ার আশ্রয় খুঁজছে। কুকুরগুলো পর্যন্ত চালার নিচে ঢুকে হাঁফ ছাড়ছে। আর ঝিম-ধরা অবস্থায় নির্জীব হয়ে পড়ে আছে। কুয়োর পাশেই একটা কাদার গর্তে একটা শুয়োর আরামে লুটোপুটি খাচ্ছে—গোটা গ্রামটায় এইটেই একমাত্র জীবনের চিহ্ন।



পাভেল করচাগিন তার ঘোড়ার বাঁধনটা খুলে নিয়ে হাঁটুর যন্ত্রণায় ঠোট কামড়ে জিনের উপর চেপে বসল। ইঙ্কলবাড়ির সিঁড়িটার উপরে শিক্ময়িত্রীটি দাঁড়িয়েছিল হাতের তেলোয় রোদ্দুর থেকে চোখ আড়াল করে।

‘আবার শিগগিরই আপনার সঙ্গে দেখা হবে আশা করি, কমরেড কমিশার’, হেসে বলল সে।

অধৈর্যভাবে পা ঠুকল ঘোড়াটা, ঘাড় বাড়িয়ে ধরে লাগামে টান লাগাল।

‘আচ্ছা, চলি, কমরেড রাকিতিনা। তাহলে, ওই ঠিক থাকল : কাল থেকেই আপনি পড়ানো শুরু করে দেবেন।’

লাগামের টানটা কমেছে অনুভব করতেই ঘোড়াটা দ্রুত কদমে চলা শুরু করে দিল। হঠাৎ একটা উন্মত্ত চিৎকার পাভেলের কানে এল। গ্রামে আগুন লাগলে মেয়েরা যেমন চিৎকার করতে থাকে, সেইরকম শোনালা আওয়াজটা। হেঁচকা একটা টানে ঘোড়ার মুখটা ঘুরিয়ে নিয়ে পাভেল দেখে একটি অল্পবয়সী চাষী-মেয়ে উর্ধ্বশ্বাসে ছুটে আসছে গ্রামের দিকে। রাস্তার মাঝখানে ছুটে এগিয়ে এসে রাকিতিনা থামাল তাকে। ব্যাপারটা কী দেখবার জন্য আশপাশের কুটিরগুলো থেকে মুখ বের করে তাকাল প্রতিবেশীরা—এদের বেশির ভাগই বুড়োবুড়ি, কারণ জোয়ান চাষীরা সবাই মাঠের কাজে গেছে।

‘হায়, হায়! ভালোমানুষের বাছারা সব শিগগির এসো গো, শিগগির ছুটে এসো! ওরা ওদিকে খুনোখুনি করে মরছে গো!’

এক ছুটে ঘোড়া হাঁকিয়ে যখন এই জায়গাটায় এসে পড়ল পাভেল, তখন মেয়েটিকে ঘিরে বেশকিছু লোকের ভিড় জমে উঠেছে—কেউবা তার শাদা ব্লাউজটা ধরে টানছে, কেউবা উদ্ভিগ্ন প্রশংসি করে চলেছে, কিন্তু তার অসংলগ্ন কথার কোনো মানে কেউ বের করতে পারছে না। শুধু বলে চলেছে, ‘খুন! কেটে ফেলছে ওরা সবাইকে....’

তখন লম্বা দাড়িওয়ালা এক বুড়ো এলোমেলোভাবে পা ফেলে-ফেলে তার ঘরে-বোনা কাপড়ের পাংলুনটা এক হাত দিয়ে চেপে ধরে দৌড়ে এল। বিকারগ্রস্ত মেয়েটাকে উদ্দেশ্য করে চোঁচিয়ে উঠল সে, ‘এই! প্যানপ্যানানি থামা শিগগির! কে খুন হল? আরে, ব্যাপারখানা কী? চ্যাচানিটা থামা হতভাগী!’

‘আমাদের আর ওই পোদ্দুবৎসির লোকজন... জমির চৌহদ্দি নিয়ে মারামারি বাড়িয়েছে আবার! আমাদের লোকজনদের কেটে ফেলছে ওরা!’

এইটুকুতেই সব বুঝে গেল সবাই। মেয়েরা তারস্বরে কান্নাকাটি করতে লাগল, বুড়োরা রাগে গজরাতে লাগল। সারা গ্রামজুড়ে ঘরে-ঘরে উঠোনে-আঙিনায় ছড়িয়ে পড়ল খবরটা : ‘পোদ্দুবৎসির লোকজন এসে কাস্তে দিয়ে আমাদের লোকজনদের গলা কেটে ফেলছে...আবার ওই জমির চৌহদ্দি নিয়ে বেধেছে!’ রোগে শয্যাশায়ী যারা শুধু তারাই ঘরে পড়ে রইল। বাকি সবাই কোদাল-কুড়ুল নিয়ে কিংবা বাড়ির ছিটেবেড়ার গা থেকে বাতা তুলে নিয়ে সশস্ত্র হয়ে গ্রামের পথে বেরিয়ে ছুটে চলল মাঠের দিকে, যেখানে দুই গ্রামের লোকজন জমির সীমানা নিয়ে তাদের বাৎসরিক রক্তাক্ত শক্তিপরীক্ষায় নেমেছে।

করচাগিন একটা চাবুক হাঁকাতেই ঘোড়াটা দারুণ জোরে ছুটে চলল। ছুটে-চলা গ্রামবাসীদের পাশ কাটিয়ে দৌড়ে চলল ঘোড়াটা। পেছনদিকে কানদুটো টান করে ধরে, মাটির বুকে প্রচণ্ড শব্দে খুর ঠুকে-ঠুকে ঘোড়াটা হাওয়ার বেগে ক্রমশই দ্রুত ছুটে চলল। সামনের ঢিবির উপরে একটা বায়ুচালিত জাঁতাকল বাহু বাড়িয়ে দাঁড়িয়ে আছে যেন পথ আটকাবার উদ্দেশ্যেই। ডানদিকে নদীর পাড়ে নিচু প্রান্তর, আর বাঁ-দিকে একটা রাইস্কেভ উঠে গিয়ে আবার নেমে দিগন্ত পর্যন্ত চলে গেছে। পাকা শস্যের শিষের উপর দিয়ে বাতাস ঢেউ খেলিয়ে চলেছে। পথের ধারে পপিফুলের উজ্জ্বল লাল লাল ছিটে। জায়গাটা নিস্তব্ধ আর অসহ্য গরম। কিন্তু দূরে নদীর রূপোলি ফিতের ফালিটুকু যেখানে রোদে গা এলিয়ে দিয়ে পড়ে আছে, সেখান থেকে ভেসে আসছে লড়াইয়ের চিৎকার।

উন্মত্ত বেগে ঘাসের জমির দিকে ছুটে চলেছে ঘোড়াটা। বিদ্যুতের মতো একটা ভাবনা খেলে গেল পাভেলের মনে, 'ঘোড়াটার পা যদি হড়কায়, তাহলে আমরা দু'জনেই খতম হয়ে যাব।' কিন্তু এখন থামার অবসর নেই, জিনের উপর নিচু হয়ে বসে কানের পাশ দিয়ে বাতাস কেটে বেরিয়ে যাবার শৌ-শৌ শব্দ শোনা ছাড়া এখন আর কিছু করার নেই।

ঘূর্ণির বেগে পাভেল ছুটে এসে পড়ল মাঠের মধ্যে, যেখানে চলেছে সেই রক্তাক্ত হাঙ্গামা। ইতিমধ্যেই জনকতক রক্তাক্ত দেহে মাটিতে পড়ে আছে।

অল্পবয়সী একটি ছেলের মুখ দিয়ে রক্ত ঝরে পড়ছে, তাকে তাড়া করেছে একটা কাস্তের হাতল বাগিয়ে ধরে একজন দাড়িঅলা চাষী—ঘোড়াটা এসে পড়ল তার উপরে। পাশেই রোদে-পোড়া মুখ, বিরাট শরীর একটা লোক তার মস্তবড় আর ভারী বুটসুদ্ধ পা তুলে সাংঘাতিক লাথি ঝাড়তে যাচ্ছে মাটিতে পড়ে-যাওয়া তার শিকারের উপরে।

লড়াইয়ে মত্ত মানুষগুলোর মধ্যে পুরোদমে ঘোড়া ছুটিয়ে এসে পড়ে পাভেল তাদের ছত্রভঙ্গ করে দিল। মানুষগুলো তাদের বিষয়টা কাটিয়ে ওঠার আগেই সে এদের একবার এর, একবার ওর উপরে ঝাঁপিয়ে পড়ে পাগলের মতো ঘোড়া হাঁকাতে থাকল। সে বুঝেছে যে ওদের প্রত্যেকের মনে আতঙ্ক জাগিয়ে তোলাই এই জানোয়ার-বনে-যাওয়া তালগোল-পাকানো মানুষগুলোকে আলাদা করে দেবার একমাত্র উপায়।

'সরে যা, ভয়োরের দল!' ক্রোধে চোঁচিয়ে উঠল সে, 'নইলে প্রত্যেককে ধরে ধরে গুলি করব, শয়তান ডাকাত যতসব!'

পাশবিক ক্রোধে বিকৃত পাশ-ফেরানো একটা মুখ দেখে পাভেল তার পিস্তলটা বের করে নিয়ে লোকটার মাথার উপর দিয়ে গুলি ছুড়ল। আরেকবার ঘুরে দাঁড়াল ঘোড়াটা, আরেকবার গর্জন করে উঠল পিস্তলটা। লড়নেঅলাদের মধ্যে জনকতক হঠে গেল তাদের কাস্তে ফেলে দিয়ে। মাঠের উপর দিয়ে চারদিকে ঘোড়া হাঁকিয়ে ছুটতে ছুটতে অনবরত গুলি ছুড়ে কমিশার শেষে অবস্থাটাকে আয়ত্তে এনে ফেলল। পালিয়ে যেতে আরম্ভ করল চাষীরা। মারামারি করে রক্তপাত ঘটাবার দায়িত্ব এড়াবার জন্য আর হঠাৎ-কোথা-থেকে আবির্ভূত ক্রোধোন্মত্ত ভয়ঙ্কর ঘোড়সওয়ারটির অবিশ্রাস্ত গুলিচালনার হাত থেকে প্রাণ বাঁচাবার জন্য তারা চারদিকে ছড়িয়ে-ছিটিয়ে পড়ল।

সৌভাগ্যক্রমে মারা পড়েনি কেউ, জখম হয়েছিল যারা তারা সেরে উঠল। কয়েকদিন বাদে মামলাটার সুনানির জন্য পোদ্দুবর্ষসিতে জেলা আদালত বসল, কিন্তু ওই মারামারির ব্যাপারে পাণ্ডা ছিল যারা তাদের বের করার জন্য বিচারকের সমস্ত চেষ্টা ব্যর্থ হল। সত্যিকারের বলশেভিকের ধৈর্য আর একাগ্রতা নিয়ে বিচারক অপ্রসন্নমুখ চাষীদের বুঝিয়ে দেবার চেষ্টা করল তাদের কাজটা কতখানি বর্বরোচিত হয়েছে। এ-ধরনের মারামারি যে-কিছুতেই আর সহ্য করা হবে না, এ-কথাটাও সে তাদের জানিয়ে দিল।

চাষীরা বলল, 'যত দোষ ওই জমির চৌহদ্দির, কমরেড বিচারক। কীভাবে যেন ওগুলো সব গুলিয়ে যায়—প্রতি বছর আমাদের লড়াই করে ওর ফয়সালা করতে হয়।'

যাই হোক, জনকতক চাষীকে মারামারি ঘটনাটার জন্য শাস্তি পেতে হল।

যে-ঘাসের জমিগুলোকে নিয়ে গুগুগোল বেধেছিল সেখানে সগুহাখনেক বাদে জনকতক লোকের একটা কমিশন গিয়ে ক্ষেতের ফালিগুলোর ধারে-ধারে খুঁটি পুঁতে সীমানা নির্দিষ্ট করতে লেগে গেল।

কমিশনের সঙ্গে যে বৃদ্ধ আমিন এসেছিল সে তার ফিতেটা জুড়াতে জুড়াতে করচাগিনকে বলল, 'তিরিশ বছর ধরে আমি এই জমি-জরিপের কাজ করছি, সবসময়ে দেখেছি এই দুই জমির মাঝখানকার আল নিয়েই যত গুগুগোল বাধে।' গরম, আর তার উপর পায়ে হেঁটে অনেকখানি ঘোরাঘুরি করার ফলে বৃদ্ধের দারুণ ঘাম ঝরছে।

'ঘাসের জমিগুলো যে কীভাবে ভাগ করা হয়েছে তা দেখলে যেন নিজের চোখেই বিশ্বাস হয় না। মাতাল লোকেও বোধহয় এতটা আঁকাবাঁকা লাইন টানে না। আর, আবাদী-ক্ষেতগুলোর অবস্থা আরও খারাপ। তিন-পা চওড়া এক-একটা ফালি, একটার উপর দিয়ে আরেকটা চলে গেছে—প্রত্যেকটা আলাদা আলাদা করে নেবার চেষ্টা করতে গেলে পাগল হয়ে যেতে হয়। প্রতি বছর আবার এই জমিগুলো আরও বেশি-বেশি সংখ্যায় ভাগাভাগি হয়ে যায়—ছেলেরা বড় হয়ে ওঠে আর বাপেরা তাদের জমি ভাগ করে আলাদা করে দেয়। বিশ্বাস করুন, কুড়ি বছর পরে আর আবাদ করার মতো জমি বাকি থাকবে না, সব আল হয়ে যাবে। এখনই তো এইভাবে শতকরা দশ ভাগ জমি নষ্ট হয়।'

হাসল করচাগিন, 'কুড়ি বছর পরে একটা আলও থাকবে না, কমরেড আমিন।'

প্রশ্নের দৃষ্টিতে তার দিকে তাকাল বৃদ্ধ আমিন।

'কমিউনিষ্ট সমাজের কথা বলছেন তো? হ্যাঁ, কিন্তু সেটা তো হল গিয়ে সুদূর ভবিষ্যতের কথা, তাই না?'

'বুদানোভ্কা যৌথখামারের কথা আপনি শোনেননি?'

'ও, বুঝেছি, কী বলতে চাচ্ছেন।'

'তাহলে?'

'আমি বুদানোভ্কায়ে গিয়েছি। কিন্তু সেটা তো হল গিয়ে একটা ব্যতিক্রম, কমরেড করচাগিন।'

ক্ষেত-জমির টুকরোগুলো মাপজোখ করে চলল কমিশনের লোকজন। দুটি ছেলে হাতুড়ির ঘায়ে খুঁটি পুঁতে চলল। আর, দু'ধারের চাষীরা দাঁড়িয়ে দাঁড়িয়ে তীক্ষ্ণদৃষ্টিতে লক্ষ

করতে লাগল—আগেকার সীমানার লাইন বরাবর যেখানে ঘাসের ফাঁকে আধ-পচা খুঁটিগুলো দেখা যাচ্ছে, ঠিক সেই সেই জায়গায় এই নতুন খুঁটিগুলো পোতা হচ্ছে কিনা।

\*

\*

\*

হাড়-জিরজিরে ঘোড়াটার উপরে চাবুক কষিয়ে অতিভাষী গাড়োয়ানটি ঘুরে বসল গাড়ির সওয়ারদের দিকে।

‘এই কমসমোলের ছেলেগুলো-যে কোথা থেকে এসে জুটল কী জানি!’ অনর্গল বকবক করে চলল সে, ‘এ-ধরনের ব্যাপার আগে কখনও ঘটেছে বলে তো মনে পড়ে না। ইঙ্কলের ওই মাস্টারনী মেয়েটাই এসব শুরু করেছে নিশ্চয়। রাকিতিনা ওর নাম, বোধহয় চেনো ওকে তোমরা? নেহাত ছুঁড়ি একটা, কিন্তু গোলযোগ বাধাচ্ছে! গাঁয়ের যত মেয়েমানুষকে খেপিয়ে তুলছে, যতসব আজোবাজে ধারণা ঢুকিয়ে দিচ্ছে ওদের মাথায়, আর তারই ফলে নানান গুণগোল পাকিয়ে উঠেছে। এতদূর গড়িয়েছে ব্যাপারটা যে, আজকাল আর লোকে তাদের বউদের মারধোর করতে পারে না! আগেকার দিনে মেজাজ বিগড়ে গেলে বউটাকে এক-আধটা চড়াপড় মারত, আর সেও তাতে গুটিসুটি মেরে যেত, হয়তো একটু মুখ গোমড়া করে থাকত, কিন্তু ইদানীং মারলে ওরা এমন শোরগোল তোলে যে গায়ে হাত না-তুললেই ভালো হত বলে মনে হয় তখন। জন-আদালতের কথা বলে শাসায়, আর অল্পবয়েসী বউগুলো তো তালাক দেবার কথা তোলে, যতসব আইনের বুলি আওড়ায়। আমার এই গান্কােকেই দেখ না—ভাবতেই পারবে না কী ঠাণ্ডা স্বভাবের মেয়ে ছিল সে—আজকাল একদম বিগড়ে গেছে, কী যেন প্রতিনিধি না কী হয়েছে—তার মানে হল গিয়ে বোধহয়—মেয়েদের মধ্যে মাতব্বর গোছের আর কী। সারা গাঁয়ের মেয়েরা ওর কাছে এসে জোটে। কথাটা শোনার পর আমি তো ওকে চাবুক মেরে বসতে গিয়েছিলাম আর কী, কিন্তু শেষপর্যন্ত ভাবলাম—মরুক গে যাক। চুলোয় যাক ওরা! বকবক করুক না! ও কিন্তু সংসারের কাজকর্মে খারাপ মেয়ে নয়।’

ঘরে-বোনা শাটের খোলা বোতামের ফাঁক দিয়ে গাড়োয়ানের লোমশ বুকটা দেখা যাচ্ছে। বুকটা চুলকে নিয়ে সে ঘোড়াটার পেটের নিচে একটা চাবুক হাঁকল। গাড়িতে দু’জন সওয়ার—রাজ্জভালিখিন আর লিদা। পোদ্দুবৎসিতে কাজে চলেছে তারা দু’জনেই। মেয়ে-প্রতিনিধিদের একটা সম্মেলনের ব্যবস্থা করার পরিকল্পনা ছিল লিদার। আর রাজ্জভালিখিনকে পাঠানো হচ্ছে সেখানকার সেলের কাজকর্ম সংগঠিত করে তোলার ব্যাপারে সাহায্য করার জন্যে।

‘তাহলে আপনি দেখছি কমসমোল পছন্দ করেন না?’ লিদা কৌতুক করে জিজ্ঞেস করল গাড়োয়ানকে।

ছোট দাড়ি টানতে টানতে একটু চুপ করে থেকে পরে সে উত্তর দিল, ‘না, এতে কী আছে...আমার বিশ্বাস, ছেলেমেয়েদের একটু আমোদ-আহ্লাদ করতে দেওয়া উচিত। নাটক অভিনয় করতে চায় বা ওইরকম কিছু করতে চায় তো করুক-না! আমি নিজে হাসির নাটক দেখতে বড় ভালোবাসি—অবশ্য যদি ভালো নাটক হয়। গোড়ার দিকে আমরা সত্যিই ভেবেছিলাম যে ছেলেমেয়েরা আয়ত্তের বাইরে চলে যাবে, কিন্তু এখন দেখছি একদম অন্যরকম দাঁড়িয়েছে ব্যাপারটা। আমি এর-ওর মুখে তনেছি—

মদ খাওয়া, মারপিট করা, এসব ব্যাপারে ভয়ানক কড়াকড়ি নিয়ম ওদের। লেখাপড়ার দিকেই ওদের বেশি নজর। কিন্তু ধর্মে ওদের একেবারেই মতি নেই, গির্জাটাকে নিয়ে ক্লাবঘর হিশেবে ব্যবহার করার দিকে ওদের সবসময়ে চেষ্টা। ওটা কিন্তু ভালো হচ্ছে না—বুড়োবুড়িরা এর ফলে ওদের বিরুদ্ধে দাঁড়িয়েছে। কিন্তু মোটের ওপর ওরা তত খারাপ নয়। অবশ্য, কথাটা তুললে যখন, তখন বলতে পারি—গায়ের ওই যতসব নিতান্তই গরিব আর বেকার লোক, যারা দিনমজুরি খাটে বা নিজের নিজের ক্ষেতখামার চালাতে পারে না, তাদের ওরা দলে ভিড়িয়ে নিয়ে একটা মস্তবড় ভুল করছে। ধনী চাষীদের ছেলেদের সঙ্গে ওরা কোনো সম্পর্ক রাখে না।

ঘরঘর শব্দ তুলে টিলাটা বেয়ে নেমে এসে গাড়িটা ইঙ্কলবাড়ির সামনে থামল।

\*

\*

\*

ইঙ্কলবাড়িটার দেখাশোনা করে যে-মেয়েটি সে ঘরখানায় আগন্তুকদের থাকার ব্যবস্থা করে দিয়ে নিজে শুতে গেল খড়-রাখার চালাটায়। লিদা আর রাজ্জভালিখিন এইমাত্র একটা সভা থেকে ফিরেছে, বেশ একটু দেরি হয়ে গেছে সভাটা ভাঙতে। কুটিরটার ভেতরে অন্ধকার। জুতো খুলে বিছানায় শুয়ে লিদা প্রায় সঙ্গে সঙ্গেই ঘুমিয়ে পড়ল। খানিক বাদে রাজ্জভালিখিনের হাতের স্থূল স্পর্শে লিদার হঠাৎ ঘুম ভেঙে গেল, হাতখানা তার দেহের উপর এমনভাবে নাড়াচাড়া করছে যে রাজ্জভালিখিনের মতলব সন্ধ্যা লিদার মনে কোনো সন্দেহের অবকাশ রইল না।

‘কী চাও?’

‘আন্তে, লিদা, অভ চেষ্টায়ে না। একা-একা ওখানে শুয়ে থাকতে আর পারছি না। নাক-ডাকানোর চেয়ে উদ্বেজক আর কিছু কি তোমার করবার নেই?’

তাকে একটা ধাক্কা মেরে ঠেলে দিতে দিতে লিদা বলল, ‘আমার গায়ে থাবা মারা বন্ধ করে এখনি নেমে যাও এই বিছানা থেকে!’ রাজ্জভালিখিনের কামাসক্ত হাসিটা লিদার কোনোদিনই ভালো লাগেনি। অত্যন্ত অপমানজনক আর বিদ্রোহাত্মক কিছু-একটা বলার ইচ্ছে হল তার, কিন্তু ঘুমে আচ্ছন্ন হয়ে চোখ বুজল সে।

‘হয়েছে, হয়েছে, থাক! আহা কী আমার বুদ্ধিজীবী হালচাল রে! তুমি তো আর খৃষ্টান সন্ন্যাসিনীদের মঠে মানুষ হওনি। সরল কচি খুকিটির মতো ভাব দেখিয়ে এই ছেলেটিকে বোকা বানাতে পারবে না। যদি সত্যিই আধুনিক হও, তবে আমার কামনার দাবি মেটাবার পর যত পারো ঘুমোও।’

লিদা ব্যাপারটা বুঝে গেছে ধরে নিয়ে রাজ্জভালিখিন এগিয়ে এসে ফের বসল তার বিছানার প্রান্তে, হাতখানা বাড়িয়ে চেপে ধরল লিদার কাঁধ।

‘চুলোর দুয়োরে যা, হতভাগা!’ এবারে লিদা সম্পূর্ণ জেগে গেছে, ‘কালই আমি করচাগিনকে বলে দেব সব কথা।’

লিদার হাতখানা চেপে ধরে রাজ্জভালিখিন রাগে দাঁত চেপে ঝিটঝিটিয়ে বলল, ‘তোমার ওই করচাগিনকে আমি একটুও গ্রাহ্য করিনে। বাধা দেবার চেষ্টা কোরো না, তাহলে জোর খাটাব বলে দিচ্ছি।’

অল্প একটু ধস্তাধস্তির শব্দ, আর তারপরেই রাত্রির নিস্তব্ধতার মধ্যে প্রতিধ্বনিত হল দুটো চড় মারার আওয়াজ....লাফিয়ে একপাশে সরে গেল রাজ্জভালিখিন। হাতড়ে

হাতড়ে দরজার দিকে এগিয়ে এল লিদা, ঠেলে খুলে ফেলল দরজাটা, ছুটে বেরিয়ে এল আঙিনায়। দাঁড়িয়ে রইল চাঁদের আলোয়। রাগে ঘৃণায় সে হাঁফাচ্ছে।

রাজ্জভালিখিন ত্রুন্ধ গলায় লিদার উদ্দেশ্যে বলল, 'ভেতরে যাও, আহাম্মক!'

সে তার নিজের বিছানাটা ঘরের বাইরে চালাটার নিচে তুলে নিয়ে এসে বাকি রাতটুকু সেখানে কাটাল। লিদা দরজাটায় খিল আটকে বন্ধ করে দিয়ে গুটিসুটি মেয়ে হয়ে ফের ঘুমিয়ে পড়ল।

সকালে বাড়ি যাবার সময়ে রাজ্জভালিখিন বুড়ো গাড়োয়ানের পাশে বসে একটার পর একটা সিগারেট ফুঁকে চলেছে।

'ছুঁচিবাইঅলা মেয়েটা হয়তো সত্যিই করচাগিনের কাছে গিয়ে সব ফাঁস করে দেবে, হতস্খাড়ী কোথাকার! ও যে এতটা দেমাক দেখিয়ে বসবে তা কে জানত। আসলে এমন কিছু দেখতে নয়, এদিকে হাবভাব এমন দেখায় যে মনে হয় যেন কতই সুন্দরী। কিন্তু ওর সঙ্গে একটা মিটমাট করে ফেলাই ভালো, নইলে ফ্যাসাদ বাধবে। এমনিতাই তো করচাগিনের বাঁকা দৃষ্টি আছে আমার ওপরে।'

লিদার কাছে এসে বসল সে। যেন কতই অনুশোচনা হয়েছে তার—এমনি একখানা ভাব দেখিয়ে মনমরা হয়ে পড়ার ভান করে ক্ষমা চেয়ে এলোমেলো কতকগুলো কথা বলল।

খেটে গেল ফন্দিটা। গাড়িটা শহরের প্রান্তে পৌঁছানোর আগেই লিদা তাকে কথা দিল যে রাত্রের ঘটনাটার কথা সে কাউকে বলবে না।

\*

\*

\*

সীমান্ত-অঞ্চলের গ্রামগুলোয় একে একে কমসমোল সেল গড়ে উঠছে। কমিউনিস্ট আন্দোলনের এই নবজাত অঙ্কুরগুলিকে সযতনে লালন করে চলেছে জেলা কমিটির সভ্যরা। পাভেল করচাগিন আর লিদা পলেভিখ্ বিভিন্ন অঞ্চলে কমসমোলের সভ্যদের সঙ্গে কাজে অনেক সময় দেয়।

রাজ্জভালিখিন গ্রামাঞ্চলে যাওয়াটা বিশেষ পছন্দ করে না। চাষী ছেলেদের বিশ্বাস কী করে অর্জন করতে হয় তা তার জানা নেই, সমস্ত ব্যাপারে তালগোল পাকাতেই শুধু পারে সে। চাষী তরুণদের সঙ্গে বন্ধুত্ব পাতিয়ে ফেলার ব্যাপারে লিদা আর পাভেলের কিন্তু কোনো অসুবিধা হয় না। মেয়েরা সঙ্গে সঙ্গেই লিদার প্রতি আকৃষ্ট হয়, নিজেদের একজন বলেই তাকে গ্রহণ করে এবং ক্রমশ কমসমোল আন্দোলন সম্বন্ধে সে তাদের মনে আগ্রহ জাগিয়ে তোলে। আর করচাগিনকে তো জেলার সমস্ত তরুণ-তরুণীই চেনে। সামগ্রিক বিভাগে কাজের জন্য যে এক হাজার ছ-শো জন তরুণের ডাক পড়ার কথা, তারা সবাই পাভেলের ব্যাটালিয়নে প্রাথমিক ট্রেনিং পেয়ে গেছে। এখানে গ্রামে-গ্রামে প্রচারের ব্যাপারে তার অ্যাকর্ডিয়ন বাজনা যতটা কাজে লেগেছে এমনটি আর কখনও নয়। এই বাজনাটা পাভেলকে এখানকার তরুণদের মধ্যে দারুণ জনপ্রিয় করে তুলেছে। গ্রামের পথে সন্দের দিকে ওরা জড়ো হয় গানবাজনা উপভোগ করার জন্য। এইসব শৌখিন ঝাঁকড়া-চুলো তরুণদের অনেকের পক্ষেই এই অ্যাকর্ডিয়নের মন-মাতানো সুর শুনতে শুনতে কমসমোলে ঢোকায় পথ শুক্ হল এখান থেকেই—কখনও আবেগভরা সুরে মনকে নাড়া দিয়ে, কখনও দীও

উদ্দীপনায়, আবার কখনও মধুর কোমলতায় সুর বেজে চলে—এমন সুর আছে শুধু ইউক্রেনের এই বিষণ্ণ-বিধুর গানগুলিতেই। ওরা অ্যাকর্ডিয়নের বাজনা শোনে, আর যে-তরুণটি এই অ্যাকর্ডিয়ন বাজায় তার কথাগুলিও শোনে—সে ছিল রেল-কারখানার একজন শ্রমিক আর এখন সে সামরিক কমিশার আর কমসমোলের সম্পাদক। তরুণ এই কমিশার যে-কথাগুলি তাদের বলে, সেই কথাগুলির সঙ্গে তার অ্যাকর্ডিয়নের সুর যেন একটি ঐকতানে মিশে যায়। নতুন নতুন গানে মুখরিত হয়ে উঠছে গ্রামগুলো, কুটিরগুলোয় বাইবেল আর প্রার্থনাগানের বইয়ের পাশাপাশি নতুন নতুন বই দেখা দিচ্ছে।

বেআইনি মাল চালান করে যারা তাদের অবস্থা এখন সজিন। সীমান্তপ্রহরীদের ছাড়াও আরও অনেকের তাল সামলাতে হয় তাদের। সোভিয়েত সরকার কমসমোল সভ্যদের পেয়েছে অতি-বিস্তৃত বন্ধু আর উৎসাহী সহযোগী হিশেবে। মাঝে মাঝে সীমান্ত-অঞ্চলের এই শহরগুলোয় কমসমোল সেলের সভ্যরা উৎসাহের ঝোঁকে শ্রেণিকারে বাড়াবাড়ি করে ফেলে, আর করচাগিনকে তখন আসতে হয় তার তরুণ কমরেডদের সাহায্য করার জন্য। পোদ্ভুৎসির কমসমোল সেলের সম্পাদক খ্রিষ্টোফা খরোভদকো—নীল-চোখ, মাথা-গরম, তর্কবাগীশ এই ছেলেটা ধর্মবিরোধী আন্দোলনে দারুণ উৎসাহী, সে একবার ব্যক্তিগত সূত্রে খবর পেল যে সেদিন রাতে গোপনে সীমান্ত পার করে আনা কিছু চোরাই মাল গ্রামের ময়দা-কলে নিয়ে আসা হবে। সমস্ত কমসমোল সভ্যদের জাগিয়ে তুলে সে সামরিক শিক্ষার জন্য ব্যবহৃত একটা রাইফেল আর দুটো বেয়নেট নিয়ে সশস্ত্র হয়ে গভীর রাতে বেরিয়ে পড়ল; ময়দা-কলের বাড়িটার আশেপাশে দলের ছেলেদের নিঃশব্দে বসিয়ে দিয়ে গুঁৎ পেতে রইল তাদের শিকারের আসার অপেক্ষায়। সীমান্তের ফাঁড়ি এই চোরাকারবারিদের ব্যাপারটা জানতে পেরে তাদের নিজেদের লোকের একটা দল পাঠিয়ে দিয়েছিল। অন্ধকারের মধ্যে এই দুই দলের মধ্যে সংঘর্ষ হয়ে গেল। সীমান্তরক্ষীরা যদি সজাগ দৃষ্টি না-রাখত আর ধৈর্য না-দেখত, তাহলে এই লড়াইয়ে কমসমোলের তরুণদের মধ্যে অনেক হতাহত হত। ছেলেদের শুধু অস্ত্রগুলো কেড়ে নিয়ে তিন-মাইল দূরে একটা গ্রামে নিয়ে আটকে রাখা হল।

করচাগিন সেই সময়ে গাব্রিলভের ওখানে এসে পড়েছিল। পরের দিন সকালে ব্যাটালিয়ন-কমান্ডার যখন তাকে খবরটা জানাল তখন পাভেল ঘোড়ায় চেপে ছুটে এল তার ছেলেদের উদ্ধার করার জন্য।

সীমান্তের ভারপ্রাপ্ত লোকটি হেসে পাভেলকে সব কথা বলল, ‘আচ্ছা, আমরা যা করব বলছি, কমরেড করচাগিন। ছেলেগুলো ভারি চমৎকার, ওদের আমরা বিপদে ফেলব না। কিন্তু তোমায় বেশ ভালো করে সমঝে দেওয়া চাই ওদের—যাতে ওরা আর ভবিষ্যতে আমাদের কাজ নিজেরা করার চেষ্টা না করে।’

সাত্ত্বী-চালাটার দরজা খুলে দিতে এগারোটি ছেলে উঠে বোকার মতো দাঁড়িয়ে দাঁড়িয়ে এক-পা থেকে আরেক পায়ে তাদের শরীরের ভর রাখতে লাগল।

সীমান্তের লোকটা চেষ্টা করে মুখে-চোখে একটা কড়া ভাব ফুটিয়ে তুলে বলল, ‘দ্যাখো একবার তাকিয়ে এদের দিকে। কী বিপ্রী গোলমাল পাকিয়ে তুলেছে গোটা ব্যাপারটার মধ্যে। এখন আমাকে এদের পাঠিয়ে দিতে হবে এলাকার সদর-দপ্তরে।’

এবার খ্রিস্টকা উত্তেজিতভাবে কথা বলল, 'কিন্তু কমরেড সাখারভ, অপরাধটা কী করেছি আমরা? ওই বদমায়েশটার ওপরে অনেকদিন থেকেই আমরা নজর রেখেছিলাম। আমরা তো শুধু সোভিয়েত-কর্তৃপক্ষকে সাহায্য করতে চেয়েছিলাম। আর আপনারা কিনা ডাকাত কয়েদ করার মতো আমাদের আটক করে রেখেছেন!' আহত ভঙ্গিতে সে ঘুরে দাঁড়াল।

খুব গাভীরপূর্ণ আলাপ-আলোচনা চলল কিছুক্ষণ, অবশ্য এটা চালাবার সময় করচাগিন আর সাখারভের পক্ষে গাভীর বজায় রাখা বেশ কঠিন হয়ে দাঁড়িয়েছিল। শেষপর্যন্ত ঠিক হল শান্তি যা পাবার তা যথেষ্ট ছেলেরা পেয়েছে।

পাভেলের উদ্দেশ্যে বলল সাখারভ, 'তুমি যদি ওদের জামিন হয়ে কথা দাও যে ওরা আর সীমান্তের দিকে পা বাড়াবে না, তাহলে আমি ওদের ছেড়ে দিতে রাজি আছি। ওরা অন্যান্য উপায়ে আমাদের সাহায্য করতে পারে।'

'বেশ, আমি ওদের জামিন হলাম। আশা করি, ওরা আমাকে আর অপদস্থ করবে না।'

ছেলেরা গান গাইতে গাইতে কুচকাওয়াজ করে ফিরে এল পোদ্দুবৎসিতে। ব্যাপারটা চেপে দেওয়া হল। এবং অল্প কিছুদিনের মধ্যেই ময়দা-কলের মালিককে শ্রেণ্ডার করা হল—এবার আইনসঙ্গতভাবেই করা হল কাজটা।

\*

\*

\*

মাইদান-ভিলার বনে কয়েক খামার ধনী জার্মান চাষীর বসবাস। এই কুলাকদের খামারগুলো একটা থেকে আরেকটা প্রায় এক-তৃতীয়াংশ মাইল দূরে দূরে। একেকটা ছোটখাটো কেল্লার মতোই মজুবত করে বানানো। এই মাইদান-ভিলা থেকেই আন্তোনিউক আর তার দলবল কাজ চালায়। এককালে জারের সৈন্যবাহিনীতে সার্জেন্ট-মেজর ছিল এই আন্তোনিউক, সে নিজের আত্মীয়স্বজনের মধ্যে থেকে সাতজন গলা-কাটা খুনীকে নিয়ে একটা দল গড়ে তুলেছে, পিস্তল নিয়ে সশস্ত্র হয়ে তারা গ্রামাঞ্চলের রাস্তায় চলতি লোকজনের উপর রাহাজানি চালায়। রক্তপাত ঘটানোর ব্যাপারে কিছুমাত্র ইতস্তত করে না, পয়সাঅলা ফাটকাবাজদের যথাসম্ভব কেড়ে নিতেও তার কোনো আপত্তি নেই, কিন্তু সোভিয়েত-কর্মীদেরও রেহাই দেয় না। আন্তোনিউকের কাজের আসল নীতিটা হচ্ছে চটপট কাজ সেরে ফেলা। আজ হয়তো সে সমবায়-ভাগারের দু'জন কেরানির কাছ থেকে টাকাকড়ি লুটে নিল, আবার পরের দিনই হয়তো বারো-তেরো মাইল দূরে কোনো গ্রামে ডাকবিভাগের কোনো কর্মচারীকে নিরস্ত্র করে ফেলে তার শেষ-কপর্দকটি পর্যন্ত যথাসর্ব্ব লুটে নিল। আরেকজন সহযোগী লুটেরা গোদেই-র সঙ্গে আন্তোনিউকের প্রতিযোগিতা। এরা দু'জন কেউ কান্নর চেয়ে কম যায় না। দু'জনে মিলে এই এলাকার মিলিশিয়া আর সীমান্তরক্ষী কর্তৃপক্ষকে ব্যতিব্যস্ত করে রেখেছে। আন্তোনিউক লুটতরাজ চালায় ঠিক বেরেজ্‌দভের উপায়ে। শহরমুখো রাস্তাগুলো দিয়ে যাতায়াত করাটা ক্রমশই বিপজ্জনক হয়ে দাঁড়াচ্ছে। ধরা পড়ার হাত এড়িয়েই চলেছে ডাকাতটা। অবস্থাটা যখন তার পক্ষে বড় বেশিরকম সঙ্গিন হয়ে ওঠে তখন সীমান্তের ওপারে সরে পড়ে আর কিছুদিন আত্মগোপন করে থাকে। তারপরে ফের দেখা দেয় এমন একটা সময়



বুঝে, যখন তার এসে-পড়ার সম্ভাবনাটা সবচেয়ে কম বলে সবাই ধরে নেয়। তার এই পালিয়ে পালিয়ে বেড়াবার ক্ষমতার ফলেই সে আতঙ্কের কারণ হয়ে দাঁড়িয়েছে। যতবার এই লুটেরাটার নতুন কোনো অত্যাচারের রিপোর্ট লিসিথসিনের কাছে এসে পৌঁছায় ততবারই সে রাগে ঠোট কামড়ায়।

‘এই সাপটার ছোবলানো বন্ধ হবে কবে? হারামজাদাটা যদি এখনও সাবধান না হয়, তাহলে ওকে খতম করার কাজটা আমাকেই করতে হবে দেখছি’, দাঁতে দাঁত চেপে বিড়বিড়িয়ে বলে লিসিথসিন। জেলা কার্যনির্বাহক কমিটির সভাপতি নিজে দু-বার করচাগিনকে আর অন্য তিনজন কমিউনিষ্টকে সঙ্গে নিয়ে ডাকাতটার পিছু ধাওয়া করেছিল, কিন্তু দু-বারই আন্ডোনিউক পালিয়ে গেছে।

ডাকাতগুলোকে শায়েস্তা করার জন্য আঞ্চলিক কেন্দ্র থেকে একটা বিশেষ বাহিনী পাঠানো হল। ফিলাতভ নামে একটি অতি ফ্যাশনদূরস্ত ছেলে এই দলটার কমান্ডার। সীমান্তের নিয়ম অনুসারে কার্যনির্বাহক কমিটির সভাপতির কাছে রিপোর্ট না-করেই তরুণ মোরগের মতো গুমর-ভরা এই ছেলেটি সরাসরি সেমাকি নামে সবচেয়ে কাছাকাছি গ্রামটায় চলে এল। গভীর রাত্রে পৌঁছে সে গ্রামের প্রান্তে একটা বাড়িতে এসে পড়ল তার লোকজনদের নিয়ে। সশস্ত্র কতকগুলো লোকের এই রহস্যজনকভাবে এসে পড়াটা লক্ষ করেছিল পাশের বাড়ির একজন কমসমোল-সভ্য। সঙ্গে সঙ্গে সে ছুটে এসে খবর দিল গ্রাম-সোভিয়েতের সভাপতির কাছে। সে এই বিশেষ দলটা পাঠানোর খবরটা কিছু জানত না, এদের ডাকাতদল বলে ধরে নিয়ে তৎক্ষণাৎ কমসমোল সভ্যটিকে পাঠিয়ে দিল জেলা-কেন্দ্রের কাছে সাহায্য চাইবার জন্য। ফিলাতভের এই গোয়ার্দুর্মির ফলে অনেকগুলো মানুষ প্রায় মরতে বসেছিল আর কী।

লিসিথসিন মাঝরাতে মিলিশিয়ার লোকজনকে জাগিয়ে তুলে সেমাকি গ্রামের এই ‘ডাকাতদল’টির ব্যবস্থা করার জন্য জন-বারো লোক সঙ্গে নিয়ে তাড়াতাড়ি চলে এল। ঘোড়া হাঁকিয়ে বাড়িটার কাছে এসে নেমে পড়ে বেড়া ডিঙিয়ে ঢুকেই ওরা চারধারে ঘিরে ফেলল বাড়িটা। দরজার কাছে একজন সাত্ত্বী পাহারা দিচ্ছিল, সে নেতিয়ে পড়ল মাথার উপরে পিস্তলের কুঁদোর একটা ঘা খেয়ে। কাঁধ লাগিয়ে দরজাটা ভেঙে ফেলল লিসিথসিন, লোকজনসুদ্ধ সে সবেগে ঢুকে পড়ল ঘরের মধ্যে। ছাদ থেকে ঝোলানো একটা তেলের আলোয় ঘরটা অস্পষ্টভাবে আলোকিত। একহাতে একটা হাতবোমা ধরে আর অন্যহাতে পিস্তল বাগিয়ে লিসিথসিন এমন প্রচণ্ড গর্জন করে উঠল যে জানলার শার্সিগুলো থরথর করে কেঁপে উঠল, ‘আত্মসমর্পণ করো, নইলে উড়ে যাবে টুকরো টুকরো হয়ে।’

মেঝে থেকে লাফিয়ে উঠে দাঁড়াল ঘুমে ঝিমস্ত মানুষগুলো, আর এক মিনিট দেরি হলেই একঝাঁক বুলেট এসে ছিড়েখুঁড়ে দিত ওদের। কিন্তু হাতবোমাটা ছুড়ে দেবার ভঙ্গিতে এই মানুষটাকে এমন ভয়ঙ্কর দেখাচ্ছে যে তারা দুই হাত তুলে দাঁড়াল। কয়েক মিনিট বাদে অন্তর্বাস-পরিহিত এই ‘ডাকাত’গুলোকে যখন বাইরে এনে জড়ো করা হল, তখন লিসিথসিনের কোর্তার উপরে মেডেলটা দেখে ফিলাতভ তাড়াতাড়ি বুঝিয়ে বলল ব্যাপারটা।

ভয়ানক ঝেপে গেল লিসিথ্‌সিন। নিতান্ত অবজ্ঞার সঙ্গে থুতু ফেলে শুকনো গলায় বলল, ‘আহাম্মক কোথাকার!’

\*

\*

\*

জার্মানির বিপ্লবের খবর এসে পৌছতে লাগল। হামবুর্গ-এর রাস্তায় রাস্তায় প্রতিরোধ-ব্যূহে রাইফেলের গুলি-ছোড়াছুড়ির ক্ষীণ প্রতিধ্বনি এসে পৌছাচ্ছে এই সীমান্ত-অঞ্চলে। সীমান্ত-এলাকায় একটা উত্তেজনার আবহাওয়া। আগ্রহের সঙ্গে খবরের কাগজ পড়ে লোকে, পশ্চিমদিক থেকে বিপ্লবের হাওয়া বইছে। জেলা কমসমোল কমিটির কাছে কমসমোল-সভ্যেরা সব অনবরত দরখাস্ত পাঠাচ্ছে—লালফৌজে স্বৈচ্ছাসেবক হিশেবে যোগ দিতে চায় তারা। সোভিয়েত ইউনিয়ন যে শান্তির কর্মনীতি অনুসরণ করে চলেছে এবং প্রতিবেশী দেশগুলির সঙ্গে যুদ্ধে নামবার কোনো ইচ্ছে যে তার নেই—এই কথাটা বিভিন্ন কমসমোল সেলের তরুণ সভ্যদের করচাগিনকে অনবরত বুঝিয়ে বলতে হচ্ছে। কিন্তু এর ফলে বিশেষ কিছু হচ্ছে না। প্রতি রবিবারে পাদরির বাড়ির বড় বাগানটায় গোটা জেলার সমস্ত কমসমোল-সভ্যেরা জড়ো হয়ে সভা করে।

একদিন দুপুরে পোদ্দুবুথ্‌সির কমসমোল সেলের সভ্যেরা রীতিমতো ফৌজি কায়দায় কুচকাওয়াজ করে জেলা কমিটির আঙিনায় এসে হাজির। জানলার ফাঁকে এদের দেখেই পাভেল বেরিয়ে এল বারান্দাটায়। গ্রিগুৎসা খরোভদকোর নেতৃত্বে এগারোটি ছেলে দেউড়ির কাছে এসে থামল—তাদের সকলের পায়ে উঁচু-বুট, কাঁধে ঝোলানো ক্যাম্বিসের বড় বড় ন্যাপস্যাক।

বিস্মিত হয়ে পাভেল জিজ্ঞেস করল, ‘কী ব্যাপার, গ্রিগা?’

জবাব না দিয়ে খরোভদকো পাভেলের দিকে চোখের ইশারা করে বাড়িটার ভেতরে চলে এল তাকে সঙ্গে নিয়ে। লিদা, রাজভালিখিন আর অন্য দু’জন কমসমোল সভ্য এই আগন্তুকটির চারধারে ঘিরে দাঁড়িয়ে কৈফিয়ত দাবি করল। দরজাটা বন্ধ করে দিয়ে খরোভদকো তার ফ্যাকাসে ভুরুদুটো কুঁচকে জানাল, ‘কমরেড, এটা হল গিয়ে একটা পরীক্ষামূলক ফৌজি সমাবেশ। পরিকল্পনাটা আমার নিজের। আজ সকালে আমি ছেলেদের জানাই যে জেলা থেকে একটা টেলিগ্রাম এসেছে, অবশ্য অত্যন্ত গোপনীয় টেলিগ্রাম, তাতে বলা হয়েছে জার্মান বুর্জোয়াদের সঙ্গে আমরা যুদ্ধে নামছি এবং ওই পোলিশ পান্দের সঙ্গেও আমরা শিগগিরই লড়াই। মক্কোর নির্দেশ অনুসারে সমস্ত কমসমোল-সভ্যের তলব পড়েছে। আমি বলি, ওদের যদি কেউ লড়াইয়ে নামতে ভয় পায়, তাহলে সে একটা দরখাস্ত দিক, তাকে ঘরে থাকতে দেওয়া হবে। আমি ওদের নির্দেশ দিই—কেউ যেন ঘুণাক্ষরেও কাউকে যুদ্ধের কথাটা না বলে, আর শুধু একটা পাঁউরুটি আর একটুকরো নোনা চর্বি নিয়েই যেন প্রত্যেকে চলে আসে—যাদের ঘরে নোনা চর্বি নেই তারা পেঁয়াজ বা রসুন আনতে পারে। ঠিক হল—গ্রামের বাইরে গোপনে সবাই একজায়গায় এসে মিলব আমরা, জেলা কেন্দ্রে যাব, তারপর সেখান থেকে যাব আঞ্চলিক কেন্দ্রে, সেখানে আমাদের অস্ত্রশস্ত্র দেওয়া হবে। কথাটা শুনে ছেলেদের ভাবখানা যা হল তা যদি দেখতে! আমাকে দারুণ

জেরায় ফেলার চেষ্টা করেছিল ওরা, কিন্তু আমি ওদের বললাম বেশি প্রশ্ন-টশ্ন না-করে কাজে লেগে যেতে। যারা যেতে চায় না, তারা সে-কথা লিখুক। আমরা চাই শুধু স্বৈচ্ছাসেবক। যা হোক, আমার সেলের ছেলেরা তো সব চলে গেল, আর আমি এদিকে রীতিমতো দুর্ভাবনায় পড়ে গেলাম। যদি কেউ আর হাজির না হয়! তা যদি হয়, তাহলে আমি গোটা সেলটাকে ভেঙে দিয়ে অন্য কোনো জায়গায় বদলি হয়ে যাব। গ্রামের বাইরে এসে বসে আছি আর আমার তো বুক টিপটিপ করছে বুঝি কেউ আর এল না শেষপর্যন্ত। কিছুক্ষণ বাদে ওরা এসে জুটতে লাগল একে একে। দু-এক জন একটু-আধটু ফুঁপিয়েছে, লুকোতে চেষ্টা করলেও ওদের মুখ দেখে সেটা বোঝা যায়। দশজনের প্রত্যেকেই এসে হাজির হল, একজনও দলত্যাগী নেই। এই হচ্ছে আমাদের পোদ্দুব্ব্বস সেল!' বিজয়গর্বের সঙ্গে বক্তব্য শেষ করল হ্রিস্তকা।

ব্যাপারটা শুনে ভয়ানক চটে গিয়ে লিডা পলেভিখ্ যখন তাকে বকতে আরম্ভ করল, তখন হ্রিস্তকা তার দিকে অবাক-চোখে তাকিয়ে বলল, 'কী বলছ তুমি? এই হচ্ছে ওদের পরখ করার সবচেয়ে ভালো উপায়, আমি বলে রাখছি। এর মধ্যে দিয়ে ওদের প্রত্যেককে পরিষ্কার করে বুঝে নেওয়া গেল। এর মধ্যে তো কোনো ছলনা নেই। শুধু ওদের যা বলেছি সেটা-যে সত্যি, তা বোঝাবার জন্যে আমি ওদের আঞ্চলিক কেন্দ্রে টেনে নিয়ে যেতাম, কিন্তু বেচারি ছেলেগুলো বড্ড ক্লান্ত হয়ে পড়েছে। বাড়ি যাক গে। তোমাকে একবার ওদের সামনে এসে ছোট একটা বক্তৃতা দিতে হবে, করচাগিন। দেবে, কেমন তো? একটু কিছু বক্তৃতা ওদের না-শোনালাে ভালো দেখায় না। বলো যে কোনো-একটা কারণে ফৌজি তলবটা আপাতত বাতিল করে দেওয়া হয়েছে, কিংবা অমনি অন্যকিছু, কিন্তু এ-কথা বলো যে, তাহলেও, ওদের জন্যে আমরা সত্যিই গর্ববোধ করছি।'

\*

\*

\*

করচাগিন কুচিং কখনও আঞ্চলিক কেন্দ্রে যায়, কারণ ওখানে যাতায়াত করতে কয়েকদিন লেগে যায়, অথচ জেলার কাজে তার এখানেই সবসময়ে থাকার দরকার পড়ে। পক্ষান্তরে, রাজ্জভালিখিন যে-কোনো ছুতোয় গাড়ি চেপে শহরে যাবার জন্য প্রস্তুত। আপাদমস্তক সশস্ত্র হয়ে, নিজেকে ফেনিমোর কুপারের উপন্যাসের কোনো নায়ক হিশেবে কল্পনা করতে করতে সে শহরমুখো রওনা হয়। বনের মধ্যে দিয়ে গাড়ি হাঁকিয়ে যেতে যেতে কাকগুলোর দিকে কিংবা ছুটন্ত কোনো কাঠবেড়ালির দিকে বন্দুক উঁচায়; পথচলতি একলা লোকদের থামিয়ে কড়া গলায় প্রশ্ন করে—তারা কারা, কোথা থেকে আসছে, কোথায় যাচ্ছে। শহরের কাছাকাছি এসে সে অস্ত্রগুলো খুলে নেয়, গাড়ির বড়ের মধ্যে রাইফেলটা গুঁজে রাখে, পকেটে লুকিয়ে ফেলে পিস্তলটা, তারপর আঞ্চলিক কমসমোল কমিটির দপ্তরে ঢোকে স্বাভাবিক চেহারায়া।

দপ্তরে ঢুকতেই সেখানকার সম্পাদক ফেদোভ তাাকে জিজ্ঞেস করল, 'এই যে, বেরেজ্জভের খবর-টবর কী?'

ফেদোভের দপ্তরে সবসময়েই লোকের ভিড়, আর সবাই একসঙ্গে কথা বলে। এরকম অবস্থার মধ্যে কাজ করে যাওয়াটা বড় সহজ নয়—একই সঙ্গে চারজন

লোকের কথা শুনতে হয়, পঞ্চম জনের কথার জবাব দিতে হয়, আবার কিছু-একটা লিখতেও হয় সেইসঙ্গে। ফেদোভের বয়েস খুব কম হলেও সে ১৯১৯ থেকে পার্টি-সভা। শুধু সেইসব ঝোড়ো দিনেই পনেরো-বছর-বয়েসী ছেলের পক্ষে পার্টি-সভা হওয়া সম্ভব ছিল।

‘খবর তো অনেক আছে’, নির্লিপ্তভাবে জবাব দিল রাজ্জভালিখিন, ‘অত খবর এককথায় বলা যায় না। সকাল থেকে রাত্রি পর্যন্ত একটানা কাজের ঠেলা। কতদিকে যে দেখাশোনা করতে হয়! আমাদের একেবারে গোড়া থেকে শুরু করতে হয়েছে, জানো তো। আমি দুটো নতুন সেল গড়ে তুলেছি। আচ্ছা, আমাকে ডেকেছিলে কেন বলা তো?’ কাজের মানুষের ভঙ্গিতে সে একখানা চেয়ারে বসল।

অর্থনীতি বিভাগের ভারপ্রাপ্ত ক্রিমস্কি তার ডেস্কের উপর কাগজের স্তুপ থেকে একমুহূর্তের জন্য মাথা তুলে বলল, ‘আমরা তো করচাগিনকে আসতে বলেছিলাম, তোমাকে নয়।’

তামাকের ধোঁয়া ছেড়ে ঘন একটা মেঘের সৃষ্টি করে রাজ্জভালিখিন বলল, ‘করচাগিন এখানে আসাটা পছন্দ কবে না, তাই আর সব কাজের ওপর আমাকেই আসতে হল...সাধারণত দেখা যাচ্ছে, সম্পাদকের মধ্যে কিছু লোক বেশ দিব্যি আছে। তারা নিজেরা কিছু করে না, আমার মতো গর্দভদেরই যত বোঝা বইতে হয়। করচাগিন যখনই সীমান্তে যায়, দু-তিন সপ্তাহের মধ্যে আর ফেরে না, আর সমস্ত কাজকর্ম আমার ওপরে এসে পড়ে।’

সে-ই যে জেলা-সম্পাদকের পদের পক্ষে যোগ্যতর লোক—রাজ্জভালিখিনের এই সুস্পষ্ট ইঙ্গিতটুকু তার শ্রোতার-যে ধরতে পারেনি তা নয়।

সে চলে যাবার পর ফেদোভ অন্যদের কাছে মন্তব্য করল, ‘এই লোকটাকে আমার ভালো লাগে না।’

রাজ্জভালিখিনের চালিয়াতিটা দৈবক্রমে একদিন ফাঁস হয়ে গেল। লিসিথসিন একদিন ফেদোভের দপ্তরে এসেছিল ডাকে-আসা কাগজপত্র ইত্যাদি নিয়ে যাবার জন্য। জেলা থেকে যারা আসে, এই হচ্ছে তাদের সবারই দস্তুর। ফেদোভের সঙ্গে লিসিথসিনের কথাবার্তা-প্রসঙ্গে রাজ্জভালিখিনের স্বরূপ প্রকাশ পেয়ে গেল।

লিসিথসিনের বিদায় নেবার সময় ফেদোভ তাকে বলল, ‘যাই হোক, করচাগিনকে একবার পাঠিয়ে দিও এখানে। আমরা তো তাকে প্রায় চিনিই না বলতে গেলে।’

‘বেশ তো। কিন্তু দেখো, ওকে যেন আবার আমাদের কাছ থেকে নিয়ে নেবার চেষ্টা কোরো না। সেটা আমরা হতে দেব না।’

\*

\*

\*

এ বছর এই সীমান্ত-অঞ্চলে অক্টোবর বিপ্লবের বার্ষিক উৎসব অন্যান্য বারের চেয়েও বেশি উৎসাহ-উদ্দীপনার সঙ্গে অনুষ্ঠিত হল। সীমান্তের গ্রামগুলিতে যে-উৎসব হবে, সেটার ব্যবস্থাপক-কমিটির সভাপতি মনোনীত হল পাভেল করচাগিন। পোদ্ভুবৎসিতে সভার শেষে পাশাপাশি তিনটি গ্রামের পাঁচ হাজার চাষী এক-তৃতীয়াংশ মাইল লম্বা এক মিছিল করে লাল ঝাণ্ডা নিয়ে ফৌজি বাজনা বাজিয়ে

সীমান্ত পর্যন্ত গেল। মিছিলের সামনে ছিল শিক্ষার্থী ব্যাটালিয়নটা। সীমান্তের সোভিয়েত এলাকার ধার ঘেঁষে খুঁটিগুলোর সমান্তরাল রেখার সুশৃঙ্খল মিছিলটা এগিয়ে গেল; যে-গ্রামগুলির মাঝখান দিয়ে সীমা-নির্দেশক রেখাচিহ্নটা চলে গেছে গ্রামগুলিকে দু-ভাগে ভাগ করে দিয়ে সেই গ্রামগুলির দিকে গেল মিছিলটা। পোলিশরা তাদের সীমানা-এলাকায় এ-ধরনের দৃশ্য আগে কখনও দেখেনি। মিছিলের সামনে ঘোড়ায় চেপে চলেছে ব্যাটালিয়ন-কম্যান্ডার গাব্রিলভ আর পাভেল করচাগিন, তাদের পেছনে বাজনা বাজছে, হাওয়ায় পতপত করে উড়ছে ঝাঙাগুলো, গলা মিলিয়ে গান ধরেছে সবাই, বহুদূর পর্যন্ত প্রতিধ্বনিত হয়ে ফিরছে সেই গানের সুর। ছুটির দিনের সবচেয়ে ভালো পোশাক পরে এসেছে খুশি-ভরা-মন চাষী ছেলেরা, কিচিরমিচির করছে, খিলখিল করে ফুটির হাসি হাসছে গ্রামের মেয়েরা, বড়রা গভীরমুখে কুচকাওয়াজ করে চলেছে, বৃদ্ধেরা চলেছে একটা পবিত্র বিজয়-অভিযানের ভাব নিয়ে। চোখ যতদূর যায় শুধু মানুষের স্রোত। সীমান্তের একধার ঘেঁষে বয়ে চলেছে সেই মিছিলের স্রোত, কিন্তু সেই নিষিদ্ধ রেখাচিহ্নটির উপরে কেউ একবার পা-ও ফেলল না। করচাগিন দেখল জনসমুদ্রের এই কুচকাওয়াজের গতি। কমসমোল-সভ্যেরা গান ধরেছে :

গহন অরণ্য থেকে বৃটেন-সাগর জুড়ে  
সবচেয়ে বলীয়ান এই লাল ফৌজ!

তার জায়গায় মেয়েদের গলা-মেলানো গান শুরু হল :

ওই যে পাহাড়তলীর কোলে মেয়েরা ফসল কাটে...

সোভিয়েত-সাক্সীরা খুশির হাসি হেসে মিছিলটাকে অভ্যর্থনা জানাল। বিমূঢ়ভাবে তাকিয়ে রইল পোলিশ-প্রহরীরা। সীমান্ত দিয়ে এই মিছিল করে যাওয়ায় পোলিশ-এলাকায় বেশ একটা সচকিত ভাবের সৃষ্টি হল—যদিও পোলিশবাহিনীর কর্তৃপক্ষকে আগে থেকেই এই মিছিলের কথা জানিয়ে দেওয়া হয়েছিল। ঘোড়সওয়ার চৌকিদার সৈন্যগুলো অস্থিরভাবে ঘোরাঘুরি করতে থাকল, সীমান্তরক্ষী সৈন্যদের সংখ্যা বাড়িয়ে দেওয়া হয়েছে পাঁচগুণ এবং জরুরি অবস্থার জন্য প্রস্তুত রিজার্ভ সৈন্যদের কাছাকাছি খাদের মধ্যে আড়ালে লুকিয়ে রাখা হয়েছে। কিন্তু মিছিলটা গানের সুরে আকাশ মুখরিত করে তুলে খুশির তালে পা ফেলে-ফেলে নিজেদের এলাকার মধ্যে দিয়েই এগিয়ে গেল।

একটা টিবির উপরে দাঁড়িয়ে ছিল একজন পোলিশ-সাক্সী। তালে তালে পা ফেলে মানুষের সারিটা এগিয়ে আসছে। কুচকাওয়াজের একটা সংগীতের প্রথম কলি বেজে উঠতেই পোলিশ-সৈন্যটি ফৌজি কেতায় তার রাইফেলটা পাশে নামিয়ে এনে সামরিক সেলাম জানাল, করচাগিন স্পষ্ট গুণতে পেল, 'কমিউন জিন্দাবাদ!'

সৈনিকটির চোখের দিকে তাকিয়েই পাভেল বুঝল যে সে-ই বলেছে ওই কথাগুলো। মুগ্ধদৃষ্টিতে তার দিকে তাকিয়ে রইল পাভেল।

ও আমাদের বন্ধু! সৈনিকের উর্দির নিচে গুর হৃদয়ে এই মিছিলের তালে তালে সাড়া জেগেছে। পাভেল পোলিশ-ভাষায় নিচুগলায় বলল, 'অভিবাদন জানাই, কমরেড!'

মিছিলটা যতক্ষণ পর্যন্ত তার সামনে দিয়ে গেল, ততক্ষণ পর্যন্ত সৈনিকটি ওইভাবে দাঁড়িয়ে রইল। পাভেল বারকতক পেছন ফিরে দেখল কালো ছোট মূর্তিটার দিকে। এই আর-একজন পোলিশ। গৌফজোড়ায় তার পাক ধরেছে, টুপিটার চকচকে চুড়োর নিচে তার চোখের চাউনি ভাবলেশহীন। পাভেল এইমাত্র যা শুনেছে, তখনও সেই চিন্তায় আচ্ছন্ন হয়ে পোলিশ-ভাষায় বিড়বিড় করে বলল যেন আপন মনেই, 'অভিবাদন জানাই, কমরেড!'

কিন্তু কোনো উত্তর এল না।

মুদু হাসল গাভ্রিলভ। ব্যাপারটা লক্ষ করেছে সে।

'বড় বেশি আশা করছ তুমি,' মন্তব্য করল সে, 'এরা সবাই সাধারণ পদাতিক সৈন্য নয়, বুঝলে? কিছু কিছু পুলিশও আছে এদের মধ্যে। ওর উর্দির হাতায় পটিটা লক্ষ করো নি? ও নিশ্চয়ই পুলিশ।'

মিছিলের সামনের দিকটা ইতিমধ্যে পাহাড়ের ঢালু বেয়ে নামতে শুরু করেছে গ্রামের মুখে। এই গ্রামটাকে দু-ভাগে ভাগ করে দিয়ে মাঝখান দিয়ে চলে গেছে সীমারেখাটা। গ্রামের সোভিয়েত-এলাকাভুক্ত অর্ধাংশ সমারোহের সঙ্গে এই মিছিলের অতিথিদের অভ্যর্থনার আয়োজন করেছে। ছোট নদীটার একপাড়ে সীমান্তের সাকোটোর কাছে সমস্ত গ্রামবাসী এসে অপেক্ষা করছে। রাস্তাটার দু'পাশে তরুণ-তরুণীরা সব সার বেঁধে দাঁড়িয়েছে। পোলিশ-এলাকায় কুঁড়েঘর আর খামারবাড়িগুলোর চালে চালে লোক ভর্তি হয়ে গেছে, একাত্তর আশ্রয়ের সঙ্গে তারা নদীর অন্য তীরের ঘটনাগুলো লক্ষ করছে। কুঁড়েঘরের দাওয়ায় আর বাগানের বেড়ার পাশে-পাশে চাষীদের ভিড়। দু'পাশে সারিবাধা মানুষগুলোর মাঝখানে মিছিলটা ঢুকতেই 'আন্তর্জাতিক'-এর সুর বেজে উঠল। সবুজ পাতায় সাজানো একটা মঞ্চের উপর থেকে বক্তৃতা হতে থাকল। জনতাকে উদ্দেশ্য করে বক্তৃতা দিল তরুণ বক্তারা আর শাদাচুল অভিজ্ঞ প্রবীণরা। পাভেলও তার ইউক্রেনীয় মাতৃভাষায় বক্তৃতা দিল। সীমান্ত ডিঙিয়ে তার কথাগুলো নদীর অপর পারে শোনা যেতে লাগল এবং পাছে তার অগ্নিগর্ভ কথাগুলো পোলিশ-এলাকার শ্রোতাদের মনে উত্তেজনার সৃষ্টি করে, এই আশঙ্কায় ওদিককার পুলিশ গ্রামবাসীদের হঠিয়ে দিতে থাকল। চাবুকগুলো সপাসপ শব্দে ওঠানামা করতে লাগল, বন্দুকের গুলির ফাঁকা আওয়াজ উঠল।

ফাঁকা হয়ে গেল রাস্তাগুলো। পুলিশের গুলি ছোড়ার আওয়াজে ভয় পেয়ে তরুণেরা চালের উপর থেকে নেমে অদৃশ্য হয়ে গেল। দৃশ্যটা দেখে সোভিয়েত এলাকার লোকেদের মুখ গম্ভীর হয়ে গেল। একজন বুড়ো রাখাল সব দেখে অত্যন্ত ক্রুদ্ধ হয়ে মঞ্চের উপর উঠে এল জনকতক ছেলের সাহায্যে। দারুণ উত্তেজনার সঙ্গে সে জনতার উদ্দেশ্যে বক্তৃতা দিল, 'তোমরা, যারা আমাদের ছেলেমেয়ে, তারা সবাই ঘটনাটা দেখলে তো!' আমাদের সঙ্গেও ঠিক এইরকম ব্যবহারই করা হত। কিন্তু আর নয়। কৃষকদের চাবুক মারার সাহস আর কারও নেই। অভিজ্ঞাতদের আর তাদের চাবুক-মারা আমরা খতম করেছি। এখন ক্ষমতা আমাদের হাতে; বাবারা, এই ক্ষমতা জোরসে ধরে রাখা তোমাদেরই কাজ। বুড়োমানুষ আমি, বক্তৃতা তেমন করতে পারি না। যদি পারতাম, তাহলে অনেককিছু আমার বলার ছিল তোমাদের। বলতাম জারদের অধীনে বলদের মতো কেমন খেটে মরেছি...ওই হতভাগ্যদের জন্যে কষ্ট হয়

সেইজন্যেই!’ জীর্ণ একটা হাত বাড়িয়ে ধরল নদীর অপর পারে, তারপরে আচ্ছন্ন হয়ে গিয়ে কেঁদে ফেলল সে—কচি শিশু আর অতিবৃদ্ধেরা যেরকম কেঁদে ওঠে।

তারপরে বক্তৃতা দিল খ্রিস্টকা খরোভদকো। তার জ্বালাময়ী বক্তৃতা শুনতে শুনতে গাব্রিলভ তার ঘোড়াটা ঘুরিয়ে নিয়ে নদীর অপর পারে চারিদিকে একবার দেখে নিল—সেখানে কেউ তার বক্তৃতা লিখে নিচ্ছে কিনা। কিন্তু ওপারে নদীর তীর জনশূন্য। সাকোর কাছের সান্ধ্যটিকে পর্যন্ত সরিয়ে দেওয়া হয়েছে।

‘দেখে তো মনে হচ্ছে যেন পররাষ্ট্র-সংক্রান্ত কমিশারিয়েটে কোনো প্রতিবাদপত্র পাঠানো হবে না,’ ঠাট্টা করল গাব্রিলভ।

\*

\*

\*

শরতের শেষদিকে এক বৃষ্টির রাতে আস্তোনিউক আর তার সাতজন সহযোগীর রক্তাক্ত গতিবিধি শেষ হয়ে গেল। মাইদান-ভিলার জার্মান-বসতিটায় একজন ধনী চাষীর বাড়িতে একটা বিয়ের ভোজসভায় রাহাজানরা ধরা পড়ল। খ্রোলিনের কমিউনের চাষীরা পিছু ধরে গিয়ে তাকে পাকড়াও করে ফেলল।

মাইদান-ভিলায় আস্তোনিউক-দলের নিমন্ত্রিত হয়ে আসার খবরটা ছড়িয়েছিল স্থানীয় মেয়েরা। সঙ্গে সঙ্গে সেলের বারোজন সভ্য জড়ো হয়ে হাতের কাছে যা-কিছু জুটল তাই নিয়ে সশস্ত্র হয়ে গাড়িতে চেপে রওনা হয়ে গেল মাইদান-ভিলায়। তার আগে খবর পাঠিয়ে দিল বেরেজ্‌দভে—একটা লোক খবর নিয়ে চলে গেল দারুণ জোরে ঘোড়া হাঁকিয়ে। তার যাওয়ার পথে সেমাকি গ্রামে ফিলাতভের ফৌজি দলটার সঙ্গে হঠাৎ দেখা হয়ে গেল; ফিলাতভ তার দলবল নিয়ে ঘোড়া হাঁকাল মাইদান-ভিলার দিকে। খ্রোলিনের কমিউনাররা খামারবাড়ীটাকে চারদিক থেকে ঘিরে ফেলেছে, আস্তোনিউকের দলের সঙ্গে তাদের রাইফেল ছোড়াছুড়ি চলছে। খামারের একটা ছোটবাড়ির মধ্যে আশ্রয় নিয়ে আস্তোনিউকের দল বন্দুকের পাল্লায় মধ্যে যে আসছে তার দিকেই গুলি ছুড়ছে। হঠাৎ একটা পাল্টা আক্রমণ করে বেরিয়ে যাবার চেষ্টা করেছিল তারা, কিন্তু দলের একজন লোককে খুইয়ে এখন বাড়িটার ভেতরে হঠাৎ আসতে বাধ্য হয়েছে। আস্তোনিউক এইরকম কোণঠাসা অবস্থায় এর আগেও অনেকবার পড়েছে এবং প্রতিবারই হাতবোমার সাহায্যে আর অন্ধকারের সুযোগে সে পথ কেটে বেরিয়ে গেছে। এবারেও সে হয়তো এইভাবে পালাতে পারত, কারণ, খ্রোলিনের কমিউনারদের মধ্যে ইতিমধ্যেই দু’জন মারা পড়েছে। কিন্তু ঠিক সেই মুহূর্তে ফিলাতভ এসে পড়ল। আস্তোনিউক বুঝতে পারল যে এবারে আর তার পার নেই। বাড়িটার সমস্ত জানলাগুলোর ফাঁক দিয়ে সে সকাল পর্যন্ত পাল্টা গুলি চালিয়ে গেল। কিন্তু ভোরবেলায় ওরা তাকে পাকড়াও করল। সাতজনের একজনও আত্মসমর্পণ করল না। এই সাপের বাসাটা ধ্বংস করতে গিয়ে চারজন লোক মারা পড়ল। নিহতদের মধ্যে তিনজন সদ্য-সংগঠিত খ্রোলিনের কমসমোল গ্রুপের সভ্য।

\*

\*

\*

আঞ্চলিক বাহিনীর শরৎকালীন মহলার জন্য পাভেল করচাগিনের ব্যাটালিয়নের ডাক পড়েছে। দারুণ বৃষ্টির মধ্যে একদিনে পুরো ছাব্বিশ মাইল রাস্তা হেঁটে তার

ব্যাটালিয়ন এসে পৌছাল ডিভিশনের ফৌজি-শিবিরে। ভোরবেলায় বেরিয়ে তারা গম্ভ্যস্থলে এসে পৌছাল অনেক রাতে। ব্যাটালিয়ন-কম্যান্ডার গুসেভ আর তার কমিশার এল ঘোড়ায় চেপে। আট-শো জন শিক্ষার্থী যখন ব্যারাকে এসে পৌছাল, তখন ক্লাস্তিতে তাদের দম ফুরিয়ে এসেছে। সঙ্গে সঙ্গে ঘুমোতে গেল তারা। পরের দিন সকালেই মহলা আরম্ভ হবার কথা—আঞ্চলিক ডিভিশনের সদর-ঘাটি থেকে এই ব্যাটালিয়নটাকে ডেকে পাঠাতে দেরি হয়েছিল। পরিদর্শনের জন্য ব্যাটালিয়নটা যখন উর্দি পরে আর রাইফেল নিয়ে শামিল হয়ে দাঁড়াল তখন তার চেহারাটা একেবারে বদলে গেল। গুসেভ এবং করচাগিন দু'জনেই এই তরুণদের শিক্ষিত করে তুলবার জন্য যথেষ্ট সময় আর শক্তি ব্যয় করেছে, তারা-যে যোগ্যতার পরীক্ষায় উত্তীর্ণ হবে সে-সম্বন্ধে তারা নিশ্চিত ছিল। সরকারি পরিদর্শনের পরে এবং ব্যাটালিয়নের ছেলেদের সামরিক কলাকৌশলে পারদর্শিতা দেখানো শেষ হবার পরে কম্যান্ডারদের মধ্যে থেকে একজন করচাগিনের দিকে এগিয়ে এল। লোকটা সুপুরুষ, কিন্তু মুখখানা একটু মাংসল। তীক্ষ্ণগলায় কৈফিয়ত চাইল সে, 'আপনি ঘোড়ায় চেপে রয়েছেন কেন? আমাদের শিক্ষার্থী ব্যাটালিয়নগুলোর কম্যান্ডার আর কমিশারদের ঘোড়ায় চাপার এজিয়ার নেই। ঘোড়াটাকে আস্তাবলে জিম্মা করে দিয়ে কুচকাওয়াজের জন্যে পায়ে হেঁটে আসুন।'

পাভেল জানে, ঘোড়া থেকে নেমে গেলে সে আর মহলায় যোগ দিতে পারবে না, কারণ পায়ে হেঁটে এক মাইলও যেতে পারবে না সে। কিন্তু এই বাহারে চামড়ার বেল্ট-লাগানো শৌখিন আর উচ্চকণ্ঠ ফুলবারুটিকে সে অবস্থাটা খুলে বোঝাবে কী করে? 'পায়ে হেঁটে তো আমি এই মহলায় যোগ দিতে পারব না।'

'কেন পারবেন না?'

কিছু-একটা কৈফিয়ত দিতে হবে বুঝতে পেরে পাভেল নিচুগলায় বলল, 'আমার পাদুটো ফুলে গেছে, এক সপ্তাহ ধরে হাঁটাহাঁটি আর দৌড়ানো আমার সহ্য হবে না। কিন্তু, কমরেড, আপনি কে জানতে পারি?'

'প্রথমত, আপনার ব্যাটালিয়ন যে-সৈন্যবাহিনীর অন্তর্ভুক্ত, আমি তার সেনানীমঞ্জলীর অধিনায়ক। দ্বিতীয়ত, আমি আপনাকে আরেকবার হুকুম করছি ঘোড়া থেকে নেমে যাবার জন্যে। আপনি যদি পঙ্গুই হন, তাহলে ফৌজে থাকা উচিত হয়নি।'

মুখের উপর যেন একটা চাবুকের ঘা খেয়েছে বলে মনে হল পাভেলের। লাগামটায় নাড়া লাগাল সে, কিন্তু গুসেভের বলিষ্ঠ হাত তাকে নিরস্ত করল। কয়েক মুহূর্তের জন্য আহত আত্মসম্মান আর আত্মসংযমের একটা লড়াই চলল তার মনের মধ্যে—কোনটা জয়ী হবে। কিন্তু পাভেল করচাগিন এখন আর লাগফৌজের সেই সৈন্য নয় যে একটা দল থেকে আরেকটা দলে হালকা মনে বদলি হয়ে আসবে। সে এখন ব্যাটালিয়ন কমিশার, আর তার ব্যাটালিয়নটা দাঁড়িয়ে রয়েছে তার পেছনেই। হুকুমটাকে যদি সে অমান্য করে, তাহলে নিজের সৈনিকদের সামনে সে সামরিক শৃঙ্খলা সম্বন্ধে বিশ্রী একটা উদাহরণ তুলে ধরবে! এই পদমর্যাদা-গর্বিত গর্দভটার জন্য সে তো আর তার ব্যাটালিয়নটাকে গড়ে তোলেনি। রেকাব থেকে পা সরিয়ে নিয়ে ঘোড়া থেকে নেমে এল সে, হাঁটুদুটোর কাছে নিদারুণ যন্ত্রণাটাকে চাপতে চাপতে ডানদিকের সৈন্যসারির দিকে এগিয়ে গেল।



দিনকয়েক ধরে আবহাওয়াটা খুব ভালো—এমনটা সাধারণত হয় না। ফৌজি মহলা শেষ হয়ে এল প্রায়। পাঁচদিনের দিন ফৌজিদলগুলো এসে গেল শেপেতোভ্‌কার কাছাকাছি—সেখানেই মহলা শেষ হবার কথা। বেরেজ্‌দভ্‌ ব্যাটালিয়নটার ওপরে ভার দেওয়া হয়েছে—ক্রিমেন্স্তোভিচি গ্রামের দিক থেকে গিয়ে রেলস্টেশনটাকে দখল করে নিতে হবে।

পাভেল এখন তার নিজের দেশের মাটিতে এসে পড়েছে। স্টেশনটার দিকে এগুবার সমস্ত পথঘাট দেখিয়ে দিল সে গুসেভকে। ব্যাটালিয়নটা দু'ভাগে ভাগ হয়ে গিয়ে বেশ খানিকটা তফাত দিয়ে পথ ঘুরে এসে 'শত্রু'র পেছনের ঘাঁটির ওপরে হঠাৎ এসে পড়ে প্রচণ্ড জয়ধ্বনির সঙ্গে স্টেশন-বাড়িটাকে দখল করে নিল। এই সাময়িক পরিকল্পনাটা সবচেয়ে বেশি প্রশংসা পেল। বেরেজ্‌দভের সৈন্যরা স্টেশনটা দখল করে রইল, আর যে-ব্যাটালিয়নটার ওপরে স্টেশনটার প্রতিরক্ষার ভার ছিল, তাদের শতকরা পঞ্চাশ জন 'নিহত' হয়েছে বলে ধরে নিয়ে তারা বনের দিকে হটে গেল।

ব্যাটালিয়নের দুটো দলের মধ্যে একটার ভার নিল পাভেল। নিজের সৈন্যদলকে ছোট ছোট দলে ভাগ হয়ে সারি বেঁধে দাঁড়াবার হুকুম দিয়ে পাভেল রাস্তার মাঝখানে তিন-নব্ব্ব কম্পানির কমান্ডার আর রাজনীতিক নেতার সঙ্গে দাঁড়িয়ে আছে, এমন সময়ে তার কাছে দৌড়ে এল একজন লালফৌজের লোক।

'কমরেড কমিশার', হাঁফাতে হাঁফাতে বলল সে, 'ব্যাটালিয়ন কমান্ডার জানতে চাচ্ছেন—মেশিনগান-বাহিনীর সৈন্যরা রেলওয়ে-ক্রসিংটা দখল করে আছে কিনা। কমিশনটা এদিকে আসছে।'

পাভেল আর কমান্ডাররা একসঙ্গে একটা রেল-ক্রসিংয়ের কাছে এল।

রেজিমেন্টের কমান্ডার আর তার সহকারীরা সবাই ছিল সেখানে। স্টেশন দখল করে নেবার পরিকল্পনাটাকে সফলভাবে কার্যকরী করার জন্য গুসেভকে অভিনন্দন জানানো হল। পরাজিত ব্যাটালিয়নের প্রতিনিধিরা নিরীহভাবে চেয়ে রইল, এমনকি আত্মপক্ষ সমর্থনের কোনো চেষ্টাও তারা করল না।

গুসেভ বলল, 'এর জন্যে কৃতিত্বটা আমার প্রাপ্য নয়। করচাগিনই আমাদের পথঘাট দেখিয়ে দিয়েছিল। ও এই অঞ্চলের লোক।'

সেনানীমণ্ডলীর অধিনায়কটি পাভেলের দিকে ঘোড়া হাঁকিয়ে এসে নাক সিটকে বলল, 'আপনি তো দেখছি দিবা দৌড়াতে পারেন, কমরেড। তাহলে ঘোড়াটা খালি চাল বাড়াবার জন্যেই, না কি?' আরও কী যেন বলতে যাচ্ছিল সে, কিন্তু করচাগিনের মুখ আর চোখের চাউনি দেখে সে থেমে গেল।

উচ্চপদস্থ কমান্ডাররা সবাই চলে যাবার পর পাভেল গুসেভকে জিজ্ঞেস করল, 'তুমি ওর নামটা জানো নাকি?'

গুসেভ তার কাঁধ চাপড়ে দিল, 'ওই ভুইফোড়টার কথায় কান দিয়ে না। নাম ওর চুমানিন। আমি যতদূর জানি, আগে ও ছিল একজন এনসাইন।'

সেদিন সারাদিন ধরে পাভেল বারকতক মাথা খুঁড়ে মনে করবার চেষ্টা করল সে কোথায় এই নামটা আগে শুনেছে। কিন্তু কিছুতেই মনে করতে পারল না।

\*

\*

\*

ফৌজি মহলা শেষ হয়ে গেছে। পাভেলদের ব্যাটালিয়ন উচ্চপ্রশংসা পাবার পর ফিরে গেছে বেরেজ্‌দে। ভীষণ ক্লান্ত পাভেল দু-একদিন বিশ্রাম করবার জন্য থেকে গেল মা'র কাছে। পাভেল দু-দিন ধরে রোজ একটানা বিশ ঘন্টা করে ঘুমোল। ঘোড়াটা থাকল আরতিওমের কাছে। তৃতীয় দিনে সে গেল রেল-কারখানায় আরতিওমের সঙ্গে দেখা করার জন্য। এই ধোঁয়ায় কালো বিষণ্ণ বাড়িটায় ঢুকে পাভেলের মনে হল যেন সে তার নিজের বাড়িতেই এসেছে। পরম পরিভ্রমের সঙ্গে সে কয়লার ধোঁয়াভরা বাতাস নিশ্বাসের সঙ্গে টেনে নিল। বড় গভীর টান এর—আবাল্য পরিচিত, এরই মধ্যে সে বড় হয়ে উঠেছে, এর সঙ্গে তার আত্মীয়তা। অত্যন্ত প্রিয় কোনোকিছুকে যেন হারিয়েছে বলে তার মনে হল। কত মাস হয়ে গেল সে একটা ইঞ্জিনের সিটির শব্দ শোনেনি। সেই চিরপরিচিত পরিবেশটুকু ফিরে পাবার জন্য এই এককালের কয়লা-জোগানদার আর ইলেকট্রিশিয়ানের মনে তীব্র কামনা জাগল—ডাঙার উপরে দীর্ঘদিন কাটানোর পরে নাবিকের মনে যেমন নিঃসীম সমুদ্র-বিস্তারের মধ্যে ফিরে যাবার জন্য কামনা জাগে। অনেকক্ষণ লেগে গেল তার এই অনুভূতিটাকে কাটিয়ে উঠতে। দাদার সঙ্গে কথাবার্তা সামান্যই বলল সে। আরতিওম এখন একটা হাপরযন্ত্রে কাজ করছে। পাভেল লক্ষ করল—আরতিওমের কপালে নতুন একটা কুঞ্জন জেগেছে। সে এখন দুটি সম্ভানের বাপ। স্পষ্টই বোঝা যাচ্ছে, বেশ কষ্টেসুটে চালাতে হচ্ছে তাকে। সে অবশ্য কোনো অভিযোগ তোলেনি, কিন্তু পাভেল নিজেই বুঝতে পারল।

তারা দু'জনে দু-এক ঘন্টা পাশাপাশি কাজ করল। তারপরে চলে এল পাভেল। রেললাইনটা পার হবার জায়গাটায় এসে পাভেল তার ঘোড়াটাকে রাশ টেনে থামিয়ে অনেকক্ষণ ধরে তাকিয়ে রইল স্টেশনটার দিকে। তারপরে চাবুক মেরে ঘোড়াটাকে জোরে হাঁকিয়ে চলল বনের ভিতর দিয়ে।

বনের পথগুলো আজকাল সম্পূর্ণ নিরাপদ। ছোট-বড় সমস্ত রাহাজান দলগুলিকে বলশেভিকরা নিশ্চিহ্ন করে দিয়েছে। এই অঞ্চলের গ্রামবাসীরা এখন শান্তিতে বসবাস করছে।

দুপুরের দিকে পাভেল এসে পৌঁছল বেরেজ্‌দে। লিদা পলেভিখ্‌ জেলা কমিটির দপ্তর-বাড়ির দাওয়ায় ছুটে বেরিয়ে এল তাকে অভ্যর্থনা জানাবার জন্য। খুশির হাসি হেসে সে বলল, 'এই যে, এসো! আমরা এখানে তোমার অভাব বোধ করছিলাম।' দুই হাত দিয়ে পাভেলকে জড়িয়ে ধলল সে। দু'জনে ঘরের মধ্যে ঢুকল।

ওভারকোটটা খুলতে খুলতে পাভেল জিজ্ঞেস করল, 'রাজ্‌ভালিখিন কোথায়?' একটু যেন অনিচ্ছার সঙ্গে লিদা জবাব দিল, 'জানি না। ও হ্যাঁ, মনে পড়েছে! আজ সকালে ও বলেছিল যে তোমার বদলে সে-ই সমাজতন্ত্রের ক্লাসটা নেবার জন্যে ইঙ্কলে যাচ্ছে। ও বলছে যে ওটা ওরই কাজ, তোমার নয়।'

কথাটা শুনে পাভেল একটু বিরক্তিমিশ্রিত বিষয় বোধ করল। রাজ্জভালিখিনকে তার কোনোদিনই ভালো লাগেনি। বিরক্তির সঙ্গে মনে-মনে ভাবল, 'ইঙ্কুলের ব্যাপারে একটা গুপ্তগোল বাধিয়ে বসতে পারে।'

লিদাকে বলল, 'ওর কথা গ্রাহ্য কোরো না। আচ্ছা, এখনকার ভালো খবরগুলো আগে সব বলো তো। গ্রুশেভ্‌কায় গিয়েছিলে নাকি? ওখানকার বাচ্চাদের সব খবরটাবর কী?'

লিদা সব খবর বলে গেল, ততক্ষণে পাভেল কৌচে ছড়িয়ে বসল—হাত-পাগুলো ব্যথায় টনটন করছে তার।

'গত পরও রাকিতিনাকে পার্টির সভ্যপদপ্রার্থী কর্মী হিশেবে নেওয়া হয়েছে। এর ফলে আমাদের পোদ্‌বুখ্‌সি সেল অনেকটা জোরালো হয়ে উঠল। রাকিতিনা বেশ মেয়ে, আমার ভারি ভালো লাগে ওকে। শিক্ষক-শিক্ষিকারা আমাদের পক্ষে চলে আসতে শুরু করেছে, জনকতক তো ইতিমধ্যেই চলে এসেছে।'

পাভেল আর জেলা পার্টি কমিটির নতুন সম্পাদক লিচিকভ প্রায়ই সঙ্কের পর লিসিথ্‌সিনের ঘরে গিয়ে মেলে।

তিনজনে মিলে বড় ডেস্কটার ধারে বসে রাত্রি একটা-দুটো পর্যন্ত পড়াশোনা করে। লিসিথ্‌সিনের স্ত্রী আর বোন শোবার ঘরে ঘুমোয় আর ওই ঘরের দরজাটা বন্ধ থাকে। আর এ-ঘরে তারা তিনজনে কোনো-একটা বই পড়ে। লিসিথ্‌সিন পড়াশোনা করার সময় পায় শুধু রায়ে। তা সত্ত্বেও, পাভেল তার ঘন ঘন গ্রামান্তর-যাত্রা থেকে ফিরে এসে প্রত্যেকবারই হতাশার সঙ্গে লক্ষ করে যে তার কমরেডরা তার চেয়ে ঢের এগিয়ে গেছে।

পোদ্‌বুখ্‌সি থেকে একদিন একজন এসে খবর দিল—আগের রায়ে অজ্ঞাত আততায়ীদের হাতে গ্রিগ্‌ৎস্‌কা খরোভদ্কো খুন হয়েছে। সঙ্গে সঙ্গে পায়ের যন্ত্রণা ভুলে ছুটে গেল পাভেল কার্যনির্বাহক কমিটির দপ্তর-বাড়ির আন্তাবলে, তাড়াতাড়ি করে নিজের ঘোড়ায় জিন ঐটে প্রাণপণ বেগে ঘোড়া ছুটিয়ে রওনা হয়ে গেল সীমান্তের দিকে।

গ্রাম-সোভিয়েতের প্রশস্ত কুটিরের সবুজ পাতার মধ্যে একটা টেবিলের উপরে শোয়ানো আছে গ্রিগ্‌ৎস্‌কার দেহ—সোভিয়েতের লাল ঝাণ্ডায় ঢাকা। একজন সীমান্তরক্ষী প্রহরী আর একজন কমসমোল-সভ্য দরজায় পাহারা দিচ্ছে, কর্তৃপক্ষ না-আসা পর্যন্ত কাউকে ঢুকতে দিচ্ছে না তারা। পাভেল করচাগিন কুটিরটায় ঢুকে টেবিলটার কাছে এসে সরিয়ে দিল লাল ঝাণ্ডাটা।

গ্রিগ্‌ৎস্‌কার মাথাটা একপাশে হেলে পড়েছে, মুখখানা তার মোমের মতো বিবর্ণ, বিস্ফারিত চোখদুটোয় মৃত্যুর যন্ত্রণা। মাথার পেছনদিকটা ফাঁক হয়ে গেছে তীক্ষ্ণ কোনো অস্ত্রের আঘাতে, একটা কচি ডালে জায়গাটা ঢাকা রয়েছে।

কে নিয়েছে এই তরুণটির প্রাণ? বিধবা খরোভদ্কোর একমাত্র ছেলে সে। তার বাবা ছিল ময়দা-কলের মজুর, পরে সে গরিব চাষীদের কমিটির একজন সভ্য হয়ে বিপ্লবের পক্ষে লড়াই করে মারা যায়।

ছেলের মৃত্যুর আঘাতে বৃদ্ধা শয্যাশায়ী হয়ে পড়েছে, পড়শীরা এসে তাকে বাঁচাবার চেষ্টা করছে। এদিকে তার ছেলে শুয়ে রয়েছে আড়ষ্ট শীতল দেহে, এই অকালমৃত্যুর রহস্যটা তার মনের মধ্যেই গোপন থেকে গেল।

খ্রিষ্টকর হত্যার ঘটনাটা সমস্ত গ্রামবাসীর মনে এক নিদারুণ ঘৃণা জাগিয়ে তুলেছে। দেখা গেল, এই গ্রামে গরিব চাষীদের স্বার্থরক্ষক এই তরুণ কমসমোল নেতাটির শত্রুর চেয়ে বন্ধুর সংখ্যাই ঢের বেশি।

খবরটা পেয়ে অত্যন্ত বিচলিত হয়ে রাকিতিনা তার ঘরে জ্বালাভরা কান্নায় ভেঙে পড়েছে। পাভেল ঘরে ঢোকার পর সে মুখ তুলে তাকাল না।

ধূপ করে একটা চেয়ারে বসে পড়ে ভাঙা গলায় বলে উঠল পাভেল, 'ওকে কে খুন করেছে বলে তোমার মনে হয়, রাকিতিনা?'

'ওই ময়দা-কলের দলটা নিশ্চয়ই। খ্রিশা বরাবরই ওই বেআইনি মাল-চালানদারদের পথের কাঁটা হয়ে ছিল।'

\*

\*

\*

খ্রিষ্টকরা খরোভদকো-কে গোর-দেওয়া উপলক্ষে দুটো গাঁয়ের মানুষ এসে জড়ো হল। করচাগিন তার ব্যাটালিয়ন নিয়ে এল, কমসমোল সংগঠনের সমস্ত ছেলেমেয়েরা এল তাদের কমরেডের উদ্দেশ্যে শেষ শ্রদ্ধা জানাবার জন্য। গ্রাম-সোভিয়েতের দপ্তরের সামনের ময়দানটায় গাভিলভ আড়াই-শো সীমান্তরক্ষী সৈন্য শামিল করল। সামরিক অস্ত্রোষ্টি-যাত্রার বিষণ্ণ সুরের তালে তালে লাল-কাপড়ে-মোড়া শবাধারটি বয়ে নিয়ে এসে ময়দানের মাঝখানে রাখা হল। গৃহযুদ্ধের সময়ে যেসব বলশেভিক পার্টিজান নিহত হয়েছিল, তাদের কবরের পাশে একটা নতুন কবর খোঁড়া হয়েছে সেখানে।

খ্রিষ্টকরা যাদের স্বার্থরক্ষার জন্য দৃঢ়তার সঙ্গে লড়াই করে এসেছে, তারা সবাই তার মৃত্যুর ফলে ঐক্যবদ্ধ হয়ে গেল। তরুণ ক্ষেতমজুর আর গরিব চাষীরা কমসমোলকে সমর্থন করবার সংকল্প গ্রহণ করল। যারা এই অস্ত্রোষ্টি-উপলক্ষে বক্তৃতা দিল, তারা সবাই ত্রুদ দাবি জানাল—হত্যাকারীদের উপযুক্ত শাস্তির ব্যবস্থা হোক, তারা যাকে খুন করেছে তারই কবরের পাশে এইখানে তাদের ধরে এনে বিচার করা হোক, যাতে সবাই চিনে রাখতে পারে শত্রুরা কারা।

তিন ঝাঁক গুলির গর্জন উঠল পর পর। ফার গাছের কচি তাজা ডাল বিছিয়ে দেওয়া হল কবরের উপর। সেদিন সন্ধ্যায় পোদ্দুবর্ষসি সেলের সভ্যরা একজন নতুন সম্পাদক নির্বাচিত করল—রাকিতিনাকে। সীমান্ত-ফাঁড়ি থেকে করচাগিনের কাছে খবর এল যে তারা খুনীদের খুঁজবার সূত্র পেয়েছে।

এক সপ্তাহ বাদে শহরের থিয়েটার-বাড়িতে সোভিয়েতগুলির দ্বিতীয় জেলা কংগ্রেস শুরু হলে সেখানে লিসিৎসিন বিজয়ীর গম্ভীর নিয়ে ঘোষণা করল :

'কমরেডসব, গত এক বছরে আমরা যে অনেক কিছু করতে পেরেছি, এ-কথা এই কংগ্রেসের সামনে ঘোষণা করতে পারছি বলে আমি আনন্দিত। এই জেলায় সোভিয়েত-ক্ষমতা সুদৃঢ়ভাবে প্রতিষ্ঠিত হয়েছে, ডাকাত-রাহাজান দলগুলোকে নির্মূল করে দেওয়া হয়েছে, বেআইনি মাল আমদানি-রপ্তানির প্রায় সম্পূর্ণই বন্ধ হয়ে গেছে। গ্রামে গ্রামে গরিব চাষীদের শক্তিশালী সংগঠন গড়ে উঠছে, কমসমোল সংগঠনগুলি আগের চেয়ে দশগুণ শক্তিশালী হয়ে উঠেছে এবং পার্টি-সংগঠনগুলি সম্প্রসারিত হয়েছে। পোদ্দুবর্ষসিতে যে-কুলাকরা কিছুদিন আগে উস্কানি দিয়ে উত্তেজনা সৃষ্টির

চেঁটা করেছিল—যার ফলে আমাদের কমরেড খরোভদকোকে হারাতে হয়েছে—সেই কুলাকদের চক্রান্ত ফাঁস হয়ে গেছে। খুনী দু'জন—ময়দা-কলের মালিক আর তার জামাই—শ্রেণ্ডার হয়েছে। জেলা আদালতে কয়েকদিনের মধ্যেই তাদের বিচার হবে। কংগ্রেসের সভাপতিমণ্ডলীর কাছে কয়েকটি গ্রামের জনকতক প্রতিনিধি এই রাহাজান-সন্ত্রাসবাদীদের চরম শাস্তির দাবি তুলেছেন।'

সমর্থনসূচক উল্লাসের ঝড়ে কেঁপে উঠল হলঘরটা :

'ঠিক, ঠিক! সোভিয়েত-রাজ্যের শত্রুদের মৃত্যু চাই!'

পাশের একটা দরজায় দেখা গেল লিদা পলেভিস্কে। পাভেলের দিকে ইশারা করল সে।

বাইরের বারান্দায় পাভেলকে সে একখানা চিঠি দিল। খামের উপরে 'জরুরি' লেখা। চিঠিখানা খুলে পাভেল পড়ল :

বেরেজ্‌দভ জেলা কমসমোল কমিটির কাছে। এই চিঠির একটি প্রতিলিপি পার্টির জেলা কমিটির কাছে পাঠানো হল। প্রাদেশিক কমিটির সিদ্ধান্ত অনুসারে কমরেড পাভেল করচাগিনকে দায়িত্বপূর্ণ কমসমোল কাজের ভার নেবার জন্য জেলা কমিটি থেকে প্রাদেশিক কমিটিতে তলব করা হল।

এই জেলায় সে গত একবছর ধরে কাজ করেছে—এখান থেকে পাভেল বিদায় নিল। তার যাওয়ার আগে পার্টির জেলা কমিটির যে-সভা হল তার আলোচনা-সূচিতে দুটো বিষয় ছিল : ১) কমরেড পাভেল করচাগিনের কমিউনিস্ট পার্টির সভাপদভুক্তি; ২) জেলা কমসমোল কমিটির সম্পাদকের দায়িত্ব থেকে খালাস দেবার উপলক্ষে তার কাজকর্মের বিবরণী-পত্রের অনুমোদন।

বিদায়ের সময় লিস্‌ভিন্সিন আর লিদা পাভেলের হাত জোরে চেপে ধরল, সৌভ্রাত্র আর প্রীতির সঙ্গে আলিঙ্গন করল। তারপর পাভেলের ঘোড়াটা যখন আঙিনা ছাড়িয়ে রাস্তার উপরে এসে পড়ল, তখন বারোটা পিস্তল থেকে গুলি ছুড়ে তাকে বিদায়-অভিবাদন জানানো হল।

### পঞ্চম অধ্যায়

ট্রামগাড়িটা অত্যন্ত কষ্টেসৃষ্টে উঠছে ফুন্‌ক্রেয়েভস্কায়া স্ট্রিট বেয়ে। বোঝার টানে তার মোটরগুলো গোঙাচ্ছে। অপেরা-বাড়ির সামনে এসে গাড়িটা থামতেই তার ভেতর থেকে নেমে এল একদল তরুণ-তরুণী। গাড়িখানা চড়াই বেয়ে উঠতে থাকল।

আর-সবাইকে তাগিদ দিল পানক্রাতভ, 'চলো, একটু তাড়াতাড়ি হাঁটা যাক, নইলে দেরি হয়ে যাবে আমাদের।'

খিয়েটারের প্রবেশপথে শুকুনেভ তাকে ধরে ফেলল, 'এই একই ধরনের একটা সম্মেলনের ব্যাপারে তিনবছর আগে আমরা এখানে এসে জড়ো হয়েছিলাম, তোমার মনে আছে, গেন্‌কা? সেটা হয়েছিল যখন দু'বাবা এল 'বিরোধী শ্রমিকপক্ষের' কথা নিয়ে। বিরাট সভা হয়েছিল সেবার! আজ রাতে আবার ওর সঙ্গেই আমাদের লড়াই করতে হবে!'

প্রবেশপত্র দেখিয়ে তারা হলঘরে ঢোকার পর পানক্রান্ত তার কথার জবাবে বলল, 'হঁ, সেই একই জায়গায় ইতিহাসের পুনরাবৃত্তি হচ্ছে দেখছি।'

তাদের চুপ করিয়ে দিল সবাই স্-স্ শব্দ করে। সম্মেলনের সাক্ষ্য-অধিবেশন শুরু হয়ে গেছে, সামনেই যে-চেয়ার পেল সেখানেই বসে পড়ল তারা দু'জনে। বক্তৃতামঞ্চের উপরে দাঁড়িয়ে একজন তরুণী সভাকে উদ্দেশ্য করে বক্তৃতা দিচ্ছে। বক্তৃতি তালিয়া।

'ঠিক মুহূর্তটিতে এসে গেছি আমরা। এবার চুপ করে বসে শোনো তোমার গিনি কী বলছে,' ফিসফিসিয়ে বলল পানক্রান্ত ওকুনেভের পাঁজরায় একটা খোঁচা মেরে।

'...এই আলোচনায় আমরা যে অনেকখানি সময় আর উদ্যম ব্যয় করেছি, সে-কথা ঠিক। কিন্তু আমার মনে হয় এর থেকে আমরা সবাই শিখেছিও অনেক কিছু। আমাদের সংগঠনে ঐচ্ছিক অনুগামীদের যে হার হয়েছে, এটা লক্ষ করে আজ আমরা সকলেই খুব আনন্দিত। তাঁদের বলতে দেওয়া হয়নি—এ অভিযোগ তাঁরা আনতে পারবেন না। বরং নিজেদের মতামত প্রকাশ করার পূর্ণ সুযোগ তাঁরা পেয়েছেন। বাস্তবিকপক্ষে, তাঁদের মত প্রকাশের যে-স্বাধীনতা আমরা দিয়েছিলাম, তাঁরা সেটার অপব্যবহার করেছেন এবং কতকগুলি ক্ষেত্রে অত্যন্ত স্থূলভাবে তাঁরা পার্টি-শৃঙ্খলা ভঙ্গ করেছেন।'

উস্বেজিত হয়ে উঠেছে তালিয়া। বক্তৃতা দেবার সময় সে যেভাবে বারবার তার চোখের উপর এসে-পড়া একগোছা চুল পেছনে সরিয়ে সরিয়ে দিচ্ছে, তাই দেখেই তার উস্বেজনাটা বোঝা যায়।

'বিভিন্ন এলাকার বহু কমরেড এখানে বক্তৃতা দিয়েছেন এবং তাঁরা প্রত্যেকেই ঐচ্ছিকপন্থীদের কাজকর্মের পদ্ধতি সম্বন্ধে বলেছেন। এই সম্মেলনে বেশ কিছুসংখ্যক ঐচ্ছিকপন্থী উপস্থিত আছেন। এলাকা পার্টি-সংগঠনগুলি তাঁদের ইচ্ছে করেই এখানে পাঠিয়েছে যাতে এই শহর পার্টি-সম্মেলনে আর-একবার তাঁদের বক্তব্য শুনবার সুযোগ আমরা পাই। এই সুযোগের পূর্ণ সদ্ব্যবহার যদি তাঁরা না করেন, তাহলে সেটা আমাদের দোষ নয়। স্পষ্টই বোঝা যাচ্ছে, এলাকাগুলিতে আর সেলগুলিতে সম্পূর্ণভাবে হেরে যাবার ফলে কিছু শিক্ষা তাঁদের হয়েছে। মাত্র গতকাল তাঁরা যা যা বলেছেন, এই সম্মেলনে ফের দাঁড়িয়ে উঠে সেইসব কথা আবার বলবার মতো জোর তাঁদের আছে বলে মনে হয় না।'

হলঘরের ডানদিকের কোণ থেকে একটা রুক্ষ গলা তালিয়াকে বাধা দিল, 'আমরা এখনও আমাদের বক্তব্য বলিনি!'

গলার স্বরটা যেদিক থেকে এসেছিল সেদিকে ফিরে তালিয়া বলল, 'ঠিক আছে, দু'বাভা, এখনই এখানে উঠে এসে বলো তোমার যা বলবার আছে, আমরা শুনব।'

দু'বাভা ক্রোধ-গম্ভীর চোখে ফিরে তাকাল তালিয়ার দিকে, রাগে কুঁচকে গেছে তার ঠোঁটদুটো। চোঁচিয়ে পাল্টা জবাব দিল সে, 'সময় এলেই বলব আমরা!' আগের দিন নিজের এলাকায় যে তার দারুণ হার হয়েছে সেই কথাটা সে ভাবছিল। ঘটনার স্মৃতিটা তখনও তাকে খোঁচাচ্ছে।

হলের মধ্যে একটা মৃদু গুঞ্জনধ্বনি উঠল। পানক্রান্ত আর নিজেকে সামলাতে না-পেরে চোঁচিয়ে উঠল, 'ফের বুঝি পার্টিকে একটা খাঙ্কা মারবার চেষ্টায় আছ, অ্যাঁ?'

দুবাভা গলার স্বরটা চিনতে পারল, কিন্তু ফিরে তাকাল না সেদিকে। সে শুধু নিচের ঠোঁটটা দাঁত দিয়ে কামড়ে ধরে মাথাটা নামিয়ে নিল।

তালিয়া বলে চলল, 'ত্রুৎক্ষিপহীরা যে কীভাবে পার্টি-শৃঙ্খলা ভাঙে দুবাভা নিজেই তার একটা লক্ষণীয় উদাহরণ। কমসমোলে সে দীর্ঘদিন কাজ করেছে, আমাদের অনেকেই তাকে জানে—বিশেষ করে অস্ত্রাগারের কর্মীরা। খারকভের কমিউনিস্ট বিশ্ববিদ্যালয়ের ছাত্র সে; তা সত্ত্বেও সে-যে গত তিন-সপ্তাহ ধরে এখানে শ্কেলেঙ্কার সঙ্গে রয়েছে, তাও আমরা সবাই জানি। বিশ্ববিদ্যালয়ে ক্লাস যখন পুরোদমে চলছে সেই সময়ে তারা কিসের টানে এখানে এসেছে? শহরের এমন কোনো এলাকা বাকি নেই, যেখানে ওরা দু'জনে বক্তৃতা করে বেড়ায়নি। এ-কথা অবশ্য ঠিক যে, গত কয়েকদিনে শ্কেলেঙ্কার বুদ্ধিগুদ্ধি যে খানিকটা ফিরে এসেছে তার লক্ষণ দেখা যাচ্ছে। ওদের এখানে পাঠিয়েছে কারা? ওরা ছাড়াও অন্য কতকগুলি সংগঠন থেকেও বেশকিছু ত্রুৎক্ষিপহী এসেছে। এরা সবাই এখানে আগে কোনো-না-কোনো সময়ে কাজ করেছে। এবারে ওরা ফিরে এসেছে পার্টির মধ্যে গুণ্ডগাল পাকিয়ে তোলবার জন্যে। ওদের পার্টি-সংগঠনগুলি কি জানে যে তারা এখানে এসেছে? নিশ্চয়ই না। সম্মেলনে উপস্থিত সবাই আশা করছে যে ত্রুৎক্ষিপহীরা এগিয়ে এসে তাদের ভুলভ্রান্তি স্বীকার করবে।'

এটা তাদের করতে রাজি করাবার আশায় তালিয়া আন্তরিক আবেদন জানাল। সে সরাসরি তাদের উদ্দেশ্য করে বলল, যেন ঘরোয়া কোনো বিতর্কে কমরেডসুলভ ভঙ্গিতেই বলছে, 'এই থিয়েটার-ঘরেই তিনবছর আগে দুবাভা আমাদের কাছে সেই আগেকার 'বিরোধী শ্রমিকপক্ষকে' নিয়ে ফিরে আসে। মনে পড়ছে? সেবারে কী বলেছিল সে, মনে আছে তো? বলেছিল : 'পার্টির ঝাণ্ডাকে আমরা কখনও আমাদের মুঠি থেকে খুলে পড়ে যেতে দেব না।' কিন্তু তিন বছর যেতে-না-যেতেই দুবাভা ঠিক সেই কাজটাই করেছে। হ্যাঁ, আমি আবার বলছি, পার্টির ঝাণ্ডাকে সে তার মুঠো থেকে খুলে পড়ে যেতে দিয়েছে। এক্ষুনি সে বলেছে, 'আমরা এখনও আমাদের বক্তব্য বলিনি।' এর থেকেই বোঝা যাচ্ছে যে সে আর তার সহযোগী ত্রুৎক্ষিপহীরা আরও কিছুদূর যেতে চায়।'

পেছনদিকের আসনগুলো থেকে একটা গলার স্বর শোনা গেল, 'হাওয়াটা কোন দিকে বইছে সে-সম্বন্ধে তুফতা আমাদের কিছু বলুক, সে-ই তো ওদের আবহতত্ত্ববিদ।'

ক্রুদ্ধ বিরক্ত কতকগুলো গলায় এর জবাব এল :

'বাজে রসিকতা করার সময় এটা নয়!'

'পার্টির বিরুদ্ধে লড়াই এরা বন্ধ করবে কিনা—এ-কথার জবাব ওরা দিক!'

'ওই পার্টিবিরোধী ঘোষণাপত্রটা কে লিখেছিল—ওরা বলুক!'

উদ্বেজনাটা ক্রমশই বেড়ে চলেছে। সবাইকে চুপ করতে বলার জন্য সভাপতি তার ঘণ্টাটা অনেকক্ষণ ধরে অবিরাম বাজিয়ে চলেছে।

গোলমালের মধ্যে ডুবে গেছে তালিয়ার গলা। তারপর ঝড়টা থামতে তার কথাগুলো ফের শোনা গেল :

‘শহরের বাইরের এলাকাগুলোর কমরেডদের কাছ থেকে আমরা যে-চিঠিপত্র পাই তার থেকে বোঝা যায়, তারা আমাদেরই পক্ষে এবং এটা খুবই উৎসাহজনক। এইরকম একটা চিঠি, যা আমাদের হাতে এসেছে, তার থেকে খানিকটা পড়ে শোনার অনুমতি চাচ্ছি। ওলগা ইউরেনেভার কাছ থেকে এই চিঠিটা এসেছে। এখানকার অনেকেই তাকে চেনে। কমসমোলের একটা এলাকা কমিটির সাংগঠনিক বিভাগের ভারপ্রাপ্ত কর্মী সে।’

তালিয়া তার সামনের একতাড়া কাগজের মধ্যে থেকে একটা কাগজ টেনে নিয়ে তার ওপরে চোখ বুলিয়ে পড়া আরম্ভ করল :

‘প্রত্যক্ষ সমস্ত কাজে অবহেলা করা হয়েছে। গত চারদিন ধরে ব্যুরোর সভ্যরা সব বেরিয়ে পড়েছে বিভিন্ন অঞ্চলে যেখানে ত্রুষ্কিপস্থীরা আগের চেয়েও জোরালো রকমের ক্ষতিকর প্রচারে নেমেছে। গতকাল একটা ঘটনা ঘটেছে—সেটা সমগ্র সংগঠনের মধ্যে ঘৃণার সৃষ্টি করেছে। শহরের একটা সেলেও ভোটের সংখ্যায় জিততে না-পেরে বিরোধীপক্ষ তাদের সমস্ত শক্তি সংহত করে আঞ্চলিক সামরিক কমিশারিয়েট সেলে লড়াইয়ে নামবে স্থির করেছে। আঞ্চলিক পরিকল্পনা কমিশনে এবং শিক্ষা বিভাগে যে কমিউনিষ্টরা কাজ করে তারাও এই সামরিক কমিশারিয়েট সেলের অন্তর্ভুক্ত। এই সেলে বিয়ান্টিশজন সভ্য আছে, কিন্তু ত্রুষ্কিপস্থীরা সবাই এখানে জোট বেঁধে এসে জড়ো হয়। এই সভায় যেরকম সব পার্টিবিরোধী বক্তৃতা করা হয়েছে, সেরকমটি এর আগে আর আমরা কখনও শুনিনি। সামরিক কমিশারিয়েট সভ্যদের মধ্যে থেকে একজন উঠে সরাসরিই বলল, ‘পার্টি যন্ত্র যদি আমাদের কথা না-মেনে নেয়, তাহলে আমরা সেটাকে ভেঙে চূরমার করে দেব।’ বিরোধীপক্ষের সবাই তার এই কথায় হাততালি দিয়ে সমর্থন জানাল। এর পরে করচাগিন বলতে উঠল। ‘নিজ্বাদের পার্টি-সভ্য বলে ঘোষণা করার পরেও তোমরা কী করে এই ফ্যানশিষ্টকে হাততালি দিয়ে সমর্থন জানাচ্ছ?’ বলল সে; কিন্তু ওরা চিৎকার করে চেয়ার চাপড়ে এমন হৈ-হুন্সা সৃষ্টি করল যে সে আর এগুতে পারল না। এই কুর্সিত ব্যবহারে সেল-সভ্যরা অত্যন্ত বিরক্ত হয়ে উঠেছিল, তারা দাবি জানাল—করচাগিনকে বলতে দেওয়া হোক। কিন্তু করচাগিন যেই ফের বলা আরম্ভ করল অমনি চোঁচামেচি শুরু হল আবার। গোলমালের ওপরে গলা চড়িয়ে সে চেঁচিয়ে বলল, ‘একেই বুঝি তোমরা গণতন্ত্র বলে থাকো! যতই চোঁচাও, আমি আমার বক্তব্য বলেই যাব।’ সেই মুহূর্তে জনকতক লোক তার উপরে ঝাঁপিয়ে পড়ে তাকে টেনে-হিচড়ে মঞ্চ থেকে নামিয়ে দেবার চেষ্টা করল। উদ্দাম গুণ্ডগোল শুরু হয়ে গেল। পাভেল পাস্টা বাধা দিয়ে বলেই যেতে লাগল, কিন্তু ওরা তাকে মঞ্চ থেকে টেনে নামিয়ে নিয়ে পাশের একটা দরজা খুলে সিঁড়ির উপরে ছুড়ে দিল—তার মুখ দিয়ে রক্ত পড়ছিল। এর পর প্রায় সমস্ত সেল-সভ্যই সভা থেকে উঠে চলে গেল। এই ঘটনাটা অনেকেরই চোখ খুলে দিয়েছে...’

বক্তৃতামঞ্চ থেকে নেমে গেল তালিয়া।

\*

\*

\*

সেগাল গত দু-মাস ধরে জেলা পার্টি কমিটির প্রচার-আন্দোলন বিভাগের ভারপ্রাপ্ত। সে সভাপতিমণ্ডলীর জায়গায় তোকারেভের পাশেই বসে প্রতিনিধিদের বক্তৃতাগুলো



মনোযোগের সঙ্গে শুনছে। এতক্ষণ পর্যন্ত সম্মেলনে বক্তৃতা দিয়েছে শুধু তরুণরাই, যারা এখনও রয়েছে কমসমোল সংগঠনের মধ্যে।

‘গত কয়েক বছরে এরা কত সুপরিণত হয়ে উঠেছে!’ ভাবছিল সেগাল। ভোকারেভের কাছে সে মন্তব্য করল, ‘বিরোধীপক্ষ ইতিমধ্যেই খুব জোর মার খেতে লেগেছে। এখনও তো তবু তোপ-কামান দাগা শুরু হয়নি। অল্পবয়সীরাই ত্রুষ্কিপষ্টীদের ঘায়েল করে তুলছে।’

ঠিক সেই মুহূর্তে তুফতা লাফিয়ে উঠে এল মধ্যে। সংক্ষিপ্ত একটা হাসির আওয়াজ আর তার প্রতি বিরুদ্ধতার একটা উচ্চকিত গুঞ্জনধ্বনি উঠল সঙ্গে সঙ্গে। এ-ধরনের অভ্যর্থনা পেয়ে তুফতা প্রতিবাদ জানানোর জন্য ঘুরে দাঁড়াল সভাপতিমণ্ডলীর দিকে, কিন্তু ততক্ষণে হলঘরটা শান্ত হয়ে এসেছে।

‘এখানকার কেউ-একজন আমাকে আবহতত্ত্ববিদ বলেছে। তোমরা যারা সংখ্যাগরিষ্ঠ দলের কমরেড, তারা এইভাবে আমার রাজনীতিক মতামতকে ব্যঙ্গ করতে চাও দেখছি!’ এক নিশ্বাসে বলে ফেলল সে কথাগুলো।

এক-দমক হাসির গর্জন উঠল তার কথার জবাবে। ফ্রোথ-বিরক্তির সঙ্গে তুফতা সভাপতির কাছে আবেদন জানাল, ‘তোমরা হাসতে পারো, কিন্তু আমি আরেকবার বলছি তোমাদের—তরুণরাই আবহাওয়ার দিকনির্দেশক বটে। লেনিন একাধিকবার এ-কথা লিখেছেন।’

একমুহূর্তে নিস্তব্ধ হয়ে গেল হলঘর।

‘কী লিখেছেন লেনিন?’ শ্রোতাদের মধ্যে থেকে আওয়াজ উঠল।

তুফতা কিছুটা সজীব হয়ে উঠল।

‘অক্টোবর-অভ্যুত্থানের জন্যে যখন প্রস্তুতি চলেছে, তখন শ্রমিকশ্রেণীর দৃঢ়মনা তরুণদের ঐক্যবদ্ধ আর সশস্ত্র করে তুলে জাহাজীদের সঙ্গে সবচেয়ে গুরুত্বপূর্ণ অঞ্চলগুলিতে তাদের পাঠাবার জন্যে লেনিন নির্দেশ দিয়েছিলেন। যদি চাও, তাহলে সেই জায়গাটা পড়ে শোনাতে পারি। বিভিন্ন কার্ডে আমার সমস্ত উদ্ধৃতিগুলো টোকা আছে।’ তুফতা তার চামড়ার থলেটার মধ্যে হাত চালিয়ে দিল।

‘থাক, ঠিক আছে, আমরা জানি কথাটা!’

‘কিন্তু লেনিন ঐক্য সম্বন্ধে কী লিখেছেন?’

‘আর পার্টি শৃঙ্খলা সম্বন্ধে?’

‘লেনিন আবার কোনকালে প্রবীণ পার্টি-নেতাদের বিরুদ্ধে তরুণদের লাগিয়েছেন?’

চিন্তার খেঁই হারিয়ে তুফতা চট করে আরেকটা প্রসঙ্গে চলে এল, ‘লাগুতিনা এখুনি ইউরেনেভার একটা চিঠি পড়ে শুনিয়েছে। তর্কাতর্কির সময়ে যদি কোথাও একটু-আধটু বাড়াবাড়ি হয়ে যায় তার জন্যে আমাদের কৈফিয়ত দিতে হবে বলে আশা করা যায় না।’

শ্কেলেঙ্কোর পাশেই বসেছিল স্ভেভায়েভ, সে দারুণ ক্রোধে হিসহিসিয়ে বলে উঠল, ‘এই বোকাটা ছাড়া আর লোক পাওয়া গেল না!’

‘হ্যাঁ,’ ফিসফিসিয়ে জবাব দিল শ্কেলেঙ্কো, ‘আহাম্মকটা আমাদের স্রেফ ডুবিয়ে ছাড়বে।’

তুফতার খ্যানখেনে চড়া পর্দার গলা শ্রোতাদের কানে যেন ঝাঁঝরা পিটিয়ে চলল, 'তোমরা যদি সংখ্যাগরিষ্ঠ গ্রুপ সংগঠিত করে তুলতে পারো, তাহলে আমাদেরও সংখ্যালঘু গ্রুপ সংগঠিত করে তোলার অধিকার আছে।'

চঁচামেচি গুরু হয়ে গেল হলঘরের মধ্যে। চারিদিক থেকে তুফতার উপরে ক্রুদ্ধ প্রশ্নের বৃষ্টি নামল :

'এ আবার কী? ফের সেই বলশেভিক আর মেনশেভিকের বৃন্তান্ত!'

'রাশিয়ার কমিউনিস্ট পার্টি একটা পার্লামেন্ট নয়!'

'ওরা মিয়াস্নিকভ থেকে মার্তভ পর্যন্ত সমস্ত রকমের দল-ভাঙিয়ার হয়েই কাজ করছে দেখছি!'

তুফতা তার দুই বাহু বিক্ষিপ্ত করল, যেন এখনি জলে ঝাঁপিয়ে পড়বে। তারপরে দ্রুত গুলি ছোড়ার মতো করে দারুণ উত্তেজিত হয়ে পাণ্টা জবাব দিয়ে চলল, 'হ্যাঁ, গ্রুপ তৈরি করার স্বাধীনতা আমাদের নিশ্চয়ই থাকা চাই। নইলে, আমরা যারা অনারকম মত পোষণ করি, তারা কী করে এরকম একটা সংগঠিত সুশৃঙ্খল সংখ্যাগরিষ্ঠ দলের বিরুদ্ধে নিজেদের মতের স্বপক্ষে লড়াই চালাব?'

হৈ-হল্লাটা বেড়ে চলল। পানক্রান্তভ দাঁড়িয়ে উঠে চিৎকার করে বলল, 'ও বলুক। ওর কী বলার আছে শোনা যাক। অন্যেরা যেসব কথা না-বলাটাই ভালো বলে মনে করবে, তুফতা হয়তো ঠিক সেই কথাগুলোই ফস করে বলে বসবে।'

শান্ত হয়ে এল হলঘর। তুফতা বুঝতে পেরেছে যে সে বাড়াবাড়ি করে ফেলেছে। এ-কথাটা বোধহয় তার এখনই বলা উচিত হয়নি। নিজের মনের কথাগুলোকে সে একেবারে হঠাৎ অন্যদিকে ঘুরিয়ে দিয়ে একসঙ্গে অনেকগুলো কথা দ্রুত উচ্চারণে বলে নিয়ে বক্তব্য শেষ করল, 'তোমরা অবশ্য আমাদের পার্টি থেকে বের করে দিয়ে এক ধাক্কায় উল্টে ফেলে দিতে পারো। এ-ধরনের ব্যাপার তো গুরু হয়েই গেছে। ইতিমধ্যেই তোমরা আমাকে কমসমোলের প্রাদেশিক কমিটি থেকে সরিয়ে দিয়েছ। কিন্তু তাতে কিছু এসে যাবে না। শিগগিরই দেখা যাবে কাদের কথাটা ঠিক।' এই বলেই সে মঞ্চ থেকে লাফিয়ে হলের মধ্যে নেমে গেল।

স্ভেভায়েভ একটা চিরকুট চালান করে দিল দুবাজার দিকে, 'মিতিয়াই, এরপরে তুমি বলতে ওঠো। তাতে অবশ্য অবস্থার কিছুমাত্র পরিবর্তন হবে না, স্পষ্টই দেখা যাচ্ছে এখানে আমরা নিতান্তই ঘায়েল হয়ে গেছি। তুফতাটাকে আমাদের সামলাতেই হবে। ও একটা নিরেট মুখ্য, বক্শেবর।'

দুবাজা বলতে চেয়ে অনুরোধ জানাল এবং সঙ্গে সঙ্গে অনুমতি দেওয়া হল।

মঞ্চের উপরে সে উঠতেই হলঘরে একটা প্রত্যাশার নিস্তব্ধতা নেমে এল। কেউ বক্তৃতা শুরু করার আগে সাধারণত যে-নিস্তব্ধতা নামে, এটা তাই নয়। দুবাজার পক্ষে এই নিস্তব্ধতাটুকু প্রচ্ছন্ন বিরোধিতায় ভরা। সেল-মিটিংগুলোয় সে যে-উৎসাহ নিয়ে বক্তৃতা দিয়ে বেড়িয়েছে তা ইতিমধ্যে মিইয়ে এসেছে। দিনে দিনে তার উদ্দীপনাটা কমে এসেছে এবং ভূতপূর্ব কমরেডদের কাছে নিদারুণ পরাজয় আর কঠিন পাণ্টা ঘা খাবার পর তার মনের অবস্থাটা এখন জল-ঢেলে নেভানো আগুনের মতো—আহত আত্মভিমানের জ্বালাভরা ধোঁয়ায় সে এখন আচ্ছন্ন হয়ে আছে, তার-যে ভুল হয়েছে

সে-কথাটা গোয়ারের মতো অস্বীকার করতে চেয়ে তার মনের জ্বালাটা আরও বেড়ে গেছে। সরাসরি ঝাপ দেবে বলে স্থির করল সে, যদিও সে জানে যে এর ফলে সংখ্যাগরিষ্ঠদের থেকে সে নিজেকে আরও বেশি বিচ্ছিন্ন করে ফেলবে। বলার সময়ে তার গলার আওয়াজটা শোনালা চাপা, কিন্তু স্পষ্ট।

‘দয়া করে আমাকে বলার সময়ে বাধা দিয়ো না কিংবা প্রশ্ন তুলে-তুলে জেরা করে বিরক্ত কোরো না। আমি আমাদের মতামতটা সম্পূর্ণ খোলসা করে বলে নিতে চাই, যদিও আগে থেকেই জানি যে তাতে কিছুমাত্র ফল হবে না। তোমরাই সংখ্যায় বেশি।’

শেষপর্যন্ত যখন সে বলা শেষ করল, তখন অবস্থাটা দেখে মনে হল যেন হলঘরে বোমা ফেটে পড়েছে। ক্রুদ্ধ চিৎকারের একটা ঘূর্ণি ঘিরে ধরল তাকে, চাবুকের মতো যেন সেগুলো কেটে বসছে তার গায়ে। ধিক্কার-ধ্বনির ফাঁকে ফাঁকে তার উদ্দেশ্যে চিৎকার উঠল :

‘ছি, ছি!’

‘দল-ভাঙিয়েরা নিপাত যাক!’

‘খুব তো কাদা ছুড়লে হে!’

ব্যঙ্গের হাস্যরোলের মধ্যে দুবাভা তার চেয়ারে এসে বসল। সেই হাসি তাকে একেবারে ধসিয়ে দিয়েছে। এরা যদি চোঁচামেচি করে তার উদ্দেশ্যে গাল পাড়ত তাহলে সে খুশি হত, কিন্তু তার বদলে তাকে এরা বিদ্রূপ করছে—কোনো অভিনেতার কৃত্রিম সুরে আবৃত্তি করতে গিয়ে গলা ভেঙে গেলে দর্শকরা যেমন বিদ্রূপ করে ওঠে।

‘এবার শকোলেঙ্কো বলবে,’ ঘোষণা করল সভাপতি।

শকোলেঙ্কো উঠে দাঁড়াল, ‘আমি বলতে চাই না।’

এবার পেছনের সারি থেকে পানক্রাতভের গম্ভীর খাদের গলা গমগম করে উঠল, ‘আমি বলতে চাই!’

তার গলার স্বরটা শুনেই দুবাভা বুঝেছে যে পানক্রাতভ মনে-মনে উত্তেজনায় টগবগ করছে। যখনই সে মর্যাস্তিক অপমানিত বোধ করে তখনই তার গম্ভীর গলাটা এইরকম গমগম করে ওঠে। সামান্য একটু নুয়ে-পড়া লম্বা মূর্তিটার দ্রুত পা ফেলে বক্তৃতামঞ্চের দিকে এগিয়ে যাওয়াটা বিষণ্ণ-গম্ভীর চোখে লক্ষ করতে করতে একটা অস্বস্তিতে ভরে উঠল দুবাভার মন। পানক্রাতভ কী বলবে তা সে জানে। আগের দিন সলোমেন্‌কায় পুরনো বন্ধুদের সঙ্গে সে-যে আলোচনা-বৈঠকে মিলিত হয়েছিল এবং তারা-যে তাকে বিরোধীপক্ষের সঙ্গে সম্পর্ক ত্যাগ করার জন্য নানারকম যুক্তি দেখিয়েছিল—সে-ঘটনাটা তার মনে পড়ল। তার সঙ্গে ছিল শকোলেঙ্কো আর স্ভেভায়েভ। তোকারেভের ঘরে তারা জড়ো হয়েছিল। পানক্রাতভ, ওকুনেভ, তালিয়া, ভলিন্সেভ, জেলোনোভা, স্তারোভেরভ আর আরতিউখিন উপস্থিত ছিল। ঐক্য পুনঃপ্রতিষ্ঠার এই চেষ্টায় একেবারেই কান দেয়নি দুবাভা। আলোচনার মাঝখানে স্ভেভায়েভের সঙ্গে ঘর থেকে বেরিয়ে গিয়ে সে নিজের ভুলটাকে স্বীকার করার অনিচ্ছাটুকু আরও প্রকট করে তুলেছিল। শকোলেঙ্কো থেকে গিয়েছিল। আর এখন সে বক্তৃতা দিতে অস্বীকার করে বসল। ‘মেরুদণ্ডহীন বুদ্ধিজীবী! নিশ্চয়ই ওরা ওকে নিজেদের দলে টেনে নিয়েছে,’ ভাবল

দুবাভা জ্বালাভরা ফোভের সঙ্গে। এই উন্মত্ত লড়াইয়ে সে একে একে তার সমস্ত বন্ধুদের হারাচ্ছে। বিশ্ববিদ্যালয়ে ঝার্কির সঙ্গে তার বন্ধুত্বে ভাঙন ধরেছে। পার্টি-ব্যুরোর একটা আলোচনা-বৈঠকে ঝার্কি 'ছেচক্লিশ জন'-এর ঘোষণাপত্রটার তীব্র নিন্দা করেছিল এবং পরে সংঘর্ষটা আরও তীব্র হয়ে ওঠার সঙ্গে সঙ্গে দুবাভা তার সঙ্গে কথাবলা বন্ধ করে দিয়েছে। এর পরে ঝার্কি বারকয়েক আন্নার সঙ্গে দেখা করতে তার ওখানে এসেছে। বছরখানেক হতে চলল আন্না আর দুবাভার বিয়ে হয়েছে। ওরা আলাদা আলাদা ঘরে থাকে এবং আন্না দুবাভার সঙ্গে একমত নয়। দুবাভার বিশ্বাস—আন্নার সঙ্গে তার সম্পর্কের মধ্যে ইদানীং যে বিনিবনার অভাব দেখা দিয়েছে, সেটা ঝার্কির ঘন ঘন যাতায়াতের ফলেই আরও বেড়ে গেছে। দুবাভার দিক থেকে এটা ঈর্ষা নয়। কিন্তু এই অবস্থায় ঝার্কির সঙ্গে আন্নার বন্ধুত্বটা দুবাভার মনের মধ্যে একটা অন্তর্দাহের সৃষ্টি করেছে। আন্নার সঙ্গে সে এ-সম্বন্ধে কথা বলেছিল, এবং তার ফলে এমন একটা দৃশ্যের অবতারণা হয়েছিল যার মধ্যে দিয়ে তাদের সম্পর্কের উন্নতি ঘটেনি বিন্দুমাত্র। কোথায় যাচ্ছে আন্নাকে কিছুই না-বলেই সে এই সম্মেলনে এসেছে।

তার মনের দ্রুত চিন্তায় বাধা পড়ল পানক্রাতভের বক্তৃতায়।

'কমরেডসব!' বক্তা একেবারে মঞ্চের ধার ঘেঁষে এসে দাঁড়াতেই কথাটার উচ্চকিত আওয়াজ কানে এল। 'ন'দিন ধরে আমরা বিরোধীদের বক্তৃতা শুনেছি এবং খুব খোলাখুলিই আমি বলছি, তারা যা বলেছে সেটা মোটেই সহযোগী হিশেবে, বিপ্লবী হিশেবে, শ্রেণীসংগ্রামে আমাদের কমরেড হিশেবে বলেনি। তাদের বক্তৃতাগুলো শত্রুতা, নিদারুণ বিদ্বেষ আর মিথ্যা কুৎসায় ভরা। হ্যাঁ, কমরেডসব, কুৎসাই গেয়েছে তারা। আমাদের বলশেভিকদের—ওরা এমনভাবে উপস্থিত করার চেষ্টা করেছে যেন আমরা পার্টির মধ্যে একটা জ্বররদন্তির রাজত্ব কায়ম করার পক্ষে, যেন আমরা এমন একদল লোক যারা শ্রেণীস্বার্থের প্রতি আর বিপ্লবের প্রতি বিশ্বাসঘাতকতা করছি। রাশিয়ার কমিউনিস্ট পার্টিকে যারা গড়ে তুলেছে, জ্বারের জেলখানায় যারা কষ্ট সয়েছে, কমরেড লেনিনকে পুরোভাগে নিয়ে যারা বিশ্ব-মেনশেভিকবাদ আর ত্রুৎস্কিবাদের বিরুদ্ধে অক্লান্ত লড়াই চালিয়ে গেছে; আমাদের পার্টির সেই সবচেয়ে ভালো, সবচেয়ে বিশ্বাসভাজন আর সবচেয়ে পরীক্ষিত অংশটিকে, বলশেভিকদের গৌরব সেইসব প্রবীণ আর অভিজ্ঞ পার্টি-সভ্যদের এরা আমলাতান্ত্রিক হিশেবে চিহ্নিত করার চেষ্টা করেছে। শত্রু ছাড়া আর কেউ কি এ-ধরনের কথা বলতে পারে? পার্টি এবং সেই পার্টির কাজকর্ম যারা পরিচালনা করে তারা কি অভিনু সমগ্র সত্তা নয়? তাহলে এতসব কথা কিসের জন্যে, জ্ঞানতে চাই। যেসব লোক লালফৌজের তরুণ সৈন্যদের তাদের কম্যান্ডার, কমিশার আর ফৌজি সদর-ঘাঁটির বিরুদ্ধে উত্তেজিত করে তুলতে চায়, এবং সেটা এমন একটা সময়ে যখন তাদের দলটিকে শত্রুসৈন্যরা ঘিরে ধরেছে, সেইসব লোককে কী বলা উচিত আমাদের? এইসব ত্রুৎস্কিপন্থীদের মতে—আমি যতক্ষণ একজন মিস্ত্রি হিশেবে আছি, ততক্ষণ পর্যন্ত 'ঠিক আছি', কিন্তু কালই যদি আমি কোনো-একটা পার্টি-কমিটির সম্পাদক হই, অমনি হয়ে দাঁড়াব 'আমলাতান্ত্রিক উপরঅলা' আর 'গদি-গরম-করনেঅলা'। কমরেডসব, এই আমলাতন্ত্রের বিরুদ্ধে আর

গণতন্ত্রের স্বপক্ষে যারা লড়াই করছে সেই বিরোধীপক্ষের মধ্যেই, ধরা যাক, তুফতার মতো একজন লোক আছে যাকে সম্প্রতি আমলাতান্ত্রিক বলে তার পদ থেকে অপসারিত করা হয়েছে, এটা কি একটু অদ্ভুত ব্যাপার নয়? কিংবা সুভেতায়োভ, যে কিনা সলোমেনকার লোকদের কাছে তার 'গণতন্ত্রের' জন্যে সুপরিচিত; কিংবা আফানাসিয়েভ—পদোচ্চ এলাকায় কাজকর্ম পরিচালনার ব্যাপারে স্বৈচ্ছাচারিতার জন্যে যাকে তার পদ থেকে প্রাদেশিক কমিটি তিন-তিনবার অপসারিত করেছিল? দেখা যাচ্ছে, পার্টি যাদের-যাদের শাস্তি দিয়েছে তারাই সবাই মিলে পার্টির বিরুদ্ধে লড়াই করার জন্যে একজোট হয়েছে। প্রবীণ বলশেভিকরা আমাদের ঐর্ষিকির 'বলশেভিকবাদ' সম্বন্ধে বলুন—বলশেভিকদের বিরুদ্ধে ঐর্ষিকির লড়াইয়ের ইতিহাস এবং এক শিবির থেকে আরেক শিবিরে তাঁর অনবরত দল-পরিবর্তনের কথাটা আমাদের তরুণদের পক্ষে জেনে রাখাটা খুবই প্রয়োজনীয়। বিরোধীপক্ষের বিরুদ্ধে এই লড়াই আমাদের সাধারণ সভ্যদের ঐক্যবদ্ধ করে তুলেছে এবং মতাদর্শের দিক থেকে আমাদের তরুণদের শক্তিশালী করে তুলেছে। পেটি-বুর্জোয়া ঝোকগুলির বিরুদ্ধে লড়াইয়ের মধ্যে দিয়ে বলশেভিক পার্টি আর কমসমোল পোড় খেয়ে-খেয়ে ইস্পাতের মতো দৃঢ় হয়ে উঠেছে। বিরোধীপক্ষের বিকারগ্রস্ত আতঙ্কসৃষ্টিকারীরা ভবিষ্যদ্বাণী করছে যে আমাদের আর্থনীতিক এবং রাজনীতিক ভিত সম্পূর্ণ ধসে পড়বে। এইসব ভবিষ্যদ্বাণীর মূল্য কতটুকু তা আগামী দিনই প্রমাণ করবে। এরা দাবি তুলেছে যে তোকারেভ বা তাঁর মতো সব প্রবীণ বলশেভিকদের পেছনে হটিয়ে দিয়ে সেই জায়গায় এনে বসাতে হবে দুবাজার মতো কোনো সুবিধাবাদীকে, যে-লোকটা পার্টির বিরুদ্ধে লড়াই করাটাকে একটা মস্তবড় বীরত্বের কাজ বলে মনে করে। না, কমরেডসব, এতে আমরা রাজি হতে পারি না। প্রবীণ বলশেভিকদের জায়গায় নতুন নতুন লোক আসবে ঠিকই। কিন্তু যখনই আমরা কোনো-একটা বাধার বিরুদ্ধে লড়াই, ঠিক সেই সময়েই এসে যারা তীব্রভাবে পার্টিকে আক্রমণ করে, সেইসব লোককে আমরা তাদের জায়গায় এনে বসাতে পারি না। আমাদের এই মহান পার্টির-ঐক্যে ভাঙন ধরাতে দেব না আমরা। প্রবীণ আর তরুণ পার্টি-কর্মীরা কখনও বিচ্ছিন্ন হবে না। লেনিনের পতাকার নিচে দাঁড়িয়ে পেটি-বুর্জোয়া প্রবণতাগুলির বিরুদ্ধে নির্মম সংগ্রামের মধ্যে দিয়ে আমরা বিজয়ের পথে এগিয়ে যাব!

সমর্থনসূচক তুমুল হাততালির মধ্যে মঞ্চ থেকে নেমে গেল পানক্রাতভ।

\*

\*

\*

পরের দিন জনা-দেশেক লোকের একটা দল তুফতার ঘরে এসে জড়ো হল।

'শ্কেলোঙ্কো আর আমি আজ খারকভে রওনা হচ্ছি,' বলল দুবাজা, 'এখানে আমাদের আর কিছু করার নেই। তোমাদের এককাটা হয়ে থাকার চেষ্টা করতেই হবে। এখন আমরা শুধু অপেক্ষা করে থেকে দেখে যেতে পারি কীরকম ঘটে ব্যাপারখানা। স্পষ্টই বোঝা যাচ্ছে, সারা রাশিয়া সম্মেলনে আমাদের নিন্দা করে প্রস্তাব নেওয়া হবে; কিন্তু আমার যেন মনে হচ্ছে, এত শিগগির আমাদের বিরুদ্ধে কোনো দমনমূলক ব্যবস্থা গ্রহণ করা হবে না। সংখ্যাগুরুরা আমাদের আরেকটা সুযোগ

দেবার সিদ্ধান্ত নিয়েছে। এখন, বিশেষ করে এই সম্মেলনের পরেই, খোলাখুলি লড়াই চালানোর মানেরটা হচ্ছে পার্টি থেকে লাখি খেয়ে বেরিয়ে যাওয়া। এটা আমাদের পরিকল্পনার অন্তর্ভুক্ত নয়। ভবিষ্যতে কী হবে না হবে এখন বলা কঠিন। আমার আপাতত এ-ছাড়া আর কিছু বলার নেই।’ দুবাতা যাবার জন্য উঠে দাঁড়াল।

ক্ষীণ-দেহ, পাতলা-ঠোট স্তারোভেরভও উঠে দাঁড়াল।

‘আমি তোমার কথা বুঝলাম না, মিতিয়াই,’ আধো-আধো উচ্চারণে আমতা আমতা করে বলল সে, ‘তার মানে কি এই যে, সম্মেলনের সিদ্ধান্ত মেনে চলার ব্যাপারে আমাদের কোনো বাধ্যবাধকতা নেই?’

স্ভেভায়েভ তার কথায় বাধা দিয়ে বলল, ‘দস্তুর অনুযায়ী—আছে। না-মেনে চললে তোমাকে পার্টি-কার্ডখানি হারাতে হবে। কিন্তু আমরা এখন অপেক্ষা করে থেকে দেখে যাব হাওয়াটা বইছে কোনদিকে এবং ইতিমধ্যে আমরা আলাদা আলাদা হয়ে যাব।’

তুফতা অস্বস্তির সঙ্গে নড়েচড়ে বসল তার চেয়ারে। বিবর্ণমুখে দমে-যাওয়া মন নিয়ে জানলাটার পাশে বসে নখ কামড়াতে লাগল শকোলেঙ্কো—বিন্দ্র রজনী যাপনের দরুন তার চোখের কোলে কালি পড়েছে। স্ভেভায়েভের কথায় সে তার এই বিষণ্ণ আনমনা ভাবটা ছেড়ে সভার দিকে ফিরে বসল।

‘আমি এই ধরনের ছল-কৌশল খাটানোর বিরুদ্ধে’, হঠাৎ-ক্রোধে বলে উঠল সে, ‘ব্যক্তিগতভাবে আমি মনে করি যে সম্মেলনের সিদ্ধান্ত মানতে আমরা বাধ্য। আমাদের মতবাদের পক্ষে আমরা লড়েছি, কিন্তু এখন অধিকাংশ ভোটে যে-সিদ্ধান্ত নেওয়া হয়েছে তা মেনে নিতেই হবে আমাদের।’

স্তারোভেরভ তার দিকে সমর্থনসূচক চাউনিতে তাকাল।

‘আমিও এই কথাই বলতে চাচ্ছিলাম’, জড়িয়ে জড়িয়ে বলল সে।

দুবাতা স্থিরদৃষ্টিতে শকোলেঙ্কোর দিকে তাকিয়ে নাক সিটকে বলল, ‘কেউ তোমাকে কিছু করতে বলছে না। প্রাদেশিক সম্মেলনে গিয়ে ‘অনুতাপ’ প্রকাশ করার সুযোগ তোমার এখনও আছে।’

লাফিয়ে দাঁড়িয়ে উঠল শকোলেঙ্কো।

‘তোমার বলার ভঙ্গিটায় আমি তীব্র আপত্তি জানাচ্ছি, দ্মিত্রি। আর, খোলাখুলি বলতে গেলে, তোমার বক্তব্যটা আমার কাছে অত্যন্ত কদর্য বলে মনে হচ্ছে এবং তোমার ওই কথায় আমি আমার অবস্থাটা পুনর্বিবেচনা করে দেখতে বাধ্য হচ্ছি।’

দুবাতা হাত নেড়ে তাকে থামিয়ে দিল, ‘তুমি ঠিক এইটেই করবে বলে আমি ভাবছিলাম। ছুটে যাও, বেশি দেরি হয়ে যাবার আগেই আফসোস জানাও গিয়ে।’

কথাটা বলেই দুবাতা তুফতা আর অন্যদের সঙ্গে করমর্দন করে বেরিয়ে গেল।

শকোলেঙ্কো আর স্তারোভেরভও একটু বাদেই চলে গেল।

\*

\*

\*

ইতিহাসের পাতায় উনিশ-শো চব্বিশ সালটা অতি নিদারুণ শীতের বছর বলে চিহ্নিত হয়ে গেল। বরফ-ঢাকা দেশটাকে জানুয়ারি তার তুহিন-মুঠোর মধ্যে আরও জোরে

চেপে ধরল—মাসের দ্বিতীয়ার্ধ থেকে শৌ-শৌ হাওয়া আর তুষার-ঝড় বইতে থাকল প্রবল বেগে।

দক্ষিণ-পশ্চিম রেলপথের লাইনগুলো বরফে চাপা পড়ে গেছে, আর প্রকৃতির সেই উন্মত্ত বাধার বিরুদ্ধে শুরু হয়ে গেছে মানুষের লড়াই।

স্থপীকৃত বরফের রাশির মধ্যে কেটে-কেটে বসে যাচ্ছে বরফ-কাটা লাঙলের ইম্পাতের দাঁতগুলো, ট্রেন-চলাচলের জন্য পথ পরিষ্কার করে দিচ্ছে। বরফের ভারে নুয়ে-পড়া টেলিগ্রাফের তার শীতে জমে গিয়ে তুষার-ঝড়ের দমকা ঝাপটে ছিড়ে ছিড়ে পড়ছে। বারোটা টেলিগ্রাফ লাইনের মধ্যে মোটে তিনটে লাইনে কাজ চলেছে : একটি যোগাযোগের লাইন ইন্দো-ইউরোপীয়, অন্য দুটি সরকারি।

শেপেতোভ্কা স্টেশনের টেলিগ্রাফ দপ্তরে তিনটি যন্ত্র অবিরাম টরেটক্কা আওয়াজ করে চলেছে—কেবল অভ্যস্ত কানেই তার অর্থ বোধগম্য।

মেয়ে-অপারেটররা এ-কাজে নতুন। তারা এতদিনে যত তারবার্তা ধরেছে তার ফিতের দৈর্ঘ্যটা দাঁড়াবে বারো-তেরো মাইলের বেশি নয়। কিন্তু তাদের পাশে বসে যে-বুড়ো টেলিগ্রাফার কাজ করে, তার ফিতের দৈর্ঘ্য ইতিমধ্যে একশো তিরিশ মাইল ছাড়িয়ে গেছে। তার অল্পবয়েসী সহযোগীদের মতো তাকে আর খবরটা উদ্ধার করার জন্য ফিতেটা পড়ে দেখতে হয় না, ভুরু কুঁচকে কঠিন কঠিন শব্দ আর বাক্যাংশের মানে বের করার জন্যও তাকে আর মাথা ঘামাতে হয় না। যন্ত্র থেকে টরেটক্কা আওয়াজ বেরুতে থাকার সঙ্গে সঙ্গে সে শুধু শব্দগুলো একে একে টুকে যায়। এবারে তার কানে এই কথাগুলো বাজল, 'সবাইকে জানানো যাচ্ছে। সবাইকে জানানো যাচ্ছে। সবাইকে জানানো...'

'নিশ্চয় ওই বরফ সাফ করার ব্যাপারে আরেকটা কোনো নির্দেশ', কথাগুলো লিখে নিতে নিতে বুড়ো টেলিগ্রাফার ভাবল মনে-মনে। বাইরে তুষার-ঝড় বইছে প্রচণ্ড বেগে, তুষার এসে আছড়ে পড়ছে জানলার গায়ে। জানলায় কেউ ধাক্কা মারছে মনে করে টেলিগ্রাফারের দৃষ্টিটা সরে এল শব্দের উৎসটার দিকে। একমুহূর্তের জন্য তার চোখদুটো আটকে গেল শার্সির গায়ে তুষার-চিহ্নিত জটিল নকশাটার দিকে। এমন অপরূপ ডাল-পাতা-কাটা নকশার সঙ্গে কোনো শিল্পীর রচনা পাল্লা দিতে পারবে না।

আপন চিন্তায় অন্যমনস্ক হয়ে গিয়ে কিছুক্ষণের জন্য টেলিগ্রাফের আওয়াজের দিকে তার কান আর রইল না। কিন্তু সঙ্গে সঙ্গেই সে ফিরে তাকিয়ে ফিতেটা টেনে নিয়ে যে-শব্দের আওয়াজগুলো তার কান এড়িয়ে গেছে সেগুলো পড়তে আরম্ভ করল।

যন্ত্রটা থেকে বেরিয়ে-আসা কথাগুলো এই :

'২১ জানুয়ারি সন্ধ্যা ৬টা ৫০ মিনিটে...'

তাড়াতাড়ি এই কথাগুলো টুকে নিয়ে ফিতেটা ছেড়ে দিয়ে টেলিগ্রাফার হাতের উপর মাথাটা রেখে ফের শুনতে থাকল।

'...গতকাল গর্কিতে মারা গেছেন...'

ধীরে ধীরে সে অক্ষরগুলো টুকে নিতে লাগল কাগজের বুকে। দীর্ঘজীবনে এরকম কত খবর সে টুকেছে—আনন্দের খবর আর মর্মান্তিক দুঃখের খবর—অন্যের আনন্দ কিংবা বেদনার সংবাদ—সে যে আর-সবার আগে কতবার পেয়েছে তার হিশেব নেই!

এইসব কাটাছাঁটা সফিকণ্ড কথাগুলোর মানে নিয়ে ভাবতে বসার অভ্যাসটা সে অনেক দিন আগেই ছেড়ে দিয়েছে। এখন সে শুধু আওয়াজটা শুনে যায় আর যান্ত্রিকভাবে অক্ষরগুলো লিখে চলে কাগজের বুকে।

এবারও কেউ একজন মারা গেছে, এবং সেই ঘটনাটা আর-কাউকে জানানো হচ্ছে। টেলিগ্রাফার বৃদ্ধটি গোড়ার কথাগুলো ভুলে গেছে : 'সবাইকে জানানো যাচ্ছে! সবাইকে জানানো যাচ্ছে! সবাইকে ঠভাবে লেখা রয়েছে প্রায় দু-মিটারের লম্বা এই ফালিটার গায়ে। মড়ার মতো মুখ নিয়ে ফিরে তাকাল সে সহকর্মীদের দিকে, তাদের কানে বাজল বৃদ্ধের আর্থ চিৎকার, 'লেনিন মারা গেছেন!'

\*

\*

\*

এই মর্মান্তিক বিয়োগ-বেদনার খবরটা টেলিগ্রাফ অফিসের চওড়া খোলা দরজার ফাঁক দিয়ে বেরিয়ে এসে ঘূর্ণির গতিতে ছড়িয়ে পড়ল সর্বত্র—স্টেশন পার হয়ে তুষার-ঝড়ের মধ্যে দিয়ে রেলপথ বেয়ে সিগন্যাল-ঘরে, বরফ-ঝরে-পড়া হাওয়ার ঝান্টায় রেল-কারখানার লোহার দেউড়ি ভেঙে কারখানা-ঘরের ভেতরে।

এক-নম্বর মেরামতি-ঘরের খোঁদলের উপরে বসানো একটা ইঞ্জিন সারানোর কাজে ব্যস্ত ছিল মামুলি মেরামতির কাজ যারা করে সেই মিস্ত্রিদের একটা দল। বুড়ো পলেন্ডভস্কি নিজে তার ইঞ্জিনটার পেটের নিচে হামাগুড়ি দিয়ে ঢুকে গেছে—জখম জায়গাগুলো সে মিস্ত্রিদের দেখিয়ে দিচ্ছে। জাখার ক্রম্বাক আর আরতিওম করচাগিন ইঞ্জিনের চুল্লির ঝাঁঝরাটার বেকে-যাওয়া ডাগগুলো পিটিয়ে সোজা করছে। জাখার ঝাঁঝরাটাকে ধরে আছে নেহাইয়ের উপরে, আর আরতিওম হাতুড়ি পিটিছে।

বুড়িয়ে গেছে জাখার। গত কয়েকটি বছর তার কপালে ঐকে দিয়ে গেছে একটা গভীর কুঙ্কন-চিহ্ন, রূপোলি রঙ ধরিয়ে দিয়ে গেছে তার রঙের চুলে, পিঠটা বেকে গেছে, বসে-যাওয়া চোখের কোণে কালিমা।

দরজাটার ওপারে একটা মানুষের কালোমূর্তি একমুহূর্তের জন্য দেখা দিল, তারপরেই রাত্রির অন্ধকার তাকে আচ্ছন্ন করে ফেলল। লোহার ঝাঁঝরাটার উপরে হাতুড়ির আওয়াজে প্রথমবার তার গলার স্বরটা শোনা গেল না। কিন্তু ইঞ্জিনের কাছে কাজে ব্যস্ত লোকগুলোর পাশে সে এসে পৌছতেই আরতিওম তার হাতুড়িটা নেহাইয়ের উপর নামিয়ে আনার আগে থেমে গেল।

'কমরেড! লেনিন মারা গেছেন!'

হাতুড়িটা আরতিওমের কাঁধের উপর থেকে ধীরে ধীরে নেমে গেল, নিঃশব্দে তার হাতটা হাতুড়িটাকে নামিয়ে দিল কংক্রিটের মেঝের উপর।

'সে কী? কী বলছ তুমি?' যে-মানুষটা এই সাংঘাতিক খবর নিয়ে এসেছে তার চামড়ার কোর্তাটাকে আরতিওমের মুঠো একটা প্রচণ্ড স্বায়িক উত্তেজনায় আঁকড়ে ধরল।

তুষারে ঢেকে গেছে লোকটার সারা দেহ, দম নেবার জন্য হাঁফাতে হাঁফাতে সে নিচু ভাঙা গলায় আরেকবার বলল, 'হ্যাঁ, কমরেড, লেনিন মারা গেছেন...'

লোকটা-যে চোঁচামেচি করে কথাটা বলেনি, তার থেকেই আরতিওম বুঝতে পারল যে এই সাংঘাতিক খবরটা সত্যি। এতক্ষণে সে মানুষটাকে চিনেছে—স্থানীয় পার্টি সংগঠনের সম্পাদক সে।



খৌদলটার ভেতর থেকে বেরিয়ে এসে সবাই নিঃশব্দে শুনল; যে-মানুষটির নাম গোটা দুনিয়া জুড়ে ধ্বনিত-প্রতিধ্বনিত হয়েছে শুনল সেই মানুষটির মৃত্যুর খবর।

দেউড়ির বাইরে কোথায় যেন একটা ইঞ্জিন চিৎকার করে উঠল, মানুষগুলো হঠাৎ চমকে উঠল আওয়াজটা শুনে। স্টেশনের দূরপ্রান্ত থেকে আরেকটা ইঞ্জিন সিটি বাজিয়ে আগেকার ইঞ্জিনের যন্ত্রণাভরা আওয়াজটার প্রতিধ্বনি তুলল, তারপরে আর একটা ইঞ্জিন...ইঞ্জিনগুলোর এই জোরালো সমবেত আওয়াজের সঙ্গে যুক্ত হল বিদ্যুৎ-স্টেশনের সাইরেনটার গোলার টুকরো উড়ে-চলার মতো সুতীক্ষ্ণ আর চড়া পর্দার আওয়াজ। তারপরে, অন্য আওয়াজগুলোকে চেপে দিয়ে কিয়েভগামী যাত্রীবাহী ট্রেনটার অতি সুন্দর 'এস' ইঞ্জিনটির গভীর চড়া-ঝঙ্কার উঠল।

শেপেতোভ্কা থেকে ওয়ারশ পর্যন্ত যে পোলিশ এক্সপ্রেস ট্রেনটি যায়, সেই ট্রেনের ইঞ্জিনচালক এই দুঃসংবাদের সিটি বাজবার কারণটা জেনে দু-এক মুহূর্ত কান পেতে শুনল, তারপর ধীরে ধীরে হাতটা তুলে ইঞ্জিনের সিটি বাজাবার দড়িটায় টান দিল। সোভিয়েত গোয়েন্দা বিভাগের একজন লোক এই শব্দটা শুনে পেয়ে চমকে উঠল। পোলিশ ইঞ্জিনচালকটি জানে যে এই শেষবার তার ইঞ্জিন-চালনা, আর কখনও তাকে আর এই ইঞ্জিন চালাতে দেওয়া হবে না, কিন্তু তবু সে ওই দড়িটা থেকে সরিয়ে নিল না তার হাতখানা। পোলিশ কূটনীতিক আর রাষ্ট্রীয় প্রতিনিধিরা তাদের ইঞ্জিনের এই আর্ত চিৎকার শুনে নরম গদিগুলোর উপরে চমকে নড়েচড়ে উঠে বসল।

রেল-কারখানায় লোকের ভিড় জমে উঠেছে। সমস্ত প্রবেশপথগুলো দিয়ে দলে দলে এসে তারা জড়ো হয়েছে। তারপর বিরাট কারখানা-বাড়িটায় যখন আর লোকের ভিড়ে তিল ধারণের জায়গা রইল না তখন গভীর নিস্তব্ধতার মধ্যে শোকসভা শুরু হল।

পার্টির শেপেতোভ্কা আঞ্চলিক কমিটির সম্পাদক প্রবীণ বলশেভিক শারাব্রিন সমবেত সকলের উদ্দেশ্যে বলল, 'কমরেডসব! বিশ্ব শ্রমিকশ্রেণীর নেতা লেনিন মারা গেছেন। পার্টির এ এক অপূরণীয় ক্ষতি—বলশেভিক পার্টির স্রষ্টা যিনি এবং যিনি এই পার্টিকে শত্রুর বিরুদ্ধে নির্মম, অনমনীয় হতে শিখিয়েছেন, তিনি আর নেই...আমাদের পার্টির এবং আমাদের শ্রেণীর নেতার এই মৃত্যু শ্রমিকশ্রেণীর শ্রেষ্ঠ সন্তানদের আহ্বান জানাচ্ছে—আমাদের সঙ্গে একসারিতে এসে তারা शामिल হোক...'

শোকযাত্রার সুর বেজে উঠল, শত শত মানুষ টুপি নামিয়ে নিল তাদের মাথা থেকে, আর আরতিওম, যে গত পনেরো বছরের মধ্যে কোনোদিন কাঁদেনি, সে তার গলার কাছে যেন একটা দলা আটকে গেছে বলে অনুভব করল, তার বলিষ্ঠ কাঁধটা কেঁপে-কেঁপে উঠল।

মানুষের ভিড়ের চাপে রেলওয়ে-কর্মীদের ক্লাবঘরের দেয়ালগুলো পর্যন্ত যেন গোঙাচ্ছে। বাইরে কনকনে ঠাণ্ডা, হলঘরের ঢোকার মুখে দু'পাশের লম্বা ফার-গাছদুটো তুষারে আচ্ছন্ন, জমাট বরফের সূচিমুখগুলো ঝুলেছে তাদের ডালপালা থেকে। কিন্তু ভেতরে দম বন্ধ হয়ে আসছে চুপ্তির আগুনের গরমে আর ছ-শো লোকের নিশ্বাসের উষ্ণতায়—এরা এসে জড়ো হয়েছে পার্টি-সংগঠন যে-স্বত্বসভার ব্যবস্থা করেছে সেই সভায় যোগ দেবার জন্য।

সভায় সাধারণত কথাবার্তার যে-গুঞ্জনধ্বনি উঠে থাকে, সেটা এখন নেই। দুঃখের বিহ্বলতায় গলার স্বর চাপা পড়ে গেছে মানুষগুলোর, ফিসফিসিয়ে কথা বলছে সবাই, শত শত লোকের চোখের চাউনিতে বেদনা আর উদ্বেগ। এরা যেন সবাই একটা জাহাজের একদল মাল্লা যারা ঝড়ের সময় তাদের কর্ণধারকেই হারিয়ে বাসেছে।

নিঃশব্দে পার্টি-ব্যুরোর সভ্যরা মঞ্চের উপরে এসে বসল। গাঁট্টাগোঁট্টা সিরোতেঙ্কো সাবধানে ঘটিটি তুলে ধরে মৃদুভাবে একবার বাজিয়েই ফের রেখে দিল টেবিলের উপরে। গোটা হলঘর জুড়ে একটা যন্ত্রণাদায়ক নিস্তব্ধতা নেমে আসার পক্ষে এই ইঙ্গিতটুকুই যথেষ্ট।

\*

\*

\*

মূল বক্তৃতাটা হয়ে যাবার পর পার্টি-সংগঠনের সম্পাদক সিরোতেঙ্কো বলবার জন্য উঠে দাঁড়াল। যে-ঘোষণাটা সে করল সেটা স্মৃতিসভার পক্ষে একটু অনন্যসাধারণ হলেও, কেউ আশ্চর্য হল না।

সে বলল, 'পার্টির সভ্যপদপ্রার্থী হিসেবে একদল শ্রমিক একটা দরখাস্ত দিয়েছে এবং তারা এই সভাকে অনুরোধ জানিয়েছে তাদের দরখাস্তটা বিবেচনা করে দেখবার জন্যে। সাঁইত্রিশ জন কমরেড সহই করেছে এটায়।' এই বলে সে পড়ে গেল দরখাস্তখানা :

দক্ষিণ-পশ্চিম রেলপথের অন্তর্ভুক্ত শেপোতোভ্‌কা স্টেশনের বলশেভিক পার্টির রেলওয়ে সংগঠন সমীপে।

আমাদের নেতার মৃত্যু আত্মহান জানিয়েছে বলশেভিক কর্মীদের সারিতে আমাদের শামিল হবার জন্য। লেনিনের পার্টিতে যোগ দেবার মতো যোগ্যতা আমাদের আছে কিনা সেটা বিচার করে দেখবার জন্য আমরা এই সভাকে অনুরোধ জানাচ্ছি।

এই ছোট্ট বিবৃতিটুকুর নিচে দু-সারি নামের স্বাক্ষর।

জোরে জোরে এই নামগুলো পড়ে গেল সিরোতেঙ্কো—প্রত্যেকটা নাম বলার পর কয়েক মুহূর্ত ধেমের রইল, যাতে নামগুলো সকলের মনে থাকে :

'স্তানিস্লাভ জিগমন্ডোভিচ পলেন্ডভ্‌স্কি, ইঞ্জিনচালক, কাজের অভিজ্ঞতা—ছত্রিশ বছর।'

হলঘরের মধ্যে দিয়ে বয়ে গেল সমর্থনসূচক গুঞ্জনের একটা ঢেউ।

'আরতিওম আন্দ্রেয়েভিচ করচাগিন, মিস্ত্রি, কাজের অভিজ্ঞতা—সতেরো বছর।'

'জাখার ভাসিলিয়েভিচ ক্রব্‌চাক, ইঞ্জিনচালক, কাজের অভিজ্ঞতা—একুশ বছর।'

প্রবীণ আর অভিজ্ঞ এইসব রেল-শ্রমিকদের নামগুলো—একে একে বলে চলল সিরোতেঙ্কো এবং তার পড়ার সঙ্গে সঙ্গে হলঘরের গুঞ্জনটাও বেড়ে চলল।

তারপরে আরেকবার নিস্তব্ধতা নেমে এল যখন সভার সামনে এসে দাঁড়াল পলেন্ডভ্‌স্কি, যার নামটা আছে এই তালিকার গোড়ায়।

বৃদ্ধ এই ইঞ্জিন-ড্রাইভার তার জীবন-কাহিনী বলবার সময়ে মনের উত্তেজনাটা কিছুতেই চাপতে পারল না।

'...আমি আর কী বলতে পারি তোমাদের, কমরেড? আগেকার দিনে মজুরের জীবন-যে কী-ধরনের ছিল, তা তো তোমরা সবাই জানো। সারাজীবন খেটে মরেছি

কেনা-গোলামের মতো আর এই বুড়োবয়সে ভিখিরির অবস্থা। এ-কথা স্বীকার করছি যে, যখন বিপ্লব এল তখন আমার নিজেকে মনে হয়েছিল সংসারের ভাবনাচিন্তার বোঝায় নুয়ে-পড়া একজন বুড়োমানুষ, তাই তখন পার্টির ভেতরে আসার পথ আমি খুঁজে পাইনি। আমি কখনও শত্রুপক্ষকে সমর্থন করিনি, তা ঠিক, তবু নিজে লড়াইয়েও বড়-একটা যোগ দিইনি। উনিশ-শো পাঁচ সালে গুয়ারশ-র রেল-কারখানায় ধর্মঘট কমিটির আমি একজন সভ্য ছিলাম এবং বলশেভিকদেরই পক্ষে ছিলাম। আমি তখন ছিলাম তরুণ আর দারুণ জঙ্গী। কিন্তু অতীতের কথা টেনে এনে কী লাভ! ইলিচের মৃত্যু আমার বকের মধ্যে এসে বিধেছে। আমাদের বন্ধুকে আর অভিভাবককে আমরা হারিয়েছি। আমি-যে বুড়ো হয়ে গেছি, সে-প্রসঙ্গটা এই শেষবারের মতো তুললাম। কীভাবে-যে কথাটা পাড়ব তা ঠিক বুঝতে পারছি না, কারণ, আমি কোনোদিনই বক্তৃতা করার ব্যাপারে বিশেষ পোক্ত নই। কিন্তু এই কথাটাই শুধু আমি বলতে চাই : অন্য কোনো পথ নয়, বলশেভিকদের পথই আমার পথ।’

ইঞ্জিনচালকটি তার শাদা মাথাটা নাড়ল, শাদা ভুরুর নিচে তার চোখদুটো স্থিরদৃষ্টিতে দৃঢ়প্রতিজ্ঞা নিয়ে তাকিয়ে রইল সভার সবার দিকে—যেন অপেক্ষা করে রয়েছে তাদের সিদ্ধান্ত জানবার জন্য।

ছোটখাটো এই শাদা-চুল মানুষটির দরখাস্তের বিরুদ্ধে একটা আওয়াজও উঠল না এবং ভোট নেবার সময়ে একজন লোকও বিরত রইল না। পার্টি-সভ্য নয় যারা তাদেরও এ-প্রশ্নে ভোট দিতে বলা হয়েছিল। তারাও কেউ পলেন্ডভ্জির বিরুদ্ধে আপত্তি জানাল না।

সভাপতিমণ্ডলীর টেবিলের কাছ থেকে যখন পলেন্ডভ্জি চলে এল তখন সে কমিউনিস্ট পার্টির একজন সভ্য।

অত্যন্ত অসাধারণ কিছু-একটা-যে ঘটছে, সে-সম্বন্ধে সবাই সচেতন। ইঞ্জিন-চালকটি এখনি যেখানে দাঁড়িয়েছিল সেখানে এবার দেখা দিল আরতিগুমের বিরাট দেহখানা। মিস্ত্রি-মানুষটা ঠিক বুঝে উঠতে পারছে না যে হাতদুখানা নিয়ে কী করবে, ঘাবড়ে-যাওয়া ভঙ্গিতে সে চেপে-চেপে ধরছে তার লোমঅলা চামড়ার টুপিটা। একটু জীর্ণ ভেড়ার চামড়ার কোর্তার বোতামগুলো খোলা, কিন্তু গলার কাছে উঁচু বেড়-লাগানো ধূসর রঙের ফৌজি কোটের পিতলের বোতামগুলো সাঁটা থাকার ফলে তার চেহারায় যেন একধরনের ছুটির দিনের ছিমছাম ভাব এসে গেছে। হলঘরের মুখোমুখি আরতিগুম ঘুরে দাঁড়াতেই একমুহূর্তের জন্য তার নজরে পড়ল—রাজমিস্ত্রির মেয়ে গালিনা একজায়গায় বসে আছে দর্জির দোকানের তার সহকর্মী মেয়েদের সঙ্গে। মার্জনার স্মিত হাসি তার মুখে—সে স্থিরদৃষ্টিতে আরতিগুমের দিকে তাকিয়ে আছে। তার মনে হল—গালিনার এই হাসিটুকুর মধ্যে যেন সমর্থন রয়েছে, আরও কী যে তার মনে হল তা সে ভাষায় ব্যক্ত করতে পারবে না।

সিরোতেজ্জেকে সে বলতে শুনল, ‘তোমার জীবন সম্বন্ধে বলো, আরতিগুম।’

কিন্তু নিজের সম্বন্ধে বলতে শুরু করাটা আরতিগুমের পক্ষে সহজ নয়। এমন বিরাট একটা সমাবেশের সামনে বক্তৃতা করার অভ্যাস নেই তার। ইঠাৎ তার মনে হল—এ জীবনে যতকিছু বলবার মতো কথা তার মনের মধ্যে জমে উঠেছে তা ভাষায়

প্রকাশ করার ক্ষমতা তার নেই। উপযুক্ত ভাষাটি খুঁজে পাবার চেষ্টায় সে একটা যন্ত্রণা অনুভব করল মনের মধ্যে, ঘাবড়ে-যাওয়ার ফলে তার পক্ষে কিছু বলাটা আরও কঠিন হয়ে দাঁড়াল। এরকম অভিজ্ঞতা তার এর আগে কখনো হয়নি। সে যে এসে দাঁড়িয়েছে একটা বিরাট পরিবর্তনের প্রবেশপথে, সে যে এমন একটা জায়গায় পা ফেলতে চলেছে যার ফলে তার বাঁকাচোরা নীরস জীবন হয়ে উঠবে সরস আর তাৎপর্যময়—এ-সম্বন্ধে সে তীব্রভাবে সচেতন।

‘আমাদের সংসারে ছিলাম আমরা চারজন,’ বলতে শুরু করল আরতিগুম।

নিস্তব্ধ হলঘর। টিকালো-নাক আর ঘন-কালো ভুরুর নিচে চাপা-পড়া-চোখ এই দীর্ঘদেহ মজুরটির কথা আশ্রয়ের সঙ্গে তখনছে হলঘরের ছ-শো লোক।

‘বড়লোকদের বাড়ি রাঁধুনির কাজ করত আমার মা। বাবাকে আমার প্রায় মনেই পড়ে না, মা’র সঙ্গে তার বনিবনাও ছিল না। ভয়ানক মদ খেত বাবা। তাই, আমাদের খাওয়ানো-পরানোর কথা মাকেই ভাবতে হত। এতগুলো পেট চালানো মায়ের পক্ষে কঠিন হয়ে দাঁড়িয়েছিল। সকাল থেকে রাত্তির পর্যন্ত বাদীগিরি করে চার কুবল মাইনে আর একমুঠো খাবার পেত মা। দু-বছর ইকুলে পড়বার সৌভাগ্য আমার হয়েছিল—সেখানে আমাকে লিখতে পড়তে শেখানো হয়েছিল, কিন্তু আমি ন-বছরে পড়তেই আমাকে একটা মিস্ত্রিখানায় শিক্ষানবিশ হিসেবে ভর্তি করে দেওয়া ছাড়া মা’র আর কোনো উপায় রইল না। তিন বছর বিনা মাইনেয় কাজ করেছি... শুধু দু-বেলা খোরাকি পেতাম... কর্মশালার মালিক ছিল ফেরস্টার নামে একজন জার্মান। আমার বয়েস বড় কম বলে সে প্রথমে আমাকে নিতে চায়নি, কিন্তু আমার গড়নটা ছিল বাড়ন্ত, আর তাই মা আমার বয়েসটা দু-তিন বছর বাড়িয়ে বলেছিল। সেই জার্মানটার কাছে আমি তিন বছর কাজ করেছিলাম—কিন্তু কাজ শেখানোর বদলে লোকটা আমাকে দিয়ে বাড়ির এটা-ওটা কাজ করিয়ে নিত, ভোদকা আনবার জন্যে পাঠাত। মদে চুর হয়ে থাকত সে সমস্তক্ষণ... কয়লা আর লোহালক্কড় বয়ে আনবার জন্যেও আমাকে পাঠাত... গিল্লিটি তো আমাকে রীতিমতো গোলাম বানিয়ে ছেড়েছিল—বাসন মাজতে হত আমায়, তরকারি কুটতে হত। কিলচড়-লাখি তো লেগেই ছিল—বেশির ভাগ সময়েই বিনা-কারণে, শুধু অভ্যাসের বশেই যে-কেউ মারত আমাকে। কর্তাটি দিনরাত মদ খেত বলে গিল্লিটির মেজাজ সবসময়েই খারাপ হয়ে থাকত আর আমি তাকে খুশি করতে না-পারলেই আমাকে মারধোর করত। আমি ছুটে পালিয়ে গিয়ে বেরিয়ে আসতাম রাস্তায়—কিন্তু যাব কোথায়, লাশি করব কার কাছে? মা থাকে চল্লিশ মাইল দূরে, তাছাড়া মা তো আর আমার পেট চালাতে পারবে না... আর কারখানায় অবস্থাটাও এর চেয়ে ভালো ছিল না মোটেই। মালিকের ভাই ছিল এখানকার কর্তা, গুয়োরটা আমাকে জন্দ করে মজা দেখতে ভালোবাসত। হাপর-চুল্লিটার পাশে এককোণ দেখিয়ে হয়তো আমাকে সে বলল, ‘এই খোকা, ওখান থেকে ওই ওয়াশারটা দাও দিকি,’ আর দৌড়ে গিয়ে ওয়াশারটাকে চেপে ধরেই আমাকে চিৎকার করে উঠতে হল—ওয়াশারটাকে তখুনি বের করে আনা হয়েছে চুল্লিটার ভেতর থেকে—মেঝের উপরে রাখা অবস্থায় সেটাকে যদিও কালো দেখাচ্ছে, ছুঁলেই কিন্তু পুড়ে বসে যাবে হাতের ছাল মাংস অবধি। আমি যখন দাঁড়িয়ে দাঁড়িয়ে

যন্ত্রণায় চিৎকার করছি, ওই লোকটার তখন হাসির চোটে পেটে খিল ধরে যাচ্ছে। এ-ধরনের কষ্ট আর সহ্য করতে না-পেরে আমি বাড়ি থেকে পালিয়ে গেলাম মায়ের কাছে। কিন্তু মা কিছু ভেবে পেল না কী করবে আমাকে নিয়ে, তাই আবার ফিরিয়ে আনল আমাকে ওই জার্মানটার কাছেই। আমার মনে আছে—সমস্ত পথটা কাঁদতে কাঁদতে এসেছিল মা। তৃতীয় বছরে ওরা আমাকে কাজটা একটু-আধটু শেখাতে শুরু করল, কিন্তু মারধোর চলল সমানে। আবার আমি পালালাম—এবার গেলাম স্তারোকনস্তান্ডিনভ-এ। একটা সসেজ তৈরির কারখানায় কাজ পেলাম এবং সেখানে শুধু নাড়িভুঁড়ি ধুয়ে-ধুয়েই দেড়-বছরেরও বেশি সময় নষ্ট করলাম। তারপর আমাদের মালিক জুয়োগেলায় কারখানাটাকে খুইয়ে বসল—চার মাস ধরে আমাদের এক পয়সা মাইনে না দিয়ে একদম উধাও হয়ে গেল সে একদিন। বেরিয়ে এলাম এই গর্তটা থেকে। ট্রেনে চেপে ঝমেরিন্‌কায় এসে কাজের সন্ধানে ঘুরছি, এমন সময় ভাগ্যভ্রমে একজন রেলকর্মীর সঙ্গে দেখা হয়ে গেল। তার দয়া হল আমার অপর। যখন বললাম আমি একটু-আধটু মিস্ত্রির কাজ জানি, সে আমাকে তার ওপরঅলার কাছে নিয়ে গিয়ে তার ভাইপো বলে পরিচয় দিয়ে কোনো-একটা কাজে আমাকে ঢুকিয়ে নেবার জন্যে অনুরোধ জানাল। চেহারা দেখে ওরা আমার বয়েস ধরে নিল সতেরো বছর, তাই আমি কাজ পেয়ে গেলাম মিস্ত্রির সহকারী হিসেবে। আমার বর্তমান কাজটা আমি করছি গত আট বছরেরও কিছু বেশিদিন ধরে। আমার অতীতজীবন সম্বন্ধে এই আমার যা-কিছু বলবার। আমার এখনকার জীবন সম্বন্ধে তোমরা তো এখানে জানো সবাই।

টুপি দিয়ে কপালটা মুছে আরতিগুম একটা গভীর নিশ্বাস ছাড়ল। সে এখনও আসল কথাটা বলেনি। এই কথাটা বলাই সবচেয়ে কঠিন, কিন্তু অনিবার্য প্রশ্নটা কেউ করে বসার আগেই তাকে সেটা বলতে হবে। ঘন লোমশ ডুরুদুটো কুঁচকে সে তাই বলে চলল নিজের কথা, 'কেন আমি আগেই বলশেভিকদের সঙ্গে যোগ দিইনি? তোমাদের সবারই এই প্রশ্নটা জিজ্ঞেস করবার অধিকার আছে। কিন্তু কী উত্তর দেবার আছে আমার? আর যাই হোক, আমি এখনও বুড়ো হয়ে পড়িনি। আজকের এই দিনটার আগে পর্যন্ত আমি-যে এই পথের দিশা পাইনি, এটা কেমন করে হল? সোজা কথাই বলব আমি তোমাদের, কারণ আমার গোপন করার কিছু নেই। ১৯১৮ সালে যখন জার্মানদের বিরুদ্ধে আমরা দাঁড়িয়েছিলাম, তখনই আমার এই পথে আসা উচিত ছিল, কিন্তু সে-সময়ে আমি এই পথের দিশা পাইনি। জাহাজি ঝুঝরাই আমাকে কতবার বলেছিল। ১৯২০-র আগে আমি রাইফেল ধরিনি। ঝড় যখন থেমে গেল, শ্বেতরক্ষীদের কৃষ্ণসাগর পার করে তাড়িয়ে দিয়ে ফিরে এলাম আমরা যে-যার ঘরে। তারপরে সংসার পাতলাম, ছেলেপুলে হল...একেবারে জড়িয়ে পড়লাম আমি পরিবার নিয়ে। কিন্তু এখন, যখন কমরেড লেনিন মারা যাবার পর পার্টির আহ্বান এসেছে, তখন আমি আমার গোটা জীবনটার দিকে তাকিয়ে দেখতে পেয়েছি কোথায় খুঁত থেকে গেছে : নিজেরা যে-রাজ অর্জন করেছি, শুধু সেইটুকু রক্ষা করে চলাটাই যথেষ্ট নয়; বিরাট একটা পরিবারের মতো ঐক্যবদ্ধ হয়ে আমাদের দাঁড়াতে হবে লেনিনের জায়গায়, যাতে সোভিয়েত-ক্ষমতা দাঁড়াতে পারে একটা ইম্পাতের পাহাড়ের মতো। আমাদের সবাইকে বলশেভিক হতে হবে। এ তো আমাদেরই পার্টি!'

এতগুলো কথা এইভাবে একসঙ্গে বলতে সে অনভ্যস্ত, তাই একটু লজ্জাবোধ করছিল আরতিওম। কিন্তু বলার শেষে মনে হল যেন তার কাঁধ থেকে একটা মস্তবড় বোঝা নেমে গেছে। শরীরটাকে টান করে খাড়া হয়ে সে দাঁড়িয়ে রইল যদি কেউ কোনো প্রশ্ন করে তারই অপেক্ষায়।

তার বক্তৃতার শেষে যে-নিষ্ঠুরতা নেমে এসেছিল, সেটা ভেঙে দিয়ে সিরোতেঙ্কার গলা শোনা গেল, 'কারুর কোনো প্রশ্ন আছে?'

সভার সবাই একটু নড়েচড়ে বসল, কিন্তু প্রথম কেউ সভাপতির কথায় কোনো সাড়া দিল না। তারপরে একজন স্টোকার—সরাসরি সে এই সভায় এসেছে তার ইঞ্জিনের কাজ থেকে, গুবরেপোকাকার মতো তার সর্বাঙ্গ কালিলেপা—দাঁড়িয়ে উঠে শেষ কথা বলে দেবার ভঙ্গিতে বলল, 'জিসেস করার আর কী আছে? আমরা তো সবাই ওকে জানি। ওর সভাপদভূক্তির নির্দেশ ইত্যাদি যা দেবার দিয়ে চুকিয়ে ফ্যালো!'

কামার গিলিয়াকার মুখখানা গরমে আর উত্তেজনায় লাল হয়ে উঠেছে, কর্কশ গলায় চৈঁচিয়ে বলল সে, 'খাটি মানুষ এই কমরেডটি, কেটে পড়বার লোক নয় ও, ওর ওপরে ভরসা করতে পারো। ওকে নিয়ে নাও, সিরোতেঙ্কো!'

হলঘরের একেবারে শেষের দিকে যেখানে কমসমোল সভারা বসে ছিল, সেখান থেকে আধা-অন্ধকারে অদৃশ্য কে-একজন দাঁড়িয়ে উঠে বলল, 'কমরেড করচাগিন জোতজমির ওপর নির্ভর করে আছে কেন এবং চাষী হিশেবে অবস্থাটা তার শ্রমিকশ্রেণীর মনোভাবকে পরাস্ত করে কিনা—সেটা একটু খোলসা করে বলুক।'

এ-কথার অসমর্থনে হলঘরের মধ্যে একটা মৃদু গুঞ্জন উঠল, প্রতিবাদ জানিয়ে একজন বলল, 'আমাদের মতো সাধারণ মানুষরা বুঝতে পারে এমন ভাষায় কথা বলো না কেন? বিদ্যে ফলাবার জায়গা এটা নয়...'

কিন্তু ততক্ষণে আরতিওম জবাব দিতে শুরু করেছে, 'ঠিক আছে, কমরেড। আমি যে ক্ষেত-খামারের ওপর খানিকটা নির্ভর করি, সে-কথা ঠিকই বলেছে ছেলেটি। কথাটা সত্যি, কিন্তু আমার শ্রমিকশ্রেণীর বিবেকের প্রতি আমি বেইমানি করিনি। যাই হোক, আজ থেকে আমি আমার জমিজমার পাট চুকিয়ে দিচ্ছি। রেল-কারখানার কাছাকাছি কোনোখানে আমি আমার পরিবারকে সরিয়ে আনব। এখানেই ভালো হবে। ওই হতভাগা জমিটা অনেকদিন থেকেই আমার গলায় কাঁটা হয়ে আটকে আছে।'

তার পক্ষে উঁচিয়ে-তোলা অসংখ্য হাতের অরণ্য দেখে আরেকবার আরতিওমের বুকটা কঁপে উঠল। মাথা উঁচু করে সে এসে বসল তার জায়গায়, পেছনদিকে সিরোতেঙ্কার ঘোষণা শুনল সে, 'সর্বসম্মতিক্রমে।'

সভাপতিমণ্ডলীর টেবিলের পাশে তৃতীয়জন এসে দাঁড়াল—পলেন্ডভ্জির ভূতপূর্ব সহকারী জাখার ক্রবাক। স্বল্পভাষী এই বুড়োমানুষটি ইদানীং কিছুদিন থেকে নিজেই ইঞ্জিনচালক হিসেবে কাজ করছে। নিজের জীবন-ভর শ্রম করে যাওয়ার কাহিনী বলার পর বর্তমান সময় পর্যন্ত এসে তার গলার স্বর নেমে গেল, তখন নিচুগলায় কিন্তু সবাই শুনতে পায় এমন স্বরে বলে চলল সে, 'আমার ছেলেমেয়েরা যে-কাজ শুরু করে গেছে সেটা শেষ করা আমার কর্তব্য। আমি আমার দুঃখ নিয়ে এককোণে মুখ লুকিয়ে বসে রইব—এর জন্যে তারা প্রাণ দেয়নি। তাদের মৃত্যুতে যে-ক্ষতি হয়েছে, আমি সেটাকে

পূরণ করার চেষ্টা করিনি। কিন্তু এখন আমাদের নেতার মৃত্যু আমার চোখ খুলে দিয়েছে। অতীতের জন্যে জবাবদিহি করতে বোলো না আমায়। আজ থেকে আমাদের জীবনের নতুন করে শুরু।’

দুঃখের স্মৃতিগুলো মনের মধ্যে নাড়া খেয়ে উঠতেই জাখারের মুখখানা মেঘাচ্ছন্ন আর গম্ভীর হয়ে উঠল। কিন্তু কোনো তীব্র প্রশ্ন না-করে পার্টিতে তাকে গ্রহণ করার সপক্ষে যখন ভোট দিয়ে সমুদ্রের ঢেউয়ের মতো অসংখ্য হাত উঠে গেল তখন উজ্জ্বল হয়ে উঠল তার চোখের দৃষ্টি, চুলে পাক-ধরা তার মাথাটা আর নিচের দিকে ঝুঁকে রইল না।

পার্টিতে এই নতুন সভ্যপদপ্রার্থীদের বক্তব্য শোনা আর ভোট দেওয়ার ব্যাপারটা অনেক রাত্রি পর্যন্ত চলল। যারা সবচেয়ে ভালো কর্মী, যাদের সবাই ভালোভাবে চেনে এবং যাদের জীবনে কোনো কলঙ্ক নেই, শুধু তাদেরই পার্টিতে নেওয়া হল।

লেনিনের মৃত্যুর পরে হাজার হাজার শ্রমিক বলশেভিক পার্টিতে এল। নেতা নেই, কিন্তু পার্টির সাধারণ সভ্যদের সারি রইল অটুট। যে-গাছ তার বলিষ্ঠ শিকড় চালিয়েছে মাটির গভীরে, তার মাথাটা কাটা পড়লেও গাছ মারা পড়ে না।

## ষষ্ঠ অধ্যায়

হোটেলের প্রমোদ-গৃহের প্রবেশপথে দু’জন লোক দাঁড়িয়ে আছে। দু’জনের মধ্যে যে বেশি লম্বা, তার চোখে পেসনেই চশমা, লাল বাহুবন্ধনীর উপরে লেখা : ‘কম্যান্ড্যান্ট’।

‘ইউক্রেনীয় প্রতিনিধিদলের সভা কি এইখানেই বসেছে?’ জিজ্ঞেস করল রিতা।

‘হ্যাঁ’, নিরুদ্ভাপ গলায় লম্বা মানুষটি জবাব দিল, ‘আপনার কী দরকার, কমরেড?’ ‘দয়া করে ভেতরে ঢুকতে দিন।’

টোকার দরজাটা জুড়ে দাঁড়িয়ে সে রিতার আপাদমস্তক খুঁটিয়ে লক্ষ করল, ‘আপনার কাছে কি প্রতিনিধির নির্দেশনামা আছে?’

রিতা তার কার্ডখানা বের করে দেখাল—উঁচু হরফে সোনালি রঙে তার গায়ে লেখা আছে ‘কেন্দ্রীয় কমিটির সভা’। সঙ্গে সঙ্গে লোকটি নরম হয়ে গেল।

‘ভেতরে যান, কমরেড’, সে বলল সহৃদয়ভাবে, ‘ওদিকে বাঁয়ে এগিয়ে গিয়ে বসবার খালি জায়গা পাবেন।’

আসনের সারির মধ্যদিয়ে এগিয়ে এসে রিতা একটা খালি চেয়ার পেয়ে বসে পড়ল। সভা শেষ হয়ে আসছে বোঝা গেল। এতক্ষণ যে-আলোচনাগুলো হয়েছে, সভাপতি তার একটা সারমর্ম পেশ করছে। তার গলার স্বরটা অত্যন্ত পরিচিত বলে মনে হল রিতার।

‘সারা কংগ্রেসের কাউন্সিলের প্রতিনিধি নির্বাচন হয়ে গেছে। দু’ঘন্টার মধ্যে কংগ্রেস বসবে। ইতিমধ্যে আমি এই প্রতিনিধিদের নামের তালিকাটা আর-একবার পরখ করে দেখি।’

আকিম! নামের তালিকাটা আকিম তাড়াতাড়ি পড়ে যাবার সময়ে রিতা গভীর মনোযোগের সঙ্গে শুনতে লাগল।

প্রত্যেক প্রতিনিধি তার নামটা পড়া হওয়ামাত্রই হাত তুলে লাল বা শাদা ছাড়পত্রখানা দেখাচ্ছে।

হঠাৎ একটা পরিচিত নাম রিতার কানে এল : পানক্রাতভ।

একখানা হাত উপর দিকে উঠতেই সে মুখ ঘুরিয়ে নজর করল, কিন্তু মানুষের সারির ফাঁকে সে ডক-খালাসি মানুষটার মুখখানা দেখতে পেল না। নামগুলো পড়া হচ্ছে—আরেকবার রিতা একটা পরিচিত নাম শুনতে পেল : ওকুনেভ। এবং ঠিক এর পরেই আরেকটা চেনা নাম : ঝার্কি।

প্রতিনিধিদের মুখগুলো ভালো করে লক্ষ করতে-করতে রিতা ঝার্কিকে দেখতে পেল। রিতার অদূরেই বসে আছে সে তার দিকে মুখখানা আধাআধি পাশ ফিরিয়ে। হ্যাঁ, ভনিয়াই বটে। এই মুখাবয়বটি রিতা ভুলে গিয়েছিল প্রায়...বেশ কয়েক বছর রিতার সঙ্গে তার দেখা হয়নি।

ওদিকে নামের তালিকাটা পড়া চলছে। তারপরে আকিম এমন একটা নাম পড়ল যেটা শুনে ভীষণভাবে চমকে উঠল রিতা : করচাগিন।

অনেক দূরে সামনের একটা সারি থেকে একখানা হাত উঠে আবার নেমে গেল এবং এই যে-মানুষটির নাম আর রিতার সেই মৃত কমরেডের নাম একই, তার মুখখানা একবার দেখবার জন্য রিতার মনে একটা যন্ত্রণাভরা আকাঙ্ক্ষা জাগল—ব্যাপারটা একটু অদ্ভুত বটে। যে-জায়গাটা থেকে হাতখানা উঠেছিল সেদিক থেকে সে কিছুতেই তার দৃষ্টি ফিরিয়ে আনতে পারছে না। কিন্তু সামনের সারির সমস্ত মাথাই তার চোখে একই রকম ঠেকছে। নিজের জায়গা থেকে উঠে পড়ে রিতা দু-সারি আসনের মাঝখান বেয়ে সামনের সারির দিকে এগিয়ে এল। ঠিক সেই মুহূর্তে আকিমের তালিকা পড়া শেষ হয়ে গেল। সঙ্গে সঙ্গে চেয়ারগুলো সশব্দে পেছনদিকে ঠেলে দিয়ে উঠে দাঁড়াল সবাই, তরুণ গলার হাসির আওয়াজে আর কথাবার্তার গুঞ্জনে ভরে উঠল হলঘরটা। গোলমালটা ছাপিয়ে যাতে তার গলা সকলে শুনতে পায়, সেই উদ্দেশ্যে আকিম চোঁচিয়ে বলল, 'বলশোই থিয়েটার...সাতটার সময়। দেরি হয় না যেন!'

বেরিয়ে আসার দরজাটার কাছে ভিড় জমিয়ে তুলেছে প্রতিনিধিরা। রিতা বুঝতে পারল—এই গাদাগাদির মধ্যে থেকে সে তার পুরনো বন্ধুদের কাউকেই খুঁজে বের করতে পারবে না। আকিম চলে যাবার আগে তাকে ধরবার চেষ্টা করতেই হবে এবং সে আর-সবাইকে খুঁজে বের করার ব্যাপারে সাহায্য করবে। ঠিক সেই সময়ে একদল প্রতিনিধি তার পাশ কাটিয়ে বেরোবার দরজাটার দিকে এগিয়ে গেল। রিতা একজনকে বলতে শুনল, 'ওহে করচাগিন, চলো, আমরাও এবার বেরিয়ে যাই!'

এবং তারপরেই রিতা একটা অতি-পরিচিত আর অবিস্মরণীয় গলার স্বরে জবাব শুনল, 'বেশ, চলো।'

চট করে ঘুরে দাঁড়াল রিতা, তার সামনে দাঁড়িয়ে আছে সঙ্গ ককেশীয় কোমরবন্ধনী-আঁটা, খাকি কোর্টা গায়ে আর নীল ব্রিচেজ-পরা লম্বা, ঘন-রঙ একজন তরুণ।

বিস্ফারিত চোখে রিতা তাকিয়ে রইল তার দিকে। তারপরেই রিতা অনুভব করল তার হাতের উষ্ণ আলিঙ্গন, কঁপে-ওঠা গলায় তাকে মৃদুস্বরে বলতে শুনল, 'রিতা!' রিতা বুঝেছে এ তো পাভেল করচাগিন।



‘তুমি বেঁচে আছ তাহলে?’

রিতার এই কথা ক’টি শুনেই পাভেল সব বুঝে নিয়েছে। তার মারা যাবার খবরটা-যে ভুল, সে-কথা রিতা জানে না।

হলঘরটা অনেকক্ষণ হল ফাঁকা হয়ে গেছে। শহরের প্রধানতম ধমনি এই ষ্বেভরুকায়া স্ট্রিটের যানবাহন চলাচলের আর জনস্রোতের কোলাহল ভেসে আসছে খোলা জানলাটা দিয়ে। ঢং ঢং করে ছ’টা বাজল ঘড়িতে, কিন্তু ওদের দু’জনেরই মনে হচ্ছে যেন এইমাত্র পরস্পরের সঙ্গে দেখা হয়েছে। কিন্তু ঘড়িটা বলছে—বলশোই থিয়েটারে যেতে হবে। চণ্ডা সিড়ি বেয়ে বেরুবার পথে নামতে নামতে রিতা আরেকবার পাভেলের সর্বাস্থে নজর বুলিয়ে নিল। সে এখন রিতার চেয়ে লম্বায় আধ-মাথা উঁচু, আগের চেয়ে পরিণত-বুদ্ধি পুরুষ আর সংযত। কিন্তু আর-সব দিক থেকে রিতার চেনা সেই আগেকার পাভেলই আছে।

‘তুমি এখন কোথায় কাজ করছ, সে-কথাটা পর্যন্ত জিজ্ঞেস করিনি’, বলল রিতা।

‘আমি কমসমোলের আঞ্চলিক কমিটির সম্পাদক—দুবাতা যাকে বলে ‘আমলা’, হেসে জবাব দিল পাভেল।

‘ওর সঙ্গে দেখা হয়েছে নাকি তোমার?’

‘হ্যাঁ এবং সেই দেখা হওয়ার ঘটনাটার অত্যন্ত অপ্রীতিকর স্মৃতি জন্মে আছে আমার মনে।’

রাস্তায় বেরিয়ে এল ওরা। হর্ন বাজিয়ে মোটরগাড়ি বেরিয়ে যাচ্ছে, ফুটপাথে ভিড়, ব্যস্ত কোলাহল। বলশোই থিয়েটারে যাবার পথে ওরা কথাবার্তা বলল খুব সামান্যই, দু’জনেরই মন জুড়ে রয়েছে একই চিন্তা। থিয়েটার-বাড়ির কাছে এসে দেখে—অসংখ্য মানুষের একটা উত্তাল ঝোড়ো সমুদ্র বাড়িটাকে চারিদিক থেকে ঘিরে ধরে, প্রবেশপথের মুখে পাহারাদার লালফৌজের সাত্ত্বীদের সারি ভেঙে ভেতরে ঢোকার চেষ্টায় পাথুরে দেয়ালের উপর আছড়ে আছড়ে পড়ছে। কিন্তু সাত্ত্বীরা শুধু প্রতিনিধিদেরই ঢুকতে দিচ্ছে। দু’পাশে সার-বাঁধা প্রহরীদের মাঝখানকার পথটুকু দিয়ে সর্গর্বে তাদের ছাড়পত্রগুলো দেখাতে দেখাতে চলেছে প্রতিনিধিরা।

থিয়েটার-বাড়িটাকে ঘিরে ফেলেছে কমসমোল সভাদের একটা সমুদ্র। এই তরুণ সমুদ্র কংগ্রেসের উদ্বোধনী সভায় ঢুকবার টিকিট জোগাড় করতে পারেনি, কিন্তু যেমন করেই হোক ঢুকবে বলে দৃঢ়প্রতিজ্ঞ। এই তরুণদের মধ্যে যারা একটু বেশি তৎপর, তারা প্রতিনিধিদের দলগুলোর ফাঁকে কোনোরকমে ঢুকে পড়ছে এবং কোনো-একটা লাল কাগজের টুকরো দেখিয়ে ভেতরে ঢোকার দরজাটা পর্যন্ত এগিয়ে যাবার ব্যবস্থা করে নিচ্ছে। দু-একজন এমনকি দরজার ফাঁক দিয়ে গলে গিয়ে ভেতরে পর্যন্ত ঢুকে যাচ্ছে। কিন্তু সঙ্গে সঙ্গে তাদের ধরে ফেলছে ডিউটি-রত কেন্দ্রীয় কমিটির লোক কিংবা কম্যান্ড্যান্ট, যারা প্রতিনিধি আর অতিথিদের তাদের নির্দিষ্ট জায়গা দেখিয়ে দিচ্ছে। তারপরে তাদের বিনা বাক্যব্যয়ে হল থেকে বের করে দেওয়া হচ্ছে এবং তাই দেখে তার ‘টিকিটহীন’ বন্ধুদের খুশি আর ধরছে না।

যারা উপস্থিত থাকতে চায়, তাদের সংখ্যার ভগ্নাংশও এই থিয়েটার-ঘরে ধরবে না।

রিতা আর পাভেল ভিড় ঠেলে কষ্টেস্টে এগিয়ে এল ভেতরে ঢোকার দরজাটার

কাছে। প্রতিনিধিরা অনবরত আসতে থাকল : কেউ আসছে ট্রামে, কেউ গাড়িতে। এদের একটা বড় দল ভেতরে ঢোকার মুখে জমে গেছে এবং লালফৌজের সাক্ষীরা—যারা নিজেরাই কমসমোলের সভ্য—এদের চাপে দেয়াল-ঠাসা হয়ে পড়েছে। এমন সময়ে প্রবেশপথের কাছে ভিড়টার মধ্যে থেকে বিরাট একটা চিৎকার উঠল :

‘বাউমান পাড়ার ছেলেরা সব, লাগাও এক ঠেলা!’

‘জোরসে ঠেলো ভাইসব, আমরা জিতছি!’

‘মারো ঠেলা হেঁ-ই-ও!’

কমসমোলের ব্যাজ-আঁটা একটি তরুণ তীক্ষ্ণ নজর রেখেছিল, চট করে সে রিতা আর পাভেলের পাশাপাশি কম্যাড্যান্টের নজর এড়িয়ে ভেতরে সৈঁধিয়ে গিয়েই বারান্দা বেয়ে সোজা দৌড় মারল। একমুহূর্তে সে মিশে গেল প্রতিনিধিদের ভিড়ের মধ্যে।

চেয়ারের সারিগুলোর পেছন দিকে এককোণে দুটো জায়গা দেখিয়ে রিতা বলল, ‘এসো, এইখানে বসি।’

বসার পর রিতা বলল, ‘একটা কথা আমার তোমাকে জিজ্ঞেস করবার আছে। অতীতের ব্যাপার অবশ্য, তবে আমার মনে হয়—তুমি জবাব দিতে আপত্তি করবে না নিশ্চয়ই। সেবারে তুমি ওভাবে পড়াশোনা বন্ধ করে দিয়ে আমাদের মধ্যে বন্ধুত্বের সম্পর্কটা ছিন্ন করে দিয়েছিলে কেন?’

রিতার সঙ্গে তার দেখা হবার সময় থেকেই পাভেল যদিও এই প্রশ্নটা ওঠার অপেক্ষায় আছে, তবু এখন এই প্রশ্নে সে একটু খতমত খেয়ে গেল। তাদের দু’জনের মধ্যে চোখাচোখি হতেই পাভেল বুঝল যে রিতা বুঝেছে ব্যাপারটা।

‘আমার তো মনে হয়, তুমি নিজেই এর জবাবটা জানো, রিতা। তিন বছর আগেকার ঘটনা এবং তখনকার পাভেল যা করেছিল সেজন্যে আমি শুধু তার নিন্দেই করতে পারি। বাস্তবিকপক্ষে, করচাগিন তার জীবনে ছোট-বড় অনেক ভুলই করেছে। ওটাও সেই ভুলগুলির মধ্যে একটা।’

হাসল রিতা, ‘ভূমিকাটি তো চমৎকার ফাঁদলে দেখছি। এবার প্রশ্নের উত্তরটায় এসো!’

‘দোষটা কেবল আমার একারই নয়’, নিচুগলায় বলল পাভেল, ওই ‘গ্যাডফ্লাই’-এরও দোষ, ওর ওই বিপ্লবী রোম্যান্টিকতার দোষ। আমাদের আদর্শের প্রতি জীবন-উৎসর্গ-করা দৃঢ়চিত্ত বীর বিপ্লবীদের সম্বন্ধে উজ্জ্বল বর্ণনা যেসব বইয়ে আছে, সেইসব বই পড়ে তখনকার দিনে আমি দারুণ প্রভাবিত হয়েছিলাম। এইসব লোক আমার সমস্ত কল্পনাকে আকর্ষণ করেছিল এবং এদের মতো হবার জন্যে আমি মনেপ্রাণে কামনা করতাম। তোমার প্রতি আমার মনোভাবকে আমি ওই ‘গ্যাডফ্লাই’-এর দ্বারা প্রভাবিত হতে দিয়েছিলাম। এখন সেটা আমার কাছে নিতান্তই আজগুবি ব্যাপার বলে মনে হয়। এখন ওই ঘটনাটা নিয়ে আমার হাসি পায়, কিন্তু তার চেয়ে বেশি হয় রাগ।’

‘তাহলে ‘গ্যাডফ্লাই’ সম্বন্ধে তুমি তোমার মত বদলেছ?’

‘না, রিতা, মূলগতভাবে নয়। ওই বইটায় ব্যক্তির ইচ্ছাশক্তি পরীক্ষার যন্ত্রণাদায়ক পদ্ধতির মধ্যে দিয়ে সম্পূর্ণ অপ্রয়োজনীয়ভাবে যে-মর্যাদাসিক অবস্থার সৃষ্টি হয়, শুধু সেইটেই আমি পরিত্যাজ্য বলে মনে করি। কিন্তু ‘গ্যাডফ্লাই’-এর মধ্যে যে-জিনিশটা

সবচেয়ে গুরুত্বপূর্ণ, সেটাকে আমি এখনও সমর্থন করি—সেটা হল তার বীরত্ব, তার অপারিসীম সহ্যশক্তি, নিজের দুঃখকষ্টগুলো পাঁচজনের কাছে বলে না বেড়িয়ে যন্ত্রণা সইবার আশ্চর্য ক্ষমতা। সমগ্রভাবে সমাজজীবনের সঙ্গে তুলনায় যার ব্যক্তিগত জীবন তুচ্ছ হয়ে গেছে, সেই ধরনের বিপুল নায়কই আমার আদর্শ।’

‘পাভেল, তিন বছর আগে যে তুমি আমাকে এসব কথা বলোনি, এইটেই আফসোসের কথা’, মৃদু হেসে বলল রিতা। হাসিটা দেখে বোঝা যায়, তার মনটা অনেক দূরে চলে গেছে।

‘আফসোস বলছ কেন, রিতা? আমি তোমার কাছে কখনও একজন কমরেডের চেয়ে বেশিকিছু হতে পারিনি, সেইজন্যই কি?’

‘না, পাভেল, তুমি তার চেয়েও বেশি কিছু হতে পারতে।’

‘সে ভুলটা তো এখনও শুধরে নেওয়া যায়।’

‘না, কমরেড ‘গ্যাডফ্লাই’, এখন বড্ড দেরি হয়ে গেছে।’

হেসে কথাটা খুলে বলল রিতা, ‘আমার কোলে এখন একটি ছোট্ট মেয়ে, বুঝলে? ওর বাবাকে আমি খুব ভালোবাসি। মোটের ওপর আমাদের তিনজনের মধ্যে বেশ দিবা বন্ধুত্ব গড়ে উঠেছে এবং আমাদের এই তিনজনকে আর পরস্পরের কাছ থেকে আলাদা করে দেওয়া যাবে না।’

পাভেলের হাতের উপর রিতা তার আঙুলগুলো বুলিয়ে দিল। পাভেল সম্বন্ধে একটা উদ্বেগের বশেই সে এটা করল, কিন্তু সঙ্গে সঙ্গেই বুঝল যে এটা করার কোনো দরকার ছিল না। হ্যাঁ, এই তিনবছরে পাভেল অনেক সুপরিণত হয়ে উঠেছে, এবং সেটা শুধু দেহের দিক থেকেই নয়। ওর চোখের চাউনি দেখেই রিতা বুঝেছে যে তার এই স্বীকারোক্তি শুনে পাভেল গভীর আঘাত পেয়েছে মনে-মনে। কিন্তু মুখে সে শুধু বলল, ‘তবু, এইমাত্র যা হারালাম, তার তুলনায় আমার যা রইল সেটা ঢের বেশি।’

এবং রিতা বুঝল যে এটা শুধুই একটা ফাঁকা বুলিমাাত্র নয়, একটা সহজ সত্য।

এবার তাদের মঞ্চের কাছাকাছি এসে বসবার সময় হয়েছে। ইউক্রেনীয় প্রতিনিধিরা যেখানে বসে আছে সেই সারিতে সামনের দিকে ওরা এগিয়ে এল। ব্যান্ড বেজে উঠল। হলের এ-প্রান্ত থেকে ও-প্রান্ত জুড়ে টাঙানো লাল কাপড়ের ফালির উপরে উজ্জ্বল অক্ষরে লেখা : ‘ভবিষ্যৎ আমাদের!’ বিরাট থিয়েটার-ঘরে নিচের চেয়ারের সারি, উপরের বক্স আর গ্যালারিগুলো ভরে গেছে হাজার হাজার মানুষ। হাজার হাজার মানুষ এসে মিলেছে একটি বিরাট প্রাণকেন্দ্রে যেখান থেকে এক অফুরন্ত শক্তির প্রবাহ উৎসারিত। যন্ত্র-শিল্পের তরুণ শ্রমিকদের অগ্রণী অংশের শ্রেষ্ঠ প্রতিভুরা এসে জড়ো হয়েছে এখানে। মঞ্চের উপর ভারী পর্দাটার গায়ে জ্বলন্ত অক্ষরে লেখা আছে : ‘ভবিষ্যৎ আমাদের!’—হাজার হাজার চোখের দৃষ্টিতে প্রতিবিম্বিত হচ্ছে এই কথাগুলোর দীপ্তি।

এখনও মানুষের স্রোত এসে ঢুকছে থিয়েটার-বাড়িতে। আর-কয়েক মুহূর্ত পরেই ভারী মঞ্চমলের পর্দাটা সরে যাবে পাশে, সারা রাশিয়া যুব কমিউনিস্ট লীগের কেন্দ্রীয় কমিটির সম্পাদক এসে দাঁড়াবে, সভা শুরু হবার সেই গাষ্ঠীর্মণ্ডিত মুহূর্তে সে অভিব্যক্ত হয়ে যাবে, তারপর ঘোষণা করবে :

‘সারা রাশিয়া যুব কমিউনিস্ট লীগের ষষ্ঠ কংগ্রেস শুরু হল বলে আমি ঘোষণা করছি।’  
বিপ্লবের এই বিরাট শক্তিকে, এই বলিষ্ঠ মহিমাকে এর আগে আর কখনও পাভেল  
করচাগিন এমন নিবিড়ভাবে অনুভব করেনি, এতটা সচেতনভাবে তার মন এর আগে  
আর কখনও এমন নাড়া খায়নি। জীবনের পথ বেয়ে পাভেল যে একজন যোদ্ধা আর  
নির্মাতা হিশেবেই বলশেভিক আদর্শের এই তরুণ যোদ্ধাদের বিজয়-সমাবেশের মধ্যে  
এসে দাঁড়িয়েছে—এ-কথাটা মনে হতে গর্ব আর আনন্দের একটা অনির্বচনীয় আবেগে  
তার মন ভরে উঠল।

\*

\*

\*

ভোর থেকে গভীর রাত্রি পর্যন্ত সর্বক্ষণ কংগ্রেসের প্রতিনিধিরা ব্যস্ত রইল, তাই  
ইতিমধ্যে আর রিতার সঙ্গে পাভেলের দেখা হয়ে ওঠেনি। একেবারে শেষের দিকের  
একটা অধিবেশনে ওদের দেখা হল—একদল ইউক্রেনীয় প্রতিনিধির সঙ্গে ছিল রিতা।

‘কাল কংগ্রেস শেষ হবার সঙ্গে সঙ্গেই আমি চলে যাব’, বলল রিতা, ‘এর মধ্যে  
আমরা আর কথাবার্তা বলবার মতো সুযোগ পাব কিনা জানি না। আমি তাই আমার  
রোজনামচার দুটো পুরনো নোটবই আর একটা ছোট চিঠি তোমার জন্যে তৈরি করে  
রেখেছি। পড়ে নিও, আর পড়া হয়ে গেলে আমাকে ওগুলো আবার ডাকে ফেরত  
পাঠিয়ে দিও। তোমাকে যেসব কথা আমার মুখে বলা হয়ে ওঠেনি, সে-কথাগুলো তুমি  
ওর থেকেই জানতে পারবে।’

রিতার হাতখানা চেপে ধরে পাভেল তার মুখের দিকে অনেকক্ষণ তাকিয়ে রইল—  
যেন তার মুখের প্রত্যেকটি বৈশিষ্ট্য সে মনের মধ্যে গেঁথে রাখতে চায়।

পূর্বনির্দিষ্ট ব্যবস্থা-অনুযায়ী পরের দিন থিয়েটার-বাড়ির প্রধান প্রবেশপথে তাদের  
দেখা হল এবং রিতা একটা প্যাকেট আর একটা আঁটা-খাম দিল পাভেলের হাতে।  
আশেপাশে লোকজন রয়েছে, তাই তারা সংযতভাবে পরস্পরের কাছ থেকে বিদায়  
নিল। রিতার চোখদুটো অল্প একটু ঝাপসা—সেই চোখের দৃষ্টিতে একটা ব্যাথাভরা  
নিবিড় স্নেহ ফুটে উঠেছে বলে পাভেল অনুভব করল।

পরের দিন ভিন্মুখী দুটি ট্রেনে চেপে তারা দু’জনে দূরদিকে চলে গেল।

পাভেল যে-ট্রেনে চলেছে, সেই ট্রেনের গোটাকতক কামরা ইউক্রেনীয়  
প্রতিনিধিদলে ভর্তি। কিয়েভের প্রতিনিধিদের সঙ্গে এক কামরায় চলেছে পাভেল।  
সকলের পর অন্য যাত্রীরা যখন ঘুমোবার জন্য শুয়ে পড়েছে আর পাশের বেঞ্চিটায়  
ওকুনেভ প্রশান্তির সঙ্গে নাক ডাকাচ্ছে, পাভেল তখন আলোটার কাছে সরে এসে  
চিঠিখানা খুলল :

‘প্রিয় পাভেল!’

‘তোমার সঙ্গে দেখা হওয়ার সময়েই এই কথাগুলো আমি তোমায় বলতে পারতাম।  
কিন্তু এই চিঠির মারফত বলাটাই আরও ভালো হবে। আমি শুধু এইটাই কামনা করছি  
যে কংগ্রেস শুরু হবার আগে আমাদের মধ্যে যে-কথাবার্তা হয়েছে, তার ফলে তোমার  
জীবনে যেন কোনো ক্ষতচিহ্ন থেকে না যায়। আমি জানি—তুমি শক্তিমান, এবং তুমি

যা বলেছ তা আন্তরিকতার সঙ্গেই বলেছ বলে আমি বিশ্বাস করি। আমি কোনো ছক-বাঁধা মনোভাব নিয়ে জীবনকে দেখি না। তাই আমার মনে হয়, ব্যক্তিগত সম্পর্কগুলির বেলায়—কদাচিৎ হলেও—কিছু কিছু ব্যতিক্রমের অবকাশ আছে, যদি সেই সম্পর্কটি খাঁটি আর গভীর ভালোবাসার ভিত্তির ওপরে গড়ে ওঠে। তোমার বেলায় সেই ব্যতিক্রমটুকু আমি হতে দিতে পারতাম, কিন্তু আমাদের তরুণতর বয়সের সেই দেনাটুকু শোধ করার জন্য প্রথমেই যে একটা আবেগ আমার মধ্যে জেগেছিল, সেটাকে আমি দমন করেছি। কারণ সেটাকে প্রশ্রয় দিলে আমাদের দু'জনের কেউই সত্যিকার সুখী হবে না। তবু, তোমার নিজের ওপরে এত রুঢ় হওয়া উচিত নয়, পাভেল। আমাদের জীবনে শুধুই সংগ্রামের নয়, সত্যিকারের ভালোবাসার সুখের স্থানও রয়েছে। 'তোমার বাকি জীবন সম্বন্ধে, সেই জীবনের আসল তাৎপর্য সম্বন্ধে, আমার বিন্দুমাত্র আশঙ্কা নেই। গভীর ভালোবাসার সঙ্গে আমি তোমার কর্মমর্দন করছি।

রিভা।'

চিন্তাশূন্যভাবে পাভেল ছিড়ে ফেলল চিঠিখানা। জানলার বাইরে হাতখানা বের করে দিয়ে বাতাসের ধাক্কায় কাগজের টুকরোগুলোর উড়ে-যাওয়াটা অনুভব করল।

সকাল নাগাদ সে রিভার রোজনাচার নোটবই দু-খানা পড়ে ফেলে ডাকে ফেরত পাঠাবার জন্য কাগজে জড়িয়ে বেঁধে রাখল। খারকভে এসে সে ওকুনেভ, পানক্রাতভ আর জনকতক প্রতিনিধির সঙ্গে ট্রেন থেকে নেমে গেল। তালিয়াকে নিয়ে আসবার জন্য ওকুনেভ কিয়েভে যাবে, তালিয়া সেখানে আল্লার কাছে আছে। পানক্রাতভ ইউক্রেনীয় কমসমোলের কেন্দ্রীয় কমিটির সভ্য নির্বাচিত হয়েছে, তারও কাজ আছে কিয়েভে। পাভেল ঠিক করল—সেও ওদের সঙ্গে কিয়েভে গিয়ে একবার ঋকি আর আল্লার সঙ্গে দেখা করে আসবে। রিভার ঠিকানায় পার্সেলটা পাঠিয়ে দেবার পর ডাকঘর থেকে বেরিয়ে এসে পাভেল দেখল, ততক্ষণে অন্য সবাই চলে গেছে। অতএব একাই রওনা হল পাভেল।

\*

\*

\*

আল্লা আর দুবাভা যে-বাড়িটায় থাকে, তার সামনে এসে ট্রাম থামল। সিঁড়ি দিয়ে দোতলায় উঠে এসে পাভেল বাঁ দিকে আল্লার ঘরের দরজায় ঘা দিল। কোনো সাড়া নেই। এত সকালে আল্লা কাজে বেরিয়ে যেতে পারে না তো। 'নিশ্চয়ই ঘুমুচ্ছে', মনে মনে ভাবল পাভেল। এমন সময়ে পাশের ঘরের দরজাটা খুলে গেল এবং ঘুমে ভারী চোখ নিয়ে দুবাভা বেরিয়ে এসে দাঁড়াল সিঁড়ির চাতালে। মুখখানা তার ছাইয়ের মতো বিবর্ণ, চোখের কোলে কালি পড়েছে। পেঁয়াজের কড়া গন্ধ বেরুচ্ছে তার মুখ দিয়ে এবং পাভেলের তীক্ষ্ণ নাকে মদের গন্ধও ঠেকল এসে। আধ-খোলা দরজাটার ফাঁকে পাভেলের নজরে পড়ল—বিছানায় শোয়া অবস্থায় একটি মোটা স্ত্রীলোকের চর্বিঅলা উলঙ্গ পা আর কাঁধ।

দুবাভা তার নজরটা লক্ষ করে পায়ের ধাক্কায় দরজাটা বন্ধ করে দিল। পাভেলের সঙ্গে চোখাচোখিটা এড়িয়ে কর্কশ গলায় জিজ্ঞেস করল সে, 'নিশ্চয়ই কমরেড বোরহাট-এর সঙ্গে দেখা করতে এসেছ? সে এখন আর এখানে থাকে না। জানো না নাকি?'

গভীর মুখে তীক্ষ্ণদৃষ্টিতে পাভেল তাকাল দুবাজার দিকে, 'না, জ্ঞানতাম না। কোথায় গেছে সে?'

হঠাৎ চটে উঠল দুবাবা। চিৎকার করে বলল, 'সেটা আমার জ্ঞানবার কথা নয়।' তারপর ঢেকুর তুলে চাপা বিষেষের সঙ্গে বলল, 'ওকে সাস্তুনা দিতে এসেছিলে বুঝি, অ্যা? শূন্যস্থান পূরণ করার জন্যে তুমি ঠিক সময়েই এসে গেছ। এই তো তোমার সুযোগ। ভেবো না, ও তোমাকে নামজুর করবে না। ও আমাকে অনেকবার বলেছে যে তোমাকেও ওর পছন্দ ছিল... কিংবা মেয়েরা আরও যেভাবে বলে আর কী! যাও, সময় থাকতে থাকতে সুযোগটা নাও গিয়ে। দেহ-মনের যথার্থ সমন্বয় ঘটাতে পারবে।'

মুখে রক্ত উঠে আসছে বলে অনুভব করল পাভেল। অতিকষ্টে নিজেকে সামলে নিচুগলায় সে বলল, 'তুমি কোন অধঃপাতে গেছ, মিতিয়াই? তুমি যে এত নিচে নেমে যাবে, তা কোনোদিন ভাবিনি। একসময়ে তুমি তো খারাপ লোক ছিলে না। তুমি কেন এভাবে নিজেকে গোপনায় যেতে দিচ্ছ?'

দেয়ালটায় ঠেক দিয়ে দাঁড়াল দুবাবা। তার খালিপায়ের নিচে সিমেন্টের মেঝেটা স্পষ্টতই ঠাণ্ডা ঠেকছে, কারণ কঁপে-কঁপে উঠছে সে। দরজাটা খুলে গেল আর ফোলা-ফোলা চোখালা একজন স্ত্রীলোকের একটা গোলগাল মুখ বেরিয়ে এল, 'ভেতরে এসো, সোনা। বাইরে দাঁড়িয়ে কেন?'

স্ত্রীলোকটি আর-কিছু বলবার আগেই দুবাবা দরজাটা ঠেলে বন্ধ করে দিয়ে তার গায়ে পিঠ লাগিয়ে দাঁড়াল।

'তোমার অধঃপতনের শুরুটা তো চমৎকার দেখছি', বলল পাভেল, 'এসব কী ধরনের সঙ্গী-সাথী তোমার আজকাল? এর শেষ কোথায়?'

কিন্তু দুবাবা আর-কোনো কথা শুনতে রাজি নয়। চোঁচিয়ে উঠল সে, 'আমি কার সঙ্গে শোব না শোব, তাও তোমরা বলে দেবে নাকি? তোমার এই উপদেশ-দান অনেক সয়েছি। এবার কেটে পড়ো যেখান থেকে এসেছ সেইখানে। যাও, দৌড়ে গিয়ে সবাইকে বলো গে—দুবাবা মদ খায়, নষ্ট মেয়েমানুষদের নিয়ে শুয়ে থাকে। যাও!'

পাভেল তার কাছে এগিয়ে গিয়ে চাপা আবেগভরা গলায় বলল, 'মিতিয়াই, ওই স্ত্রীলোকটিকে বিদায় করে দাও। আমি তোমার সঙ্গে কথা বলতে চাই, শেষবারের মতো বলছি...'

অন্ধকার হয়ে উঠল দুবাজার মুখ। ঘুরে দাঁড়িয়ে আর-একটি কথাও না বলে সে ঘরের ভেতরে ঢুকে গেল।

'হতভাগা শুয়ার!' বিড়বিড় করে বলে পাভেল ধীরে ধীরে সিঁড়ি বেয়ে নেমে এল।

\*

\*

\*

দুটি বছর কেটে গেছে। অপেক্ষ সময়ের হিশেবে দিন আর মাসগুলো একে একে পার হয়ে গেছে, কিন্তু জীবনের বিচিত্র রঙে রঙিন সময়ের এই মিছিলটার আপাত-গতানুগতিকতা ভরে উঠল অভিনবত্বে, প্রত্যেকটি দিনই অন্যদিনের চেয়ে পৃথক। বিরাট এই দেশের ষোলো কোটি মানুষ, যারা পৃথিবীর ইতিহাসে এই প্রথম অসীম ঐশ্বর্য-ভরা তাদের এই সুবিস্তীর্ণ ভূখণ্ডে ভাগ্যানিয়ন্ত্রণের সমস্ত দায়িত্ব নিজেদের

হাতে তুলে নিয়েছে, তারা তাদের যুদ্ধবিধ্বস্ত দেশের আর্থনীতিক ব্যবস্থাটাকে পুনর্গঠিত করে তোলার বিরাট শ্রমসাপেক্ষ কাজে ব্যাপৃত ছিল এই দু-বছর ধরে। দেশ আরও শিক্ষালী হয়ে উঠেছে : নতুন বীর্ষ সঞ্চারিত হয়েছে তার শিরা-উপশিরায়; নির্ধূম চিমনিঅলা পরিত্যক্ত কারখানার প্রাণহীন দৃশ্য আর ইদানীং দেখতে পাওয়া যায় না।

অবিশ্রাম কাজের মধ্যে দিয়ে পাভেলের এই দু-বছর কেটেছে। জীবনকে যারা নিষ্কল্যাণ হয়ে গ্রহণ করে, প্রত্যেকটি সকালকে হাই তুলে অলস অভ্যর্থনা জানায় আর দশটা বাজার সঙ্গে সঙ্গে ঘুমুতে যায়—পাভেল তাদের মতো নয়। গতিমুখর তার জীবন; নিজের বেলায় যেমন, তেমনি অন্যের বেলাতেও প্রত্যেকটি অপচয়িত মুহূর্তের জন্য ক্ষুব্ধ হয়ে ওঠে সে।

ঘুমোবার জন্য পাভেল সবচেয়ে কম সময় দেয়। প্রায়ই তার জানলায় গভীর রাত্রি পর্যন্ত আলো জ্বলে; তখন ঘরের ভেতরে দেখা যাবে—টেবিলের চারধারে জনকতক লোক বসে পড়াশোনায় মগ্ন। এই দু-বছরে তারা কার্ল মার্কসের ‘পুঁজি’ গ্রন্থের তৃতীয় খণ্ড খুঁটিয়ে পড়েছে এবং পুঁজিবাদী শোষণ-ব্যবস্থার সূক্ষ্ম প্রক্রিয়াটা এখন তাদের কাছে সুস্পষ্ট হয়ে উঠেছে।

পাভেলের কাজের এলাকায় এসে জুটেছে রাজ্জালিখিন। তাকে কোনো-একটা জেলা কমসমোল সংগঠনের সম্পাদক নিযুক্ত করার জন্য সুপারিশ করে প্রাদেশিক কমিটি এখানে পাঠিয়েছে। রাজ্জালিখিন যখন এসে পৌঁছায়, তখন পাভেল এখানে ছিল না এবং তার অনুপস্থিতিতেই ব্যুরো এই নুতন কমরেডটিকে একটা এলাকায় পাঠিয়ে দেয়। পাভেল ফিরে এসে খবরটা জেনে কোনো মন্তব্য করেনি।

একমাস বাদে পাভেল অপ্রত্যাশিতভাবে একদিন এসে পড়ল রাজ্জালিখিনের এলাকায় কাজকর্ম কেমন চলেছে দেখার জন্য। কিছু তথ্য যা নজরে পড়ল তাতে দেখা গেল : নতুন সম্পাদকটি মদ খেয়ে মাতলামি করে, নিজের চারপাশে সে কতকগুলো খোশামুদে মোসাহেব জুটিয়ে নিয়েছে, এবং কর্তব্যনিষ্ঠ আর সক্রিয় কর্মী যারা তাদের স্বতঃপ্রবৃত্তি হয়ে কাজ করার উৎসাহটাকে দমিয়ে রেখেছে। পাভেল এইসব প্রমাণ দিয়ে ব্যুরোর কাছে রিপোর্ট দাখিল করল এবং ব্যুরোর আলোচনা-বৈঠকে যখন রাজ্জালিখিনকে তীব্র তিরস্কার করার পক্ষে সবাই মত দিল, তখন পাভেল উঠে দাঁড়িয়ে সবাইকে বিম্বিত করে দিয়ে বলল, ‘আমি প্রস্তাব করছি—রাজ্জালিখিনকে বহিষ্কৃত করে দেওয়া হোক এবং এই বহিষ্কার হোক চূড়ান্ত।’

প্রস্তাবটা শুনে সবাই একটু হকচকিয়ে গেল। এক্ষেত্রে এই শাস্তির ব্যবস্থাটা বড় বেশি কড়া বলে মনে হল। কিন্তু পাভেল নিজের মতের সমর্থনে দৃঢ় হয়ে বলল, ‘বদমায়েশটাকে বের করে দিতেই হবে। ও যাতে মানুষের মতো মানুষ হয়ে উঠতে পারে, তার জন্যে সবরকম সুযোগই গুরু ছিল, কিন্তু কমসমোলের মধ্যে ও থেকে গেছে শুধুমাত্র নিজের সুবিধের জন্যে।’ তারপরে পাভেল বেরেজ্জদভের ঘটনাটা ব্যুরোর কাছে বলল।

‘আমি এর প্রতিবাদ করছি!’ চোঁচিয়ে বলল রাজ্জালিখিন, ‘করচাগিন স্রেফ ব্যক্তিগত রাগ মেটাবার চেষ্টায় আছে। ও যা যা বলল, সবই একদম বাজে গালগল্প। ও এইসব অভিযোগের সপক্ষে তথ্য-প্রমাণ পেশ করুক। মনে করো, আমি তোমাদের কাছে এসে বানিয়ে বললাম যে করচাগিন বেআইনি মাল লেনদেন করেছে, তখন

তোমরা কি শুধু ওইটুকু শুনেই তাকে কমসমোল থেকে বের করে দেবে? ওকে লিখিত প্রমাণ পেশ করতে হবে।’

‘আচ্ছা, ভেবো না। দরকারমতো সমস্ত প্রমাণই পেশ করব আমরা’, জবাব দিল পাভেল।

ঘর থেকে বেরিয়ে গেল রাজ্জালিখিন। পাভেল ব্যুরো-সভ্যদের যুক্তি-তথ্য দিয়ে বোঝাল, যার ফলে আধঘণ্টা বাদে রাজ্জালিখিনকে একজন ভিন্ন মতাদর্শের লোক হিসেবে কমসমোল থেকে বহিষ্কৃত করে একটা প্রস্তাব নেওয়া হল।

\*

\*

\*

গরমকাল এসে গেল আর সেইসঙ্গে এল ছুটির মরশুম। পাভেলের সহকর্মীরা সব একে একে চলে গেল তাদের ন্যায্য প্রাপ্য ছুটির দিনগুলো কাটিয়ে আসবার জন্য। শরীর সারাবার জন্য যাদের তেমন দরকার ছিল তারা গেল সমুদ্রতীরে; পাভেল তাদের আর্থিক সাহায্যের ব্যবস্থা আর স্বাস্থ্যনিবাসে জায়গা পাবার বন্দোবস্ত করে দিল। ক্লাস্ত দেহে আর বিবর্ণ মুখ নিয়ে—কিন্তু আসন্ন ছুটি উপভোগের প্রত্যাশায় খুশিমনে—তারা রওনা হয়ে গেল। তাদের কাজের বোঝাটা এসে চাপল পাভেলের ঘাড়ে এবং সে বিনা-বাক্যব্যয়ে এই বাড়তি কাজের বোঝাটা বইল ক-দিন ধরে। ওরা সব ফিরে এল রোদে-পোড়া রঙ নিয়ে, প্রাণবন্ত কর্মোদ্দীপনায় ভরপুর হয়ে। তারপর আবার অন্যেরা গেল। গোটা গ্রীষ্মকালটা ধরে দণ্ডরে কাজের লোকের সংখ্যায় ঘাটতি রয়ে গেল। কিন্তু তার জন্য জীবন শ্রুৎগতি হয়ে পড়ে নি—পাভেলের পক্ষে একদিনের জন্যও কাজ বন্ধ করে দিয়ে বসে থাকা সম্ভব হয়নি।

গরমকাল কেটে গেল।

শরৎ আর শীতকালটা পাভেলের ভালো লাগত না, কারণ প্রতিবছর এই সময়টায় তার ভয়ানক শরীরের কষ্ট হয়।

এই বছরটায় পাভেল বিশেষ আগ্রহ নিয়ে গ্রীষ্ম আসার অপেক্ষায় ছিল। কারণ, প্রতি বছরে তার শক্তি একটু একটু করে নিঃশেষিত হয়ে আসছে বলে সে অনুভব করছিল—যদিও নিজের কাছেও কথাটা স্বীকার করতে অত্যন্ত যত্নগা বোধ করত। মাত্র দুটো উপায় আছে তার; হয়, কাজগুলো করবার জন্য তাকে যে প্রচণ্ড প্রয়াস করতে হচ্ছে, সেটা তার সহ্য হচ্ছে না বলে স্বীকার করে নিয়ে নিজেকে পশু বলে ঘোষণা করা; আর নাহয়, যতক্ষণ তার পক্ষে কাজ করে যাওয়া সম্ভব, ততক্ষণ চালিয়ে যাওয়া। এই দ্বিতীয় পথটাই বেছে নিয়েছে সে।

একদিন প্রাদেশিক পার্টি-কমিটির ব্যুরোর একটা আলোচনা-বৈঠকে ডাক্তার বার্তেলিক তার কাছে এসে পাশে বসল। বহুদিনের পুরনো পার্টি-কর্মী সে, পার্টির বেআইনি যুগে গোপন কাজকর্ম চালিয়ে গেছে। বর্তমানে ডাক্তার বার্তেলিক এই অঞ্চলে জনস্বাস্থ্য বিভাগের পরিচালক। পাভেলকে বলল সে, ‘তোমার মুখচোখ কেমন যেন শুকনো দেখাচ্ছে, করচাগিন। শরীর কেমন যাচ্ছে? তুমি কি চিকিৎসা কমিশনে স্বাস্থ্য পরীক্ষা করিয়েছ? করাও নি? আমিও তাই ভেবেছি। কিন্তু তোমাকে দেখে তো



মনে হচ্ছে তোমার শরীরটা একটু সারিয়ে নেওয়া দরকার। বৃহস্পতিবার বিকেলের দিকে একবার এসো, পরীক্ষা করে দেখব একবার আমরা।’

পাভেল যায়নি। কাজে খুব ব্যস্ত ছিল সে। কিন্তু বার্তেলিক ভোলেনি তার কথা, কয়েকদিন বাদে সে নিজেই এসে পাভেলকে নিয়ে গিয়ে হাজির করাল চিকিৎসা-কমিশনের কাছে। এই কমিশনে সে নিজে উপস্থিত থাকল স্বায়ুরোগ-বিশেষজ্ঞ চিকিৎসক হিসেবে। চিকিৎসা-কমিশন সুপারিশ করল :

‘চিকিৎসা কমিশন মনে করে যে, অবিলম্বে বিশ্রাম নিয়ে ক্রিমিয়ায় গিয়ে দীর্ঘকালের চিকিৎসাধীনে থাকা দরকার এবং তারপরেও নিয়মিত চিকিৎসা দরকার। এটা যদি করা না হয়, তাহলে পরিণামটা অত্যন্ত গুরুতর হয়ে দাঁড়াবে এবং সেটাকে আর কিছুতেই এড়ানো যাবে না।’

এই সুপারিশটুকুর শিরোভাগে লাতিন ভাষায় যে বিভিন্ন রোগের লম্বা তালিকা দেওয়া ছিল, সেটা পড়ে পাভেল শুধু একটা জিনিশ বুঝতে পারল : তার আসল রোগটা পাবে নয়, নার্ডভস্কে—সেটা গুরুতরভাবে জখম হয়ে পড়েছে।

বার্তেলিক চিকিৎসা-কমিশনের সিদ্ধান্তের কথাটা ব্যুরোকে জানাল এবং করচাগিনকে অবিলম্বে কাজের দায়িত্ব থেকে খালাস করে দেবার প্রস্তাবে কেউ কোনো আপত্তি তুলল না। করচাগিন নিজে অবশ্য বলল যে, সাংগঠনিক বিভাগের পরিচালক স্বেত্‌নেভ ফিরে না-আসা পর্যন্ত তার ছুটি মূলতবি রাখা হোক। কমিটিকে নেতৃত্বহীন অবস্থায় ছেড়ে যেতে সে চায় না। ব্যুরো রাজি হল, যদিও বার্তেলিক এই দেরিতে আপত্তি তুলেছিল।

অতএব, আর তিন সপ্তাহ বাদেই ছুটিতে যাবে—জীবনে সে এই প্রথম ছুটি নিজে। ইয়েভপাতোরিয়্যার এক স্বাস্থ্যনিবাসে যাবার জন্য ইতিমধ্যেই তার দেৱাজের টানায় একটা পাস রয়েছে।

এই তিন সপ্তাহ সে আরও বেশি করে কাজে লেগে গেল; এই অঞ্চলের কমসমালের একটা পূর্ণাঙ্গ সভা করল এবং যেখানে যা-কিছু কাজে ফাঁক পড়েছিল সমস্তই ওছিয়ে আনবার জন্য শ্রান্তিহীনভাবে উঠেপড়ে লাগল—যাতে নিশ্চিত মনে সে এখান থেকে যেতে পারে।

এবং তার এই প্রথম সমুদ্র-দর্শনে যাবার ঠিক আগের দিনই একটা অবিশ্বাস্য রকমের কুর্ষসিত ব্যাপার ঘটে গেল।

একটা বৈঠকে উপস্থিত থাকার জন্য পাভেল সেদিন কাজের শেষে এসেছিল পার্টির প্রচার-বিভাগের দপ্তরে। সে যখন এসে পৌঁছল, তখন ঘরে আর কেউ নেই। তাই সে অন্যদের আসার অপেক্ষায় এসে বসল বইয়ের তাকের পেছনে খোলা জানলাটার ধারে। কিছুক্ষণের মধ্যেই কয়েকজন এসে গেল। বইয়ের তাকের আড়াল থেকে সে ওদের দেখতে পাচ্ছে না, কিন্তু একটা গলা তার চেনা। ফাইলোর গলা—অঞ্চলের আর্থনীতিক দপ্তরের ভারপ্রাপ্ত সে, লম্বা আর সুপুরুষ, চলন-বলনে একটা চোস্ত ফৌজি কায়দা আছে, মদ খাওয়া আর সুশ্রী চেহারার যে-কোনো মেয়ের পিছু নেবার ব্যাপারে খ্যাতি অর্জন করেছে।

ফাইলো একসময়ে পার্টিজান দলে ছিল। সুযোগ পেলেই সে একগাল হেসে জাঁক করে বলতে ছাড়ে না—মাখনোর বোম্বেটে-দলের ডজন-ডজন লোকের মাথা

সে কীভাবে দিনে দিনে কেটে উড়িয়ে দিয়েছে। পাভেল সহ্য করতে পারে না লোকটাকে। একবার কমসমেলের একটি মেয়ে পাভেলের কাছে এসে কাঁদতে কাঁদতে বলেছিল : ফাইলো মেয়েটিকে বিয়ে করবে বলে কথা দিয়ে তার সঙ্গে একসপ্তাহ একসঙ্গে বসবাস করার পর কেটে পড়েছে, ইদানীং মেয়েটির সঙ্গে দেখা হলে অভিবাদনও জানায় না। পার্টির নিয়ন্ত্রণ কমিশনে এ-সম্বন্ধে আলোচনা উঠেছিল, কিন্তু মেয়েটি কোনো প্রমাণ দিতে না-পারায় সেবারে ফাইলো পার পেয়ে গিয়েছিল। কিন্তু পাভেলের বিশ্বাস হয়েছিল মেয়েটির কথায়। এখন পাভেলের কানে ঢুকছিল ওদের কথাবার্তা—তার উপস্থিতির কথাটা না-জেনে খুব খোলাখুলি কথাবার্তা বলছিল ওরা।

‘তারপর ফাইলো, চলছে কেমন? ইদানীং কোন তালে ঘুরছ?’

এটা শ্রিবভের গলা—ফাইলোর প্রমোদ-সঙ্গীদের একজন। কে জানে কেন, শ্রিবভকে পার্টির প্রচার-বিভাগের একজন কর্মী বলে মনে করা হয়—যদিও লোকটা নিতান্তই অজ্ঞ, সংকীর্ণমনা এবং নির্বোধ। সে যাই হোক, পার্টির প্রচারকর্মী বলে অভিহিত হয়ে শ্রিবভ গর্ব বোধ করে এবং যে-কোনো উপলক্ষে সবাইকে কথাটা মনে করিয়ে দেয়।

‘আমাকে তুমি অভিনন্দন জানাতে পারো হে ছোকরা। কাল আমি আর-একটা কেন্দ্রা ফতে করেছি। ওই করোতায়েভা। তুমি তো বলেছিলে—ওর কাছে বিশেষ সুবিধে হবে না। ওইখানেই তোমার ভুল হয়েছিল হে। আমি যদি কোনো মেয়ের পেছনে লাগি, তাহলে নিশ্চয় জানবে—আজ হোক, কাল হোক, ঠিক বাগিয়ে নেব।’ বড়াই করে কথাটা বলে ফাইলো শেষে কিছু অশ্লীল কথা জুড়ে দিল।

পাভেল অনুভব করল, প্রচণ্ড একটা স্নায়বিক উত্তেজনায় তার সর্বত্র কাঁপছে—ভয়ানক ক্রুদ্ধ হয়ে উঠলে যেরকম তার সর্বদা হয়ে থাকে। করোতায়েভা মহিলা-বিভাগের ভারপ্রাপ্ত কমরেড এবং এই আঞ্চলিক কমিটিতে সে আর পাভেল একই সময়ে আসে। পাভেল তাকে জানে—বেশ ভালো মেয়ে, বিশ্বস্ত পার্টি-কর্মী, সাহায্যপ্রার্থী মেয়েদের জন্য সহৃদয় বিচক্ষণতার সঙ্গে সবরকম বন্দোবস্ত করে দেয়। কমিটির সহকর্মীরা তাকে সম্মান করে। পাভেল জানে করোতায়েভা অবিবাহিতা। তার সম্বন্ধেই-যে ফাইলো বলছে, সে-বিষয়ে পাভেলের মনে কোনো সন্দেহ রইল না।

‘যাও, যাও! নিশ্চয়ই বানিয়ে বলছ তুমি! করোতায়েভা এমনটি হতে দেবে বলে তো মনে হয় না।’

‘বানিয়ে বলছি? আমি? কী ভাবো তুমি আমায়? এর চেয়েও কঠিন কত ক্ষেত্রে মেরে বেরিয়ে গেলাম! শুধু পদ্ধতিটা জানা চাই। কোন মেয়ের কাছে কীভাবে এগুতে হবে সেটা বোঝা দরকার। কেউ কেউ সঙ্গে সঙ্গেই পটে যায়, কিন্তু সে-ধরনের মেয়েরা ওই হয়রানিটুকুর যোগ্য নয়। কোনো কোনো মেয়েকে বাগে আনতে আবার মাসখানেক লেগে যায়। ওদের মনস্তত্ত্ব বুঝে নেওয়াই সবচেয়ে জরুরি জিনিশ। ঠিক পথে এগুনোটাই হচ্ছে আসল কথা। ওটা একটা শাস্ত্র-বিশেষ, বুঝলে হে ছোকরা! কিন্তু আমি ওসব বিষয়ে ঝানু বিশেষজ্ঞ। হোঃ হোঃ হোঃ!’

দারুণ একটা আত্মতৃপ্তিতে উপছে উঠেছে ফাইলো। আর, আরও সব রসালো বৃত্তান্ত শোনবার আশ্রয়ে তার শ্রোতার তাকে উক্কে দিচ্ছে।

উঠে দাঁড়াল পাভেল। হাতদুটো মুঠো-বাঁধা হয়ে উঠেছে তার, বুকের মধ্যে হৃৎপিণ্ডটায় উদ্‌কাম ধুকধুকানি শুরু হয়ে গেছে বলে অনুভব করল সে।

‘এমনি সাধারণভাবে টোপ ফেলে যে করোতায়োভাকে গাঁথার খুব বেশি আশা নেই, তা আমি জ্ঞানতাম। কিন্তু তাই বলে আমি হাল ছেড়ে দিতে রাজি নই, বিশেষ করে আমি যখন ওকে বাগাব বলে গ্রিবভের সঙ্গে বারো বোতল মদ বাজি রেখেছি। অতএব আমি—যাকে বলে গিয়ে—অন্তর্ধাতী কৌশল খাটানোর চেষ্টা করলাম। দু-একবার ওর আপিসে গেলাম, কিন্তু দেখলাম ওর মনে খুব-একটা দাগ কাটতে পারছি না। তাছাড়া, আমার সম্বন্ধে নানা ধরনের সব আক্ষেবাজে কথা বলাবলি হয়, নিশ্চয়ই সেসবের কিছু কিছু ওর কানেও পৌঁছেছে... আচ্ছা যাক, সেসব দীর্ঘ বৃত্তান্ত। সংক্ষেপে বলতে গেলে, সরাসরি আক্রমণে কোনো ফল হল না, তাই আমি পেছনদিক থেকে আক্রমণের কৌশল খাটলাম। হোঃ! হোঃ! মতলবটা দিব্যি ফেঁদেছিলাম, বুঝলে! আমার দুঃখভরা জীবনের কাহিনী বললাম ওকে—কীভাবে আমি যুদ্ধে লড়াই করেছি, নানান জায়গায় ঘুরে-ঘুরে বেড়িয়েছি আর জীবনে কতবার ধাক্কা খেয়েছি, কিন্তু মনের মতো ঠিক মেয়েটিকে কোনোদিন খুঁজে পাইনি, নিঃসঙ্গ হতভাগ্যের মতো এই এখন ঘুরে বেড়াচ্ছি—আমায় ভালোবাসার কেউ নেই... এবং এই ধরনের আরও অনেক কথা ইনিয়ে-বিনিয়ে বললাম। আমি ওর মনের দুর্বল জায়গাগুলোয় ঘা মারলাম, বুঝলে তো? ওকে নিয়ে যে আমার ভয়ানক হয়রানি গেছে সে-কথা অবশ্য স্বীকার করতেই হবে। একবার তো ভেবেই বসেছিলাম যে মেয়েটাকে চুলোর দুয়োরে পাঠিয়ে দিয়ে এসব আহাম্মকির পাট চুকিয়ে দিই। কিন্তু ততদিনে এটা একটা নীতিগত প্রশ্নে দাঁড়িয়ে গেছে, অতএব নীতির দিক থেকে আমাকে লেগে থাকতেই হল। এবং শেষপর্যন্ত আমি বাগে আনলাম। আমার এই ধৈর্যের ফল কী হল বলো দেখি? দেখা গেল, ও কুমারী! হাঃ! হাঃ! কী মজার ব্যাপার!’

ফাইলো বলে যেতে লাগল তার ন্যাক্কারজনক কাহিনী।

পাভেল কখন যেন এসে দাঁড়িয়েছে তার পাশে, তা তার প্রায় মনে নেই। রাগে ফুঁসছে সে।

‘জানোয়ার!’ গর্জন করে উঠল পাভেল।

‘কী! আমি জানোয়ার, অ্যাং? আর, তুমি-যে আড়ি পেতে অন্যের কথা শোনো, তুমি তাহলে কী?’

শব্দটাই, পাভেল আর কিছুও বলেছিল—কেননা, তার জামার গলার কাছটা চেপে ধরল ফাইলো—একটু মাতাল অবস্থায় ছিল সে।

‘আমায় অপমান! অ্যাং?’ চিৎকার করে উঠেই সে পাভেলকে ঘুসি মেরে বসল।

ওক-কাঠের ভারী একটা টুল তুলে নিয়ে পাভেল একটি আঘাতে তাকে পেড়ে ফেলল মাটিতে। ফাইলোর কপাল ভালো যে, পাভেলের সঙ্গে সেদিন তার পিস্তলটা ছিল না—থাকলে সেদিন তাকে বাঁচতে হত না।

কিন্তু এই কাণ্ডজ্ঞানহীন অবিস্থাস্য ব্যাপারটা ঘটে গেছে। এবং, ক্রিমিয়ায় যেদিন তার রক্তা হয়ে যাবার কথা, সেইদিনই পাভেলকে হাজির হতে হল পার্টি-আদালতের সামনে।

পুরো পার্টি-সংগঠনের সমস্ত সভ্য এসে জড়ো হয়েছে শহরের থিয়েটার-বাড়িটায়। ঘটনাটার ফলে দারুণ প্রতিক্রিয়ার সৃষ্টি হয়েছে এবং পার্টি-আদালতের গোটা স্তন্যনটাই পার্টি-সভ্যদের ব্যবহারিক নীতি, চারিত্রিক নীতি আর পারস্পরিক ব্যক্তিগত সম্পর্ক সম্বন্ধে একটা গুরুতর আলোচনায় গিয়ে দাঁড়াল। এই ঘটনার সঙ্গে সাধারণভাবে যেসব প্রশ্ন জড়িত ছিল, সেইগুলোর আলোচনার একটা দিকনির্দেশ হিশেবেই ব্যাপারটাকে নেওয়া হল এবং খাস ঘটনাটা গৌণ হয়ে দাঁড়াল। ফাইলো অত্যন্ত উদ্ধত ব্যবহার করল, অবজ্ঞার হাসি হেসে ঘোষণা করল যে মামলাটাকে জন-আদালতের সামনে হাজির করে মারপিট করবার জন্য করচাগিনকে সশ্রম দণ্ড ভোগ করাবে। কোনো প্রশ্নের উত্তর দিতে সে সরাসরি অস্বীকার করে বসল।

‘আমাকে নিয়ে বেশ একটু মুখরোচক গালগল্প করার মতো খোরাক পেতে চাও তোমরা, না? সেটি হচ্ছে না। তোমাদের খুশিমতো যে-কোনো দোষ চাপাতে পারো আমার ঘাড়ের। কিন্তু আসল ঘটনাটা হচ্ছে : মেয়েরা-যে আমাকে এমন তীব্র আক্রমণ করেছে, তার কারণ—আমি ওদের দিকে মনোযোগ দিই না। তোমাদের এই গোটা মামলাটাই একটা অতি বাজে ব্যাপার। এটা যদি ১৯১৮-এ হত, তাহলে এই উন্মাদ করচাগিনটার সঙ্গে আমি আমার নিজের মতো করেই ব্যাপারটা ফয়সালা করে ফেলতাম। এরপর, তোমরা আমাকে বাদ দিয়েই তোমাদের আদালতের কাজ চালিয়ে যেতে পারো!’ এই বলে সে বেরিয়ে গেল হলঘর থেকে।

তারপর, সভাপতি পাভেলকে বলল—ঘটনাটা কী ঘটেছিল বলার জন্য। পাভেল বেশ শান্তভাবেই বলা শুরু করল, যদিও নিজেকে সংযত রাখার জন্য তাকে যথেষ্ট বেগ পেতে হচ্ছিল।

‘আমি নিজেকে সামলাতে পারিনি বলেই গোটা ব্যাপারটা ঘটতে পেরেছে। কিন্তু যখন আমি কোনো কাজের বেলায় মাথা ঝটানোর চেয়ে হাত চালানোর ওপরেই বেশি ভরসা করতাম, সেসব দিন বহুকাল গত হয়েছে। এক্ষেত্রে যেটা ঘটেছে সেটা একটা আকস্মিক ব্যাপার। কী যে করে বসলাম সেটা খেয়াল হবার আগেই আমি ফাইলোকে মেরে বসেছিলাম। গত কয়েক বছরের মধ্যে এই একবার মাত্র আমি এই ধরনের ‘পার্টিজান’ সুলভ কাজের অপরাধ করে বসেছি। আমি এর তীব্র নিন্দা করছি—যদিও, ওই মারটা ফাইলোর প্রাপ্য বলেই আমি মনে করি। ফাইলোর ধরনের লোকগুলো অতি ন্যাকারজনক। আমি এইটে কিছুতেই বুঝি না, বিশ্বাসও করতে পারি না যে একজন বিপ্লবী, একজন কমিউনিস্ট কী করে একই সঙ্গে এমন বদমায়েশ আর নোংরা জানোয়ার হতে পারে। এই গোটা ব্যাপারটার একমাত্র ইতিবাচক দিক হল এই যে, ব্যক্তিগত জীবনে সহকর্মী কমিউনিস্টদের আচার-ব্যবহার কী-ধরনের হবে আমাদের সেই আলোচনায় প্রবৃত্ত করছে।’

পার্টি-সভ্যদের বিরাট সংখ্যাগরিষ্ঠ অংশ ফাইলোকে পার্টি থেকে বের করে দেবার পক্ষে ভোট দিল। মিথ্যা সাক্ষ্য দেবার জন্য খ্রিবভকে তীব্র তিরস্কার করে প্রস্তাব নেওয়া হল এবং এর পরে আর কোনো অপরাধ করলে তাকেও পার্টি থেকে বের করে দেওয়া হবে বলে সাবধান করে দেওয়া হল। সেদিন ফাইলোর সঙ্গে সেই কথাবার্তা

অন্য যারা যোগ দিয়েছিল, তারা নিজেদের ভুল স্বীকার করল এবং তাদের নিন্দা করে ছেড়ে দেওয়া হল।

তারপরে, উপস্থিত সবাইকে ডাক্তার বার্তেলিক পাভেলের স্নায়বিক অবস্থার কথাটা জানাল এবং এই ঘটনা সম্বন্ধে তদন্ত করার জন্য যে-কমরেডটিকে পার্টি থেকে নিযুক্ত করা হয়েছিল, সে যখন প্রস্তাব আনল যে করচাগিনকেও তীব্র তিরস্কার করা হোক, তখন সভার সবাই ভীষণভাবে প্রতিবাদ তুলল। সেই কমরেডটি তখন তার প্রস্তাব প্রত্যাহার করে নেওয়ায় পাভেলকে নির্দোষ ঘোষণা করা হল।

\*

\*

\*

দিন-কয়েক বাদে পাভেল খারকভে রওনা হয়ে গেল। পার্টির আঞ্চলিক কমিটির কাছে পাভেল বারবার করে অনুরোধ জানাচ্ছিল যে তাকে তার বর্তমান কাজ থেকে খালাস করে দিয়ে ইউক্রেনীয় কমসমোলের কেন্দ্রীয় কমিটির হেফাজতে দেওয়া হোক; শেষপর্যন্ত আঞ্চলিক কমিটি সেটা মঞ্জুর করেছে। ভালো একটা প্রমাণপত্র দেওয়া হয়েছে তাকে। কেন্দ্রীয় কমিটির একজন সম্পাদক আকিম। খারকভে পৌছেই পাভেল তার সঙ্গে দেখা করতে গেল এবং সমস্ত ব্যাপারটা বলল।

আকিম তার প্রমাণপত্রটার উপরে একবার চোখ বুলিয়ে নিল—তাতে পাভেলের ‘পার্টির প্রতি অপরিসীম আনুগত্যের’ কথা বলা হয়েছে, কিন্তু সেইসঙ্গে এ-কথাও বলা হয়েছে : ‘পার্টিগত সংঘম আছে; তবে, বিরল ক্ষেত্রে আত্মসংযম হারিয়ে বসতে পারে। ওর নার্সত্বের গুরুতর অবস্থার জন্য এরকমটা হয়।’

আকিম বলল, ‘এমন ভালো একটা প্রমাণপত্র এই একটা কথার জন্যে খুঁত ধরে গেল, পাভেল। যাক গে, ওরকম ব্যাপার আমাদের মধ্যে যারা সবচেয়ে শক্তিম্যান তাদের বেলাতেও ঘটে। দক্ষিণে যাও, শরীরটাকে বাগিয়ে নাও, তারপর ফিরে এলে কাজের কথা হবে।’

আন্তরিকতার সঙ্গে তার সঙ্গে করমর্দন করল আকিম। •

\*

\*

\*

কেন্দ্রীয় কমিটির ‘কমিউনার’ স্বাস্থ্যনিবাস। চারদিকে গোলাপ-ঝাড় আর উচ্ছল ফোয়ারার মধ্যে-মধ্যে বসানো আঙুর-লতায় ঢাকা শাদা বাড়িগুলো। যারা ছুটি উপভোগ করতে এসেছে তাদের পরনে গরমকালের উপযোগী শাদা হালকা পোশাক কিংবা স্নানের পোশাক। একজন অল্পবয়সী মেয়ে-ডাক্তার পাভেলের নামটা রেজিস্টারে লিখে নিল, তারপরে কোণের দিকে বাড়িটায় একটা প্রশস্ত কামরায় এসে উঠল পাভেল। ধপধপে শাদা বিছানার চাদর, নিখুঁত পরিচ্ছন্নতা, আর প্রশান্তি—নির্ব্যাঘাত প্রশান্তির আশীর্বাদ। স্নান করে শরীরটাকে স্নিগ্ধ করে নিয়ে পোশাক বদলে পাভেল তাড়াতাড়ি চলল সমুদ্রতীরে।

সামনে শান্ত মহিমাময় সমুদ্র—দিগন্ত পর্যন্ত প্রসারিত পালিশ-করা মার্বেল পাথরের মতো নীলচে-কালো তার বিস্তার। অনেক দূরে যেখানে আকাশের সঙ্গে সমুদ্র মিশেছে, সেখানে ভাসছে একটা নীলাভ কুয়াশা আর তারই বুকে প্রতিফলিত হয়েছে গলিত

সূর্যের রক্তিম দীপ্তি। প্রভাতী কুয়াশার মধ্যে দিয়ে অস্পষ্টভাবে দেখা যাচ্ছে একসারি পাহাড়ের ভারী রেখাকৃতি। পাভেল গভীর নিশ্বাসের সঙ্গে ফুসফুস ভরে টেনে নিল এই শরীর চাঙা করে তোলা নির্মল সমুদ্রবায়ু, দু-চোখ ভরে দেখল সুনীল সাগরবিস্তারের নিঃসীম প্রশান্তি।

অলস গতিতে একটা ঢেউ বেলাভূমির সোনালি বালিয়াড়ির বুকের উপর দিয়ে গড়িয়ে এল তার পায়ের কাছে।

## সপ্তম অধ্যায়

কেন্দ্রীয় কমিটির স্বাস্থ্যনিবাসের ঠিক পাশেই প্রধান পলিক্লিনিকের বাগান, সমুদ্রতীর থেকে স্বাস্থ্যনিবাসে ফিরে আসতে সময় কম লাগে বলে রোগীরা এই বাগানের মধ্যে দিয়ে যায়। এই বাগানের উঁচু চুনোপাথরের দেয়ালের পাশে একটা দীর্ঘ-শাখা-বিস্তারী প্রুইন গাছের ছায়ায় বিশ্রাম করতে ভারি ভালো লাগে পাভেলের। শান্তি-ঘেরা এই নির্জন জায়গাটি থেকে সে তাকিয়ে তাকিয়ে দেখে বাগানের পথে মানুষগুলোর প্রাণবন্ত চলাফেরা, বিকেলের দিকে বসে-বসে শোনে ব্যাণ্ডের বাজনা—বিরাট এই স্বাস্থ্যনিবাসের আমুদে নরনারীর ভিড়ের বিরক্তিকর ঠেলাঠেলি থেকে এখানে সে বিশ্রাম পায়।

আজকেও সে তার এই প্রিয় জায়গাটিতে এসে বসেছে। রোদ্দুরের আর এইমাত্র স্নান করে আসার ফলে একটু ঘুমের আমেজ জমেছে, দোলনা-কেদারাটায় গভীর আরামে শরীরটাকে ছড়িয়ে দিয়ে তন্দ্রায় আচ্ছন্ন হয়ে গেল পাভেল। স্নানের তোয়ালেটা আর ফুরমানভের 'অভ্যুত্থান' নামে যে-বইটা সে পড়ছিল, সেটা পড়ে রইল পাশের কেদারায়া। স্বাস্থ্যনিবাসে এই প্রথম কয়েকদিনে তার স্নায়বিক পীড়াটা মোটেই কমেনি, মাথাধরাটাও লেগে আছে। তার রোগটা এ-পর্যন্ত স্বাস্থ্যনিবাসের ডাক্তারদের বড় ধোঁকায় ফেলে দিয়েছে। তারা পাভেলের রোগের মূল উৎস সন্ধানের চেষ্টায় আছে। অনবরত এই ডাক্তারি পরীক্ষায় ভারি বিরক্ত বোধ করছে সে—ডাক্তারদের ঠেলায় ক্লান্ত হয়ে উঠেছে। পাভেল যে-ওয়ার্ডে আছে, সেখানকার মেয়ে-ডাক্তার বেশ দিব্যি মেয়েটি, নামটা তার বড় মজার—ইয়েক্সসালিম্‌চিক। পাভেল যথাসাধ্য চেষ্টা করে তাকে এড়িয়ে যাবার জন্য। এই অনিচ্ছুক রোগীটিকে কোনো বিশেষজ্ঞ চিকিৎসকের কাছে বা কোনো-একটা শারীরিক পরীক্ষার জন্য কোথাও নিয়ে যেতে রাজি করানোর ব্যাপারে মেয়েটিকে বড় মুশকিলে পড়তে হয়।

পাভেল তাকে বোঝাবার চেষ্টা করে, 'এই গোটা ব্যাপারটাই ভারি ক্লান্তিকর ঠেকছে আমার। দিনে পাঁচবার করে সেই একই বৃত্তান্ত বলে যাচ্ছি আর যতসব বাজে প্রশ্নের জবাব দিচ্ছি : আমার ঠাকুরমা পাগল ছিলেন কিনা, ঠাকুরদার বাপের গিঠেবাত ছিল কিনা। আরে গেল যা, তাঁর কি ব্যারাম ছিল না ছিল তা আমি জানব কোথেকে? জীবনে কোনোদিন দেখিইনি আমি তাঁকে! ওই ডাক্তারদের প্রত্যেকটি আমাকে দিয়ে স্বীকার করিয়ে নিতে চায় যে আমার গনোরিয়া বা তার চাইতেও

খারাপ কিছু একটা ব্যারাম হয়েছিল, এরজন্যে আমার ভয়ানক ইচ্ছে জাগে তাদের টেকো মাথার উপর ঘাই কষাবার। আমাকে একটু বিশ্রাম নেবার সুযোগ দিন, ব্যস, শুধু ওইটুকুই আমি চাই। এখানে আমার থাকবার এই ছ-সপ্তাহ ধরে যদি শুধু নিজের রোগনির্ণয়ের পরীক্ষা চালাতে দিতে থাকি, তাহলে শেষপর্যন্ত আমি সমাজের পক্ষে একটি বিপজ্জনক ব্যক্তি হয়ে উঠব।’

ইয়েক্সসালিমচিক কথাটা শুনে ওর সঙ্গে হাসাহাসি করে, কৌতুক করে, কিন্তু কয়েক মিনিট বাদেই ধীরভাবে পাভেলের হাতখানা ধরে সারাপথটা অনর্গল কথা বলতে বলতে নিয়ে আসে ওকে সার্জনের কাছে।

কিন্তু আজ আর কোনো পরীক্ষার ব্যাপার নেই, এবং খাবার দেরি আছে ঘণ্টাখানেক। একটু বাদেই সে তন্দ্রার মধ্যে গুনতে পেল পায়ের শব্দ এগিয়ে আসছে। পাভেল চোখ খুলল না। ভাবল, ‘ঘুমিয়ে পড়েছি মনে করে চলে যাবে।’ বৃথা আশা। পাশে কে একজন এসে বসতে কদারাটার ক্যাচকোঁচ আওয়াজ তার কানে এল। মৃদু একটা সুগন্ধের রেশ নাকে ঢুকতেই বুঝল, আগন্তুকটি মেয়ে। চোখ খুলল সে—প্রথমেই চোখে পড়ল একটা ঝলমলে শাদা পোশাক আর নরম চামড়ার চটি-পরা একজোড়া তামাটে রঙের পা, তারপরে দেখল ছেলেদের মতো করে ছাঁটা চুল, একজোড়া মস্ত বড় বড় চোখ আর ইঁদুরের মতো তীক্ষ্ণ একপাটি শাদা দাঁত। লাজুক হাসি হাসল মেয়েটি তাকে দেখে, ‘ব্যাঘাত সৃষ্টি করিনি, আশা করি?’

কোনো জবাব দিল না পাভেল—এটা তার দিক থেকে একটু অভদ্রতা হলেও সে তখনও আশা করছে যে চলে যাবে মেয়েটি।

‘এটা আপনার বই?’ ফুরমানভের বইখানার পাতা ওল্টাতে ওল্টাতে জিজ্ঞেস করল মেয়েটি।

‘হঁ।’

এক মুহূর্তের নিস্তব্ধতা।

‘আপনি তো ‘কমিউনার’ স্বাস্থ্যনিবাসে আছেন, না?’

অধৈর্যের সঙ্গে শরীরটাকে নাড়াল পাভেল। ‘একটু শাস্তিতে থাকতে দেবে না তাকে মেয়েটা। বিশ্রামটুকুর দফা রফা। ও এবার অসুখ সম্বন্ধে জিজ্ঞেস করা শুরু করবে। চলেই যেতে হবে দেখা যাচ্ছে।’

‘না’, কাটা জবাব দিল সে।

‘কিন্তু আপনাকে ওখানেই দেখেছি নিশ্চয়।’

পাভেল উঠে পড়তে যাবে এমন সময়ে পেছনে গুনল একটা মেয়ের গভীর আর মিষ্টি গলার স্বর, ‘কিরে দোরা, এখানে কী করছিস?’

স্নানের পোশাক-পরা মোটাসোটা, রোদে-পোড়া, সোনালি চুলঅলা একটি মেয়ে এসে বসল চেয়ারটার প্রান্তে। দ্রুত একনজর তাকাল সে পাভেলের দিকে।

‘কোথায় যেন আপনাকে দেখেছি, কমরেড। আপনি খারকভ থেকে এসেছেন না?’

‘হ্যাঁ।’

কথাবার্তাটা বন্ধ করে দিতে মনস্থ করল পাভেল।

‘কোথায় কাজ করেন আপনি?’

‘শহরের জঞ্জাল সাফ করার বিভাগে’, জবাব দিল সে। এই ঠাট্টায় এমন জোরে হেসে উঠল মেয়েদুটি যে পাভেল চমকে উঠল।

‘আপনাকে কিন্তু খুব-একটা ভদ্র বলা যাচ্ছে না, কমরেড।’

এইভাবে ওদের মধ্যে বন্ধুত্বের সূত্রপাত। জানা গেল—দোরা রদকিনা খারকভে পার্টির শহর কমিটির ব্যুরো সভ্য। পরে যখন তাদের মধ্যে ঘনিষ্ঠ পরিচয় হয়েছিল, তখন তাদের বন্ধুত্বের সূত্রপাতের সময়কার এই মজার ঘটনাটা নিয়ে দোরা প্রায়ই পাভেলকে কৌতুকচ্ছলে খোঁচা দিত।

\*

\*

\*

একদিন বিকেলে ‘তালাসা’ স্বাস্থ্যনিবাসের বাগানে খোলা জায়গায় একটা গান-বাজনার আসরে পুরনো বন্ধু ঝার্কির সঙ্গে পাভেলের হঠাৎ দেখা হয়ে গেল।

অদ্ভুত ব্যাপার—তাদের দেখা হয়ে যাবার কারণটা হল একটা ‘ফব্রুয়ারি’ নাচ।

স্কলকায়া একজন চড়া-গলাঅলা গায়িকা গভীর আবেগের সঙ্গে ‘উদয় কামনার রাত্রি’ গানটি শোতাদের গেয়ে শোনানোর পর, একজোড়া মেয়ে-পুরুষ লাফিয়ে এগিয়ে এল মঞ্চের উপর। পুরুষটি অর্ধনগ্ন—মাথায় একটা লাল উঁচু টুপি আর ঝলমলে রঙিন কতকগুলো স্প্যাঙ্কল তার উরুতে, ঝকঝকে শাদা একটা শার্টের সামনের অংশটুকু তার বুকের উপর ঝুলছে, গলায় একটা ‘বো-টাই’ বাঁধা—বন্য মানুষের একটা বাজ্ঞে অনুকরণ করেছে সে। তার সঙ্গিনীটির পুতুলের মতো মুখ, প্রচুর কাপড় পরা। স্বাস্থ্যনিবাসের রুগীরা আরামকেদারা আর খাটিয়াগুলোয় বসে আছে, এগুলোর পেছনে দাঁড়িয়ে আছে ঝাড়ের মতো গর্দানঅলা মুনাফাখোর দোকানদাররা—এদের খুশির ওজ্জ্বলধ্বনির মধ্যে মঞ্চের উপরে ওই স্ত্রী-পুরুষ দু’জনে ঘুরপাক খেয়ে-খেয়ে একটা ‘ফব্রুয়ারি’ নাচের জটিল নকশা একে চলল পায়ে পায়ে। এর চেয়ে ন্যাকারজনক দৃশ্য কল্পনা করা শক্ত। নাদুসনুদুস পুরুষটি উজ্জ্বলবুকের মতো উঁচু টুপিটা মাথায় চাপিয়ে তার সঙ্গিনীটিকে জোরে চেপে ধরে মঞ্চের উপরে ইজিতপূর্ণ নানারকম দেহভঙ্গি করেছে। পাভেল তার পেছনে গুনতে পেল ভুঁড়িঅলা একটা মোটাসোটা দেহের সশব্দ নিশ্বাস। চলে যাবে বলে ঘুরে দাঁড়াল সে, এমন সময়ে সামনের সারি থেকে কে-একজন দাঁড়িয়ে উঠে চিৎকার করে বলল, ‘ঢের হয়েছে এইসব বেশ্যাবাড়ির নাচগান! চুলোয় যাক!’

এ ঝার্কি।

পিয়ানো-বাজনদার বাজনা বন্ধ করে দিল, বেহালাটা থেমে গেল একটা ক্যাচকঁচে আওয়াজ তুলে। মঞ্চের উপরে স্ত্রী-পুরুষ দুটি শরীর-মোচড়ানো বন্ধ করে দিল। পেছনের জনতা হিংস্রভাবে হিসহিসিয়ে উঠল :

‘এ কী বেআদবি—অনুষ্ঠানের মধ্যে বাধা দিচ্ছে!’

‘গোটা ইউরোপ আজ ‘ফব্রুয়ারি’ নাচছে!’

‘এ কী অভ্যচার!’

কিন্তু রুগীদের মধ্যে একজন, চেরেপোভেৎস কমসমোল সংগঠনের সম্পাদক সেরিওঝা ঝ্বানভ মুখের মধ্যে চারটে আঙুল পুরে কান-ফাটানো একটি সিটি



মারল। তার এই উদাহরণ অনুসরণ করল আর-সবাই এবং মুহূর্তের মধ্যে নাচিয়ে স্ত্রী-পুরুষ দু'জনে অদৃশ্য হয়ে গেল মঞ্চ থেকে—যেন দমক একটা হাওয়ায় উড়ে গেল তারা। আগেকার দিনের চাপরাসিদের মতো দেখতে যে বাচাল লোকটি আজকের এই প্রমোদ-অনুষ্ঠান পরিচালনা করছিল, সে এসে ঘোষণা করল যে নাচ-গানের দলটি চলে যাচ্ছে।

স্বাস্থ্যনিবাসের স্থানের পোশাক-পরা একটি ছেলে সবার হাসির মধ্যে চৌঁচিয়ে বলল, 'বাঁচিয়েছ বাপু, যেখানকার মাল সেখানেই গেছে।'

সামনের সারিগুলোর দিকে এগিয়ে এসে ঝার্কিকে খুঁজে বের করল পাভেল।

পাভেলের ঘরে বসে দুই বন্ধুতে অনেকক্ষণ কথাবার্তা বলল। ঝার্কি জানাল, পার্টির একটা আঞ্চলিক কমিটির প্রচার-আন্দোলন বিভাগে সে কাজ করছে।

'আমি বিয়ে করেছি, জানো না বোধহয়?' বলল ঝার্কি, 'শিগগিরই একটি ছেলে বা মেয়ে আশা করছি।'

বিস্মিত হল পাভেল, 'তাই নাকি, বিয়ে করেছ? তোমার স্ত্রীটি কে?'

পকেট থেকে একটা ফটোগ্রাফ বের করে ঝার্কি পাভেলকে দেখাল, 'চিনতে পারছ?' ঝার্কি আর আন্না বোরহার্ট-এর একসঙ্গে তোলা একটা ফটোগ্রাফ।

আরও বিস্মিত হয়ে জিজ্ঞেস করল পাভেল, 'তাহলে দুবাজার খবর কী?'

'ও মস্কোতে আছে। পার্টি থেকে ওকে বের করে দেবার পর ও বিশ্ববিদ্যালয় ছেড়ে দেয়। বাউমান উচ্চ কারিগরি বিদ্যালয়ে এখন পড়ছে ও। শুনেছি ওকে নাকি ফের পার্টিতে নেওয়া হয়েছে। খবরটা সত্যি হলে খুব খারাপ বলতে হবে। পুরোপুরি একদম বাজে ছেলে হয়ে গেছে ও...পানক্রাতভ কী করেছে জানো? একটা জাহাজ-তৈরির কারখানার সহকারী পরিচালক। অন্যদের খবর আমি বিশেষ কিছু জানি না। ইদানীং আর বড়-একটা যোগাযোগ নেই আমাদের। আমরা সবাই দেশের নানান জায়গায় কাজ করেছি। কিন্তু মাঝে মাঝে এইরকম একজায়গায় জড়ো হয়ে মিললেই পুরনো দিনের গল্পসল্প করতে ভারি ভালো লাগে।'

দোরা ঘরে ঢুকল আরও জনকতককে সঙ্গে নিয়ে। ঝার্কির কোর্টার উপরে আটকানো মেডেলের দিকে একনজর তাকিয়ে নিয়ে পাভেলকে জিজ্ঞেস করল সে, 'তোমার এই কমরেডটি কি পার্টিসভ্য? কোথায় কাজ করেন ইনি?'

খতমত খেয়ে পাভেল সংক্ষেপে ঝার্কি সম্বন্ধে বলল তাকে।

'বেশ', বলল দোরা, 'তাহলে ইনি থাকতে পারেন। এই কমরেডরা সদ্য মস্কো থেকে এসেছে। পার্টির সাম্প্রতিক খবরগুলো এদের কাছ থেকে শোনা যাবে। তোমার ঘরে এসে আমরা নিজেদের মধ্যে একটা পার্টি-বৈঠক-গোছের বসাব বলে ঠিক করলাম,' ব্যাখ্যা করে বলল সে।

পাভেল আর ঝার্কি ছাড়া এই আগন্তুকরা সবাই পুরনো বলশেভিক। ত্রুৎকি, জিনোভিয়েভ আর কামেনেভের নেতৃত্বে নতুন বিরোধীপক্ষের কথা তাদের বলল মস্কো পার্টির 'নিয়ন্ত্রণ কমিশন'এর সভ্য বার্তাশেভ।

'এই সংকটের মুহূর্তে আমাদের প্রত্যেকেরই নিজের কাজের জায়গায় থাকা উচিত। আমি কালই চলে যাচ্ছি এখান থেকে', উপসংহারে জানাল বার্তাশেভ।

পাভেলের ঘরে এই আলোচনা-বৈঠকের পরে তিনদিনের মধ্যেই একদম ফাঁকা হয়ে গেল স্বাস্থ্যনিবাসটা। পাভেলও অল্প কয়েকদিন বাদেই চলে এল—তার বিশ্রামের মেয়াদ ফুরোবার আগেই।

কমসমালের কেন্দ্রীয় কমিটি কাজের অপেক্ষায় বসিয়ে রাখল না তাকে—একটা শিল্প-এলাকায় কমসমোল সম্পাদক হিসেবে কাজ দেওয়া হল পাভেলকে এবং দেখা গেল—এক সপ্তাহের মধ্যেই সে স্থানীয় শহর-সংগঠনের একটা সভায় বক্তৃতা করতে লেগে গেছে।

সেই বছরের শরৎকালের শেষদিকে পাভেল একদিন আর-দু'জন পার্টিকর্মীর সঙ্গে চলেছে দূরের কোনো-একটি জেলায়, তখন মাঝপথে একজায়গায় তাদের গাড়িটা হড়কে গিয়ে একটা খানার মধ্যে গড়িয়ে পড়ে উল্টে গেল।

আরোহীদের সবাই আহত হল। পাভেলের ডান হাঁটুটা পিষে গেল। দিনকয়েক বাদে তাকে নিয়ে আসা হল খারকভের অস্ত্রচিকিৎসা প্রতিষ্ঠানে। জখম পা-টার এল-রে ফোটো নিয়ে পরীক্ষা করে দেখার পর চিকিৎসা-কমিশন অবিলম্বে অস্ত্রোপচার করার পরামর্শ দিল।

পাভেল মত দিল।

চিকিৎসা-কমিশনের সভাপতি গাঁটাগোঁটা অধ্যাপকটি বললেন, 'তাহলে, কাল সকালেই।' তিনি উঠে দাঁড়ালেন, আর সবাই তাঁর পেছনে সার বেঁধে বেরিয়ে গেল।

আলোয় উজ্জ্বল ছোট একটা ওয়ার্ড, সেখানে একটামাত্র খাট। নিখুঁত পরিচ্ছন্নতা আর পাভেলের অনেকদিন হল ভুলে-যাওয়া সেই হাসপাতালের অদ্ভুত ধরনের গন্ধ। চারিদিকে তাকিয়ে দেখল সে। খাটটার পাশে তুষার-ভদ্র কাপড়ে ঢাকা একটা ছোট টেবিল আর শাদা রঙ-করা একটা টুল। ঘরটার আসবাব বলতে এই।

নার্স এল তার রাতের খাবার নিয়ে।

পাভেল ফেরত পাঠিয়ে দিল খাবারটা। বিছানাটার উপরে আধ-শোওয়া অবস্থায় চিঠি লিখছিল সে। লিখতে লিখতে হাঁটুর যন্ত্রণাটাও চাগিয়ে উঠে তার চিন্তায় বাধা দিচ্ছিল, খিদেটাও নষ্ট হয়ে গেল যন্ত্রণার চোটে।

চতুর্থ চিঠিখানা লেখা হয়ে যাবার পর আঙুলে করে দরজাটা খুলে গেল, হাঁটু পর্যন্ত ঝোলানো শাদা একটা কোর্তা গায়ে আর শাদা ক্যাপ মাথায় একটি তরুণী তার বিছানার কাছে এগিয়ে এল।

আবছা আলোয় পাভেল দেখতে পেল একজোড়া বাঁকা ভুরু আর ডাগর দুটি চোখ—চোখদুটির রঙ কালো বলেই মনে হল। তার এক হাতে একটা ফোলিও ব্যাগ, অন্য হাতে একখানা কাগজ আর পেন্সিল।

'আমি আপনার ওয়ার্ডের ডাক্তার', বলল মেয়েটি, 'আমি এবারে একগাদা প্রশ্ন করে যাব আর, ভালো লাগুক বা না লাগুক, আপনাকে নিজের সম্বন্ধে সবকিছু বলে যেতে হবে।'

মিষ্টি হাসল সে, এই হাসিটুকুতেই 'জেরা' আর তেমন অপ্রীতিকর রইল না।

প্রায় একঘণ্টা ধরে পাভেল তার কাছে বলে গেল—শুধু নিজের কথাই নয়, কয়েক পুরুষ ধরে তার সমস্ত আত্মীয়স্বজনের কথাও।

\*

\*

\*

অস্ত্রোপচারের ঘর। নাকের উপর, মুখের উপর গেজ-কাপড়ের ঠুলি-আঁটা লোকজন।

চকচকে নিকেলের যন্ত্রপাতি; লম্বা, সরু একটা টেবিল আর তার নিচে বিরাট একটা গামলা। অস্ত্রোপচারের টেবিলটার উপরে পাভেল যখন শুয়ে পড়ল, অধ্যাপকটি তখনও হাত ধুচ্ছিলেন। তার পেছনে অস্ত্রোপচারের দ্রুত প্রস্তুতি চলেছে। মাথাটা ঘুরিয়ে তাকাল পাভেল—নার্সিটি চিমটে আর ছুরিগুলো সাজিয়ে রাখছে।

‘ওদিকে তাকাবেন না, কমরেড করচাগিন’, পাভেলের পায়ের ব্যাভেজ খুলতে খুলতে বলে উঠল তার ওয়ার্ডের ডাক্তার বাঝানোভা, ‘ওতে মনের জোর কমে যেতে পারে।’

সকৌতুক হাসি হেসে জিজ্ঞেস করল পাভেল, ‘কার মনের জোর, ডাক্তার?’

কয়েক মিনিট বাদে ভারী কাপড়ের একটা ঠুলি পরিয়ে ঢেকে দেওয়া হল তার মুখ এবং অধ্যাপককে বলতে শুনল সে, ‘আমরা এবার আপনাকে অজ্ঞান করে ফেলার ওষুধ দেব। নাক দিয়ে গভীর নিশ্বাস নিন আর এক-দুই-তিন গুনতে থাকুন।’

মুখে ঠুলি-চাপা শান্ত্বনুরে উত্তর দিল পাভেল, ‘বেশ। যদি কোনো অকথ্য মন্তব্য করে বসি, তার জন্যে অগ্রিম মাপ চেয়ে রাখছি।’

হাসি চাপতে পারলেন না অধ্যাপকটি।

ইথারের প্রথম দু-চার ফোঁটা পড়ার সঙ্গে সঙ্গে দম-আটকানো একটা জঘন্য গন্ধ।

গভীর একটা নিশ্বাস টেনে নিল পাভেল, স্পষ্ট উচ্চারণ করার চেষ্টা করতে করতে গুনতে শুরু করল। এতে তার ট্রাজেডি-ভরা জীবননাট্যের প্রথম অঙ্কের যবনিকা উন্মোচিত হল।

\*

\*

\*

খামখানা প্রায় অর্ধেক ছিড়ে আরতিওম চিঠিখানা খুলল, ভেতরে ভেতরে দারুণ একটা অস্থিরতা জেগেছে তার মনে। তার চোখের দৃষ্টি যেন বিধে দিল চিঠিখানার প্রথম কয়েক ছত্র। তারপরে পাতাটার বাকি অংশটুকুর উপর দিয়ে তাড়াতাড়ি চোখ বুলিয়ে গেল সে।

‘আরতিওম! আমাদের মধ্যে চিঠিপত্র লেখালেখি এত কম—বছরে বড়জোর একটা কি দুটো। কিন্তু কতগুলো চিঠি লিখলাম না লিখলাম তাতে কি কিছু যায় আসে? তুমি লিখেছ—তোমার পরিবারকে তুমি শেপেতোভ্কা থেকে কাজাতিনের রেল-কারখানায় সরিয়ে নিয়ে এসেছ, কারণ, তুমি শেকড়সুঙ্ক নিজেকে উপড়ে আনতে চাও। আমি জানি, এই শেকড়টা হচ্ছে স্তেশা আর তার আত্মীয়দের পেছনমুখো খুদে-মালিকানা মনোভাবের মধ্যেই। স্তেশার মতো লোকদের নতুন করে গড়ে-তোলাটা সহজসাধ্য নয়, এবং তুমিও হয়তো শেষপর্যন্ত ব্যর্থ হবে। তুমি লিখেছ—তোমার ‘এই বুড়ো বয়সে’ পড়াশোনা করাটা কঠিন হয়ে দাঁড়িয়েছে, কিন্তু তবু, আমার তো মনে হচ্ছে তুমি মন্দ এগুচ্ছ না। তুমি-যে কারখানার কাজটা ছেড়ে দেবে না বলে জিদ ধরেছ আর শহর-সোভিয়েতের সভাপতি হিশেবে কাজ করতে চাচ্ছ না, সেটা ভুল হচ্ছে। সোভিয়েত সরকার কায়েম করার জন্যে তুমি লড়াই করোনি কি? তাহলে লেগে যাও! কালকেই শহর-সোভিয়েতের সভাপতি হয়ে কাজে লেগে যাও!

‘এবার আমার কথা বলি! কিছু-একটা গোলযোগ ঘটেছে আমার। আমি আজকাল খুব ঘন ঘন হাসপাতালের বাসিন্দা হয়ে পড়ছি। ওরা দু’বার আমাকে কাটাছেঁড়া করেছে, বেশকিছুটা রক্ত আর শক্তি খুইয়েছি, কিন্তু এখনও পর্যন্ত কেউ বলতে পারছে এর শেষ হবে কবে।

‘আমি আর কর্মকম নই এবং ইদানীং একটা নতুন পেশা নিয়েছি আমি—‘রোগীর’ পেশা। ভয়ানক যন্ত্রণা সহ্য করতে হচ্ছে আমায় এবং এর মোট ফলটা দাঁড়িয়েছে—ডান পায়ে নড়ন-চড়ন বন্ধ, শরীরের নানা জায়গায় কতকগুলো ক্ষতচিহ্ন আর এবারকার এই অধুনাতন ডাক্তারি আবিষ্কার : সাত বছর আগে আমার শিরদাঁড়া জখম হয়েছিল, আর এই জখমটার জন্যে আমায় কঠিন মূল্য দিতে হতে পারে। কিন্তু আমি কর্মীদের মধ্যে যাতে ফিরে যেতে পারি, তার জন্যে যে-কোনো কষ্ট সহ্য করতে প্রস্তুত আছি।

‘কর্মীদের বাইরে পড়ে থাকার চেয়ে ভয়ঙ্কর কিছু আমার জীবনে আমি কল্পনাও করতে পারি না। এ-ধরনের কোনো সম্ভাবনার কথা চিন্তাও করতে চাই না আমি। এবং সেইজন্যেই এই ডাক্তাররা আমাকে নিয়ে যা করতে চায় তাই করতে দিই। কিন্তু কোনো উন্নতি হচ্ছে না—ক্রমশই আরও অন্ধকার, আরও ঘন হয়ে জমে উঠছে মেঘ। প্রথমবার অস্ত্রোপচারের পর আমি হাঁটবার শক্তি ফিরে পাবার সঙ্গে সঙ্গেই কাজে ফিরে এসেছিলাম। কিন্তু শিগগিরই আবার ওরা ফিরিয়ে আনল আমায়। এবার আমাকে পাঠিয়ে দেওয়া হচ্ছে ইয়েন্ডপাতোরিয়া-র এক স্বাস্থ্যনিবাসে। কাল রওনা হব। কিন্তু দমে যেও না, আরতিওম, তুমি তো জানো আমি বড় সহজে হাল ছাড়ি না। তিনজন মানুষের জীবনীশক্তি আমার মধ্যে আছে। দাদা, তুমি আর আমি এখনও আরও কিছু কাজের কাজ করব। তোমার শরীরের যতন নিয়ো, মাত্রাতিরিক্ত পরিশ্রম করে শক্তি খুইয়ো না যেন, কারণ আমাদের শরীর সারাবার জন্যে বিশ্রাম নিতে গিয়ে পার্টিকে বড্ড ক্ষতি সহিতে হয়। কাজের মধ্যে দিয়ে আমরা যে-অভিস্কৃতা সঞ্চয় করি আর পড়াশোনার মধ্যে দিয়ে আমরা যে-জ্ঞান অর্জন করি, সেটা খুবই মূল্যবান—হাসপাতালে শুয়ে থেকে তার অপচয় হতে দেওয়া চলে না। তোমার কর্মমর্দন করছি।

পাভেল।’

আরতিওম যখন তার ঘন ভুরুজোড়া কুঁচকে ভাইয়ের চিঠিখানা পড়ছে সেই সময়ে ওদিকে পাভেল হাসপাতালে ডাক্তার বাঝানোভার কাছে বিদায় নিচ্ছে।

‘তাহলে কাল আপনি ক্রিমিয়ায় রওনা হচ্ছেন?’ পাভেলের দিকে হাতখানা বাড়িয়ে দিয়ে বলল বাঝানোভা, ‘আজকের বাকি সময়টুকু কাটাবেন কীভাবে?’

‘কমরেড রদকিনা এখুনি এসে যাবে’, জবাব দিল পাভেল, ‘ও আমাকে নিয়ে যাবে ওর বাড়ির সবার সঙ্গে আলাপ করিয়ে দেবার জন্যে। ওর ওখানেই আমি রাস্তিরে থাকব, সকালে ও আমাকে স্টেশনে পৌঁছে দেবে।’

বাঝানোভা দোরাকে চেনে, কারণ সে প্রায়ই হাসপাতালে এসে দেখে যেত পাভেলকে।

‘কিন্তু কমরেড করচাগিন, আমার বাবাকে দিয়ে আপনাকে একবার পরীক্ষা করিয়ে নেব বলেছিলাম—আপনিও রাজি হয়েছিলেন, সেটা কি ভুলে গেছেন? আমি তাঁর কাছে আপনার অসুখের বিস্তৃত বিবরণ দিয়েছি। তাঁকে দিয়ে আপনাকে একবার পরীক্ষা

করিয়ে নিতে চাই আমি। আজ বিকেলে আপনি সময় করে নিতে পারবেন বোধহয়?’  
তৎক্ষণাৎ রাজি হল পাভেল।

সেদিন বিকেলে বাঝানোভা পাভেলকে নিয়ে এল তার বাবার মস্তবড়  
কাজের কামরায়।

বিখ্যাত অঙ্কচিকিৎসক তিনি। তিনি পাভেলকে সযতনে পরীক্ষা করে দেখলেন।  
তার মেয়ে হাসপাতাল থেকে পাভেলের সমস্ত এক্স-রে ছবিগুলো আর তার রোগের  
সম্বন্ধে রিপোর্টগুলো নিয়ে এসেছিল। বাঝানোভার বাবা যখন লাতিন ভাষায়  
অনেকক্ষণ ধরে কী-সব মস্তব্য করলেন তখন বাঝানোভার মুখখানা-যে হঠাৎ বিবর্ণ  
হয়ে গেল, সেটা পাভেল লক্ষ না-করে পারেনি। অধ্যাপকের বিরাট টেকো মাথাটার  
দিকে চেয়ে চেয়ে পাভেল তার তীক্ষ্ণচোখের দৃষ্টির অর্থটা অনুসন্ধান করল। কিন্তু  
ডাক্তার বাঝানোভার মুখের ভাব দূর্বোধ্য।

পাভেলের পোশাক পরা হয়ে যাবার পরে পাভেলকে প্রীতি জানিয়ে অধ্যাপক  
বিদায় নিলেন; বললেন, ‘তাকে এক্ষুনি একটা-আলোচনা সভায় যেতে হবে। পরীক্ষার  
ফলাফলটা পাভেলকে জানানোর ভার দিয়ে গেলেন তার মেয়ের ওপরে।

বাঝানোভার রুচিসম্মতভাবে সাজানো ঘরখানায় একটা কৌচের উপর শুয়ে  
পাভেল ডাক্তারের মতামত জানার অপেক্ষায় রয়েছে। কিন্তু কীভাবে-যে শুরু করবে  
কথাটা, ঠিক বুঝে উঠতে পারছে না বাঝানোভা। তার বাবা তাকে যা বলে গেলেন,  
সেটা কিছুতেই পাভেলকে বলে উঠতে পারছে না সে—তিনি বলেছেন : পাভেলের  
শরীরের মধ্যে যে-সাংঘাতিক প্রদাহের প্রক্রিয়াটা শুরু হয়েছে, এ-পর্যন্ত কোনো ওষুধ  
সেটাকে প্রতিরোধ করতে পারেনি। অস্ত্রোপচারের বিরুদ্ধে মত দিয়েছেন অধ্যাপক :  
‘এই ছেলেটি গুরু হাত-পা নাড়াচাড়া করার ক্ষমতা হারিয়ে বসবে—এটাই অবধারিত।  
এই মর্মান্তিক পরিণতি ঠেকাবার ক্ষমতা আমাদের নেই।’

ডাক্তার হিশেবে এবং বন্ধু হিসেবে ওকে এ-কথাটা বলা ঠিক হবে না বলেই মনে  
হচ্ছে বাঝানোভার। তাই, সাবধানে কথা বাছাই করে সে পাভেলকে আসল  
ব্যাপারটার খানিকটা মাত্র বলল।

‘ইয়েভপাতোরিয়ার কাদা-জলে আপনি নিশ্চয়ই সেরে উঠবেন বলে আমার মনে  
হচ্ছে, কমরেড করচাগিন। শরৎকালের মধ্যেই আপনি কাজে যোগ দিতে পারবেন।’

কিন্তু বাঝানোভা ভুলে গেছে যে, পাভেলের সুতীক্ষ্ণ চোখদুটো তাকে সমস্তক্ষণ লক্ষ  
করে চলেছে।

‘আপনি যেটুকু বললেন—কিংবা বরং বলতে পারি, যেটুকু আপনি চেপে গেলেন,  
তার থেকে বুঝতে পারছি যে অবস্থাটা খুব গুরুতর। আমাকে সব কথাই খোলাখুলি  
বলবার জন্য আমি-যে বরাবর আপনাকে অনুরোধ জানিয়ে এসেছি, সেটা মনে আছে  
তো? আমার কাছে কোনোকিছু চেপে যাবার দরকার নেই, আমি অজ্ঞান হয়েও পড়ব  
না, কিংবা নিজের গলা কেটে ফেলবার চেষ্টাও করব না। কিন্তু নিজের ভবিষ্যৎ আমি  
জানতে চাই।’

সরাসরি উত্তর এড়িয়ে গিয়ে বাঝানোভা একটা রসিকতা করল এবং সে-রাত্রে  
পাভেল নিজের ভবিষ্যৎ সম্বন্ধে কিছু জানতে পারল না।

বিদায় নেবার সময় কোমল গলায় বাঝানোভা বলল, 'আমি আপনার বন্ধু—এ-কথাটা যেন ভুলে যাবেন না, কমরেড করচাগিন। আপনার ভবিষ্যৎ-জীবনে কী হবে না-হবে কে বলতে পারে। যদি কখনও আমার সাহায্য বা পরামর্শের দরকার হয়, দয়া করে লিখে জানাবেন। আমার সাধ্যে যা আছে, নিশ্চয়ই করব।'

জানলা দিয়ে সে তাকিয়ে দেখল—চামড়ার কোট-পরা লম্বা মূর্তিটা লাঠির উপরে সজোরে ভর দিয়ে অতিকষ্টে দরজাটার কাছে অপেক্ষমাণ গাড়িটার দিকে এগুচ্ছে।

\*

\*

\*

আবার সেই ইয়েভপাতোরিয়া। দক্ষিণ অঞ্চলের উষ্ণ রোদ। সোনালি এল্ড্রয়ডারি-করা চাঁদি টুপি মাথায় রোদে-পোড়া লোকজন সব কথা বলে জোরে জোরে। দশ মিনিটের মধ্যে গাড়ি হাঁকিয়ে নতুন আগন্তুকদের নিয়ে আসা হল ধূসর রঙের চুনোপাথরের একটা দোতলা বাড়িতে। 'মাইনাক' স্বাস্থ্যনিবাস।

ডিউটিরত ডাক্তার আগন্তুকদের নানা ঘরে পৌছিয়ে দেয়।

'আপনার কীরকম পাস আছে, কমরেড?' পাভেলকে সে জিজ্ঞেস করল। তখন তারা এগারো-নম্বর ঘরের সামনে দাঁড়িয়ে।

পাভেল জানাল, 'ইউক্রেনের কমিউনিস্ট পার্টির কেন্দ্রীয় কমিটির দেওয়া পাস।'

'বেশ, তাহলে কমরেড এব্নেরের সঙ্গে এক ঘরে আপনার থাকার ব্যবস্থা করে দিচ্ছি। কমরেডটি জার্মান, একজন রুশী সঙ্গী চান।' বলে দরজাটার উপরে টোকা মারল ডাক্তারটি।

একটা গলার স্বর ভেসে এল ভেতর থেকে, 'ভেতরে আসুন' উচ্চারণটা নিতান্তই বিদেশী। পাভেল তার স্যুটকেসটা রেখে ঘুরে দাঁড়িয়ে দেখল বিছানায় শোয়া মানুষটিকে—সোনালি চুল, নীল চোখদুটির দৃষ্টি প্রাণময়। খুশিভরা হাসির সঙ্গে জার্মানটি তাকে অভ্যর্থনা জানাল।

লম্বা আঙুলঅলা একখানা ফ্যাকাসে হাত পাভেলের দিকে বাড়িয়ে দিয়ে সে বলল, 'ওটেন মর্গেন, গেনোসেন।' তারপর শুধরে নিয়ে জার্মান-ঘেঁষা উচ্চারণে ভাঙা রুশভাষায় বলল, 'সুপ্রভাত!'

কিছুক্ষণের মধ্যে দেখা গেল—পাভেল তার বিছানার ধারে বসে আছে, আর দু'জনে খুব প্রাণবন্ত কথাবার্তায় জমে গেছে—তাদের সংলাপের ভাষাটা হচ্ছে সেই 'আন্তর্জাতিক' ভাষা যাতে মুখের কথার ভূমিকাটা গৌণ; অলিখিত এসপেরেন্টো ভাষার ইঙ্গিত-ইশারা-মুখভঙ্গি আর আন্দাজ ইত্যাদি সমস্ত ফাঁক পূরণ করে তোলে।

পাভেল জানল এব্নের একজন জার্মান শ্রমিক, ১৯২৩-এর হামবুর্গ-অভ্যুত্থানের সময় উরুতে জখম হয়। পুরনো চোটটা আবার চেগে উঠে তাকে শয্যাশায়ী করে ফেলেছে। কিন্তু সমস্ত কষ্ট সে হাসিমুখে সহ্য করে—এবং এইজন্যই পাভেল তার প্রতি সঙ্গে সঙ্গে সশ্রদ্ধ হয়ে উঠল।

এক ঘরে থাকার পক্ষে এরচেয়ে ভালো সঙ্গী আর কামনা করতে পারত না পাভেল। এ লোকটি সকাল থেকে সঙ্গে অবধি তার ব্যাধির যন্ত্রণা নিয়ে বকবক করবে না, নিজের মন্দভাগ্য নিয়ে হা-হতাশ করবে না।

বরং ওর সঙ্গ পেয়ে লোকে নিজের জ্বালাযন্ত্রণার কথাই ভুলে থাকতে পারে।

একটু স্কোভের সঙ্গেই পাভেল ভাবল মনে-মনে, ‘আহা, জার্মান ভাষাটা একটুও জানিনে।’

\*

\*

\*

স্বাস্থ্যনিবাসের বাগানের এককোণে গোটাকতক দোলনা-চেয়ার, একটা বাঁশের টেবিল আর দুটো চাকা-লাগানো ঠেলা-চেয়ার পাতা থাকে। প্রতিদিন ডাক্তারদের দেখা-শোনা-চিকিৎসা ইত্যাদি হয়ে যাবার পরে পাঁচজন রোগী এখানটায় এসে জড়ো হয় সময় কাটাবার জন্য। স্বাস্থ্যনিবাসের অন্যসব রোগীরা এই পাঁচজনের নাম দিয়েছে ‘কমিউনিষ্ট আন্তর্জাতিক কার্যনির্বাহক কমিটি’।

ঠেলা-চেয়ারগুলোর একটায় আধ-শোয়া অবস্থায় বসে থাকে এব্নের। আরেকটায় বসে থাকে পাভেল—তারও হাঁটাহাঁটি করা বারণ। এই দলের আর-তিনজনের মধ্যে আছে ভাইমান, গাট্টাগাট্টা শরীরের একজন এস্তোনিয়ান, ক্রিমিয়ার প্রজাতন্ত্রের বাণিজ্য-দপ্তরে কাজ করত সে; আরেকজন মার্তা লাউরিন, অল্পবয়সী পিঙ্গল-চোখ এই লাভভিয়ান মেয়েটিকে দেখে বছর আঠারো বয়েস বলে মনে হয়; আর তৃতীয়জন লেদেনেভ, লম্বা বলিষ্ঠ গড়নের একজন সাইবেরিয়ান, কানের পাশে চুলে পাক ধরেছে তার। সত্যিই পাঁচটি বিভিন্ন জাতির প্রতিনিধি রয়েছে এই ছোট্ট দলটায়—জার্মান, এস্তোনিয়ান, লাভভিয়ান, রাশিয়ান এবং ইউক্রেনিয়ান। মার্তা আর ভাইমান জার্মান বলতে পারে, তাই এব্নের দোভাষীর কাজ করিয়ে নেয় এদের দিয়ে। পাভেল আর এব্নেরের বন্ধুত্বের কারণটা হচ্ছে তারা একই ঘরে থাকে। মার্তা আর ভাইমান জার্মান ভাষা জানে বলে তার সঙ্গে ঘনিষ্ঠ হয়েছে। এবং পাভেল আর লেদেনেভের মধ্যে বন্ধুত্বের বাঁধনটা গড়ে উঠেছে দাবা-খেলার মারফত।

লেদেনেভ এখানে আসার আগে পর্যন্ত পাভেল ছিল এই স্বাস্থ্যনিবাসের ‘চ্যাম্পিয়ন’ দাবা-খেলোয়াড়। ভাইমানের সঙ্গে একটা তীব্র প্রতিযোগিতার পর সে তার কাছ থেকে এই সম্মানের পদবিটা ছিনিয়ে নিয়েছিল। টিলাঢালা শান্ত স্বভাবের এস্তোনিয়ানটি এই পরাজয়ের ফলে বেশ একটু দমে গেছিল এবং তাকে এভাবে অপদস্থ করার জন্য সে বহুদিন পর্যন্ত মনে-মনে পাভেলকে ক্ষমা করতে পারেনি। কিন্তু কয়েকদিনের মধ্যে স্বাস্থ্যনিবাসে একজন লম্বা লোক এসে পৌছাল, পঞ্চাশ বছর বয়সের পক্ষে তাকে দেখে রীতিমতো তরুণ বলে মনে হয়। করচাগিনের সঙ্গে সে একদান দাবা খেলতে চায় বলে জানাল। বিপদের কোনো আভাস না দেখে, পাভেল শান্তভাবে গোড়ার দিকেই মস্তী চলে আক্রমণ করে খেলা শুরু করল। লেদেনেভ সামনের বোড়েগুলো এগিয়ে দিয়ে পাল্টা চাল দিল। নতুন কোনো আগন্তুক এলেই তার সঙ্গে পাভেলকে ‘চ্যাম্পিয়ন’ খেলোয়াড় হিসেবে একহাত দাবা-খেলায় বসতে হত এবং খেলার সময় সর্বদা একদল উৎসুক দর্শকের ভিড় জমে উঠত দাবার ছকটাকে ঘিরে। ন’বারের বার চাল দিতে গিয়ে পাভেল বুঝতে পারল যে প্রতিপক্ষ তার বোড়েগুলো ধীরে ধীরে এগিয়ে এনে চারিদিক থেকে তাকে চেপে ধরছে। এতক্ষণে

পাভেল দেখতে পেল যে তার প্রতিপক্ষ বড় সাংঘাতিক খেলোয়াড়, প্রথমদিকে এতটা হালকা চালে খেলেছে বলে অনুতাপ হল তার।

তিন ঘণ্টা ধরে ধস্তাধস্তির মধ্যে দিয়ে পাভেল তার সবরকম কলাকৌশল আর বুদ্ধি খাটাবার পর হার স্বীকার করে নিতে বাধ্য হল। দর্শকদের মধ্যে আর কারুর ব্যাপারটা বুঝে-ওঠার অনেক আগেই সে নিজের পরাজয়টা প্রত্যক্ষ করতে পেরেছিল।

প্রতিপক্ষের দিকে একনজর তাকিয়ে সে দেখে—লেদেনেভ তার দিকে তাকিয়ে আছে—তার মুখে সদয় হাসি। বোঝা গেল, সেও জানে খেলার ফলটা কী দাঁড়াবে। ভাইমান গভীর মনোযোগের সঙ্গে খেলাটা অনুসরণ করে চলেছিল এবং পাভেলের হেরে যাওয়াটাই-যে তার কাম্য, সেটা গোপন করার একটুও চেষ্টা করছিল না। কিন্তু সেও বুঝে উঠতে পারেনি যে শেষপর্যন্ত কী দাঁড়াবে ফলটা।

পাভেল বলল, 'শেষ বোড়েটা হাতে-থাকা পর্যন্ত আমি হাল ছাড়ি না।' সমর্থনসূচক মাথা নাড়ল লেদেনেভ।

পাভেল লেদেনেভের সঙ্গে পাঁচদিনে দশ দান খেলল—সাতবার হেরে গেল, দুবার জিতল এবং একবার খেলায় কোনো নিষ্পত্তি হল না।

আনন্দে আত্মহারা হয়ে গেল ভাইমান।

'ধন্যবাদ, অসংখ্য ধন্যবাদ, কমরেড লেদেনেভ! দারুণ একখানা খেলাই দিয়েছেন ওকে! এরকম একটা মার খাবার দরকার ছিল ওর! আমাদের মতো পুরনো সব দাবা-খেলোয়াড়দের হারিয়ে দিয়ে বসে ছিল, শেষপর্যন্ত কিনা একজন বুড়োমানুষের কাছেই পাল্টা হার মানতে হল ওকে। হাঃ-হাঃ-হাঃ!'

ভূতপূর্ব বিজয়ী খেলোয়াড়টিকে সে খোঁচা মারল, 'হেরে গিয়ে কেমন লাগছে এবার, অ্যাঃ?'

পাভেলকে 'চ্যাম্পিয়ন' পদবিটা খোয়াতে হল বটে; কিন্তু লেদেনেভকে সে বন্ধু হিশেবে পেল, এবং এ-বন্ধুত্ব তার পরবর্তী জীবনে অত্যন্ত মূল্যবান হয়ে উঠেছিল। এতদিনে সে বুঝেছে যে দাবা-খেলায় লেদেনেভের কাছে তার হেরে-যাওয়াটা খুবই স্বাভাবিক। দাবার কলাকৌশল সম্বন্ধে তার জ্ঞানটা নিতান্তই ভাসা-ভাসা এবং এই খেলাটার সমস্ত গোপন রহস্যগুলো যার নখদর্পণে এইরকম একজন বিশেষজ্ঞের কাছেই তার হার অনিবার্য।

পাভেল আর লেদেনেভের মধ্যে একটা উল্লেখযোগ্য তারিখের মিল আছে দেখা গেল : লেদেনেভ যে-বছরে পার্টিতে যোগ দেয়, সেই বছরেই পাভেলের জন্ম। এরা দু'জনেই বলশেভিকদের মধ্যে তরুণ আর প্রবীণ কর্মীদের প্রতিনিধিত্বান্বিত চরিত্র। একজনের পেছনে রয়েছে নিরবসর রাজনৈতিক কাজে-ভরা সুদীর্ঘ জীবন, গোপন আন্দোলনের কাজে ব্যয়িত অনেকগুলি বছর, জারের জেলখানায় বন্দিজীবনের অভিজ্ঞতা; এসবের পর গুরুত্বপূর্ণ সরকারি কাজ। অন্যজনের রয়েছে দৃষ্ট যৌবন আর মাত্র আট-বছরের সংগ্রামের অভিজ্ঞতা—কিন্তু এমন আট-বছর যার দীপ্তি একাধিক জীবনকে ম্লান করে দিতে পারে। প্রবীণ আর নবীন এদের দু'জনেরই আছে অশান্ত হৃদয় অথচ ভগ্নস্বাস্থ্য।

বিকেলের দিকে এবনের আর করচাগিনের ঘরখানা ক্লাব-গোছের হয়ে ওঠে। আর সমস্ত রাজনীতিক খবরাখবরের উৎসও এটা। কথাবার্তা আর হাসির শব্দে গম্গম করে



ঘরখানা। ভাইমান সাধারণত কথাবার্তার মাঝখানে এক-আধটা স্থূল রসিকতার গল্প ফাঁদবার চেষ্টা করে, কিন্তু সেক্ষেত্রে মার্তা আর করচাগিন তাকে দু'পাশ থেকে অবশ্যম্ভাবীরূপে আক্রমণ করবেই। সুতীক্ষ্ণ কোনো-একটা বিদ্রূপাত্মক মন্তব্য করে মার্তা সাধারণত তাকে ধামিয়ে দিতে পারে, আর এতেও সে না-ধামলে করচাগিন এগিয়ে আসে।

'তোমার এই বিশেষ ধরনের 'রসিকতা'টুকু ঠিক আমাদের রুচিসম্মত কিনা প্রথমে তোমার জিজ্ঞেস করা উচিত, বুঝলে ভাইমান...তুমি-যে এ-ধরনের কথাবার্তা কী করে মুখে আনো সেটা আমি ঠিক বুঝি না', অশান্ত গলায় বলে পাভেল।

ভাইমান তার পুরু নিচের ঠোঁটটা বঁকিয়ে, ছোট ছোট চোখের চাউনিতে ব্যঙ্গের আভাস ফুটিয়ে অন্য সবার মুখের উপর নজর বুলিয়ে বলে, 'রাজনীতিক শিক্ষা বিস্তারের বিভাগে একটা নীতিশাস্ত্রের দপ্তর খুলে করচাগিনকে তার বড়কর্তা করে দেবার জন্যে সুপারিশ করতে হবে দেখছি। মার্তার আপত্তির কারণটা বুঝি—স্ট্রীলোক হিশেবে ও হল গিয়ে আমাদের পেশাদার বিরুদ্ধবাদী। কিন্তু করচাগিন নেহাত বালক হিশেবে নিজেকে জাহির করার চেষ্টা করছে, যেন কমসমোলের কোলে একটি খোকা... আর তাছাড়া, নাতি হয়ে ঠাকুরদাকে শিক্ষা দিতে আসাটাতেও আমার আপত্তি আছে।'

কমিউনিস্টদের নীতিবোধ সম্বন্ধে খুব জোরালো একটা তর্কের শেষে স্থূল রসিকতা নিয়ে আলোচনা উঠল নীতির দিক থেকে। বিভিন্ন জনের বিভিন্ন মত মার্তা তরজমা করে করে বুঝিয়ে দিল এবনেরকে। এবনের বলল, 'স্থূল রসিকতা ভালো নয়। আমি পাভেলের সঙ্গে একমত।'

পিছু হঠে যেতে বাধ্য হল ভাইমান। প্রসঙ্গটাকে হেসে উড়িয়ে দিয়ে নিজের পরাজয়টা সাধ্যমতো সামলে নেবার চেষ্টা করল সে। কিন্তু এরপর আর কোনোদিন সে সেই গল্প বলেনি।

পাভেল মার্তাকে কমসমোল-সভ্য বলে ধরে নিয়েছিল, কারণ উনিশ বছরের বেশি ওর বয়েস নয় বলেই তার মনে হয়েছিল। তারপরে যখন শুনল যে ১৯১৭ থেকে সে পার্টি-সভ্য, তার বয়েস একত্রিশ বছর আর লাভভিয়ান কমিউনিস্ট পার্টির সে একজন সক্রিয় কর্মী, তখন তার বিশ্বাস আর ধরে না। ১৯১৮-য় শ্বেতরক্ষীরা তাকে গুলি করে মারবে বলে ঠিক করেছিল, কিন্তু শেষপর্যন্ত একটা বন্দি-বিনিময়ের ব্যাপারে অন্য জনকতক কমরেডের সঙ্গে তাকে সোভিয়েত সরকারের হাতে দেওয়া হয়। ও এখন 'প্রাভদা'র সম্পাদকীয় বিভাগে কাজ করছে আর সেইসঙ্গে উচ্চ বিদ্যালয়েও পড়ছে, শিগগিরই শেষ করবে। পাভেলের অজান্তেই মার্তার সঙ্গে তার বন্ধুত্ব গড়ে উঠেছে। এই লাভভিয়ান মেয়েটি প্রায়ই এবনেরকে দেখতে আসে, সেই সূত্রে ও এই 'পাঁচজন'-এর একজন অবিচ্ছেদ্য অঙ্গ হয়ে উঠেছে।

এগলিং নামে একজন পুরনো দিনের বেআইনি পার্টির কর্মী এই ব্যাপারটা নিয়ে মার্তার পেছনে লাগে, 'আহা, বেচারি ওজোল্ ওদিকে মস্কোয় ঘরের মধ্যে শুকিয়ে মরছে, তার কী হবে? হায়, হায়, মার্তা! কোন প্রাণে তুমি করছ এমনটা?'

সকালে ঘুম থেকে ওঠার ঘণ্টাটা বাজবার ঠিক আগেই স্বাস্থ্যনিবাসের বাড়িটা জুড়ে একটা মোরগের জোরালো ডাক শোনা যায়। রোগীদের দেখাশোনা করে যারা, তারা

কোথা থেকে এই আওয়াজটা আসে বুঝে উঠতে না-পেরে অসভ্য ওই পাখিটার সন্ধানে এদিক-ওদিক ছোট্টাছুটি করে। এবনের যে মোরগের ডাকের অবিকল নকল করতে পারে আর সে-ই যে তাদের নিয়ে একটু মজা করছে, এটা তাদের কাকুর মাথায় একদম খেলে না। এবনের ব্যাপারটা ভারি উপভোগ করত।

স্বাস্থ্যনিবাসে পাভেলের একমাস মেয়াদের শেষের দিকে তার শরীরের অবস্থা আরও খারাপের দিকে গেল। ডাক্তাররা তাকে বিছানায় শুয়ে থাকার নির্দেশ দিলেন। অত্যন্ত বিচলিত হয়ে পড়ল এবনের। সে গভীরভাবে ভালোবেসে ফেলেছে এই নির্ভীক বলশেভিক তরুণটিকে—জীবনীশক্তি আর উদ্যমে-ভরা এই যে-ছেলেটি এত অল্পবয়সেই স্বাস্থ্য হারিয়ে বসেছে।

ডাক্তাররা করচাগিনের মর্মান্তিক পরিণতির যে-ভবিষ্যদ্বাণী করেছেন, সে-কথা মার্ভা তাকে বলার পর এবনের গভীরভাবে পীড়িত হল মনে-মনে।

স্বাস্থ্যনিবাসে পাভেলের শেষের দিনগুলো কাটল শয্যাশায়ী অবস্থায়। নিজের যন্ত্রণাটাকে সে আর-সবার কাছ থেকে গোপন করে গেল—ওধু মার্ভা তার মুখের নিদারুণ বিবর্ণতা লক্ষ করে বুঝতে পেরেছিল কী সাংঘাতিক যন্ত্রণা সে সহিছে। এখান থেকে তার চলে যাবার এক সপ্তাহ আগে পাভেল ইউক্রেণীয় কেন্দ্রীয় কমিটির কাছ থেকে একটা চিঠি পেল। তাতে জানানো হয়েছে যে স্বাস্থ্যনিবাসের ডাক্তাররা তাকে কাজের অনুপযুক্ত বলে ঘোষণা করার ফলে তাঁদের পরামর্শ অনুসারে পাভেলের ছুটি আরও দু'মাসের জন্য বাড়িয়ে দেওয়া হল।

খরচের টাকাও চিঠির সঙ্গে এসে পৌছাল।

অনেকদিন আগে বুখরাইয়ের কাছে মুষ্টিযুদ্ধ শিখতে গিয়ে যেভাবে সে তার প্রথম ঘুসিগুলো সয়েছিল, এবারও পাভেল সেইভাবে সহিল এই আঘাতটা। তখনও সে ঘুসি খেয়ে বারবার পড়ে গিয়েছিল, কিন্তু সঙ্গে সঙ্গেই ফের উঠে দাঁড়িয়েছিল।

মা'র কাছ থেকে হঠাৎ একটা চিঠি পেল পাভেল—আল্‌বিনা কিউৎসাম নামে তার এক পুরনো দিনের সখীর সঙ্গে গিয়ে একবার দেখা করবার জন্য লিখেছে সে; ইয়েভপাতোরিয়ার কাছেই একটা ছোট বন্দর-শহরে তিনি থাকেন। এই বান্ধবীটির সঙ্গে পনেরো বছর দেখাশোনা হয়নি পাভেলের মায়ের, তাই সে বিশেষ করে অনুরোধ জানিয়েছে যেন ক্রিমিয়ায় থাকতে থাকতে পাভেল গিয়ে একবার আল্‌বিনার সঙ্গে দেখা করে আসে। পাভেলের জীবনে এই চিঠিখানার ভূমিকা হয়ে দাঁড়িয়েছিল অত্যন্ত গুরুত্বপূর্ণ।

এক সপ্তাহ বাদে পাভেলের স্বাস্থ্যনিবাসের বন্ধুরা সবাই বন্দর-ঘাটায় এসে তাকে আন্তরিক বিদায়-অভিবাदन জানাল। এবনের তাকে ভাইয়ের স্নেহে আলিঙ্গন করে চুমো খেল। মার্ভা অন্য কোথায় যেন গিয়েছিল সেই সময়টায়, তাই পাভেলকে তার কাছ থেকে বিদায় না নিয়েই রওনা হতে হল।

পরদিন সকালে বন্দর-ঘাটা থেকে একখানা ঘোড়াগাড়ি পাভেলকে নিয়ে এসে থামল ছোট বাগানঅলা একটা বাড়ির সামনে।

পাঁচজন লোক নিয়ে এই কিউৎসাম-পরিবার : মা আল্‌বিনা, মোটাসোটা, বয়স্ক মহিলা, কালো বিষণ্ণ দুই চোখ, বার্বাক্যোর ছাপ ফুটে-ওঠা তার মুখে অতীত সৌন্দর্যের আভাস; তার দুই মেয়ে লোলা আর তাইয়া; লোলার একটি ছোট্ট খোকা; আর বাড়ির

কর্তা কিউৎসাম—হোতকা-গোছের আর বিরক্তিকর বৃদ্ধকে দেখতে বুনো ঔয়োরের মতো ।

বুড়ো কিউৎসাম একটি দোকানে কাজ করে । ছোটমেয়ে তাইয়া ফাইফরমাশ খাটে । লোলার সম্প্রতি স্বামীর সঙ্গে ছাড়াছাড়ি হয়ে গেছে—লোকটা মাতাল আর অত্যাচারী । টাইপিষ্ট লোলা ইদানীং কাজ না-করে এই বাড়িতেই থাকে, তার ছোটছেলেটির দেখাশোনা করে আর সংসারের কাজে মাকে সাহায্য করে ।

এই দুটি মেয়ে ছাড়া, জর্জ নামে একটি ছেলেও আছে; পাভেলের এখানে আসার সময় সে মক্কায় ছিল ।

পরিবারের লোকজন পাভেলকে আন্তরিক অভ্যর্থনা জানাল । শুধু বুড়ো কিউৎসাম আগন্তুকটিকে দেখল শত্রুতাভরা সন্দেহের দৃষ্টিতে ।

ধৈর্যের সঙ্গে পাভেল আলবিনাকে সমস্ত পারিবারিক খবরাখবর জানাল, এবং সঙ্গে সঙ্গে কিউৎসাম-পরিবারের জীবন সম্বন্ধে অনেককিছু জেনে গেল ।

বাইশ বছর বয়েস লোলার । শাদাসিধে মেয়েটি, বব-করা বাদামি চুল, মুখের ধাঁচটা একটু চওড়া-গোছের, মুখে মন-খোলা একটা ভাব । সঙ্গে সঙ্গেই সে পাভেলের ঘনিষ্ঠ বন্ধু হয়ে উঠল এবং পরিবারের গোপন কথাগুলো সবই জানিয়ে দিল তাকে । বলল, গোটা পরিবারটাকে ওই বুড়ো নিজের ইচ্ছেমতো কড়া-হাতে শাসন করে, অন্য কেউ স্বাধীনভাবে কিছু করার বিন্দুমাত্র চেষ্টা করলেই সেটাকে চেপে দেয় । সংকীর্ণমনা, গোড়ামিতে ভরা আর ছিদ্রাশ্রয়ী এই লোকটি পরিবারের লোকজনদের সদাসর্বদা সজ্জন্ত করে রেখেছে । ফলে তার ছেলেমেয়েরা তাকে দারুণ অপছন্দ করে, স্ত্রী ঘৃণা করে—যে-স্ত্রী এই পঁচিশ বছর ধরে তার স্বৈরাচারিতার বিরুদ্ধে লড়াই করে ব্যর্থ হয়েছে । মেয়েরা সবসময় মায়ের পক্ষ নেয় । পরিবারের মধ্যে ঝগড়াঝাটি লেগেই আছে এবং এর ফলে তাদের জীবন বিষময় হয়ে উঠেছে ।

অবিরাম বকাবকি আর সংঘাতের মধ্যে দিয়ে দিনগুলো কাটে ।

লোলা পাভেলকে বলল : পরিবারের জীবনে অশান্তির আরেকটি উৎস হল তাদের ভাই জর্জ—খাটি অকর্মী ছেলে একটি, দেমাক-ডরা, উদ্ধত প্রকৃতির; ভালো খাওয়াদাওয়া, কড়া মদ আর পরিপাটি পোশাক-আশাক ছাড়া আর কোনোকিছুর ধার ধারে না । ছেলেমেয়েদের মধ্যে জর্জ মায়ের বড় প্রিয় । স্কুলের পড়া শেষ করার পর জর্জ বলল সে মক্কা বিশ্ববিদ্যালয়ে পড়তে যাবে এবং সেখানে যাবার জন্য তার টাকা চাই, 'লোলা ওর আংটিটা বেচে দিতে পারে, তোমারও তো দু-একটা জিনিশ আছে যার বদলে টাকা পাওয়া যেতে পারে । আমার টাকার দরকার । সেটা কীভাবে তোমরা জোগাড় করবে আমার তাতে যায় আসে না ।'

জর্জ ভালোভাবেই জানত—সে যা-ই চাক, মা তাকে সেটা না-দিয়ে পারবে না এবং নির্লজ্জভাবে সে মায়ের এই স্নেহের সুযোগ নিয়ে থাকে । বোনদের সে দেখে তান্মিল্যের দৃষ্টিতে । স্বামীকে ভুলিয়ে মা তার কাছ থেকে যা-কিছু টাকা-পয়সা বাগাতে পারে সেটার সবটাই ছেলেকে পাঠিয়ে দেয়, তাছাড়া তাইয়ার রোজগারের যথাসর্বস্বও মা জর্জকে পাঠায় । ইতিমধ্যে, জর্জ প্রবেশিকা পরীক্ষায় ফেল মারার পর এখন মক্কায় তার কাকার কাছে দিবি ফুর্তিতেই আছে এবং আরও টাকা চেয়ে ঘন ঘন টেলিগ্রাম পাঠিয়ে মার মনে সবসময় আতঙ্ক জাগিয়ে রেখেছে ।

তার এখানে এসে পৌছবার দিন সন্দের আগে পর্যন্ত পাভেল তাইয়ার দেখা পায়নি। বারান্দাটায় তাড়াতাড়ি তার দিকে এগিয়ে গেল আলবিনা, পাভেলের কানে এল—সে ফিসফিসিয়ে তার আসার খবরটা বলছে তাকে। অপরিচিত তরুণটির সঙ্গে তাইয়া সলজ্জভাবে করমর্দন করল, তার ছোট কান পর্যন্ত রক্তিম হয়ে উঠল এবং পাভেল তার ছোট কড়াপড়া বলিষ্ঠ হাতখানা কয়েক মুহূর্ত চেপে ধরে রইল।

উনিশ বছরে পড়েছে তাইয়া। সুন্দরী নয়, কিন্তু তবু তার বড় বড় বাদামি চোখ, মস্কোলীয় ধাঁচের তির্যক ভুরু, টিকালো নাক, ভরা, তাজা ঠোঁট—সব মিলিয়ে তার বেশ একটা আকর্ষণ আছে। ডোরাকাটা ব্লাউজের নিচে তার উন্নত স্তনদুটি স্পষ্ট হয়ে ফুটে উঠেছে।

দুই বোনের জন্য দুটি ছোট ছোট ঘর। তাইয়ার ঘরে সরু একটা লোহার খাট, টুকটাকি জিনিশে ভর্তি একটা টানা-আলমারি, তার ওপর ছোট একটা আয়না, আর দেয়ালের গায়ে কয়েক ডজন ফটোগ্রাফ আর ছবিঅলা পোস্টকার্ড। জ্ঞানলার তাকে দুটো পাত্রের একটাতে গাঢ় লাল রঙের জেরানিয়ম-ফুল, অন্যটাতে হালকা পাটল রঙের অ্যান্টার-ফুল। লেসের পর্দাটা ফিকে নীল রঙের ফিতে দিয়ে আটকানো।

লোলা তার বোনকে খুনসুড়ি কেটে বলল, ‘তাইয়া সাধারণত পুরুষ-জাতীয় ব্যক্তিদের ওর ঘরে ঢুকতে দেয় না। আপনার বেলাতেই ও ব্যতিক্রম ঘটল।’

বৃদ্ধ দম্পতি বাড়ির যে-অংশে থাকে, সেই অংশের একটা ঘরে পরের দিন বিকেলে বাড়ির সবাই বসে চা খাচ্ছিল। তাইয়া নিজের ঘরে ছিল, ওখান থেকে কথাবার্তা শুনছিল। বৃদ্ধ মনোযোগের সঙ্গে তার চা-টা চামচ দিয়ে নাড়তে নাড়তে মাঝে মাঝে তার চশমার উপর দিয়ে বিরূপ নজর চালিয়ে অতিথিটির দিকে তাকাচ্ছিল।

‘আজকালকার এই বিয়ের আইনকানুনগুলোর ওপরে আমার কোনো শ্রদ্ধা নেই’ বলল সে, ‘আজ বিয়ে, কালই খারিজ। খেয়াল-খুশির ব্যাপার। পূর্ণ স্বাধীনতা!’

গলায় বিষম লেগে গিয়ে কেশে উঠল বৃদ্ধ, তারপরে দম নিয়ে লোলাকে দেখিয়ে বলল, ‘এই দেখ না—কারুর অনুমতি না নিয়েই সে আর ওই মিনসেটা গিয়ে বিয়ে করে বসলে, ছাড়াছাড়িও হয়ে গেল ওইভাবেই। আর এখন আমাকেই ওকে আর ওর ওই অপোগণ্ডটিকে খাওয়াতে হচ্ছে। কী অন্যায় জুলুম!’

লজ্জায় যন্ত্রণায় রক্তিম হয়ে উঠল লোলার মুখ, জলভরা চোখে মুখখানা আড়াল করে নিল পাভেলের দিক থেকে।

‘তাহলে আপনি মনে করেন যে ওই বদমায়েশটার সঙ্গেই ওর থাকা উচিত ছিল?’ জিজ্ঞেস করল পাভেল। তার দুইচোখে ক্রোধের দীপ্তি।

‘কাকে বিয়ে করতে চলেছে, সেটা দেখেওনেই করা উচিত ছিল ওর।’

আলবিনা বাধা দিল। রাগটাকে একরকম না-চেপেই, তাড়াতাড়ি বলে উঠল সে, ‘বাইরের একজন লোকের সঙ্গে এসব আলোচনা কি না-করলেই নয়? বলবার মতো আর কোনো কথা কি খুঁজে পেল না?’

বুড়োটা তার দিকে ঘুরে বসে ঝেঁকিয়ে উঠল, ‘কী আলোচনা করব না-করব তা আমার জ্ঞান আছে! আমাকে কী করতে হবে না-হবে সেটা আবার তুমি বলে দিতে শুরু করলে কবে থেকে!’

সেদিন রায়ে পাভেল এই কিউৎসাম-পরিবারের কথা ভাবতে ভাবতে অনেকক্ষণ পর্যন্ত জেগে রইল। আকস্মিকভাবে এখানে এসে পড়ে সে নিজের অজান্তেই এই পারিবারিক ঘটনাচক্রের মধ্যে জড়িয়ে পড়েছে। মাকে আর মেয়েদের সে কীভাবে এই বাঁধন থেকে মুক্তি পাবার জন্য সাহায্য করতে পারে সেই কথাটাই ভাবছিল। নিজের জীবনটাই তার বাধাপ্রাপ্ত হয়ে গতি কমাতে শুরু করেছে। অনেককিছু সমস্যার সমাধান করতে হবে তাকে অথচ এখন সুনির্দিষ্ট কোনো একটা ব্যবস্থা অবলম্বন করা আগেকার চেয়ে কঠিন হয়ে দাঁড়িয়েছে।

স্পষ্টই দেখা যাচ্ছে, একটাই পথ আছে : পরিবারের লোকগুলোকে ভিন্ন করে দিতে হবে, মাকে আর মেয়েদের চলে যেতেই হবে এই বুড়োমানুষটিকে ছেড়ে। কিন্তু এই ব্যাপারটা তত সহজ নয়। পাভেলের পক্ষে কোনোক্রমেই এই পারিবারিক বিপ্লবের দায়িত্ব নেওয়া সম্ভব নয়, কারণ, সে তো দু-একদিনের মধ্যেই চলে যাবে এবং হয়তো আর কোনোদিনই তার এদের সঙ্গে দেখাও হবে না। সেক্ষেত্রে, ঘোলাজলের এই বন্ধ ডোবাটাকে নেড়ে দেবার চেষ্টা না করে, ঘটনাস্রোতকে তার নিজস্ব গতিতে বয়ে যেতে দেওয়াটাই ভালো নয় কি? কিন্তু বুড়োমানুষটির ওই ন্যাকারজনক চরিত্রটা তাকে কিছুতেই শান্তি দিচ্ছে না। গোটাকতক পরিকল্পনা তার মাথায় এল, কিন্তু আরও ভালো করে ভেবে দেখার পর সবগুলোকেই সে অবাস্তব বলে বাতিল করে দিল।

পরের দিন ছিল রবিবার। শহরের মধ্যে এক পাক ঘুরে এসে পাভেল দেখে বাড়িতে একা তাইয়া রয়েছে। অন্যেরা গেছে আত্মীয়স্বজনের সঙ্গে দেখা করার জন্য।

পাভেল তাইয়ার ঘরে এসে একটা চেয়ারে ক্লান্তভাবে বসে পড়ল। জিজ্ঞেস করল, 'বাইরে গিয়ে মাঝে মাঝে একটু আমোদপ্রমোদ করো না কেন?'

নিচুগলায় জবাব দিল তাইয়া, 'হামার কোথাও যেতে ভালো লাগে না।'

রায়ে সে যেসব পরিকল্পনা ভেবেছিল, সেগুলো মনে পড়ল পাভেলের, কথাগুলো সে তাইয়াকে বলবে বলে মনস্থ করল, আর কেউ এসে পড়ার আগেই ব্যাপারটা শেষ করতে হবে বলে সরাসরি আসল কথাটা পাড়ল সে। তাড়াতাড়ি করে বলে চলল, 'শোনো, তাইয়া, তোমার-আমার মধ্যে 'তুমি' বলা ভালো। আমাদের মধ্যে আর এইসব আনুষ্ঠানিক কেতা মেনে চলার দরকার কী? আমি শিগগিরই চলে যাচ্ছি। তোমাদের পরিবারের সঙ্গে আমার জানাশোনা হল এমন একটা সময়ে যখন আমি নিজেই নানান দুর্ভোগে পড়েছি—এইটে একটা আফসোসের কথা, নইলে ব্যাপারটা অন্যরকম হতে পারত। এক বছর আগে হলে আমরা সবাই একসঙ্গে এখন থেকে চলে যেতে পারতাম। তোমার আর লোলার মতো মেয়েদের জন্যে সর্বত্রই প্রচুর কাজ পড়ে রয়েছে। বৃদ্ধ আর বদলাবে বলে আশা করা নিরর্থক। তোমার বাড়ি ছেড়ে যাওয়াই একমাত্র পথ। কিন্তু এখন সেটা অসম্ভব। আমার নিজের কী হবে না-হবে এখনও পর্যন্ত আমি কিছুই জানি না। আমি বিশেষ করে পীড়াপীড়ি করব যাতে আমাকে ফের কাজে পাঠিয়ে দেওয়া হয়। ডাক্তাররা আমার সম্বন্ধে যতসব আজ্ঞেবাজে কথা লিখে পাঠিয়েছে আর কমরেডরা সবাই চেষ্টা করছে যাতে অনন্তকাল ধরে আমার চিকিৎসা চলে। কিন্তু সে-সম্বন্ধে পরে ভাবা যাবে, এখন... আমি মাকে চিঠি লিখে এখানে তোমাদের কঠিন অবস্থা সম্বন্ধে তাঁর পরামর্শ চেয়ে পাঠাব। অবস্থাটাকে এভাবে চলতে দিতে পারি না। কিন্তু তাইয়া,

তোমাকে এই কথাটা খুব ভালো করে বুঝে নিতে হবে যে এর ফলে বর্তমান জীবন থেকে নিজেকে একেবারে বিচ্ছিন্ন করে আনতে হবে। সেটা কি তুমি করতে চাও এবং সেটা করার মতো জোর তোমার হবে তো?’

চোখ তুলে তাকাল তাইয়া। আশ্তে আশ্তে বলল, ‘চাই, কিন্তু সে জোর আমার আছে কিনা তা জানি না।’

তার এই অনিশ্চয়তাটুকু পাভেল বোঝে। সে বলল, ‘কিছু ভেবো না, তাইয়া! ইচ্ছাটা যতক্ষণ আছে ততক্ষণ সবকিছু ঠিক হয়ে যাবে। পরিবারের সবার ওপরে তোমার টানটা কি খুব বেশি?’

একমুহূর্ত ইতস্তত করল তাইয়া। শেষে বলল, ‘মা’র জন্যে আমার বড় দুঃখ হয়। বাবা তাঁর জীবনটা বিষময় করে তুলেছেন, আর এখন জর্জ তাঁকে জ্বালাচ্ছে। জর্জকে মা যতটা ভালোবাসেন, আমাকে সেরকম কোনোদিনই বাসেননি, তবু মা’র জন্যে আমার বড় কষ্ট হয়...’

অনেকক্ষণ ধরে অন্তরঙ্গ কথাবার্তা হল তাদের মধ্যে। বাড়ির অন্য লোকজন সব ফিরে আসার একটু আগে পাভেল কৌতুক করে বলল, ‘এতদিনে যে বুড়ো কারও সঙ্গে তোমার বিয়ে দিয়ে দেয়নি, সেইটেই আশ্চর্য।’

কথাটা শুনে তাইয়া আতঙ্কে হাতদুটো বিকশিপ্ত করে বলল, ‘না, না, আমি কখনও বিয়ে করব না। বেচারি লোলার অবস্থাটা আমি দেখেছি। কোনোকিছুর লোভেই আমি বিয়ে করতে রাজি নই!’

হেসে উঠল পাভেল, ‘তাহলে বাকি জীবনটার মতো তুমি ব্যাপারটার ফয়সালা করে ফেলেছ? কিন্তু যদি কোনো চমৎকার সুপুরুষ তরুণ তোমার জীবনে এসে যায়, তাহলে?’

‘না, তাহলেও না। বিয়ের আগে প্রেম করার বেলায় ওরা সবাই ভারি চমৎকার।’

শান্ত করার ভাবে পাভেল তার কাঁধে হাত রাখল, ‘ঠিক আছে, তাইয়া। স্বামী না হলেও তোমার দিব্যি চলে যেতে পারে। কিন্তু তরুণদের ওপরে তোমার অতটা নির্মম হবার দরকার নেই। আমি তোমার সঙ্গে প্রেম জমাবার চেষ্টায় আছি—এ সন্দেহ যে তোমার মনে জাগেনি, সেটা ভালো, নইলে মুশকিল হত।’ ভাইয়ের মতো পাভেল কুণ্ঠিত মেয়েটির বাহুর ওপরে চাপড় মারল।

কোমল গলায় বলল তাইয়া, ‘তোমার মতো মানুষরা অন্য ধরনের মেয়েদের বিয়ে করে।’

\*

\*

\*

দিনকয়েক বাদেই পাভেল খারকভ রওনা হয়ে গেল। পাভেলকে বিদায় জানানোর জন্য তাইয়া, লোলা আর আল্‌বিনা তার বোন রোজাকে সঙ্গে নিয়ে স্টেশনে এল।

বিদায়ের সময় আল্‌বিনা তাকে দিয়ে প্রতিজ্ঞা করিয়ে নিল—সে যেন তার মেয়েদের ভুলে না যায়, এই দূরবস্থার মধ্যে থেকে যাতে তারা উদ্ধার পায় তার জন্য যেন সে তাদের সাহায্য করে। ঘনিষ্ঠ কোনো প্রিয়জনকে যেমন লোকে বিদায় দেয়, তেমনিভাবেই তারা পাভেলকে বিদায় জানাল, তাইয়ার চোখে জল এসে গেল। কামরাটার জানলা দিয়ে

পাভেল তাকিয়ে তাকিয়ে দেখল লোলার হাতে শাদা ক্রমালটা আর তাইয়ার ডোরাকাটা ব্লাউজটা ক্রমশ ছোট হয়ে আসতে আসতে শেষে মিলিয়ে গেল।

খারকভে পৌছে পাভেল সোজা চলে এল তার বন্ধু পেতিয়া নোভিকভের ঘরে— কারণ, দোরার ব্যাঘাত ঘটাতে চায় না সে। একটু জিরিয়ে নিয়ে সে এল কেন্দ্রীয় কমিটিতে। এখানে এসে আকিমের জন্য অপেক্ষা করে রইল এবং শেষপর্যন্ত যখন তারা দু'জন ছাড়া ঘরে আর কেউ নেই, তখন পাভেল বলল যে তাকে অবিলম্বে কাজে লাগিয়ে দেওয়া হোক। মাথা নাড়ল আকিম, 'তা হয় না, পাভেল! চিকিৎসা-কমিশনের নির্দেশ আছে, আর কেন্দ্রীয় কমিটি বলেছে, তোমার শরীরের অবস্থা গুরুতর। তোমাকে কোনো কাজ করতে দেওয়া হবে না—স্নায়বিক রোগ-চিকিৎসা প্রতিষ্ঠানে তোমাকে পাঠিয়ে দেওয়া হবে।'

'ওরা কী বলল না-বলল, আমি তার কী ধারু-ধারি, আকিম! আমি তোমার কাছেই আবেদন জানাচ্ছি। কাজ করার একটা সুযোগ আমাকে দাও! একটা হাসপাতাল থেকে আরেকটা হাসপাতালে এইভাবে ঘোরাঘুরি—এতে কোনো লাভ নেই।'

আকিম তার অনুরোধ প্রত্যাখ্যান করার চেষ্টায় যুক্তি দেখাল, 'পার্টি-সিদ্ধান্তের বিরুদ্ধে যেতে পারি না আমরা। এটা-যে তোমারই ভালোর জন্যে তা কি তুমি বোঝো না, পাভলুশা?'

কিন্তু পাভেল এমন আন্তরিক আবেগের সঙ্গে নিজের কথাটা তুলে ধরল যে শেষপর্যন্ত রাজি হতে হল আকিমকে।

পরের দিনই পাভেল কেন্দ্রীয় কমিটির সেক্রেটারিয়েটের বিশেষ বিভাগে কাজে লেগে গেল। কাজ শুরু করে দিলেই শরীরে হ্রতশক্তি ফিরে আসবে বলে তার বিশ্বাস ছিল। কিন্তু অল্পদিনের মধ্যেই বুঝল সেটা ভুল। একনাগাড়ে আট ঘণ্টা বসে থাকে সে তার ডেস্কে, দুপুরের খাবার সময়টুকুতেও কাজ বন্ধ করে না, তার কারণ শুধু এই যে তিনতলা সিঁড়ি ভেঙে ক্যান্টিন পর্যন্ত ওঠানামা করার হয়রানিটুকু সওয়া তার পক্ষে সম্ভব নয়। প্রায়ই তার হাত বা পা হঠাৎ অসাড় হয়ে যায় এবং মাঝে মাঝে তার গোটা শরীরটাই কয়েক মুহূর্তের জন্য পক্ষাঘাতগ্রস্ত হয়ে পড়ে। প্রায়ই একটা জ্বর-জ্বর ভাব বোধ করে সে। মাঝে মাঝে সকালে দেখে বিছানা ছেড়ে ওঠার শক্তি নেই এবং রোগের সেই সাময়িক আক্রমণ কেটে যাবার পর হতাশার সঙ্গে লক্ষ করে যে সেদিনকার মতো কাজে যোগ দিতে তার পুরো একঘণ্টা দেরি হয়ে যাবে। শেষপর্যন্ত একদিন দেরি করে কাজে আসার জন্য তাকে সরকারিভাবে তিরস্কার করা হল। আর তখনই সে বুঝল যে, যে-ব্যাপারটাকে সে জীবনে সবচেয়ে বেশি ভয় করে এসেছে, এটা তারই সূত্রপাত—সক্রিয় কর্মীদের বাইরে পড়ে যাচ্ছে সে।

আকিম তাকে দু'বার অন্য কাজে বদলি করে দিয়ে সাহায্য করল, কিন্তু যা অনিবার্য তাই ঘটল। ফিরে এসে কাজে যোগ দেবার একমাস বাদেই পাভেল আবার শয্যাশায়ী হয়ে পড়ল। এইবারে তার মনে পড়ল বিদায় নেবার সময় বাঝানোভার শেষ কথাগুলো। পাভেল তাকে চিঠি লিখল এবং সেইদিনই এসে পড়ল বাঝানোভা। যে-কথাটা পাভেলের কাছে সবচেয়ে প্রধান, সেই কথাটাই বাঝানোভা বলল তাকে—হাসপাতালে-যে পাভেলকে যেতেই হবে এমন কোনো কথা নেই।

তামাশা করতে গিয়ে পাভেল বলল, 'তাহলে আমার শরীর আজকাল এত ভালো যাচ্ছে যে আর চিকিৎসার দরকার নেই, অ্যাঁ?' কিন্তু কৌতুকটা খুব কার্যকরী হল না।

আগের চেয়ে একটু সেরে উঠেছে বলে মনে হতেই সে কেন্দ্রীয় কমিটিতে ফিরে এল। কিন্তু এবারে আকিমের মনোভাব একেবারে অনমনীয় : পাভেলকে হাসপাতালে যেতে হবে বলে গোঁ ধরল সে।

'হাসপাতালে যাব না আমি,' চাপা স্বরে বলল পাভেল, 'কোনো লাভ হবে না গিয়ে। খুব ভালোরকম নির্ভরযোগ্য বিশেষজ্ঞের মত জেনেই আমি এ-কথা বলছি। একটা পথই শুধু আমার সামনে খোলা আছে—পেনশন নিয়ে কাজকর্ম থেকে অবসর নেওয়া। কিন্তু সেটি হচ্ছে না! আমাকে কাজ ছেড়ে দেওয়াতে পারবে না তোমরা। মাত্র চব্বিশ বছর বয়েস আমার—অকর্মণ্য পশু হিসেবে, আর কোনো লাভ নেই জেনেও হাসপাতাল থেকে হাসপাতালে ঘুরে-ঘুরে জীবনটাকে কাটিয়ে দিতে চাই না আমি। কিছু-একটা কাজ তোমাদের আমাকে দিতেই হবে—আমার এই অবস্থার পক্ষে উপযোগী কোনো কাজ। বাড়িতে বসে কাজ করতে পারি আমি, কিংবা আপিসেও থাকতে পারি... শুধু দেখো, চিঠিপত্রে নম্বর বসিয়ে যাওয়া বা ওই ধরনের স্রেফ কলম-নাড়াচাড়ার কোনো কাজ যেন দিয়ো না। এমন একটা কাজ আমাকে পেতেই হবে, যাতে আমার মন পরিতৃপ্ত হয়, আমার এই সান্ত্বনাটুকু থাকবে যে আমি এখনও কোনো-একটা কাজে লাগছি।'

পাভেলের আবেগ-কম্পিত গলার স্বর ক্রমশই চড়া পর্দায় উঠে গেল।

আকিম তার প্রতি গভীর একটা সমবেদনা অনুভব করল। এই-যে দীর্ঘ-হৃদয় তরুণটি তার এই সৎক্ষিপ্ত জীবনকালের সবটাই পার্টির জন্য দান করেছে, তার পক্ষে সংগ্রাম থেকে বিচ্ছিন্ন হয়ে পড়ার এই চিন্তাটার সঙ্গে নিজে থেকে খাপ খাইয়ে নিয়ে, পেছনের সারিতে সরে গিয়ে অবসর-জীবন যাপন করতে বাধ্য হওয়াটা-যে কী মর্মান্তিক, তা আকিম জানে। সে যতদূর পারে পাভেলকে সাহায্য করবে বলে মনস্থ করল।

'আচ্ছা, ঠিক আছে। শান্ত হও, পাভেল। আগামীকাল সেক্রেটারিয়েটের একটা বৈঠক আছে, সেখানে আমি কমরেডদের কাছে তোমার ব্যাপারটা তুলব। কথা দিচ্ছি, আমার যথাসাধ্য করব।'

ভারী পায়ে উঠে দাঁড়াল পাভেল, আকিমের হাতখানা চেপে ধরল, 'আকিম, তোমার কি সত্যিই মনে হয় যে জীবন আমাকে কোণঠাসা করে গুঁড়িয়ে দিতে পারবে? যতক্ষণ পর্যন্ত আমার হৃৎপিণ্ডটা এইখানে ধুকধুক করবে,' বলতে বলতে সে আকিমের হাতখানা চেপে ধরল নিজের বুকের উপরে যাতে সে তার হৃৎপিণ্ডের ভোঁতা ধুকধুক আওয়াজটা শুনতে পায়, 'যতক্ষণ পর্যন্ত এই ধুকধুকনি বন্ধ না হবে, ততক্ষণ পর্যন্ত কেউ আমাকে পার্টি থেকে ছিনিয়ে নিতে পারবে না। আমাকে পার্টির কর্মীদের বাইরে ঠেলে সরিয়ে দিতে পারে একমাত্র মৃত্যুই। এই কথাটি মনে রেখো, ভাই।'

কিছু বলল না আকিম। সে জানে পাভেলের এই কথাগুলো শুধু ফাঁকা বুলি নয়—এটা যুদ্ধক্ষেত্রে মারাত্মকভাবে আহত সৈনিকের চিৎকার। সে জানে, করচাগিনের মতো মানুষ এছাড়া অন্য কোনোরকম ভাবতে বা বলতে পারে না।



দু'দিন বাদে আকিম পাভেলকে জানাল, একটা কেন্দ্রীয় খবরের কাগজের সম্পাদকীয় বিভাগে কাজ করার সুযোগ তাকে দেওয়া হবে—অবশ্য যদি লেখালেখির কাজ তাকে দিয়ে হবে বলে মনে হয়, তাহলে।

সম্পাদকীয় দপ্তরে পাভেলকে সৌজন্যের সঙ্গে অভ্যর্থনা জানান হল এবং একজন সহকারী সম্পাদক তার সঙ্গে কথাবার্তা বললেন—পুরনো দিনের গোপন পার্টি-কর্মী এই মহিলাটি ইউক্রেনের কেন্দ্রীয় নিয়ন্ত্রণ কমিটির সভাপতিমণ্ডলীর একজন সভ্য।

‘আপনি লেখাপড়া কতদূর পর্যন্ত করেছেন, কমরেড?’ জিজ্ঞেস করলেন তিনি।

‘প্রাথমিক স্কুলে তিন বছর পড়েছি।’

‘পার্টির কোনো রাজনীতিক স্কুলে আপনি পড়েছেন কি?’

‘না।’

‘তা, স্কুল-কলেজে খুব বেশি দূর না-পড়েও ভালো সাংবাদিক হওয়া যায়। কমরেড আকিম আমাদের বলেছে আপনার কথা। বাড়িতে বসে করবার মতো কাজ আমরা আপনাকে দিতে পারি। আর, সাধারণভাবে, আপনার কাজ করার মতো যথাযোগ্য ব্যবস্থা করে দিতেও প্রস্তুত আছি আমরা। কিন্তু এ-ধরনের কাজের জন্যে বেশ খানিকটা জ্ঞান থাকার দরকার—বিশেষ করে সাহিত্য আর ভাষার ক্ষেত্রে।’

অবস্থাটা উৎসাহব্যঞ্জক নয়। আধঘণ্টা ধরে এই কথাবার্তার মধ্যে দিয়ে সে দেখতে পেল—তার জ্ঞান যথেষ্ট নয়। কেমন লিখতে পারে দেখবার জন্য তাকে একটা প্রবন্ধ রচনা করতে দেওয়া হয়েছিল; লাল পেন্সিলে দাগ দিয়ে দেখানো তিরিশটার বেশি ভাষাগত প্রকাশভঙ্গির ভুল আর বানান-ভুল-সমেত লেখাটা তাকে ফিরিয়ে দেওয়া হল।

‘আপনার বেশ যোগ্যতা আছে, কমরেড করচাগিন,’ বললেন সম্পাদিকা, ‘কিছুদিন বেশ খাটলে আপনি দিব্যি লিখতে শিখে যেতে পারেন। কিন্তু বর্তমানে আপনার লেখায় ব্যাকরণের অনেক ভুল আছে। আপনার প্রবন্ধটা থেকে বোঝা যাচ্ছে, আপনার রুশভাষায় যথেষ্ট দখল নেই। এতে আশ্চর্য হবার কিছু নেই, কারণ আপনি সেটা শেখার সময় পাননি। আমরা এখানে আপনাকে কোনো কাজে লাগাতে পারব না বলে দুঃখিত। তবু ফের বলছি, আপনার যোগ্যতা আছে। আপনার প্রবন্ধটির বক্তব্য না-বদলিয়ে যদি শুধু ভাষাটার সম্পাদনা করে দেওয়া যায়, তাহলে ওটা একটা চমৎকার রচনা হয়ে দাঁড়াবে। কিন্তু, দেখুন, এমনিতেই আমাদের সম্পাদনা করবার মতো লোক দরকার।’

লাঠিটার উপরে ঝুঁকে পড়ে ভর দিয়ে উঠে দাঁড়াল করচাগিন। তার ডান চোখের ভুরুটা বারবার কঁপে উঠল।

‘হ্যাঁ, আপনার বক্তব্যটা আমি বুঝেছি। আমি আর সাংবাদিক হব কোথেকে? আমি এককালে ছিলাম ভালো স্টোকার, আর, ইলেকট্রিশিয়ান হিশেবেও মন্দ নয়। ভালো ঘোড়সওয়ার ছিলাম এবং কমসমোল তরুণদের মধ্যে আলোড়ন জাগিয়ে তুলতে পারতাম। কিন্তু বুঝতে পারছি, আপনাদের কাজের ক্ষেত্রে আমার অবস্থাটা খুব করুণ হয়ে দাঁড়াবে।’

করমর্দন করে বেরিয়ে এল সে।

বারান্দাটার একটা বাক্সে এসে ঘুরে যাবার সময়ে হঠাৎ সে পড়েই যাচ্ছিল; সেখান দিয়ে যাচ্ছিল পোর্টফোলিও হাতে এক মহিলা—সে ছুটে এসে তাকে ধরে ফেলল।

‘কী হয়েছে, কমরেড? মুখটা বিবর্ণ হয়েছে আপনার!’

সামলে নিতে কয়েক সেকেন্ড লেগে গেল পাভেলের। তারপরে সে আন্তে নিজেকে ছাড়িয়ে নিয়ে লাঠিটার উপর ঝুঁকে পড়ে ভর দিয়ে-দিয়ে হেঁটে চলে গেল।

সেইদিন থেকে পাভেল অনুভব করল, তার জীবনটা ক্ষয়ে আসছে। এখন আর কাজ করার কোনো প্রশ্নই ওঠে না। ক্রমশই বেশি-বেশি করে শয্যাশায়ী হয়ে থাকতে হচ্ছে। কেন্দ্রীয় কমিটি তাকে কাজের দায়িত্ব থেকে খালাস করে দিয়ে পেনশনের ব্যবস্থা করে দিল। যথাসময়ে মাসোহারা এসে গেল, আর সেইসঙ্গে এসে গেল তাকে অসুস্থ পত্র হিশাবে ঘোষণা করে একখানা সুপারিশপত্র। পাভেলকে খুশিমতো যে-কোনো জায়গায় যাবার অধিকার দিয়ে কেন্দ্রীয় কমিটি তাকে টাকাকড়ি আর পরিচয়পত্র ইত্যাদি দিয়ে দিল।

মার্তার কাছ থেকে একটা চিঠি পেল সে—মস্কোতে গিয়ে তার কাছে কিছুদিন থাকতে বলছে সে। এদিকে পাভেলও কিছুদিন থেকে মস্কোতে যাবে বলে মনস্থ করেছিল, কারণ তখনও তার মনে একটা ক্ষীণ আশা জেগে ছিল যে সারা ইউনিয়ন কেন্দ্রীয় কমিটি হয়তো তাকে এমন একটা কোনো কাজ জুটিয়ে দিতে পারবে যে-কাজে যোরাঘুরি করে বেড়াবার দরকার পড়বে না।

কিন্তু মস্কোতেও তাকে ডাক্তারি চিকিৎসা করাবার জন্য পরামর্শ দেওয়া হল এবং ভালো একটা হাসপাতালে তাকে জায়গাও দিতে চাওয়া হল। সেটা প্রত্যাখ্যান করল সে।

মার্তা আর তার বান্ধবী নাদিয়া পিটার্সন যে-ফ্ল্যাটে একসঙ্গে থাকে, সেখানে পাভেলের উনিশটা দিন দ্রুত কেটে গেল। অনেকখানি সময় পাভেলকে একলা কাটাতে হত, কারণ মার্তা আর নাদিয়া সকালে কাজে বেরিয়ে যায় আর সন্দের আগে ফেরে না। মার্তার লাইব্রেরি থেকে বই নিয়ে পড়ে-পড়ে সময় কাটাত সে—মার্তার বইয়ের সংগ্রহ বেশ ভালো। সন্ধ্যাবেলায় মার্তা আর নাদিয়ার বন্ধুবান্ধব আসে, তাদের সঙ্গে সময়টা বেশ আনন্দে কাটত।

কিউৎসামদের কাছ থেকে চিঠি এল, তারা তাকে একবার গুদের ওখানে আসতে লিখেছে। অসহনীয় হয়ে উঠছে তাদের জীবন, পাভেলের সাহায্য চায় তারা।

তাই একদিন সকালে পাভেল গুসিয়াখিনকভ গলির সেই ছোট্ট নিরিবিলি ফ্ল্যাট ছেড়ে রওনা হয়ে গেল। ট্রেনটা তাকে দক্ষিণমুখো দ্রুত বয়ে নিয়ে চলেছে সমুদ্রের দিকে, স্ন্যাভসেঁতে বৃষ্টিঝরা শরৎ থেকে দূরে সে চলেছে দক্ষিণ ক্রিমিয়ার উষ্ণ উপকূলে। জানলার ধারে বসে পাভেল টেলিগ্রাফের খুঁটিগুলোর দ্রুত পাশ কেটে বেরিয়ে যাওয়াটা লক্ষ করছে। ভুরুদুটি তার কঁচকে আছে, তার কালো দুই চোখে একটা দীপ্তি অনিবার্ণ হয়ে আছে।

## অষ্টম অধ্যায়

নিচে সমুদ্র এসে আছাড় খাচ্ছে পাহাড়ের এবড়োবেবড়ো খাঁজ-কাটা পাথুরে তীরে। সুদূর তুরস্ক থেকে বয়ে-আসা শুকনো হাওয়া এসে লাগছে মুখেচোখে। কথক্রিটের বাঁধ দিয়ে সমুদ্র থেকে আড়াল-করা পোতাশ্রয়টা এলোমেলো একটা বৃন্তাংশ রচনা করে

টুকে গেছে তটভূমির মধ্যে। আর তারই উপর দিয়ে দেখা যায়—সমুদ্রের ধারে এসে হঠাৎ থেমে-যাওয়া পাহাড়ের সারির ঢালু বুকের উপর আটকে রয়েছে শহরতলীর ছোট ছোট শাদা বাড়িগুলো।

শহরের বাইরে এই পুরনো পার্কটা বেশ শান্ত। ম্যাপল গাছের হলদে পাতাগুলো হাওয়ায় ভাসতে ভাসতে ধীরে ধীরে নেমে আসছে পার্কের ঘাস-গজানো পথগুলোর উপরে।

শহর থেকে পাভেলকে এখানে গাড়ি করে পৌঁছে দিয়ে গেছে একজন বুড়ো পারসিক গাড়োয়ান। অদ্ভুত এই সওয়ারিটি যখন নেমে এল তার গাড়ি থেকে তখন সে জিজ্ঞেস না করে থাকতে পারল না, 'এত জায়গা থাকতে এখানে এলে কেন? এখানে না আছে কমবয়েসী মেয়ে, না আছে কোনো আমোদের ব্যবস্থা, আছে শুধু শেয়ালের পাল...এখানে আর করবে কী? চলো বরং আমি গাড়ি করে তোমাকে শহরে ফিরিয়ে নিয়ে যাই, কমরেড-মশাই!'

পাভেল তার ভাড়া চুকিয়ে দিল। গাড়ি হাঁকিয়ে চলে গেল বুড়ো।

পার্কটা সত্যিই সম্পূর্ণ জনমানবশূন্য। পাহাড়ের খাড়াইটার কাছে সমুদ্রের মুখোমুখি একটা বেঞ্চি পেয়ে গেল পাভেল, বসে পড়ে মুখখানা মেলে ধরল মৃদু-তেজ শরৎ-রৌদ্রের দিকে।

সবকিছু ভেবে দেখার জন্য এবং নিজের জীবনে কী করবে না-করবে সেটা বিবেচনা করার জন্য সে এই নিরিবিলি জায়গাটায় এসে বসেছে। অবস্থাটা ভালো করে বিবেচনা করার পর একটা কোনো সিদ্ধান্ত নেবার সময় এসেছে।

কিউৎসামদের এখানে তার এই দ্বিতীয়বার আসাতে তাদের পারিবারিক সংঘাতটা একেবারে পেকে উঠেছে। পাভেলের এসে পড়ার খবর পেয়েই বুড়ো দারুণ চটে উঠে সাংঘাতিক গালাগাল-চোঁচামেচি করেছিল। স্বভাবতই প্রতিরোধের নেতৃত্বটা এসে পড়েছিল পাভেলের ওপরে। অপ্রত্যাশিতভাবে স্ত্রী আর মেয়েদের কাছ থেকে একটা জোরালো প্রতিরোধের মুখোমুখি দাঁড়াতে হল বুড়োকে। পাভেলের এখানে এসে পৌঁছানোর প্রথমদিন থেকেই গোটা বাড়িটা দুটো শত্রু-শিবিরে ভাগ হয়ে গেল। বাড়িটার যে-অংশে বাবা-মা থাকে, সেদিকে যাবার দরজাটা তালাবন্ধ হয়ে গেল। পাশের দিকে ছোট একখানা ঘর ভাড়া দেওয়া হল করচাগিনকে। পাভেল অগ্রিম ভাড়া চুকিয়ে দেওয়ায় বুড়ো এই ব্যবস্থায় কিছুটা শান্ত হল। মেয়েরা এখন ভিন্ন হয়ে গেছে তাই সে আর তাদের ভরণপোষণ করবে বলে আশা করা যায় না।

কূটনীতিক কারণে আলবিনা তার স্বামীর সঙ্গেই আছে। বুড়ো মেয়েদের বসবাসের অংশটুকুর এদিকে এক পা-ও আসে না কখনও; যে-মানুষটিকে সে মনেপ্রাণে ঘৃণা করে, তার সঙ্গে দেখাদেখিটা এড়িয়ে চলে। কিন্তু সে যে এখনও বাড়ির কর্তা, সেটা জাহির করার জন্য বাইরের উঠোনটায় যতদূর পারে সে শোরগোল তোলে।

দোকানে কাজ নেবার আগে এই কিউৎসাম বুড়ো জুতো তৈরি করে আর ছুতোরগিরি করে চালাত, তাই পেছনের আঙিনাটায় তার ছোট্ট একটা কর্মশালা ছিল। ভাড়াটেকে বিরক্ত করবার জন্য এখন সে তার কাজ করার বেঞ্চটাকে চালার ভেতর থেকে টেনে নিয়ে এসে বসিয়েছে ঠিক পাভেলের ঘরের জানলাটার নিচেই—সেখানে

সে ঘণ্টার পর ঘণ্টা প্রচণ্ড শব্দে হাতুড়ি পেটায় আর তার ফলে করচাগিনের পড়ায় ব্যাঘাত ঘটছে জেনে একটা বিদ্রোহী ভৃগু লাভ করে।

হিসহিসিয়ে বুড়ো আপন-মনে বলে, 'দাঁড়াও, এখান থেকে তাড়িয়ে ছাড়ছি তোমায়...'

অনেক দূরে একেবারে দিগন্তের কাছে একটা স্টিমার ছোট একটা ধোয়ার রেখা ঐকে দিয়েছে সমুদ্রের উপরে। একঝাঁক গাংচিল ডানা ছড়িয়ে কান-ফাটানো চিৎকার তুলে সমুদ্রের ঢেউয়ে হোঁ মারছে।

হাতের তেলোয় থুতনিটা রেখে পাভেল চিন্তায় ডুবে গেছে। ছেলেবেলা থেকে বর্তমান সময় পর্যন্ত গোটা জীবনের ছবিটা তার মনচক্ষুর সামনে খেলে গেল। এই চব্বিশ বছর সে কীভাবে বেঁচেছে? বাঁচাটা সার্থক হয়েছে, না ব্যর্থ হয়েছে? আরেকবার সে জীবনটার পর্যালোচনা করে চলল বছর ধরে-ধরে, ধীরভাবে পক্ষপাতহীন বিচার করে-করে। সে দেখল যে ততটা খারাপভাবে জীবনটা কাটায়নি, তখন দারুণ একটা স্বস্তিবোধ করল। ভুলক্রটি ঘটেছে ঠিকই—তরুণ বয়সের অনভিজ্ঞতার ভুল, প্রধানত অজ্ঞতাজনিত ভুল। কিন্তু সোভিয়েত-রাজ্য প্রতিষ্ঠার জন্য সংগ্রামের সময়ে সেইসব ঝোড়ো দিনগুলোয় সে-ও থেকেছে লড়াইয়ের মাঝখানে এবং বিপ্লবের রক্তপতাকায় তার জীবনের দু-এক বিন্দু রক্তও লেগে আছে।

শক্তি নিঃশেষ হয়ে না-আসা পর্যন্ত সে থেকেছে কর্মীদলের মধ্যে। আর এখন চোট খেয়ে পড়ে যাবার পর যুদ্ধক্ষেত্রে সৈনিকদের সামনের সারিতে জায়গা নিতে অসমর্থ হয়ে তার এবার পেছন-ঘাঁটির হাসপাতালে এসে আশ্রয় নেওয়া ছাড়া আর-কোনো উপায় নেই। পাভেলের মনে পড়ল তাদের ওয়ারশ আক্রমণ করার কথাটা এবং লড়াই যখন চরমে উঠেছে তখন একজন সৈন্যের গুলি লেগে পড়ে যাবার দৃশ্যটা। মাটির উপরে ঘোড়ার খুরের সামনে পড়ে গিয়েছিল সে। কমরেডরা তাড়াতাড়ি তার ক্ষতগুলো বেঁধেছেদে স্ট্রিচার-বাহকদের জিয়ার্য দিয়ে শত্রুর পেছনে তাড়া করে এগিয়ে চলে সামনের দিকে। একজন আহত সৈনিকের জন্য পুরো স্কোয়াড্রনের এগিয়ে যাওয়াটা খেমে থাকেনি। মহৎ আদর্শের জন্য সংগ্রামে এইরকমই হয়, এরকমই হবেই। অবশ্য ব্যতিক্রমও ঘটে। সে পা-কাটা মেশিনগান-গোলন্দাজদেরও কামান বয়ে নিয়ে যাওয়ার গাড়িতে চেপে যুদ্ধে যেতে দেখেছে তো। এইসব লোক শত্রুসারির মধ্যে নিদারুণ আতঙ্ক জাগিয়ে তুলেছে, মৃত্যু আর ধ্বংসের তাণ্ডব সৃষ্টি করেছে তাদের মেশিনগান, ইস্পাত-কঠিন সাহস আর অত্রাস্ত নিশানার ক্ষমতার জন্য তারা হয়ে উঠেছে তাদের নিজের নিজের ফৌজিদের গর্ব। কিন্তু এ-ধরনের সংখ্যা খুব কম।

কিন্তু এই পরাজয়ের পর আর যখন কর্মীদলের মধ্যে তার ফিরে যাবার কোনো আশা নেই, এ-অবস্থায় কী করবে সে? ভবিষ্যতে-যে তাকে এর চেয়েও ঢের বেশি ভয়ঙ্কর কিছু সইতে হবে—বাবানোভার কাছ থেকে এই স্বীকৃতিটুকু তো সে আদায় করেই ছেড়েছে। কী করবে সে? অমীমাংসিত এই প্রশ্নটি যেন তার সামনেই একটা অতলম্পর্শী গহ্বরমুখ বিস্তার করে রয়েছে।

সংগ্রাম করার ক্ষমতাকেই সে জীবনে সবচেয়ে বড় মূল্য দিয়ে এসেছে, সেই ক্ষমতাটাকেই হারিয়ে বসার পর আর বেঁচে রইবে কিসের জন্য? আজকের আর

নিরানন্দ আগামীকালের অস্তিত্বের সমর্থনে যুক্তিটা কী? কী দিয়ে ভরে তুলবে সে তার দিনগুলোকে? টিকে রইবে শুধু নিশ্বাস নেবার জন্য আর পান-আহার করবার জন্য? তার কমরেডরা সব সংগ্রামের মধ্যে দিয়ে এগিয়ে যাবে, আর সে শুধু পাশে দাঁড়িয়ে অসহায়ের মতো দেখে যাবে? যোদ্ধাদের দলে সে হয়ে রইবে একটা বোঝা? এই-যে দেহটা তার প্রতি বিশ্বাসঘাতকতা করেছে, সেটাকে ধ্বংস করে ফেলাটাই কি ঢের ভালো হবে না? হৃদপিণ্ডের মধ্যে একটা গুলি চালিয়ে দাও—আর চুকিয়ে ফ্যালো সবকিছু! সেই হবে সার্থক জীবনের সময়োচিত পরিসমাপ্তি। যন্ত্রণার হাত থেকে যে-সৈনিক নিজেকে নিষ্কৃতি দিয়েছে, তার নিন্দা করবে কে?

পকেটের মধ্যে তার ব্রাউনিং-পিস্তলের চ্যান্টা গড়নটা হাতড়াল সে। বাঁটের উপরে আড়লগুলো চেপে এল। ধীরে ধীরে বের করে আনল পিস্তলটা।

‘শেষপর্যন্ত যে তুমি এরকম একটা সিদ্ধান্তে আসবে, তা কি কেউ কখনও ভাবতে পেরেছে?’

নিঃশব্দ ঘৃণার চোখ মেলে ওর দিকে স্থিরদৃষ্টিতে তাকিয়ে রইল পিস্তলের নলটা। পাভেল হাঁটুর উপরে পিস্তলটা রেখে নিদারুণ আত্মগ্লানির সঙ্গে গাল পাড়ল একটা।

‘সস্তা বাহাদুরি যতসব! যে-কোনো আহাম্মকই তো গুলি খেয়ে আত্মহত্যা করতে পারে—ওটাই তো সবচেয়ে সহজ পথ, কাপুরুষের পথ। জীবন যখন তোমার ওপরে বড় বেশিরকম নির্দয় হয়ে ওঠে, তখন তো যে-কোনো সময়েই খুলির মধ্যে একটা গুলি চালিয়ে দেওয়া যায়। কিন্তু জীবনে এই সংকট কাটাবার চেষ্টা করেছে কি? একথাটা কি বিনাধিধায় বলতে পারো যে পোহার ফাঁদটাকে কেটে বেরিয়ে আসার জন্যে যথাসম্ভব সব করেছে? নভোগ্রাদ-ভলিনস্কির সেই লড়াইয়ে আমরা পরপর সতেরো বার হামলা চালিয়ে সমস্ত বাধাবিপত্তি সত্ত্বেও শেষপর্যন্ত জয়ী হলাম—সে-কথাটা ভুলে গেছ নাকি? সরিয়ে রেখে দাও পিস্তলটা। আর, কখনও কারুর কাছে ঘৃণাক্ষরেও কথাটা বোলো না যেন। জীবন যখন অসহনীয় হয়ে ওঠে তখন কী করে বাঁচতে হয়, সেটা শেখো। জীবনটাকে কাজে লাগাও।’

দাঁড়িয়ে উঠে রাস্তায় গিয়ে পড়ল পাভেল। পথ-চলতি একজন পাহাড়ি তাকে তার গাড়িতে তুলে নিয়ে পৌছে দিল। শহরে পৌছে গাড়ি থেকে সে নেমে গেল। একখানা খবরের কাগজ কিনে নিয়ে তাতে পড়ল—‘দেমিয়ান বেদনি’ ক্লাবে শহর পার্টি গ্রুপের একটা সভা বসবে।

সেদিন অনেক রাতে পাভেল বাড়ি ফিরল। সভায় সে বক্তৃতা দিয়েছিল। তখন সে ভাবতেও পারেনি যে বড় কোনো সাধারণ সভায় তার এই শেষ বক্তৃতা।

\*

\*

\*

\*

পাভেল যখন বাড়ি ফিরল, তাইয়া তখনও জেগে আছে। পাভেলের এই দীর্ঘ অনুপস্থিতিতে সে দুর্ভাবনায় পড়েছিল। মনে পড়ছিল—সকালে পাভেলের দুই চোখে সে কেমন যেন কঠোর আর নিরুপদ্রাব একটা চাউনি লক্ষ করেছে—যে-চোখদুটির দৃষ্টি সর্বদাই প্রাণবন্ত আর উজ্জ্বল। উদ্ভিগ্ন হয়ে ভাবছিল—কী হল ওর? পাভেল কখনও

নিজের সম্বন্ধে কিছু বলতে ভালোবাসে না; কিন্তু সে-যে কোনো-একটা নিদারুণ মানসিক যন্ত্রণায় ভুগছে সেটা তাইয়া অনুভব করেছিল।

মা'র ঘরে ঘড়িটায় যখন দুটো বাজল, তখন বাইরের দেউড়িটার ক্যাচকেঁচে আওয়াজ শুনতে পেল তাইয়া। জ্যাকেটটা চাপিয়ে সে দরজাটা খুলে দেবার জন্য বেরিয়ে এল। লোলা তার নিজের ঘরে ঘুমোচ্ছিল। ঘুমের মধ্যে এপাশ-ওপাশ করে অস্পষ্ট ভাষায় সে কী যেন বলে উঠল।

পাভেল ঢুকতেই তাইয়া স্বস্তির সঙ্গে ফিসফিসিয়ে বলল, 'আমার তো ভাবনাই শুরু হয়ে গিয়েছিল।'

'যতক্ষণ বেঁচে আছি, ততক্ষণ আমার কিছু হবে না, তাইয়া', ফিসফিসিয়ে বলল পাভেল, 'লোলা ঘুমুচ্ছে? কী জানি কেন, আমার একটুও ঘুম পাচ্ছে না। আমার কিছু বলার আছে তোমায়। চলো, তোমার ঘরে যাই, যাতে লোলার ঘুম ভেঙে না যায়।'

একটু ইতস্তত করল তাইয়া। অনেক রাত হয়ে গেছে। এই গভীর রাতে সে কী করে পাভেলকে আসতে দেবে তার ঘরে? মা কী ভাববে জানতে পারলে? কিন্তু পাভেল পাছে মনে আঘাত পায়, এই আশঙ্কায় সে তার অনুরোধ প্রত্যাখ্যান করতে পারল না। পাভেলের আগে-আগে ঘরের দিকে এগিয়ে যেতে-যেতে ভাবল, তাকে কে জানে কী বলবে পাভেল?

'যা বলছিলাম, তাইয়া,' নিচুগলায় বলতে লাগল পাভেল। অন্ধকার ঘরে তাইয়ার মুখোমুখি বসেছে সে, এত কাছাকাছি বসেছে যে তার নিশ্বাসের স্পর্শ পাচ্ছে তাইয়া। 'জীবনের গতি এমন অদ্ভুতভাবে মোড় নিচ্ছে যে ভাবলে অবাক হয়ে যেতে হয়। এই গত কয়েকদিন ধরে আমার অতি বিশ্রী লাগছিল। কীভাবে যে বাঁচব সেটাই বুঝে উঠতে পারছিলাম না। জীবনটাকে আর কখনও এমন অন্ধকার মনে হয়নি। কিন্তু আজ আমি আমার নিজের ব্যক্তিগত 'রাজনীতিক ব্যুরো'র একটা সভায় বিরাট গুরুত্বপূর্ণ একটা সিদ্ধান্ত নিয়েছি। যা বলতে যাচ্ছি, তা শুনে আশ্চর্য হয়ো না যেন।'

গত কয়েক মাস তার কীভাবে কেটেছে সে-কথা এবং আজ পার্কে বসে তার মনে যেসব চিন্তা খেলে গেছে তার অনেকটাই সে খুলে বলল তাইয়ার কাছে।

'এই হচ্ছে অবস্থাটা। এবার সবচেয়ে গুরুতর কথাটা বলি। এই পরিবারে ঝড় সবে শুরু হচ্ছে। এখান থেকে বেরিয়ে এসে খোলা বাতাসে গিয়ে পড়তে হবে—এই গর্ত থেকে যতটা দূরে চলে যাওয়া সম্ভব। নতুন করে জীবন শুরু করা দরকার। এই লড়াইয়ে একবার যখন আমি যোগ দিয়েছি, তখন এর শেষপর্যন্ত আমি যাবই। বর্তমানে আমাদের জীবন—তোমার-আমার দু'জনেরই—মোটাই সুখের নয়। এই জীবনে আগুন লাগিয়ে দেব বলে আমি স্থির করেছি। কী বলতে চাচ্ছি, বুঝেছ? তুমি কি আমার জীবনসঙ্গিনী, আমার স্ত্রী হতে রাজি আছ, তাইয়া?'

তাইয়া এতক্ষণ প্রায় নিশ্বাস বন্ধ করে শুনছিল তার কথা, এই শেষের কথাগুলো শুনে সে চমকে উঠল।

'আমি আজ রাতেই তোমার উত্তর জানতে চাচ্ছি না,' বলে চলল পাভেল, 'তোমাকে খুব ভালো করে ভেবে দেখতে হবে কথাটা। তুমি বোধহয় বুঝতে পারছ

না যে নিয়মমাফিক পূর্বরাগের পালা, প্রেম ইত্যাদি না চালিয়ে, এ-ধরনের কথা এমন স্থূলভাবে বলে বসা যায় কী করে। কিন্তু তোমার-আমার মধ্যে ওসব বাজে ব্যাপারের কোনো প্রয়োজন নেই। এই আমি হাত এগিয়ে দিলাম তোমার দিকে। আমায় বিশ্বাস করলে ভুল হবে না তোমার। পরস্পরকে অনেক কিছুই দিতে পারি আমরা। আমি যেটা ভেবে স্থির করেছি, সেটা এবার বলি : যতদিন-না তুমি একজন সত্যিকার মানুষ, একজন যথার্থ বলশেভিক হয়ে উঠছ, ততদিন আমাদের এই বোঝাবুঝি বলবৎ থাকবে। এ-ব্যাপারে যদি আমি তোমায় সাহায্য না-করতে পারি, তাহলে জানব আমার এক কানাকড়িও দাম নেই। ততদিন পর্যন্ত আমাদের চুক্তি কিছুতেই ভাঙা চলবে না। কিন্তু তোমার মন যখন পরিণত হয়ে উঠবে, তখন তুমি সমস্তরকম বাধ্যবাধকতা থেকে খালাস পেয়ে যাবে। কে জানে কী ঘটবে! একেবারে পুরোপুরি পশু হয়ে যেতে পারি আমি, এবং সেক্ষেত্রে, মনে রেখো, তুমি আমার কাছে বাঁধা পড়ে গেছ বলে কিছুতেই মনে করবে না।'

দু-এক মুহূর্ত চুপ করে রইল সে, তারপরে স্নেহভরা কোমল গলায় আবার বলল, 'আমার বন্ধুত্ব আর ভালোবাসা এই আমি জানিয়ে রাখলাম তোমায়।'

তাইয়ার আঙুলগুলো সে ধরে রইল, একটা প্রশান্তি অনুভব করল মনে-মনে, যেন তাইয়া ইতিমধ্যেই মত দিয়ে দিয়েছে।

'প্রতিজ্ঞা করো, তুমি আমায় কখনও ছেড়ে যাবে না?'

'মুখের কথাটুকুই প্রমাণ নয়, তাইয়া। আমার মতো লোকেরা-যে তাদের বন্ধুদের প্রতি কখনও বেইমানি করে না, সেটা বিশ্বাস করো...আসল কথা হল তারাও যেন আমার প্রতি বেইমানি না করে,' স্কোভের সঙ্গে বলল পাভেল।

'আজ রাতে আমি তোমায় কোনো উত্তর দিতে পারছি না। ব্যাপারটা আমার পক্ষে বড়ো আকস্মিক', বলল তাইয়া।

উঠে পড়ল পাভেল।

'শুতে যাও, তাইয়া। ভোর হয়ে আসছে।'

নিজের ঘরে এসে জামা-কাপড় না-ছেড়েই পাভেল শুয়ে পড়ল এবং বালিশে মাথা রাখার সঙ্গে সঙ্গেই ঘুমিয়ে পড়ল।

পাভেলের ঘরে জানলার পাশে টেবিলটার উপরে উঁচু হয়ে আছে পার্টি-লাইব্রেরি থেকে আনা বই, খবরের কাগজ আর লেখায় ভর্তি কতকগুলো নোটবইয়ের স্তুপ। একটা খাট, দুটো চেয়ার এবং তার আর তাইয়ার ঘরের মাঝখানের দরজাটার গায়ে টাঙানো খুদে খুদে লাল আর কালো নিশান-চিহ্নিত মস্তবড় একটা চীনের মানচিত্র—এই হচ্ছে ঘরটার যা-কিছু আসবাব। স্থানীয় পার্টি-কমিটির কমরেডরা পাভেলকে বই আর সাময়িক পত্রিকা ইত্যাদি সরবরাহ করতে রাজি হয়েছে। কথা হল ওরা শহরের সবচেয়ে বড় সাধারণ পাঠাগারের পরিচালককে নির্দেশ দেবে যাতে সে পাভেলকে দরকারমতো যে-কোনো বই পাঠিয়ে দেয়।

কয়েকদিনের মধ্যেই বইয়ের বড় বড় বাউন্ড আসা শুরু হল। পাভেল ভোর থেকে সারাদিন বসে-বসে এই বই পড়ে, মাঝে মাঝে নোট নেয়, আর সকাল-সন্ধ্যায় খাবার সময়ে শুধু সামান্য কিছুক্ষণের জন্য পড়া বন্ধ রাখে; তার এই ব্যাপার দেখে লোলা

তো একেবারে অবাক হয়ে গেছে। সন্কেগুলো পাভেল সর্বদা এই দুই বোনের সঙ্গে গল্পসল্প করে কাটায়, সারাদিনে যা পড়েছে তা শোনায ওদের।

রাত্রি বারোটো বেজে যাবার অনেক পরেও বুড়ো কিউৎসাম তার ওই অবাকুণীয় ভাড়াটের জানলার খড়খড়ির ফাঁকে আলোর রেখা দেখতে পায়। পা টিপে টিপে জানলার কাছে এগিয়ে এসে সে ফাঁকটার মধ্যে দিয়ে উঁকি মেরে দেখে—টেবিলের উপরে একটা মাথা ঝুঁকে রয়েছে।

‘এত রাতে ভদ্রলোকরা সব যখন ঘুমুচ্ছে বিছানায় শুয়ে, তখন এই লোকটা সারারাত্রি ধরে আলো জ্বালিয়ে রেখেছে। ভাবখানা যেন ও-ই এ-বাড়ির কর্তা। ও আসার পর থেকে মেয়েদুটো তো একেবারেই শাসনের বাইরে চলে গেছে।’ মনে-মনে গজগজ করতে করতে বুড়ো তার নিজের ঘরের দিকে চলে যায়।

আট বছরের মধ্যে এই প্রথমবার পাভেল এত অজস্র সময় পেয়েছে এবং এই প্রথম তার হাতে করবার মতো কোনো নির্দিষ্ট কর্তব্যকর্ম নেই। সময়ের সন্ধ্যাবহারে লেগে গেছে সে, জ্ঞানের সাধনায় নব-দীক্ষিতের আগ্রহ-ঔৎসুক্য নিয়ে বই পড়ে চলেছে। দিনে আঠারো ঘণ্টা পড়াশোনা করে সে। তার শরীর-যে এ চাপ আর কতদিন সহিত বলা যায় না, কিন্তু একদিন তাইয়ার একটা প্রাসঙ্গিক মন্তব্যে সবকিছু বদলে গেল।

‘তোমার-আমার ঘরের মাঝখানে দরজায় ঠেকা-দেওয়া ওই টানা-আলমারিটা আমি সরিয়ে নিয়েছি। যদি কোনো সময়ে আমার সঙ্গে কথা বলার দরকার হয়, তাহলে সোজা চলে এসো আমার ঘরে। লোলার ঘরের মধ্যে দিয়ে আসার দরকার নেই।’

পাভেলের গাল রক্তিম হয়ে উঠল। সুখের হাসি হাসল তাইয়া। ওদের মধ্যে চুক্তিটা সম্পাদিত হয়ে গেল।

\*

\*

\*

কিউৎসাম বুড়ো ইদানীং আর ওই কোণের ঘরের খড়খড়ি-ফেলা জানলার ফাঁকে আলোর রেখাটা দেখতে পায় না, আর তাইয়ার মা লক্ষ করতে শুরু করেছে তার মেয়ের চোখের দৃষ্টিতে ফুটে-ওঠা একটা সুখানুভূতির দীপ্তি, যেটাকে তাইয়া গোপন করতে পারছে না। তার চোখের কোলে কালিমার আবছা আভাস দেখে বিন্দি রাত্রিগুলির কথা বোঝা যায়। আজকাল প্রায়ই এই ছোট্ট বাড়িটায় প্রতিধ্বনিত হয়ে ফেরে তাইয়ার গানের সুর আর গিটারের ঝঙ্কার।

কিন্তু তাইয়ার এই সুখ নিরুপদ্রব নয়। পাভেলের সঙ্গে তার সম্পর্কের মধ্যে এই-যে গোপনীয়তা, এর বিরুদ্ধে বিদ্রোহী হয়ে ওঠে তার নবজাগ্রত নারীত্ব। যে-কোনো শব্দেই চমকে ওঠে সে, মা’র পায়ের শব্দ শুনেছে বলে মনে হয়। যদি মা কিংবা লোলা জিজ্ঞেস করে বসে যে সে ইদানীং তার ঘরের অন্য দরজাটা ছিটকিনি এঁটে বন্ধ করে রাখে কেন—তাহলে কী জবাব দেবে? চিন্তাটা পীড়া দিচ্ছিল তাকে। তাইয়ার আশঙ্কাটা লক্ষ করে পাভেল তাকে শাস্ত করার চেষ্টা করে।

‘ভয়টা কিসের তোমার?’ কোমল গলায় বলে সে, ‘আর যাই হোক, তুমি আর আমি তো আমাদের জীবনের কর্তা। ঘুমোও শান্ত হয়ে। কেউ আমাদের জীবনে প্রবেশ করতে পারবে না।’



তারপর, নিরুদ্বেগ-মনে তাইয়া পাভেলের বুকের উপর মুখ রেখে, দুই হাতে তার ভালোবাসার মানুষটিকে জড়িয়ে ধরে ঘুমিয়ে পড়ে। আর, পাভেল জেগে থেকে শোনে তার নিশ্বাসের নিয়মিত শব্দ, অনড় হয়ে সে পড়ে থাকে যাতে তাইয়ার ঘুমে ব্যাঘাত না হয়; এই-যে মেয়েটি পরম নির্ভরতায় তার জীবনটাকে তুলে দিয়েছে ওর হাতে, তার প্রতি একটা নিবিড় স্নেহে আবিষ্ট হয়ে যায় ওর সমগ্র সত্তা।

তাইয়ার চোখে এই জ্বলজ্বলে দীপ্তি ফুটে-ওঠার কারণটা লোলাই প্রথম আবিষ্কার করল। এবং, সেইদিন থেকে দুই বোনের মধ্যে একটা ব্যবধানের ছায়া নেমে এল। শিগগিরই মা-ও জেনে গেল, কিংবা বলা যেতে পারে, আন্দাজ করে নিল। দুর্ভাবনায় পড়ল আলবিনা—করচাগিনের কাছ থেকে সে এটা আশা করেনি।

লোলার কাছে আলবিনা বলল, 'তাইয়া তো ওর বউ হবার যুগি় মেয়ে নয়। কী হবে শেষপর্যন্ত কী জানি!'

দারুণ দৃষ্টিস্তম্ভ হয়ে পড়েছে আলবিনা, কিন্তু করচাগিনকে কিছু বলার মতো সাহস সম্বল করে উঠতে পারল না সে।

স্থানীয় তরুণ-তরুণীর দল পাভেলের সঙ্গে দেখা করতে আসা শুরু করেছে। মাঝে মাঝে ওদের সবাইকে একসঙ্গে পাভেলের ঘরে বসাবার মতো জায়গা কুলায় না বলতে গেলে। মৌমাছির চাকের গুঞ্জনের মতো ওদের গলার আওয়াজ এসে পৌছায় বুড়ো কিউৎসামের কানে। প্রায়ই ওদের গলা-মেলানো গান শুনতে পায় সে :

সদাই নির্জন এই মোদের সাগর,

রাত্রিদিন ওনি তায় রোবক্স্ট বর...

আর, পাভেলের সেই প্রিয় গানটি :

চোখের জলে ভিজে গেছে তামাম দুনিয়াটা...

প্রচার-সংক্রান্ত কিছু কাজ করবার জন্য পাভেল চিঠি লিখে পীড়াপীড়ি করতে থাকায় পার্টি-কমিটি তার ওপরে তরুণ শ্রমিকদের পাঠচক্রটা পরিচালনা করার ভার দিয়েছে। এইভাবে দিন কাটতে থাকে পাভেলের।

আরেকবার সে শব্দ দুইহাতে হাল চেপে ধরেছে এবং তার জীবনতরীখানা বারকতক বিপজ্জনকরকমে টলমল করে ওঠার পর এখন আবার একটা নতুন পথ কেটে চলেছে নির্দিষ্ট গতিতে। পড়াশোনা আর সাহিত্যচর্চার মধ্যে দিয়ে পাভেলের আবার পার্টি-কর্মীদের মধ্যে ফিরে আসার স্বপ্ন সফল হতে চলেছে।

কিন্তু জীবন পাভেলের চলার পথে একটার-পর-একটা বাধা সৃষ্টি করেই চলেছে এবং এই প্রত্যেকটা বাধা তার লক্ষ্যে পৌছানোর পথে কতটা করে দেরি করিয়ে দিচ্ছে ভেবে সে দারুণ বিক্ষুব্ধ হয়ে উঠছে।

একদিন জর্জ, সেই বদনসিব ছাত্রটি মস্কো থেকে এসে হাজির হল সঙ্গে এক বউ নিয়ে। সে এসে উঠল তার উকিল-স্বত্ত্বরের বাড়ি এবং সেখান থেকে টাকার জন্য মা'র ওপরে দারুণ তাগিদ দিতে থাকল।

কিউৎসাম-পরিবারে যে-ফাটল ধরেছিল, জর্জ আসার ফলে সেটা আরও বেড়ে গেল। বিনাধিখায় জর্জ তার বাবার পক্ষ নিল। তার স্ত্রীর পরিবারের লোকজনদের

মনোভাবটা খানিকটা সোভিয়েত-বিরোধী—এদেরই সহযোগিতায় সে নানান ফন্দি খাটিয়ে করচাগিনকে বাড়ি থেকে তাড়িয়ে দেবার জন্য এবং তাইয়া যাতে তাকে ছেড়ে আসে তার জন্য চেষ্টা করতে লাগল।

লোলা কাছাকাছি একটা এলাকায় চাকরি পেয়ে যাওয়ায়, জর্জের এসে পৌছানোর দু-সপ্তাহ বাদে সে তার বাচ্চাছেলেটিকে আর মাকে সঙ্গে নিয়ে এখান থেকে চলে গেল। এর দিনকতক বাদেই পাভেল আর তাইয়া চলে গেল দূরে সমুদ্রের ধারে একটা শহরে।

\*

\*

\*

আরতিওম তার ভাইয়ের কাছ থেকে বড় একটা চিঠিপত্র পায় না। কিন্তু সেইসব অতি-বিরল ক্ষেত্রে, যখনই সে শহর-সোভিয়েতের দপ্তরে তার ডেকের উপরে পরিচিত হস্তাক্ষরে নিজের নাম-লেখা খামখানা তার অপেক্ষায় রয়েছে দেখতে পায়, তখনই আবেগে তার বুক টিপটিপ করতে থাকে। আজও সে খামখানা খুলতে খুলতে সন্তোষে ভাবল মনে-মনে, ‘আহা, পাভেল, তুই যদি আমার আরও কাছাকাছি থাকতিস! নানা বিষয়ে তোর পরামর্শ পেলে আমার ভারি সুবিধে হত, ভাই।’

চিঠিখানা পড়তে লাগল সে।

‘আরতিওম, সম্প্রতি আমার জীবনে যা যা ঘটেছে, সেসব তোমায় জানাবার জন্যে এই চিঠি লিখছি। এসব কথা আমি তোমাকে ছাড়া আর কাউকে লিখি না। আমি জানি, একমাত্র তোমাকেই বিশ্বাস করে এসব কথা খুলে বলা যায়। কারণ, তুমি আমাকে জানো বলেই কথাগুলো বুঝবে।

‘স্বাস্থ্যের দিক থেকে জীবন আমাকে আঘাতের পর আঘাত হেনে ক্রমাগত পেড়ে ফেলছে। একটা আঘাতের বিরুদ্ধে লড়াই করতে করতে উঠে দাঁড়াবার প্রায় সঙ্গে সঙ্গেই আগের চেয়েও আরো নির্মম আঘাত এসে আমাকে ফের পেড়ে ফেলছে। আমার আর প্রতিরোধের শক্তি নেই, এটাই সবচেয়ে ভয়ঙ্কর ব্যাপার। প্রথমে আমার বাঁ-হাতখানার সমস্ত শক্তি খুইয়ে বসলাম। কিন্তু, এতেও যেন দুর্ভোগের পরিমাণটা যথেষ্ট হল না; তাই, এবারে দুই পায়ের জোরও এমনিতেই গেল। কোনোরকমে হাঁটাহাঁটিটুকু করতে পারছিলাম (ঘরের সীমানার মধ্যেই অবশ্য), কিন্তু এখন বিছানা থেকে টেবিলটার কাছ পর্যন্ত পৌছতে আমার কষ্ট হয়। এবং অবস্থাটা—যে এর চেয়েও খারাপ দাঁড়াবে, তা জানি। আগামীকাল যে আমার অবস্থা কী দাঁড়াবে তা কেউ জানে না।

‘ইদানীং আর আমার বাড়ির বাইরে একেবারে যাওয়া হয় না। আমার জানলা দিয়ে সমুদ্রের ছোট্ট একটা টুকরো মাত্র দেখতে পাওয়া যায়। দেহ-মনের এই-যে বিরোধ, মানুষের জীবনে এরচেয়ে বড় ট্রাজেডি আর কী হতে পারে!—বিশ্বাসঘাতক দেহটা প্রতি পদে আমাকে মেনে চলতে অস্বীকার করে বসছে, অথচ মনটা আমার একজন বলশেভিকের—এমন একজন বলশেভিকের, যে কাজ করার জন্যে একান্ত উদ্দীপ্ত, সংগ্রামী সৈনিকদের সারিতে, তোমরা যারা গোটা লড়াইয়ের মোর্চা-জুড়ে এগিয়ে চলেছ নিদারুণ তুষার-ঝঞ্ঝার মতো, তাদেরই পাশাপাশি থাকাই যার একমাত্র কামনা।

‘আমি এখনও বিশ্বাস করি যে, কর্মীদের মধ্যে আমি আবার ফিরে যাব, সৈনিকদের সারিতে গিয়ে আমিও জায়গা নেব, বেয়নেট বাগিয়ে ধরব শত্রুকে আক্রমণ করার জন্যে। এ-বিশ্বাস আমাকে রাখতেই হবে, না-রাখার কোনো অধিকারই আমার নেই। দশ বছর ধরে পার্টি আর কমসমোল আমাকে লড়াই করতে শিখিয়েছে এবং আমাদের সবাইকে উদ্দেশ্য করে আমাদের নেতা যা বলে গেছেন, তা আমার পক্ষেও সমানই প্রযোজ্য : ‘বলশেভিকরা জয় করে নিতে পারে না এমন কোনো দুর্গ নেই।’

ইদানীং পুরোপুরি পড়াশোনার মধ্যে দিয়েই আমার জীবনটা কাটছে। শুধু বই আর বই। অনেক কিছু পড়ে ফেলেছি, আরতিওম। সমস্ত ক্লাসিক সাহিত্য ভালো করে অনুশীলন করেছি। বাড়িতে বসে চিঠিপত্রের মাধ্যমে কমিউনিস্ট বিশ্ববিদ্যালয়ে ক্লাস করার যে-ব্যবস্থা আছে, আমি সেটার প্রথম বছরের পরীক্ষায় পাস করেছি। বিকেলের দিকে তরুণ কমিউনিস্টদের একটা পাঠক্রম পরিচালনা করছি। পার্টি-সংগঠনের প্রত্যক্ষ কর্মজীবনের সঙ্গে আমার যোগসূত্র এই তরুণ কমরেডরা। আর আছে তাইয়ার মানুষের-মতো-মানুষ হয়ে-ওঠার বিষয়টা আর আমার এই স্নেহময়ী স্ত্রীর ভালোবাসা আর সাদর পরিচর্যা। আমরা দু’জনে বড় বন্ধু। খুব শাদাসিধেভাবে সংসার চলে আমাদের—আমার পেনশনের বত্রিশ রুবল আর তাইয়ার রোজগার মিলিয়ে বেশ চলে যাচ্ছে আমাদের। যে-পথ বেয়ে আমি পার্টিতে এসেছি, তাইয়াও সেই পথেই এগুচ্ছে : ও যি-র কাজ করত, এখন একটা ক্যান্ডিনে ডিশ খোয়ার কাজ নিয়েছে (এই শহরে কোনো কলকারখানা নেই)।

‘সেদিন ও আমাকে ভারি গর্বের সঙ্গে মহিলা বিভাগের প্রতিনিধি হিসেবে পাওয়া ওর প্রথম পরিচয়পত্রখানা দেখাচ্ছিল। এটা ওর কাছে শুধু একটা কাগজের টুকরোমাত্র নয়। ওর মধ্যে আমি এক নতুন নারীর জন্ম দেখতে পাচ্ছি এবং এই জন্মপ্রক্রিয়ায় আমি আমার যথাসাধ্য সাহায্য করছি। কখনও বড় কোনো কারখানায় ও কাজ করবে, সেখানে কাজের মধ্যে দিয়ে বৃহৎ শ্রমিক-সম্প্রদায়ের অংশ হিসেবে ও সুপরিণত হয়ে উঠবে। কিন্তু ওর পক্ষে এখানে যেটুকু করা সম্ভব, সেইটেই করছে ও।

‘তাইয়ার মা দু’বার এখানে এসে আমাদের সঙ্গে দেখা করে গেছে। নিজের অজান্তেই সে তাইয়াকে আবার তুচ্ছতায় ভরা, সংকীর্ণ স্বার্থপর জীবনের মধ্যে টেনে নিয়ে যাবার চেষ্টা করছে। আমি আলবিনাকে বুঝিয়ে দেবার চেষ্টা করেছিলাম যে তার মেয়ে যে-পথ বেছে নিয়েছে, সেই পথটাকে সে যেন তার নিজের ভাগ্যহত অতীত জীবনের ছায়া ফেলে অন্ধকারে ঢেকে না দেয়। কিন্তু কোনো ফল হয়নি তাতে। আমার মনে হচ্ছে, একদিন-না-একদিন মা এসে তার মেয়ের পথরোধ করে দাঁড়াবে, আর, তখন একটা সংঘাত অনিবার্য হয়ে উঠবে।

‘তোমার হাতখানা চেপে ধরলাম।

তোমার পাভেল।’

\*

\*

\*

পুরনো মাথসেস্তা’য় পাঁচ-নম্বর স্বাস্থ্যনিবাস...পাহাড়ের গা খুঁড়ে একটা তাক-মতো বের করে নেওয়া হয়েছে, তারই উপরে দাঁড়িয়ে আছে এই তিনতলা ইঁটের বাড়িটা। চারিদিকে ঘন বন। প্যাঁচালো পাক খেয়ে একটা রাস্তা নেমে গেছে নিচে। খোলা

জানলা দিয়ে ঘরের মধ্যে বাতাস বয়ে আনছে খনিজ জলের ফোয়ারাগুলোর গন্ধকের ঘ্রাণ। পাভেল করচাগিন একা রয়েছে এই ঘরে। কাল নতুন রোগীরা এলে সে এই ঘরে একজন সঙ্গী পাবে। জানলার বাইরে পায়ের শব্দ আর পরিচিত গলার স্বর শুনতে পেল সে। জনকতক লোক কথাবার্তা বলছে। কিন্তু পাভেল এই গভীর-খাদের গলাটা কোথায় শুনেছে যেন আগে। স্মৃতির গহনে চাপা পড়ে গিয়ে অস্পষ্ট হয়ে আসা, কিন্তু অ-বিশ্মৃত একটি নাম ফুটে উঠল তার মনের পটে : 'লেদেনেভ ইনুকেস্তি পাভলভিচ, ও ছাড়া আর কেউ নয়!' রীতিমতো আত্মপ্রত্যয়ের সঙ্গে পাভেল ডাকল তার বন্ধুকে, আর, একমুহূর্ত বাদেই দেখা গেল—লেদেনেভ বিছানার পাশে এসে দাঁড়িয়ে তার সঙ্গে সোৎসাহে করমর্দন করছে।

'তাহলে করচাগিন দেখছি এখনও চালিয়ে যাচ্ছ, অ্যাং? আচ্ছা, নিজের পক্ষ থেকে কী তোমার বলার আছে বলো দিকি? অসুস্থ হয়ে পড়ে থাকার জন্যে তুমি-যে সত্যিই উঠেপড়ে লেগে গেছ, এমনটা তো নয় নিশ্চয়ই! ওসব চলবে না! আমার উদাহরণটা অনুসরণ করা উচিত তোমার। আমাকেও ডাক্তাররা তাকের উপর তুলে রাখতে চেয়েছিল—কিন্তু ওদের মুখে ছাই দিয়ে এই দিব্যি চালিয়ে যাচ্ছি।' বলতে বলতে ভারি আমোদের হাসি হেসে উঠল লেদেনেভ। কিন্তু এই হাসির আড়ালে প্রচ্ছন্ন সহানুভূতি আর দুঃখটা অনুভব করল পাভেল।

দু-ঘণ্টা প্রাণচঞ্চল কথাবার্তার মধ্যে একসঙ্গে কাটাল তারা। মস্কোর সমস্ত সাম্প্রতিক খবরাখবর পাভেলকে জানাল লেদেনেভ। কৃষিতে যৌথখামারের প্রবর্তন আর গ্রামজীবনকে নতুন করে সংগঠিত করে তোলার ব্যাপারে পার্টি যেসব অভ্যন্তরীণ সিদ্ধান্ত নিয়েছে তার কাছ থেকেই সেগুলো পাভেল এই প্রথম শুনল। গভীর আগ্রহের সঙ্গে লেদেনেভের প্রত্যেকটি কথা যেন মনের মধ্যে গঁথে নিল সে।

'আমি তো এদিকে ভাবছিলাম, তোমার দেশ ইউক্রেনের কোনো জায়গায় গিয়ে হয়তো তুমি উঠেপড়ে কাজে লেগে গেছ,' বলল লেদেনেভ, 'তুমি আমায় হতাশ করলে দেখছি। আচ্ছা, যাক গে। আমার অবস্থা তো আরও খারাপ হয়ে দাঁড়িয়েছিল। ভেবেছিলাম শয্যাশায়ী থাকতে হবে সারাজীবনই, কিন্তু দেখতেই তো পাচ্ছ, এখনও ঝাড়া আছি আমি। ইদানীং আর শাস্তভাবে নিরুপদ্রবে দিন কাটাবার কোনো উপায় নেই। মোটেই চলবে না তাহলে! স্বীকার করতেই হবে : মাঝে মাঝে স্রেফ একটু দম নেবার জন্যে সামান্য দিনকয়েকের মতো জিরিয়ে নিলে যে কী চমৎকার হত, সেই চিন্তাটা আমাকে পেয়ে বসে। আর যাই হোক, আমার তো আর আগেকার মতো ব্যেঙ্গ নেই, দৈনিক দশ থেকে বারো ঘণ্টা করে কাজ করাটা মাঝে মাঝে আমার পক্ষে একটু কঠিন হয়েই দাঁড়ায়। তা, এসব কথা একটু-আধটু ভাবতে ভাবতে বোঝাটাকে একটু হালকা করে নেবার চেষ্টাও করে থাকি মাঝে মাঝে, কিন্তু ফের সেই একই অবস্থা দাঁড়ায়। কখন-যে আবার সেই এক-গলা কাজের মধ্যে ডুবে গিয়ে রাত্রি বারোটার আগে বাড়ি ফেরার ফুরসত পাওয়া যায় না। যন্ত্রটা যতই শক্তিশালী হয়ে উঠছে, তার চাকাগুলোও ততই জোরে ঘোরা শুরু করেছে, আর আমাদের পক্ষে ততই দিন দিন গতিটা বেড়ে চলেছে যাতে কিনা আমাদের এই বুড়ো-বয়েসীদের স্রেফ জোয়ান-বয়েসীদের মতো না-থেকে উপায় নেই।'

উঁচু কপালটার উপরে একবার হাত বুলিয়ে নিয়ে লেদেনেভ পিতৃসুলভ স্নেহের সুরে বলল, 'আচ্ছা, এবার তোমার নিজের কথা বলো।'

লেদেনেভের সঙ্গে তার শেষ দেখা হবার পর যা-যা ঘটেছে, পাভেল তার একটা বিবরণ দিয়ে গেল। বলতে বলতে অনুভব করল তার বন্ধুর সহানুভূতি-ভরা দুই চোখে সমর্থনের চাউনি।

\*

\*

\*

বারান্দাটার এককোণে ডালপালা-ছড়ানো গাছগুলোর ছায়ার নিচে একটা ছোট টেবিলের চারধারে স্বাস্থ্যনিবাসের একদল রোগী বসে আছে। ওদের মধ্যে একজন তার ঘন ভুরুজোড়া কুঁচকে 'প্রাভদা' পড়ছে। তার গায়ে কালো রুশী শার্ট, মাথায় জীর্ণ পুরনো ক্যাপ, বহুকাল না-কামানো রোদে-পোড়া শীর্ণ মুখ আর গভীর গর্তের মধ্যে বসে-যাওয়া নীল চোখ দেখেই বোঝা যায় সে একজন বহুদিনের অভিজ্ঞ খনি-মজুর। বারো বছর হয়ে গেল—খ্রিসানফ্ চের্নকজভ খনির কাজ ছেড়ে এসে একটা গুরুত্বপূর্ণ সরকারি পদে বহাল হয়েছে, কিন্তু তবু তাকে দেখে মনে হয় যেন সে সবে খনির খাদ থেকে বেরিয়ে এসেছে। তার হাবভাব, চলাফেরা, কথা বলার ভঙ্গি—সবকিছুর মধ্যে দিয়ে সুস্পষ্ট হয়ে ওঠে তার পেশাটা।

চের্নকজভ প্রাদেশিক পার্টি ব্যুরোরও সভ্য। একটা যন্ত্রণাদায়ক ব্যাধি তার শক্তি ক্ষয় করে দিচ্ছে : ঘৃণা করে চের্নকজভ তার 'গ্যাংগ্রিন'-দুষ্ট পা-টাকে, যার জন্য সে আজ প্রায় ছ-মাস হতে চলল শয্যাশায়ী হয়ে আছে।

তার সামনে বসে চিন্তাচ্ছন্নভাবে সিগারেটের ধোঁয়া ছাড়ছে ঝিগিরেভা—আলেক্সান্দ্রা আলেক্সেয়েভনা ঝিগিরেভা—সাঁইত্রিশ বছরের এই মহিলাটি উনিশ বছর ধরে পার্টি-সভ্য। পিটার্সবুর্গের গুপ্ত-আন্দোলনের কমরেডরা তার নাম দিয়েছিল—'ধাতু-মজুরনী তরোচ্কা'। সাইবেরিয়ায় যখন সে নির্বাসিত হয়, তখন সে ছিল প্রায় বালিকা-বয়সী।

এই দলের তিন-নম্বর সভ্য পানকভ। পাশের দিক থেকে দেখতে যেন খোদাই-করা তার মুখখানা। তার সুন্দর চুলঅলা মাথাটা ঝুঁকে পড়েছে একটা জার্মান পত্রিকার উপরে। শিশুর ফ্রেমঅলা তার বিরাট চশমাটা ঠিকমতো বসিয়ে নেবার জন্য মাঝে মাঝে সে হাত তুলছে। ত্রিশ বছর-বয়সী, ব্যায়ামবিদের মতো সুগঠিত-দেহ এই যুবকটি যখন পক্ষাঘাতে আড়ষ্ট তার পা-টা টেনে-টেনে চলাফেরা করে তা তখন দেখে কষ্ট হয়। পানকভ একজন লেখক এবং সম্পাদক, শিক্ষার জন-কমিশারিয়েটে কাজ করে। সে ইউরোপ সম্বন্ধে একজন বিশেষজ্ঞ এবং গোটাকতক বিদেশী ভাষা জানে। ক্রীতিমতো পণ্ডিত লোক সে—এমনকি, গভীর প্রকৃতির চের্নকজভ পর্যন্ত তাকে খুব সমীহ করে চলে।

'এই বৃষ্টি তোমার ঘরের সঙ্গী?' পাভেল করচাগিন যে-চাকাঅলা চেয়ারটায় বসে আছে, সেদিকে মাথা নেড়ে ফিসফিসিয়ে ঝিগিরেভা জিজ্ঞেস করল চের্নকজভকে।

চের্নকজভ খবরের কাগজটা থেকে মুখ তুলে তাকাল এবং সঙ্গে সঙ্গে তার কুঁচকানো ভুরুজোড়া মসৃণ হয়ে গেল, 'হ্যাঁ, ওই করচাগিন। ওর সঙ্গে আলাপ করে নিন, শুরা। রোগ ওকে ভারি কাবু করে ফেলেছে—বড় স্কোভের কথা। তা নইলে ছেলেটা খুব শক্ত-শক্ত জায়গায় আমাদের খুবই কাজে লাগতে পারত। কমসমোলের

একেবারে গোড়ার দলেও ও একজন। আমার দৃঢ় বিশ্বাস, ওকে যদি আমরা সাহায্য করি—এবং সে সাহায্য আমি ওকে করব বলেই মনস্থ করেছি—তাহলে ও এখনও কাজের উপযুক্ত হয়ে উঠবে।’

পানকডও তখন ছিল চেরুনকজ্জের কথাগুলো।

‘ওর অসুখটা কী?’ কোমল গলায় জিজ্ঞেস করল ওরা ঝিগিরেভা।

‘গৃহস্থের সময়কার জের আর কী। মেরুদণ্ডের কী একটা ব্যাধি। আমি এখানকার ডাক্তারকে জিজ্ঞেস করেছিলাম, তিনি তো বললেন ওর সম্পূর্ণ পক্ষাঘাতগ্রস্ত হয়ে পড়ার সম্ভাবনা। বেচারি!’

ওরা বলল, ‘আমি গিয়ে ওকে নিয়ে আসি এখানে।’

এইভাবে ওদের বন্ধুত্বের সূত্রপাত হল। পাভেল তখন জানত না যে ঝিগিরেভা আর চেরুনকজ্জ তার অত্যন্ত প্রিয় বন্ধু হয়ে উঠবে এবং ব্যাধির ভারে আক্রান্ত তার ভবিষ্যৎ জীবনে এরাই হবে তার প্রধান অবলম্বন।

\*

\*

\*

আগেকার মতোই বয়ে চলেছে জীবনের স্রোত। তাইয়া কাজ করছে আর পাভেল পড়াশোনা করে চলেছে। পাঠচক্রগুলোর কাজটা শুরু করামাত্রই আরেকটা নিদারুণ বিপত্তি এসে তাকে অতর্কিতে আক্রমণ করে বসল। তার দুটো পা-ই সম্পূর্ণ পক্ষাঘাতগ্রস্ত হয়ে গেল। এখন শুধু ডানহাতখানাই সে ইচ্ছামতো নাড়াচাড়া করতে পারবে। বারবার চেষ্টা করার পর যখন সে বুঝল যে তার আর নড়াচড়া করার ক্ষমতা নেই, তখন ঠোঁট কামড়ে রক্ত বের করে ফেলল। তাইয়া যে পাভেলকে সাহায্য করতে অক্ষম, এই কথাটা মনে হতেই তাইয়া হতাশা-মেশানো তীব্র একটা ক্ষোভ অনুভব করল, কিন্তু বীরত্বের সঙ্গে এই হতাশা আর বিক্ষোভটাকে চেপে গেল। পাভেল ক্ষমা চাওয়ার ভঙ্গিতে হেসে বলল, ‘এবারে আমাদের ভিন্ন হয়ে যেতে হবে, লক্ষ্মীটি। আমাদের চুক্তির মধ্যে আর-যাই থাক, এটা তো আর ছিল না। কথাটা আজ আমি একবার ভালো করে ভেবে দেখব।’

কিন্তু তাইয়া তাকে আর কোনো কথা বলতে দেবে না। চোখের জল আর চেপে রাখতে না-পেরে পাভেলের বুকে মুখ গুঁজে কান্নার আবেগে ভেঙে পড়ল সে।

\*

\*

\*

আরতিওম তার ভাইয়ের এই সাম্প্রতিকতম বিপত্তির কথাটা জানতে পেরে মাকে চিঠি লিখল। মারিয়া ইয়াকোভলেভনা সবকিছু ফেলে রেখে সঙ্গে সঙ্গে চলে এল ছেলের কাছে। এখন থেকে তারা তিনজনে একসঙ্গে থাকতে লাগল। তাইয়া এবং এই বৃদ্ধাটি প্রথম থেকেই পরস্পরকে ভালোবাসার সঙ্গে গ্রহণ করেছে।

সমস্ত রোগযন্ত্রণা সত্ত্বেও পাভেল এরই মধ্যে তার পড়াশোনা চালিয়ে যাচ্ছে।

দুর্যোগপূর্ণ এক শীতের সন্ধ্যায় তাইয়া বাড়ি ফিরে এল তার প্রথম জয়ের খবর নিয়ে : শহর-সোভিয়েতে নির্বাচিত হয়েছে সে। এরপর থেকে পাভেল খুব কমই তার দেখা পায়। স্বাস্থ্যনিবাসের রান্নাঘরে তাইয়া কাজ করে, সেখানে তার সারাদিনের

কাজের শেষে সোজা সে যায় শহর-সোভিয়েতের দপ্তরে, আর অনেক রাতে ফিরে আসে ক্লান্ত হয়ে, কিন্তু অনেককিছু নতুন ধারণা মাথায় নিয়ে। শিগগিরই সে পার্টির সভ্যপদপ্রার্থী হিশেবে দরখাস্ত করবে এবং সেই বহুপ্রতীক্ষিত দিনটির জন্য আশ্রহভরা আশা নিয়ে সে প্রস্তুত হচ্ছে।

এমন সময়ে দূরদৃষ্ট আরেকটা আঘাত হানল। পাভেলের ক্রমবর্ধমান রোগটা ধীরে ধীরে তার কাজ চালিয়ে আসছিল। হঠাৎ একটা অসহ্য জ্বালা-ধরানো যন্ত্রণা তার ডান চোখটাকে যেন ছুঁচ দিয়ে বিধতে লাগল। বাঁ-চোখের কাছ পর্যন্ত যন্ত্রণাটা দ্রুত ছড়িয়ে পড়তে থাকল। চারপাশের সমস্ত কিছুকে আড়াল করে দিয়ে একটা কালো পর্দা নেমে এল এবং পরিপূর্ণ দৃষ্টিহীনতার ভীষণতা পাভেল জানল জীবনে এই প্রথম।

নিঃশব্দে এই নতুন বাধাটা এসে তার পথ রুখে দাঁড়িয়েছে—অলঙ্ঘনীয় ভয়ঙ্কর এ বাধা। এই ব্যাপারটা তাইয়াকে আর মাকে নিদারুণ হতাশায় আচ্ছন্ন করে দিল। কিন্তু পাভেল তুহিন-শীতল একটা শান্ত মনোভাব নিয়ে সিদ্ধান্ত গ্রহণ করল, ‘আমাকে অপেক্ষা করে থেকে দেখে যেতে হবে শেষপর্যন্ত কী ঘটে। সত্যিই যদি আর এগুবার কোনো সম্ভাবনা না-থাকে, কর্মীদের মধ্যে ফিরে যাবার জন্য আমার সমস্ত চেষ্টা যদি এই দৃষ্টিহীনতার ফলে ব্যর্থ হয়ে গিয়ে থাকে, তাহলে এই সবকিছু চুকিয়ে ফেলতেই হবে আমায়।’

পাভেল তার বন্ধুদের চিঠি লিখল, আর জবাবে তারা তাকে উৎসাহ জোগাল সাহসের সঙ্গে লড়াই চালিয়ে যাবার জন্য।

এই নিদারুণ লড়াইটা চলতে থাকার সময়ে একদিন তাইয়া বাড়ি ফিরে এসে উজ্জ্বল-মুখে ঘোষণা করল, ‘আমি এখন পার্টির সভ্যপদপ্রার্থী, পাভলুশা।’

যে মিটিঙে তার দরখাস্ত মঞ্জুর হয়েছে, সেই আলোচনা-বৈঠকের একটা উদ্বেজিত বিবরণ দিয়ে গেল তাইয়া—‘গুনতে গুনতে পাভেলের মনে পড়ল পার্টির ভেতরে তার নিজের প্রথম পদক্ষেপের কথাটা।’

তাইয়ার হাতখানা জোরে চেপে ধরে সে বলল, ‘তাহলে, কমরেড করচাগিনা, তুমি আর আমি দু’জনে এখন থেকে একটা ‘পার্টি ফ্র্যাকশন’ হলাম।’

পরের দিন পাভেল জেলা পার্টি-কমিটির সম্পাদককে একটা চিঠি লিখল—সে যেন একবার এসে তার সঙ্গে দেখা করে।

সেইদিনই বিকেলের দিকে সর্বান্তে কাদার ছিটে-লাগা একটা গাড়ি বাড়িটার বাইরে এসে থামল এবং এক মিনিট বাদেই দেখা গেল জেলা পার্টি-কমিটির সম্পাদক ভোল্‌মের পাভেলের হাত ধরে ঝাঁকুনি দিচ্ছে। মাঝবয়েসী একজন লাভভিয়ান এই ভোল্‌মের, আকর্ষণ-বিস্তৃত তার দাড়ি।

‘আচ্ছা, আছ কেমন? তোমার এরকম ব্যবহারের মানেটা কী, অ্যা? ঝাড়া হয়ে যাও দেখি, আমরা তোমায় একুনি গ্রামের দিকে কাজ করার জন্যে পাঠিয়ে দিচ্ছি,’ হালকা হাসির সঙ্গে সে বলে উঠল।

তার-যে একটা সভায় উপস্থিত থাকার কথা, সেটা একদম ভুলে গিয়ে দু-ঘণ্টা রইল সে পাভেলের কাছে। কাজ পাবার জন্য পাভেলের আবেগদীপ্ত আবেদন গুনতে গুনতে সে ঘরটায় পায়চারি করল।

পাভেলের বলা শেষ হয়ে গেলে সে বলল, 'পাঠচক্রের কথা-টখা এখন বন্ধ করো। বিশ্রাম নিতে হবে তোমাকে। আর, তোমার ওই চোখ সন্ধ্যাে একটা ব্যবস্থা করতেই হবে আমাদের। এখনও হয়তো কিছু-একটা করা সম্ভব। মস্কোতে গিয়ে কোনো বিশেষজ্ঞ চোখের ডাক্তারকে দেখালে কেমন হয়? তুমি ভেবে দেখো এটা...'

তার কথায় বাধা দিল পাভেল, 'আমি চাই মানুষের মধ্যে থাকতে, কমরেড ভোলমের, রক্তমাংসে গড়া মানুষদের মধ্যে! আগের চেয়ে এখনই এটা আমার আরও বেশি দরকার। একা-একা থাকতে পারব না আমি। আমার কাছে পাঠিয়ে দাও তরুণদের, যাদের অভিজ্ঞতা সবচেয়ে কম। গ্রামে গ্রামে ওরা একটু বেশিরকম বাঁয়ে ঝুঁকছে—যৌথখামারের পরিধি যথেষ্ট নয় মনে করে ওরা কমিউন সংগঠিত করে তুলতে চাচ্ছে। কমসমোলদের জানো তো, ওদের যদি না-সামলাও, তাহলে সারি ভেঙে ছুটে অতিরিক্ত এগিয়ে যেতে চাইবে ওরা। আমি নিজেই এইরকম ছিলাম এককালে।'

ভোলমের তাকে থামিয়ে দিয়ে জিজ্ঞেস করল, 'তুমি এসব খবর জানলে কী করে? সবে তো আজ ওরা জেলা থেকে খবর এনেছে।'

হাসল পাভেল, 'আমার স্ত্রী বলেছে। তোমার বোধহয় মনে আছে তাকে? গতকাল তাকে পার্টির সভ্যপদপ্রার্থী হিসেবে মনোনীত করা হয়েছে।'

'করচাগিনার কথা বলছ নাকি—ওই-যে ডিশ্‌ ধোয়, সেই মেয়েটি? তোমার স্ত্রী! তা তো জানতাম না!' দু-এক মুহূর্ত চুপ করে রইল সে. তারপর মাথায় হঠাৎ একটা চিন্তা খেলে যেতেই কপালের উপরে একটা চাপড় মেরে বলল, 'আচ্ছা, কাকে তোমার কাছে পাঠাব, বলি শোনো : লেভ বের্সেনেভ। ওর চেয়ে ভালো কমরেডের সঙ্গ কামনা আর করতে পারবে না তুমি। ও একেবারে তোমার মনের মতো মানুষ, তোমরা হাই-ফ্রিকোয়েন্সি দুটো ট্রান্সফর্মারের মতো। এককালে আমি ইলেকট্রিশিয়ান ছিলাম জানো, তাই প্রায়ই এই বিশেষ-বিশেষ শব্দ বলি। লেভ তোমার জন্যে একটা রেডিও-সেট বানিয়ে দেবে—ও এসব কাজে খুব ওস্তাদ। আমি তো ওর ওখানে প্রায়ই রাত্রি দুটো পর্যন্ত কানে ওই ইয়ার-ফোন লাগিয়ে বসে থাকি। আমার স্ত্রী শেষপর্যন্ত সত্যি সন্দেহ করতে শুরু করে দিয়েছিল—ওই অত রাতে বাড়ি ফেরার মানেটা কী, সে-সম্বন্ধে কৈফিয়ত দাবি করে বসেছিল।'

হাসল করচাগিন।

'বের্সেনেভ কে?' জিজ্ঞেস করল সে।

পায়চারি থামিয়ে বসে পড়ল ভোলমের, 'ও আমাদের একজন উকিল। কিন্তু আসলে, এই আমি যেমন ব্যালে-নাচিয়ে ও তেমনি উকিল। মাত্র কিছুদিন আগে পর্যন্ত ও একটা গুরুত্বপূর্ণ পদে বহাল ছিল। ১৯১২ থেকে বৈপ্লবিক আন্দোলনের মধ্যে আছে, অক্টোবর-বিপ্লবের সময় থেকে পার্টি-সভা। গৃহযুদ্ধের সময় দু-নম্বর ঘোড়সওয়ার আর্মির বিপ্লবী আদালতে কাজ করেছে, তখন ককেশাসে শ্বেতরক্ষী পরজীবীদের খতম করা হচ্ছিল। ও আবার সারিথসিনেও, দক্ষিণ যুদ্ধফ্রন্টেও। তারপর কিছুদিন দূরপ্রাচ্য প্রজাতন্ত্রের সর্বোচ্চ সামরিক আদালতের সভাপতি হল। ওখানে ও ছিল বড় কষ্টের মধ্যে। শেষপর্যন্ত যন্ত্রায় ধরে ওকে। দূরপ্রাচ্যের কাজ ছেড়ে এখানে এই ককেশাসে চলে আসে। প্রথমে ও প্রাদেশিক আদালতের সভাপতি হিসেবে,



তারপর প্রাদেশিক আদালতের সহ-সভাপতি হিশেবে কাজে লাগে। তারপর ফুসফুসের রোগ একেবারে কাবু করে ফেলল ওকে। ব্যাপার দাঁড়াল—হয় ওকে এখানে এসে চুপচাপ বিশ্রাম নিতে হবে, আর নাহয় পঞ্চত্ব পেতে হবে। অতএব এইভাবে আমরা এমন একজন বিশিষ্ট উকিল পেয়ে গেছি। কাজটিও বেশ দিব্যি নির্বাণাট ধরনের—ওর পক্ষে সবচেয়ে উপযুক্ত কাজ। যাই হোক, এখানকার লোকে তো ক্রমে ক্রমে ওকে টেনে আনল একটা ফ্রপের মধ্যে। তারপরেই ও জেলা কমিটিতে নির্বাচিত হয়ে গেল, একটা রাজনীতিক ইকুলের ভার দিল ওকে, তারপর নিয়ন্ত্রণ কমিশনেও এনে বসিয়ে দিয়েছে। যে কোনো গোলমালে ব্যাপারে ফয়সালা করার জন্যে গুরুত্বপূর্ণ কোনো কমিশন নিযুক্ত হলেই ও সেইসব কমিশনের অবধারিত সভ্য। এইসব ছাড়াও, ও আবার শিকারে বেরোয়, দারুণ রেডিও-বাতিক্রম এবং ওর-যে মাত্র একটা ফুসফুস, তুমি ওকে দেখে সেটা বিশ্বাসই করতে পারবে না। প্রচণ্ড উদ্যমে একেবারে ফেটে পড়ছে। ও যদি মারা যায়, তাহলে নিশ্চয় জেলা কমিটি থেকে আদালতে যাবার পথের মাঝখানে কোথাও মারা পড়বে।

ভোলমেরকে খামিয়ে দিয়ে পাভেল তীক্ষ্ণস্বরে জিজ্ঞেস করল, 'এভাবে এতগুলো বোঝা তোমরা ওঁর ঘাড়ে চাপিয়েছ কেন? উনি তাহলে তো এখানে এসে আগের চেয়ে বেশিই কাজ করছেন!'

দুট্টমি-ভরা চোখে ভোলমের তাকাল তার দিকে, 'আরে, আমি যদি তোমাকে একটা পাঠচক্রের আর অন্য কিছু-একটা কাজের ভার দিই, তাহলে লেভ বের্সেনেভও ঠিক এইরকমই এসে বলবে, 'এতগুলো বোঝা কি করচাগিনের ঘাড়ে না-চাপালেই নয়?' কিন্তু নিজের বেলায় ও বলে, পাঁচ বছর হাসপাতালে চিৎ হয়ে শুয়ে থাকার চেয়ে একবছর খুব জোরদার রকমের কাজ চালিয়ে যাওয়াটা ওর ঢের পছন্দসই। দেখে শুনে তো মনে হচ্ছে, সমাজতন্ত্র গড়ে-তোলার আগে আর আমাদের নিজেদের লোকজনদের সম্বন্ধে ঠিকমতো নজর দিয়ে উঠতে পারব না।'

'কথাটা ঠিক—আমিও পাঁচবছরের বন্ধতার চেয়ে একবছরের সক্রিয় জীবন ঢের বেশি বাঞ্ছনীয় বলে মনে করি। কিন্তু মাঝে মাঝে আমরা অত্যন্ত অন্যায়রকমে আমাদের শক্তির অপচয় ঘটাই। এখন আমি বুঝি যে, এটা বীরত্বের লক্ষণ ততটা নয় যতটা স্বতঃস্ফূর্ততা আর দায়িত্বজ্ঞানহীনতার লক্ষণ। এখন এই এতদিনে আমি বুঝতে শুরু করেছি যে, নিজের স্বাস্থ্য সম্বন্ধে এমন নির্বোধের মতো অসাবধান হবার কোনো অধিকারই আমার ছিল না। এখন দেখতে পাচ্ছি যে তার মধ্যে বীরত্বের কিছুই নেই। ওই ড্রাগ আয়োৎসর্গের ধারণাটা যদি আমার মাথায় না-ধাকত, তাহলে আরো গোটাকতক বছর বেশি টিকতে পারতাম। অর্থাৎ, বামপন্থার শিশুরোগ আমার একটা প্রধান বিপদ।'

'এখন এইসব কথা ও বলছে বটে', মনে-মনে ভাবল ভোলমের, 'কিন্তু পায়ের উপর একবার খাড়া হয়ে দাঁড়াতে দাও, দেখবে কাজ ছাড়া আর সবকিছুই ভুলে গেছে ছেলেটা।' কিন্তু মুখে কিছু বলল না সে।

পরের দিন বিকেলে লেভ বের্সেনেভ এল। মাঝরাাত্রি হয়ে গেল তার পাভেলের কাছ থেকে বিদায় নিতে। বহু বছর আগের হারানো ভাইটিকে ফিরে পেয়েছে—এরকম একটা মনোভাব নিয়ে সেদিন রাতে নিজের ঘরে ফিরল সে।

পরের দিন সকালে করচাগিনের ঘরের ছাদে বেতারের এরিয়েলের খুঁটি আর তার লাগানো হল। ঘরের মধ্যে তখন লেভ তার অতীতজীবনের নানান কৌতূহল-জাগানো ঘটনার কাহিনী পাভেলকে বলতে বলতে রিসিডিং-সেটটা ঠিকঠাক করতে ব্যস্ত। পাভেল তাকে দেখতে পায় না, কিন্তু তাইয়া তার যে-বর্ণনা দিয়েছে, তার থেকে পাভেল তার চেহারাটা বুঝে নিয়েছে—লম্বা, সোনালি চুলঅলা, নীল-চোখ যুবক এই লেভ, তার চলন-বলনের মধ্যে একটা উদ্বেজনা-চালিত ভঙ্গি আছে—লেভ-এর সঙ্গে প্রথম আলাপের মুহূর্তে পাভেল তার হৃৎ এইরকম চেহারার কল্পনাই করেছিল।

সন্ধ্যা আসতে ঘরে তিনটে ছোট ছোট ভাল্ভ মৃদু আলোয় জ্বলতে থাকল। বিজয়ীর ভঙ্গিতে লেভ পাভেলের হাতে তুলে দিল ইয়ার-ফোন। এলোমেলো সব বিশৃঙ্খল আওয়াজে ভরে উঠেছে ঈশ্বর। বন্দরের ট্রান্সমিটার থেকে কিচিরমিচির একটা আওয়াজ আসছে একদল পাখির চঁচামেচির মতো। সমুদ্রের উপরে কাছাকাছি কোনো জাহাজের বেতার থেকে বেরিয়ে আসছে ফুটকি আর ড্যাশ-চিহ্নের স্রোত। কিন্তু এই সমস্ত গোলমাল আর আওয়াজগুলো পরস্পরের সঙ্গে মিলেমিশে গিয়ে যে-ঘূর্ণির সৃষ্টি করেছে, তার মধ্যে থেকে টিউনিং কয়েলটি বাছাই করে নিল একটা আত্মপ্রত্যয়-ভরা প্রশান্ত গলা, তারপর কয়েলটি সেইখানেই স্থির হয়ে রইল :

‘মস্কো রেডিও থেকে বলছি...’

ছোট এই রেডিও-সেটটা পৃথিবীর বিভিন্ন জায়গার ষাটটা বেতার-কেন্দ্রকে পাভেলের নাগালের মধ্যে এনে দিয়েছে। যে-জীবন থেকে সে বিচ্ছিন্ন হয়ে পড়েছে সেটা আবার তার কাছে এসে পড়ল এই ইয়ার-ফোনের পাতলা পর্দার মধ্যে দিয়ে। পাভেল আবার অনুভব করতে পারছে সেই বৃহত্তর জগতের নাড়ির বলিষ্ঠ গতিচাঞ্চল্য।

পাভেলের চোখে আনন্দের দীপ্তি ফুটে উঠতে দেখে ক্রান্ত বের্সেনেভ তৃপ্তির হাসি হাসল।

\*

\*

\*

মস্তবড় বাড়িটা নিস্তব্ধ হয়ে আছে। ঘুমের ঘোরে এপাশ-ওপাশ করতে করতে কী যেন বিড়বিড়িয়ে বলল তাইয়া। পাভেল আজকাল খুব কমই তার স্ত্রীর দেখা পায়। অনেক রাত্রে ক্রান্ত হয়ে শীতে কাঁপতে কাঁপতে বাড়ি ফেরে সে। কাজের পেছনে ক্রমশই বেশি করে সময় দিতে হচ্ছে তাকে এবং বিকেলের দিকে ইদানীং সে ফুরসত পায় কুচিং কখনও। এ-সম্বন্ধে বের্সেনেভের কথাটা মনে পড়ে পাভেলের, ‘কোনো বলশেভিকের বউটিও যদি পার্টি-কমরেড হয়, তাহলে তাদের দু’জনের মধ্যে দেখাশোনাটা খুব বিরল হয়ে দাঁড়ায়। কিন্তু এর দুটো সুবিধের দিক আছে : পরস্পরের কাছে তারা কোনোদিন একঘেয়ে হয়ে উঠবে না, ঝগড়া করারও সময় হবে না তাদের!’

সত্যিই তো, সে আপত্তি করবে কী করে? এছাড়া আর কীই বা আশা করতে পারত সে? একসময়ে তাইয়ার বিকেলগুলি ছিল পাভেলেরই জন্য। তখন তাদের সম্পর্কটা

ছিল আরও নিবিড়, আরও বেশি স্নেহের মাধুর্যে ভরা। কিন্তু তখন তাইয়া ছিল শুধু স্ত্রী, পাভেলের সঙ্গিনী মাত্র; এখন সে তার ছাত্রী এবং পার্টি-কমরেড।

সে জানে, তাইয়া যতই রাজনীতির দিক থেকে সুপরিণত হয়ে উঠবে, পাভেলের জন্য সে ততই কম সময় দিতে পারবে। তাই যা অনিবার্য সেটা মেনে নিয়েছে পাভেল।

একটা পাঠ্যক্রম পরিচালনার কাজ তাকে দেওয়া হয়েছে, বিকেলের দিকে আবার তার ঘরখানা ভরে উঠছে নানা কঠোর মিলিত আওয়াজের গুঞ্জনধ্বনিতে। তরুণদের সঙ্গে এই কয়েক ঘণ্টা কাটানোর ফলে পাভেল নতুন উদ্যম আর প্রাণশক্তিতে ভরপুর হয়ে ওঠে।

বাকি সময়টা তার কাটে রেডিও শুনে। খাবার সময়ে তার ইয়ার-ফোন কান থেকে খুলে নেবার জন্য মাকে বড় মুশকিলেই পড়তে হয়।

অন্ধ হয়ে যাবার ফলে সে যা হারিয়েছিল, এই রেডিওটা আবার তাকে সেই জ্ঞান-আহরণের সুযোগটুকু ফিরিয়ে দিয়েছে। দেহে তার নিদারুণ যন্ত্রণা; দুই চোখে তীব্র জ্বালা-ধরা বেদনা; নির্মম দূরদৃষ্ট তার ওপরে চাপিয়ে দিয়েছে কঠোর বোঝা—কিন্তু জ্ঞানসঞ্চয়ের সর্বগ্রাসী কামনা তাকে এই সবকিছুই ভুলে থাকতে সাহায্য করেছে।

রেডিওটা যখন মাগনিতোস্কোপ-এর খবরে সেখানকার কমসমোল সভ্যদের বীর-কৃতিত্বের বিবরণ দিয়ে গেল, তখন আনন্দে ভরে উঠল পাভেলের বুক। এই তরুণ কমিউনিস্টরা সব পাভেলদের পরবর্তী দলের ছেলেমেয়ে।

নির্মম তুষার-ঝড় আর একপাল ক্ষুধার্ত নেকড়েবাঘের মতো ভয়ঙ্কর সেই ঠাণ্ডায় জমে-যাওয়া উরালের মাটি—দৃশ্যটাকে কল্পনা করতে লাগল পাভেল। বাতাসের গর্জন তার কানে বাজতে লাগল, আর চোখের সামনে ফুটে উঠল তুষার-ঝড়ে-পড়া ঘূর্ণির মধ্যে একদল কমসমোল তরুণ—যারা তার পরে জন্মেছে—বিরাট বিরাট কারখানা-বাড়িগুলোর ছাদে আর্ক-ল্যাম্পের আলোয় জানলায় জানলায় শার্সি লাগাচ্ছে, প্রথম দফার বড় বড় দামি যন্ত্রপাতিগুলো তুষার-ঝড় আর বরফের আক্রমণ থেকে বাঁচাবার জন্য। এর তুলনায়, তাদের প্রথমদলের সেই কিয়েভের কমসমোল তরুণদের বনের মধ্যে রেলপথ তৈরির কাজে ঝড়-জল-তুষারপাতের বিরুদ্ধে লড়াইয়ের ব্যাপারটা কত তুচ্ছ বলে মনে হয়! দেশ ক্রমশই বড় হয়ে উঠছে, আর সেইসঙ্গে দেশের মানুষগুলোও।

ওদিকে নীপারের জলস্রোত লোহার বাঁধ ভেঙে বেরিয়ে ভাসিয়ে নিয়ে গেছে মানুষ আর যন্ত্রপাতি। এবং আরেকবার সেখানেও কমসমোল তরুণরা ঝাপিয়ে পড়েছে বাঁধের ফাটল ঝুখবার জন্য—দু-দিন ধরে প্রচণ্ড লড়াইয়ের পর তারা সেই দুর্দমনীয় স্রোতের তোড়কে ফের বাগ মানিয়েছে। পাভেলের পরবর্তী নতুন একদল কমসমোল তরুণ এগিয়ে চলেছে এই বিরাট সংগ্রামের পুরোভাগে। এবং এই বীরদলের নামের তালিকায় পাভেল শুনে আনন্দ পেল তার পুরনো কমরেড ইগনাৎ পানক্রাতভের নাম।

মন্ডায় এসে প্রথম কয়েকটা দিন ওরা রইল এক দণ্ডের মহাফেজখানার একটা ভাঁড়ার ঘরে। এই দণ্ডের কর্তা পাভেলকে বিশেষ একটা ক্রিনিকে ভর্তি করার জন্য ব্যবস্থা করছিল।

এতদিনে পাভেল উপলব্ধি করেছে—যখন সে তরুণ ছিল আর তার শরীর শক্ত ছিল, তখন তার পক্ষে বীরত্ব দেখানো ছিল অপেক্ষাকৃত সহজ। কিন্তু এখন যখন জীবন তাকে লোহার মতো শক্ত মুঠোয় চেপে ধরেছে, তখন কোট বজায় রাখাটা একটা সম্মানের ব্যাপার হয়ে দাঁড়িয়েছে।

\*

\*

\*

দেড় বছর হল পাভেল করচাগিন মন্ডায় এসেছে। অবর্ণনীয় যন্ত্রণায় ভরা আঠারোটি মাস।

চক্ষু-চিকিৎসাগারের অধ্যাপক আভেরবাখ পাভেলকে খোলাখুলিই জানিয়ে দিয়েছেন যে তার আর দৃষ্টিশক্তি ফিরে পাবার কোনো আশা নেই। ভবিষ্যতে কোনো সময়ে প্রদাহটা কমে গেলে, চোখের তারার উপরে অস্ত্রোপচার করা সম্ভব হতে পারে। ইতিমধ্যে, প্রদাহটা বন্ধ করার জন্য তিনি একটা অস্ত্রোপচার করার পরামর্শ দিয়েছেন।

পাভেলের মত আছে কিনা জানতে চাইলেন তাঁরা। পাভেল ডাক্তারদের বলল, যা যা করা দরকার বলে তাঁরা মনে করেন সবই করতে পারেন।

একনাগাড়ে ঘণ্টার পর ঘণ্টা শুয়ে রইল সে অস্ত্রোপচারের টেবিলের উপরে, তার গলার মধ্যে ছুরির ফলাটা বারবার খুঁজে ফিরল প্যারাথাইরয়েড গ্রন্থিটা এবং তিনবার মৃত্যুর কালো ডানার ঝাপটা অনুভব করল সে। কিন্তু নাছোড়বান্দার জেদ নিয়ে পাভেল আঁকড়ে ধরে রইল জীবনকে এবং ঘণ্টার-পর-ঘণ্টা ধরে দুঃসহ উৎকর্ষা ভোগ করার পর তাইয়া তার প্রিয়তমকে দেখতে পেল—মড়ার মতো বিবর্ণ তার মুখ, কিন্তু বেঁচে আছে সে, আর বরাবরের মতোই শান্ত আর ধীর।

‘কিছু ভেবো না, লক্ষ্মীটি, আমাকে মেরে ফেলাটা এত সহজ নয়। আর কিছু না হলেও অন্তত এইসব বিজ্ঞ ডাক্তারের হিশেবগুলোকে ভুল করে দেবার জন্যেও আমি বেঁচে থাকব, আর যতটা পারি শোরগোল তুলে দেব। এঁরা আমার স্বাস্থ্য সম্বন্ধে যা যা বলছেন, সবই সত্যি। কিন্তু যখন এঁরা আমাকে কাজের সম্পূর্ণ অনুপযুক্ত বলে রায় দেবার চেষ্টা করছেন, তখনই এঁদের মন্তব্য ভুল হচ্ছে। এখনও আমি এঁদের দেখিয়ে দেব।’

নতুন জীবনের নির্মাতা যারা, সেই কর্মীদের মধ্যে ফিরে গিয়ে নিজের জায়গায় দাঁড়ানো সম্বন্ধে পাভেল কৃতসংকল্প। কী করতে হবে, তা সে এখন জানে।

\*

\*

\*

শীত কেটে গেছে, খোলা জানলা দিয়ে ঘরের মধ্যে ঢুকে পড়েছে বসন্তের জোয়ার। আরেকটা অস্ত্রোপচার সামলে ওঠার পর পাভেলের শরীরটা খুব দুর্বল, কিন্তু তা সত্ত্বেও

সে আর হাসপাতালে থাকবে না বলে মনস্থির করে ফেলেছে। রোগ-যন্ত্রণাবিদ্ধ মানবতার এই দৃশ্যের মধ্যে থাকা, চারিদিকে মৃত্যুব্যাধিগ্রস্ত মানুষের গোষ্ঠানি আর বিলাপের মধ্যে এই এত মাস ধরে থাকা—এটা নিজের যন্ত্রণা সহ্য করার চেয়েও তার পক্ষে ঢের বেশি অসহ্য হয়ে উঠছে।

তাই, যখন আরেকটা অস্ত্রোপচারের জন্য তার কাছে প্রস্তাব করা হল, সে মত না দিয়ে দৃঢ় আর কঠোরভাবে বলল, 'না, যথেষ্ট হয়েছে। যথেষ্ট রক্ত আমি ঢেলেছি বিজ্ঞানের জন্যে। যেটুকু অবশিষ্ট রয়েছে, সেটুকু আমি অন্যভাবে ব্যবহার করতে চাই।'

সেইদিন পাভেল কেন্দ্রীয় কমিটির কাছে একটা চিঠি লিখে জানাল যে, এখন তার আর চিকিৎসার সন্ধানে এখানে-ওখানে ঘুরে বেড়িয়ে কোনো লাভ নেই, সে মস্কোতেই থাকতে চায়—তার স্ত্রী এখন মস্কোতেই কাজ করছে। এই প্রথম পাভেল পার্টির কাছে সাহায্য চাইল। তার অনুরোধ রাখা হল—মস্কো সোভিয়েত তার থাকার জন্য একটা বাসার বন্দোবস্ত করে দিল। হাসপাতাল থেকে চলে আসার সময়ে সে শুধু একান্ত-মনে কামনা করল যেন এখানে আর তাকে ফিরে আসতে না হয়।

ঋণোত্তীর্ণতায় স্টিট থেকে বেরিয়ে গেছে যে ছোট নিরিবিলা গলিটা, তারই ওপরে অনাড়ম্বর এই ছোট ঘরখানা পাভেলের কাছে যেন মস্তবড় একটা বিলাস। প্রায়ই রাতে ঘুম ভেঙে জেগে-ওঠার পর পাভেলের পক্ষে বিশ্বাস করা কঠিন হয়ে পড়ে যে তার পক্ষে হাসপাতালটা সত্যিই হয়ে দাঁড়িয়েছে একটা অতীতের জিনিশ।

তাইয়া ইতিমধ্যে হয়ে উঠেছে পুরোদস্তুর পার্টি-সভ্য। চমৎকার কর্মী সে, এবং তার ব্যক্তিগত জীবনের এই মর্যাদাসিক পরিস্থিতি সত্ত্বেও সে তার কারখানার সবচেয়ে ভালো কর্মীদের চেয়ে মোটেই পিছিয়ে নেই। অল্পদিনের মধ্যেই তাইয়ার সহকর্মীরা তাকে কারখানার ট্রেড ইউনিয়ন কমিটির সভ্য নির্বাচিত করে এই শাস্ত্র প্রকৃতির অল্পভাষী মেয়েটির প্রতি তাদের শ্রদ্ধা প্রদর্শন করল। তার স্ত্রী যে ঋমশই একজন যথার্থ বলশেভিক হয়ে উঠেছে—এই গর্ববোধ পাভেলের যন্ত্রণা সইবার ক্ষমতাকে আরও খানিকটা বাড়িয়ে দিল।

\*

\*

\*

বাঝানোভা একটা কাজে মস্কোয় এসে তার সঙ্গে দেখা করতে এল। অনেকক্ষণ ধরে কথাবার্তা বলল তারা। অদূর-ভবিষ্যতে তার সংগ্রামী কর্মীদের মধ্যে ফিরে আসার পরিকল্পনার কথাটা বাঝানোভাকে বলতে বলতে প্রাণবন্ত হয়ে উঠল পাভেল।

তার রগের চুলে রূপোলি রঙ ধরেছে লক্ষ করে কোমল গলায় বাঝানোভা বলল, 'অনেক কিছু আপনাকে সইতে হয়েছে, দেখছি। কিন্তু তা সত্ত্বেও আপনার উৎসাহ-উদ্দীপনা কমেনি। এটাই আসল কথা। গত পাঁচবছর ধরে যে-কাজটা করার জন্যে আপনি তৈরি হচ্ছিলেন সেটা এবারে আরম্ভ করবেন বলে স্থির করেছেন দেখে আমি খুশি। কিন্তু কীভাবে এটা করবেন বলে ঠিক করেছেন?'

প্রত্যয়ের হাসি হাসল পাভেল, 'সোজা সোজা দাগ-টানা ছক-কাটা একটা কার্ডবোর্ড স্টেনসিলের মতো জিনিশ কাল আমাকে এনে দেবে আমার বন্ধুরা। এতে

আমি লাইনগুলো ঘুলিয়ে না-ফেলেই লিখে যেতে পারব। এটা ছাড়া আমার পক্ষে লেখা সম্ভব নয়। অনেক ভাবার পরে আমার মাথায় এই ফন্দিটা আসে। বুঝতেই পারছেন—কার্ডবোর্ডের উপরে খাঁজ-কাটা শক্ত উঁচু ধার-বরাবর পেন্সিল ধরে রেখে যদি লিখে যাই, তাহলে সোজা লাইন ছেড়ে হাত সরে যাবার সম্ভাবনা নেই। অবশ্য কী লিখছি সেটা যদি চোখে দেখতে না-পাওয়া যায়, তাহলে লেখাটা খুবই কঠিন হয়ে দাঁড়ায়। কিন্তু সেটা একবারে অসম্ভব নয়। আমি চেষ্টা করে দেখেছি বলেই জানি। ব্যাপারটায় পটু হয়ে উঠতে অবশ্য আমার কিছুদিন সময় লেগেছে, কিন্তু এখন আমি আরও ধীরে ধীরে প্রত্যেকটা অক্ষর মনোযোগ দিয়ে লিখতে শিখে যাবার ফলে ফলটা দাঁড়িয়েছে বেশ সন্তোষজনক।’

এইভাবে পাভেল কাজ আরম্ভ করে দিল।

কতোভ্‌স্কি ঘোড়সওয়ার-ডিভিশনের বীর সৈনিকদের নিয়ে একটা উপন্যাস লেখার পরিকল্পনা করেছিল সে। উপন্যাসের নামটা আপনা থেকেই মাথায় এসে গিয়েছিল : ‘ঝড়ের সম্ভান।’

এই উপন্যাসটা লেখার লক্ষ্যে সে এখন তার সমস্ত জীবনটাকে একমুখী করে আনল। ধীরে ধীরে লাইনের পর লাইন লেখা হয়ে কাগজগুলো ভরে উঠতে লাগল। নিজের পারিপার্শ্বিক সম্বন্ধে অচেতন হয়ে গিয়ে, চিত্রকল্পনার জগতে সম্পূর্ণ ডুবে গিয়ে কাজ করে চলল সে এবং জীবনে এই প্রথম সে অনুভব করল সৃষ্টির যন্ত্রণা। বাস্তবজীবনে যেটা সুস্পষ্টভাবে প্রত্যক্ষগোচর, সেইসব উজ্জ্বল আর অবিস্মরণীয় দৃশ্যগুলি যখন লিখিত বর্ণনার মধ্যে দিয়ে প্রাণহীন আর নিশ্চল হয়ে দাঁড়ায়, তখন শিল্পীর মনে কী তীব্র গ্লানি জমে ওঠে, সেটা পাভেল এই প্রথম জানল।

রচনার পুরোটাই তাকে স্বরণ করে রাখতে হচ্ছে, হুবহু শব্দগুলো পর্যন্ত। সামান্যতম ব্যাঘাতেও তার সমস্ত চিন্তার সূত্র ছিঁড়েঝুঁড়ে যায়, কাজটা পিছিয়ে যায়। মা সভয়ে দেখল ছেলের এই অবস্থাটাকে।

মাঝে মাঝে স্বরণশক্তি খাটিয়ে পুরো পাতা ধরে ধরে, এমনকি গোটা একটা অধ্যায় পর্যন্ত আবৃত্তি করে যেতে হয় তাকে। আর এই ব্যাপারটা লক্ষ করে তার ছেলের মাথা খারাপ হয়ে যাচ্ছে বলে মনে হওয়ায় মারিয়া ইয়াকোভ্‌লেভনা রীতিমতো ভয় পেয়ে যায়। কাজের সময়ে পাভেলকে কিছু বলতে তার সাহস হয় না, কিন্তু মেঝেয় পড়ে-যাওয়া কাগজগুলো তুলে দেবার সময়ে সে ভীতসুরে বলে, ‘তুই যদি আর-কোনো কাজে হাত দিতিস, পাভলুশা, তাহলে আমি খুশি হতাম। এভাবে সমস্তক্ষণ লিখে চলাটা তোর পক্ষে মোটেই ভালো হতে পারে না...’

মায়ের ভয় দেখে উচ্চকিত হেসে ওঠে পাভেল। বৃদ্ধাকে ভরসা দিয়ে বলে, ভাবনার কিছু নেই, এখনও ‘হঁশের লাগাম কেটে বেরিয়ে’ যায়নি সে।

\*

\*

\*

উপন্যাসটির তিনটে অধ্যায় লেখা হয়ে গেল। ওদেসায় কতোভ্‌স্কি ডিভিশনের যোদ্ধাদের মধ্যে যারা পাভেলের পুরনো কমরেড, তাদের কাছে সে মতামত চেয়ে পাণ্ডুলিপিটা পাঠিয়ে দিল। কিছুদিনের মধ্যেই তারা তার রচনার প্রশংসা করে চিঠি

লিখল। কিন্তু পাণ্ডুলিপিটা তার কাছে ডাকে ফেরত আসার পথে হারিয়ে গেল। ব্যর্থ হয়ে গেল ছ-মাসের পরিশ্রম। সাংঘাতিক আঘাত পেল পাভেল। কোনো নকল না-রেখে একমাত্র কপিটা পাঠিয়ে দিয়েছিল বলে তীব্র অনুশোচনা হল তার।

ঘটনাটা জ্ঞানার পর লেদেনেভ তাকে খুব একচোট বকুনি দিল, 'এতটা অসাবধান তুমি হলে কী করে? কিন্তু যাক গে, যা আর ফিরে পাবার উপায় নেই, তা নিয়ে মাথা খুঁড়ে লাভ কী। আবার গোড়া থেকে শুরু করতেই হবে তোমায়।'

'কিন্তু, ইন্নকেন্তি পাভলভিচ, আমার ছ-মাসের পরিশ্রমের ফল হাতছাড়া হয়ে গেল যে! দৈনিক আটঘণ্টা করে কঠিন পরিশ্রমের ফল! হতভাগা পরগাছাগুলো যতসব।'

বকুকে সান্ত্বনা দেবার জন্য যথাসাধ্য চেষ্টা করল লেদেনেভ।

আবার গোড়া থেকে লেখা শুরু করা ছাড়া কোনো উপায় নেই। লেদেনেভ তাকে কাগজের যোগান দিল, পাণ্ডুলিপিটা টাইপ করিয়ে নেবার ব্যাপারে সাহায্য করল।

দেড় মাস বাদে প্রথম অধ্যায়টা নতুন করে লেখা শেষ হল।

করচাগিনরা যে-ফ্ল্যাটে থাকে, তারই আরেকটা ঘরে থাকে আলেক্সেয়েভ নামে একটি পরিবার। ওদের বড়ছেলে আলেক্সান্দর কমসমালের একটা জেলা কমিটির সম্পাদক। তার বোন গালিয়া—আঠারো বছর-বয়েসী প্রাণোচ্ছল মেয়েটি কারখানার ট্রেনিং স্কুলে পড়া শেষ করেছে। পাভেল মাকে বলল—গালিয়া তার 'সেক্রেটারি' হিসেবে কাজ করতে রাজি আছে কিনা সেটা যেন মা একবার তাকে জিজ্ঞেস করে দেখে।

সামগ্রহে রাজি হয়ে গেল গালিয়া। মিষ্টি হাসি-ভরা মুখে একদিন এল সে, পাভেল একটা উপন্যাস লিখছে শুনে তার ভারী আনন্দ। বলল, 'আপনাকে সাহায্য করার সুযোগ পেলে ভারী খুশি হব, কমরেড করচাগিন। ফ্ল্যাটে ফ্ল্যাটে পরিচ্ছন্নতা বজায় রাখা উচিত—সেই বিষয়ে বাবার হয়ে আমাকে রোজ ভোঁতা ভাষায় একঘেয়ে নির্দেশনামা লিখতে হয় রাশি-রাশি, তার চেয়ে এ-লেখা আমার ঢের বেশি ভালো লাগবে।'

সেদিন থেকে পাভেলের কাজ এগিয়ে চলল দ্বিগুণ গতিতে। সত্যিই একমাসের মধ্যে এতটা লেখা হয়ে গেল দেখে পাভেল বিস্মিত হল। তার এই কাজে গালিয়ার সোৎসাহ অংশগ্রহণ আর সহানুভূতি পাভেলের পক্ষে খুব বড়রকম সাহায্য হয়ে দাঁড়িয়েছে। দ্রুত পেন্সিল চালিয়ে যায় গালিয়া, আর যেসব জায়গা তার বিশেষভাবে ভালো লাগে, সেই জায়গাগুলো বারবার করে পড়ে পাভেলের এই সাহিত্যিক সফলতায় সে আন্তরিক আনন্দবোধ করে। গালিয়াই বলতে গেলে এই বাড়ির প্রায় একমাত্র বাসিন্দা যে পাভেলের এই কাজের সার্থকতায় বিশ্বাস করে; অন্যদের ধারণা যে শেষপর্যন্ত ও করে কিছু হবে না, পাভেল শুধু তার এই বাধ্যতামূলক নিক্রিয়তার অবসরটুকু কাটাবার জন্যই এই কাজে লেগেছে।

লেদেনেভ দিনকতকের জন্য একটা কাজে মক্কোর বাইরে গিয়েছিল, ফিরে এসে প্রথম কয়েকটা অধ্যায় পড়ে বলল, 'চালিয়ে যাও ভাই। তোমার সফলতা সন্দেহে আমার কোনো সন্দেহ নেই। ভবিষ্যতে তোমার বড় আনন্দের দিন আসছে, কমরেড পাভেল। আমার দৃঢ় বিশ্বাস, কর্মীদলের মধ্যে তোমার ফিরে যাবার স্বপ্নটা শিগগিরই বাস্তব হয়ে উঠবে। আশা ছেড়ো না, ভাই।'

পাভেল-যে এতটা উদ্যমে ভরপুর হয়ে উঠেছে, সেটা দেখে এই প্রবীণ মানুষটি গভীর একটা তৃপ্তির সঙ্গে সেদিনকার মতো বিদায় নিল।

গালিয়া নিয়মিত আসে। অবিস্মরণীয় অতীতের ঘটনাগুলিকে পুনরুজ্জীবিত করে তুলে তার পেন্সিল ছুটে চলে কাগজের বুকের উপর দিয়ে। মাঝে মাঝে, একসঙ্গে অনেকগুলো স্মৃতির ভিড়ে আচ্ছন্ন হয়ে গিয়ে পাভেল যখন আপন চিন্তায় ডুবে যায়, তখন গালিয়া লক্ষ করে তার চোখের পাতার কাঁপুনি, আর সে-চোখে তার মনের দ্রুত-চলমান চিন্তাগুলির প্রতিবিম্ব। তার এই চোখের স্বচ্ছ আর অগ্নান তারাদুটি এত প্রাণময় যে সেদিকে তাকিয়ে ওই চোখদুটি দৃষ্টিহীন বলে যেন বিশ্বাসই হতে চায় না।

সারাদিনের কাজের শেষে গালিয়া যা লিখেছে সেটা পড়ে শোনায় আর প্রখর একাগ্রতার সঙ্গে পাভেল তার ভুরু কুঁচকে শুনে যায়।

‘ভুরু কুঁচকাচ্ছেন কেন, কমরেড করচাগিনি? এই জায়গাটা তো বেশ ভালোই লেখা হয়েছে, নাকি?’

‘না, গালিয়া, খারাপ হয়েছে।’

যে-জায়গাগুলো অপছন্দ হয়, সেগুলো পাভেল নিজেকে আবার লেখে। ছক-কাটা কার্ডবোর্ডের সেই সরু ফাইলটা নিয়ে লিখতে গিয়ে অসুবিধার সৃষ্টি হয়, তখন মাঝে মাঝে অধৈর্য হয়ে ছুড়ে ফেলে দেয় সেটা। আর তারপরে, জীবন তার দৃষ্টিশক্তি কেড়ে নিয়েছে বলে প্রচণ্ড রাগে পেন্সিলটা ভেঙে ফেলে, ঠোট কামড়ে রক্ত বের করে ফেলে।

লেখার এই কাজটা যতই শেষ হয়ে আসছে, ততই তার সর্বদা-সজাগ ইচ্ছাশক্তির প্রহরা ডিঙিয়ে মনের অবরুদ্ধ আবেগগুলি বেশি-বেশি করে আত্মপ্রকাশ করছে। এই নিষিদ্ধ আবেগগুলি হচ্ছে বিষণ্ণতা আর ওই-ধরনের আরও কতকগুলি উষ্ণ আর কোমল সহজ মানবিক অনুভূতি—যে-অনুভূতি প্রকাশে পাভেল ছাড়া আর প্রত্যেকেরই অধিকার আছে। কিন্তু সে জানে—এই আবেগগুলির কোনো-একটাকেও যদি সে প্রশ্রয় দিয়ে ফেলে, তাহলে পরিণামটা হয়ে দাঁড়াবে মর্মান্তিক।

তাইয়া অনেক রাতে কারখানা থেকে বাড়ি ফিরে মারিয়া ইয়াকোভলেভনার সঙ্গে নিচুগলায় দু-চারটে কথা বলে নিয়েই রাতের মতো শুয়ে পড়ে।

\*

\*

\*

অবশেষে শেষ অধ্যায়টি লেখা হয়ে গেল। এর পরে কয়েকদিন ধরে গালিয়া পাভেলকে পুরো উপন্যাসটি পড়ে শোনাতে।

আগামীকাল এই পাণ্ডুলিপিটা লেনিনগ্রাদে প্রাদেশিক পার্টি কমিটির সাংস্কৃতিক বিভাগে পাঠিয়ে দেওয়া হবে। যদি সেখানে বইটা মনোনীত হয়, তাহলে এটাকে প্রকাশভবনে পাঠিয়ে দেওয়া হবে—আর, তারপরে...

কথাটা ভাবতেই তার হৃৎপিণ্ডটা উৎসেগে ধকধক করে উঠল। সবকিছু যদি ব্যবস্থামতো হয়ে যায়, তাহলে তার শুরু হবে নতুন জীবন—কয়েক বছরব্যাপী অবিশ্রান্ত আর উর্ধ্বশ্বাস পরিশ্রমের ফলে অর্জিত জীবন।



এই বইটির ভাগ্যের দ্বারাই পাভেলের নিজের ভাগ্য নির্ধারিত হবে। পাণ্ডুলিপিটা যদি অমনোনীত হয়, তাহলে ওইখানেই তার শেষ। আর, যদি রচনাটা জায়গায় জায়গায় খারাপ হয়ে থাকে, যদি আরও কিছুদিন খাটলে দোষত্রুটিগুলোকে শুধরে দেওয়া যায়, তাহলে সে সঙ্গে সঙ্গে ফের উঠেপড়ে লেগে যাবে।

তার মা পাণ্ডুলিপির ভারী পার্সেলটা নিয়ে গেল ডাকঘরে।

গুরু হল উদ্ভিগ্ন প্রতীক্ষার দিনগুলি। এর আগে পাভেল তার জীবনে আর-কোনোদিন একখানা চিঠি পাবার জন্য এমন যন্ত্রণাভরা উদ্বেগ নিয়ে অপেক্ষা করে থাকেনি। সকালে ডাক-বিলির সময় থেকে বিকেলে ডাক-বিলির সময় পর্যন্ত সারাদিন ছটফট করে সে। কিন্তু লেনিনগ্রাদ থেকে কোনো খবর আসে না।

প্রকাশকদের এই একটানা নীরবতা এতদিনে একটা অন্তত ইঙ্গিত বলে মনে হতে শুরু হয়েছে। আসন্ন সর্বনাশের পূর্বানুভূতি দিনে দিনে বেড়ে চলেছে। নিজের কাছে স্বীকার করল পাভেল যে যদি তার বইটা পুরোপুরি অমনোনীত হয়, তাহলে আর বাঁচবে না সে। এ আঘাত সে সহ্যে পারবে না। বেঁচে থাকার কোনো হেতুই আর থাকবে না।

এইরকম হতাশার মুহূর্তগুলিতে তার মনে পড়ে যায়—দক্ষিণ ক্রিমিয়ার সমুদ্রের ধারে পাহাড়ের বুকে সেই পার্কটার কথা, আর, বারবার সে ওই একই প্রশ্ন করে নিজেকে, 'লোহার এই ফাঁদটা কেটে বেরিয়ে আসার জন্যে, কর্মীদের মধ্যে ফিরে আসার জন্যে, জীবনটাকে কাজে লাগাবার জন্যে তোমার পক্ষে যতদূর চেষ্টা করা সম্ভব সেই সবই করেছে কি?'

এবার তাকে উত্তর দিতে হল, 'হ্যাঁ, আমার মনে হয়, সবরকম চেষ্টাই করে দেখেছি আমি!'

শেষপর্যন্ত, এই অপেক্ষা করে থাকার যন্ত্রণাটা যখন প্রায় অসহ্য হয়ে উঠেছে, তখন একদিন তার মা ছুটতে ছুটতে এসে ঘরে ঢুকল। ছেলের চেয়ে মা বড় কম উদ্বেগ ভোগ করেনি। ঘরে ঢুকেই চোঁচিয়ে বলে উঠল মা, 'লেনিনগ্রাদ থেকে খবর এসেছে!'

প্রাদেশিক কমিটির একটা টেলিগ্রাম। ফর্মটার উপরে লেখা সংক্ষিপ্ত একটা বার্তা : 'উপন্যাস সর্বান্তঃকরণে অনুমোদিত। প্রকাশের জন্য পাঠানো হয়েছে। বিজয়-সাক্ষ্যের জন্য অভিনন্দন।'

হৃথপিণ্ডের গতি বেড়ে গেল পাভেলের। তার এতদিনের স্বপ্ন সফল হয়েছে! লোহার ফাঁদটাকে চুরমার করে দেওয়া হয়েছে। এবারে একটা নতুন অস্ত্র-হাতে সে ফিরে এসেছে সংগ্রামী কর্মীদের মধ্যে আর জীবনের মাঝে।





চিরায়ত গ্রন্থমালা

এবং

চিরায়ত বাংলা গ্রন্থমালা

শীর্ষক দুটি সিরিজের আওতায়

বাংলাভাষাসহ পৃথিবীর বিভিন্ন দেশ

ও ভাষার শ্রেষ্ঠ রচনাসমূহকে

পাঠক সাধারণের কাছে সহজলভ্য করার লক্ষ্যে

বিশ্বসাহিত্য কেন্দ্র

একটি উদ্যোগ গ্রহণ করেছে।

এই বইটি ‘চিরায়ত গ্রন্থমালা’র

অন্তর্ভুক্ত।

বইটি আপনার জীবনকে দীপান্বিত করুক।



বিশ্বসাহিত্য কেন্দ্র